


Chyoiyúng
chyumlaiká:
dangshikaq asik; Zaiwa



New Testament in Zaiwa

Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 25 Nov 2022 from source files dated 29 Jan 2022
23f9fc55-a8a4-59ef-9513-707ec336b0ee

Contents

Mahte	1
Markuq	60
Lukaq	97
Yohan	161
Lagyo	209
Romaq	266
1 Korinhtuq	293
2 Korinhtuq	319
Galatiq	336
Ehpesu	345
Hpilipi	354
Kolose	360
1 Htesaloni	366
2 Htesaloni	372
1 Timohti	375
2 Timohti	382
Tituq	387
Hpilemon	390
Hebre	392
Yakuq	412
1 Petruq	419
2 Petruq	427
1 Yohan	432
2 Yohan	439
3 Yohan	440
Yude	441
Shing-rán	443

MAHTE é Gabú Danglù Laiká (The Gospel of Matthew)

*Yesuq É Byùxik Shap Kyô É Hkyô
Luk 3:23-38*

¹ Abraham é awut ashín, Dawiq é yhangzo yhangshu,* Yesuq Hkrisduq é byùxik labaù gi, a-ô mã é eq rajung za nghut lhê.

² Abraham gi, Isak lé hkû;

Isak gi, Yakup lé hkû;

Yakup gi, Yudaq eq yhanggu yhangmâng pé lé hku é nghut lhê;

³ Yudaq gi, Hparet eq Zera lé hkû, haú nhik é yhângnu gi, Tamar nghut ri.

Hparet gi, Hesrun lé hkû;

Hesrun gi, Ram lé hkû;

⁴ Ram gi, Aminada lé hkû;

Aminada gi, Nashon lé hkû;

Nashon gi, Salamun lé hkû;

⁵ Salamun gi, Buaq lé hkû;

Buaq é yhângnu gi, Rahap nghut ri.

Buaq gi, Obet lé hkû;

Obet é yhângnu gi, Ruhtaq nghut ri.

Obet gi, Yese lé hkû;

⁶ Yese gi, Hkohkâm Dawiq lé hkû;

Dawiq gi, Sholumon lé hkû; Sholumon é yhângnu gi, Uriaq yhangmyi dut wú sù nghut ri.

⁷ Sholumon gi, Rehoboam lé hkû;

Rehoboam gi, Abiyaq lé hkû;

Abiyaq gi, Asa lé hkû;

⁸ Asa gi, Yehoshaphat lé hkû;

Yehoshaphat gi, Yoram lé hkû;

Yoram gi, Uzi-aq lé hkû;

⁹ Uzi-aq gi, Yohtam lé hkû;

Yohtam gi, Ahaza lé hkû;

Ahaza gi, Hezekiaq lé hkû;

¹⁰ Hezekiaq gi, Manase lé hkû;

Manase gi, Amon lé hkû;

Amon gi, Yosiaq lé hkû;

¹¹ Yosiaq gi, Babelon má shúm dut huí é hkûn, Yehkoniah eq yhanggu yhangmâng pé lé hku é nghut ri.

¹² Babelon má shúm dut huí é htâng má,

Yehkoniah gi, Shalahtila lé hkû;

Shalahtila gi, Zerubabelaq lé hkû;

¹³ Zerubabelaq gi, Abiut lé hkû;

Abiut gi, Eliakim lé hkû;

Eliakim gi, Azor lé hkû;

¹⁴ Azor gi, Zaduk lé hkû;

Zaduk gi, Ahkim lé hkû;

Ahkim gi, Eliut lé hkû;

¹⁵ Eliut gi, Eliaza lé hkû;

Eliaza gi, Mahtan lé hkû;

Mahtan gi, Yakup lé hkû;

¹⁶ Yakup gi, Mariq é yhanglâng Yosep lé hku é nghut ri;

Mariq gi, Hkrisduq gâ é Yesuq lé hku é sù nghut ri.

¹⁷ Haú mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq† é pyat jé shoq gi, byùxik raxe myi xik nghut ri.

Yesuq Hku Lé Lo É Hkyô

Luk 2:1-7

¹⁸ Yesuq Hkrisduq hku lé lo é hkyô gi, a-ô mã é eq rajung za nghut ri: Yesuq é yhângnu Mariq gi, Yosep eq dúng tô é sù nghut ri; nghut kôlhang, yhangnhik a zùm shi má, yhang gi, Chyoiyúng Woinyí mai zogúng dut bê nghut ri.

¹⁹ Yhâng é yhumsing hpó Yosep gi, dingmán sù nghut lui, yhang lé byu pê hí má hoq a kâm lhoq hpu nau é

* **1:1** Awut ashín eq yhangzo yhangshu gâ é lé, Chyúmdang ra-am má, "yhangzo" ga le bo tô lhê.

† **1:17** Grik dong Hkrisduq gâ é gi, xù but hui Sù gâ é lichyúm nghut mù, Hebre dong Mesaia gâ é eq rajung za nghut lhê.

yanmai, tsik za lhoq kâng pyám rã dâ ri.

²⁰ Nghut kôlhâng, yhang haû su myit nyi é hkûn, yhupmoq má, haû Yhumsing é maumang lagyo gi, yhang lé, lé htoq shit luí, "Dawiq é yhangzo yhangshu Yosep é, haû náng é yhumsing myhí Mariq lé hâng yù rã hkyô lé, hkâ-myit chiq; haí mù gâ le, yhang wun tô é zoshâng gùng gi, Chyoiyúng Woinyí dông lo é nghut lhê. ²¹ Yhang gi, yuqzo rayuq hkû rã nghut luí, nãng gi, zoshâng haû lé, Yesuq nghû myìng myhíng byi ra rã nghut lhê; hkâsu mù gâ le, Yhang gi, Yhâng é byu pé lé, yhangmoq é yubak mara mai hkyi yù rã sù nghut lhê." ga taí ri.

²² Shí hkyô banshoq gi, Garai Gasâng eq, haû myiqhtoi dông taí é dang lé lhoq dik é nghut ri.

²³ Myiqhtoi dang haû gi, "Haû zomyi gyíng gi, zogûng dut luí, yuqzo rayuq hkû rã nghut lhê; Yhâng é myìng lé gi, Emanuelaq ga kó rã nghut lhê."* gâ ri. Hau é lichyúm gi, "Garai Gasang gi, nganhúng eq rahá nghut nyi lhê." gâ é nghut lhê.

²⁴ Yosep gi, yhup bûn lo é hkûn, haû Yhumsing é maumang lagyo taí é eq rajung za, Mariq lé, yhangmyi dông yhûm má shuí yù bê nghut ri. ²⁵ Nghut kôlhâng, yhang gi, yuqzo haû hku é hkûn jé shoq, Mariq eq gungsho a zùm nghut ri. Yuqzo haû lé, yhang gi, Yesuq ga myhíng byí ri.

2

Buihtoq Hkyam Mã É Hpaqchyí Bò Bang

¹ Herut hkohkâm up nyi é u lé, Yuda mau mã é Betlehem wà má Yesuq lé hku é nghut ri. Hau htâng, buihtoq hkyam mã é hpaqchyí bò bang gi, Yerusalem wà mó má jé

lé kômù, ² "Haû hku lé lô bê Yudaq byu pé é Hkohkâm gi, hkâmá nghut lhê lú? Yhâng é kyí lé, buihtoq hkyam mã ngamoq myàng luí, Yhang lé noq rã matú jé lé é nghut lhê." ga luí, myí akô nghut ri.

³ Herut hkohkâm gi, haû hkyô lé wó gyo jáng myit myô nyi ri; hau htoq agó, Yerusalem wà mó mã é lhunglhâng bang le, myit myô bum akô nghut ri. ⁴ Haû mù luí, yhang gi, byu pé é hkyangjong agyi pé eq tará sará pé banshoq lé, jì tsíng yù mù, haû Hkrisduq hkâmá hku lé lô rã nghut é hkyô lé myí ri. ⁵ Haû hkûn, yhangmoq gi, "Yuda mau Betlehem wà mã nghut lhê. Hkâsu mù gâ le, shí hkyô eq séng luí, haû myiqhtoi kâ tô é má,

⁶ "Yudaq mau mã é Betlehem wà é, nãng gi, Yudaq mau mã é wà pé má, je tiq sù a nghut;

hkâsu mù gâ le, ngá é Israelaq byu pé lé upzúng rã Zau gi, nãng chyáng mai htoq lô rã nghut lhê.*

ga bo tô ri." ga tû taí akô.

⁷ Hau htâng, Herut gi, haû hpaqchyí bò bang lé haq jì yù mù, kyí lé htoq shit é ahkyíng lé, yhangmoq chyáng mai hkyak wó myí sê yù bê nghut ri. ⁸ Haû mù, yhang gi, "Nungmoq, zoshâng haû lé rago é ho wú keq. Ngò le, Yhang lé é wó noq rã matú, Yhang lé é myàng eq yhang, ngo lé lo shit kyo keq." ga taí luí, haû bang lé Betlehem wà shut nhang kat bê nghut ri.

⁹ Yhangmoq gi, haû hkohkam é dang lé gyô yu é htâng má, htoq e ló bekô nghut ri. Haû buihtoq hkyam mã yhangmoq myang é kyí gi, haû zonú nyi é ahtoq ang ang mã ló nô é jé shoq, yhangmoq é hí má e ló byí ri. ¹⁰ Yhangmoq gi, kyí haû lé myàng jáng, gyai yhang gabú bum akô nghut ri. ¹¹ Yhangmoq gi, haû yhûm má wang e ló kô é hkûn, zonú

eq yhangnu Mariq lé myàng kômù, hkyihput htug luí, haù zonù lé no-
qkuq akò; hau htàng, yhangmoq
é sutdek pé lé le hpóng luí, hính,
namngón jung loban eq mura* pé
lé yù mù, Yhang lé chynghuq byí
akò nghut ri. ¹² Yhangmoq gi,
Herut chyáng a dum taù ló râ matú,
yhupmoq má, yhangmoq lé sidiq
byí é hui kômù, hkyô gó hkat đông
yhangmoq é mau shut taù ló bekò
nghut ri.

*Egutuq Mìng Shut Hfang E É
Hkyô*

¹³ Yhangmoq ló byuq é htàng má,
haù Yhumsing é maumang lagyo
rayuq gi, Yosep lé yhupmoq má
htoq shit mù, "Toq aq! Haù zoshàng
eq yhangnu lé, Egutuq mìng shut
shuì hfang ê aq. Ngò, nang lé dum
ji yu é ahkyíng jé shoq, haù má nyi
nyi keq. Haì mù gâ le, Herut gi,
zoshàng haù lé sat râ matú, ho nyi
bê nghut ri." ga taì ri.

¹⁴ Haù mù, yhang gi, toq luí, myín
lé yhang, zôshàng me lé shuì chùng
mù, Egutuq mìng shut e ló bê nghut
ri. ¹⁵ Yhangmoq gi, Herut shi é jé
shoq, haù má nyi nyi akò. Haù gi,
"Ngá zo lé, ngò, Egutuq mìng mai
wut htoq yù bê nghut lhê."[☆] ga, haù
Yhumsing eq myiqhtoi đông taì é
dang lé lhoq dik é ru nghut lhê.

¹⁶ Herut gi, yhang lé, hpaqchyí bò
bàng eq mhaù pyâm tô é lé sé jáng,
nhikmo-yo bê nghut ri; haù mù,
yhang gi, haù hpaqchyí bò bàng
chyáng mai wó sê yu é ahkyíng lé
sôn wù mù, Betlehem wà eq hau é
awui ayàm mâ é wà pé má nyi é, í
zân mai a-ô mâ é yuqzo pé banshoq
lé, sat pyám nhang ri. ¹⁷ Haù gi,
"Ramaq gâ é jowò má, yón kuq é eq
ngau garú é htê lé wó gyô ri;
Rahkelaq gi, yhang zô pé a nyi
byuq lo kô é yanmai, ngau

nyi é eq nhik a wó tìng dut
ri."[☆]
ga luí, ¹⁸ myiqhtoi Yerehiaq đông
taì tô é dang lé lhoq dik é nghut ri.

*Nazaret Wà Má Dum Taù Lo É
Hkyô*

¹⁹ Herut shi byuq é htàng, Egutuq
mìng má, haù Yhumsing é mau-
mang lagyo gi, Yosep chyáng yhap-
moq đông lé htoq shit mù, ²⁰ "Toq
aq, haù zôshàng me lé shuì chùng
mù, Israelaq mìng má taù ló aq;
hkâsu mù gâ le, haù zoshàng lé sat
naù bang shi byuq bekò nghut ri."
ga taì ri.

²¹ Haù mù, Yosep gi, zôshàng me
lé shuì chùng mù, Israelaq mìng
shut taù ló bê nghut ri. ²² Nghut
kôhang, yhang gi, Yuda mau má,
Arhkela-uq, yhangwa Herut é hkó
má xoq up nyi é hkyô lé wó gyo
jáng, haù má a wâm ló lo nghut
ri. Yhupmoq má sidiq byí é hui é
eq rajung za, yhang gi, Galile mau
shut e ló mù, ²³ Nazaret gâ é wà
má ló nyi nyi bê nghut ri. Haù
mù, "Yhang lé, Nazaret wà byù ga
râ nghut lhê." ga luí, haù myiqhtoi
pé đông taì tô é dang lé lhoq dik é
nghut ri.

3

*Wui-myhup Sará Yohan Shui
Hen É Hkyô*

*Mrk 1:1-8; Luk 3:1-18; Yhn 1:19-
28*

¹ Haù yoq má, Wui-myhup Sará
Yohan htoq lô mù, Yuda mau mâ é
yoso má hko kyô é gi, ² "Myit lình
keq; hkâsu mù gâ le, mauhkúng
mìngdán gi, chyàng lò bê* nghut ri."
gâ ri. ³ Haù yuq gi,
"Haù yoso má, byù rayuq garú taì é
htê gi,
'Haù Yhumsing é matú, hkyô hen
to keq; Yhàng é matú, hkyô
lhoq nyhang to keq.' gâ ri."[☆]

* 2:11 Mura gi, chi wó kut jung xù nghut lhê.
Mauhkúng mìngdán gi, chyàng lò bê gâ é lichyúm gi,
lê. ☆ 3:3 Esai 40:3

☆ 2:15 Hos 11:1 ☆ 2:17 Yer 31:15 * 3:2

gi, Garai up râ ahkyíng chyàng lò bê gâ é nghut
lhê.

ga myiqhtoi Esai-aq taí tô é sú yuq nghut ri.

⁴Yohan gi, gola-uq shomaú èq saí é mebu wut mù, yhâng é hpyidum má gi, shokuq hpyihit hit ri. Yhâng é zoshuq gi, dinggám eq yosô byo-î pé nghut ri. ⁵Yerusalem wà mó má é bang, Yuda mau ban-shoq má é bang eq Yodan làng awui ayàm lhunglhang má é bang gi, yhâng chyáng htoq e bum akô. ⁶Yhangmoq gi, yhumsing é mara lé yín yû kôluí, yhâng chyáng mai Yodan làng má wui-myhup hkâm yu bum akô nghut ri.

⁷Nghut kôlhang, yhang gi, yhang wui-myhup hkâm byí é jang má, Hparishe pé eq Saduke pé myo myo lé lo nyí kô é lé myàng jáng, yhangmoq lé taí é gi, "Duq htân lhangmuí amyú pé ê, jé lô râ yubak dam mai wó h pang lut kó sháng gaq ga, nungmoq lé ó yuq taí pún é lhu? ⁸Myit lhing hkyô eq gingdán é ashi pé zui keq. ⁹'Ngamoq gi, Abraham é yhangzo yhangshú pé nghut lhé.' nghú luí, yhumsing é i-myit unghkaú má hkâlum to kó. Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhé. ¹⁰Ahkuí lhang, Garai Gasang gi, Yhâng é wazung lé haú siggám wang pé má tô to bê nghut ri; haú mù, ge é ashi a zuí é agàm hkanmó lé gi, htuq lhêng pyám mù, myi má dú kat pyám râ nghut lhé.

¹¹Ngò gi, nungmoq myit lhing kó sháng gaq nghú, wui èq za wui-myhup hkâm byí lhé. Nghut kôlhang, ngá htoq má wum-o a-tsam jé bo é sú rayuq, ngá htàng má jé lé lô shirâ nghut luí, ngò gi, Yhâng é hkyí-tsung chùng byi râ lhang a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byi râ nghut lhé. ¹²Yhang gi, loq má byò chung to mù, guq chyârâng má é guq bùm lé

hik sân pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí èq nyhê hkyô pyám râ nghut lhé." ga ri.

Yesuq, Wui-myhup Hkâm Yu É Hkyô

Mrk 1:9-11; Luk 3:21-22

¹³Haú hkùn, Yesuq gi, Yohan chyáng wui-myhup hkâm yù râ ga, Galile mau mai Yodan làng má jé lé lo ri. ¹⁴Nghut kôlhang, Yohan gi, "Ngò sheq Náng chyáng wui-myhup hkâm yù râ sú ru nghut lhé nhing! Nàng sheq ngá chyáng lé lo lhé lhu?" ga luí, lhom taí hkùm ri.

¹⁵Haú hkùn, Yesuq gi, "Dingmán hkyô banshoq lé, nga-nhúng lhoq dik râ é yanmai, Ngo lé wui-myhup hkâm byi laq." ga tú taí ri. Haú mù, Yohan le, gyo byi bê nghut ri.

¹⁶Yesuq gi, wui-myhup hkâm yù eq yhang, wui mai htoq lo ri. Haú hkùn, mauhkúng bóng lô mù, Garai Gasang é Woi-nyí gi, hpúngkyui gunghkyâng sú é đông mai, Yhâng ahtoq má lé gyó nô tô é lé, Yhang myang kat ri. ¹⁷Haú hkùn, "Shí yuq gi, Ngò chyitdap é Ngá zo nghut lhé; Yhâng é ahtoq má Ngò gabú myit ngón nyi lhé." ga mauhkúng mai danghtë htoq lo ri.

4

Yesuq, Gúnglaú Huí É Hkyô

Mrk 1:12-13; Luk 4:1-13

¹Hau htàng má, Chyoiyúng Woi-nyí gi, Yesuq lé, nat Tsadán eq gunglaú é huí nhâng râ matú, yoso shut shuí ê ri. ²Yesuq gi, zoshuq gám é myí xê nyí myí xê myìn jé jáng, zòmut hui bê nghut ri. ³Haú hkùn, gunglaú sú gi, Yhâng chyáng lé mù, "Nàng, Garai Gasang é Yhangzo nghut le gi, luqgok shí pé lé muk dut nhâng aq." ga taí ri.

⁴Haú jáng, Yesuq gi, "Byù gi, muk èq za asak duí râ a nghut; Garai

Gasâng é nhut mai htoq lo é mung-dang hkangmó eq sheq asak duì rá nghut lhê.^{1*} ga luí, Chyúmdang má kâ tô ri." ga yhang lé tú taí ri.

⁵ Haú hkûn, nat Tsadán gi, Yesuq lé, chyoiyúng myuq* má shuí ê mù, noqkuq yhum je myhang é shúhtâng htoq má yap nhang to luí,
⁶ "Nàng, Garai Gasâng é Yhangzo nghut le gi, byam gyó kat wú aq. Hkâsu mù gâ le,

'Náng é matú, Garai Gasang gi, Yhâng é maumang lagyô pé lé taí to rá nghut mù, luqgok má Náng é hkyí a ló htung shoq,

yhangmoq é loq eq Nang lé lhom bún yú kó rá nghut lhê.^{1*} ga luí, Chyúmdang má kâ tô ri." ga taí ri.

⁷ Nghut kôlhâng, Yesuq gi, "Haú Yhumsîng, nungmoq é Garai Gasang lé, wó chyam wú rá a nghut.^{1*} ga luí le, Chyúmdang má kâ tô ri." ga, yhang lé tú taí ri.

⁸ Nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq eq haú pé é hkikhkâm hkyô lé tûn shit ri. ⁹ Hau htâng, yhang gi, "Nàng hkyihput htuoq mù, ngo lé noq é nghut jáng, shí pé banshoq, Nang lé ngò byi rá." ga, Yesuq lé taí ri.

¹⁰ Haú hkûn, Yesuq gi, "Tsadán nàng, ló byuq aq! Hkâsu mù gâ le, 'Haú Yhumsîng náng é Garai Gasang lé za, nàng noqkuq dojaú ra rá nghut lhê.^{1*} ga luí, Chyúmdang má kâ tô ri." ga, yhang lé taí ri.

¹¹ Haú mù, nat Tsadán gi, ló byuq bê nghut luí, maumang lagyô pé gi, Yesuq lé, lé dojaú nyi akô nghut ri.

Yesuq Mungdang Hko Hi Ló É Hkyô

Mrk 1:14-15; Luk 4:14-15

* 4:4 Tarâ Pun 8:3 * 4:5 chyoiyúng myuq gi, Yerusalem lé gâ lhê. * 4:6 Hkyá-on 91:11-12
* 4:7 Tarâ Pun 6:16 * 4:10 Tarâ Pun 6:13 * 4:16 Esai 9:1-2

¹² Yesuq gi, Wui-myhup Sará Yohan htóng gyó é hkyô lé wó gyo jáng, Galile mau shut dum taú ló bê nghut ri. ¹³ Yhang gi, Nazaret wà mai htoq ló mù, Zebulun eq Nahtali mau má é nhông yàm má joq é Kaperna-um wà má ló nyi nyi ri. ¹⁴ Haú gi, myiqhtoi Esai-aq laiká má,

¹⁵ "Zebulun mau eq Nahtali mau, wuimau má é hkyô, Yodan làng yàm, tûngbau pé nyi é Galile mau é,

¹⁶ mauchut hkaú má nyi nyi é bang, maubó mó lé myàng bê nghut ri;

shí wup hkaú má nyi to bâng é matú, maubó lô bê nghut ri."^{1*}

ga kâ tô é dang lé lhoq dik rá matú nghut ri.

¹⁷ Haú hkûn mai, Yesuq gi, "Myit lhîng keq! Mauhkûng mingdán gi, chyâng lô bê nghut ri." ga, mung-dang hko hi e ló bê nghut ri.

Yesuq É Chángzo Hí Dut Bang

¹⁸ Yesuq gi, Galile nhông yàm má hkyô sô wún é hkûn, Petruq gâ é Simun eq yhanggu Andre nhiktâng lé myang ri. Yhangnhik tâng gi, ngozo kóng zo su nhik nghut mù luí, nhông má gùn dú nyi akô nghut ri. ¹⁹ Haú mù, Yhang gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng rá nghut lhê." ga taí ri. ²⁰ Haú hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

²¹ Yesuq gi, jowò haú mai xoq sô e ló le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhângwa Zebedi eq rahá, lhaí hkaú má gùn hpo nyi akô. Yhangnhik lé, Yesuq wut kat jáng, ²² yhangnhik gi,

radá dâm, yhangnhik é yhângwa eq
lhaí haú lé, tô pyâm to kôluí Yesuq
htâng châng bekô nghut ri.

*Nò Bang Lé, Yesuq Lhoq Gê Byí É
Hkyô*

Luk 6:17-19

²³ Yesuq gi, Galile mau ramau
gón má htoq é mù, tarajong pé má,
mhoqshit luí, mauhkúng mingdán
eq sêng é gabú danglù lé, hko
kyo uchyang, byu pè chyáng má
é nòhpyo ajung jung hui bang eq
noli nojàng amyú myú dap bang
lé, lhoq gê byí wún ri. ²⁴ Yesuq
eq sêng é hkyô ludang gi, Suriq
ramau gón má byo myín ló mù,
byu pé gi, awáng nòhpyo ajung jung
huí é bang, hkê-nhò jamjaú nyi é
bang, nat gang wang júng é bang,
mhúngtuq tuq é bang, gùngjum shi
é bang lé, shuí lé lô kôluí, Yhang gi,
haú bang lé lhoq gê byí ri. ²⁵ Galile
mau, Dekapoli,† Yerusalem, Yuda
mau eq, Yodan làng tû tap má é byu
moq mó gi, Yesuq htâng châng bum
akô nghut ri.

5

Hkungsô Wó É Tarâ

Luk 6:20-23

¹ Yesuq gi, byu moq mó lé myàng
jáng, bùm má doq ló luí, ló zung tô
ri. Haú hkún, Yhâng é chângzô pé gi,
Yhâng chyáng lé lô kôjáng, ² Yhang
nhut hkum hpóng luí, yhangmoq lé
mhoqshit é gi:

³ "Woi-nyí má, asho awui dut é
bang gi, hkungsô wó nyi ri;
hkâsu mù gà le, mauhkúng
mingdán gi, yhangmoq é
mingdán nghut nyi ri.

⁴ Myit iyon huí é bang gi, hkungsô
wó nyi ri; hkâsu mù gà le,
yhangmoq gi, nhik lhoq tîng
é hui kó râ nghut lhê.

⁵ I-myit nú-nhâm é bang gi,
hkungsô wó nyi ri; hkâsu mù

gà le, yhangmoq gi, mingkan
lé wó sîng kó râ nghut lhê.

⁶ Dingmán hkyô lé mut shit nyi é
bang gi, hkungsô wó nyi ri;
hkâsu mù gà le, yhangmoq
gi, nhik dik shoq myàng zo
kó râ nghut lhê.

⁷ Shogyo nhikmyin myit bo é bang
gi, hkungsô wó nyi ri; hkâsu
mù gà le, yhangmoq gi,
shogyo nhikmyin yu é hui
kó râ nghut lhê.

⁸ Myit sansêng é bang gi, hkungsô
wó nyi ri; hkâsu mù gà le,
yhangmoq gi, Garai Gasang
lé myàng kó râ nghut lhê.

⁹ Nguingón hkyô sô xoq byí é bang
gi, hkungsô wó nyi ri; hkâsu
mù gà le, yhangmoq gi,
Garai Gasang é yhangzô pé
gà é hui kó râ nghut lhê.

¹⁰ Dingmán hkyo é yanmai zing-
ri huí é bang gi, hkungsô
wó nyi ri; hkâsu mù gà
le, mauhkúng mingdán gi,
yhangmoq é nghut nyi ri.

¹¹ Ngá é yanmai, byu pè èq, nung-
moq lé rhoi é, zing-rí é, a teng a
mán é đông agè ashop é dang amyú
myú tá tso kô é hkún, nungmoq
hkungsô wó nyi ri. ¹² Nguingón
gabú nyí keq, hkâsu mù gà le, nung-
moq é matú kô é chyunghuq gi,
mauhkúng mingdán má joq tô ri.
Nungmoq é hí lhê é myiqhtoí pé lé
le, yhangmoq gi, haú đông zing-rí
laí lo wú bekô nghut ri.

Xo Eq Maubó

Mrk 9:50; Luk 14:34-35

¹³ Nungmoq gi, myidàm htoq má
é xo nghut nyi lhê. Nghut kôlháng,
xo gi, màn kân byuq jáng, haú lé hai
èq dum wó lhoq ngam yù rà lúh?
Shinggan shut dú pyám mù, byu pè
èq nâng pyeq pyâm é mai lai luí, hai
akyú le bò rá a nghut lo.

¹⁴ Nungmoq gi, mingkân é
maubó nghut akô; bùm htoq má

† 4:25 Dekapoli gà é gi, Grik đông myuq raxê lé gà lhê.

é myuq lé gi, wó nghop to râ a nghut. ¹⁵ Myibung lé tap mù, mũng eq nghop tô é ó a kut wú kó; haù su kut râ malaì, yhúmhaù má lúng tô é bang yuq hkangmó myoq wó myâng râ matú, tsungjang má kúm tsung to râ nghut lhê. ¹⁶ Haù eq rajung za, byu pé gi, nungmoq é ge é muzó pé lé byu-myâng luì, mauhkung htoq mâ é nungmoq é İwa lé hkya-on kó sháng gaq, nungmoq é maubó lé yhangmoq é hí má duq nhang to keq.

Tarâ Lhoq Dik É Hkyô

¹⁷ Ngò gi, myiqhtoì pé é dang eq jep é tarâ lé lhoq hpyoq pyám râ matú, jé lé é nghut nhò hkàngâm kó; haù pé lé lhoq dik râ matú sheq jé lé é ru nghut lhê. ¹⁸ Ngò, nungmoq lé teng za taì kôlé, mauhkung eq myigùng byuq byuq le lhang, haù pé a ban lhoq dik dik gi, jep é tarâ mâ é tiq dik é dangji eq myihkyet zo ralhüm lhang byuq byuq râ a nghut. ¹⁹ Jep é tarâ shí pé mâ é tiq dik é dang rahkun lé lu lai luì, góbang lé le, haù su kut râ matú mhoq byì é sù ó yuq nghut kôle, mauhkung mingdán má tiq dik sù gâ é hui râ nghut lhê; nghut kôlhang, jep é tarâ shí pé lé châng kut luì, mhoq byi sù kúm gi, mauhkung mingdán má, hkik sù gâ é hui râ nghut lhê. ²⁰ Ngò, nungmoq lé taì kôlé, nungmoq dingmán é hkyô má, haù Hparishe pé eq tarâ sará pé dingmán é htoq je a gyaù le gi, mauhkung mingdán má, nungmoq wó wâng kó râ a nghut.

Byù Hkâsat

²¹ 'Byù hkâsat, sat é sù gi, jéyáng é hui râ nghut lhê' ga, hí hpyang lhê é bang lé taì tô é dang, nungmoq wó gyô wú bê nghut lhê. ²² Nghut kôlhang, Ngò, nungmoq lé taì kôlé, gumang rayuq yuq lé nhikjum yó é sù gi, jéyáng é hui râ nghut lhê.

Hau htoq agó, gumang hpó lé, 'Byù gang'* ga taì é sù gi, Yudaq byìn tú wapdoq má jéyáng é hui râ nghut lhê; 'Byù bam ê' ga wut é sù gi, ngaraì myi eq gingdán nyi ri.

²³ Haù mù, hkungga gyap má, náng hkungga nhông râ dâ é hkùn, náng é gumang rayuq yuq, nang lé mara hun é hkyô rajung jung joq é lé, myit bün kat é nghut jáng, ²⁴ náng é hkungga lé, haù hkungga gyap hí má tô pyám to mù, náng é gumang hpó haù yuq eq hí ngu-ingón hkyô ló yù luì sheq, hkungga lé nhông byi aq.

²⁵ Nang lé yui tsuq sù gi, nang lé tarâ rùng má dé e ló é hkùn, hkyô má ru nghut nyi ashü lú, yhang eq nguingón hkyô hí hân yù aq. Haù a nghut jáng, haù yuq gi, nang lé, tarâ agyi chyáng é ap pyám mù, haù tarâ agyi gi, nang lé htóng hkyô pyám râ matú, htóng suwún hpô é loq má ap pyám râ nghut lhê. ²⁶ Ngò, nang lé teng za taì lé, yuichyìn haù a ban xap xap gi, htóng haù mai náng wó htoq ló râ a nghut.

Su-myi Sulàng Lú É Hkyô Eq Séng Luì Mhoqshit É Dang

²⁷ 'Su-myi sulàng hkâlú'†* gâ é dang lé, nungmoq wó gyo wú bê nghut lhê. ²⁸ Nghut kôle, Ngò, nungmoq lé taì kôlé, myiwe rayuq lé shut nau é myit eq wú é sù gi, yhâng é myit hkaù má, myiwe haù yuq eq su-myi sulàng lú hkyô kut é sù nghut bê. ²⁹ Haù mù, náng é loqyo myoq eq, nang lé mara kut shut nhang é nghut le gi, haù lé lap choq yù mù, dú pyám aq. Hkâsu mù gâ le, náng é ragùngdu gón ngaraì ming gyó râ htoq má, náng é gungsho rajung jung za htên byuq é nghut le gi, náng é matú je ge ri. ³⁰ Haù eq rajung za, náng é loqyo loq eq, nang lé mara kut shut nhang é nghut le gi, haù lé hpyit yù mù, dú pyám aq.

* 5:21 Htoq Ló 20:13 * 5:22 Byù gang gâ é lé, Grik đông "Raka" gâ lhê. * 5:27 Htoq Ló 20:14

Hkâsu mù gâ le, náng é ragùndu gón ngaraí ming gyó râ htoq má, náng é gungsho rajung jung za htên byuq é nghut le gi, náng é matú je ge ri.

Myi Làng Gâng É Hkyô Eq Séng Luí Mhoqshít É Hkyô

Mht 19:9; Mrk 10:11-12; Luk 16:18

³¹ 'Yhumsing é yhangmyi lé kâng é sù gi, lhoq kang laiká byi râ dut lhê.'[☆] gâ é dang joq lhê. ³² Nghut kôlhang, Ngò, nungmoq lé tái kôlé, myiwe đông mai làng shut é a nghut é za, yhumsing é yhangmyi lé kâng é sù gi, myiwe haú lé sulàng lú sù dut nhâng bê nghut ri; hau htoq agó, yhumsing yhanglàng eq gang bê myiwe lé hâng yu é sù le, su-myi lú é sù dut bê nghut ri.

Danggidiq

³³ Hau htoq agó, 'Danggidiq a zùng hkâmú; Yhumsing lé byi tô é danggidiq eq rajung za cháng aq.' ga luí, hí hpyang lhê é bang lé, tái tô é dang lé nungmoq wó gyô wú bê nghut lhê. ³⁴ Nghut kôlhang, Ngò, nungmoq lé tái kôlé, hai eq le hkâdakâm kó: mauhkung lé lang luí le, hkâdakâm kó; hkâsu mù gâ le, haú gi, Garaí Gasâng é zùng tanghkuq nghut lhê; ³⁵ myigùng lé lang luí le, hkâdakâm kó; hkâsu mù gâ le, haú gi, Garaí é hkyí nang jang nghut lhê; Yerusalem lé lang luí le, hkâdakâm kó; hkâsu mù gâ le, haú gi, Hkohkâm mó é myuq nghut lhê. ³⁶ Hau htoq agó, yhumsing é ulhùm eq le, hkâdakâm kó; hkâsu mù gâ le, xâm rahkat lé lhang hpyú shoq noq shoq, nàng wó kut é a nghut. ³⁷ Náng é dang lé, 'nghut lhê' lé gi, 'nghut lhê' nghû, 'a nghut é' lé gi, 'a nghut' nghû, tái aq; haú mai lai é gi, haú agè ashop su chyáng mâ é nghut ri.

Lató Hpuq É Hkyô

Luk 6:29-30

³⁸ 'Myoqjí matú myoqjí xap, zui matú zui xap'[☆] gâ é dang lé, nungmoq wó gyô wú bê nghut lhê. ³⁹ Nghut kôlhang, Ngò, nungmoq lé tái kôlé, agè ashop kut é sù lé lató hkâhpuq. Náng é loqyo bowâm má pyuq byi sù lé, loqpaí hkyam le hkâm byi shi aq. ⁴⁰ Byù rayuq yuq, nang lé mara tsuq mù, náng é buzo lé yu pyám byi é nghut jáng, bumó lé le, hkyut byi shi aq. ⁴¹ Byù rayuq yuq, nang lé zik mù, radéng é nhâng jáng, yhang eq rahá í dèng châng é byi aq. ⁴² Nang lé dung sù lé, byi aq; náng chyáng mai chyí naú sù lé le, nunghtáng hkâlhik pyám.

Gyè Lé Chyitdap Râ É Hkyô

Luk 6:27-28, 32-36

⁴³ 'Náng é chyangnâm mâ é bang lé gi, chyitdap mù, náng é gyè lé gi, a jú kut aq'[☆] gâ é dang lé, nungmoq wó gyô wú bê nghut lhê. ⁴⁴ Nghut kôlhang, Ngò, nungmoq lé tái kôlé, nungmoq gi, mauhkung htoq mâ é nungmoq é Íwâ é yhangzô pé wó dut kó sháng gaq, nungmoq é gye pé lé chyitdap mù, nungmoq lé zing-ri bâng é matú kyûdung byi keq; ⁴⁵ hkâsu mù gâ le, Yhang gi, agè ashop bâng é ahtoq má le, gè bâng é ahtoq má le, bui tsô byi nhâng mù, dingmán bâng é ahtoq má le, a dingmán bâng é ahtoq má le, mau wô byi nhâng Sù nghut ri. ⁴⁶ Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó râ lú? Kang guq bang lhang, haú su kut lhê a nghut kó lú? ⁴⁷ Hau htoq agó, nungmoq é gumang wui lé za shi-kyám kô le gi, nungmoq kut é muzó gi, góbâng htoq má haí wá laklai râ lú? Tungbaù pé lhang haú su kut lhê a nghut kó lú? ⁴⁸ Haú

☆ 5:31 Tarâ Pun 24:1 ☆ 5:38 Htoq Ló 21:24

☆ 5:43 Nhong 19:18

mù, mauhkûng htoq mâ é nungmoq é Íwa gumjup é su, nungmoq le gumjup nyí keq.

6

Alu Byí É Hkyô

¹ Nungmoq ðingmán é hkyô lé, byu pé myàng sháng gaq nghú, byu pé hí má a kut shit loshoq, sídiq nyí keq. Haú su kut é nghut jáng, mauhkûng htoq mâ é nungmoq é Íwâ chyáng mai, chyunghuq wó yú kó râ a nghut.

² Haú mù, haú gegùn labyoq kut bang gi, byu pé eq shigyaú é hui sháng gaq ga, tarajong pé hká, hkyô pé hká kut é su, náng gi, alu byí é hkûn, tut htê su hkâlhoq htoq. Ngò, nungmoq lé teng za táí kôlé, haú bang gi, yhangmoq é chyunghuq lé hkúm shoq wó yú bekô nghut lhê.

³ Ra châ to bang lé náng alu byí é hkûn, náng é loqyo loq kut é hkyô lé, loqpaí loq lé lháng hkâsé nhâng.

⁴ Haú hkûn, náng alu byí é lé, ó a châng sé râ nghut lhê. Haú jáng sheq, ó a sé loshoq kut é hkyô lé myang é sù, náng é Íwa gi, nang lé chyunghuq shigyaú râ nghut lhê.

Kyûdûng É Hkyô

Luk 11:2-4

⁵ Nungmoq kyûdûng le, gegùn labyoq kut bang su hkâkut kó; hkâsu mù gà le, yhangmoq gi, byu pé byu-myàng shoq ga, tarajong pé eq hkyô kang pé má yap mù, kyûdung râ ô nau akô. Ngò, nungmoq lé teng za táí kôlé, haú bang gi, yhangmoq é chyunghuq lé wó yú bekô nghut ri. ⁶ Nghut kôlhang, náng kyûdûng le, náng é gok hkaú má wang ló mù, hkum myhí pyám luí, a byu-myang é náng é Íwâ chyáng dung aq. Haú jáng, ó a byu-myang é lé myàng sù, náng é Íwa gi, nang lé jeju dum tau byi râ nghut lhê. ⁷ Haú mù, kyûdûng le, tungbaù

pé su kut luí, dang puq hkâhtau kó; hkâsu mù gà le, yhangmoq gi, dang hîng chín luí dung jáng sheq, gyo byi nhò ngam akô nghut ri. ⁸ Haú bang su hkâkut kó; hkâsu mù gà le, nungmoq é Íwa gi, nungmoq râ é hkyô lé, nungmoq a dung shí mai sê to Sù nghut lhê.

⁹ Haú mù, nungmoq kyûdûng le, 'Mauhkûng htoq tsáng myhâng mâ é ngamoq é Áwa ê, Náng é myìng gi, choyiyúng nyí sháng gaq,

¹⁰ Náng é mingdán jé lô sháng gaq, Náng ô nau é hkyô, mauhkûng htoq má dik é su, myigùng htoq má le dik sháng gaq ô.

¹¹ Ngamoq nyí wuí râ é zoshuq lé, ngamoq lé hkû-nyí byi laq.

¹² Ngamoq lé shut é bâng é mara lé ngamoq hkyut pyám byí é su,

ngamoq é mara lé le hkyut pyám byi laq.

¹³ Ngamoq lé, agúng alaú hkyô má a wàng nhang é za,

agè ashop jang mai hkyi yù laq ô. (Hkâsu mù gà le, kô dik é up sîng hkyô, a-tsam eq hpungwup shíngkang gi, pyat dedu ah-tum abyuq Náng chyáng ru joq nyi ri ô! Amen.)*

ngù dung keq. ¹⁴ Supê eq, nungmoq lé kut shut é mara lé, nungmoq hkyut pyám byí é nghut le gi, mauhkûng htoq mâ é nungmoq é Íwa le, nungmoq lé mara hkyut pyám byi râ nghut lhê. ¹⁵ Nghut kôlhang, haú bâng é mara lé, nungmoq a hkyut pyám byí é nghut le gi, nungmoq é Íwa le, nungmoq é mara lé hkyut pyám byi râ a nghut.

Zoshuq Gám É Hkyô

¹⁶ Nungmoq gi, zoshuq gám é hkûn, gegùn labyoq kut bang su myoqdong hkâlhoq nyhui kó; hkâsu mù gà le, haú bang gi, yhangmoq zoshuq gám é hkyô lé, tún shit rá

* 6:13 Chyúmlaika ra-am má, shí tùm a bo é nghut lhê.

matú myoqdong lhoq nyhuí shit akò nghut ri. Ngò, nungmoq lé teng za tái kôlé, haú bang gi, yhangmoq é chynghuq wó yú bekò nghut ri. ¹⁷ Nungmoq kúm gi, zoshuq gám é hkûn, nungmoq zoshuq gám é hkyô lé, byu pê hí má de de a dut é za, nungmoq a byu-myang é Íwa za myàng sháng gaq, myoq chí pyám luí, u xú but keq; ¹⁸ haú jáng sheq, ó a sé loshoq kut é hkyô lé myang é Sû, nungmoq é Íwa gi, nungmoq lé chynghuq shigyaú rá nghut lhê.

Mauhkûng Htoq Mã É Sutzè

Luk 12:33-34

¹⁹ Jàngkon, jogyik èq wó lhoq htên pyâm é eq hkaú su èq le wó wang hkaú yu pyám byí é myigùng htoq má, nungmoq é matú, sutzè lé hkâhkong to kó. ²⁰ Jàngkon, jogyik èq le a wó lhoq htên pyâm é eq, hkaú su èq le a wó wang hkaú yu pyâm byí é mauhkûng htoq má sheq, nungmoq é matú sutzè hkong to keq. ²¹ Hkâsu mù gâ le, náng é sutzè joq jang má, náng é i-myt le jé nyí rá nghut lhê.

²² Myoqjí gi, gungdû é myibung nghut nyí ri. Náng é myoqjí ge é nghut le gi, náng é gungdu gón má maubó byíng mui to rá nghut lhê. ²³ Nghut kôlhang, náng é myoqjí a ge é nghut le gi, náng é gungdu gón gi, mauchut tuq dut nyí rá nghut lhê. Náng chyáng bo é maubó gi, mauchut byuq é nghut jáng, mauchut haú gi, hkâ-í yhang htû rá lhâ!

²⁴ Ó yuq nghut kôle, yhumsing í yuq lé wó dojaú rá a nghut. Hkâsu mù gâ le, yhang gi, rayuq lé a jú kut mù, rayuq lé gi, chyitdap rá nghut lhê; haú a nghut jáng, rayuq lé lhumzui mù, rayuq lé gi, hpau a tap kut rá nghut lhê. Nungmoq gi, Garai Gasang lé le, ngunzè lé le, radá dâm wó dojaú kó rá a nghut.

Hkâ-myt Chiq Kó
Luk 12:22-31

²⁵ Haú mù luí, Ngò, nungmoq lé tái kôlé, nungmoq é asak matú haí zo haí shuq rá eq nungmoq é gungdû matú haí wut haí tsang rá lé, hkâ-myt chiq kó. Asak gi, zoshuq htoq má, gungdu gi, mebû htoq má, je ahkyak lhê a nghut kó lhú? ²⁶ Maulat mã é nghoqzô pé lé wú wú keq; yhangmoq gi, kyô hkyó kyô shu a kut é htoq agó, chyí pé má le haí a tsing kat to kó é nghut le lhang, mauhkûng htoq mã é nungmoq é Íwa gi, yhangmoq lé, byi tso byi huq nyí lhê. Nungmoq gi, nghoq haú pé htoq má je riyhang hpaudap nyí lhê a nghut kó lhú? ²⁷ Nungmoq má, ó yuq wá, myit chiq é èq, yhumsing é asak lé radúng kô wó jat yù kó rá lhú?

²⁸ Haú nghut le nhing, haí mù, mebû matú myit chiq akò lhú? Myigùng má yuq tô é htutbó ban pé hkâsu kut kô lo é lé, myit wú keq. Haú pé gi, mù le a zui, hkying le a duì kó nghut ri. ²⁹ Nghut kôlhang, Ngò, nungmoq lé tái kyo kôlé, hkohkâm Sholumon hpung kô dik u lé wut é mebu lhang, ban haú rabó lé a hkyit nghut ri. ³⁰ Lumjing myit tiq é bang è, hkûnyí joq mù, napmá myihkyóm má dú kat pyám hui rá nghut é yosô mhan pé lé za lhang, Garai Gasang haú su kut hut é nghut le gi, nungmoq lé je riyhang hut rá a nghut kó lhú? ³¹ Haú mù, 'Haí zo rá lhi?' 'Haí shuq rá lhi?' 'Haí wut rá lhi?' nghû hkâ-myt chiq myhing kó. ³² Tungbaù pé kúm gi, haú pé banshoq lé châng hkat ho nyí akò; nghut kôlhang, mauhkûng htoq mã é nungmoq é Íwa gi, haú pé lé nungmoq rá é hkyô, sé byí nyí lhê. ³³ Nghut kôlhang, Yhâng é mingdán eq dingmán hkyô lé hí hô keq, haú jáng, haú pé banshoq, nungmoq lé puq byi rá nghut lhê. ³⁴ Haú mù, napmá lhê é matú hkâ-myt chiq kó; hkâsu mù gâ le, napmá gi, yhang é yhang myit chiq rá nghut lhê.

Hkû-nyí é wuîhke hkyô gi, hkû-nyí é matú gé bê nghut ri.

7

A Jéyáng Râ Hkyô
Luk 6:37-38, 41-42

¹ Nungmoq jéyáng é a hui kó sháng gaq, ó lé le, hkâjéyáng kó. ² Hkâsu mù gâ le, nungmoq jéyáng é su, nungmoq le, jéyáng é hui kó râ nghut é htoq agó, nungmoq lik byî é bung eq, nungmoq lé dum lik byi râ nghut lhê.

³ Yhumsing myoq hkaû má lúng tô é siktúm lé lhang a myit wú é nhîng, haî mù luî, nunggu nungmâng é myoqwàng lé myang lhê lú? ⁴ Yhumsing é myoq má siktúm lhung to luî nhîng, 'Náng myoq má lúng tô é myoqwàng lé, ngò choq pyám byi lé.' nghû luî, náng é gumang hpó lé hkâsu wó tai râ lú? ⁵ Gegùn labyoq kut sù è, náng é myoq má lúng tô é siktúm lé hí choq pyám aq. Haû jáng sheq, nunggu nungmâng é myoq má wang tô é myoqwàng choq pyám byi râ matú, náng san za myàng râ nghut lhê.

⁶ Hkûi pé lé, yunglhô é zê hkâbyi kó; waq pé hí má, nungmoq é palhé wuizo lé hkâdú byi kó. Haû su kut jáng, haû bang gi, zè haû pé lé nâng pyeq pyám mù, nungmoq lé dum taû ngat lò râ nghut lhê.

Dung Keq, Hô Keq, Hkum Má Kok Keq

Luk 11:9-13

⁷ Dung keq, haû jáng, nungmoq lé byi râ nghut lhê; hó keq, haû jáng, nungmoq myàng kó râ nghut lhê; hkum má kok keq, haû jáng, nungmoq lé hpóng byi râ nghut lhê. ⁸ Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

⁹ Nungmoq má, ó yuq wá, yhumsing yhangzo muk dúng le, luqgok byi kó râ lú? ¹⁰ Ngozo dúng le, lhangmui* byi kó râ lú? ¹¹ Agè ashop é bang nungmoq lhang gi, nungmoq é zo wuî lé, ge é chyunghuq dat byi kô le nhîng, mauhkûng htoq tsáng myhâng má é nungmoq é Îwa gi, Yhang lé dúng é bang lé, je riyhang ge é chyunghuq byi râ nghut lhê! ¹² Haû mù, hai hkyô má nghut kôlhang, nungmoq gi, yhumsing ô nau é dông supé lé kut nhâng nau é su, yhangmoq lé le kut byi keq. Haî mù gâ le, haû gi, jep é tarâ eq myiqhtoî pê é dang lo jup tô é nghut ri.

Chyap É Hkúmdong Eq Lam É Hkúmdong

Luk 13:24

¹³ Chyap é hkúmdong mai wàng keq. Hkâsu mù gâ le, lam é hkúmdong eq hkyô mó gi, htên byoq hkyô shut shuí e é nghut mù luî, haû dông wàng bang gi, myô akô nghut ri. ¹⁴ Chyap é hkúmdong eq hkyô zo kúm gi, asak hkyô shut shuí e é nghut mù luî, haû lé myang ho é bang gi, shaû akô nghut ri.

Agàm Eq Ashi

Luk 6:43-45

¹⁵ Nungmoq chyáng jé lé lo é myiqhtoî pyoq pé lé, sidiq nyî keq; yhangmoq gi, sau-kuq wut mù, nungmoq chyáng jé lé kôlhang, myaq zo myaq shuq nau é wamhkuî pé nghut akô. ¹⁶ Yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê. Zubyp mai tsibiyiq shi, zugâm mai mailhpáng-shi wó yu wú akô lú? ¹⁷ Ge é agàm gi, ge é ashî zui mù, a ge é agàm gi, a ge é ashî za dat zui ri. ¹⁸ Ge é agàm gi, a ge é ashî a wó zui, a ge é agàm le, ge é ashî a wó zui nghut ri. ¹⁹ Ge é ashî a zui é shigâm hkangmó lé gi, htuq

* 7:10 Garai Gasang gi, lhangmui a zo râ matú, Yudaq byu pé lé hkunmó hkyô tô é nghut lhê.

pyám mù, myi má dú kat pyám rã nghut lhê. ²⁰ Haù mù, yhangmoq é muzó jizó lé wú mù, nungmoq gi, yhangmoq lé wú sé kó rã nghut lhê.

²¹ Ngo lé, 'Yhumsing ê, Yhumsing ê,' ga, wut é bang yuq hkangmó gi, mauhkung mingdán má myang wàng kó rã a nghut; haù mauhkung htoq má é Ngá Wa ô nau é đông kut sù za sheq, myang wàng rã nghut lhê. ²² Haù buinyi má, byù myo myo gi, 'Yhumsing ê, Yhumsing ê, Nàng é mying mai, ngamoq gi, my-iqhtoi le htoi bê; nat gang lé hkat htoq bê; laklai kumlhá ajung jung lé, kut bê a nghut lhu?' ga lui, Ngo lé myi kó rã nghut lhê. ²³ Haù hkùn, Ngò gi, 'Nungmoq lé, Ngò hkâ-nhám le a sé; agê ashop hkyô kut é bang nungmoq, Ngá chyáng mai gâng ló byuq keq.' nghũ, yhangmoq lé san za tù taí kat rã nghut lhê.

Hpaqchyí Bò Sù Eq Ngok Sù

Luk 6:47-49

²⁴ Haù mù, Ngá é dang shí pé lé wó gyô yù lui, châng kut é sù gi, hpaqchyí bò mù, lunghtân htoq má, yhũm saí é sù eq wui nyi ri. ²⁵ Mau wô, wui je, laidun lò mù, yhũm haù lé lo htung kôlhang, yhũm haù gi, a htên byoq byuq rã nghut lhê; hkâsù mù gâ le, yhũm haù gi, lunghtân htoq má tsuq tô é yanmai nghut ri. ²⁶ Nghut kôlhang, Ngá é dang lé, wó gyô yù mù, a cháng sù gi, semui-jàng má, yhũm saí é byù ngok eq wui nyi rã nghut lhê. ²⁷ Mau wô, wui je, laidun wò yup dut lò mù, yhũm haù lé lo htung jáng, yù whui a mù loshoq htên byoq byuq rã nghut lhê." gâ ri.

²⁸ Yesuq mungdang ban taí é hkùn, shiwa byu pé gi, Yhang mho-qshit é hkyô lé maũhong bum akô; ²⁹ hkâsù mù gâ le, Yhang gi, yhangmoq é tarã sará pé eq a pung é za, ahkáng ayá wò sù rayuq su, mho-qshit é yanmai nghut ri.

8

Manggâm Dap É Byù Rayuq *Mrk 1:40-45; Luk 5:12-16*

¹ Yesuq gi, bùm htoq mai gyô lo é hkùn, byù moq mó gi, Yhâng htâng châng bum akô nghut ri. ² Haù hkùn, manggâm dap é byù rayuq gi, Yhâng é hí má, lé mù, hkyihput htuq lui, "Yhumsing ê, Nàng đồng é nghut le gi, ngo lé Nàng wó lhoq sân-yúng byi rã nghut lhê." ga taí ri.

³ Yesuq gi, loq lham kat mù, haù yuq lé é zàng lui, "Ngò dóng lhê, sân-yúng aq koi." ga taí kat ri. Haù hkùn jáng, haù yuq é manggâm gi, ge byuq bê nghut ri. ⁴ Haù hkùn, Yesuq gi, "Nàng, shí hkyô ó lé le hkâtaí kyo. Nghut kôlhang, nàng é gungdu lé, hkyangjong hpô chyáng ló tũn shit mù, yhangmoq é matú saksé dut sháng gaq, Mosheq taí tô é eq rajung za, hkungga ló nhông byi aq." ga haù yuq lé taí kat ri.

Gyezau Hpô É Lumjing Myit *Luk 7:1-10; Yhn 4:43-54*

⁵ Yesuq, Kaperna-um wà má wang e ló le, Romaq gyezau hpô rayuq gi, Yhâng chyáng lé jé mù, ⁶ "Yhumsing ê, ngá é dui-nhâng zoshâng gi, gùngjum shi é htoq agó, yhũm má gyaí no jamjaù leq tô ri." ga garúm lé dung ri.

⁷ Haù hkùn, Yesuq gi, yhang lé, "Ngò, lé lhoq gê byi rã." ga taí kat ri.

⁸ Gyezau hpô haù, Yhang lé dum tũ taí é gi, "Yhumsing ê, Nàng, ngá é laishin-htâng má, lé nang rã lhang ngò má a gingdán. Nàng, dang rahkun za taí kat laq; haù hkùn, ngá é dui-nhâng zoshâng ge ló rã nghut lhê. ⁹ Hkâsù mù gâ le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê; rayuq lé, 'Ê aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jũn lé le, 'Shí kut aq!' nghu le, yhang kut lhê." gâ ri.

10 Yesuq gi, dang haú lé wó gyo jáng, maú byuq luí, Yhâng htâng cháng bang lé, "Ngò, nungmoq lé teng za tái kôlé, Israelaq amyû má lhang, shí í lumjínq é sù lé, Ngò, rayuq lé le a myàng wú é nghut lhê. 11 Ngò, nungmoq lé tái kôlé, buih-toq buiwàng hkyam mâ é byu pé myo myo gi, mauhkûng mingdán má, Abraham, Isak, Yakup pé eq rahá, zoshuq poí mó má myang zùng kó râ nghut lhê. 12 Nghut kôlhang, mingdán haú má wàng âng é bang kúm gi, shinggan mauchut hkaú shut dú pyám é hui luí, haú jowò má ngaubyi ngaù nhap eq zui kyik kyik shoq hpuzô nyi bùm bekò râ nghut lhê." ga tái ri.

13 Hau htâng, Yesuq gi, gyezau lé, "Ló aq hkoi! Nàng lumjínq é eq rajung za, dut râ nghut lhê." ga tái ri. Haú-u má yhang, haú dui-nhâng zoshâng gi, ge byuq bê nghut ri.

Byù Myo Myo Lé Lhoq Gê Byí É Hkyô

Mrk 1:29-34; Luk 4:38-41

14 Yesuq gi, Petruq é yhùm má jé wang e é hkûn, Petruq é yhâng-aumó gyai yhang no leq tô é lé, é myang ri. 15 Yesuq gi, yhâng é loq má é záng kat é hkûn, Petruq yhâng-aumó gi, nõhpyo ge byuq mù, toq luí, Yhang lé wó gaí tso gaí huq bê nghut ri.

16 Myinhtâng mauchut lô jáng, nat gang wang júng nyi é bang myo myo lé, Yhâng chyáng shuí lé lo akò. Yhang gi, agè ashop é nat gâng pé lé dâng eq hkat htoq pyám mù, nõhpyo huí é bang banshoq lé lhoq gê byí ri. 17 Haú gi,

"Yhang gi, nga-nhûng é noli nojàng lé yu pyám byi mù, nga-nhûng é noli nojàng lé, wùn waq pyám byi bê nghut ri."*
ga, myiqhtoi Esai-aq tái tô é dang lhoq dik rá matú nghut ri.

Yesuq Htâng Cháng Râ Bang

Luk 9:57-62

18 Yesuq gi, Yhâng é lhinghkyuq má byù moq mó zup ming nyi é lé myàng jáng, Yhâng é chángzô pé lé, nhông hé hpoq shut gû dap é sháng gâ ri. 19 Haú hkûn, tarâ sará rayuq gi, lé lô mù, "Sarâ é, ngò gi, Nàng hká e le hká cháng râ nghut lhê." ga Yhang lé tái ri.

20 Haú jáng, Yesuq gi, "Wamhkuí pé gi, hkyûng wó akò; ngoq pé le, ngoqsut wó akò. Nghut kôlhang, haú Byu Yhangzo gi, u nghê jowò lhang a wó nghut ri." ga lhom tái kat ri.

21 Haú hkûn, chángzo rayuq gi, "Yhumsîng ê, ngá wa lé ló yhùm pyám râ ahkáng hí byi shilaq." ga tái kat ri.

22 Nghut kôlhang, Yesuq gi, "Shí bê bang gi, shí bê bang yhangchang yhùm lhum kó sháng gaq, nàng gi, Ngá htâng cháng aq." ga dum tái tái ri.

Laidun Lhoq Zim É Hkyô

Mrk 4:35-41; Luk 8:22-25

23 Hau htâng, Yesuq lhai hkaú má wàng mù, Yhâng é chángzô pé le, Yhâng htâng cháng wàng bekò nghut ri. 24 Haú hkûn, nhông má byodan-htik laidun mó lò mù, wuìlhêng pé gi, lhai má bat ùm lò bê nghut ri. Nghut kôlhang, Yesuq gi, yhup myhî tô ri. 25 Chángzô pé gi, Yhâng chyáng jé ê mù, Yhang lé nhaú pun luí, "Yhumsîng ê, hkyi yù laq ô! Nga-nhúng myup ló nyi ri." ga tái akò.

26 Yhang gi, "Lumjínq myit shaú é bang é! Haí mù, haú-í gyuq bum akò lhú?" ga tái kat ri. Hau htâng, Yhang gi, toq luí, laidun eq wuìlhêng pé lé tân kat jáng, banshoq zim byuq bê nghut ri.

27 Byù haú bang gi, maúhong byuq kômù, "Shí yuq gi, hkasú é byù lhà? Lai eq wuìlhêng pé lhang

* 8:17 Esai 53:4

gi, Yhâng é dang lé gyo byî ri myhi-nhung!" ga luî, rayuq eq rayuq myî lûm bum akô nghut ri.

Nat Wang Júng Su Nihk Lé, Lhoq Gê Byî É Hkyô

Mrk 5:1-20; Luk 8:26-39

²⁸ Yesuq gi, Gadara byu pê é mau hpoq má jé dap ló jáng, nat gang wang júng é byû í yuq gi, lupdùng mai htoq lé lo kômù, Yhang lé lé huî akô. Haú nhik gi, haú hkyô mai ó lhang a wám lai loshoq wuî é su nhik nghut akô. ²⁹ Yhangnhik gi, Yesuq lé, "Garaî Yhangzo é, Nang, ngamoq eq haî sêng lhê lúhú? Ahkyíng a jé shimá, ngamoq lé zing-ri râ matú jé lé lo é nghut lhê lúhú?" ga taî garú akô.

³⁰ Haú mai a lûm wê é jowò má, waq rajùm mó gi, myî dù but zô nyi bum akô nghut ri. ³¹ Nat gâng pé gi, Yesuq lé, "Nang, ngamoq lé hkat htoq râ nghut jáng, hê waq pê chyáng wàng nhâng laq." ga dúng akô.

³² Yesuq gi, "Htoq ló keq!" ga taî kat ri. Haú mù, yhangmoq gi, htoq ló luî, waq pê chyáng wàng mù, waq haú jùm gi, gampyoq mai nhông hkaû shut din yán wang ló kôluî, wuî hkaû má myup shi byuq bekô nghut ri. ³³ Waq zúng bang gi, myuq hkaû shut hpang din wang ló kômù, dut lai lo é hkyô banshoq lé le, nat gang wang júng huî su nhik hkâsu dut é hkyô lé le, ló taî kyo akô nghut ri. ³⁴ Haú mù, rawa bang gi, Yesuq lé huî râ matú htoq lé lo bùm kômù, Yhang lé myàng jáng, yhangmoq é mau mai htoq ló byuq râ matú, chôm dúng tôngbán akô nghut ri.

9

Gungjum Shî Sû Lé Lhoq Gê Byî É Hkyô

Mrk 2:1-12; Luk 5:17-26

¹ Yesuq gi, lhaî má wàng mù, yhumsing é wà shut jî dap ló bê nghut ri. ² Byû ra-am gi, gùngjum

shî sû rayuq lé, taphkang mai Yhâng chyáng waq lé lo akô. Yesuq gi, yhangmoq é lumjng myit lé byu-myàng jáng, haú gùngjum shî sû lé, "Ngá zo é, nhik hkâ-ngê; náng é yubak mara lé hkyut pyám byi bê." ga taî ri.

³ Haú hkûn, tarâ sará pé ra-am gi, yhangmoq é i-myit hkaû má, "Byû shí yuq gi, Garaî Gasang lé rhoî dang taî nyi ri." ga myit nyi bum akô nghut ri.

⁴ Yesuq gi, yhangmoq myit nyi é hkyô lé sé mù, "Nungmoq é i-myit hkaû má, haú su agè ashop é dông haî mù myit nyi akô lúhú? ⁵ 'Náng é yubak mara lé hkyut pyám byi bê.' nghû taî râ eq 'Toq luî, hkyô so aq.' nghû taî râ má, hká hkun je taî lui lhê lúhú? ⁶ Nghut kôlháng, haú Byu Yhangzo gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lhê." ga taî luî, haú gùngjum shî sû lé, "Toq aq, náng é taphkang yu chûng luî, yhûm taù ló aq hkoi." ga taî kat ri. ⁷ Haú mù, haú yuq gi, toq mù, yhûm shut ló byuq bê nghut ri. ⁸ Byû hpûng mó gi, haú hkyô lé myàng kôjáng, gyuq maù kômù, byu pé lé haú su é ahkáng ayá byi tô é Garaî Gasang lé hkyu-on kungton bum akô nghut ri.

Mahte lé shuî yu é hkyô

Mrk 2:13-17; Luk 5:27-32

⁹ Yesuq gi, haú jowò mai sê e ló é hkûn, kang guq zúm má sung tô é Mahte ga sù lé myàng mù, "Ngá htâng cháng aq." ga taî jáng, haú yuq gi, toq luî, Yhâng htâng cháng bê nghut ri.

¹⁰ Yesuq gi, Mahte é yhûm má myinzang zô nyi é hkûn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô. ¹¹ Haú lé, Hparishe pé myàng kôjáng, Yhâng é chángzô pé lé, "Nungmoq é sará gi, haî mù luî, kang guq bang eq yubak dap bang

eq rahá zo shuq nyi lê lú?" ga myí akô.

¹² Yesuq gi, haú su ga kô é lé wó gyo jáng, "Wángzán bang gi, chí sará a ra kó; nòhpyo hui bang za sheq ru rá lê. ¹³ 'Ngò ô nau é gi, hkungga nhông hkyô a nghut, shogyo nhik-myin hkyô sheq ru nghut lê. ✱ gâ é lichyúm lé mhoq yú keq. Hkâsu mù gâ le, Ngò gi, dingmán bang lé wut yù rá matú jé lé é a nghut, yubak dap bang lé ji yù rá matú sheq jé lé é ru nghut lê." ga tũ taí kat ri.

Zoshuq Gám É Eq Sêng É Hkyô
Mrk 2:18-22; Luk 5:33-39

¹⁴ Hau htâng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq Hparishe pé gi, zoshuq gám gám kut lê; nghut kôle, Náng é chángzô pé gi, haí mù a gám kô é lú?" ga luí, lé myí akô.

¹⁵ Haú mù, Yesuq tũ taí é gi, "Bíng pé gi, lusik eq rahá nghut nyi to ashí hkûn, hkâsu ge yón kó rá lú? Lusik lé, yhangmoq chyáng mai shuí yu pyâm é hkyíng jé rá nghut lê; haú hkûn kúm gi, yhangmoq zoshuq gám kó rá nghut lê.

¹⁶ Ó yuq le, mebu xau má pán sik èq a lhaq hpo wú kó; hkâsu mù gâ le, pán sik kun byuq jáng, mebu xau le je lhoq cheq pyám rá nghut lê. ¹⁷ Tsibiyiq wíng asik lé le, shokuq htûng axau má ó a kat wú kó. Kat é nghut jáng, tsibiyiq wíng asik soq htân luí, htûng buq goq byuq mù, tsibiyiq wíng le yui shun byuq, htûng le htên byuq, dut rá nghut lê. Haú mù, tsibiyiq wíng asik lé, shokuq htûng sik má kat jáng sheq, haú í jûng é a hten rá nghut lê." gâ ri.

Shí Bê Myiwe Zo Eq No É Myiwe Myhí

Mrk 5:21-43; Luk 8:40-56

¹⁸ Yesuq haú su ga taí nyi é hkûn, suwún rayuq jé lé lô mù, Yhâng

é hí má hkyihput htuq luí, "Ngá zo byizo gi, ahkuí za shi byuq bê. Nghut kôlháng, Nàng lé mù, yhâng é ahtoq má loq lé ke byi laq, haú jáng, yhang, asak dum dui lò rá nghut lê." ga taí ri. ¹⁹ Yesuq gi, toq mù, Yhâng é chángzô pé eq rahá, haú yuq htâng châng e ló akô.

²⁰ Haú hkûn, raxe í zân yhang, suí yui nyi é myiwe myhí rayuq gi, Yhâng é nunghtáng má huí lé mù, Yhâng é bushi htâng má ê záng kat ri. ²¹ Myiwe myhí haú gi, yhang gûng yhang, "Ngò, Yhâng é buhtâng má ê wó záng jáng gi, ge byuq rá nghut lê." ga, wó myit é yanmai nghut ri.

²² Yesuq gi, lhing wú kat luí, yhang lé myàng jáng, "Ngá zo é, nhik hkâ-ngê, náng é lumjîng myit gi, nang lé lhoq gê byi bê nghut ri." ga taí ri. Haú hkûn jáng yhang, myiwe myhí haú gi, ge byuq bê nghut ri.

²³ Yesuq gi, suwún hpô é yhûm má jé wang ló é hkûn, sampyí mut bang eq garu garín dut nyi é bang lé, é myàng mù, ²⁴ yhangmoq lé, "Hui keq. Myiwe zo gi, shi byuq é a nghut, yhup myhí tô é sheq ru nghut lê." ga taí jáng, yhangmoq gi, Yhang lé wuizui kut pyám byí akô. ²⁵ Yesuq gi, byù hpûng lé, shínggan shut htoq ló nhâng mù, Yhang wang é luí, myiwe zo haú lé loq èq zuí kat jáng, myiwe zo haú gi, dum dui toq lo ri. ²⁶ Haú hkyo é danglù gi, ramau gón yhang jam ló byuq bê nghut ri.

Myoqjit Í Yuq Eq Nhut Jit Sú Rayuq Lé, Lhoq Gê Byí É Hkyô

²⁷ Yesuq gi, haú jowò mai xoq e ló nyi le, Yhâng é htâng má, myoqjit í yuq gi, châng dín uchyang, "Dawiq é Yhangzo é, ngá-nhik lé shogyô yù laq ô!" ga wut taí akô.

²⁸ Yesuq gi, yhúmhaú má jé wang ló é hkûn, myoqjit su nhik

châng wang lò kômù, haú nhik lé, "Ngò wó kut byí é lé, nungnhik lumjínng akò luq?" ga myí ri.

Haú hkún, yhangnhik gi, "Lumjínng lhê ô, Yhumsíng ê." ga tú taí akò.

²⁹ Hau htâng, Yhang gi, haú nhik é myoqjí má ê záng htung luí, "Nungnhik lumjínng é eq rajung za dut sháng gaq." ga taí ri. ³⁰ Haú mù, yhangnhik gi, myoq wó myâng bekò nghut ri. Yesuq gi, "Shí hkyô, ó lé le hkâsé nhâng kó." ga, yhangnhik lé htân htân sidiq byí ri.

³¹ Nghut kôlháng, yhangnhik gi, haú hkyô lé, haú mau ramau gón yhang taí pyo ló bekò nghut ri.

³² Haú nhik htoq ló nyí kô é hkún, nat gang wang júng luí, dang a wó nyô sù rayuq lé, Yesuq chyáng shuí lé lo akò. ³³ Nat gang lé hkat htoq pyâm é hkún, nhutjit sù haú gi, dang wó nyô bê nghut ri. Byù hpúng mó gi, haú lé wú maú byuq kômù, "Shí su dut é hkyô lé, Israe-laq amyû má radàm lháng a myang wú." ga taí bum akò.

³⁴ Nghut kôlháng, Hparishe pé kúm gi, "Nat gâng pê é zaú é wum-o a-tsam éq za, nat gâng pé lé hkat htoq pyâm é nghut ri." ga taí bum akò nghut ri.

Mû Zui Byù Shaú Ri

³⁵ Yesuq gi, myuq pé eq wà pé banshoq má wàng luí, haú pé má é tarajong pé má mhoqshit é eq, mauhkûng mingdán hkyô eq sêng é gabú danglù lé hko kyo uchyang, nôhpyo ajung jung eq noli nojàng hui bang yuq hkangmó lé, lhoq gê byí wún ri. ³⁶ Yesuq gi, byù moq mó lé myàng jáng, wú shogyô nyí ri. Hkâsu mù gâ le, yhangmoq gi, sau zúng sù a nyí é sau pé su, awui ahke dut é eq byo myín bûm kô é yanmai nghut ri. ³⁷ Haú mù, Yhang gi, Yhâng é chángzô pé lé, "Kyôshú

yù râ myo shoq joq kôlháng, mù zui râ byù gi, shaú nyi ri. ³⁸ Haú mù, haú kyô Yhumsíng lé, Yhâng é kyô yô má, kyô shu byù myo myo nhâng byi râ matú, dung keq." ga taí ri.

10

Raxe Í Yuq Lé Nhang Htoq Kat É Hkyô

Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17

¹ Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq râ eq, noli nojàng eq nôhpyo ajung jung lé wó lhoq gê râ ahko ahkáng yhangmoq lé byí ri.

² Haú lagyo raxe í yuq é mying gi, (Petruq ga sù) Simun eq yhanggu Andre; Zebedi é yhangzô nhiktang Yakuq eq yhanggu Yohan; ³ Hpilip eq Barhtolume; Htomaq eq kang guq sù Mahte; Alhpe é yhangzo Yakuq, Htade, ⁴ Zelutuq* dut é Simun eq, Yesuq lé ap pyám râ sù, Yudaq Iskarut pé nghut akò.

⁵ Yesuq gi, haú bang raxe í yuq lé dangsâng mù, nhang htoq kat ri. Yhang sang kat é dang gi, "Tûngbau pé chyáng le hkâ-ê kó; Samariq wà rawà má le hkâwâng kó. ⁶ Haú byuq byuq é sau pé su nghut nyi é Israe-laq byu pê chyáng sheq ê keq. ⁷ Nungmoq gi, ê mù, 'Mauhkûng mingdán gi, chyáng lò bê nghut ri.' nghu é danglù lé hko kyo keq. ⁸ Nò bang lé lhoq gê byi, shí bê bang lé lhoq dui toq, manggâm dap bang lé lhoq san lhoq yúng byi, nat gâng pé lé hkat htoq pyám, kut keq. Lai laí wó é lé, lai laí byi keq. ⁹ Nungmoq é hpyihit má, hîng, ngùn eq gyi pé hkâkat chûng kó; ¹⁰ hkyowui é matú, etap, mebu htaí, hkyî-tsung eq dumbáng pé hkâyü chûng kó;

* **10:4** Zelutuq gâ é lichyûm gi, yhumsíng zui sai é hkyô má gyai yhang myit lòm shirong é sù lé ga lhê. Haú u lé, Israe-laq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

hkâsu mù gâ le, mù zui sù gi, zoshuq wó gíng lhê.

¹¹ Hká wâ hká dum má jé wang ló le le, haú má é gíngdán é byù lé hô mù, haú mai htoq ló é hkùn jé shoq, haú yuq é yhûm má za nyi nyi keq.

¹² Haú yhûm má wang é hkùn, shichyên yù keq.

¹³ Haú yhûm gi, gíngdán é nghut jáng, nungmoq shimân byí é hkyô, yhangmoq chyáng joq nyi sháng gaq; a gíngdán é nghut jáng, nungmoq chyáng dum taù lò sháng gaq.

¹⁴ Nungmoq lé a lhom hap yu é eq nungmoq é dang lé a lhom gyo byi kô é nghut jáng, haú yhûm haú wâ mai htoq ló é hkùn, nungmoq é hkyiwa má dap é hpuilhaú lé ko hkyô pyâm to keq.

¹⁵ Ngò, nungmoq lé teng za taí kôlé, tarâ jéyáng é buinyi má, haú wâ gi, Sodom eq Gomoraq myuq htoq má je hpuzo rá nghut lhê.

¹⁶ Wamhkuí hpúng má nhang hâng kat é sau pé lé su, Ngò, nungmoq lé nhang kat é nghut lhê. Haú mù, lhangmuí su hpaqchyí bò luí, hpúngkyui su nú-nhâm nyi keq.

¹⁷ Byu pé lé sidiq keq; hkâsu mù gâ le, yhangmoq gi, nungmoq lé, tarâ rúng pé má é ap pyám kó rá nghut é htoq agó, yhangmoq é tarajong pé má, nungmoq lé nhuq bat kó rá nghut lhê.

¹⁸ Nungmoq gi, Ngá é yanmai, mauzau wuè eq hkohkam pé é hí má shuí jé é hui luí, yhangmoq é hí má le, tungbaù pé é hí má le, saksé myang hkám kó rá nghut lhê.

¹⁹ Nghut kôlhang, nungmoq lé ap pyám kô é hkùn, nungmoq hkâsu taí rá eq haí taí rá lé, hkâ-myit chiq kó. Haú hkùn taí rá dang, nungmoq wó kó rá nghut lhê.

²⁰ Hkásu mù gâ le, haú gi, nungmoq é dang a nghut, nungmoq é Yhângwá é Woi-nyí sheq, nungmoq dông taí rá ru nghut lhê.

²¹ Nhiktâng gi, nhiktâng yhangchang, îwa gi, yhangzo lé, shí shoq ap pyâm lhum kó rá nghut lhê;

zo wuè gi, mó wuè lé gumlau toq mù, sat pyám nhang kó rá nghut lhê.

²² Byù lhunglhang bang gi, Ngá é yanmai, nungmoq lé a ngui kut kó rá nghut lhê; nghut kôlhang, jihtûm jé shoq wó hkam jân nyi é sù gi, hkyi yu é hui rá nghut lhê.

²³ Rawò má zing-ri é hui jáng, rawò shut hpang é keq. Ngò, nungmoq lé teng za taí kôlé, Israelaq byu pé é myuq pé má, nungmoq a ban wang ngap shimá, haú Byu Yhangzo jé rá nghut lhê.

²⁴ Jongzo gi, sará htoq, dui-nhâng zoshâng gi, yhumsing htoq, gyaú rá a nghut.

²⁵ Jongzo gi, yhâng é sará su, dui-nhâng zoshâng gi, yhâng é yhumsing su, wó dut jáng gé bê. Yhumsing hpó lé lhang Bezebulaq† ga kô le gi, Yhâng é yhumbyù wuè lé gi, je riyhang nghú kó rá a nghut lhú?

²⁶ Haú mù, yhangmoq lé hkâgyuq kó. A byông htoq loshoq wó záu nghop tô é haí le a joq rá nghut lhê; a sé loshoq wó haq tô é le, haí a joq rá nghut lhê.

²⁷ Ngò, nungmoq lé mauchut hkaú má taí é hkyô lé, myoq myàng maubó má taí kyo keq; Ngò, nungmoq lé dangsoq soq kyo é hkyô lé, yhumhkûng htoq mai taí pyô keq.

²⁸ Gungdu lé za wó sat pyám mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraí ming má wó lhoq htên é Sù lé sheq, gyuq nyi keq.

²⁹ Johkyáng í du lé, gyi ht-ingham rachap èq wó ùng pyâm lhê a nghut kó lhú? Nghut kôlhang, haú radu lhang, nungmoq é îwâ é myit èq a nghut jáng, myigùng má wó byit gyó rá a nghut.

³⁰ Nungmoq é ulhum má é xâm banshoq lé lhang, nghap to gù nghut lhê.

³¹ Haú mù, hkâgyuq kó; nungmoq gi, haú johkyáng myo myô htoq má lhang gù je bo é bang nghut lhê.

³² Byu pé hí má, Ngo lé lhom

† 10:25 Bezebulaq gâ é gi, Tsadán é myíng rajà nghut lhê.

yín yu é sù ó yuq lé nghut kôle, mauhkûng htoq mâ é Ngá Wâ é hí má, Ngò lhom yín yú râ nghut lhê. ³³ Byu pê é hí má, Ngo lé he-ngik pyâm é sù ó yuq lé nghut kôle, mauhkûng htoq mâ é Ngá Wâ é hí má, Ngò he-ngik pyâm râ nghut lhê.

³⁴ Ngo lé, haù myidàm htoq má simsaq hkyô byi râ matú lé lo é sù su hkâ-ngâm kó. Ngò gi, simsaq hkyô byi râ matú lé lo é a nghut, shâm byi râ matú sheq lé lo é ru nghut lhê. † ³⁵ Hkâsu mù gâ le,

'Yuqzo gi, yhângwa eq, byizo gi, yhângnu eq, dumó gi, yhângmhoi eq, byoq lhum kó râ nghut lhê.

³⁶ Yhumsing é yhumbyù wuì gi, yhumsing é gyè taù dut râ nghut lhê. *

gâ tô é matú sheq, Ngò jé lé é ru nghut lhê.

³⁷ Ngo lé chyt é htoq yhumsing é ìnu ìwa lé je chyt é sù ó yuq nghut kôle, Ngá é chángzo kut râ gingdán sù a nghut; Ngo lé chyt é htoq yhumsing é zo wuì lé je chyt é sù ó yuq nghut kôle, Ngá é chángzo kut râ gingdán sù a nghut; ³⁸ Yhumsing é tapzìng lé a waq é za, Ngá htàng châng é sù ó yuq nghut kôle, Ngá é chángzo kut râ gingdán sù a nghut. ³⁹ Yhumsing é asak lé ha bún é sù ó yuq nghut kôle, asak sum râ nghut lhê; Ngá é yanmai, yhumsing é asak sùm pyâm é sù ó yuq nghut kôle, asak wó râ nghut lhê.

⁴⁰ Nungmoq lé hap yù sù gi, Ngo lé hap yu é sù nghut bê; Ngo lé hap yù sù gi, haù Ngo lé nhang kat Sù lé hap yu é sù nghut bê. ⁴¹ Myiqhtoi rayuq lé, myiqhtoi dông lhom hap yu é sù ó yuq nghut kôle, myiqhtoi rayuq é chyunghuq lé wó yù râ nghut lhê; dingmán sù rayuq lé, dingmán sù dông lhom hap yu é sù ó yuq nghut kôle, dingmán sù

rayuq é chyunghuq lé wó yù râ nghut lhê. ⁴² Shí, tiq bang má é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taì kôlé, yhâng é chyunghuq lé hkyak myang hkam yù râ za nghut lhê." gâ ri.

11

Yesuq Eq Wui-myhup Sará Yohan

Luk 7:18-35

¹ Yesuq gi, Yhâng é chángzo raxe í yuq lé dang ban pying é htàng má, Galile mau mâ é wà pé má mhoqshit râ matú eq hko kyo râ matú, haù jowò mai htoq e ló bê nghut ri.

² Wui-myhup Sará Yohan gi, Hkrisduq kut nyi é hkyô lé, htóng hkaù má wó gyo jáng, ³ "Nàng gi, haù jé lé lô râ Sù nghut lhê lú? Haù a nghut jáng, ngamoq gi, góyuq lé láng ra shirâ lú?" ga, yhâng é chángzô pé lé myí nhang kat ri.

⁴ Yesuq tũ taì é gi, "Nungmoq wó gyo wó myang é hkyô, Yohan lé lô taì kyo keq; ⁵ myoqjit bang, myoq wó myâng bekô; hkyi hten bang le, wó so bekô; manggâm dap bang le, lhoq gè byi é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. ⁶ Ngá é yanmai, Ngo lé lum shut é hkyô a bò sù gi, hkungsô wó nyi ri." ga taì ri.

⁷ Yohan é chángzô pé taù ló kô é u lé, Yohan eq séng luì, byù moq mó lé Yesuq taì é gi; "Nungmoq gi, haì lé hpuq wú râ matú, haù yoso shut e akô lú? Laì èq hik nhún é jamgàm lé wú râ matú nghut akô lú? ⁸ Haù a nghut jáng, haì lé wú râ matú e akô lú? Nù-nhâm é mebu wut sù lé wú râ matú e akô lú? A nghut. Nù-nhâm é mebu wut bang gi, hkohkâm-wâng pé má

† **10:34** Yesuq gi, simsaq hkyô byi sù nghut lhê. Nghut kôlhâng, Yhang é yanmai, byu pé mabyoq htoq râ nghut é hkyô lé sé mù, haù su ga taì é nghut lhê. * **10:36** Mihka 7:6

sheq rû nyi lhê. ⁹ Haû nghut lé gi, hai lé wu râ matú é kô é lhu? Myiqhtoi rayuq lé lhu? Haû kúm nghut ri; Ngò, nungmoq lé tai kôlé, Yohan gi, myiqhtoi htoq lháng gyaú sù nghut lhê. ¹⁰ Haú yuq é hkyô lé, Chyúmdang má kê tô é gi,

'Wú aq, Náng é hkyô lajang láng râ matú, Ngá é lagyo lé, Náng é hí má Ngò nhang kat rá nghut lhê.'[✱]

gâ ri. ¹¹ Ngò, nungmoq lé teng za tai kôlé, myiwe wui mai hku kat é bang má, Wui-myhup Sará Yohan htoq je kô é rayuq lháng a htoq wú shi; nghut kôlhang, Garai Gasâng é mauhkúng mingdán má je tiq dik sù gi, Yohan htoq je kô lhê. ¹² Wui-myhup Sará Yohan é buinyi mai ahkuí jé shoq, mauhkúng mingdán gi, lú chyîn wang nyi é hui mù, sarhé pé gi, haú lé wó yû bekô nghut ri. ¹³ Hkâsu mù gâ le, Yohan é ahkyíng jé shoq, haû myiqhtoi pé banshoq eq tarâ gi, haú hkyô eq séng luí, myiqhtoi htoí to gù nghut lhê. ¹⁴ Nungmoq hap yù nau é nghut jáng, Yohan gi, haú jé lé lô râ ga sù Eliyaq nghut lhê.[✱] ¹⁵ Gyô yù râ nohkyap dap sù gi, gyô yù sháng gaq.

¹⁶ Shí ipyat lhê é byu pé lé, Ngò, hai eq tai kê wú râ lhu?
¹⁷ Yhangmoq gi,

'Nungmoq é matú, ngamoq sampyí mut byi kôlhang, nungmoq gi, a gó kó;

ngamoq, ngaú hkyangsâng kôlhang, nungmoq gi, a ngaú kó.'

ga luí, gai pé má zùng mù, góbang lé wut tai lhum nyi é zoshâng wui eq wui akô. ¹⁸ Hkâsu mù gâ le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga tai akô. ¹⁹ Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bang

é buinùm hpó nghut ri.' ga dum tai akô. Nghut kôlhang, hpaqchyí byéng-yá gi, yhâng é muzô eq saksé tân shit nyi ri." gâ ri.

*Myit A Lhîng É Wà Mó Pê Hkyô
Luk 10:13-15*

²⁰ Hau htâng, Yesuq gi, laklai kumlhá pé je myo kut shit bê nghut kôlhang, myit a lhîng é myuq pé lé tân é gi, ²¹ "Kurazin và mó ê! Náng dingnyé wó ri! Bet-saida và mó ê! Náng dingnyé wó ri! Nungmoq chyáng lé kut shit é laklai kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhîng mù, jimé tû wut lhê, myiwap kyaq gyûn lhê kut bekô râ nghut lhê. ²² Ngò, nungmoq lé tai kôlé, tarâ jéyáng é buinyi má, nungmoq gi, Turuq myuq eq Sidun myuq htoq má je hpuzo kó râ nghut lhê. ²³ Dum mù, Kaperna-um và nàng ê, nàng gi, mauhkúng jé shoq waq toq é hui râ lhu? A nghut, mosumhkung má sheq gyó râ nghut lhê. Náng chyáng kut shit é laklai kumlhá lé, haú Sodom và má kut shit é ru nghut le gi, myuq haú hkû-nyí jé shoq joq nyi râ nghut lhê. ²⁴ Ngò, nungmoq lé tai kôlé, tarâ jéyáng é buinyi má, Sodom và hpuzô é gi, náng htoq shau râ nghut lhê." gâ ri.

*Ngú Nyí Bâng É Matú Bánno Jang
Luk 10:21-22*

²⁵ Haú u lé, Yesuq tai é gi, "Mauhkúng eq myigung é Yhumsíng, Áwa é, Náng gi, haú pé lé, hpaqchyí byéng-yá bò bang eq myit hpaqchyí sé bâng é hí má nghop to luí, zoshâng wui lé tân shit bê nghut é yanmai, Ngò, Náng lé hkya-on lhê ô. ²⁶ Nghut bê, Áwa é, haú gi, Náng ô nau é hkyô nghut ri.

²⁷ Ngá Wa gi, lhunglháng lé Ngá é loq má ap byí to bê. Haú Zo lé, Áwa mai lai luí ó le a sé; Áwa lé le, haú

Zo eq haù Zo mai sé nhâng rã matú hkyin yu é bang mai lai luí ó a sé.

²⁸ Ngú é eq wòlai wun é lunglhang bang ê, Ngá chyáng lé keq; Ngò, nungmoq lé bánno nhâng rã nghut lhê. ²⁹ Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yú keq; haù hkùn, nungmoq é asak woi-nyí bánno kó rã nghut lhê. ³⁰ Haù mù gà le, Ngá é kandang gi, waq lui é htoq agó, Ngá é wò le sòm lhê." gà ri.

12

Bánno Buinyi É Yhumsing

Mrk 2:23-28; 3:1-6; Luk 6:1-5, 6-

11

¹ Haù yoq lhê é Bánno buinyi ranyí má, Yesuq gi, Yhâng é chángzô pé eq rahá yò hkaù mai sô lai ló nyi ri. Yhâng é chángzô pé gi, zòmut é yanmai, kyôshi ratsuí langshap yú mù, zô akò nghut ri. ² Hparishe pé gi, haù lé myàng kôjáng, "Wú aq! Náng é chángzô pé gi, Bánno buinyi má a ge kut jung lé kut nyi akò." ga taí kat akò.

³ Haù hkùn, Yesuq tũ taí é gi, "Dawiq lháng gi, yhâng htâng châng é bang eq rahá zòmut huí é hkùn hkâsu kut é hkyô lé, nungmoq a nghap wú kó lú? ⁴ Dawiq gi, Garai Gasâng é yhúmhaù má wang ê mù, hkyangjông pé mai lai luí, ó le a ge zô é, kyâng tô é muk lé, yhang eq yhâng htâng châng é bang yú zo kó é a nghut kó lú? ⁵ Hau htoq agó, Bánno buinyi má, hkyangjông pé gi, noqkuq yhúmhaù má Bánno buinyi é tará lé shut kôlhang mara a wó é lé, haù tará laiká má nungmoq a nghap wú kó lú? ⁶ Ngò, nungmoq lé taí kólé, haù noqkuq yhúm htoq je ko sù gi, shí má nghut nyi lhê. ⁷ Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê"✠ gà

é lichyúm lé nungmoq sé kô é ru nghut le gi, mara a bò bang lé mara hùn kó rã a nghut. ⁸ Hkâsu mù gà le, haù Byu Yhangzo gi, haù Bánno buinyi é Yhumsing nghut lhê." gà ri.

⁹ Hau htâng, Yhang gi, haù jowò mai e ló mù, yhangmoq é tarajong má wang e ló ri. ¹⁰ Loq rahkyam ajum shi byuq é byù rayuq le, haù má nyi tô ri. Yhangmoq gi, Yesuq lé, "Bánno buinyi má, nõhpyo lhoq gê byi le, tará wang lhê lú?" ga myi é dông, Yhang lé mara hùn rã hkyô ho akò nghut ri.

¹¹ Haù hkùn, Yesuq gi, "Nungmoq chyáng mâ é ó yuq wá, yhumsing é sau radu, Bánno buinyi má dong gyó tô le, a xe htoq yu é nyi kó rã lú? ¹² Byù gi, saù htoq má hpaudap dik é nghut lhê! Haù mù, Bánno buinyi má ge é hkyô kut le, tará wang lhê." ga yhangmoq lé tũ taí ri.

¹³ Hau htâng, Yhang gi, haù loq jum shí sù lé, "Náng é loq nyhang kat aq." ga taí kat jáng, haù yuq gi, loq nyhang kat jáng, loq haù gi, a no é loq su ge byuq bê nghut ri. ¹⁴ Hparishe pé kúm gi, htoq ló kômù, Yesuq lé hkâsu kut wó sat pyám rã hkyô lé, chòm hpyê lhùm bum akò nghut ri.

Garai Hkyin Tô É Dui-nhâng Zoshâng

¹⁵ Yesuq gi, haù hkyô lé sé jáng, haù jowò mai htoq ló bê nghut ri. Byù myo myo le, Yhâng htâng châng bùm kômù, Yhang gi, nõhpyo huí bang banshoq lé lhoq gê byi luí, ¹⁶ Yhang ó yuq nghut é hkyô lé, a taí byông htoq rã matú, yhangmoq lé taí hkùm tô ri. ¹⁷ Haù gi, myiqtói Esai-aq é nhut dông mai taí tô é dang lé lhoq dik rã matú nghut ri. Dang haù pé gi,

¹⁸ "Shí yuq gi, Ngò chyit, Ngò myit nguí luí, hkyin tô é Ngá é dui-nhâng zoshâng nghut lhê;

Ngò gi, Ngá é Woi-nyí, Yhang lé kat byi râ nghut mù,

Yhang gi, tarâ dingmán é hkyô lé byù myû banshoq pé má tai kyo râ nghut lhê.

¹⁹ Yhang gi, haí a hpuq tù é htoq agó, a garu râ nghut lhê; Yhâng é htê lé, hkyô mó pé má wó gyo râ a nghut.

²⁰ Yhang gi, tarâ dingmán é hkyô lhoq ung é hkûn jé shoq,

nâng chap pyám bê jam gâm lé le, lhoq hkyui râ a nghut, my-ihkau za htoq nyí bê myi lé le, lhoq sat pyám râ a nghut.

²¹ Byù myû chângjup gi, Yhâng é mying má myit myoqbyù kó râ nghut lhê."[☆]

gâ ri.

Yesuq Eq Bezebulaq

Mrk 3:20-30; Luk 11:14-23; 12:10; 6:43-45

²² Hau htâng, agè ashop é nat gang wang júng luí, myoqjit nhutjit é byù rayuq lé, Yesuq chyáng shuí lé lô kôjáng, Yesuq gi, haú yuq lé lhom lhoq gê byí ri; haú mù, haú yuq gi, dang le wó nyô, myoq le wó myâng dut bê nghut ri. ²³ Byù hpûng mó gi, haú lé wú maú byuq kômù, "Shí yuq, Dawiq é Yhangzo za gi, nghut lhê laq?" ga tai bum akô.

²⁴ Nghut kôlhang, Hparishe pé gi, haú lé wó gyo kôjáng, "Shí yuq gi, nat gâng pé é zau Bezebulaq* é wum-o a-tsam èq za nat gâng pé lé wó hkat htoq é nghut ri." ga tai bum akô nghut ri.

²⁵ Yhangmoq myit nyi é hkyô lé Yesuq sé mù, yhangmoq lé tai é gi, "Hká mingdán nghut kôle, ahkaú má byoq gâng lhùm nyi kô é nghut jáng, htên byoq byuq râ za nghut lhê; haú eq rajung za, myuq ralhum nghut nghut, yhumhtu ralhum nghut nghut, yhangchang byoq lhùm nyi kô é nghut jáng, haú gi, wó gíng nyi râ a nghut.

²⁶ Tsadán gi, Tsadán lé hkat htoq pyám é nghut jáng, yhumsing gùng yhumsing lhoq hpyoq nyi gù bê nghut ri. Haú su nghut jáng, yhâng é mingdán gi, hkâsu kut wó gíng to râ lhú? ²⁷ Haú mù luí, Ngò gi, Bezebulaq é wum-o a-tsam èq za nat gâng pé lé hkat htoq é nghut jáng, nungmoq é byu pé gi, ó yuq é wum-o a-tsam èq hkat htoq pyám kô é nghut lhê lhú? Haú su nghut jáng, haú bang gi, nungmoq lé tarâ jéyáng bang dut kó râ nghut lhê. ²⁸ Nghut kôlhang, Ngò gi, Garai Gasâng é Woi-nyí èq nat gâng pé lé hkat htoq pyám é nghut jáng, Garai Gasâng é mingdán gi, nungmoq chyáng jé bê nghut ri.

²⁹ Ó yuq nghut kôle, wum-o bò sù lé hí tuí zing pyám é a nghut le gi, yhâng é yhùm má lú wâng mù, yhâng é sutzè lé hkâsu wó lú yù râ lhú? Haú yuq lé hí tuí zing pyám jáng sheq, yhâng é sutzè lé wó lú yù râ nghut lhê.

³⁰ Ngá hkyam shut a dap sù gi, Ngo lé gye kut sù nghut lhê; Ngò eq rahá a shùm tsing sù gi, lhoq pyo pyám é sù nghut nyi ri. ³¹ Haú mù, Ngò, nungmoq lé tai kôlé, byu pé é yubak mara hkanmó eq Garai Gasang lé rhoí dang tai pyám é lhunglhang gi, mara hkyut byí é wó hui râ nghut lhê. Nghut kôlhang, haú Chyoiyúng Woi-nyí lé rhoí dang tai pyám é gi, mara hkyut byí é hui râ a nghut. ³² Haú Byu Yhangzo lé dang dng shut é sù gi, mara hkyut byí é wó hui râ nghut lhê; nghut kôlhang, haú Chyoiyúng Woi-nyí lé dang tai shut é sù gi, shí ipyat má le, htang pyat má le, mara hkyut byí é hui râ a nghut.

³³ Ashi lé wú luí, agàm lé sé râ nghut é yanmai, agàm lé lhoq gê jáng, ashi le gè râ nghut lhê; agàm lé a lhoq gê jáng, ashi le gè râ a nghut; ³⁴ Duq htân lhangmui amyú

☆ 12:21 Esai 42:1-4 * 12:24 Bezebulaq gâ é gi, Tsadán é mying rajà nghut lhê.

ê, nungmoq gi, agè ashop é bang nghut to kôluí nhîng, dang gè hkâsu wó taí kó râ lúhú? Hkâsu mù gâ le, i-mytit unghkaû má bying mui tô é lé za, nhut mai taí htoq lo é nghut lhê. ³⁵ Ge é sù gi, yhumsing é i-mytit unghkaû má é sutdò mai ge é zè pé lé lhoq htoq shit lhê. Agè ashop é sù gi, yhumsing é i-mytit unghkaû má é agè ashop é sutdò mai, agè ashop é zè pé lé lhoq htoq shit lhê. ³⁶ Ngò, nungmoq lé taí kôlé, byù gi, yhumsing taí kat é akyû a bo é dang pé é matú, tarâ jéyang é buinyi má taí sân kyo ra kó râ nghut lhê. ³⁷ Hkâsu mù gâ le, yhumsing mara lut râ le, ó le ó taí é dang pé mai; mara byí é hui râ le, ó le ó taí é dang pé mai, nghut râ nghut lhê." gâ ri.

Limik Kumlhá Lé Dung Kô É Hkyô

Mrk 8:11-12; Luk 11:29-32; 11:24-26

³⁸ Hau htâng má, Hparishe pé eq tarâ sará pé ra-am gi, "Sará ê, ngamoq gi, Nàng, limik kumlhá kut shit râ lé myàng nau ri." ga Yhang lé dúng akò.

³⁹ Haù mù, Yhang tù taí é gi, "Agè ashop é eq lhum a zuí é ipyat shí gi, limik kumlhá dung nyi ri myhi-nhung! Myiqhtoi Yonaq é kumlhá mai lai luí, gotú haí le tún shit râ a nghut. ⁴⁰ Hkâsu mù gâ le, Yonaq gi, ngo mó é wamdau hkaû má sum nyí sum myín lúng é su, haù Byu Yhangzo le, myigùng káng má sum nyí sum myín lúng râ nghut lhê.

⁴¹ Ninewe wà byù wui gi, Yonaq mungdang hko kyô é hkûn myit lhing kô é nghut mù, tarâ jéyang é buinyi má, ipyat shí má é bang eq rahá toq lò luí, ipyat shí má é bang lé mara hùn kó râ nghut lhê; haù Yonaq htoq ko sù gi, ahkuí shí má jé nyi to bê. ⁴² Maupyí má é hkohkâm myhí gi, maumyí ló htâng é mai lé lò mù, Sholumon é hpaqchyí dang lé, lé gyô yù bê nghut mù, haù tarâ

jeýang é buinyi má, ipyat shí má é bang eq rahá toq lò luí, ipyat shí má é bang lé mara hùn râ nghut lhê; haù Sholumon htoq ko sù gi, ahkuí shí má jé nyi to bê.

⁴³ Haù agè ashop é nat gi, byù rayuq chyáng mai htoq lò mù, kyuuq huí é jowò pé má sô yông e lò luí, no râ jowò hkat ho wù le, a myang hô nghut ri. ⁴⁴ Haù hkûn, yhang gi, 'Ngò nyi lai lo é yhùm má dum taù lò wù rà.' ga taí ri. Yhang dum taù jé lò wù le, yhùm haù lé, ó le a sing yu hpyuq é htoq agó, san za rago dut to láng é lé lò myang ri. ⁴⁵ Haù jáng, yhang gi, dum taù é mù, yhang htoq je wui é nat nyhit nat lé shuí lò luí, haù má lo wang nyi to bekò. Haù mù, haù yuq é nyi yap sâmlai gi, hí lhê htoq má je wui lò bê nghut ri; agè ashop é ipyat shí le, haù eq rajung za dut râ nghut lhê." gâ ri.

Yesuq É Yhângnu Eq Yhanggú Pé Mrk 3:31-35; Luk 8:19-21

⁴⁶ Yesuq, shiwa byu pé lé dang rû nyo nyi ashí hkûn, yhângnu eq yhanggu pé gi, Yhang lé nyò nau kômù, shinggan má lé yap tô akò nghut ri. ⁴⁷ Haù mù, Yesuq lé, "Náng nu eq nunggu pé gi, Nang lé nyò nau mù, shinggan má láng yap bum akò." ga taí kyô akò.

⁴⁸ Haù hkûn, Yhang gi, "Ô pé gi, Ngá nu eq Ngá gu pé nghut akò lúhú?" ga tù taí kat ri. ⁴⁹ Hau htâng, Yhang gi, Yhâng é chángzô pé lé loq tun luí, "Wú keq, shí bang gi, Ngá nu eq Ngá é gumang wui nghut bê. ⁵⁰ Hkâsu mù gâ le, mauhkung htoq má é Ngá Wa ô nau é hkyô châng é sù ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bê." ga xoq taí ri.

13

Kyôshi Sân É Dangtú

Mrk 4:1-20; Luk 8:4-15

¹ Haù nyi má yhang, Yesuq gi, yhúmhkaû mai htoq lò mù, wui

nhông yàm má ê zung tô ri. ² Byù hpûng mó gi, Yhâng é lêngkhkyuq má zup zing lé bùm kô é yanmai, Yhang gi, lhai hkaû má doq zung tô ri. Shiwa byu pé kúm gi, gin-gau htoq má yap tô bum akô. ³ Hau htâng, Yhang gi, haú bang lé, dangtú pé dông myo myo tai é má, "Kyô hkyó sù rayuq gi, kyôshi san râ ga htoq e lô ri. ⁴ Yhang, kyôshi sân kat é hkûn, ra-am gi, hkyô má gyó ang mù, nghoq pé eq lé hte zô pyám ri. ⁵ Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lô kôle, ⁶ amyit a wó chin hing é nghut mù, bui htoq lô jáng, lhap kyuq pyám bê nghut ri. ⁷ Dum ra-am gi, zugyóm hkaû má gyó ang lui, zubyap haú pé kô lò mù, wup pyám ri. ⁸ Ra-am dum nghut jáng, myìhpún bo é jang má gyó ang lui, ashi zui lo é gi, sân kat é htoq rashô tú, hkyuq xê tú, sum xê tú, myô jat lo é nghut ri. ⁹ Gyô yù râ nohkyap dap sù gi, gyô yù shàng gaq." ga le tai ri.

¹⁰ Haú hkûn, chángzô pé gi, Yhâng chyáng lé mù, "Nàng gi, hai mù, shí bang lé, dangtú dông tai lê lhu?" ga myi akô.

¹¹ Haú jáng, Yhang tui tai é gi, "Mauhkung mingdán eq sêng é sê gyo wui é hkyô pé lé sê gyo râ ahko ahkáng, nungmoq lé byi to bê, nghut kôhang, yhangmoq lé gi, a byi shí é nghut lê. ¹² Wó to sù lé gi, yhang agùn agó wó râ matú, jat byi shirâ nghut lê. A wó su chyáng mai kúm gi, yhang wó tô é lé lhang yu pyám byi shirâ nghut lê. ¹³ Yhangmoq gi, wú to kôhang, a myàng kó; gyô nyi kôhang, a wó gyo, a sê gyo kó nghut é yanmai, yhangmoq lé Ngò dangtú dông tai rá é nghut lê. ¹⁴ Haú gi, 'Nungmoq gi, wó gyô tô nyi kôhang, sê gyo kó râ a nghut; myang tô nyi kôhang, wú sé kó râ a nghut.

¹⁵ Hkâsu mù gâ le, byù shí bang gi, myit nhikshi jit byuq bê; yhangmoq é nohkyap gi, a wó gyo kó, myoqjí le chum byuq bekô nghut ri.

Haú su a nghut le gi, yhangmoq, myoq myàng no gyo mù, i-myt bun bóng lui, lêng lò kômù,

Ngò, yhangmoq lé yâ gè byi berâ nghut lê.*

gâ é, Esai-aq é myiqhtoi dang lé lhoq dik é nghut ri. ¹⁶ Nghut kôhang, nungmoq é myoq gi, wó myàng mù, nungmoq é nohkyap gi, wó gyô é yanmai, nungmoq gi, hkungsô wó nyi ri. ¹⁷ Hkâsu mù gâ le, Ngò, nungmoq lé teng za tai kôle, nungmoq wó myàng, wó gyô é pé lé, myiqhtoi pé eq dingmán bang myo myo gi, myàng nau gyo nau kôhang, a wó myàng, a wó gyo kó nghut ri.

¹⁸ Ahkuí, kyôshi san sù eq sêng é dangtú é lichyúm lé rago gyô wú keq; ¹⁹ Hkyô má gyó âng é kyôshi gi, mauhkung mingdán eq sêng é danglù lé wó gyo kôhang, a sê gyô é yanmai, haú agè ashop sù lé lô mù, yhâng é i-myt hkaû má san kat tô é kyôshi lé, lé yu pyám byi é hui sù lé gá nau é nghut lê. ²⁰ Luqgok yò pé má gyó âng é kyôshi gi, mungdang lé wó gyo jáng, radá dâm gabú myit eq hap yù kôhang, ²¹ amyit a wó chin é yanmai, razup zo za yuq mù, mungdang é yanmai, wuìhkê é eq zing-rí é hui kôjáng, hân hân htak ló byuq é sù lé gá nau é nghut lê. ²² Zugyóm má gyó âng é kyôshi gi, haú mungdang lé wó gyô yù kôhang, shí ipyat lê é myit wui myit hke hkyô pé eq hkyô shuí nghoq jung ngùn hing zèhkoq eq hup pyám é yanmai, ashi a wó zui é sù lé gá nau é nghut lê. ²³ Nghut kôhang, myìhpún bo é jang má gyó âng é kyôshi kúm gi, mungdang lé

* 13:15 Esai 6:9-10

wó gyo mù, sê gyô yu é sù lé gá nau é nghut lhê. Haú yuq ashi zuí é gi, san kat é htoq rashô tú, hkyuq xê tú, sum xê tú, myô jat lo é nghut ri.

Myoqgàm Dangtú

²⁴ Yesuq, yhangmoq lé dangtú đông xoq taí kyô é gi, "Mauhkúng mingdán gi, ge é kyôshi lé, yò má san kat sù rayuq eq du ri. ²⁵ Byu pé yhup myhí tô bum é u lé, yhâng é gyè gi, lé jé mù, guq gàm gyoro má, myoqshi lé sân to hkô luí, taú ló byuq bê nghut ri. ²⁶ Guq gàm yuq lò mù, guq nhâm htoq lo é hkûn, myoqgàm le bo yuq htoq lo ri.

²⁷ Yhumsíng hpô é dui-nhâng zoshâng wui gi, yhâng chyáng lé jé mù, 'Yhumsíng è, ge é kyôshi lé za yò má sân tô é a nghut lú? Myoqgàm pé gi, hkâmai htoq lo é lú?' ga myí kôjáng, ²⁸ haú yhumsíng hpô gi, 'Gumlau gye eq kut é nghut ri.' ga tú taí ri.

Haú jáng, dui-nhâng zoshâng wui gi, 'Ngamoq, myoq haú pé lé é nut pyám rá lé, nàng ô nau ri lú?' ga myí akô.

²⁹ Haú hkûn, yhang gi, 'Hká nut pyám kó; hkâsu mù gá le, nung-moq, myoq haú pé lé nut é hkûn, guq gàm pé lé le bo záng nut pyám kó rá nghut lhê. ³⁰ Kyôshu yoq jé shoq rahá yuq to kó sháng gaq; haú hkûn, myoqgàm pé lé hí hkyin tsíng yù mù, nyhê hkyô pyám rá matú hkyom dít to luí, guq lé kúm gi, shù yù mù, ngá é chyí má tsíng kat to rá matú, kyô shu bang lé ngò taí rá nghut lhê.' ga tú taí ri." gá ri.

Angshi Cham Eq Múnchi Dangtú *Mrk 4:30-34; Luk 13:18-21*

³¹ Hau htâng, Yesuq gi, yhang-moq lé gotú dangtú ralhum dum xoq taí é gi; "Mauhkúng mingdán gi, byù rayuq eq, yhâng hkyâm má hô tô é angshi cham eq wui ri. ³² Angshi cham haú gi, kyômyui jí banshoq htoq má je tiq é nghut

kôle, yuq kô lò jáng, hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq pé má, maulat nghoq zô pé lé wó zung nô bum lhê." gá ri.

³³ Yhang, gotú dangtú dum xoq taí é gi, "Mauhkúng mingdán gi, myiwe rayuq eq sungso mún sum búng má yu nyhó luí, haú pé banshoq lé wó lhoq dau nhang é múnchi eq wui ri." gá ri.

³⁴ Yesuq gi, byù moq mó lé, haú pé banshoq dangtú đông mai chyat taí ri; yhangmoq lé, dangtú a bo é haí lhang a taí wú nghut ri. ³⁵ Haú gi,

"Ngá nhut lé hpóng mù, dangtú đông mai taí rá; mingkan lé sân-hi hpan é mai zaú tô é hkyô pé lé taí sân kyo rá nghut lhê."*

ga, myiqhtoi đông taí tô é dang lo dik é nghut ri.

Myoqgàm Dangtú Lé Taí Sân Kyô É Hkyô

³⁶ Hau htâng má, Yesuq gi, byù moq mó mai htoq lò mù, yhúmkaú má wang ló ri. Haú hkûn, Yhâng é chángzô pé gi, Yhâng chyáng lé lô kômù, "Yò má é myoqgàm dangtú eq sêng é hkyô lé taí sân kyo laq." ga taí akô.

³⁷ Haú jáng, Yhang tú taí é gi, "Ge é kyôshi san sù gi, haú Byu Yhangzo nghut ri. ³⁸ Yô gi, mingkan nghut ri; ge é kyôshi gi, mauhkúng mingdán é yhangzô pé nghut akô. Myoqgàm pé kúm gi, haú Tsadán é yhangzô pé nghut akô; ³⁹ haú lé châng hkat sân é gumlau gyè gi, nat Tsadán nghut ri. Kyôshu yoq gi, mingkan htúm é ahkyíng nghut ri; kyô shu bang gi, maumang lagyô pé nghut akô.

⁴⁰ Haú myoqgàm pé lé, nut yù mù, myi má nyhê pyám é su, haú mingkan htúm é ahkyíng má dut rá nghut lhê. ⁴¹ Haú Byu Yhangzo gi, Yhâng é maumang lagyô pé lé nhâng rá nghut lhê; haú mù, haú

* 13:35 Hkya-on 78:2

bang gi, hkyô lhoq ngoq nhang é bang banshoq eq agè ashop hkyô kut é bang lhunglhang lé, Yhang é mingdán mai hkyin she htoq yû mù, ⁴² gyúng nyi é myibung hkyûng hkaû má dú kat pyám kó râ nghut lhê; hau má, ngaubyi ngaù nhap eq zuì kyik kyik shoq hpuzô nyi kó râ nghut lhê. ⁴³ Haú hkûn, dingmán bang gi, yhangmoq Yhangwâ é mingdán má búi su duqbo nyi kó râ nghut lhê. Nohkyap dap sù gi, gyô yù sháng gaq.

Haq Tô É Sutzè Dangtú

⁴⁴ Mauhkûng mingdán gi, yò má haq tô é sutzè eq wuí ri. Sutzè haú lé myang é sù gi, haú lé saí haq to mù, gabú myit eq taù ló luí, yhang wó é banshoq lé ûng pyám mù, yò haú lé wui yu ri.

⁴⁵ Dum, mauhkûng mingdán gi, réng é palhé lé châng ho wún é hpugá hpó eq wuí ri. ⁴⁶ Yhang gi, gyai hpaù é palhé lé myàng jáng, yhang wó é banshoq lé ló ûng pyám mù, haú lé wui yu ri.

Gùn Lé Dangtú Yu É Hkyô

⁴⁷ Mauhkûng mingdán gi, nhông má, ngozo ajà já lé wó dú nghop yu é gùn eq le wuí ri. ⁴⁸ Gùn haú má ngozo byíng jáng, ngo kóng bang gi, wui yàm má she htoq yû mù, zung to luí, ge é pé lé gi, ngo-pyap má guq kat yû luí, a ge é pé lé gi, dú pyám akô. ⁴⁹ Haú eq rajung za, minkan htùm é ahkyíng má le, maumang lagyô pé gi, gyó lé lô mù, agè ashop é bang lé, dingmán bâng chyáng mai gam htoq yû luí, ⁵⁰ ngaubyi ngaù nhap eq zuì kyik kyik shoq hpuzô nyi râ nghut é, gyúng nyi é myibung hkyûng hkaû má dú kat pyám kó râ nghut lhê.

⁵¹ Shí hkyô banshoq lé nungmoq sê gyo bekô lúhú?" gâ ri.

Haú hkûn, yhangmoq gi, "Sê gyo bê." ga tú tai akô nghut ri.

⁵² Hau htâng, Yesuq gi, yhangmoq lé, "Mauhkûng mingdán eq séng luí mhoq yû bê é tará sará ó nghut kôle, yhang mhoq é hkyô gi, yhumsing é sut-púnglhung hkaû mai zè sik zè xau lé yu htoq é yhumsing hpó rayuq eq wuí ri." ga dum tai ri.

Myiqhtoi, Myoqdong A Wó Dut É Jang

Mrk 6:1-6; Luk 4:16-30

⁵³ Yesuq gi, dangtú haú pé lé ban tai jáng, haú jowò mai htoq e ló bê nghut ri. ⁵⁴ Yhang gi, Yhang é yhummau má jé ló jáng, byu pé lé, yhangmoq é tarajong má mhoqshit ri; haú hkûn, yhangmoq gi, gyô maú byuq kôluí, "Byù shí yuq gi, hpaqchyí byéng-yá shí eq hpungwup a-tsam mó shí pé lé, hkâmai wó yu é nghut lhê là?" ⁵⁵ Yhang gi, laksîma hpô é yhangzo a nghut lúhú? Yhangnú é myíng gi, Mariq gâ lhê a nghut lúhú? Yhanggú pé gi, Yakuq, Yosep, Simun eq Yudaq gâ é bang a nghut kó lúhú? ⁵⁶ Yhang nhammó pé le, nga-nhung eq rahá nghut nyi lhê a nghut kó lúhú? Haú su nghut le nhîng, haú pé banshoq lé, Yhang hkâmai wó yu é nghut lhê là?" ga myí bùm kômù, ⁵⁷ Yesuq lé myit a ngón dut bùm bekô nghut ri.

Yesuq kúm gi, yhangmoq lé, "Myiqhtoi rayuq gi, yhumsing é yhummau eq yhumsing é yhùm má za, myoqdong a lhaq wó wú é nghut lhê." ga tú tai kat ri.

⁵⁸ Yhangmoq lumjîng myit a bò kô é yanmai, Yesuq gi, haú má, laklai kumlhá myo myo a kut shit lo nghut ri.

14

Wui-myhup Sará Yohan Shi Byuq É Hkyô

Mrk 6:14-29; Luk 9:7-9

¹ Haú hkûn, mauzau Herut gi, Yesuq eq séng é ludang lé wó gyo jáng, ² yhang a-ô má é bang lé, "Shí yuq gi, Wui-myhup Sará Yohan

nghut ri-nhung; Yhang gi, shi é mai dum dui toq lo é nghut mù, hpungwup a-tsam haú pé lé wó kut é nghut ri." ga taí ri.

³ Herut haú su gâ é gi, yhanggu Hpilip é yhangmyi Herudiaq é yanmai, Yohan lé chyup tuí yù mù, htóng hkyô pyâm é yanmai nghut ri. ⁴ Hkâsu mù gâ le, Yohan gi, yhang lé, "Nàng, myiwe haú lé hâng yu é gi, tarâ a wang é nghut lhê." ga taí byí nyi é yanmai nghut ri. ⁵ Herut gi, Yohan lé sat pyâm naú kôlhâng, mingbyú wui lé gyuq é yanmai, a wám sat nghut ri; haí mù gâ le, yhangmoq gi, Yohan lé myiqhtoi tsuq nyí kô é yanmai nghut ri.

⁶ Nghut kôlhâng, Herut é hkû ladu hkyúm buinyi má, Herudiaq é yhangzo byizo gi, yhangmoq é hí má gó shit é lé, Herut gi, gyai yhang wú myit nguì mù, ⁷ byizo haú lé, yhang haí dung le haí byi râ ga dakam é danggidiq byí ri. ⁸ Byizo haú gi, yhângnu hpaqchyí byí é lé gyô yù mù, "Shí, bó má, Wui-myhup Sará Yohan é ulhum lé, kat byi laq." ga, Herut lé dúng ri. ⁹ Mauzau hpó gi, myit a ngón dut byuq kôlhâng, yhang dakam tô é danggidiq é yanmai le, bíng pê é myoqdong lé tê nau é yanmai le, yhang dúng é lé, byi râ matú, ¹⁰ htóng hkaú má lúng tô é Yohan é ulhum lé hpyit râ hkunmó hkyô kat bê nghut ri. ¹¹ Yohan é ulhum lé bó má kat luí, myiwe zo haú lé byi jáng, myiwe zo haú gi, haú lé yhângnú chyáng yu ló byí ri. ¹² Haú mù, Yohan é chángzô pé gi, yhâng é màng lé lé yù luí, myhup pyâm bekô nghut ri. Hau htâng, yhangmoq gi, Yesuq lé ló taí kyô akô nghut ri.

Byù Ngo Hkyíng Lé Byi Tsô É Hkyô

Mrk 6:30-44; Luk 9:10-17; Yhn 6:1-14

¹³ Yesuq gi, haú hkyô lé wó gyo jáng, haú mai lhaí ji mù, tsím tsâm é

jowò shut Yhang baú e ló ri. Haú lé, byu pé wó gyô bùm kôjáng, wà mó pé mai htoq lé lô kômù, hkyí hkyô Yhâng htâng châng e ló akô nghut ri. ¹⁴ Yesuq gi, lhaí mai gyó dap ló é hkûn, byù moq mó nyi to lánq é lé myàng jáng, yhangmoq lé wú shogyo luí, nò bang lé lhoq gê byí ri.

¹⁵ Myinhâng jé lô jáng, haú chángzô pé gi, Yhâng chyáng lé kômù, "Shí má gi, tsím tsâm é jowò nghut é htoq agó, bui le gyum ló bê nghut mù, shiwa byu pé gi, wà pé shut ló luí, yhangmoq é matú zôjung ló wó wui kó sháng gaq, yhangmoq lé nhang kat aq hkoi." ga taí akô.

¹⁶ Haú hkûn, Yesuq gi, "Yhangmoq ló a ra. Nungmoq, yhangmoq lé rajung jung byi tso keq." ga tû taí kat ri.

¹⁷ Haú su ga jáng, yhangmoq gi, "Muk ngo long eq ngozo í du za ru wó lhê." ga dum tû taí akô.

¹⁸ Haú jáng, Yesuq gi, "Yu lò keq." ga tû taí mù, ¹⁹ shiwa byu pé lé, wàhu yò má zùng nhang ri. Hau htâng, Yhang gi, haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, muk lé hpê gàm mù, chángzô pé lé byí ri. Haú chángzô pé gi, shiwa byu pé lé gàm byí akô nghut ri. ²⁰ Yhangmoq banshoq bang zô gyí bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsíng yu ashí kô nghut ri. ²¹ Haú má zô é bang gi, myiwe wui eq zoshâng wui lé a nghap lhôm é za, yuqgê baú ngo hkyíng kô bo ri.

Yesuq, Wui Htoq Má Sô É Hkyô
Mrk 6:45-56; Yhn 6:15-21

²² Yesuq gi, haú shiwa byu pé lé byo ló nhang nyi é hkûn jáng, chángzô pé lé lhaí má wang ji nhâng mù, tû tap shut dap ló lánq nhâng ri. ²³ Shiwa byu pé lé nhang pyâm é htâng má, Yhang gi, kyúdung râ

ga, Yhang baú bùm shut doq e ló ri. Myinhâng chutshúm zó jé shoq, Yhang baú haú má nyi nyi ri. ²⁴ Haú u lé, lhaí gi, gin-gau mai tsómra wê é jowò má jé é hkún, lai tau mut é yanmai, wuìheng èq gyai yhang lo bat nhún é hui zô ri.

²⁵ Htang napsùn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri. ²⁶ Haú mù, chángzô pé gi, Yesuq nhông htoq má sô nyi é lé myàng kôjáng, gyuq dân kômù, "Sobyô ô!" ga gyuq nán é èq taí garú akô nghut ri.

²⁷ Haú jáng yhang, Yesuq gi, yhangmoq lé, "Hkâgyuq kó! Ngò ru nghut lhê; myit wum lhoq kíng keq." ga nyo kat ri.

²⁸ Haú hkún, Petruq gi, "Yhumsíng ê, Nàng yhang ru nghut le gi, ngo lé, wuì htoq mai sô lé lô nhâng laq." ga taí kat ri.

²⁹ Haú jáng, Yesuq gi, "Lé lô aq." ga tú taí kat ri.

Haú mù, Petruq gi, lhaí mai gyó mù, wuì htoq mai Yesuq chyáng sô e ló ri. ³⁰ Nghut kôlhang, yhang gi, laidun htan é lé myang kat jáng, wú gyuq luí, wuì má nop ló nyi mù, "Yhumsíng ê, ngo lé hkyi yù laq." ga wut garú kat ri.

³¹ Yesuq gi, radá dân yhâng é loq lham kat luí, Petruq lé llang zing to mù, "Lumjíng myit shau sù ê, nàng haí mù úng-âng lhê lú?" ga taí ri.

³² Yhangnhik, lhaí má wàng kôjáng, laidun le zím byuq bê nghut ri. ³³ Hau htàng, haú lhaí má lúng tô é bang gi, Yhang lé paí gop mù, "Nàng gi, gè gè yhang, Garai Gasâng é Yhangzo nghut bê." ga taí akô nghut ri.

³⁴ Yhangmoq gi, gû dap ló kômù, Genesarat mau má jé wang ló bekô nghut ri. ³⁵ Haú mau má é bang gi, Yesuq lé wú sé kôjáng, awuì ayàm má é bang banshoq lé kyô kat akô. Haú mù, byu pé gi, nòhpyo hui

banglunglhang lé, shuì lé lô kômù, ³⁶ nòhpyo hui bang lé, Yhâng é bushi htàng má za lhang záng nhâng rá matú dúng tôngbán akô; Yhang lé záng é lunglhang bang gi, lhoq gè byi é huì bekô nghut ri.

15

Sansêng É Hkyô Eq A Sansêng É Hkyô

Mrk 7:1-23

¹ Hau htàng má, Hparishe pé eq tarà sará pé ra-am gi, Yerusalem wà mó mai Yesuq chyáng jé lé lô kômù, ² "Nàng é chángzô pé gi, haí mù luí, íchyí iwa pé é htungli lé a cháng kut akô lú? Yhangmoq gi, loq hí a chí é zang zô akô nghut ri." ga, lé taí akô.

³ Haú jáng, Yesuq tú taí é gi, "Nungmoq gi, haí mù, nungmoq é htungli é yanmai, Garai Gasâng é hkunmó lé a cháng kô é lú?" ⁴ Hkâsu mù gâ le, Garai Gasang gi, "Nungmoq é inu iwa lé, hkungga keq."* ga le, 'Inu iwa lé, nhing é sù ó yuq nghut kôle, sat pyâm é hui rá lhê.* ga le, taí tô é nghut lhê. ⁵ Nghut kôlhang, nungmoq taí é gi, 'byu rayuq yuq, yhumsíng é yhangnu yhangwa lé byi âng é zè lé, Garai Gasang lé byi rá chyunghuq nghut lhê ga taí é nghut jáng, ⁶ haú yuq gi, yhangwa lé hkungga nó a ra.' gâ akô nghut ri. Haú đông mai, nungmoq gi, nungmoq é htungli é yanmai, Garai Gasâng é mungdang lé he-ngik pyâm akô nghut ri.

⁷ Gegùn labyoq kut bang ê! Nungmoq eq séng luí, myiqhtoi Esai-aq htoi tô é dang gi, têng ri. ⁸ Myiqhtoi dang haú gi,

'Byù shí bang gi, nhut htoq mai za Ngo lé hkunggâ akô; yhangmoq é myit nhikhlum gi, Ngò eq wê gâng nyi akô.

⁹ Yhangmoq, Ngo lé noqkuq nyi kô é gi, akôm má za nghut nyi ri;

hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.[✧]
gâ é nghut lhê." gâ ri.

¹⁰ Hau htâng, Yesuq gi, shiwa byu pé lé, Yhâng chyáng wut yù luí, "Gyô yù mù, sé lo keq. ¹¹ Nhut má wang lo é hái jung le, byù lé a sanséng dut nhang é a nghut, nhut mai htoq lo é pé sheq, byù lé a sanséng dut nhang é ru nghut lhê." ga taí ri.

¹² Haú hkûn, haú chángzô pé gi, Yhâng chyáng lé lô kôluí, "Hparishe pé gi, shí hkyô lé wó gyo mù, nhik-yô nyi bùm kô é lé, Nàng sê lhê l hú?" ga myi kôjáng,

¹³ Yhang gi, "Mauhkûng htoq tsáng myhâng mâ é Ngá Wa a hô tô é agàm hkangmô gi, apùn eq roq nut pyâm é hui rà nghut lhê. ¹⁴ Yhangmoq é yanmai, myit hkâ-myo kó; yhangmoq gi, myoqjit bang nghut kôle, myoqjit é bang lé hkyô-u she é bang nghut akô. Myoqjit yhangchang hkyô-u she l hùm é nghut le gi, í yuq é yhang donghkong má byit gyó kó rà za nghut lhê." ga tú taí ri.

¹⁵ Haú hkûn, Petruq gi, "Ngamoq lé, dangtú hau é lichyúm taí sân kyo laq." ga taí jáng, ¹⁶ Yesuq gi, "Nung-moq, ahkuí le haú-í yhang go nyi ashí kô luq? ¹⁷ Nhut má wang lo é hái jung le, wamdaú hkaú má jé wang ló mù, gungdaú mai dum htoq ló é nghut lhê. ¹⁸ Nghut kôlhang, nhut mai htoq lo é gi, myit nhiklhum mai htoq lo é nghut mù, byù lé a sanséng dut nhang ri. ¹⁹ Hkâsu mù gâ le, myit nhiklhum mai htoq lo é gi, agè ashop é dông myit é hkyô pé, byù sat é hkyô, su-myi sulàng lú hkyô, ashop é dông gungsho zùm yap é hkyô, hkaú é hkyô, a tengmán é saksé hkâm é hkyô, lumù gansang é hkyô pé nghut ri. ²⁰ Haú pé gi, byù lé a sanséng dut nhang é hkyô pé nghut ri; loq a chí e za zo shuq

é gi, byù lé a sanséng a dut nhang é nghut lhê." ga taí ri.

Hkanan Myiwe Myhí Rayuq É Lumjǎng Myit

Mrk 7:24-30

²¹ Hau htâng, Yesuq gi, haú mai Turuq eq Sidun mau shut htoq e ló bê nghut ri. ²² Haú hkûn, haú mau má nyi é Hkanan myiwe myhí rayuq gi, Yhâng chyáng lé jé mù, "Dawiq é Yhangzo, Yhumsíng ê, ngo lé shogyô yù laq ô! Ngá byizo gi, nat gang wang júng mù, gyai yhang nò gyín nyi ri." ga taí garú ri.

²³ Nghut kôlhang, Yesuq gi, dang rahkun le a tú taí nghut ri. Haú mù, Yhâng é chángzô pé gi, Yhâng chyáng lé jé kô mù, "Myiwe myhí haú lé ló nhang pyám aq; hái mù gâ le, yhang gi, nga-nhông é htâng má cháng garú nyi ri." ga taí akô.

²⁴ Yesuq gi, "Byuq byuq é sau pé su nghut nyi é Israelaq byu pé chyáng sheq, Ngo lé nhang kat é ru nghut lhê." ga taí ri.

²⁵ Haú hkûn, myiwe myhí haú gi, Yhâng é hí má lé mù hkyihput htuq luí, "Yhumsíng ê, ngo lé garúm yù laq ô!" ga taí ri.

²⁶ Yesuq gi, "Zô wui chyáng mâ é zoshuq lé yù mù, hkuí pé lé byi tsô é jung a nghut." ga tú taí jáng, ²⁷ myiwe myhí haú gi, "Yhumsíng ê, haú kúm nghut ri; nghut kôlhang, hkuí pé l háng, yhumsíng hpô é zoh-poq mai gyó é zang cham zang htâng lé, zô akô mhai." ga dum taí ri.

²⁸ Haú mù, Yesuq gi, "Myiwe zo é, náng é lumjǎng myit gi, kô nyi ri! Nàng dúng é hkyô lé gyo byi bê nghut lhê." ga tú taí ri. Haú hkûn jáng, myiwe myhí hau é byizo le ge byuq bê nghut ri.

Byù Myi Hkyǎng Lé Byi Tsô É Hkyô

Mrk 8:1-10

29 Yesuq gi, haú mai htoq ló luí, Galile nhông yàm má é jé mù, bùm shut doq ló luí, ló zung nyi ri. 30 Haú hkùn, byù moq mó gi, hkyí hten bang, myoqjit bang, gung-yùn bang, nhut jit bang eq nó bang gotú myo myo lé shuí lé lô kômù, Yhâng é hkyí wang má lé nyhi to kô é nghut luí, Yhang gi, haú bang lé lhoq gê byí ri. 31 Haú shiwa byu pé gi, nhut jit bang dang wó nyô kô é lé le, gung-yùn bang ge byuq é le le, hkyí hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Israelaq é Garai Gasang lé hkya-ôn bum akô nghut ri.

32 Yesuq gi, Yhâng é chángzô pé lé wut yù mù, "Ngò, shí bang lé wú shogyô ri; yhangmoq gi, Ngò eq rahá nghut nyi é sum nyí bò bê, haí le a myàng zo kó nghut ri. Yhangmoq, hkyolat má mut yut ló yut kó abe, yhangmoq zòmut to gú lé, Ngò a nhang kat naù." ga taí ri.

33 Haú hkùn, Yhâng é chángzô pé gi, "Isù é yoso má nhing, byù shí myhò bang lé luq shoq byi tso rà zoshuq gi, hkarâ é wó rà lúhú?" ga myí akô.

34 Yhang gi, "Nungmoq, muk hkâ-myhó long wó akô lúhú?" ga tau myi jáng, yhangmoq gi, "Muk nyhit long eq ngo-nú zo ratsuí wó lhê." ga tú taí akô.

35 Haú mù, Yhang gi, byù hpûng lé, myigùng htoq má zùng nhang ri. 36 Hau htâng, Yhang gi, haú muk nyhit long eq ngozo lé yù mù, jeju ban hkya-on jáng, myhik hpé luí, haú chángzô pé lé byi jáng, yhangmoq gi, byù hpûng lé gâm byí akô nghut ri. 37 Yhangmoq lhunglhâng bang zô gyí bùm kô é htâng má, haú chángzô pé gi, amyit ahtâng lé nyhit mung bying shoq wó guq tsing yu ashí kô nghut ri. 38 Haú hkùn zô é bang má, myiwe wui eq zoshâng wui lé a ngaph lhôm é za, yuqgè wui baú myí hkyíng yuq bo

ri. 39 Yesuq gi, byù hpûng lé ló nhang pyâm é htâng má, lhaí má wang jì mù, Magadan mau shut dap e ló bê nghut ri.

16

Kumlhá Dung Kô É Hkyô

Mrk 8:11-13; Luk 12:54-56

¹ Hparishe pé eq Saduke pé gi, Yesuq chyáng lé jé kômù, Yhang lé chyam wú é dông, mauhkûng má é kumlhá kut shit rà matú, dúng akô.

² Haú mù, Yhang gi, yhangmoq lé, "Nungmoq gi, myinhâng jé jáng, 'Mau hpong rà nghut lhê, hkâsu mù gâ le, mauhkûng ne ri.' ga le, ³ napkyó lé nghut jáng, 'Hkû-nyí laidun lò rà nghut lhê, hkâsu mù gâ le, mauhkûng nè mù, noq ri.' ga le, lhaq taí akô. Nungmoq gi, mauhkung é isâm lé wú mù sê gam hkoq yù kô é nghut kôhang, shí ipyat lhê é kumlhá lé gi, a sê gam hkoq yù kó nghut ri. ⁴ Agè ashop é eq lhum a zuí é ipyat shí gi, limik kumlhá lé ho nyi akô; nghut kôhang, Yonaq é kumlhá mai lai luí, gotú haí le tûn shit rà a nghut." ga taí ri. Hau htâng, Yesuq gi, yhangmoq chyáng mai htoq ló bê nghut ri.

Hparishe Pé Eq Saduke Pé É

Múnchi

Mrk 8:14-21

⁵ Yhangmoq, nhông hé hpoq shut gú dap ló kô é hkùn, haú chángzô pé gi, muk yu chûng rà lé tô-myhí pyâm akô. ⁶ Haú hkùn, Yesuq gi, "Hparishe pé eq Saduke pé é múnchi lé, sidiq luí, koi pyâm nyi keq." ga, yhangmoq lé taí kat ri.

⁷ Yhangmoq gi, "Nga-nhúng, muk a yu chung é yanmai, haú su ga taí é nghut ri." ga luí, taí lhum bum akô nghut ri.

⁸ Yhangmoq haú su taí lhùm nyi kô é lé Yesuq sé jáng, yhangmoq lé, "Lumjing myit shaú é bang ê, muk a bo é hkyô lé, haí mù taí lhùm nyi akô lúhú? ⁹ Ahkuí jé shoq, nungmoq

gi, a sê gyo shi kó lúhú? Muk ngo lông eq byù ngo hkying lé byi tsô é htâng, nungmoq hkâ-myhó mung wó dum guq tsing yù kô é lé le, ¹⁰ muk nyhit lông eq byu myi hkying lé byi tsô é htâng, nungmoq hkâ-myhó mung wó dum guq tsing yù kô é lé le, nungmoq a myit bun kó lúhú? ¹¹ Ngò gi, muk eq séng luí taí é a nghut é lé, nungmoq, hkâsu mù a sê gyo kô é lúhú? Hparishe pé eq Saduke pé é múnchi lé koi pyám keq nghú taí é ru nghut lhê." ga taí ri. ¹² Háu hkûn sheq, Yhang taí é gi, muk má chung é múnchi lé koi pyám râ matú taí é a nghut e za, Hparishe pé eq Saduke pé é mhoqshit hkyô lé koi pyám râ matú taí é ru nghut é lé, yhangmoq sê gyô akô nghut ri.

Yesuq Lé, Petruq Yin Yu É Hkyô

Mrk 8:27-30; Luk 9:18-21

¹³ Yesuq gi, Kesare-Hpilipi wà mó nâm mâ é mau má jé é hkûn, Yhâng é chángzô pé lé, "Háu Byu Yhangzo gi, ó yuq nghut lhê ga, byu pé taí akô lúhú?" ga myí ri.

¹⁴ Háu hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a nghut jáng, gotú my-iqhtoi rayuq yuq nghut ri ga, taí akô." ga tú taí kôjáng, ¹⁵ Yhang gi, "Háu jáng, nungmoq gi, Ngo lé ó yuq nghut lhê nghu akô lúhú?" ga, yhangmoq lé xoq myí ri.

¹⁶ Háu hkûn, Simun Petruq gi, "Nàng gi, rú dui nyi é Garai Gasâng é Yhangzo, Hkrisduq nghut ri." ga tú taí ri.

¹⁷ Háu mù, Yesuq tú taí é gi, "Yonaq é yhangzo Simun ê, nàng gi, hkungsô wó nyi ri; hkâsu mù gâ le, nang lé háu hkyô tûn shit é gi, byù mai a nghut, mauhkûng htoq má nyi é Ngá é Íwa mai tûn shit é ru nghut lhê. ¹⁸ Ngò, nang lé taí lé, nàng gi, Petruq* nghut luí, luqgok shí má, Ngò, Ngá é

noqkuq hpúng lé xuq to râ nghut mù, háu moming hkúmdong pé gi, hpúng háu lé wó úng râ a nghut. ¹⁹ Mauhkûng mingdán é zoqshi pé lé, Ngò, nang lé ap byi râ nghut lhê; myigùng htoq má, nàng tuí to má tuí to lé, mauhkûng htoq má le, tuí to râ nghut lhê; myigùng htoq má, nàng lhoq lhut má lhoq lhut lé, mauhkûng htoq má le, lhoq lhut byi râ nghut lhê." gâ ri. ²⁰ Háu htâng, Yhang Hkrisduq nghut é hkyô lé, ó lé le a taí kyo râ matú, Yhâng é chángzô pé lé taí hkûm kat ri.

Yesuq Gi, Yhang Shí Râ Lé Hí Te Taí É Hkyô

Mrk 8:31—9:1; Luk 9:22-27

²¹ Yesuq gi, Yhang Yerusalem wà mó má ló mù, suwún wuí, hkyangjong agyi pé eq tará sará pé é loq má, zing-rí é myo myo hui zo luí, sat pyám é hui ra râ nghut kôle, sum nyi nghú râ buinyi má, lhoq toq yu é hui râ nghut é hkyô lé, háu hkûn mai, Yhâng é chángzô pé lé taí kyo hi ló bè nghut ri.

²² Háu mù, Petruq gi, Yhang lé rahkyam shut shuí htoq yù mù, "Yhumsing ê, háu hkyô Náng chyáng hkâ-nhám le a dut sháng gaq." ga Yhang lé tân ri.

²³ Yesuq gi, lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq séng é hkyô lé a myit e za, byù eq séng é hkyô lé za myit é sù nghut mù, Ngá é matú myit leqbat jowò nghut ri." ga taí ri.

²⁴ Háu htâng, Yhang gi, Yhâng é chángzô pé lé, "Ngá htâng cháng naù sù ó yuq nghut kôle, yhumsing gùng yhumsing he-ngik pyám mù, yhumsing é tapzing lé waq chùng luí, cháng ra râ nghut lhê. ²⁵ Hkâsu mù gâ le, yhumsing é asak lé hkyi yù naù sù ó yuq nghut kôle, asak sum râ nghut lhê; nghut kôlhang,

* 16:18 Grik đông Petruq gâ é gi, luqgok lé gâ é nghut lhê.

Ngá é yanmai, yhumsing é asak sùm pyâm é sù kúm gi, asak wó yú râ nghut lhê. ²⁶ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, hai akyú bò râ lhú? Byù gi, yhumsing é asak woi-nyí lé, hai èq wó htaí yù râ lhú? ²⁷ Haú Byu Yhangzo gi, Yhâng Wâ é hpungwup shingkang bo é èq, Yhâng Wâ é maumang lagyô pé eq rahá jé lé lô râ nghut lhê; haú hkûn, Yhang gi, yuq hkangmó lé, yhumsing kut lai bê eq rajung za akyú byi râ nghut lhê. ²⁸ Ngò, nungmoq lé teng za taí kôlé, ahkuí shí má yap to bang ra-am gi, haú Byu Yhangzo, Yhâng é mingdán eq jé lé lo é lé, a myang é za shí kó râ a nghut." ga taí ri.

17

Yesuq, Isâm Htaí Lo É Hkyô
Mrk 9:2-13; Luk 9:28-36

¹ Hkyuq nyi lai htàng má, Yesuq gi, Petruq lé le, Yakuq eq yhanggu Yohan nhiktàng lé le, shuí chúng mù, yhangmoq baú myhang é bùm ralhùm má doq ló akô. ² Haú má, yhangmoq é myoq hí tē má, Yesuq é ihpyô isâm htaí byuq mù, Yhâng é myoqdong gi, bui su duqbó tó é eq, Yhâng é mebu gi, maubó su hpyu zan tó ri. ³ Haú hkûn jáng, Mosheq eq Eliyaq gi, yhangmoq é hí má htoq shit mù, Yesuq eq dǎng nyo lhùm nyi akô.

⁴ Haú mù, Petruq gi, Yesuq lé, "Yhumsing ê, shí jowò má nganhúng nyi le ge ri. Nǎng ô nau é nghut le gi, Nǎng é matú ralhùm, Mosheq é matú ralhùm, Eliyaq é matú ralhùm kut, ngò zúm sùm lhùm saí bá." ga taí ri.

⁵ Petruq dang ru taí nyi ashí le, duqbó é mhut gi, yhangmoq lé htup zing lô mù, mhut hkaú mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhang

má Ngò myit dik nyi lhê. Yhâng é dang gyo keq." gâ ri.

⁶ Haú su gâ é htê lé, chǎngzô pé wó gyo kôjǎng, yhangmoq gi, gyuq nán mù, myigung má gop bùm bekò nghut ri. ⁷ Nghut kôlhang, Yesuq gi, yhangmoq chyáng jé lé lô mù, yhangmoq lé loq èq zǎng kat luí, "Toq keq, hkâgyuq kó." ga taí ri. ⁸ Yhangmoq tu wú kat kô le, Yesuq mai lai luí, ó lé le a myàng lo kó nghut ri.

⁹ Bùm mai taú gyó lô kô é hkûn, Yesuq gi, "Ahkuí nungmoq myang é hkyô lé, haú Byu Yhangzo shi é mai lhoq dui toq yu é a hui hui gi, ó lé le hkâtaí kyo kó." ga, yhangmoq lé taí hkûm tó ri.

¹⁰ Haú jáng, chǎngzô pé gi, "Eliyaq hí lé ra râ nghut lhê ga, tará sará pé haí mù taí kô é lhú?" ga, Yesuq lé myí akô.

¹¹ Haú hkûn, Yesuq gi, "Eliyaq hí lé luí, lhunglhang lé hen lajǎng to râ gâ é gi, tǎng lhê. ¹² Nghut kôlhang, Ngò, nungmoq lé taí kôlé, Eliyaq gi, jé lé bè nghut lhê; nghut kôle, yhangmoq gi, yhang lé a lhom wú sé kômù, yhangmoq ô nau é dǎng banshoq kut bekò nghut ri. Haú eq rajung za, haú Byu Yhangzo le, yhangmoq é loq má hpuzo râ nghut lhê." ga tǎ taí ri. ¹³ Haú hkûn sheq, Yhang taí nyi é gi, Wui-myhup Sará Yohan eq sǎng é hkyô nghut é lé, haú chǎngzô pé sê gyó akô nghut ri.

Nat Wang Júng Sù Lé Lhoq Gê Byí
É Hkyô

Mrk 9:14-32; Luk 9:37-45

¹⁴ Yhangmoq, byù moq mó pé chyáng dum taú jé lô kô é hkûn, byù rayuq gi, Yesuq chyáng lé jé mù, hkyihput htuoq luí, ¹⁵ "Yhumsing ê, ngá é yuqzo lé shogyô yù laq; yhang gi, mhǎngtuq tuq luí, gyaí yhang jamjaú nyi ri. Myihkyóm má le, wui má le, anum num lǎng wǎng wǎng dut nyi ri. ¹⁶ Yhang lé, Nǎng é chǎngzô pé chyáng shuí é

kôlhang, yhangmoq a wó lhoq gê byi kó nghut ri." ga tai ri.

¹⁷ Haû mù, Yesuq gi, "Lumjìng myit a bo é eq agê ashóp é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lúhú? Yuqgè zo haú lé, Ngá chyáng shuí lé lô keq." ga tù tai kat ri. ¹⁸ Yesuq gi, nat gang lé tân kat jáng, nat gang haû gi, yuqgè zo haú yuq chyáng mai htoq lô byuq bê nghut mù, haú hkûn jáng, yuqgè zo haú gi, ge byuq bê nghut ri.

¹⁹ Hau htâng, chángzô pé gi, ó a nyi é u má, Yesuq chyáng lé lô kômù, "Ngamoq gi, haû mù, nat haú lé a wó hkat htoq é lúhú?" ga, lé myi kôjáng, ²⁰ Yhang gi, "Nungmoq é lumjìng myit shaú é yanmai nghut ri. Ngò, nungmoq lé teng za tai kôlé, nungmoq é lumjìng myit ang-shi cham í za hkâlháng bò kô é nghut le gi, bùm shí lé, 'Hé shut htot lô aq.' ga tai le, htot râ nghut lhê. Nungmoq a wó kut é haû lháng joq râ a nghut. ²¹ Shí jung gi, kyúdung é eq zoshuq gám é dông za a nghut jáng, a htoqló é nghut lhê.*" ga dum tù tai ri.

²² Yhangmoq, Galile mau má rahá zup nyi kô é hkûn, Yesuq gi, yhangmoq lé, "Haû Byu Yhangzo gi, byu pé é loq má ap pyâm é hui zo râ nghut lhê. ²³ Haú bang gi, Yhang lé sat pyám kó râ nghut lhê; nghut kôlhang, Yhang gi, shi é htâng sum nyi nghú râ nyi má lhoq dui toq é hui râ nghut lhê." ga tai ri. Haû mù, haú chángzô pé gi, gyai yhang gyô yón nyi bekô nghut ri.

Noqkuq Yhûm Hkansê Kat É Hkyô

²⁴ Yesuq eq Yhâng é chángzô pé gi, Kaperna-um wá má jé kô é hkûn, noqkuq yhûm hkansê hkyuí bang gi, Petruq chyáng lé jé kômù, "Nungmoq é sará gi, noqkuq yhûm hkansê a kat lúhú?" ga myí akô.

* **17:21** Chyúmbun shí gi, chyúmding myo myo má a bo é nghut lhê.

²⁵ Petruq gi, "Kat lhê." ga tù tai ri.

Hau htâng, Petruq yhúmhkaû má wang ló le, Yesuq hí lhom tai é gi, "Simun é, mingkan hkohkam pé gi, kang eq hkansé pé lé, ó pé chyáng mai guq yu akô lúhú? Yhumsing byu pé chyáng mai lúhú? Haû a nghut jáng, góbâng chyáng mai lúhú? Nang, hkâsu wó myit lhê lúhú?" gâ ri.

²⁶ Haû mù, Petruq gi, "Góbâng chyáng mai nghut ri." ga tù tai jáng, Yesuq gi, "Haû su nghut le gi, yhumsing byu pé gi, lut akô nghut ri. ²⁷ Nghut kôlhang, yhangmoq é i-myt a ngón a dut kó sháng gaq, nhông má ê mù, ngo-nhe ê hkyó aq. Sâng-hi wó nhê yu é ngozô é nhut lé láng há kat jáng, ngùn htingchap rachap lé myàng râ nghut lhê. Haú lé yù mù, Ngá é matú eq náng é matú, yhangmoq lé lô byi aq." ga tai ri.

18

Kô Dik Sû Gi, Ó Yuq Nghut Lhê Lhú?

Mrk 9:33-37, 42-48; Luk 9:46-48; 17:1-2

¹ Haú hkûn, haú chángzô pé gi, Yesuq chyáng lé jé kômù, "Mauhkûng mingdán má, kô dik sù gi, ó yuq nghut lhê lúhú?" ga myí akô.

² Yesuq gi, zoshâng zo rayuq lé wut yù mù, yhangmoq é gung gûng má shap to luí, ³ tai é gi, "Ngò, nungmoq lé teng za tai kôlé, nungmoq gi, myit htaí lhik luí, zoshâng zo wuí su dut kô é za a nghut jáng, mauhkûng mingdán má hkâ-nhám le wó wâng kó râ a nghut.

⁴ Haû mù, zoshâng zo shí yuq su, yhumsing é i-myt wó lhoq nyhum é sù ó yuq nghut kôle, mauhkûng mingdán má, kô dik sù nghut ri.

⁵ Shí sù é zoshâng lé, Ngá é myìng mai hap yu é sù ó yuq nghut kôle, Ngo lé hap yu é sù nghut bê.

⁶ Nghut kôlhang, Ngo lé lumjìng é

zoshâng wuî mã é rayuq yuq lé, mara kut shut nhang é sù gi, yhâng é lingzing mã luqlui long mó tuî hut byi lui, nik é wuimau mã, dú hkyô pyâm é huî é nghut le gi, yhâng é matú je gè râ nghut lhê.

⁷ Haû mingkan gi, byu pé lé mara kut shut nhâng jang joq é yanmai, dingnyé wó ri. Haû mara kut shut nhâng hkyô gi, htoq lugù bê; nghut kôlhang, haû lé lhoq htoq sù gi, dingnyé wó ri. ⁸ Náng é loq èq, a nghut jáng, náng é hkyi èq, nang lé mara kut shut nhang é nghut le gi, haû lé hpyit dú pyám aq. Ahtum abyuq é myi mã, hkyi hkúm loq hkúm gù dú hkyô pyâm é huî râ htoq mã, hkyi loq a hkúm é za, asak wó yu é nghut le gi, náng é matú je ge ri. ⁹ Náng é myoqjí èq, nang lé mara kut shut nhang é nghut le gi, haû lé lap choq yú mù, dú pyám aq; myoqjí í jí dap gù ngaraî myi mã dú hkyô pyâm é huî râ htoq mã, myoq rají eq za, asak wó yu é nghut le gi, náng é matú je ge ri.

Byuq Byuq É Sau
Luk 15:3-7

¹⁰ Shì sù é zoshâng zo wuî mã é rayuq lé lhâng a wú tiq râ matú, sidiq nyi keq. Hkâsu mù gâ le, Ngò, nungmoq lé taí kôlé, mauhkúng mã é yhangmoq é maumang lagyô pé gi, mauhkúng htoq mã é Ngá Wâ é myoqdong lé, hkâ-nhám le myang nyi akô. ¹¹ (Hkâsu mù gâ le, haû Byu Yhangzo gi, byuq byuq bê bang lé hkyi yù râ matú, jé lé é nghut lhê.)*

¹² Byù rayuq gi, sau rashò du wó é nguî sháng, sau haû gù mã é radu byuq byuq é nghut jáng, haû gaú xe gaú du lé, bùm pé mã nyhi pyâm to lui, byuq byuq é sau lé a châng ho é nyi râ lú? Haû lé, nungmoq hkâsu wó myit ngam akô lú? ¹³ Ngò, nungmoq lé teng za taí kôlé, yhang gi, haû byuq byuq é sau haû lé myang ho é hkùn, a lám byuq é sau

gaú xe gaú dû é matú gabú é htoq mã, haû dû matú je riyhang gabú ri. ¹⁴ Haû eq rajung za, mauhkúng htoq mã é nungmoq é Íwa gi, shì tiq bang mã é rayuq htên byoq byuq rá lé lhâng, ô nau é a nghut.

Mara Kut Shut É Gumang Hpó Lé
Hkâsu Kut Râ Hkyô

¹⁵ Náng é gumang hpó, nang lé mara kut shut é nghut jáng, yhâng chyáng ê mù, nungnhik baú za nghut é hkùn, yhâng é mara lé tân shit aq. Yhang, náng é dang lé gyô é nghut jáng, nang gi, gumang rayuq dum wó bê nghut ri. ¹⁶ Nghut kôlhang, yhang, náng é dang lé a gyô é nghut jáng, 'Mara hun é hkyô hkangmó lé, saksé í yuq sum yuq lòm jáng, wó lhoq teng sháng gaq.'* gâ tô é eq rajung za, nang, gotú byù ra-í yuq lé shuî chùng aq. ¹⁷ Yhang gi, haû bang é dang lé le a lhom yu é nghut jáng, haû hkyô lé, noqkuq hpúng mã shit kyo aq; hpúng é dang lé le a gyô é nghut jáng, yhang lé, a lumjing é byù rayuq dong le, kang guq sù rayuq dong le sôn pyám aq.

¹⁸ Ngò, nungmoq lé teng za taí kôlé, myigùng htoq mã, nungmoq tuî to mã tuî to lé, mauhkúng htoq mã le, tuî to râ nghut lhê; myigùng htoq mã, nungmoq lhoq lhut mã lhoq lhut lé, mauhkúng htoq mã le, lhoq lhut byi râ nghut lhê.

¹⁹ Ngò, nungmoq lé dum taí kôlé, myigùng htoq mã, nungmoq mã é í yuq myit hui lui, haî lé dung kôlhang, mauhkúng htoq mã é Ngá Wa gi, haû nhik lé gyo byi râ nghut lhê. ²⁰ Hkâsu mù gâ le, Ngá mying lé lang lui, í yuq sum yuq zup zing é jang hkâmá nghut kôlhang, haû bang é gyoro mã Ngò nyi lhê." gâ ri.

Shogyo Nhikmyin A Sê É Jùn Hpó
É Dangtú

²¹ Haû hkùn, Petruq gi, Yesuq chyáng huî ê mù, "Yhumsing ê, ngá

* **18:11** Bun zo shì gi, chyúmding myo myo mã a bo é nghut lhê. ✧ **18:16** Tarâ Pun 19:15

é gumang, ngo lé mara kut shut é nghut le, yhang lé hkâ-myhó dâm mara hkyut byi ra râ lúh? Nyhit dâm jé shoq hkyut byi ra râ lúh?" ga myi ri.

²² Haû jáng, Yesuq tú taí é gi, "Ngò, nang lé taí lé, nyhit dâm za a nghut, nyhit xe nyhit tú dâm hkyut byi râ lúh.

²³ Mauhkûng mingdán gi, yhum-sing é dui-nhâng zoshâng wui é jihpán lé jep nau é hkohkâm rayuq eq du ri. ²⁴ Yhang gi, jihpán lé jep hi ló é u lé, yhâng chyáng ngùn wan myo myo chyín dap to sú lé shuí lé lo akô. ²⁵ Haû yhumsing hpó gi, haú yuq chyín a wó xap é yanmai, chyín wó yû râ matú, yhang lé le, yhangmyi lé le, yhangzo banshoq eq yhang wó é zèhkoq banshoq lé le, úng pyám râ hkunmó hkyô kat ri.

²⁶ Haû mù, dui-nhâng zoshâng haú yuq gi, yhâng é hí má hkyihput htuq luí, 'Ngo lé myit hîng byi shi laq; banshoq lé, ngò xap râ.' ga dúng tôngbán ri. ²⁷ Haû dui-nhâng zôshang é yhumsing hpó gi, haú yuq lé wú shogyo luí, chyín banshoq lhut pyám byi mù, nhang kat ri.

²⁸ Nghut kôlhang, dui-nhâng zoshâng haú gi, htoq ló mù, yhang lé, denari† rashô chyín dap tô é dui-nhâng zoshâng luzúm rayuq lé myàng jáng, haú yuq é lingzing má gyaq myhik zing to mù, 'Ngo lé dap tô é chyín hân xap aq!' ga taí ri.

²⁹ Haú hkûn, yhâng é luzúm dui-nhâng zoshâng haú gi, yhâng é hí má hkyihput htuq luí, 'Ngo lé myit hîng byi shi laq; ngò xap râ.' ga dúng tôngbán ri.

³⁰ Nghut kôlhang, yhang gi, a gyo byi e za, yhâng é chyín dum wó xap é hkûn jé shoq, haú yuq lé htóng hkyô pyám nhâng ri. ³¹ Gotú dui-nhâng zoshâng wui gi, haú hkyô lé myàng kôjáng, i-myt wú nô kôluí,

yhangmoq é yhumsing hpó lé, haú hkyô banshoq ló taí kyô akô.

³² Haû mù, haú yhumsing hpó gi, dui-nhâng zoshâng haú lé wut hâng yû mù, 'Agè ashop é dui-nhâng zoshâng ê, nàng, ngo lé dúng tôngbán é yanmai, nàng, ngo lé dap é chyín banshoq lé, ngò lhut pyám byi bê nghut lê mhai. ³³ Haú su é nhîng, ngò, nang lé shogyô yu é su, nàng é luzúm dui-nhâng zoshâng lé, nàng ge shogyô yu lê a nghut lúh?' ga taí luí, ³⁴ yhang gi, nhikjum yo mù, yhâng é chyín ban xap é hkûn jé shoq, jamjau hui zo râ matú, yhang lé, htóng suwún pê chyáng ap byi pyám bê nghut ri.

³⁵ Nungmoq é gumang wui lé, nungmoq é myit mai mara a wó hkyut byi kô é nghut jáng, mauhkûng htoq tsáng myhâng má é Ngá Wa le, nungmoq lé haú đông kut râ nghut lê." gâ ri.

19

Myi Làng Gâng É Hkyô

Mrk 10:1-12

¹ Yesuq gi, mhoqshit é dang haú pé lé ban taí jáng, Galile mau mai htoq ló mù, Yodan làng tú tap mâ é Yuda mau má ê jé ri. ² Byù moq mó gi, Yhâng htàng cháng kô é nghut mù, Yhang gi, haú bang mâ é nôhpyo hui bang lé, haú má lhoq gê byi ri.

³ Haú hkûn, Hparishe pé ra-am gi, Yhâng chyáng lé jé kômù, Yhang lé chyam wú é đông, "Byù rayuq gi, hai hkyô mai nghut nghut, yhumsing é yhangmyi lé lhoq kâng pyâm le, tará wang lê lúh?" ga myi akô.

⁴ Haú jáng, Yhang tú taí é gi, "A-nham sâng-hi lé, Hpân Sû, 'byu hpan é hkûn, yuqgè eq myiwe lé hpan é nghut lê.'"[✱] ⁵ 'Hau é yanmai, yuqgè gi, yhumsing é înu îwâ chyáng mai htoq luí, yhangmyi eq rahá rading rallum za kut nyi mù,

† 18:28 Denari rachap gi, ra-nyí lê é byù rayuq é zuihpau eq wui ri. ✱ 19:4 Apùn 1:27 ✱ 19:5 Apùn 2:24

yhangnhik gi, gungsho ralthum za dut byuq kó rá nghut lhê.* ga ká tô é lé, nungmoq a nghap wú kó lú? ⁶ Haú mù luí, yhangnhik gi, í yuq a nghut lô é za, rayuq za dut bê nghut ri. Haú mù luí, Garai Gasang lhoq tsûm tô é lé, byù gi, a lhoq kang sháng gaq." gâ ri.

⁷ Haú hkûn, yhangmoq gi, "Haú lé nhîng, yuqgè rayuq gi, lhoq kang laiká za ká byi mù, yhangmyi lé wó nhang pyâm lhê ga, haí mù, Mosheq, hkunmó hkyô tô lhê lú?" ga, Yhang lé dum taú myí akô.

⁸ Haú mù, Yesuq gi, "A-nham sâng-hi mai gi, haú đông a nghut. Nghut kôlhâng, nungmoq é myit nhikhum htân kô é yanmai, nungmoq é yhangmyí pé lé lhoq kang rá ahkáng, Mosheq byí tô é ru nghut lhê. ⁹ Ngò, nungmoq lé taí kôlé, sulàng lú é za a nghut jáng, yhum-sing é yhangmyi lé kâng pyâm mù, myiwe gotú dum hâng yu é sù ó yuq nghut kôle, su-myi lú é sù dut bê." ga, yhangmoq lé dum tú taí ri.

¹⁰ Haú hkûn, haú chángzô pé gi, "Myi làng hkyô má haú đông ru nghut le gi, a yu le lhang je ge nyo ri." ga taí akô.

¹¹ Haú mù, Yesuq gi, "Yuq hkangmó gi, dang haú lé wó hap yu é a nghut, wó hkâm rá jeju wó é bang za sheq, wó hap yu é nghut lhê. ¹² Byù ra-am gi, ínù unghkaú mai yhang, yuqgè a jé gû hku lé lo é bang nghut akô; ra-am gi, góbâng èq kut é yanmai, yuqgè a jé dut byuq akô; ra-am nghut jáng, mauhkûng mingdán é matú, yuqgè a jé rá đông kut yu pyâm akô nghut ri. Shí hkyô lé wó hap yù sù gi, hap yù sháng gaq." ga dum taí ri.

Zoshâng Wui Eq Yesuq

Mrk 10:13-16; Luk 18:15-17

¹³ Hau htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng

chýáng shuí lé lo akô. Haú chángzô pé kúm gi, haú shuí lé lô bang lé lhom tân hkûm akô nghut ri.

¹⁴ Nghut kôlhâng, Yesuq gi, "Haú zoshâng wui lé, Ngá chýáng lé nhâng keq; yhangmoq lé hkâhkûm zing to kó; hkâsu mù gâ le, mauhkûng mingdán gi, haú sù é bâng é mingdán ru nghut lhê." ga taí kat ri. ¹⁵ Yhang gi, zoshâng wui htoq má loq ke shimân byi mù, haú jowò mai htoq ló bê nghut ri.

Sùt Wó É Zorâm Rayuq É Hkyô

Mrk 10:17-31; Luk 18:18-30

¹⁶ Byù rayuq gi, Yesuq chýáng lé jé mù, "Sarâ ê, ahtum abyuq é asak wó yù rá matú, ge é muzó haí kut ra rá lú?" ga myí ri.

¹⁷ Haú jáng, Yesuq gi, "Ge é hkyô eq séng luí, haí mù Ngo lé myí lhê lú? Ge é Sù gi, rayuq za nyi lhê. Nàng, asak dui é má wàng nau é nghut le gi, jep é tarâ pé lé cháng aq." ga tú taí ri.

¹⁸ Haú yuq gi, "Hká gû lé lú?" ga dum myí jáng, Yesuq gi, "Byù hkâsat, su-myi hkâlú, hkâhkau, a teng a mán é saksé hkâhkám, ¹⁹ nángnu nángwa lé hkungga aq,* ga le, 'náng gùng lé náng chyitdap e su, náng é chyangnâm mâ é bang lé le chyitdap aq.* ga le bo tô ri." ga taí kat ri.

²⁰ Haú hkûn, zorâm hpó haú gi, "Haú pé banshoq lé, ngò cháng bê nghut lhê; haí kut rá ashí lú?" ga dum taú myí ri.

²¹ Yesuq gi, "Nàng, gumjup sù dut nau le gi, ló mù, nàng wó é sutzè pé lé ûng pyâm luí, myùng bang lé byí pyâm aq; haú jáng, nàng, mauhkûng htoq má sutzè wó rá nghut lhê; haú mù, Ngá htâng lé cháng aq." ga tú taí ri.

²² Zorâm hpó haú gi, sutzè gyai wó sù nghut é yanmai, dang haú lé wó gyo jáng, gyai yhang myit a ngón é èq ló byuq bê nghut ri.

²³ Hau htâng, Yesuq gi, Yhâng é chángzô pé lé, "Ngò, nungmoq lé teng za tái kôlé, sutzè wó bang gi, mauhkûng mingdán wó wâng râ gyai yhang wuî ri. ²⁴ Hau htoq agó, Ngò, nungmoq lé tái kôlé, sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." ga tái ri.

²⁵ Haú chángzô pé gi, haú su gâ é lé wó gyo kôjáng, haú ru nghut le gi, ó yuq za hkyi yu é hui râ nghut lhê lú?" ga Yhang lé myî akô nghut ri.

²⁶ Haú hkûn, Yesuq gi, yhangmoq lé wú kat mù, "Haú hkyô lé byù mai gi, wó kut râ a nghut; nghut kôlhang, Garai Gasang gi, lhunglhang lé wó kut é Sù nghut lhê." ga tái ri.

²⁷ Haú hkûn, Petruq gi, Yhang lé, "Ngamoq gi, wó é gû lhunglhang lé tô pyâm to lui, Náng htâng cháng bê nghut lhê. Ngamoq, hái wá wó râ nghut lhê lú?" ga myî kat ri.

²⁸ Haú mù, Yesuq tû tái é gi, "Ngò, nungmoq lé teng za tái kôlé, lhunglhang lé asik dum sai dut nhâng é má, haú Byu Yhangzo gi, Yhâng é hpungwup bo é hkohkâm-tanghkuq má zùng tô é hkûn, Ngá htâng châng é bang nungmoq le, hkohkâm-tanghkuq raxe í lhûm htoq má zùng to kômù, Israelaq amyû raxe í hú lé jéyáng kó râ nghut lhê. ²⁹ Ngá é yanmai, yhumsing é yhûm, nhiktâng wuî, ìnu ìwa, zo dù wuî eq yò pé rajung jung lé tô pyâm tô é sù ó yuq nghut kôle, rashô tú akyû myo jat shoq wó râ nghut é htoq agó, ahtum abyuq é asak le, wó yû râ nghut lhê. ³⁰ Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyi bang yuq gi, hí bekô râ nghut lhê.

20

Tsibiyiq Hkyâm Mû Zui Bang Lé Dangtú Yu É Hkyô

¹ Hkâsu mù gâ le, mauhkûng mingdán gi, yhumsing é tsibiyiq hkyâm má mù zui nhâng râ langchyáng ê lûng râ ga, napsûn noq le htoq e ló é hkyâm yhumsing eq du ri. ² Yhang gi, ra-nyí é matú denari rachap byi râ dông, haú bang eq myit huî yù mù, yhangmoq lé, yhâng é tsibiyiq hkyâm má nhang hâng kat ri.

³ Napkyó gau hkyíng* kô má, yhang gi, htoq e ló le, hai mù le a kut é za, gai má yap tô é bang ram lé é myang ri. ⁴ Haú mù, yhang gi, haú bang lé, 'Nungmoq le, ngá é hkyâm má mù é zui keq; byi âng é ahpau, ngò, nungmoq lé byi râ nghut lhê.' ga tái jáng, yhangmoq gi, e ló bekô nghut ri.

⁵ Hau htâng, yhang gi, raxe í hkyíng má le, myinhâng sum hkyíng kô má le, dum htoq ê mù, haú eq rajung za langchyáng pé é lung kat ri. ⁶ Myinhâng ngo hkyíng kô má, yhang dum htoq e ló wú le, góbang ra-am le yap tô bum é lé, é myâng mù, haú bang lé, 'Nungmoq gi, hai le a kut é za, ra-nyí buî hái mù shí má yap tô bum akô lú?' ga myi jáng, ⁷ haú bang gi, 'Ngamoq lé, ó yuq eq le a lûng kô é yanmai nghut lhê.' ga tû tái akô.

Haú hkûn, yhang gi, 'Nungmoq le, ngá é hkyâm má mù é zui keq.' ga tái ri.

⁸ Myinhâng jé jáng, tsibiyiq hkyâm yhumsing gi, yhâng é mù shuí u sù lé, 'Haú langchyáng pé lé ji yù mù, je htâng má lung yu é bang mai hí lui, sâng-hi lung yu é bang jé shoq, mù zui hpau byi aq.' ga tái ri.

⁹ Myinhâng ngo hkyíng má mù wàng bang le, denari rachap

* **20:3** Chyúmdang ra-am má, sum hkyíng ga chung tô é gi, Yudaq byu pé é ahkyíng nghut lhê. Yudaq byu pé é ahkyíng gi, napkyó hkyuq hkyíng mai nghap hi lhê.

chap wó yu bum akô. ¹⁰ Haú mù, je hí má mù wàng bang gi, yhangmoq je myo wó nhô ngam akô. Nghut kôlhang, yhangmoq le, rayuq denari rachap chap za wó akô nghut ri. ¹¹ Yhangmoq gi, haú myhó za wó yu bùm kô é yanmai, haú hkyâm yhumsing lé, ¹² 'Shí bang gi, je htâng má mù lé wàng mù, nayí rahkum za mù zui kôlhang, nàng gi, ra-nyí buigyùm chap bui htân yò má mù zuí é bang ngamoq eq rajung za byí ri.' ga mara hùn dang taí akô.

¹³ Nghut kôlhang, haú hkyâm yhumsing gi, haú bang má é rayuq lé, 'Buinùm hpó é, ngò, nang lé a tará é đông kut é a nghut. Denari rachap byí rá nghú, nàng eq ngò myit huí to bê a nghut lúhú?' ¹⁴ Nàng wó âng é lé yu chùng mù, ló aq. Je htâng má mù lé wang é sù lé le, nang lé byí é myhó, ngò byí nau ri. ¹⁵ Ngá é ngùn lé, ngò kut nau é su a ge kut lúhú? Ngò, ge é kut le, nàng manôn ri lúhú?' ga taí ri.

¹⁶ Haú mù luí, htâng gyó nyí bang gi, hí bekô rá nghut mù, hí nghut nyí bang gi, htâng gyó byuq kó rá nghut lhê." gâ ri.

Yesuq Gi, Yhang Shí Râ Hkyô Lé Dum Taí Ri

Mrk 10:32-34; Luk 18:31-34

¹⁷ Ahkuí, Yesuq gi, Yerusalem wà mó shut doq ló nyi é u lé, haú chángzo raxe í yuq lé, gotû kut wut yù mù, ¹⁸ "Nga-nhúng gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tará sará pé é loq má ap byí pyâm é hui rá nghut lhê; haú bang gi, Yhang lé, shí rá mara byi kó rá nghut é htoq agó, ¹⁹ jóng pyâm é, nhuq bat é eq tapzîng má jén sat pyâm é hui rá matú, haú tûngbaù pé é loq má ap pyám kó rá nghut lhê. Nghut kôlhang, Yhang gi, sum nyi

ngô rá buinyi má, lhoq dui toq é dum hui rá nghut lhê." ga taí ri.

Zô Nhik Matú Ínu Êq Dung Byí É Hkyô

Mrk 10:35-45

²⁰ Hau htâng má, Zebedi é yhangzô nhiktang é yhângnu gi, yhangzô nhik eq rahá jé lé lô kômù, rajung dung rá matú, Yesuq é hí má hkyihput htug nyi ri.

²¹ Haú mù, Yesuq gi, "Nàng, haí ô nau ri lúhú?" ga yhang lé myi jáng, yhang gi, "Nàng é mingdán má, shí ngá zô nhiktâng lé, Náng é loqyò hkyam má rayuq, loqpaí hkyam má rayuq kut, zùng rá ahkáng byi laq." ga taí ri.

²² Haú hkûn, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq rá góm† lé, nungnhik wó shuq kó rá lúhú?" ga myi jáng, yhangnhik tâng gi, "Wó shuq lhê." ga tû taí akô nghut ri.

²³ Haú mù, Yesuq gi, yhangnhik lé, "Ngò shuq rá góm lé, nungnhik shuq ra kó rá za nghut lhê. Nghut kôlhang, Ngá é loqyò, loqpaí hkyam má zùng rá ahkáng lé gi, Ngò byí jung a nghut. Jowò hau pé gi, Ngá Wa hen to byi bâng é matú za ru nghut lhê." ga taí ri.

²⁴ Gotû chángzo raxê yuq gi, haú hkyô lé wó gyo kôjáng, haú nhiktâng lé nhik-yô akô nghut ri.

²⁵ Haú mù, Yesuq gi, yhangmoq banshoq bang lé wut tsing yù luí, "Tûngbaù pé lé uphkang é ga bang gi, tûngbaù pé lé up zô nyi kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chùng mù, up zô nyi kô é hkyô lé le, nungmoq sé lhê. ²⁶ Nungmoq chyáng gi, haú su a dut kó sháng gaq; haú Byu Yhangzo lhang gi, dojaú é lé hkam yù rá matú jé lé é a nghut é za, dojaú rá matú eq byù myo myô é matú, shíhtaí gunglik hkungga

† 20:22 Góm gâ é gi, Yesuq, jamjau hui rá hkyô eq shí rá hkyô lé, taí nau é nghut lhê.

đông, Yhâng é asak lé byi pyám rã matú sheq, jé lé é ru nghut é su, ²⁷ nungmoq má, byù mó dut naù sù ó yuq nghut kôle, nungmoq é dui-nhâng zoshâng dut ra rã nghut lhê. ²⁸ Hau htoq agó, nungmoq má ushuq dut naù sù ó yuq nghut kôle, nungmoq é jùn dut ra rã nghut lhê." ga tái ri.

Myoqjit Í Yuq Myoq Dum Myang É Hkyô

Mrk 10:46-52; Luk 18:35-43

²⁹ Yesuq eq Yhâng é chángzô pé gi, Yeriho myuq mai htoq ló nyí kô é hkûn, byù moq mó gi, yhangmoq é htâng má châng e ló bum akô. ³⁰ Haù hkyô yàm má zung tô é myoqjit í yuq gi, Yesuq laí ló nyí é hkyô lé wó gyo kôjáng, "Dawiq é Yhangzo, Yhumsing ê, ngá-nhik lé shogyô yù laq ô!" ga, wut garû kat akô nghut ri.

³¹ Byù moq mó gi, yhangnhik zím byuq rã matú tân hkúm kôlhang, yhangnhik gi, "Dawiq é Yhangzo, Yhumsing ê, ngá-nhik lé shogyô yù laq ô!" ga, je riyhang htê mó eq wut garû kat akô nghut ri.

³² Haù mù, Yesuq gi, yap kat mù, "Ngò, nungnhik lé haí kut byi rã ô nau akô lú?" ga, yhangnhik lé wut myí kat ri.

³³ Haù hkûn, yhangnhik gi, "Yhumsing ê, ngá-nhik myoq myàng nau ri." ga tú tái akô.

³⁴ Yesuq gi, yhangnhik lé wú shogyo luí, yhangnhik é myoqjí má é záng byí ri. Haù hkûn jáng, yhangnhik gi, myoq wó myàng kômù, Yhâng htâng cháng bekô nghut ri.

21

Yesuq, Yerusalem Wà Mó Má Wang E Ló É Hkyô

Mrk 11:1-11; Luk 19:28-38; Yhn 12:12-19

¹ Yesuq eq Yhâng é chángzô pé gi, Yerusalem wà mó eq chyâng lo nyí kô é hkûn, Tsanlun Bùm mã é Bethpage wà má jé ló kôjáng, Yesuq gi, chángzo í yuq lé, ² "Nungnhik, hí mã é wà mã ê keq; wà haù má, logúng zing radu lé, logúng zo eq rahá tuí to lánng é lé, ê myàng kó rã nghut lhê; haù lé hpyi yù mù, Ngá chyáng she lò keq. ³ Byù rayuq yuq, nungnhik lé rajung jung gâ lò jáng, 'Shí í du lé, haù Yhumsing chùng rã ri.' gâ nghú tú tái keq; haù jáng, yhang, radá dâm nhâng byi rã nghut lhê." ga Yesuq tái luí, nhang kat ri.

⁴ Haù gi, myiqhtoi dang lhoq dik rã matú dut lo é nghut ri. ⁵ Myiqhtoi dang haù gi,

"Zi-un byizo* lé, shí su nghú keq; 'Wú aq, nánng é hkohkâm gi, nú-nhâm é myit eq logúng htoq má jì mù, nghut bê, logúng zo htoq má jì mù, nánng chyáng lé lô bê nghut ri.'"†

gâ ri.

⁶ Haù chángzô nhik gi, e ló mù, Yesuq tái kat é eq rajung za ê kut bekô nghut ri. ⁷ Yhangnhik gi, logúng me lé she lò mù, yhangnhik é buhíng pé lé, haù logúng mê é htoq má ke byi kôjáng, Yesuq gi, doq jì ri. ⁸ Byù moq mó mã é myo myo gi, yhangmoq é buhíng lé, hkyô má hkyut hkang byí akô; ram gi, mhandíng pé lé zân hkyô yù mù, hkyô má hkang byí akô nghut ri. ⁹ Yhâng é hí má htâng má châng sô nyi bum é bang gi,

"Dawiq é Yhangzo gi, hosana† nghut nyí sháng gaq ô!"

* 21:5 Zi-un byizo gâ é lychým gi, Yerusalem byu pé gâ é nghut lhê. † 21:5 Zhk 9:9 † 21:9 Hebre dang má, hosana gâ é gi, "ahkuí hkyi yù laq" gâ é nghut lhê. Nghut kôlhang, bun zo 9 má gi, hkya-on dang đông chung é nghut lhê. † 21:9 Hkya-on 118:26

"Haú Yhumsing é myìng mai jé lé lô Sû gi, hkungsô wó nyí sháng gaq ô!"[✧]

"Htoq tsáng myhâng má, hosana nghut nyí sháng gaq ô!" ga luí, taí garû bum akô nghut ri.

¹⁰ Yesuq, Yerusalem wà mó má wang lô é hkûn, rawà gón é bang gi, gabyông lo bùm kômù, "Shí yuq gi, ó wá nghut lhê lhà?" ga luí, myi lhùm bum akô.

¹¹ Haú hkûn, byù moq mó gi, "Shí yuq gi, Galile mau, Nazaret wà byù Yesuq gâ é myiqhtoi nghut lhê." ga taí akô nghut ri.

Yesuq, Noqkuq Yhûm Lé Lhoq Sansêng Pyâm É Hkyô

Mrk 11:15-19; Luk 19:45-48; Yhn 2:13-22

¹² Yesuq gi, noqkuq yhûm má wang ê mù, haú mâ é zè ung zè wuì kut nyi é bang banshoq lé, hkat htoq pyám luí, ngùn htaí zo bâng é siboi pé eq hpûngkyui ung zo bâng é tanghkuq pé lé, tu mhuq pyám byí ri. ¹³ Haú hkûn, Yhang gi, "Ngá yhûm gi, kyûdung yhûm ga râ nghut lhê."[✧] ga kâ to kôlhang, nungmoq gi, jowò shí lé 'damaq hkyûng'[✧] kut nyi akô." ga, yhangmoq lé taí ri.

¹⁴ Yesuq, noqkuq yhûm má nyi tô é hkûn, myoqjit bang eq hkyí hten bang Yhâng chyáng lé lô kômù, Yhang gi, haú bang lé lhom lhoq gê byí ri. ¹⁵ Nghut kôlhang, hkyangjong agyi pé eq tará sará pé gi, Yhang kut é mauhpo muzó pé lé le, "Dawiq é Yhangzo gi, hosana nghut sháng gaq." ga, noqkuq yhûm má zoshâng wuì garû nyi bùm kô é lé le, myàng kôjáng, wú nhik-yô bum akô nghut ri.

¹⁶ Haú mù, yhangmoq gi, "Zoshâng shí bang haí taí nyi kô é lé, Nàng wó gyô lhê lhú?" ga, Yesuq lé myi kôjáng, Yhang gi, "Wó gyô ri. Nungmoq gi, 'Zoshâng wuì eq nyheqnú pé é nhut mai hkya-on kungtôn

râ matú, nàng lajâng to bê nghut ri."[✧]

ga kâ tô é lé, Chyúmdang má a ng-hap wú kó lhú?" ga yhangmoq lé taí ri.

¹⁷ Hau htâng má, Yhang gi, haú bang lé nyhi to luí, wà hkaú mai htoq lô mù, Behtani wà má ê jé luí, haú myîn, haú má bíng yu ri.

Maihpáng Gâm Nyhuí Kyuq Shi Byuq É Hkyô

Mrk 11:12-14, 20-24

¹⁸ Yhang gi, htang napkyó noq le, Yerusalem wà mó shut dum taú lô é hkûn, hkyô má zòmut hui bê nghut ri. ¹⁹ Haú mù, Yhang gi, hkyô yàm má yuq tô é maihpáng gâm lé myang kat mù, chyâng e wú le, ahaq mai lai luí, haí lé le a myàng nghut ri. Haú mù, Yhang gi, shigàm haú lé, "Nàng má, hkâ-nhám le ashí a zui sháng gaq." ga taí kat ri. Haú hkûn jáng, agàm haú gi, nyhuí kyuq shi lô byuq bê nghut ri.

²⁰ Haú chángzô pé gi, haú lé myàng kôjáng, maú byuq kômù, "Maihpáng gâm shí gi, haí mù haú-í hân nyhuí kyuq shi lô lhê lhà?" ga myí akô.

²¹ Yesuq gi, "Ngò, nungmoq lé teng za taí kólé, nungmoq, úng-âng é myit a bo é za, lumjíng kô é nghut le gi, maihpáng gâm má Ngò kut é muzó lé, nungmoq wó kut kó râ nghut é htoq agò, bùm shí lé, 'Htot mù, wuimau má lô gyó wâng aq.' ga taí jáng, taí é eq rajung za dùt râ nghut lhê. ²² Nungmoq, lumjíng myit eq dung kô é nghut jáng, haí dúng le le wó yú kó râ nghut lhê." ga tú taí ri.

Yesuq É Ahkáng Ayá Lé Myí Chyam É Hkyô

Mrk 11:27-33; Luk 20:1-8

²³ Yesuq gi, noqkuq yhûm wàng hkaú má wang ê mù, mhoqshit nyi é hkûn, hkyangjong agyi pé eq mingbyu é suwún wuì gi, Yhâng

✧ 21:13 Esai 56:7 ✧ 21:13 Yer 7:11 ✧ 21:16 Hkya-on 8:2

chyang lé jé kômù, "Hai ahko ahkâng eq, Nang, shí pé lé kut nyi lhê lúh? Ahko ahkâng shí, Nang lé ó yuq byí é lúh?" ga myí akô.

²⁴ Haú hkûn, Yesuq gi, "Ngò le, nungmoq lé rajung myí wú kôlé, nungmoq wó tú taí kô é nghut jáng, hai ahko ahkâng eq, Ngò, shí pé kut é hkyô lé taí kyo rá nghut lhê.

²⁵ Yohan byí é bapstima gi, ó yuq é ahko ahkâng mai nghut lhê lúh? Mauhkûng mai lúh? A nghut jáng, byu chyang mai lúh?" ga taú myí kat ri.

Haú hkûn, yhangmoq, chôm hpyê lhum kô é gi, "Mauhkûng mai nghut lhê.' nghû, nga-nhung taí jáng le, 'Haú nghut le nhing, hai mù, yhang lé a lumjáng kô é lúh?' ga rá nghut; ²⁶ 'Byu chyang mai nghut lhê.' nghû jáng le, yhangmoq lungghang bang gi, Yohan lé, myiqhtoi rayuq ga lumjáng bûm kô é nghut lhê yanmai, haú bang lé, nga-nhung gyuq rá lhê nghut." ga akô.

²⁷ Haú mù, yhangmoq gi, Yesuq lé, "Ngamoq a sé." ga tú taí akô.

Haú hkûn, Yesuq gi, "Haú jáng, Ngò le, hai ahko ahkâng eq shí pé kut é hkyô lé, nungmoq lé a taí kyo." ga, yhangmoq lé taí ri.

Yuqzô Nhiktâng Lé Dangtú Yu É Hkyô

²⁸ Yesuq xoq taí é gi, "Nungmoq hkâsu wó myit akô lúh? Byù rayuq gi, yuqzo í yuq wó ri. Yhang gi, kô sù yuq chyang ê mù, 'Ngá zo ê, nang, hkû-nyí tsibiyiq hkyâm má mù é zui aq.' ga taí jáng, ²⁹ yuqzo haú gi, 'Ngò a kâm ê.' ga tú taí ri; nghut kôlháng, htâng má, yhang gi, myit dum lhing mù, é bê nghut ri.

³⁰ Hau htâng, yhangwa gi, yhang zo tiq sù yuq chyang é mù, rajung za ga é dum taí jáng, yuqzo haú gi, 'Ê rá, áwa!' ga yín yú kôlháng, a é kut ri.

³¹ Haú nhiktâng má é hká yuq sheq, yhangwa ô nau é hkyô lé kut sù nghut ri lúh?" gâ ri.

Haú hkûn, yhangmoq gi, "Ko sù nghut ri." ga tú taí akô.

Haú mù, Yesuq gi, yhangmoq lé, "Ngò, nungmoq lé teng za taí kôlé, kang guq bang eq shiwa myhí pé gi, Garai Gasâng é mingdán má, nungmoq a wàng shimá, wang ló nyi bùm kô rá nghut lhê. ³² Hkâsu mù gâ le, Yohan gi, nungmoq chyang lé jé mù, dingmán hkyô lé tûn shit kôlháng, nungmoq gi, yhang lé a jing kut akô nghut ri; nghut kôlháng, haú kang guq bang eq shiwa myhí pé gi, yhang dang lé jing akô nghut ri. Nungmoq gi, haú hkyô lé myang é nghut kôlháng, myit a lhing kô é htoq agó, yhang lé a lumjáng shi kô nghut ri.

Tsibiyiq Hkyâm Saí Bang Lé Dangtú Yu É Hkyô

Mrk 12:1-12; Luk 20:9-19

³³ Gotú dangtú lé gyô wú shi keq; hkyâm yhumsing rayuq gi, tsibiyiq hkyâm ralhum saí to mù, lhinghkyuq kyâm to luí, tsibiyiq wing pyik htoq rá dongkong dù to mù, machya ralhum saí tô ri. Hau htâng, yhang gi, hkyâm haú lé, hkyâm saí zo bâng chyang ngho byí to mù, gó ming shut e ló byuq bê nghut ri. ³⁴ Kyôshu yoq jé jáng, yhang gi, yhang eq sêng é tsibiyiq shi é yú rá matú, yhang é dui-nhang zoshâng wui lé, haú hkyâm saí zo bâng chyang nhang kat ri.

³⁵ Haú hkyâm saí zo bang gi, dui-nhang zoshâng wui lé, lhom chyup yú kômù, rayuq lé gi, lhom nhuq bat, rayuq lé gi, lhom sat pyám, rayuq lé gi, luqgok eq lhom dú sat pyám, kut akô nghut ri. ³⁶ Hau htâng má, yhang gi, hí dam lhê htoq je myo shoq gotú dui-nhang zoshâng wui lé dum nhang kat le le, haú hkyâm saí zo bang gi, hí lhê bang lé su lhom dum kut akô nghut ri. ³⁷ Ló htáng má, yhang gi, 'Ngá zo

lé gi, yhangmoq lhom hkungga kó rá nghut lhê.' ga, yhang zo lé, haú bang chyáng nhang kat ri.

³⁸ Nghut kôlhang, haú hkyâm sai zo bang gi, yhang zo lé myàng kôjáng, 'Shí yuq gi, silí wunlí sing yù rá sù nghut lhê; lé keq, yhang lé sat pyám mù, yhâng é silí wunlí lé yu pyám byi sháng.' ga, rayuq eq rayuq taí lhùm bum akô nghut ri.

³⁹ Haú mù, yhangmoq gi, yhang lé, chyup yù luí, hkyâm shinggan shut dú htoq kômù, sat pyám bekô nghut ri.

⁴⁰ Haú mù luí, tsibiyiq hkyâm yhumsing lé jé é hkùn lé, haú hkyâm sai zo bang lé hkâsu kut nhô ngam akô lhú?" ga Yesuq myí ri.

⁴¹ Haú hkùn, haú hkyangjong agyi pé eq suwún wuí gi, "Haú agè ashop bang lé gi, agè ashop é dông sat pyám rá nghut lhê. Haú tsibiyiq hkyâm lé gi, kyô shu yoq má, yhâng é gambùm lé byi rá bang lé, htot ngho byi pyám rá nghut lhê." ga, tú taí akô nghut ri.

⁴² Haú jáng, Yesuq dum taí é gi, "Chyúmdang má, 'Yhùm sai bang eq hkyin htoq pyâm é luqgok gi, htungchyûn má é ahkyak dik é luqgok dut bê. Shí hkyô gi, haú Yhumsing kut é nghut luí, nga-nhông é myoq hí má mauhpo dut bê nghut ri.'^{*}

ga bo tô é lé, nungmoq a nghap wú kó lhú?

⁴³ Haú mù, Ngò, nungmoq lé taí kôlé, Garai Gasâng é mingdán lé, nungmoq chyáng mai yù mù, hau é ashí wó zui rá byuhú lé byi pyám rá nghut lhê. ⁴⁴ Luqgok haú má gyó záng é sù gi, gyuí gyop byuq rá nghut lhê. Luqgok hau eq gyó nhê záng é sù le, nhê pyeq pyâm é hui rá nghut lhê." gâ ri.

⁴⁵ Hkyangjong agyi pé eq Hparishe pé gi, haú Yesuq taí é dangtú pé lé wó gyo kôjáng, yhangmoq lé taí nyi é hkyô lé,

sê gyô akô nghut ri. ⁴⁶ Haú mù, yhangmoq gi, Yhang lé chyup yù rá hkyô ho nyi akô; nghut kôlhang, byu pé gi, Yhang lé, myiqhtoi rayuq ga myit lum to kô é yanmai, yhangmoq gi, haú bang lé gyuq akô nghut ri.

22

Myiháng Poí Dangtú Pé

Luk 14:15-24

¹ Yesuq, dangtú pé dông yhangmoq lé dum taí é gi, ² "Mauhking mingdán gi, yhumsing yhangzô é matú myiháng poí hen lajâng to byi é hkohkâm rayuq eq du ri. ³ Hkohkâm hpó haú gi, yhang ji tô é bang, haú poí má lé lô rá matú, yhâng é dui-nhâng zoshâng wui lé ê tsing taí nhang ri; nghut kôlhang, haú bang gi, a lé kut akô nghut ri.

⁴ Hau htâng má, yhang gi, gotú dui-nhâng zoshâng wui lé, 'Ngò haí le hen to bê; ngá é no eq xu-myum é gau-nyhaú pé lé sat mù, jung hkanmó rì rì nghut to bê. Myiháng poí má lé lô keq hkoí nghú, haú ji tô é bang lé ê taí keq.' ga pyîng luí, nhang kat ri.

⁵ Nghut kôlhang, haú ji to huí é bang gi, dang haú lé haí su a gyô ngàm kômù, rayuq gi, yohtung shut, rayuq gi, hpugá dinggá hkyô shut é byuq bekô nghut ri. ⁶ Ram dum nghut jáng, yhâng é dui-nhâng zoshâng wui lé lhom chyup yù kômù, nhuq bat luí, sat pyám byi akô nghut ri. ⁷ Haú mù, hkohkâm gi, nhikjum yo luí, yhâng é gyezô pé lé, haú byù sat bang lé sat pyám nhâng mù, yhangmoq é myuq lé nyhê hkyô pyám nhang ri.

⁸ Hau htâng má, yhang gi, yhâng é dui-nhâng zoshâng wui lé, 'Myiháng poí gi, rì rì nghut to bê; nghut kôlhang, haú ji to huí é bang gi, lé rá a gingdán kó nghut ri. ⁹ Haú mù, hkyô kang pé má é luí, myang é yuq hkanmó lé, poí má lé rá matú é

^{*} 21:42 Hkya-on 118:22-23

jì keq.' ga taí ri. ¹⁰ Haú jáng, dui-nhâng zoshâng haú bang gi, hkyô kang pé má htoq é luí, myang é byù gè byù gang lhunglhang lé jì tsing yù kô é nghut mù, myiháng poí gi, bíng pé zung byíng bùm bê nghut ri.

¹¹ Nghut kôlhang, bíng haú bang lé, hkohkâm hpó, lé wang wú é hkûn, myiháng poí wàng hking a wut tô é byù rayuq lé, yhang byu-myang ri. ¹² Haú mù, yhang gi, haú yuq lé, 'Buinùm hpó é, nàng gi, myiháng poí wàng hking le a wut é nhing, shí má hkâsu kut wang lo é lúhú?' ga myi jáng, haú yuq gi, haí le a dat tú tái lo nghut ri.

¹³ Haú hkûn, hkohkâm hpó gi, yhâng é dui-nhâng zoshâng wui lé, 'Yhâng é hkyí loq má tui luí, haú ngaubiyi ngàu nhap eq zui kyik kyik shoq hpuzô nyi râ nghut é shinggan mauchut hkaú má, dú htoq pyám keq.' gâ ri.

¹⁴ Hkâsu mù gâ le, byù myo myo gi, jì yu é hui kôlhang, hkyin yù hui é bang gi, shaú ri." gâ ri.

Kehtaq Lé Kang Kat Byí É Hkyô
Mrk 12:13-17; Luk 20:20-26

¹⁵ Hau htâng má, Hparishe pé gi, htoq ló kômù, Yhâng é dang pé má mara chyup râ hpaqchyí dâ akô nghut ri. ¹⁶ Yhangmoq gi, Herut é byu pé eq rahá, yhangmoq é chángzô pé lé, Yesuq chyáng nhang kat akô. Haú bang gi, Yesuq chyáng lé jé kômù, "Sarâ ê, Nàng gi, tengmán sù nghut é eq, Garai Gasâng é hkyô lé, tengmán é dông mhoqshit é sù nghut é lé le, Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê lhê. ¹⁷ Haú mù, hkoséng Kehtaq lé kang kat byí le gi, ge lhê lúhú? A gè lúhú? Nàng, hkâsu wó myit é hkyô taí kyô wú aq." ga taí akô nghut ri.

¹⁸ Yesuq kúm gi, yhangmoq é agè ashop hkyô lé sé byi mù, "Gegùn labyoq kut bang ê, nungmoq gi,

haí mù, Ngo lé lé chyam wú akô lúhú? ¹⁹ Kang kat rá ngùn htingchap rachap, Ngo lé byí wú keq." ga taí kat ri. Haú hkûn, yhangmoq gi, denari rachap yù byí akô. ²⁰ Haú mù, Yhang gi, yhangmoq lé, "Shí má, ó yuq é alhô eq masat laiká dap tô ri lúhú?" ga myi jáng, ²¹ yhangmoq gi, "Kehtaq é nghut ri." ga tú taí akô. Haú mù, Yhang gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taí kat ri.

²² Haú su gâ é lé, wó gyo kôjáng, haú bang gi, maú byuq kômù, Yhâng chyáng mai htoq ló byuq bekô nghut ri.

Saduke Pé, Yesuq Lé Myí Chyam
É Hkyô

Mrk 12:18-27; Luk 20:27-40

²³ Haú nyí má yhang, haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myí akô. ²⁴ Yhangmoq myí kô é gi, "Sarâ ê, 'Myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê.' ga, nganhúng lé, Mosheq taí tô é nghut lhê. ²⁵ Hí hpyang lé, ngamoq chyáng, gumang nhiktâng wui nyhit yuq nyi akô. Lagám yuq gi, myiwe yù luí, zo dù a dap é za yhangmyi lé shi lhuí pyâm to bê nghut ri. ²⁶ Haú eq rajung za, Lanong, Lalaq mai Lahká jé shoq, chuimó haú lé gon luí, ó le zo dù a dap é za shi ló byuq bùm bekô nghut ri. ²⁷ Ló htâng má, myiwe myhí haú le châng shi ló byuq bê nghut ri. ²⁸ Haú mù luí, haú dum dui toq é buinyi má, myiwe myhí haú gi, haú nhiktâng wui nyhit yuq mâ é hká yuq é yhangmyi nghut râ lúhú? Hkâsu mù gâ le, yhang gi, haú nhiktâng wui banshoq bâng é yhangmyi dut wú bê sù nghut ri." gâ akô.

²⁹ Haù hkûn, Yesuq gi, yhangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoq akô nghut ri. ³⁰ Haù dum dui toq é buinyi má gi, myi byi myi yû hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê. ³¹ Shi é mai dum dui toq bang eq séng luí, ³² Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'[✧] ga, nungmoq lé taí tô é lé, nungmoq a nghap wú kó lhú? Yhang gi, shi to bâng é Garai Gasang a nghut; dui nyi bâng é Garai Gasang sheq ru nghut lhê." ga taí ri.

³³ Byù moq mó gi, dang haù wó gyo kôjáng, Yhang mhoqshit é hkyô lé maú byuq bum akô nghut ri.

Ahkyak Dik É Jep É Tarâ

Mrk 12:28-34; Luk 10:25-28

³⁴ Saduke pé lé, Yesuq lhoq zîm pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zîng lé bum akô. ³⁵ Yhangmoq má bo é tarâ sará rayuq gi, Yesuq lé chyam wú é dông, ³⁶ "Sará ê, jep é tarâ má, hká lhum gi, je ahkyak dik lhê lhú?" ga myi ri.

³⁷ Haù mù, Yesuq gi, "'Haù Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq eq, chyitdap rá lhê.'[✧] gâ é nghut lhê. ³⁸ Tarâ haù gi, je hí lhum eq je ahkyak dik é lhum nghut lhê. ³⁹ Hau htang lhum le haù eq du é nghut mù, 'Náng gûng lé nàng chyitdap é su, náng é chyangnâm má é bang lé le chyitdap aq.'[✧] gâ é nghut lhê. ⁴⁰ Tarâ haù í lhum gi, jep é tarâ banshoq eq myiqhtoí laiká banshoq é dangchyûng nghut lhê." ga, yhang lé taí kat ri.

Hkrisduq Gi, Ô Yuq É Yhangzo?

Mrk 12:35-37; Luk 20:41-44

⁴¹ Hparishe pé zup zîng to kô é hkûn, Yesuq gi, yhangmoq lé, ⁴² "Nungmoq gi, Hkrisduq eq séng luí hkâsu myit ngam akô lhú? Yhang gi, ó yuq é yhangzo nghut lhê lhú?" ga myi jáng, yhangmoq gi, "Dawiq é yhangzo nghut ri." ga tú taí akô.

⁴³ Haù mù, Yhang gi, yhangmoq lé, "Haù hkûn, Dawiq gi, Woi-nyí dông mai, Yhang lé, 'Yhumsîng' ga, haí mù wut lhê lhú? Hkâsu mù gâ le, Dawiq taí é gi,

⁴⁴ 'Haù Yhumsîng Garai gi, ngá é Yhumsîng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq,

Ngá é loqyo hkyam shut zung nyi shi aq." ga taí ri.[✧]

gâ ri. ⁴⁵ Haù mù, Dawiq yhang lháng, Hkrisduq lé, 'Yhumsîng' gâ é nghut le gi, yhangzo za hkâsu ge nghut rá lhú?" ga taí ri. ⁴⁶ Haù mù, ó yuq lé, dang rahkun lháng a wó tú taí lo kô é nghut mù luí, haù nyí mai, ó yuq lháng Yhang lé dangmyi a wám myi lo kó nghut ri.

23

Tarâ Sará Pé Eq Hparishe Pé Lé Sidiq Râ Hkyô

Mrk 12:38-40; Luk 11:37-52; 20:45-47

¹ Hau htâng, Yesuq gi, byù moq mó eq Yhâng é chángzô pé lé taí é má, ² "Tarâ sará pé eq Hparishe pé gi, Mosheq é tanghkuq má zung akô. ³ Haù mù, yhangmoq mhoqshit é hkyô chângiup lé, nungmoq châng kut ra kó râ nghut lhê. Nghut kôlhang, yhangmoq kut é dông gi, hkâkut kó; hkâsu mù gâ le, yhangmoq gi, yhangmoq taí é dông a kut kó nghut ri. ⁴ Yhangmoq gi, byu pé é goqsân má wôlai ke byi kôlhang, yhangmoq yhang gi, wò haù pé lé

✧ 22:32 Htoq Ló 3:6

✧ 22:37 Tarâ Pun 6:5

✧ 22:39 Nhung 19:18

✧ 22:44 Hkya-on 110:1

bo waq râ matú, loqnyhui lhang a kâm lhoq tuí kó nghut ri.

⁵ Yhangmoq kut é hkyô lunglhang gi, byu pé myàng râ matú za kut shit é nghut akô; haù chyúmbun bo é showuî-htông pé lé lhoq kô yù kômù, buhîng pé mâ é banbyaú pé lé lhoq hing yu akô nghut ri; ⁶ yhangmoq gi, poi pé mâ é réng é jowô pé eq tarajong pé mâ é ahkyak dik é zùng jang pé má, myang zùng râ lé ô nau nyi akô; ⁷ yhangmoq gi, gai pé má lhom shi-kyâm yù kó râ eq, byu pé mai, yhangmoq lé, 'Rabai'* ga lhom wut kó râ lé ô nau nyi bum akô.

⁸ Nungmoq kúm gi, 'Rabai' ga wut râ lé hkâ-ô nau kó; hkâsu mù gà le, nungmoq gi, sará rayuq za wó lhê nghut é htoq agó, nungmoq banshoq bang gi, gumang chyat ru nghut lhê. ⁹ Haù mù, myidàm htoq má, ó yuq lé le, 'âwa' hkâ-nghû kó; hkâsu mù gà le, mauhkûng htoq mâ é Îwa rayuq za, nungmoq é Îwa nghut lhê. ¹⁰ Hau htoq agó, 'sarâ' ga wut râ lé, hkâ-ô nau kó; hkâsu mù gà le, Hkrisduq za, nungmoq é Sará nghut lhê. ¹¹ Nungmoq mâ é je gyaú sù gi, nungmoq é dui-nhâng zoshâng dut râ nghut lhê. ¹² Hkâsu mù gà le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê, yhumsing gùng lé lhoq nyhûm sù kúm gi, waq toq é hui râ nghut lhê.

¹³ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, byu pé hí má, mauhkûng mingdán hkyô lé xaù tô akô; nungmoq yhang le a wàng kó, wàng nau nyi bang lé le a wàng nhâng kó nghut ri. ¹⁴ (Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, chuimó pé é yhûm-yò pé lé hpyoq

zo hpyoq shuq é eq kyû hîng hîng dúng shit mhaù é bang nghut akô; haù mù, dam byí é je myo hui zo kó râ nghut lhê.)†

¹⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, byù rayuq lé nungmoq é noqkuq htông má wó lhoq lhiq yû râ matú, myì hkyô, wuì hkyô, châng jón wún kômù, wó lhoq lhiq yu é sù lé gi, nungmoq su ngaraì byù í tú shuì dut akô nghut ri.

¹⁶ Hkyô-u she é myoqjit pé ê, nungmoq gi, dingnyé wó ri. Nungmoq gi, 'Noqkuq yhûm lé lang luí dakam é sù gi, haì a ra; noqkuq yhûm mâ é hîng lé lang mù dakam é sù kúm gi, châng ra bê.' ga lhaq taì akô. ¹⁷ Myoqjit é byù nâ pé ê! Haù hîng eq hîng lé lhoq yúnglhô é noqkuq yhûm gi, hká lhum je ahkyak lhê lú? ¹⁸ Hau htoq agó, nungmoq gi, 'Haù hkungga gyap lé lang luí dakam é sù gi, haì a ra, nghut kôlhang, haù hkungga zè lé lang mù dakam é sù gi, châng ra bê.' ga le, lhaq taì akô nghut ri. ¹⁹ Myoqjit pé ê! Haù hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê lú? ²⁰ Haù mù, haù hkungga gyap lé lang luí dakam é sù gi, haù hkungga gyap eq hau é ahtoq má ke tô é zè banshoq lé lang luí dakam é sù dut bê nghut ri. ²¹ Noqkuq yhûm lé lang luí dakam é sù gi, haù noqkuq yhûm eq haù má nyi é Sù lé lang luí dakam é sù dut bê nghut ri. ²² Hau htoq agó, mauhkûng lé lang luí dakam é sù gi, Garai Gasâng é tanghkuq eq haù má zung é Sù lé lang luí dakam é sù dut bê nghut ri.

²³ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le,

* **23:7** Aramaik dang đông rabai gà é gi, sará gà é lichyûm nghut lhê. † **23:14** Chyúmding ra-am má gi, bun zo 14 shí a bo é nghut lhê.

nungmoq gi, xunmân nghut é gau-tsáng shingtón, bantsai, hpakkyí pé má é xê gambùm ragambùm lé gi, byí nyí kômù, je ahkyak é tarâ nghut é, tarâ rap-rá hkyô, shogyo nhikmyin hkyô eq lhumzui hkyô pé lé gi, lhaí pyâm tô akô nghut ri. Hí lhum lé kut é su, htang lhum lé le kut râ lhê. ²⁴ Hkyô-u she é myoqjit pé ê! Nungmoq, pyup lé gi, jân pyám kômù, gola-uq lé gi, myui pyâm akô nghut ri.

²⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, zo hkoq shuq góm pé lé ahtoq shut za chí yúng mù, ahte má gi, lú zo lú shuq é eq yhumsing maiwáng zat é myit byíng zan tô ri. ²⁶ Hparishe myoqjit pé ê! Zo hkoq shuq góm é ahte lé hí chí yúng pyám keq, haú jáng, ahtoq le sân-yúng râ nghut lhê.

²⁷ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, but hpyu tô é lup pé eq du akô; haú pé gi, ahtoq má wú yúng kôlhang, ahkaú má gi, mâng bup showui pé eq achayut é chângjup byíng tô é nghut ri. ²⁸ Haú eq rajung za, nungmoq gi, byu pé hí má, ahtoq pyâm dingmán é su kut shit kôlhang, ahkaú má gi, gegùn labyoq kut é eq agê ashop é hkyô pé byíng zan tô ri.

²⁹ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, myiqhtoí pé é lup lé luptsuq tsuq kômù, dingmán bâng é lup pé lé mhón byí kôluí, ³⁰ 'Ngamoq gi, ngamoq é íchyí îwa pé é ipyat má nyí âng é ru nghut le gi, haú myiqhtoí pé é sui lhoq shun é bang má, ngamoq bo lòm rá a nghut.' ga lhaq taí akô. ³¹ Haú su mù, nungmoq gi, haú myiqhtoí pé lé sat pyám bâng é awut ashín

pé nghut é hkyô lé, nungmoq gùng nungmoq saksé hkam yu nyi akô nghut ri. ³² Haú mù, nungmoq é íchyí îwa pé hí tô é muzó lé, banshoq châng kut pán keq!

³³ Lhangmuí pé ê, duq htân lhangmuí amyú pé ê! Ngarai mîng é dam byi hkyô mai, hkâsu wó hpang lut kó râ lhú? ³⁴ Hau é yanmai, myiqhtoí pé, hpaqchyí bò bang eq chyúm sará pé lé, Ngò, nungmoq chyáng nhang kat râ nghut lhê. Haú bang má é ram lé gi, nungmoq lhom sat pyám mù, tapzîng má jén pyám kó râ nghut lhê; ra-am lé gi, nungmoq é tarajong pé má, nhuq bat kômù, ra-myuq htâng ra-myuq châng hkat zing-rí wún kó râ nghut lhê. ³⁵ Hau é yanmai, haú dingmán sù Abelaq é sui mai hí luí, noqkuq yhùm eq hkungga gyap gyoro má nungmoq sat pyâm é, Berehkiq é yhangzo Zahkariq é sui jé shoq, myidàm htoq má shun pyâm é dingmán bang banshoq é sui gi, nungmoq é ahtoq má jé lô râ nghut lhê. ³⁶ Ngò, nungmoq lé teng za taí kôlé, shí hkyô banshoq gi, ipyat shi é ahtoq má jé râ nghut lhê.

³⁷ Yerusalem é, Yerusalem é, myiqhtoí pé lé sat pyám pyám kut mù, náng chyáng nhang kat é bang lé luqgok eq dú sat sat kut é myuq nàng ê, woqzîng gi, yhangzô pé lé, yhâng é dùng hkaú má tsîng lhùng yu é su, nungzô pé lé, Ngò, hkâmyhó dâm shuí tsîng yù naù kôlhang, nàng a dóng nghut ri. ³⁸ Wú keq, nungmoq é yhùm gi, nungmoq é matú chamchyuiyu dut pyâm to berâ nghut lhê. ³⁹ Hkâsu mù gâ le, Ngò, nungmoq lé taí kôlé, 'Yhum-sing é myîng mai jé lé lo é Sù gi, hkungsô wó nyí sháng gaq.'* ga, nungmoq a taí taí gi, Ngo lé wó myâng kó râ a nghut lo." gâ ri.

* 23:39 Hkya-on 118:26

24

Ló Htâng Buinyì Má Dut Lò Râ Hkyô

Mrk 13:1-31; Luk 21:5-33

¹ Yesuq gi, noqkuq yhûm mai htoq e ló é u lé, Yhâng é chángzô pé gi, Yhâng é nàm má huí lé lô kômù, haú noqkuq yhum é loqmú pé lé tûn shit akô. ² Haú hkûn, Yesuq gi, yhangmoq lé, "Haú pé banshoq lé, nungmoq myang lhê a nghut kó lhú? Ngò, nungmoq lé teng za tái kôlé, luggok haú pé gi, rachâm htoq racham lháng a kê lhum loshoq, hpuyoq hpyi pyâm é hui râ nghut lhê." ga tái ri.

³ Yesuq gi, Tsanlun Bùm má zung tô é hkûn, haú chángzô pé gi, yhangmoq baú Yhâng chyáng lé je kômù, "Haú hkyô pé gi, hkâ-nhám dut lò râ lhú? Nang gyó lé râ hkûn eq ló htâng buinyì má, hkasû é kumlhá htoq lô râ nghut lhê lhú? Ngamoq lé tái kyô wú laq." ga, Yhang lé myi akô.

⁴ Haú hkûn, Yesuq, yhangmoq lé tû tái é gi, "Nungmoq lé, ó yuq èq le a wó shuí nghoq sháng gaq, sidiq nyi keq. ⁵ Hkâsu mù gâ le, 'Ngò gi, haú Hkrisduq nghut lhê.' ga, Ngá myîng lé lêng é byù myo myo pô htoq lô mù, byù myo myo lé hkyô shuí nghoq kó râ nghut lhê. ⁶ Nungmoq gi, majan dut nyi é hkyô eq majan eq sêng é danglám pé lé, wó gyo kó râ nghut lhê; nghut kôlháng, hkâgyuq dân kó. Haú hkyô pé gi, dut lò râ za nghut lhê; nghut kôlháng, ló htâng é buinyì gi, a nghut shi. ⁷ Byù ra-myû eq ramyû, mingdán ralhúm eq ralhúm majan zân lhúm lò kó râ nghut lhê. Jowò myo myo má, mutmó gyó é pé eq layàng nún é pé dut lò râ nghut lhê. ⁸ Haú pé gi, wuîhke jamjau hkyo é apûn awang za ru nghut ashî.*

⁹ Haú hkûn, nungmoq gi, zing-rî é eq sat pyâm é hui zo râ matú, ap pyâm é hui kó râ nghut lhê. Byù myû lhunglhâng bang gi, Ngá é yanmai, nungmoq lé a ngui kut kó râ nghut lhê. ¹⁰ Haú u lé, byù myo myo gi, lumjîng myit lé tô pyâm kômù, rayuq eq rayuq a ngui lhum dut é htoq agó, rayuq eq rayuq ap pyâm lhum kó râ nghut lhê. ¹¹ Hau htoq agó, myiqhtoi pyoq pé myo myo pô htoq lô kômù, byù myo myo lé hkyô shuí nghoq kó râ nghut lhê. ¹² Agè ashop é hkyô myô jat lo é yanmai, byù myo myô é chyitdap myit gi, kân ló byuq râ nghut lhê; ¹³ nghut kôlháng, jîhtûm je shoq wó hkam jân nyi é sù gi, hkyi yu é hui râ nghut lhê. ¹⁴ Byù myû banshoq má saksé dut râ matú, haú mingdán eq sêng é gabú danglù lé, mingkan gón má hko kyo râ nghut lhê. Hau htâng má sheq, ló htum buinyì je râ nghut lhê.

¹⁵ Haú mù luî, myiqhtoi Danielaq dông mai tái tô é eq rajung za, 'haú lhoq hten lhoq hpuyoq é achayut hkyô'☆ gi, chyoiyúng jowò má shap tô é lé, nungmoq myàng kó râ nghut lhê. (Chyúmlaiká nghap sù gi, sê gyo sháng gaq). ¹⁶ Haú hkûn, Yuda mau má nyi é bang gi, bùm pé shut hfang doq ló kó sháng gaq. ¹⁷ Yhumhkûng htoq má nyi tô é sù gi, yhúmhmau mâ é zè hái lé le, a ló gyó wang yù lo sháng gaq. ¹⁸ Yò má nyi tô é sù gi, yhâng é buhîng lé a ló taû yu nyi lo sháng gaq. ¹⁹ Haú buinyì pé má, zogûng dut é myiwe eq náu huq ashî nghut é înu wuî gi, gyai yhang wuîhke jamjau kó râ nghut lhê. ²⁰ Haú nungmoq hpâng râ buinyì gi, gyoqmyô,* a nghut jáng, Bánno buinyì má a ang râ matú, kyûdûng nyi keq. ²¹ Hkâsu mù gâ le, mingkan lé joq é hkûn mai ahkuí je shoq, hkâ-nhám le a dut wú shí é wuîhke jamjau mó gi,

☆ **24:8** Esai 19:2 ☆ **24:15** Dan 9:27; 11:31; 12:11 * **24:20** Israelaq mau má gi, gyoqmyô lé hkyô htoq le gyai wuîhke é ahkyîng nghut lhê.

haú buinyì pé má dut lò rá nghut lhê; haú sù é hkyô gi, htângnùng má hkâ-nhám le dum dut lo rá a nghut. ²² Buinyì haú pé lé lhoq shaú pyâm é za a nghut le gi, ó yuq le asak wó lut rá a nghut; nghut kôlhang, Garai Gasang eq hkyin yù hui bâng é matú gi, buinyì haú pé lé, lhoq shaú pyâm byi rá nghut lhê. ²³ Haú ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, haú a nghut jáng, 'Wú keq, Yhang hê má nyi ri.' ga tái jáng, nungmoq hkájíng kó. ²⁴ Hkâsu mù gâ le, Hkrisduq pyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lháng, wó lhoq nghoq shoq ga, kumlhá mó pé eq laklaí kumlhá pé lé kut shit kó rá nghut lhê. ²⁵ Gyo keq, shí hkyô a dut shimá, Ngò, nungmoq lé tái kyô nyi gù nghut lhê.

²⁶ Haú mù, rayuq yuq eq, nungmoq lé, 'Yhang gi, yoso má nyi ri.' gâ jáng le, hkâ-ê kó; 'Yhang gi, shí gok hkaú má lúng tô ri.' ga jáng le, hkâjíng kó. ²⁷ Hkâsu mù gâ le, bui htoq hkyam má lhap hpyat é gi, bui wang hkyam má lháng jé shoq duqbó é su, haú Byu Yhangzo jé lé é hkûn le, dut rá nghut lhê. ²⁸ Màng leq é jang má, langdâ pé, lé zíng bùm rá nghut lhê.

²⁹ Buinyì haú pé mâ é wuîhke jamjau lai eq yhang, 'Bui gi, noq byuq mù, lhamó gi, a tsô dut byuq rá nghut lhê; kyî pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhûn é huî bùm kó rá nghut lhê.'[✱]

³⁰ Haú hkûn, haú Byu Yhangzô é kumlhá gi, mauhkûng má htoq shit lô rá nghut mù, myidàm htoq mâ é byù myû lhunglháng gi, yón ngau bùm kó rá nghut lhê. Haú

Byu Yhangzo gi, mauhkûng mai, mhut ji mù, hpungwup a-tsam mó eq le, hpungwup shingkâng eq le, gyó lé lo é lé, yhangmoq byu-myàng kó rá nghut lhê. ³¹ Hau htâng má, Yhang gi, Yhâng é maumang lagyô pé lé, tut htê mó eq nhang kat luî, yhangmoq gi, maumyî chyûn myi chyûn eq mauhkûng rahkyam mai, gó hkyam htum shoq mâ é, Yhang hkyin yu tô é bang lé shuí tsíng yù kó rá nghut lhê.

³² Maihpáng gâm lé wú mù, mhoq yû keq; agâm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê. ³³ Haú eq rajung za, shí hkyô ban-shoq† lé, nungmoq myàng kôjáng, Yhang gi, chyáng bê nghut mù, hkúmdong má lháng nghut nyi bê hkyô lé, nungmoq sé lo keq. ³⁴ Ngò, nungmoq lé teng za tái kôlé, shí pyat mâ é byu pé a ban shi byuq shimá, haú hkyô pé‡ ban-shoq dut byuq rá nghut lhê. ³⁵ Mauhkûng eq myigùng gi, a joq lo dut byuq rá nghut lhê; nghut kôlhang, Ngá é dang gi, ru joq nyi rá nghut lhê.

Haú Buinyì Eq Ahkyíng Lé, Ó Le A Sé

Mrk 13:32-37; Luk 17:26-30, 34-36; 12:35-48

³⁶ Buinyì eq ahkyíng haú lé gi, ó yuq le a sé; mauhkûng htoq mâ é maumang lagyô pé lháng a sé; haú Zo le a sé; haú Íwa za ru sê lhê. ³⁷ Noaq é tsín pyat má dut é su, haú Byu Yhangzo lé lo é hkûn le, dut rá nghut lhê. ³⁸ Hkâsu mù gâ le, dowuî a díng shí é buinyì pé má, byu pé gi, Noaq, wuî-sanghpo mó hkaú má wang é hkûn jé shoq, zo zo shuq shuq, myi byi myi yû, kut nyi bum akô nghut ri; ³⁹ yhangmoq gi, dowuî díng lô mù, yhangmoq ban-shoq lé ùm sat pyâm é hkûn jé shoq, haú dut lò rá lé, a sé kó dut

✱ 24:29 Esai 13:10; 34:4 † 24:33 Shí hkyô ban-shoq gâ é gi, Yesuq jé lé rá hí má dut rá hkyô pé lé tái é nghut lhê. ‡ 24:34 Haú hkyô pé gâ é gi, Yerusalem noqkuq yhûm htên byoq rá lé tái é nghut lhê.

bùm é su, haù Byu Yhangzo lé lo é hkûn le, dut râ nghut lhê. ⁴⁰ Haù hkûn, yò má rahá nyi tô é byù í yuq mâ é rayuq gi, shuí yu é hui mù, rayuq gi, myit gyó to râ nghut lhê. ⁴¹ Luqlúí chòm lêng nyi é myiwe í yuq mâ é rayuq gi, shuí yu é hui mù, rayuq gi, myit gyó pyâm to râ nghut lhê.

⁴² Haù su mù, haù nungmoq é Yhumsing gi, hká nyi jé lé lô râ lé, nungmoq a sê kô é yanmai, sidiq machya nyi keq. ⁴³ Myín hká u má hkau sù jé lé lô râ lé, yhumsing sê é ru nghut le gi, yhâng é yhùm má a wó hput wâng nhâng loshoq, yhang machya nyi râ nghut é lé, nungmoq sê gyô nyi keq. ⁴⁴ Haù mù, nungmoq le rì rì nghut nyi keq; hkâsu mù gâ le, haù Byu Yhangzo gi, a bûn nùng má jé lé lô râ nghut lhê.

⁴⁵ Yhumsing hpô é dui-nhâng zoshâng wuì lé, uphkâng râ eq ahkying jé jáng zoshuq gâm byi râ matú, yhumsing hpô eq mù nhang tô é, lhumzui luí, hpaqchyí bo é dui-nhâng zoshâng gi, ó yuq nghut râ lúh? ⁴⁶ Yhumsing hpó dum taù lo é hkûn, haù su kut nyi lánq é dui-nhâng zoshâng gi, hkungsô wó nyi rì. ⁴⁷ Ngò, nungmoq lé teng za tai kôlé, yhumsing hpó haù gi, yhâng é sutzé banshoq, dui-nhâng zoshâng haù yuq lé ap to râ nghut lhê. ⁴⁸ Nghut kôlhang, laq má mù, dui-nhâng zoshâng haù yuq gi, agè ashop sù nghut luí, 'Ngá é yhumsing hpó jé lô râ gyai myáng ashí.' ga, yhâng é i-myt unghkaù má myit yù mù, ⁴⁹ gotù dui-nhâng zoshâng luzúm wuì lé nhuq bat é htoq agó, í shuq wut bang eq rahá zo zo shuq shuq kut nyi é nghut le gi, ⁵⁰ dui-nhâng zoshâng hau é yhumsing hpó gi, yhang a myitngam tô é buinyi eq yhang a sê tô é ahkying má jé lô mù, ⁵¹ yhang lé jap pyám luí, gegùn labyoq kut bang hkâm zô é, ngaubiyi ngau

nhap eq zui kyik kyik shoq hpuzô nyi râ jowò má hkyô pyám râ nghut lhê.

25

Zomyi Raxê Yuq Lé Dangtú Yu É Hkyô

¹ Haù hkûn, mauhkung mingdán gi, myibung yu chùng mù, lusik lé te yù râ ga, htoq e ló é zomyi raxê yuq eq pûng râ nghut lhê. ² Haù bang má, ngo yuq gi, nhik a gy-ing kó; ngo yuq gi, nhik gying akô nghut ri. ³ Haù nhik a gying é bang gi, myibung yu chùng kôlhang, xú a yu chùng kó nghut ri. ⁴ Nghut kôlhang, haù nhik gying é bang kúm gi, yhangmoq é myibung lé le, xú bo é bông lé le yu chung akô nghut ri. ⁵ Lusik jé lé lô râ myáng nyi é yanmai, yhangmoq banshoq bang gi, yhup muì lò kômù, yhup myhí byuq bekò nghut ri.

⁶ Myín gunggàm jé jáng, 'Lusik jé bê ô! Yhang lé te yù râ matú, htoq lé lô keq hkoi ô!' ga, garú é hté htoq lo ri.

⁷ Haù hkûn, zomyi haù bang banshoq gi, toq lô mù, yhangmoq é myibung lé hen lajáng akô nghut ri. ⁸ Haù nhik a gying bang gi, 'Ngamoq lé, xú ratsuí byi kó laq; hkâsu mù gâ le, ngamoq é myibung shi lô nyi ri.' ga, haù nhik gying bâng chyáng dúng akô.

⁹ Haù hkûn, haù nhik gying bang gi, 'Nungmoq eq ngamoq é matú ga jáng, luq râ a nghut. Haù mù, nungmoq é matú, xú ung bâng chyáng é wui yù keq.' ga tũ tai kat akô.

¹⁰ Yhangmoq, xú wuì e ló kô é hkûn, lusik gi, jé lé lô mù, haù rì rì hen tô é zomyi wuì gi, yhang eq rahá myiháng poí má wang ló bekò. Hkum le myhí byuq bê nghut ri.

¹¹ Hau htâng má, hau htâng gyó tô é zomyi wuì gi, tau jé lô kômù, 'Yhumsing ê! Yhumsing ê! Ngamoq lé, hkum hpóng byi laq ô!' ga tai akô.

12 Nghut kôlhang, haù lusik gi, 'Ngò, nungmoq lé teng za tai kôlé, nungmoq lé ngò a sé.' ga tù tai kat ri.

13 Haù mù luí, haù Byu Yhangzo jé lé rá buinyì eq ahkyíng lé, nungmoq a sé kô é yanmai, sidiq machya nyì keq.

Dui-nhâng Zoshâng Sum Yuq Lé, Dangtú Yu É Hkyô

Luk 19:11-27

14 Mauhkûng mingdán gi, byù rayuq byìn we htoq rá hen nyì é nghut mù, yhâng é dui-nhâng zoshâng wui lé wut yù luí, yhâng é sutzè lé ap byì to sù eq pung ashì nghut ri. 15 Yhang gi, yhangmoq é a-tsam má cháng luí, rayuq lé gi, ngùn ngo jói, rayuq lé gi, í jói, htâng rayuq lé gi, rajoí kut byì to mù, byìn we shut htoq ló byuq bê nghut ri. 16 Ngùn ngo jói wó yù sù gi, haù hkûn jáng htoq ló mù, hpugá gá luí, ngùn ngo jói wó myat yù bê nghut ri. 17 Haù eq rajung za, ngùn í jói wó yù sù le, í jói wó myat yù bê nghut ri. 18 Nghut kôlhang, rajoí za wó yù sù gi, htoq e ló mù, myigùng má du luí, yhâng yhumsíng hpô é ngùn lé haq myhup tô ri.

19 Hau htâng tsómra myáng jáng, dui-nhâng zoshâng haù bâng é yhumsíng hpó gi, dum taù jé lô mù, yhangmoq é ngùn chyaráng lé, lo jep ri. 20 Ngùn ngo jói wó yù sù gi, amyat ngo jói lé le yu lé lô mù, 'Yhumsíng ê, nàng, ngo lé, ngùn ngo jói ap tô é nghut lhê. Wú aq, amyat ngo jói wó ho jat yù bê.' ga tai ri.

21 Haù hkûn, haù yhumsíng hpó gi, 'Ará! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi rá nghut lhê. Nàng yhumsíng hpô é gabú hkyô má bo wang lòm aq hkoil!' ga tù tai ri.

22 Haù eq rajung za, í jói wó yù sù le, lé lô mù, 'Yhumsíng ê, nàng, ngo

lé ngùn í jói ap tô é nghut lhê. Wú aq, amyat í jói wó ho jat yù bê.' ga, lé tai ri.

23 Haù hkûn, haù yhumsíng hpó gi, 'Ará! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi rá nghut lhê. Nàng yhumsíng hpô é gabú hkyô má bo wang lòm aq hkoil!' ga tù tai ri.

24 Hau htâng, rajoí wó yù sù le, lé lô mù, 'Yhumsíng ê, nàng gi, byù wui nghut mù, yhumsíng a hô tô é jang má é shù yù nau é htoq agó, yhumsíng, kyôshi a sân hkyô tô é jang má é tsíng yù nau sù nghut é lé, ngò sê lhê. 25 Haù mù, ngò gi, gyuq luí, htoq ê mù, nàng é ngùn lé, myigùng má é haq myhup tô é nghut lhê. Wú aq, shì gi, nàng é ngùn nghut lhê.' ga tai ri.

26 Haù mù, yhumsíng hpó gi, yhang lé, 'Agè ashop é eq lagôn é dui-nhâng zoshâng ê! Ngò gi, yhumsíng a hô tô é jang má é shù yù nau é eq, yhumsíng, kyôshi a sân hkyô tô é jang má é tsíng yù nau sù nghut é lé, nàng sê to gù nghut le nhíng, 27 ngá é ngùn lé, ngò dum taù jé lô jáng, aráng eq amyat wó yù shoq, ngùn hpùn kat jang má, haí mù a kat tô é lú?

28 Haù mù, haù ngùn rajoí lé, nàng chyáng mai yù luí, raxê jói wó to sù lé, byì pyám nhâng rá nghut lhê. 29 Hkâsu mù gá le, wó sù ó yuq lé nghut kôle, yhang agùn agó wó rá matú, jat byi rá nghut lhê. A wó su chyáng mai kúm gi, yhang wó tô é lé lhang yu pyám byi shirâ nghut lhê. 30 Haù mù, haù akyû a bo é dui-nhâng zoshâng lé gi, ngaubyi ngaù nhap eq zui kyik kyik shoq hpuzô nyì rá jowò nghut é, shínggan mauchut hkaù má dú htoq pyám keq.' gá ri.

Sau Eq Bainám

³¹ Haù Byu Yhangzo gi, Yhâng é hpungwup shing kang mai, maumang lagyo lhunglhâng bang eq rahá jé lé lo é hkûn, Yhâng é hpungwup shing kang bo é hkohkâm-tanghkuq htoq má zùng râ nghut lhê. ³² Haù hkûn, byù myû chângjup gi, Yhâng é hí má zing lé lo bùm kó râ nghut mù, Yhang gi, sau zúng sù mai, sau eq bainám lé gotù tũ kut gam hkoq é su, byu pé lé gam hkoq pyám râ nghut lhê. ³³ Yhang gi, sau pé lé, loqyo hkyam shut, bainám pé lé, loqpaì hkyam shut kut, nyhi to râ nghut lhê.

³⁴ Hau htâng má, haù Hkohkâm gi, Yhâng é loqyo hkyam shut má é bang lé, 'Ngá Wâ chyáng má é shimân jeju hkam yu é hui bang ê, lé keq; mingkan lé hpan é hkûn mai, nungmoq é matú ga hen lajâng tô é muì mingdán má wang ló keq. ³⁵ Hkâsu mù gâ le, Ngò zòmút é u lé, nungmoq, Ngo lé byi tso kô é nghut lhê; Ngò wuìshit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô é nghut lhê; ³⁶ Ngò gùngchîn dut é u lé, nungmoq, Ngo lé byi hut kô é nghut lhê; Ngò nõhpyo huì é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga taí râ nghut lhê.

³⁷ Haù hkûn, haù dingsmán bang gi, Yhang lé, 'Yhumsing ê, Nang zòmút huì é lé, ngamoq, hkâ-nhám myàng luí, byi tsò wú é l hú? Nang wuìshit é lé, ngamoq, hkâ-nhám myàng luí, byi huq wú é l hú? ³⁸ Nang bíng kut wún é lé, ngamoq, hkâ-nhám myàng luí, lhom hkulum wú é l hú? Nang gùngchîn dut é hkûn, ngamoq, hkâ-nhám byi hut wú é l hú? ³⁹ Nang nõhpyo huì é lé le, htóng lúng é lé le, ngamoq, hkâ-nhám myàng luí, lé gon lé kum wú é l hú?' ga myi kó râ nghut lhê.

⁴⁰ Haù hkûn, haù hkohkâm gi,

'Ngò, nungmoq lé teng za taí kôlé, shí, Ngá gumang wuì má é je tiq sù lé, nungmoq kut byi é hkyô haí le, Ngo lé kut byi é nghut bê.' ga taí râ nghut lhê.

⁴¹ Hau htâng má, Yhang gi, Yhâng é loqpaì hkyam shut má é bang lé, 'Dingnyé wó é bang ê, Ngá chyáng mai gâng ló mù, nat Tsadán eq yhâng é maumâng pê é matú hen tô é, ahtum abyuq é myi má wang ló keq. ⁴² Hkâsu mù gâ le, Ngò zòmút é u lé, nungmoq, Ngo lé a byi tso kó; Ngò wuìshit é u lé, nungmoq, Ngo lé a byi huq kó; ⁴³ Ngò bíng kut wún é u lé, nungmoq, Ngo lé a lhom hkulum yù kó; Ngò gùngchîn dut é u lé, nungmoq, Ngo lé, mebu a byi hut kó; Ngò nõhpyo huì é eq htóng lúng é u lé, nungmoq, Ngo lé a gon kó nghut ri.' ga taí râ nghut lhê.

⁴⁴ Haù hkûn, yhangmoq gi, 'Yhumsing ê, nang zòmút wuìshit é, bíng kut wún é, gùngchîn dut é, nõhpyo huì é eq htóng lúng é lé, ngamoq, hkâ-nhám myàng luí, a wú gon kut wú é l hú?' ga taù myi kó râ nghut lhê.

⁴⁵ Haù hkûn, Yhang gi, 'Ngò, nungmoq lé teng za taí kôlé, shí bang má é je tiq sù lé, nungmoq, a kut byi é hkyô haí le, Ngo lé a kut byi é nghut bê.' ga, yhangmoq lé tũ taí râ nghut lhê.

⁴⁶ Haù mù luí, haù bang gi, ahtum abyuq mara dam byi é má wang ló kó râ nghut lhê; haù dingsmán bang kúm gi, ahtum abyuq é asak má wang ló kó râ nghut lhê." ga Yesuq taí ri.

26

Yesuq Lé, Sat Râ Da Kô É Hkyô

Mrk 14:1-2; Luk 22:1-2; Yhn 11:45-53

¹ Yesuq gi, haù hkyô pé lé ban taí é htâng má, Yhâng é chángzô pé lé, ² "Nungmoq sê tô é eq rajung za, í nyí laí é htâng má, Lhoqlhai Poí jé rá nghut mù, haù Byu Yhangzo gi,

tapzìng má jén sat é hui râ matú, ap pyâm é hui râ nghut lhê." ga tai ri.

³ Haú u lé, hkyangjong agyi pé eq suwún wuí gi, Kayahpaq gâ é hkyangjong mó rayuq é yhumwàng má zup zìng to kômù, ⁴ Yesuq lé haq chyup yû râ eq sat pyám râ hkyô lé, hpyê lhùm bum akò nghut ri. ⁵ Nghut kôlhang, yhangmoq gi, "Byu pé gabyông lò kó abe, poí gyo rô má gi, a kut shi sháng," ga, tai lhùm akò nghut ri.

Yesuq, Xú Hut Gyun Huí É Hkyô
Mrk 14:3-9; Yhn 12:1-8

⁶ Yesuq gi, Behtani wà má nyi é manggâm dap wú sù Simùn é yhùm má nyi tô é hkùn, ⁷ myiwe myhí rayuq gi, gyai hpaú é namngón xú bo é luq hpyû bông yu lé lô mù, Yesuq zo shuq nyi é hkùn, namngón xú haú lé, Yhâng é ulhum má hut gyun byi ri.

⁸ Haú hkyô lé, haú chángzô pé myàng kôjáng, wú nhik-yo kômù, "Haí mù luí, haú lé aha agó kut pyâm lhê lúhú? ⁹ Xú haú lé, ahpau myo myô èq ùng pyám mù, myùng bang lé byi le ge lhê mhaí!" ga tai kat akò.

¹⁰ Yesuq gi, haú hkyô lé sé luí, "Haí mù, myiwe zo haú lé, i-myit lhoq myô nyi akò lúhú? Yhang gi, Ngá é ahtoq má ge é hkyô kut bê nghut ri. ¹¹ Haú myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sù a nghut. ¹² Yhang, Ngá gùng má namngón xú hut gyún é gi, Ngá gùng lé yhum râ matú, hen lajáng é hkyô nghut ri. ¹³ Ngò, nungmoq lé teng za tai kôlé, haú gabú danglù lé, mینگkan gón hko kyô é jowò hkangmó má, yhang lé myit bún é dông, yhang kut é hkyô shí lé, tai kyo bekò râ nghut lhê." ga tai kyo ri.

Yesuq Lé, Yudaq Èq Ung Zô Pyâm
É Hkyô

Mrk 14:10-11; Luk 22:3-6

¹⁴ Hau htàng, haú chángzo raxe í yuq má bo é Yudaq Iskarut ga sù gi, hkyangjong agyi pé chyáng é mù, ¹⁵ "Ngò, Yesuq lé nungmoq é loq má ap byi é nghut jáng, nungmoq, ngo lé haí byi kó râ lúhú?" ga myi ri. Haú mù, yhangmoq gi, yhang lé ngùn denggá sum xê chap nghap byi akò. ¹⁶ Haú hkùn mai, Yudaq gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mrk 14:12-26; Luk 22:7-23; Yhn 13:21-30

¹⁷ Múnchi a kat é Muk Zo Poí sâng-hi nyi má, haú chángzô pé gi, Yesuq chyáng lé lô kômù, "Nàng zo râ Lhoqlhai Poí zoshuq lé, ngamoq hkâmá món to râ lúhú?" ga myi akò.

¹⁸ Haú mù, Yhang gi, "Myuq hkaú shut wang lô mù, byu rayuq chyáng é luí, hau yuq lé, 'Ngá é ahkyíng chyáng bê; Ngá é chángzô pé eq rahá, Ngò, nàng é yhùm má Lhoqlhai Poí kut râ nghut lhê.' gâ Sará tai ri nghú, é tai keq." ga pying kat ri. ¹⁹ Haú mù, haú chángzô pé gi, Yesuq pying kat é eq rajung za é tai kômù, Lhoqlhai Poí lé món to bekò nghut ri.

²⁰ Myinhtàng jé lô jáng, Yesuq gi, haú chángzo raxe í yuq eq rahá, zohpoq má zung to ri. ²¹ Yhangmoq zô nyi bùm kô é u lé, Yesuq gi, "Ngò, nungmoq lé teng za tai kôlé, nungmoq mâ é rayuq sù gi, Ngo lé ap pyám râ nghut lhê." ga tai ri.

²² Haú hkùn, yhangmoq gi, gyai gyô yón kômù, rayuq htàng rayuq, "Yhumsing ê, ngò a nghut hkaí?" ga, Yhang lé chôm myi akò.

²³ Haú hkùn, Yesuq gi, "Ngò eq rahá, hkoq shí má loq lap bê sù gi, Ngo lé ap pyám râ sù nghut lhê. ²⁴ Haú Byu Yhangzo gi, Yhang eq séng luí ká tô é eq rajung za, shí râ za nghut lhê. Nghut kôlhang, haú

Byu Yhangzo lé ap pyâm é sù gi, dingnyé wó ri; haú yuq gi, a hku lé le lhang, je ge ri." ga dum taí kat ri.

²⁵ Hau htâng, Yhang lé ap pyám râ sù, Yudaq gi, "Rabai ê, ngò a nghut hkaí?" ga myi jáng, Yesuq gi, "Nàng nghut ri." ga tù taí kat ri.

²⁶ Yhangmoq zô nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shí gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byí ri.

²⁷ Hau htâng, Yhang gi, góm lé le, yù mù, jeju hkya-on luí, yhangmoq lé byi mù, taí é gi, "Nungmoq banshoq bang, shuq keq. ²⁸ Shí gi, yubak mara hkyut pyám byi râ, byù myo myô é matú htoq pyâm é, dangshikaq eq sêng é Ngá sui nghut lhê. ²⁹ Ngò, nungmoq lé taí kôlé, ahkuí mai gi, Ngò, Ngá Wá é mingdán má, nungmoq eq rahá tsibiyiq wing asik lé shuq é buinyi a jé jé, tsibiyiq wing lé dum shuq râ a nghut lo." ga taí ri.

³⁰ Yhangmoq gi, hkya-on mahkôn ralhum ban hkôn jáng, Tsanlun Bùm shut htoq e ló bekô nghut ri.

Petruq He-ngik Râ Lé, Te Taí É Hkyô

Mrk 14:27-31; Luk 22:31-34; Yhn 13:36-38

³¹ Hau htâng má, Yesuq gi, yhangmoq lé, "Nungmoq lhunglhang bang gi, hkû-myîn yhang jáng, Ngá é yanmai, myit lingbat kó râ nghut lhê; hkâsu mù gâ le,

'Haú sau zúng sù lé, Ngò bat sat pyám mù, sau hpúng mâ é sau pé gi, lhoq pyo pyâm é hui kó râ nghut lhê.[☆]

ga kâ tô ri. ³² Nghut kôlhang, Ngò gi, lhoq dui toq é huí htâng má, Galile mau shut, nungmoq é hí má e ló lángrâ nghut lhê." gâ ri.

³³ Haú hkûn, Petruq gi, "Náng é yanmai, góbang banshoq myit lingbat kôlhang, ngò gi, hkâ-nhám le myit lingbat râ a nghut." ga tù taí ri.

³⁴ Yesuq gi, "Ngò, nang lé teng za taí lé, hkû-myîn yhang jáng, woq a tûn shimá, nàng, Ngo lé sum dâm he-ngik pyám râ nghut lhê." ga tù taí ri.

³⁵ Nghut kôlhang, Petruq gi, "Ngò, Nàng eq rahá shí râ dut kôlhang, Nang lé ngò he-ngik pyám râ a nghut." ga saí taí ri. Haú chángzô pé góbang banshoq le, haú su ga châng taí bum akô nghut ri.

Get-samane Gâ É Jowò Má Kyûdûng É Hkyô

Mrk 14:32-42; Luk 22:39-46

³⁶ Hau htâng má, Yesuq gi, Yhâng é chángzô pé eq rahá Get-samane gâ é jowò má ê kômù, yhangmoq lé, "Ngò, hé má ê mù, kyûdûng nyi é u lé, nungmoq shí má zùng lángrâ keq." ga taí ri. ³⁷ Yesuq gi, Petruq eq Zebedi yhangzô nhik lé shuí chûng ri. Yhang gi, myit gyai a ngón é eq myit wui nhik hkyik dut lò bê nghut ri. ³⁸ Hau htâng, Yhang gi, yhangmoq lé, "Ngò gi, shí râ í yhang myit yón nyi ri; nungmoq gi, Ngò su machyâ luí, shí má lángrâ nyi keq." ga taí ri.

³⁹ Yesuq gi, haú mai ratsuí zo sô é mù, myigùng má ngóm gop to luí, "Áwa ê, wó dut é nghut le gi, góm* shí lé, Ngá chyáng mai lhaí pyám byi laq. Nghut kôlhang, Ngò ô nau é dông a nghut, Nàng ô nau é dông sheq nghut sháng gaq." ga kyûdûng ri.

⁴⁰ Hau htâng, Yhang gi, Yhâng é chángzô pé chyáng dum taú lo le, yhangmoq yhup myhí to kô é lé lo myàng ri. Haú mù, Yhang gi, Petruq lé, "Nungmoq gi, hkyíng hkum rahkum za lhang, Ngò eq rahá a wó machya nyi kó lhu? ⁴¹ Gunlaú é a hui sháng

☆ **26:31** Zhk 13:7 * **26:39** Góm gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

gaq, machyâ luî, kyûdûng nyi keq. Haû woi-nyî gi, kâm nyi kôlhang, gungsho gi, wum nyhôm nyi ri." ga taî ri.

⁴² Yhang gi, radàm dum ê mù, "Âwa ê, góm shî lé, Ngò a shuq é a wó lai râ nghut jáng gi, Nàng ô nau é dông nghut sháng gaq hkoi." ga kyû dum dúng ri.

⁴³ Yhang dum taû lo le, yhang-moq gi, myoqkuq lai kô é yanmai, yhup myhî to láng kô é lé, lo dum myàng ri. ⁴⁴ Haû mù, Yhang gi, yhangmoq lé tô pyâm to mù, sum dâm nghû râ dàm dum ê luî, hí lé dúng é dang lé roq é dum dúng ri.

⁴⁵ Haû mù, Yhang gi, haû chángzô pè chyang dum taû jé lô mù, yhang-moq lé, "Nungmoq gi, ahkuî jé shoq yhup ngón nyi ashî kó lú? Wú keq! Haû ahkyíng gi, jé bê nghut luî, haû Byu Yhangzo gi, yubak dap bâng é loq má ap pyâm é hui râ nghut bê. ⁴⁶ Toq keq! Ló losháng hkoi! Ngo lé ap pyám râ sù gi, jé lé bê nghut ri." ga taî ri.

Yesuq, Chyup Yû Huî É Hkyô

Mrk 14:43-50; Luk 22:47-53; Yhn 18:3-12

⁴⁷ Yesuq, dang nyo nyi ashî u lé, haû chángzo raxe í yuq má bo é Yudaq gi, jé lé lo ri; haû hkyangjong agyî pé eq mingbyu é suwún wui chyáng mai nhang kat é bang nghut é, shâm eq dumbáng pé chung tô é byu moq mó le, yhang eq rahá nghut akô. ⁴⁸ Yesuq lé ap pyám râ sù gi, haû bang lé, "Ngò, bopuq puq é sù gi, haû yuq nghut bê; Yhang lé chyup yû keq." ga kumlhá byî tô ri. ⁴⁹ Yudaq gi, Yesuq chyáng hkyê za ê mù, "Rabai ê, wángzán nyi lhé lú?" ga taî luî, Yhang lé bopuq puq byî ri.

⁵⁰ Haû hkûn, Yesuq gi, "Buinùm hpó ê, nàng kut râ muzó lé kut aq hkoi." ga tú taî kat ri.

Hau htâng, yhangmoq gi, hí shut huî é luî, Yesuq lé chôm zuî zìng mù, chyup yû bekô nghut ri.

⁵¹ Haû mù, Yesuq eq rahá nyi bang mâ é rayuq gi, shâm she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁵² Haû jáng, Yesuq gi, haû yuq lé, "Náng é shâm lé, xâng pyám aq; hkâsu mù gà le, shâm shé sù gi, ó yuq nghut kôle, sham èq shî râ nghut lhé. ⁵³ Ngò gi, Ngá Wa lé dung jáng, Yhang gi, radá dâm, maumang lagyo dap pé raxe í dap htoq myo shoq nhang kat byi râ nghut é lé, nungmoq a sé kó lú?"

⁵⁴ Nghut kôlhang, haû su nghut é nghut jáng, shî hkyô dut lò râ nghut lhé ga Chyúmdang pé má bò tô é hkyô gi, hkâsu wó dik lò râ lú?" ga taî kat ri.

⁵⁵ Hau htâng, Yhang gi, byu moq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chung mù, lé lo akô lú? Ngò gi, nyí wui, noqkuq yhûm má zùng mù, mhoqshit nyî kôlhang, nungmoq, Ngo lé a chyup yû kô é nghut lhé. ⁵⁶ Nghut kôlhang, shî su dut é hkyô pé banshoq gi, haû myiqhtoî pé kâ tô é hkyô pé lo dik râ matú dut é nghut ri." ga taî ri. Haû hkûn, haû chángzô pé banshoq gi, Yesuq lé tô pyâm to kôluî, hpang byo byuq bekô nghut ri.

Yudaq Byìn Tú Wapdoq Má Jep Huî É Hkyô

Mrk 14:53-65; Luk 22:54-55, 63-71; Yhn 18:13-14, 19-24

⁵⁷ Yesuq lé chyup yu é bang gi, haû tarâ sará pé eq suwún wui zup zìng nyi é jang, hkyangjong mó Kayahpaq é yhûm má, Yhang lé shuí e akô. ⁵⁸ Petruq gi, hkyangjong mó é yhumwàng hkaû má châng jé wâng shoq, we we mai Yesuq htâng châng tô ri. Yhang gi, hkâsu dut lò râ lé myàng nau luî, wâng hkaû má wang ê mù, zúng bang eq rahá zung tô ri.

⁵⁹ Haû hkyangjong agyî pé eq Yudaq byìn tú wapdoq má é góbang gi,

Yesuq lé sat pyám nhâng râ matú, a têng é saksé ho nyi akô. ⁶⁰ A têng é saksé myo myo htoq lô kôlhang, wó sat râ í é saksé a myàng kó nghut ri.

Ló htáng má, byù í yuq gi, lé lô kômù, ⁶¹ "Shí yuq gi, 'Ngò gi, haù Garai Gasâng é noqkuq yhùm lé lhoq hten pyám mù, sum nyí gyoro má dum wó saí lhê, 'ga taí sù nghut ri." ga taí akô.

⁶² Haù hkùn, haù hkyangjong mó gi, toq yap mù, "Nàng, haí le a tú taí luq? Shí bang, Nàng lé mara hun nyí é saksé gi, hká đông nghut lhê lhú?" ga, Yesuq lé myí ri. ⁶³ Nghut kôlhang, Yesuq gi, jit le a ga nyi tô ri.

Haù mù, hkyangjong mó gi, Yhang lé, "Haù rû dui nyi é Garai Gasâng é mying lé lang luí, ngò, Nàng lé myí wú lé: Nàng gi, Garai Gasâng é Yhangzo, Hkrisduq nghut lhê luq, ngamoq lé taí kyô wú aq." ga taí jáng, ⁶⁴ Yesuq gi, "Nàng taí é eq rajung za nghut lhê. Ngò, nungmoq banshoq lé taí kôlé, nungmoq gi, ahkuí mai htâng hpyang má, haù Byu Yhangzo gi, a-tsam bo dik Su é loqyo hkyam má zung tô é lé le, mhuthtui ji mù, mauhkúng mai lé lo é lé le, nungmoq myàng kó râ nghut lhê." ga taí ri.

⁶⁵ Haù hkùn, hkyangjong mó gi, yhang é bu lé lêng cheq pyám mù, "Yhang gi, Garai Gasang lé rhoi dang taí bê nghut ri! Nga-nhúng, hai saksé râ ashí lhú? Yhang, Garai Gasang lé rhoi dang taí é lé, nungmoq, ahkuí wó gyo bekô nghut lhê. ⁶⁶ Nungmoq hkâsu wó myit akô lhú?" ga myí jáng, yhangmoq gi, "Yhang gi, shí gíng sù nghut lhê." ga tú taí akô nghut ri.

⁶⁷ Hau htâng má, yhangmoq gi, Yesuq é myoqdong má sôkan byé gyun luí, loqtsup eq htui byí akô nghut ri. Góbang gi, Yhang lé bo-pyuq pyuq byi luí, ⁶⁸ "Hkrisduq Nàng, Nàng lé bat sù ó yuq nghut é lé, myiqhtoi htoí wú aq." ga taí akô.

Yesuq Lé, Petruq He-ngik Pyám É Hkyô

Mrk 14:66-72; Luk 22:56-62; Yhn 18:15-18, 25-27

⁶⁹ Petruq gi, wâng hkaù má nyi tô é u lé, dui-nhâng zoshâng myhí rayuq gi, yhang chyáng lé jé mù, "Nàng le, haù Galile byù Yesuq eq rahá nyi sù nghut ri." ga taí ri.

⁷⁰ Nghut kôlhang, Petruq gi, haù bang banshoq é hí má yhang, "Nàng haí taí nyi é lé, ngò a sé." ga he kat ri.

⁷¹ Hau htâng, yhang gi, wâng hkúmdong shut htoq e ló le, haù jowò má, dui-nhâng zoshâng myhí góyuq le, yhang lé myàng mù, "Shí yuq gi, Nazaret wà byù Yesuq eq rahá nyi sù nghut ri." ga, haù mà é bang lé taí kat ri.

⁷² Haù hkùn, yhang gi, "Byù haù yuq lé, ngò a sé!" ga dakam é đông he pyám ri.

⁷³ Hau htâng razup zo má, haù jowò má yap to bang gi, Petruq chyáng huí ê kômù, "Nàng le, haù bang má bò sù yhang nghut ri; nàng é danghté lé sê gyô ri." ga taí akô.

⁷⁴ Haù hkùn, yhang gi, yhanggùng yhang nhing luí, "Haù yuq lé, ngò a sé." ga dakâm dang taí ri.

Haù-u yhang, woq tân bê nghut ri. ⁷⁵ Haù mù, Petruq gi, "Woq a tân shi má, nàng, Ngo lé sum dâm he pyám râ nghut lhê." ga, Yesuq, yhang lé taí é dang lé, myit bún kat mù, shinggan shut htoq ê luí, gyai yhang ê ngau ri.

27

Yudaq Juíshi É Hkyô

Mrk 15:1; Luk 23:1-2; Yhn 18:28-32

¹ Napsùn noq le, hkyangjong agyi pé banshoq bang eq mingbyu é suwún wuí gi, Yesuq lé sat pyám nhâng râ matú chôm myit hpyit yú bekô nghut ri. ² Haù mù, yhangmoq gi, Yhang lé tuí yù luí, shuí

htoq é kômù, mauzau Pilat chyáng lé ap byí akô nghut ri.

³ Yesuq lé ap pyâm é sù Yudaq gi, Yesuq lé jéyáng doqđân é hkyô lé myang sé jáng, nungngham wó mù, haù ngùn sum xê chap lé, hkyangjong agyi pé eq suwún wui chyáng ló dum taù byí ri. ⁴ Haù mù, yhang gi, "Mara a bò Su é sui lé, ngò ap pyám bê nghut é yanmai, ngò mara wó bê." ga taí jáng, yhangmoq gi, "Haù hkyô, ngamoq eq haí sêng lhê lú? Haù gi, nàng eq sheq ru sêng lhê." ga lhom taí kat akô nghut ri.

⁵ Haù mù, Yudaq gi, ngùn haù lé, noqkuq yhúmhaù má dù pyâm to luí, htoq ló mù, yhang gùng yhang é juishi byuq bê nghut ri.

⁶ Haù hkyangjong agyi pé gi, ngùn chap haù pé kui yù luí, "Shí gi, sui hpau ngùn nghut lhê yanmai, alu sidek má a ge kat." ga taí akô. ⁷ Haù mù, yhangmoq gi, tungbaù pé é lupdùng kut râ matú, au saí zo su é maumyí lé, ngùn hau eq wui hpyit yù râ dông, chòm myit hpyit to bekô nghut ri. ⁸ Hau é yanmai, ahkuí jé shoq, haù jowò lé, sui myigùng ga myhng tô akô nghut ri. ⁹ Haù gi, "Haù Israelaq byu pé mai, Yhang lé gù hpyit tô é ngùn sum xê chap lé, yhangmoq yù mù, haù Yhumsing Garai, ngo lé pying tô é eq rajung za, ¹⁰ haù au saí zo su é maumyí lé, yhangmoq wui yù bekô nghut ri." ga myiqhtoi Yeremiaq taí tô é dang lo dik é nghut ri.

Yesuq Lé, Pilat Myí Jep Wú É Hkyô

Mrk 15:2-15; Luk 23:3-5, 13-26; Yhn 18:33—19:16

¹¹ Haù u lé, Yesuq gi, mauzau hpó é hí má yap tô é nghut mù, haù mauzau hpó gi, Yhang lé, "Nàng gi, Yudaq byu pé é hkohkâm nghut lhê lú?" ga myí jáng, Yesuq gi, "Nàng taí é eq rajung za nghut lhê." ga tú taí ri.

¹² Haù hkyangjong agyi pé eq suwún wui gi, Yhang lé, mara hùn kôjáng, Yhang gi, haí le a tú taí nghut ri. ¹³ Haù hkùn, Pilat gi, Yhang lé, "Yhangmoq, Nang lé mara hùn saksé haù-í hkâm nyi kô é lé, Nàng a wó gyo lú?" ga saí myí ri. ¹⁴ Nghut kôlhang, Yesuq gi, dang rahkun lháng a tú taí é yanmai, haù mauzau hpó gi, gyai maú byuq bê nghut ri.

¹⁵ Haù Lhoqlhai Poí u lé, ming-byù wui ô nau é má cháng luí, haù mauzau hpó gi, htóng byù rayuq yuq lé nhâng byí é htung joq ri. ¹⁶ Haù u lé, a gè mying htoq é htóng byù, Barabaq ga sù rayuq nyi ri. ¹⁷ Haù mù, byù moq mó zup zing lò kô é hkùn, Pilat gi, yhangmoq lé, "Nungmoq é matú, hká yuq lé lhut byi nhâng nau akô lú? Barabaq luq? Haù a nghut jáng, Hkrisduq gá é Yesuq lé luq?" ga myí ri. ¹⁸ Yhang haù su ga myí é gi, yhangmoq, Yesuq lé manôn kôluí, yhâng chyáng lé ap byi kô é hkyô lé sê é yanmai nghut ri.

¹⁹ Pilat gi, tarâ jéyáng tingnyâng htoq má zung tô ashí hkùn, yhangmyi gi, "Haù mara a bò Sù lé, haí le hkâkut; hkâsu mù gâ le, hkû-nyí za lháng, yhupmoq má, haù yuq é yanmai, ngò tsómra hpuzô pyám bê nghut lhê." ga, yhâng chyáng dang pying kat ri.

²⁰ Nghut kôlhang, haù hkyangjong agyi pé eq suwún wui gi, Barabaq lé dúng htoq yù râ eq Yesuq lé sat pyám nhâng râ matú, shiwa byu pé lé wum byi bekô nghut ri.

²¹ Haù mauzau hpó gi, "Shí í yuq mâ é hká yuq lé, nhâng byi nhâng nau akô lú?" ga myí jáng, yhangmoq gi, "Barabaq!" ga tú taí akô nghut ri.

²² Haù mù, Pilat gi, "Haù jáng gi, Hkrisduq gá é Yesuq lé, ngò hkâsu kut râ lú?" ga dum myí kat jáng, yhangmoq banshoq bang gi,

"Yhang lé tapzîng má jén sat pyám aq!" ga dum tû taí akô nghut ri.

²³ Nghut kôlhang, yhang gi, "Haí mù luí lúhú? Yhang gi, hai mara kut shut bê lúhú?" ga dum myi jáng, yhangmoq gi, htê mò eq, "Yhang lé tapzîng má jén sat pyám aq!" ga je riyhang garû lo bum akô nghut ri.

²⁴ Pilat gi, hká dông le a dat kut lô é eq byu pé gabyông lò kó râ nghut é hkyô lé myàng luí, uchyam yù mù, shiwa byu pé hí má loq chi luí, taí é gi, "Shí yuq é sui gi, ngò eq haí a sêng; nungmoq eq za ru sêng lhê." gâ ri.

²⁵ Haú shiwa byù lhunglhang bang gi, "Yhâng é sui gi, ngamoq eq ngamoq é yhangzo yhangshú pé htoq má joq nyi sháng gaq." ga, dum tû taí kat akô nghut ri.

²⁶ Haú hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám râ matú ap byí kat bê nghut ri.

Yesuq Lé, Gyezô Pé Rhoi É Hkyô
Mrk 15:16-21; Yhn 19:2-3

²⁷ Hau htâng, mauzau hpô é gyezô pé gi, Yesuq lé, mauzau hpô é yhumwàng mó hkaú má shuí wang lò kômù, Yhâng é lhîngkyuq má, gyedap gón lé ji tsîng tô akô.

²⁸ Yhangmoq gi, Yesuq é mebu hkyut pyám byi kôluí, zam zam ne é buhîng hut byi kômù, ²⁹ zujanmaú ralhûm sai yù kôluí, Yhâng é ulhum má tsung byí akô nghut ri. Yhangmoq gi, jâm-yang rahkat lé, Yhâng é loqyo loq má kat byi kômù, Yhâng é hí má hkyihput htuq kôluí, "Yudaq byu pé é hkohkâm hpô ê! Chyung hîng xê hîng nyi sháng gaq ô!" ga, jihpoi dang taí akô. ³⁰ Yhangmoq gi, Yhang lé sôkan byé gyun luí, Yhâng é loq mai jâm-yang lú yù mù, Yhâng é ulhum má dum bat bat kut akô nghut ri. ³¹ Yhangmoq gi, Yhang lé rhoi jihkyoi ban kut yù kôjáng, Yhang wut tô é buhîng lé

hkyut yù kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e lô bekô nghut ri.

Yesuq Lé Jén Pyâm É Hkyô

Mrk 15:22-32; Luk 23:27-43; Yhn 19:17-27

³² Yhangmoq htoq e lô nyi le, Kuru ni myuq byù nghut é Simun ga sù lé myàng kômù, yhang lé, zik luí tapzîng waq nhang akô nghut ri.

³³ Yhangmoq gi, Golgahta gâ é jowò má jé e lô bekô nghut ri. Golgahta gâ é lichyúm gi, ugyap joq é jowò lé gâ é nghut lhê. ³⁴ Haú má jé jáng, yhangmoq gi, Yesuq lé, hkô jung eq nyhò tô é tsibiyiq wing lé byi huq akô; nghut kôlhang, Yhang gi, haú lé chyam wú mù, a shuq byi kut pyâm ri. ³⁵ Yhangmoq gi, Yesuq lé tapzîng má jén tap tô é htâng, Yhâng é mebu lé lháng, hkyîn shosé shé é dông gam yu pyâm byí akô. ³⁶ Hau htâng, yhangmoq gi, haú jowò má zung to mù, Yhang lé zúng nyi akô nghut ri. ³⁷ Yhâng é u htoq má, "SHÍ YUQ GI, YU-DAQ BYU PÊ É HKOHKÂM, YESUQ NGHUT LHÊ." ga, Yhang lé mara hun é laiká kâ tap tô akô. ³⁸ Haú hkûn, Yhang eq rahá, damyaq í yuq lé le, Yhâng é loqpaí hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri. ³⁹ Hkyô sô lai lô é bang gi, nyhap é dông u-ngut ngut mù, taí kô é gi, ⁴⁰ "Noqkuq yhûm lé hpyoq pyám luí, sum nyi gyoro má dum wó sai lhê ga Sù ê! Nàng, Garai Gasâng é Yhangzo nghut le gi, Náng gûng nàng hkyi yù luí, tapzîng mai gyó lo wú aq mhai!" ga akô nghut ri.

⁴¹ Haú eq rajung za, hkyangjong agyi pé, tarâ sará pé eq suwún wuí le, Yhang lé rhoi jihkyoi kut mù, taí kô é gi, ⁴² "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù

nghut ri myhi-nhung! Yhang gi, Israelaq byu pê é hkohkâm nghut lhê lhê! Ngamoq wó lumjîng râ matú, Yhang, tapzîng mai gyó lo wú sháng gaq. ⁴³ Yhang gi, Garai Gasang lé lumhkaû sù nghut lhê mù, Garai ô nau é sù nghut le gi, ahkuí Yhang lé hkyi yù sháng gaq; hkâsu mù gâ le, Yhang gi, 'Ngò, Garai Gasâng é Yhangzo nghut lhê.' ga taí ri." ga bum akô nghut ri. ⁴⁴ Haú eq rajung za, Yhang eq rahá tapzîng má jén to huí é damyaq í yuq le, Yhang lé rhoí dang taí akô nghut ri.

Yesuq Soqkâng Byit É Hkyô

Mrk 15:33-41; Luk 23:44-49; Yhn 19:28-30

⁴⁵ Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri. ⁴⁶ Myinhâng sum hkyíng kô má, Yesuq gi, "Eloi, Eloi, lama sabakhtani?" ga, htê mó eq garû kat ri. Hau é lichyúm gi, "Ngá Garai ê, Ngá Garai ê, Nàng, haí mù, Ngo lé tô pyâm tô lhê lú?" gâ é nghut ri.*

⁴⁷ Haú nâm má yap tô é bang ram gi, haú lé wó gyo kôjáng, "Yhang gi, myiqhtoi Eliyaq lé wut nyi ri." ga taí akô.

⁴⁸ Haú hkûn jáng, yhangmoq má é rayuq gi, din e ló mù, wuimaù lé é yu ri. Yhang gi, haú lé tsibiyiq wing chyín má jum yù luí, jàm-yang má tuí tap mù, Yesuq shuq râ matú yhun byí ri. ⁴⁹ Góbang gi, "Yhang lé, Eliyaq, lé hkyi yu lhê laq, nganhúng chôm láng wú sháng." ga taí akô nghut ri.

⁵⁰ Haú hkûn, Yesuq gi, htê mó eq dum garû kat luí, Yhâng é soqkâng byit bê nghut ri.

⁵¹ Haú u lé, haú noqkuq yhùm má é pán-gyang gi, ahtoq mai a-ô í hkyam byáng goq byuq bê nghut ri. Myigùng le nún lô mù, luqgok pé le goq byuq bê nghut ri. ⁵² Lup pé

gi, bóng lô mù, shi byuq bê é chyoiyúng bang myo myo gi, lhoq dui é hui akô. ⁵³ Haú bang gi, Yesuq dum dui toq é htâng, lup mai htoq lô kômù, chyoiyúng myuq* má wang é luí, byù myo myô hí má htoq shit akô nghut ri.

⁵⁴ Shô up gyezau hpó eq, yhang eq rahá Yesuq lé zúng nyí é bang gi, layàng nún é eq dut lo é hkyô banshoq lé myàng kôjáng, gyuq dàn kômù, "Yhang gi, gè gè yhang, Garai Gasâng é Yhangzo nghut ri-nhung!" ga taí akô nghut ri.

⁵⁵ Myiwe wuì myo myo le, we we mai wú nyi bum akô. Haú bang gi, Yesuq râ é má garúm râ matú, Galile mau mai Yhang htâng châng lé é bang nghut akô. ⁵⁶ Haú bang má, Magadalaq wà mà é Mariq, Yakuq eq Yose nhiktâng é yhângnu Mariq eq Zebedi é yhangzô nhiktang é yhângnú pé le bo akô nghut ri.

Yesuq Lé, Myhup Pyâm É Hkyô

Mrk 15:42-47; Luk 23:50-56; Yhn 19:38-42

⁵⁷ Myinhâng jé lô jáng, Yesuq é chángzo dut bê nghut é, sùt wó sù, Aramahti myuq byù Yosep ga sù lé lo ri. ⁵⁸ Yhang gi, Pilat chyáng é mù, Yesuq é gungsôm lé é dung jáng, Pilat gi, yhang lé byi râ matú hkunmó hkyô kat bê nghut ri. ⁵⁹ Yosep gi, gungsôm lé yù mù, pán yúng eq htup yup luí, ⁶⁰ luqgok lé kyùng tô é, yhâng é lup sik hkaû má é kat tô ri. Hau htâng, yhang gi, luphkum má, luqlông eq lhêng chí pyâm to luí, ló byuq bê nghut ri. ⁶¹ Magadalaq wà mà é Mariq eq goyuq Mariq gi, lup hí má zung tô akô nghut ri.

Lup Zúng É Hkyô

⁶² Haú Hên Lajang Buinyi laí é htâng nyí lé, hkyangjong agyi pé eq Hparishe pé gi, Pilat chyáng é mù, ⁶³ "Yhumsîng é, Yhang, asak dui nyi ashí hkûn, 'Sum nyí nghû râ buinyi

* 27:46 Hkya-on 22:1 * 27:53 Chyoiyúng myuq gâ é gi, Yerusalem wà mó lé gâ é nghut lhê.

má, Ngò dum dui toq lô râ.' ga, haù byù mhaù taí é dang lé, ngamoq bûn nyí lhê. ⁶⁴ Haù mù, haù sum nyí nghû râ buinyì jé shoq, lup lé rago za zúng nhang to aq. Haù a nghut jáng, Yhâng é chángzô pé, màng lé lé hkaù yu lô mù, Yhang shi é mai dum dui toq lô bê ga, byu pé lé taí kó râ nghut lhê. Shí, lô htàng dâm mhaù é hkyô gi, sâng-hi dâm htoq je wui râ nghut lhê." ga, lé taí akô nghut ri.

⁶⁵ Haù hkûn, Pilat gi, "Nungmoq sê é đông, lup lé haí a dut loshoq, gyezô pé lé zúng nhang to keq." ga tú taí kat ri. ⁶⁶ Haù mù, yhangmoq gi, ê luí, lup lé gau shoq ga, luqgok má dizik htung mù, lup zúng byù nyhi to bekô nghut ri.

28

Dum Dui Toq Lo É Hkyô

Mrk 16:1-8; Luk 24:1-12; Yhn 20:1-10

¹ Bánno buinyì lai jáng, rabat é sâng-hi nyí maubó zó má, Magadalaq wà mâ é Mariq eq goyuq Mariq gi, lup má ê wú râ ga, e lô akô.

² Haù hkûn, layàng mó nún lo ri; hkâsu mù gâ lé, Yhumsing Garaí é maumang lagyo rayuq gi, mauhkung mai gyô lé lô mù, lup má ê luí, haù luqlong lé tu lheng mù, hau ahtoq má zung tô ri. ³ Yhâng é isâm gi, lhap su duqbó mù, Yhâng é mebu gi, gyo su hpyu zan tô ri. ⁴ Zúng nyí é bang gi, yhang lé lûm wú gyuq kômù, pyik pyik nán luí, shí gùng su dut bùm bekô nghut ri.

⁵ Haù maumang lagyo gi, myiwe haù nhik lé, "Hkâgyuq kó! Haù tapzîng má jén sat huí é Yesuq lé, nungnhik ho nyi kô é lé, ngò sê lhê.

⁶ Yhang gi, shí má a nyí lo; Yhang taí tô é eq rajung za, lhoq dui toq é hui bê nghut ri. Yhang lé lhez é jowó lé, lé wú keq. ⁷ Haù mù, hân taù lô luí, Yhâng é chángzô pé lé, 'Yhang, shí é mai lhoq dui toq é

hui bê nghut ri; nungmoq é hí má, Galile mau shut lô láng berá. Nungmoq, Yhang lé, haù má lô myàng kó râ nghut lhê.' nghû lô taí kyo keq. Nungnhik lé, ngò taí é lé matsing chùng keq." ga taí kat ri.

⁸ Haù mù luí, myiwe myhí haù nhik gi, gyuq kôlhang, gyai gabú é myit eq lup mai hân taù lô mù, Yhâng é chángzô pé lé lô taí kyo râ matú, din lô bê nghut ri. ⁹ Haù hkûn, Yesuq gi, radá dâm yhangnhik lé lhom tê mù, "Wángzán nyí kó sháng gaq." ga taí ri. Haù mù, yhangnhik gi, huí ê luí, Yhâng é hkyí má po zing to mù, Yhang lé noqkuq akô. ¹⁰ Haù hkûn, Yesuq gi, yhangnhik lé, "Hkâgyuq kó. Ngá é gumang wui lé, Galile mau shut e lô keq nghû lô taí kyo keq; haù má, yhangmoq, Ngo lé myàng kó râ nghut lhê." ga taí kat ri.

Zúng Nyi É Gyezô Pé Taí É Danglù

¹¹ Myiwe haù nhik hkyô má ru nghut nyi ashí le, lup zúng é gyezô pé ra-am gi, myuq hkaù má wang lô mù, dut lai lo é hkyô banshoq lé, haù hkyangjong agyi pé lé lô taí kyo akô nghut ri. ¹² Haù hkyangjong agyi pé gi, suwún wui eq huí lhum luí, hpyê lhum é htàng má, haù gyezô pé lé, ngùn myo myo tsup byi mù, ¹³ "Myín lé, ngamoq yhup myhí tô é hkûn, Yhâng é chángzô pé lé lô mù, màng lé, lé hkaù yu lô bekô nghut ri.' nghû taí keq. ¹⁴ Shí hkyô lé, haù mauzau hpó wó gyô é nghut jáng, yhang myit ngón shoq, ngamoq taí râ nghut lhê; haù hkûn, nungmoq gi, hai manghkáng a htoq râ nghut lhê." ga taí kat ri. ¹⁵ Haù mù, gyezô pé gi, ngùn haù pé lé yù luí, yhangmoq lé taí kat é eq rajung za kut bekô nghut ri. Haù su mù, haù hkyô gi, Yudaq byu pé má taí pjo myhín lô bê nghut mù, ahkuí jé shoq taí nyi bum akô nghut ri.

Chángzô Pé Kut Râ Sasana Muzó
Mrk 16:14-18; Luk 24:36-49; Yhn
20:19-23; Lagyo 1:6-8

¹⁶ Hau htâng má, haû chángzo raxe rayuq gi, yhangmoq lé, Yesuq ê nhang tô é Galile mau mâ é bùm shut e ló bekô nghut ri.
¹⁷ Yhangmoq gi, Yesuq lé myàng kôjáng, noqkuq akô; nghut kôlhang, ra-am gi, a dê jing kó nghut ri.
¹⁸ Hau htâng, Yesuq gi, yhangmoq chyáng lé lô mù, "Mauhkûng eq myigùng htoq mâ é ahkáng ayá banshoq, Ngô lé byi to bê nghut lhê. ¹⁹ Haû mù, nungmoq gi, htoq ê lui, byù myû chângjup lé, Ngá é chángzô pé dut nhâng mù, haû Îwa, Yhangzo, Chyoiyúng Woinyí é mying lang lui, wui-myhup hkám byi mù, ²⁰ nungmoq lé, Ngò hkunmó hkyô tô é lhunglhang lé châng kut râ matú, yhangmoq lé mhoqshit keq. Ngô gi, mingkan pyat htúm é hkûn jé shoq lhang, nungmoq eq rahá ru nghut nyi râ nghut lhê." ga pying tô ri.

MARKUQ é Gabú Danglù Laiká (The Gospel of Mark)

Yesuq É Matú Hkyô Htong Byí É Hkyô

Mht 3:1-12; Luk 3:1-18; Yhn 1:19-28

¹ Haú Garai Gasâng é Yhangzo, Yesuq Hkrisduq eq sêng é gabú danglù hi é hkyô gi, ² haú myiqhtoi Esai-aq laiká má:

"Náng é hkyô lajang láng rá matú, Ngá é lagyo lé, Náng é hí má Ngò nhang kat rá nghut lhê."[☆]
ga luí le,

³ "Haú yoso má, byù rayuq garú tai é htê gi,

'Haú Yhumsing é matú, hkyô hen to keq; Yhâng é matú hkyô lhoq nyhang to keq."[☆]

ga luí le, kâ tô é eq rajung za nghut lhê. ⁴ Haú mù, Wui-myhup Sará Yohan gi, yoso hkaú má jé lé luí, wui-myhup hkám byí nyi é eq, yubak mara hkyut pyám byí é huí rá matú myit lhing mù, wui-myhup hkám yù rá hkyô lé, hko kyô nyi ri. ⁵ Haú hkûn, Yuda mau jowò hkangmó mâ é bang eq Yerusalem wà mó mâ é ban-shoq bang gi, yhâng chyáng htoq e bum akô. Yhangmoq gi, yhum-sing é mara lé yín yû kôluí, yhâng chyáng mai Yodan làng má wui-myhup hkám yu bum akô nghut ri.

⁶ Yohan gi, gola-uq shomaú eq saí é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosô byo-î pé lé zo sú nghut ri. ⁷ Yhang tai kyô é dang gi, "Ngá htoq má wum-o a-tsam je bo é sú rayuq, ngá htâng má jé lé rá nghut lhê; ngò gi, yhâng é hkyi-tsung tui lé hpyí rá lháng a gingdán é nghut lhê. ⁸ Ngò gi, nungmoq

lé, wui eq za wui-myhup wó hkám byi lhê; nghut kôlhang, Yhang gi, Chyoiyung Woi-nyí má nungmoq lé wui-myhup hkám byi rá nghut lhê." gâ ri.

Yesuq, Wui-myhup Hkâm Yu É Hkyô Eq Gunglaú Huí É Hkyô

Mht 3:13-17; 4:1-11; Luk 3:21-22; 4:1-13

⁹ Haú yoq má, Yesuq gi, Galile mau Nazaret wà mai lé jé mù, Yohan chyáng Yodan làng má wui-myhup hkâm yu ri. ¹⁰ Yesuq gi, wui mai htoq lo é u lé, mauhkung bóng lo é lé le, Woi-nyí gi, hpûngkyui gunghkyâng sú é dông mai, Yhang ahtoq má gyó lé lo é lé le, Yhang myang kat ri. ¹¹ Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkung mai danghtê htoq lo ri.

¹² Haú hkûn jáng, Woi-nyí gi, Yhang lé yoso shut wang e ló nhang ri. ¹³ Haú mù, Yhang gi, yoso má myi xê nyí nyi luí, Tsadán eq gunglaú é huí ri; tân jung yosô zè pé le, Yhang eq rahá nghut nyi ri; maumang lagyo pé gi, Yhang lé, lé dojaú nyi akô nghut ri.

Sâng-hi Lhé É Chángzô Pé

Mht 4:12-22; Luk 4:14-15; 5:1-11

¹⁴ Yohan htóng gyó é htâng má, Yesuq gi, Galile mau má ló jé mù, ¹⁵ "Ahkying gi, jé bê; Garai Gasâng é mingdán gi, chyâng lò bê nghut ri; myit lhing mù, haú gabú danglù lé lumjing keq hkoí." ga luí, Garai Gasâng é gabú danglù lé hkô kyo wún ri.

¹⁶ Yesuq gi, Galile nhông yàm mai sô lai ló le, Simun eq yhanggu Andre nhiktang, nhông má gùn dú nyí kô é lé, myang ri; haú nhik gi, ngozo kóng zo su nhik nghut akô.

¹⁷ Haú mù, Yesuq gi, haú nhiktang lé, "Ngá htâng cháng keq; Ngò, nungnhik lé, byù lé châng kóng su

nhik dut nhâng râ nghut lhê." ga tai ri. ¹⁸ Haú hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

¹⁹ Yesuq gi, radun zo dum sô e ló é hkûn, Zebedi é yhangzo, Yakuq eq yhanggu Yohan nhiktâng, lhai hkaú má gùn hpo nyi kô é lé, myang ri. ²⁰ Haú hkûn, Yhang gi, radá dâm, yhangnhik tâng lé wut kat jáng, yhangnhik tâng gi, yhangnhik é yhangwa Zebedi eq langchyang pé lé, lhai hkaú má nyi pyâm to kôluí, Yhang htâng cháng bekô nghut ri.

Nat Lé, Yesuq Hkat Htoq Pyâm É Hkyô

Luk 4:31-37

²¹ Yhangmoq gi, Kaperna-um wà má e akô; Bánno buinyi nyi jé jáng, Yesuq gi, tarajong má wang é mù, mhoqshit hi ló bê nghut ri. ²² Shiwa byu pé kúm gi, Yhang mhoqshit é hkyô lé mauhong bum akô; hkâsu mù gâ le, Yhang gi, tarâ sará pé eq a pung é za, ahkáng ayá wó sù rayuq su, yhangmoq lé mhoqshit é yanmai nghut ri. ²³ Haú u lé, agè ashop é nat wang júng é byù rayuq tarajong má bo lom nyi luí, wut garú kat é gi, ²⁴ "Nazaret wà byù Yesuq ê, ngamoq gi, Nang eq hai sêng lhê lú? Ngamoq lé lhoq hten râ matú, Nang jé lé é nghut lhê lú? Nang gi, Garai Gasâng é Chyoiyúng Sù nghut é lé, ngò sê lhê." gâ ri.

²⁵ Haú hkûn, Yesuq gi, "Hkâjop, yhang chyang mai htoq ló aq." ga yhang lé tân kat ri. ²⁶ Haú hkûn, agè ashop é nat haú gi, byù haú yuq lé wum kat langtân nhâng luí, hté mó èq garu uchang htoq ló byuq bê nghut ri.

²⁷ Shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasú é dang wá nghut lhê lú? Ahko ahkáng bo é dông mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyó jáng, haú bang lhang gyo byí akô

nghut ri." ga luí, tai lhùm bum akô nghut ri. ²⁸ Yesuq eq sêng é ludang gi, Galile mau jam shoq, yang é dông byo myin ló bê nghut ri.

Byù Myo Myo Lé, Yesuq Lhoq Gé Byí É Hkyô

Mht 8:14-17; Luk 4:38-41

²⁹ Yhangmoq gi, tarajong mai htoq luí, haú hkûn jáng, Yakuq eq Yohan nhik le mù, Simun eq Andre nhiktâng é yhùm má wang e ló bekô nghut ri. ³⁰ Simûn é yhâng-aumó gi, gyai yhang nò leq tô é nghut mù luí, yhangmoq gi, Yesuq lé haú yuq no é hkyô lhom tai kyô akô nghut ri. ³¹ Haú mù luí, Yesuq gi, yhang chyang huí è mù, yhâng é loq má zui luí tu tsung ri; haú hkûn jáng, nò ge byuq luí, yhang gi, yhangmoq lé gaí tso gaí huq bê nghut ri.

³² Haú nyi buiwang é htâng má, byu pé gi, no é bang eq nat gang wang júng nyi é bang banshoq lé, Yesuq chyang shuí lé lo bum akô nghut ri. ³³ Rawa bang, hkúmdong nàm má lé zup zing tô akô. ³⁴ Haú mù, Yesuq gi, awáng nòhpyo ajung jung huí é bang myo myo lé lhoq gê byí ri; nat gang myo myo lé le, hkat htoq pyâm ri; nghut kôlhang, Yhang ó nghut é lé nat gang haú bang sé kô é yanmai, nat gang haú bang lé dang a tai nhâng nghut ri.

³⁵ Yesuq gi, htang napkyó mau lhang a bó shimá, toq mù, gaú é jowò ralhum má htoq é luí, kyú é dúng ri. ³⁶ Simun eq yhâng é luzúm wuí kúm gi, Yhang lé châng hô kômù, ³⁷ Yhang lé myang hô kôjáng, "Yuq hkangmó gi, Nang lé châng hkat ho nyi akô." ga luí, tai kyô akô nghut ri.

³⁸ Haú hkûn, Yesuq gi, yhangmoq lé, "Awui ayâm mâ é wà pé má le, ngò, mungdang wó hkô râ matú é sháng, hau é matú ngò lé é ru nghut lhê." ga tú tai ri. ³⁹ Haú mù luí, Yhang gi, Galile mau ramau gón, tarajong pé má mungdang hkat

hko wún é htoq agó, nat gâng pé lé le hkat htoq pyám byi wún ri.

Manggâm Dap Sû Lé, Yesuq Lhoq Gê Byi É Hkyô

Mht 8:1-4; Luk 5:12-16

⁴⁰ Manggâm dap é byù rayuq gi, Yesuq chyáng lé mù, hkyihput htuq luí, "Nàng dóng é nghut le gi, ngò lé Nàng wó lhoq sân-yúng byi rã nghut lhê." ga dung wut ri.

⁴¹ Háu hkún, Yesuq gi, yhang lé wú shogyo luí, loq lhâm kat mù, háu yuq lé ê záng luí, "Ngò dóng lhê, sân-yúng aq hkoí." ga taí ri.

⁴² Háu hkún jáng, manggâm ana byuq byuq luí, yhang gi, gè bê nghut ri.

⁴³⁻⁴⁴ Yesuq gi, "Nàng, shí hkyô ó lé le hkàtaí kyo. Nghut kôlháng, náng é gungdu lé, hkyangjong hpô chyáng ló tún shit mù, náng sân-yúng bê hkyô lé yhangmoq é matú saksé dut sháng gaq, Mosheq tará tô tô é eq rájung za, hkungga ló nhông byi aq." ga, yhang lé gyai yhang sidíq byi mù, radá dâm nhang kat bê nghut ri. ⁴⁵ Nghut kôlháng, háu yuq gi, htoq ló mù, háu hkyô lé je taí pyo myhín ló bê nghut ri. Hau é yanmai, Yesuq gi, wà hkaú má de de a ge wang ló lo mù, shinggan má é chamchuyiuyi dut é jowò má za nyi nyi ri. Nghut kôlháng, byu pé gi, jowò hkangmó mai Yhâng chyáng ru zing lé nyi bum ashí kó nghut ri.

2

Gùngjum Shí Sû Lé, Yesuq Lhoq Gê Byi É Hkyô

Mht 9:1-8; Luk 5:17-26

¹ Buinyi hkâ-myháng a myáng má, Yesuq gi, Kaperna-um wà má dum wang lò jáng, Yhang yhúm dum taú jé lô bê gâ é hkyô lé, byu pé wó gyô bum akô nghut ri. ² Háu mù, byù myo myo zing lé lô kôluí, yhúm hkaú má jowò a joq lô é htoq agó, hkum-tot má lháng a joq lo nghut ri;

Yesuq gi, yhangmoq lé mungdang hko kyô nyi ri. ³ Háu hkún, byù myi yuq gi, gùngjum shí sù rayuq lé chôm dang waq luí, Yhâng chyáng lé lo akô. ⁴ Yhangmoq gi, byù lúm myô chyín chyap to mù, byù háu yuq lé Yesuq chyáng a wó shuí jé ê kô é yanmai, Yesuq é u htoq má é yhumhkung lé dong htông yù luí, gùngjum shí sù lé taphkang eq roq hkyô kat akô nghut ri. ⁵ Yesuq gi, yhangmoq é lumjín myit lé byu-myàng jáng, gùngjum shí sù lé, "Ngá zo ê, náng é yubak mara lé hkyut pyám byi bê." ga taí ri.

⁶ Háu hkún, tarâ sará pé ra-am gi, háu má zung to kôluí, yhangmoq é i-myit unghkaú má, ⁷ "Byù shí yuq gi, haí mù luí háu su gâ lhê laq? Yhang gi, Garai Gasang lé rhoí dang taí nyi ri; Garai Gasang mai lai luí, ó yuq wá mara wó hkyut byi rã lúhú?" ga luí, myit són wuí nyi bum akô nghut ri.

⁸ Yesuq gi, yhangmoq é unghkaú má myit wú nyi kô é hkyô lé, radá dâm Yhang é myit mai sé mù, "Nungmoq é i-myit hkaú má, haí mù háu su nghú myit són wuí nyi bum akô lúhú? ⁹ Háu gùngjum shí sù lé, 'Náng é yubak mara lé hkyut pyám byi bê.' nghú taí é dang eq, 'Toq aq, náng é taphkang lé yù mù, hkyô so aq.' nghú taí rã má, hká hkun je taí lui lhê lúhú? ¹⁰ Nghut kôlháng, háu Byu Yhangzo* gi, mingkan htoq má, mara hkyut byi rã ahkáng wó Sù nghut é lé, nungmoq lé sé nhâng nau lhê." ga, yhangmoq lé taí kat ri. ¹¹ Hau htâng, Yhang gi, háu gùngjum shí sù lé, "Ngò, nang lé taí bá, toq aq, náng é taphkang lé yu chùng luí, yhúm taú ló aq hkoí." ga taí ri. ¹² Háu yuq gi, toq mù, yhâng é taphkang lé yu chùng luí, yhangmoq banshoq bang wú tsuq tô é myoq hí mai sô htoq ló byuq

* **2:10** Byu Yhangzo gâ é gi, Yesuq Yhânggùng yhang lé le taí é nghut lhê, Mesaia lé le taí é nghut lhê.

bê nghut ri. Hau é yanmai, yuq hkangmó gi, mauhong bùm kômù, "Isù é hkyô gi, hkâ-nhám lháng a myàng wú shì." ga, Garai Gasang lé hkya-on kungton bum akô nghut ri.

Lewiq (Mahte) Lé Wut Yu É Hkyô
Mht 9:9-13; Luk 5:27-32

¹³ Yesuq gi, nhông yàm má radàm dum htoq e ri. Haú hkûn, byù moq mó gi, Yhâng chyáng jé lé lo bùm kômù, Yhang gi, haú bang lé lhom mhoqshit nyi ri. ¹⁴ Yhang gi, sô yông ló nyi é hkûn, kang guq zúm má zung tô é, Alhpe yhangzo Lewiq lé myang kat luí, "Ngá htâng cháng aq." ga tái ri. Haú hkûn, Lewiq gi, toq luí, Yhang htâng cháng bê nghut ri.

¹⁵ Yesuq gi, Lewiq é yhùm má myinzang ê zô nyi é hkûn, kang guq bang myo myo eq yubak dap bang le, Yhang eq Yhâng é chángzô pé eq rahá zo shuq bum akô. Hkâsu mù gâ le, Yhang htâng châng é bang gi, ajùm ayò nghut é yanmai nghut ri. ¹⁶ Tarâ sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, "Yhang gi, haí mù luí, kang guq bang eq yubak dap bang eq rahá zo shuq nyi lhê lú?" ga myí bum akô nghut ri.

¹⁷ Haú su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chí sará a ra kó, nõhpyo hui bang za sheq ru rã lhê. Haú eq rajung za, Ngò gi, dingmán bang lé wut yù rã matú jé lé é a nghut, yubak dap bang lé ji yù rã matú sheq jé lé é ru nghut lhê." ga tái kat ri.

Zoshuq Gám É Eq Sêng É Hkyô
Mht 9:14-17; Luk 5:33-39

¹⁸ Yohan é chángzô pé eq Hparishe pé gi, zoshuq gám nyi akô nghut ri. Haú mù, ra-am gi, Yesuq chyáng jé lé kômù, "Wui-myhup Sará Yohan é chángzô pé

eq Hparishe pé é chángzô pé gi, zoshuq gám akô; nghut kôlháng, náng é chángzô pé gi, haí mù a gám kô é lú?" ga luí, myí akô nghut ri.

¹⁹ Haú hkûn, Yesuq tũ tái é gi, "Bíng pé gi, lusik eq rahá nghut nyi tô ashí hkûn, zoshuq hkâsu wó gám rã lú? Yhangmoq gi, lusik eq rahá nghut nyi é u lé, zoshuq gám kó rã a nghut. ²⁰ Nghut kôlháng, lusik lé yhangmoq chyáng mai shuí yu pyâm é hkyíng jé rã nghut lhê; haú buinyi pé má kúm gi, yhangmoq, zoshuq gám kó rã nghut lhê.

²¹ Ó yuq le, mebu xau má pán sik èq a lhaq hpo wú kó; haú su kut é nghut jáng, pán sik gi, kun byuq mù, mebu xau le je lhoq cheq pyám rã nghut lhê. ²² Haú eq rajung za, tsibiyiq wing asik lé le, shokuq htung axau má ó a kat wú kó. Kat é nghut jáng, tsibiyiq wing asik gi, htung lé lhoq buq goq nhâng luí, tsibiyiq wing eq shokuq htung htên byuq rã nghut lhê. Haú mù, tsibiyiq wing asik gi, shokuq htung sik má za ge kat é nghut lhê.

Bánno Buinyi É Yhumsing
Mht 12:1-14; Luk 6:1-11

²³ Bánno buinyi ra-nyí má, Yesuq gi, Yhâng é chángzô pé eq rahá yò hkaú mai sô lai ló é hkûn, Yhâng é chángzô pé gi, kyôshi ratsuí langshap yu akô nghut ri. ²⁴ Haú mù, Hparishe pé gi, Yesuq lé, "Wú aq, Bánno buinyi má a ge kut jung lé, haí mù, náng é chángzô pé kut nyi akô lú?" ga tái akô.

²⁵ Haú hkûn, Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut hui luí, zoshuq rã tô é hkûn, hkâsu kut é hkyô lé, nungmoq hkâ-nhám le a nghap wú kó lú? ²⁶ Abiahta, hkyangjong mó kut nyi é u lé, Dawiq gi, Garai Gasâng é yhúm hkaú má wang é mù, hkyangjong pé mai lai luí, ó le a ge zô é, kyâng tô é muk lé yù zo mù, yhang htâng châng é

bang lé le ratsuí tsuí byi tso é nghut lhê." ga tû taí ri.

²⁷ Hau htâng, Yhang gi, yhang-moq lé, "Bánno buinyi gi, byù é matú kut tô é nghut lhê; byù gi, Bánno buinyi é matú a nghut.
²⁸ Haù mù, haù Byu Yhangzo gi, haù Bánno buinyi é Yhumsing lhang nghut lhê." ga xoq taí ri.

3

¹ Yesuq gi, tarajong má radàm dum wang e le, loq raloq ajum shi byuq é byù rayuq nyi to lánq ri.
² Haù hkún, haù má nyi tô é bang ra-am gi, Bánno buinyi má, Yesuq mai haù yuq lé lhoq gê byi râ lhu ga, mara hún râ matú gyám wú nyi akô nghut ri. ³ Yesuq gi, haù loq jum shi sù lé, "Banshoq bâng é hí má, toq yap shit aq." ga taí kat ri.

⁴ Hau htâng, Yhang gi, haù má nyi tô é bang lé, "Bánno buinyi má, ge é muzó kut râ, a ge é muzó kut râ, byù asak hkyi râ eq byù sat râ hkyô pé má, hká lhum kut le sheq tarâ wang lhê lhu?" ga myi kat jáng, yhangmoq kúm gi, jit le a ga kó nghut ri.

⁵ Haù mù, Yhang gi, nhik-yô nau é myit eq haù bang lé lhang wú mù, yhangmoq myit htan é hkyô lé, wú yón luí, haù loq jum shi sù lé, "Náng é loq nyhang kat aq." ga taí kat jáng, haù yuq gi, loq nyhang kat luí, yhang é loq gi, shoq za ge byuq bê nghut ri. ⁶ Hau htâng má, Hparishe pé gi, htoq ló kômù, Yesuq lé hkâsu kut wó sat pyám râ hkyô lé, Herut é byu pé eq chôm hpyé lhum bum akô nghut ri.

Byù Ajùm Ayò, Yesuq Htâng Cháng Kô É Hkyô

⁷ Yesuq gi, Yhâng é chángzô pé eq rahá, nhông shut dum e ló le, Galile mau mâ é byù ajùm ayò gi, Yhang htâng châng e ló bum akô

nghut ri. ⁸ Hau htoq agó, Yuda mau mâ é bang, Yerusalem wà mó mâ é bang, Idumia mau mâ é bang, Yodan làng hé hpoq mâ é bang, Turuq myuq eq Sidun myuq awui ayàm jé shoq mâ é bang, ajùm ayò gi, Yhang kut nyi é hkyô banshoq lé wó gyo kôjáng, Yhâng chyáng jé lé bum akô nghut ri. ⁹⁻¹⁰ Yesuq gi, byù myo myo lé lhoq gê byi é yanmai, nòhpyo hui to bang gi, Yhang lé wó záng shoq ga, chyín chyap wang ló bum akô. Byù lúm myo luí, Yesuq gi, Yhang lé a nhê pyet pyám sháng gaq ga, Yhâng é chángzô pé lé lhai rallhum hen to nhang ri. ¹¹ Agé ashop é nat pé gi, Yhang lé myàng hkanmó, Yhâng é hí má lêng ngop to luí, "Nàng gi, Garai Gasâng é Yhangzo nghut ri." ga luí, taí garú akô. ¹² Nghut kôlhang, Yesuq gi, Yhang ó yuq nghut é hkyô lé a taí byông htoq râ matú, tân hkúm kat ri.

Lagyo Kut Râ Byù Raxe Í Yuq Hkyin Yu É Hkyô

Mht 10:1-4; Luk 6:12-16

¹³ Yesuq gi, bùm shut doq ló mù, Yhang ô nau é bang lé ji kat luí, haù bang gi, Yhâng chyáng jé lé lo bum akô nghut ri. ¹⁴ Haù hkún, Yesuq gi, byù raxe í yuq lé hkyin yù luí, lagyo ayá byi ri; haù bang gi, Yhang eq rahá nyi râ matú le, mungdang hkô râ matú Yhang nhang htoq kat râ eq, ¹⁵ nat gâng pé lé hkat htoq râ ahko ahkáng wó râ matú le, nghut akô nghut ri. ¹⁶ Haù raxe í yuq gi, Simun (Yesuq mai Petruq ga mying myhing byi sù); ¹⁷ Zebedi é yhangzô nhiktâng Yakuq eq yhanggu Yohan (Yhâng nhiktâng lé Yesuq mai Buanerga ga mying myhing byi ri; hau é lichyúm gi, maugum zô nhik gâ é nghut lhê.); ¹⁸ Andre, Hpilip, Barhtolume, Mahte, Htomaq, Alhpe é yhangzo

* **3:18** Zelutuq gâ é lichyúm gi, yhumsing zui sai é hkyô má gyai yhang myit lòm shirong é sù lé gâ lhê. Haù u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

Yakuq, Htade, Zelutuq* dut é Simun eq, ¹⁹ Yhang lé ap pyám rá sù, Yudaq Iskarut pé nghut akô.

Yesuq Eq Bezebulaq

Mht 12:22-32; Luk 11:14-23; 12:10

²⁰ Hau htâng, Yesuq gi, yhûm má wang ló le, byù ajùm ayò dum zîng lé lô kômù, Yhang eq Yhang é chángzô pé gi, zang zo hkyíng lháng a wó kó nghut ri. ²¹ Yhâng é yhumbyù wuì gi, haú hkyô lé wó gyo kôjáng, "Yhang, myit a gyíng lo nghut ri." ga luí, Yhang lé hung shuí yù rá matú, e akô nghut ri.

²² Yerusalem wà mó mai gyó lé lo é tarâ sará pé gi, "Shí yuq gi, Bezebulaq gâ é nat gâng pê é zau lúng sù nghut ri-nhung! Yhang gi, nat zaú é wum-o a-tsam eq za, nat gâng pé lé hkat htoq pyâm é nghut ri." ga tai bum akô nghut ri.

²³ Haú mù luí, Yesuq, yhang-moq lé wut yù mù, dangtú dong tai é gi, "Tsadán gi, Tsadán lé hkâsu kut wó hkat htoq rá lúhú?

²⁴ Mingdán ralhum gi, ahkaú má byoq gâng lhûm nyi kô é nghut jáng, mingdán haú wó gíng nyi rá a nghut. ²⁵ Yhumhtu ralhum má le, ikun byù yhangchang byoq gâng lhûm nyi é nghut le gi, yhumhtu haú wó gíng nyi rá a nghut. ²⁶ Haú eq rajung za, Tsadán le, yhanggùng yhang lhoq hpyoq luí, gam hkoq nyi é nghut le gi, yhang wó nyi nyi rá a nghut, htûm byuq rá za nghut lhê. ²⁷ Ó yuq nghut kôle, wum-o bò sù lé hí tui zing pyâm é a nghut le gi, yhâng é yhûm má lú wâng mù, yhâng é sutzè lé wó lú yù rá a nghut: Haú yuq lé hí tuí zing pyám jáng sheq, yhâng é sutzè lé wó lú yù rá nghut lhê. ²⁸ Ngò, nungmoq lé teng za tai kôlé, byu pé kut shut é mara banshoq eq rhoi dang tai pyâm é pé lé gi, mara wó hkyut pyám byi lhê. ²⁹ Nghut kôlhang, haú Chyoiyúng Woi-nyí lé rhoi dang tai pyâm é sù gi, hkâ-nhám le, mara

hkyut byi é wó hui rá a nghut; haú yuq gi, ahtum abyuq yubak wó sù nghut nyi ri." gâ ri.

³⁰ Yhang haú su ga tai é gi, yhang-moq mai, "Yhang gi, agè ashop é nat wó sù nghut ri." ga kô é yanmai nghut ri.

Yesuq É Yhângnu Eq Yhanggu Pé

Mht 12:46-50; Luk 8:19-21

³¹ Hau htâng, Yesuq é yhângnu eq yhanggu pé gi, jé lé mù, yhûm hkun má yap to kôluí, Yesuq htoq lô rá matú, byù rayuq lé wang tai nhang akô nghut ri. ³² Byù ajùm ayò gi, Yhâng é lhîngkyuq má zung tô akô; haú bang gi, Yhang lé, "Wú aq, náng nu eq nunggu pé gi, nang lé hui naú luí, shinggan má lánq bum akô." ga tai kyô akô nghut ri.

³³ Haú hkûn, Yhang gi, "Ô pé gi, Ngá nu eq Ngá gu pé nghut akô lúhú?" ga myi kat ri.

³⁴ Hau htâng, Yhang gi, Yhâng é lhîngkyuq má zung hkyuq tô é bang lé wú mù, tai é gi, "Shí bang gi, Ngá nu eq Ngá é gumang wuì nghut bê! ³⁵ Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê." gâ ri.

4

Kyôshi Sân É Dangtú

Mht 13:1-23; Luk 8:4-15

¹ Yesuq gi, nhông yàm má radàm dum mhoqshit hi ló bê nghut ri.

Haú hkûn, Yhâng é lhîngkyuq má byù moq mó lûm yán zîng lé lo bùm kô é yanmai, Yhang gi, nhông hkaú mã é lhai má wang zung tô ri; haú u lé, byù moq mó gi, nhông yàm gin-gau htoq má nyi míng bum akô nghut ri. ² Yhang gi, haú bang lé, dangtú pé dông myo myo mhoqshit byi nyi ri; Yhang mhoqshit é má,

³ "Gyo wú keq! Kyô hkyó sù rayuq gi, kyôshi san rá gâ htoq e ló ri.

⁴ Yhang, kyôshi sân kat é hkûn, ram gi, hkyô má gyó ang mù, nghoq

pê eq lé hte zô pyám ri. ⁵ Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lò kôle, ⁶ amyit a wó chin hing é nghut mù, bui htoq lô jáng, lhap kyuq pyám bê nghut ri. ⁷ Dum ra-am gi, zugyóm hkaû má gyó ang lui, zubyap haú pé kô lò mù, wup pyám é yanmai, ashi a wó zui nghut ri. ⁸ Nghut kôlhang, ra-am gi, myihpún bo é jang má gyó âng é yanmai, yuq kô lò mù, ashi sum xê tú, hkyuq xê tú, rashô tú lhang, zui myô lo é nghut ri." gâ ri.

⁹ Hau htâng, Yesuq dum taí é gi, "Gyo yù rá nohkyap dap sù gi, gyô yù sháng gaq." gâ ri.

¹⁰ Yhang baú za nghut nyi é hkûn, haú lagyo raxe í yuq eq Yhang nàm má nyi tô é bang gi, dangtú haú eq sêng é hkyô lé, lé myí akô. ¹¹ Haú hkûn, Yhang, yhangmoq lé taí kyô é gi, "Garai Gasâng é mingdán eq sêng é sê gyo wui é hkyô lé sé gyo rá ahko ahkáng, nungmoq lé byí to lugù nghut bê. Nghut kôlhang, góbâng é matú gi, jung hkanqmó lé dangtú dông chyat taí é nghut lhê.

¹² Haú mù lui,

'Yhangmoq gi, myang nyi kôlhang, a wú sé kó, gyô nyi kôlhang, a sê gyo kó;

sé wú sê gyo kô é ru nghut le gi, lhung taú lò mù, mara hkyut pyám byí é hui kó rá nghut lhê![✱] gâ ri." ga tô ri.

¹³ Hau htâng, Yhang, yhangmoq lé dum xoq taí é gi, "Nungmoq, dangtú shí lé a sê gyo kô é nghut le gi, gotú dangtú pé lé hkâsu kut ung sê gyo kó rá lú? ¹⁴ Yô mù zui sù san kat é kyôshi gi, mungdang nghut lhê. ¹⁵ Byù ra-am gi, hkyô má gyó âng é kyôshi eq wui akô; yhangmoq gi, mungdang lé wó gyô yu é hkûn yhang, Tsadán gi, lé mù, yhangmoq chyáng má é mungdang lé lé yù pyám byí ri. ¹⁶ Ra-am gi, luqgok yò

pé má gyó âng é kyôshi eq wui akô; yhangmoq gi, mungdang lé wó gyo jáng, radá dâm gabú myit eq hap yù akô. ¹⁷ Nghut kôlhang, yhangmoq gi, amyit a wó chin é yanmai, razup zo za yuq kômù, mungdâng é yanmai, wuihke é eq zing-rí é pé hui kôjáng, hân hân htak lò byuq kó rá nghut lhê. ¹⁸ Dum ra-am nghut jáng, zugyóm hkaû má gyó âng é kyôshi eq wui akô; yhangmoq gi, mungdang lé wó gyô yù kôlhang, ¹⁹ shí ipyat lhê é myit wui myit hke hkyô, hkyô shuí nghoq jung ngùn hing zèhkoq eq gotú zè pé lé ô nau é hkyô pé, yhangmoq chyáng wang lò jáng, haú mungdang lé hup pyám é yanmai, ashi a wó zui dut kó rá nghut lhê. ²⁰ Ra-am kúm gi, myihpún bo é jang má gyó âng é kyôshi eq wui akô; yhangmoq gi, haú mungdang lé gyô yù mù, lhom yù lui, sán kat é htoq sum xê tú, hkyuq xê tú, rashô tú lhang myo shoq ashi zui lò kó rá nghut lhê." gâ ri.

Myibung Htûn É Hkyô

Luk 8:16-18

²¹ Yesuq, yhangmoq lé xoq taí é gi, "Nungmoq gi, myibung lé yù mù, tsungjang má a tsung e za, mung eq nghop tô é, a nghut jáng, yhupchong ô má tsung tô é, ó yuq wá kut wú akô lú? ²² Hkâsu mù gâ le, haq tô é zè hái jung le htoq zè lò rá eq, zaú tô é pé hái jung le byông htoq lò rá nghut lhê. ²³ Gyô yù rá nohkyap dap sù ó yuq nghut kôle, gyô yù sháng gaq." gâ ri.

²⁴ Hau htoq agó, Yhang dum taí é gi, "Nungmoq gi, wó gyô yu é hkyô lé rago myit wú keq; nungmoq lik byí é bung eq, nungmoq lé dum lik byi rá nghut lhê; hau htoq lhang myo shoq wó kó rá nghut lhê. ²⁵ Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lhang yu pyám byi shirâ nghut lhê." gâ ri.

✱ 4:12 Esai 6:9-10

Kyôshi Yuq Kô Lo É Dangtú

²⁶ Hau htâng, Yhang dum xoq taí é gi, "Garai Gasâng é mingdán gi, byù rayuq mai, myigùng má sân kat é kyôshi eq wuí ri. ²⁷ Byù hau yuq gi, myín lé yhup tô é nghut nghut, nyí lé toq lo é nghut nghut, kyôshi gi, zúi htoq lô mù, yuq kô lo nyi ri; nghut kôhang, yhang gi, hkâsu kut yuq lo nyi é hkyô lé a sé nghut ri. ²⁸ Myigùng gi, yhang baú yhang, kyôshi lé, sâng-hi má abum bum nhâng, hau htâng má a-nhâm htoq nhâng mù luí, ashi zui shoq kut é nghut lhê. ²⁹ Kyôshi myhíng jáng, kyô shu yoq jé bê nghut é yanmai, yhang gi, zaiyik èq yâm yù râ nghut lhê." gâ ri.

*Angshi Cham Lé Dangtú Yu É Hkyô**Mht 13:31-32; Luk 13:18-19*

³⁰ Yesuq dum xoq taí é gi, "Garai Gasâng é mingdán lé, hai èq lhoq whuí wú râ lúh? Hai jung dangtú yù mù, shit wú râ lúh? ³¹ Garai Gasâng é mingdán gi, angshi cham eq wuí ri. Angshi cham hau gi, myigùng má hô é kyômyui jí pé má je tiq é nghut lhê. ³² Nghut kôhang, ho mù, yuq kô lô jáng, xun hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq kô lò luí, hau é buishùm hkaú má, maulat nghoq zô pé lé wó zung nô nyi é nghut lhê." gâ ri.

³³ Hau sú é dangtú myo myo đông mai, Yesuq gi, yhangmoq wó sê gyô é myhó, mungdang hko kyô nyi ri. ³⁴ Yhang gi, yhangmoq lé, dangtú a bo é hai lhang a taí wú nghut ri; nghut kôhang, Yhang eq chángzô pé baú nghut nyi é hkûn kúm gi, jung hkgámó é lichyúm lé taí sân kyô ri.

*Laidun Mó Lé, Yesuq Lhoq Zim Pyâm É Hkyô**Mht 8:23-27; Luk 8:22-25*

³⁵ Hau nyí, myinhâng lé, Yesuq gi, Yhâng é chángzô pé lé, "Nga-nhung nhông hé hpoq shut dap e ló sháng." ga taí ri. ³⁶ Hau hkûn, chángzô pé gi, byù moq mó lé nyhi pyâm to luí, Yhang zung tô é lhai mai yhang, Yhang lé shuí gû dap ló bekô; gotú lhai pé le, yhangmoq eq rahá bo gû dap ló akô nghut ri. ³⁷ Hau u lé, laidun mó jé lô mù, wuìhêng hta toq lô luí, lhai má lo bat hâng é yanmai, wuí byíng lô bê nghut ri. ³⁸ Hau hkûn, Yesuq gi, lhai htâng má uhkuq hkuq mù yhup myhí tô ri; hau chángzô pé gi, Yhang lé nhaú pun luí "Sarâ é, nga-nhung myup shi ló râ dut é lé, nàng a chiq byí lúh?" ga taí akô nghut ri.

³⁹ Yesuq gi, toq mù, laidun lé tan luí, wuìhêng lé, "Zim aq." ga taí kat jáng, hau laidun num ló byuq luí, banshoq zim byuq bê nghut ri.

⁴⁰ Hau htâng, Yhang gi, Yhâng é chángzô pé lé, "Hai mù, hau-í gyuq bum akô lúh? Nungmoq gi, lumjíng myit a bò shi kó lúh?" ga taí ri.

⁴¹ Yhangmoq gi, gyai yhang gyuq dan bùm kômù, "Shí yuq gi, hkâsú é byù nghut lhê làh? Lai eq wuìhêng pé lhang gi, Yhâng é dang lé qy byí ri-nhung!" ga luí, rayuq eq rayuq myí lhum bum akô nghut ri.

5*Nat Gang Hkat Htoq Pyâm É Hkyô**Mht 8:28-34; Luk 8:26-39*

¹ Yhangmoq gi, nhông hé hpoq mâ é Gerase byu pé é mau má jé dap e ló akô. ² Yesuq lhai mai htoq ló é hkûn, agè ashop é nat wang júng é byù rayuq gi, lupdùng mai htoq lé lô mù, Yhang lé lhom huí ri.

³ Hau yuq gi, lupdùng má za nyi é sú nghut ri; yhang lé, ó yuq èq le, shamtoq-tuí èq lhang a wó tuí zing wú kó nghut ri. ⁴ Hkâsu mù gâ le, adàm dâm, yhâng é loq eq hkyí má shamtoq-tuí èq tuí tô wú kôhang, yhang gi, loq má é shamtoq-tuí pé

lé lãng hpyit pyám pyám kut mù, hkyî mã é shamtoq kyum lé lhoq hkyop pyám pyám kut ri. Yhang lé, ó yuq èq le a wó hkuq yù kó nghut ri. ⁵Yhang gi, nyí myin aga lupdùng eq bùm pé má puk garu uchyang, yhumsing gùng lé luqgok èq dũn cheq wún ri.

⁶Yhang gi, Yesuq lé, we mai myang kat jáng, ðin e ló mù, Yhâng é hí má hkyihput htuq ngop luí, ⁷htê mó èq, "Myhang htâng é Garaí Yhangzo Yesuq ê! Nàng gi, ngò eq haí sêng lhê lhú? Nàng gi, ngo lé a zing-ri râ matú, Garaí Gasâng hí má danggidiq byi laq." ga taí garú ri. ⁸Haí mù gâ le, Yesuq gi, yhang lé, "Agè ashop é nat nãng è, byù shí yuq chyáng mai htoq ló aq." ga taí kat é yanmai nghut ri.

⁹Hau htâng, Yesuq gi, "Náng myíng haí gâ lhê?" ga, yhang lé myi jáng, yhang gi, "Ngamoq gi, myo myo nghut é yanmai, Legio gâ lhê." ga tú taí ri. ¹⁰Hau htâng, yhang gi, haú jowò mai yhangmoq lé a kôn pyám râ matú, Yesuq lé dum dung dung kut nyi ri.

¹¹Haú u lé, waq rajùm mó gi, bùm yàm má dù but zô nyi bum akò nghut ri. ¹²Haú mù luí, nat gâng pé gi, "Ngamoq lé, waq pè chyáng nhang kat luí, yhangmoq chyáng wàng nhâng laq." ga luí, Yesuq lé dung akò. ¹³Haú hkûn, Yesuq gi, yhangmoq lé ahkáng byí kat jáng, haú agè ashop é nat pé gi, haú yuq chyáng mai htoq ló kôluí, waq pè chyáng wang ló byuq bekò nghut ri. Haú mù, haú í hkyîng kô bo é waq hpúng gi, gampyoq mai nhông hkaú shut rut ðin yán wang ló kôluí, myup shi byuq bekò nghut ri.

¹⁴Waq zúng bang gi, hfang ðin wang ló kômù, myuq hkaú mã é bang eq awui ayàm mã é bang lé, haú hkyô ló shit kyo kô é yanmai, byù haú bang gi, dut laí lò bê hkyô lé, è htoq wú akò nghut

ri. ¹⁵Yhangmoq gi, Yesuq chyáng jé lé kô é hkûn, nat gang myo myo wang júng wú é sũ, mebu wut luí, byù gè rayuq su zung to lãng é lé myàng kômù, gyuq dan bùm bekò nghut ri. ¹⁶Haú hkyô lé myang é bang gi, nat gâng pé wang júng sũ eq waq pè chyáng hkâsu dut é hkyô, góbang lé taí kyo akò nghut ri. ¹⁷Hau htâng, byu pé gi, Yesuq lé yhangmoq é mau mai htoq ló byuq râ matú, chôm dũng tôngbán akò nghut ri.

¹⁸Yesuq lhaí hkaú mã wang ló é u lé, haú nat gâng pé wang júng laí lò bê sũ gi, Yesuq htâng cháng râ matú, Yesuq lé dung tôngbán ri. ¹⁹Nghut kôllhang, Yesuq gi, yhang lé ahkáng a byi e za, "Nàng, yhùm shut sheq ló mù, haú Yhumsing, nang lé hkâ-í kut byi bê hkyô eq hkâsu kut shogyo nhikmyin yu é hkyô lé, náng é yhumbyù buinùm ji-myi wui lé ló taí kyo aq." ga taí kat ri. ²⁰Haú mù, byù haú yuq gi, ló luí, yhang lé Yesuq hkâ-í kut byi bê hkyô lé, Dekapoli* mau bang lé ló taí kyô ri. Haú hkûn, wó gyô é bang banshoq gi, mauhong bum akò nghut ri.

Shi Byuq Bê Myiwe Zo Eq No É Myiwe Myhi Rayuq É Hkyô

Mht 9:18-26; Luk 8:40-56

²¹Yesuq gi, lhaí ji mù, nhông he hpoq shut dum dap jé ló mù, Yhang, nhông yàm má nyi tô é u lé, byù ajùm ayò gi, Yhâng é lhinghkyuq má lé zîng bum akò nghut ri; ²²haú hkûn, Ya-irurq gâ é, tarajong má up bang mã é rayuq gi, haú mã lé luí, Yesuq lé myang kat jáng, Yhâng é hkyî wang mã paí gop to mù, ²³"Ngá zo byizo gi, kâng byit ló nyi ri; yhang ge lò mù asak dum ðui shí sháng gaq, nãng lé mù, yhâng é ah-toq mã loq lé ke byi laq." ga, wum kat dũng tôngbán nyi ri. ²⁴Haú mù, Yesuq gi, haú yuq htâng châng e ló

* 5:20 Dekapoli gâ é gi, Grik ðông myuq raxé lé gâ lhê.

ri; byù ajùm ayò le, Yhâng é awui ayàm má châng chyín chyap wún bum akò.

²⁵ Haù hkùn, raxe í zân suí yui nyi é myiwe myhí rayuq le haù hpúng má bo tô ri. ²⁶ Yhang gi, chi sará myo myô pê chyáng yhang wó é ngunzè banshoq lhoq pán mù, nò hkâm luí yâ wú kôlhang, ge é hkyô a joq é htoq agó, je lháng wuìhke lò ri. ²⁷ Yhang gi, Yesuq é hkyô lé wó gyo jáng, byù hpúng mai Yesuq é nunghtáng má huí lé mù, Yhâng é bu má ê záng kat ri. ²⁸ Haí mù luí gâ le, yhang gi, "Ngò, Yhang é bu má za lháng é wó záng é nghut le gi, ge byuq râ nghut lhê." ga wó myit é yanmai, haù su kut é nghut ri. ²⁹ Haù hkùn jáng, yhâng chyáng suí yui é kân byuq luí, yhang gi, hpuzô nyi é mai wó lut bê hkyô lé, yhânggùng má sê gyô kat bê nghut ri.

³⁰ Yesuq gi, Yhâng é gùng mai hpungwup a-tsam htoq ló é lé, radá dâm châng sê kat luí, byù moq mó shut lhing wú mù, "Ngá é bu má ó yuq záng bê lúhú?" ga myi kat ri.

³¹ Haù hkùn, Yhâng é chángzô pé gi, "Náng é lhíngkyuq má byù ajùm ayò chyín chyap nyi é lé, myang to luí nhíng, 'Ngo lé, ó yuq záng bê lúhú?' nghú myi lhê lúhú?" ga tú tai kat akò.

³² Nghut kôlhang, Yesuq gi, Yhang lé lé záng sù lé myàng rá matú, ho lhing wú nyi ashí nghut ri. ³³ Haù hkùn, myiwe myhí haù gi, yhâng chyáng hkásu dut lai lò bê hkyô lé sê é yanmai, Yesuq é hí má lé mù, gyuq nán é èq Yhang é hkyí wang má ngóm gop to luí, yhâng chyáng dut lai lò bê hkyô banshoq lé tai kyô ri. ³⁴ Haù mù, Yesuq gi, myiwe myhí haù lé, "Byizo é, náng é lumjínng myit gi, náng lé lhoq gê byi bê nghut ri; náng é nòhpyo ge byuq bê nghut ri; ngón za ló aq hkoi!" ga tai ri.

³⁵ Yesuq gi, dang ru tai nyi ashí hkùn, tarajong má up sù Ya-irug

é yhùm mai byù ra-am jé lé mù, "Nang é byizo gi, shi byuq bê; haí mù luí, haù sará lé lhoq hkyik nyi lhê lúhú?" ga luí, lé tai kat akò.

³⁶ Yesuq gi, haù bang tai é dang lé gyô lhai pyám mù, "Hkâgyuq, za lumjínng aq." ga, haù tarajong má up sù lé tai kat ri.

³⁷ Hau htâng, Yhang gi, Petruq, Yakuq eq Yakuq é yhanggu Yohan pé mai lai luí, ó yuq lé le, Yhang htâng a cháng nhâng nghut ri.

³⁸ Yhangmoq, haù tarajong má up sù é yhùm má jé lé kô é hkùn, Yesuq gi, byu pé garu garín ga yón ngau gabyông nyi bum é lé, myàng ri.

³⁹ Yhang gi, yhúmhaù shut wang ló mù, haù bang lé, "Haí mù, yón ngau gabyông nyi bum akò lúhú? Haù zoshâng gi, shi byuq é a nghut, yhup myhí tô é sheq ru nghut lhê." ga tai ri. ⁴⁰ Nghut kôlhang, yhangmoq gi, Yhang lé wuizui kut pyám byí akò.

Yhang kúm gi, haù bang banshoq lé hkat htoq pyám mù, zoshâng é yhângnu yhângwa nhik eq Yhâng é chángzô pé lé za shui luí, zoshâng lé lhez tô é gok má wang e akò nghut ri. ⁴¹ Yesuq gi, myiwe zo hau é loq má zuí to mù, "Talihta ku-mi" (haù é lichyúm gi, "Myiwe zo é, ngò, nang lé tai bá, toq aq." gâ é nghut lhê.) ga tai ri. ⁴² Myiwe zo haù gi, haù hkùn jáng, toq luí, sô wún ri (yhang gi, asak raxe í zân bò bê sù nghut ri.). Yhangmoq gi, haù sù dut é hkyô lé gyai yhang maú byuq bùm bekô nghut ri. ⁴³ Yhang gi, haù hkyô ó lé le a sé nhâng rá matú, yhangmoq lé tai hkúm kat luí, myiwe zo haù lé, zô jung byi tso rá matú le, yhangmoq lé tai ri.

6

Yhumsing Wà Má Myoqdong A Wó É Hkyô

Mht 13:53-58; Luk 4:16-30

¹ Yesuq gi, haù jowò mai htoq e ló mù, Yhâng é yhum mau shut taù

ló ri; Yhâng é chángzô pé le, Yhang eq rahá bo châng ló akô nghut ri. ² Bánno buinyi jé jáng, Yhang gi, tarajong má mhoqshit hi ló ri; wó gyô é bang myo myo gi, gyô maú byuq kôluí, "Byù shí yuq gi, haú pé lé hkâmá mhoq yu é làh? Yhang wó yu é hpaqchyí byéng-yá gi, hkasû é wá nghut mù luí, laklaí kumlhá lé lhang kut lhê laq? ³ Shí yuq gi, Mariq é yhangzo, laksima hpó nghut lhê, a nghut lúhú? Yhang gi, Yakuq, Yose, Yudaq, Simun pé é yhangmang nghut lhê, a nghut lúhú? Yhâng nhammó pé le, nganhúng eq rahá nghut nyi lhê, a nghut kó lúhú?" ga luí, Yhang lé myit a ngón dut bùm bekô nghut ri.

⁴ Yesuq, yhangmoq lé taí é gi, "Myiqhtoi rayuq gi, yhumsing é yhum mau, yhâng é buinùm ji-myi wuì eq yhumsing é yhùm má za, myoqdong a lhaq wó wú é nghut lhê." gâ ri. ⁵ Yhang gi, nô byù ra-am lé loq ke byi mù, lhoq gê byí é mai lai luí, gotû laklaí kumlhá haí le, haú má a wó kut shit nghut ri. ⁶ Haú mù, Yesuq gi, yhangmoq lumjúng myit a bò kô é hkyô lé, maú nyi ri. Hau htâng, Yhang gi, Nazaret wá mai htoq ló mù, rawà htâng rawà má châng mhoqshit wún ri.

Lagyo Raxe Í Yuq Lé Nhang Htoq Kat É Hkyô

Mht 10:5-15; Luk 9:1-6

⁷ Yesuq gi, haú lagyo raxe í yuq lé wut yù mù, agè ashop é nat pé lé ûng rà a-tsam byi luí, í yuq yuq kut nhang htoq kat ri.

⁸ Yhang, yhangmoq lé châng pying kat é dang gi, "Hkyowui é matú má, dumbáng mai lai luí, zoshuq le, etap le, ngùn le, gotû haí le, hkâyú chùng kó; ⁹ hkyí-tsung kúm gi, tsúng chùng keq; nghut kôlhang, bu í dung hkâwut chùng kó. ¹⁰ Hká má nghut kôlhang, rayhùm yhùm má nungmoq wang bing kô é nghut le gi,

haú wâ mai dum htoq ló é buinyi jé shoq, haú yhùm má za nyi nyi keq. ¹¹ Jowò rawò wò mà é bang, nungmoq lé a lhom hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyâm to mù, haú jowò mai htoq ló keq." gâ ri.

¹² Haú mù, yhangmoq gi, htoq e ló luí, myit lhang rà é hkyô, byu pé lé hkô kyô akô. ¹³ Hau htoq agó, yhangmoq gi, nat gâng pé myo myo lé hkat htoq pyám byi mù, nó é bang myo myo lé le xú but byi luí, lhoq ge byí akô nghut ri.

Yohan, Ulhum Hpyit Huí é Hkyô Mht 4:1-12; Luk 9:7-9

¹⁴ Yesuq é myiêng hù lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi, "Shí yuq gi, haú shi byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam haú pé lé wó kut é nghut ri." ga luí, taí bum akô nghut ri.

¹⁵ Ra-am gi, "Yhang gi, Eliyaq nghut ri." ga taí akô nghut ri.

Dum, ra-am taí kô é gi, "Yhang gi, hí hpyang lhê é myiqhtoi pé su, myiqhtoi rayuq nghut ri." gâ ri.

¹⁶ Herut kúm gi, haú lé wó gyo jáng, "Ngò, ulhum hpyit pyám byí é Yohan gi, shi é mai dum dui toq bunhung!" ga taí ri.

¹⁷ Herut gi, yhanggu Hpilip é yhangmyi Herudiaq lé hâng yu pyâm é hkyô é yanmai, Yohan lé chyup tuí yù nhâng mù, htóng hkyô pyám nhang wú é sù nghut lhê.

¹⁸ Hkâsu mù gâ le, Yohan gi, Herut lé, "Nàng, nunggu é yhangmyi lé hâng yu é gi, tarâ a wang é nghut lhê." ga luí, taí byí nyi é yanmai nghut ri. ¹⁹ Haú mù, Herudiaq gi, Yohan lé gyai a jú dut byuq luí, sat pyám naú kôlhang, a wó sat dut nyi ri. ²⁰ Haí mù gâ le, Herut gi, Yohan,

dingmán chyoiyúng é sũ nghut é lé sé mù luí, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyo nhúng nhâng byuq kôhang, yhang taí é dang pé lé ru gyô nau nyi ashî nghut ri.

²¹ Nghut kôhang, Herut gi, yhâng é hkû ladu hkyúm buinyi má, byù mó pé, gyezau pé, Galile mau suwún wui pé lé, ji yù mù zoshuq poí mó kut é yanmai, haú nyi gi, Herudiaq é matú, buinyi gè dut bê nghut ri. ²² Herudiaq é yhangzo byizo gi, wang lé lô mù, gó shit é hkûn, Herut eq yhâng é bíng pé gi, myit ngón bum akô nghut ri.

Haú mù, hkohkâm gi, myiwe zo haú lé, "Nàng ô nau é haí nghut kôle, dung aq, ngò nàng lé byi râ nghut lhê." ga, dakam é danggidiq byi ri. ²³ Hau htoq agó, yhang gi, myiwe zo haú lé, "Nàng dung é haí nghut kôle, ngò byi râ; ngá é mingdán rawuí gû lháng, byi râ nghut lhê." ga, dakam é danggidiq byi ri.

²⁴ Haú hkûn, myiwe zo haú gi, htoq lô mù, yhâng nu lé, "Haí dúng le gè râ laq?" ga myi jáng, yhângnu gi, "Wui-myhup Sará Yohan é ulhum dung aq." ga tũ taí kat ri.

²⁵ Myiwe zo haú gi, radá dâm hân hân wang lô mù, hkohkâm lé, "Ahkuí yhang, Wui-myhup Sará Yohan é ulhum lé, bó má kat mù byi laq." ga, dúng tôngbán ri.

²⁶ Haú su ga jáng, hkohkâm gi, myit gyai yhang a ngón dut byuq kôhang, yhang dakam tô é danggidiq é yanmai le, bíng pè é myoq-dong lé tê nau é yanmai le, myiwe zo haú taí é dang lé a kâm he pyám lo nghut ri. ²⁷ Haú mù, hkohkâm gi, zúng é gyezo rayuq lé, Yohan é ulhum ê hpyit lô râ matú, radá dâm hkunmó hkyó mù nhang kat ri. Haú mù, haú yuq gi, htóng hkaú má ê luí, Yohan é ulhum lé, ê hpyit mù, ²⁸ bó má kat luí, myiwe zo haú lé lo byi ri; myiwe zo haú gi, ulhum

haú lé, yhângnu chyáng yu lô byi ri. ²⁹ Yohan é chángzô pé gi, haú hkyô lé wó gyo kôjáng, yhâng é mâng lé lé yù luí, lup má lô myhup pyám bekô nghut ri.

Byù Ngo Hkyîng Lé Byi Tsô É Hkyô

Mht 14:13-21; Luk 9:10-17; Yhn 6:1-14

³⁰ Lagyo pé gi, Yesuq chyáng dum jé zíng lò kômù, yhangmoq kut lai lo é hkyô pé eq mhoqshit bê hkyô pé banshoq, Yhang lé taí kyô akô nghut ri. ³¹ Hau htâng, byù myo myo gi, yhangmoq chyáng htoq htoq wàng wàng kut nyi kô é yanmai, yhangmoq gi, zang zo ahkyíng lháng a wó kô nghut ri. Haú mù, Yesuq gi, chángzô pé lé, "Nga-nhúng, tsím tsâm é jowò ralhumm má ê mù, ê nô yù sháng." ga taí ri.

³² Haú mù, yhangmoq gi, yhangmoq baú lhai racham má ji mù, tsím tsâm é jowò shut e lô akô nghut ri. ³³ Nghut kôhang, yhangmoq e lô é lé châng myang é bang myo myo gi, yhangmoq lé wú sé kôluí, wà hkangmó mai hkyi hkyô châng din ê kômù, yhangmoq é hí má jé to lánng akô nghut ri. ³⁴ Yesuq gi, lhai mai gyó dap lô é hkûn, byù moq mó nyi to lánng lé myàng jáng, yhangmoq gi, zúng sũ a nyi é sau pé su dut kô é yanmai, yhangmoq lé wú shogyo luí, myo myo mhoqshit byi hi lô bê nghut ri.

³⁵ Bui gyum lô yâm jé jáng, Yhang é chángzô pé gi, lé lô kômù, Yhang lé, "Shi má gi, tsím tsâm é jowò nghut é htoq agó, bui le gyum lô bê; ³⁶ yhangmoq gi, awui ayám mã é yhùm pé eq wà pé má, zoshuq lô ho wui zo kô sháng gaq, yhangmoq lé lô nhâng aq hkoi." ga taí akô nghut ri.

³⁷ Haú hkûn, Yhang gi, "Nungmoq, yhangmoq lé rajung jung byi tso keq." ga tũ taí jáng, yhangmoq gi, "Shi myhô é bang zo râ matú,

ngamoq gi, ê luí, denari* í sho èq muk é wuí byi ra rá luq?" ga dum taú myí akò nghut ri.

³⁸ Nghut kôlhang, Yhang gi, "Nungmoq chyáng muk hká-myhó wó akò? Ê wú wú keq." ga myí ri. Haú mù, yhangmoq gi, myang hô jáng, "Muk ngo long eq ngozo í du wó lhê." ga, dum tú taí akò nghut ri.

³⁹ Hau htâng, Yesuq gi, banshoq bang lé ahpúng hpúng kut wàhu yò má zùng nhâng rá matú, Yhâng é chángzô pé lé taí kat ri. ⁴⁰ Haú mù, shiwa byu pé gi, rashô shô kut le, ngo xê xê kut le, ahpúng hpúng zung tô bùm bekò nghut ri. ⁴¹ Yesuq gi, haú muk ngo long eq ngozo í du lé yù mù, mauhkúng shut tu wú to luí, jeju ban hkya-on jáng, muk lé hpê gam ri. Hau htâng, Yhang gi, byu pé hí má châng hkat to byi rá matú, Yhâng é chángzô pé lé byí ri. Ngozo í du lé le, Yhang yù mù, banshoq bang lé gãm byí ri. ⁴² Yhangmoq banshoq bang gi, zô gyí bùm bekò nghut ri. ⁴³ Hau htâng, haú chángzô pé gi, zô myhit tô é muk eq ngozo lé, raxe í mung byíng shoq wó guq tsíng yu ashí kó nghut ri. ⁴⁴ Haú hkùn, zô é bang gi, yuqgê wuí baú lháng, byù du ngo hkyíng nghut ri.

*Yesuq, Wuí Htoq Má Sô É Hkyô
Mht 14:22-33; Yhn 6:15-21*

⁴⁵ Yesuq gi, haú shiwa byu pé lé byo ló nhang nyi é hkùn jáng, Yhâng é chángzô pé lé lhaí má wang jí nhâng mù, tú tap má é Bet-saida wà mó shut dap ló lángh nhang ri. ⁴⁶ Yhangmoq lé shi-kyám kat é htâng, Yhang gi, kyúdung rá ga, Yhang baú bùm shut doq e ló bé nghut ri.

⁴⁷ Buigyum htâng, lhaí gi, nhông gùng má jé tô é u lé, Yesuq gi, Yhang baú za myí htoq má nyi tô ashí nghut ri. ⁴⁸ Laí tau mut é yanmai,

haú chángzô pé gi, lhaí lhu wuíhkê nyi kô é lé, Yesuq myang ri. Napsùn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq shut e ló luí, yhangmoq é nàm mai laí ló rá dâ ri. ⁴⁹ Nghut kôlhang, yhangmoq gi, Yhang, nhông htoq má sô nyi é lé myang kôjáng, sobyô su ngàm kômù, kyek garú bum akò nghut ri. ⁵⁰ Hkâsu mù gâ le, yhangmoq banshoq bang gi, Yhang lé myàng kôluí, gyuq dàn kô é yanmai nghut ri.

Nghut kôlhang, Yhang, radá dâm yhangmoq lé dâng nyo kat é gi, "Hkâgyuq kó. Ngò ru nghut lhê; zím za nyi keq." gâ ri. ⁵¹ Hau htâng, Yhang gi, lhaí htoq má yhangmoq eq rahá é doq jí jáng, laí gi, zím byuq bê nghut ri; haú mù, yhangmoq gi, gyai yhang mauhong byuq bùm bekò nghut ri. ⁵² Hkâsu mù gâ lé, yhangmoq gi, muk gam é laklaí kumlhá eq séng luí a sê gyo kô é htoq agó, myitbun a bóng kô é yanmai nghut ri.

⁵³ Yhangmoq gi, gû dap ló kômù, Genesarat mau má jé wang lò jáng, lhaí lé haú má ló shap tô akò nghut ri. ⁵⁴ Yhangmoq lhaí mai gyó é hkùn jáng, byu pé gi, Yesuq lé lhom wú sê akò nghut ri. ⁵⁵ Haú mù, yhangmoq gi, haú mau ramau gón má din jón mù, nò bang lé taphkang mai waq luí, Yesuq nyi rí gâ é jowò hkangmó má, shuí lé lo bum akò nghut ri. ⁵⁶ Yesuq jé é wà hkangmó, myuq hkangmó, awui ayàm má é wà hkangmó pé má, yhangmoq gi, nò byù lé gài pé má lé lheq to kôluí, Yhâng é bushi htâng má za lháng, haú bang lé byi záng nhâng rá matú, Yhang lé dũng tòngbán akò. Yhang lé záng é lhunglháng bang gi, lhoq gê byí é huí akò nghut ri.

* 6:37 Denari rachap gi, byù rayuq é ra-nyí lhê é zuihpau eq wuí ri.

7

A Sanséng Dut Nhang É Hkyô Pé Mht 15:1-20

¹ Haú Hparishe pé eq tarâ sará pé ra-am gi, Yerusalem wà mó mai jé lé lô kômù, Yesuq é nàm má lé zup zing bum akô. ² Haú hkûn, Yhâng é chángzô pé ra-am gi, htûngli dông a chí pyâm é, a sanséng é loq èq zo shuq nyí kô é lé, yhangmoq myang akô nghut ri. ³ (Hparishe pé eq Yudaq byù banshoq bang gi, yhangmoq é íchýí îwâ pé é htûngli lé châng é bang nghut lhê mù luí, loq hí a chí é gi, haí le a zô wú kó nghut ri. ⁴ Yhangmoq gi, gàì pé mai taú lò jáng le, gùng hí a chí pyâm é, zojung a zo kó nghut é htoq agó, góm pé, hkoq pé, gyi chòkon pé lé chí é htûngli gotú pé lé le, châng akô nghut ri.)

⁵ Haú mù, Hparishe pé eq tarâ sará pé gi, Yesuq lé, "Náng é chángzô pé gi, haí mù luí, íchýí îwâ pé é htûngli lé a châng e za, a sanséng é loq èq zo shuq nyi akô lhú?" ga myí akô.

⁶ Haú hkûn, Yesuq gi, yhangmoq lé, "Gegùn labyoq kut bang ê, nungmoq eq séng luí myiqhtoì Esai-aq htoì tô é dang má,

'Byù shí bang gi, nhut htoq mai za Ngo lé hkunggâ akô; yhangmoq é myit nhiklhùm gi, Ngò eq wê gâng nyi akô.

⁷ Yhangmoq gi, akôm má za, Ngo lé noqkuq nyi akô; hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.*

ga kâ tô é gi, têng ri. ⁸ Nungmoq gi, Garai Gasang tô tô é hkunmó lé tô pyám luí, byu é htûngli lé za, myhik zing tô akô nghut ri." ga luí tù taí ri.

⁹ Hau htâng, Yhang xoq taí é gi, "Nungmoq gi, yhumsing é htûngli lé za châng rà matú, Garai Gasâng

é hkunmó lé he-ngik pyâm é má, hpaqchyí gyaí bo akô nghut ri. ¹⁰ Hkâsu mù gâ le, Mosheq gi, 'Nungmoq é ìnu îwa lé, hkungga keq.* ga le, 'Înu îwa lé, nhîng é sù ó yuq nghut kôle, sat pyâm é hui rà lhê.* ga le, kâ tô é nghut lhê. ¹¹ Nghut kôlhàng, nungmoq taí é gi, byù rayuq yuq, yhumsing é yhângnu yhângwa lé byi âng é zè lé, Korban za (Garai Gasang lé byi rà chyunghuq) nghut lhê gâ nhang akô. ¹² Haú mù, haú yuq lé, yhângnu yhângwâ é matú, haí a kut byi nhâng lô é dông dut bê nghut ri. ¹³ Haú dông mai, nungmoq gi, nungmoq chung gyó lo é htûngli é yanmai, Garai Gasâng é mungdang lé he-ngik pyâm akô; haú sù é hkyô myo myo lé le, nungmoq kut akô nghut ri." gâ ri.

¹⁴ Yesuq gi, shiwa byu pé lé Yhâng chyáng dum wut yù mù, taí é gi, "Nungmoq banshoq bang, ngò taí é lé gyô yù mù, sé lo keq; ¹⁵ Shinggan mai wang lo é haí jung le, byù lé a sanséng dut nhang é a nghut, nghut kôlhàng, byu é unghkaù mai htoq ló é zè kúm gi, byù lé a sanséng dut nhang lhê." gâ ri. ¹⁶ (Gyo rà nohkyap dap é sù gi, gyô yù sháng gaq.)" ga taí ri.*

¹⁷ Yhang gi, byù moq mó mai htoq ló mù, yhúmkaù má jé wang ló é hkûn, Yhâng é chángzô pé gi, dangtú haú eq séng luí, Yhang lé lhom myí akô nghut ri. ¹⁸ Haú mù, Yhang gi, yhangmoq lé, "Nungmoq gi, haú-í yhang go akô luq? Shinggan mai wang lo é haí jung le, byù lé a sanséng nhâng wó dut rà a nghut é hkyô lé, a sé kó lhú? ¹⁹ Hkâsu mù gâ lé, haú gi, byu é myit nhiklhùm hkaù má wang ló é a nghut e za, wamdau hkaù má sheq wang ló é nghut mù, shinggan shut dum lhoq htoq pyâm é nghut lhê." ga taí ri. (Yhang isu ga taí é gi,

* 7:7 Esai 29:13 * 7:10 Htoq Ló 20:12 * 7:10 Htoq Ló 21:17 * 7:16 Bun zo shí gi, Chyúmlaiká ra-am má bo lhê, ra-am má a bò.

zoshuq lhunglhang sanseng lhelê gá nau é dong nghut ri.)

²⁰ Hau htoq agó, Yhang xoq taí é gi, "Byù mai htoq ló é haí jung le, byù lé a sanseng nhâng wó dut é nghut lhê. ²¹ Hkâsu mù gâ lé, ahkaú mai htoq lo é gi, byu pé é myit mai htoq ló é nghut mù, agè ashop é dong myit é hkyô pé, ashop é dong gungsho zùm yap é hkyô, hkaú é hkyô, byù sat é hkyô, su-myi sulàng lú hkyô, ²² myoqnoq é hkyô, agè ashop é hkyô, mhaú zô é hkyô, achag achyut zùm yap lhâm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê; ²³ Agè ashop é hkyô shí pé banshoq gi, byu é unghkaú mai htoq lo é nghut mù, byù lé a sanseng dut nhang ri." gâ ri.

Tungbaù Myiwe Myhí Rayuq É Lumjng Myit

Mht 15:21-28

²⁴ Yesuq gi, haú jowò mai htoq ló mù, Turuq eq Sidun maukyo shut e ló luí, yhâm ralhúm má wang ê ri; Yhang nyi é hkyô lé, ó yuq lé lé a sé nhâng nau kôlhang, a wó zaú to nghut ri. ²⁵ Haú mù, agè ashop é nat wang júng tô é myiwe zo rayuq é yhangnu gi, Yhang nyi tô é hkyô lé wó gyô é hkûn jáng, Yhâng chyáng jé lé mù, Yhâng é hkyô wang má lé paí gop to luí, ²⁶ yhang zô chyáng mai nat gang lé hkat htoq pyám byi râ matú, Yhang lé dúng tóngbán ri. Myiwe haú gi, Suru-Hpiniki mau mâ é Grik byuhú nghut ri.

²⁷ Yesuq gi, "Zo wuít hí zô gyi kó sháng gaq; haí mù gâ le, zô wui chyáng mâ é zoshuq lé yù mù, hkuí pé† lé byi tsô é jung a nghut." ga yhang lé taí kyô ri.

²⁸ Haú hkûn, yhang gi, "Yhumsing ê! Haú kúm nghut ri; nghut kôlhang, siboi ô mâ é hkuí

lhang, zô wui é zô myhit shuq htâng lé, ge zo lhê a nghut lú?" ga dum tú taí ri.

²⁹ Haú mù, Yesuq gi, yhang lé, "Nàng tú taí é dang hau é yanmai, ló lo aq hkoi; haú nat gang gi, nung zô chyáng mai htoq ló byuq bê nghut ri." ga taí kat ri.

³⁰ Myiwe myhí haú gi, yhâm má dum taú jé lo é hkûn, yhang zo chong htoq má leq to láng é lé le, nat gang htoq byuq bê nghut é lé le, lo myang ri.

Nojit É Eq Dang A Hkyang É Sù Lé Lhoq Gê Byi É Hkyô

³¹ Yesuq gi, Turuq mau mai dum htoq ló mù, Sidun mai sô laí ló luí, Dekapoli mau hkaú dong laí byit mù, Galile nhông shut gyó jé ló ri. ³² Haú hkûn, byù ra-am gi, nojit é eq dang a hkyang é byù rayuq lé, Yhâng chyáng shuí lé lô kômù, haú yuq é ahtoq má loq ke byi râ matú, Yhang lé dúng tóngbán akô nghut ri.

³³ Yesuq gi, haú yuq lé baú za byù hpúng mai shuí htoq yù mù, yhâng é nohkyûng má loqnyhui htaú háng byi luí, sôkan byé tik yù mù, haú yuq é shô má htau byi ri. ³⁴ Hau htâng, Yhang gi, mauhkûng shut tu wú mù, soq mó shê luí, "Ehpahta!" (Lichyúm gi, "Bóng aq hkoi!") ga luí, haú yuq lé taí kat ri. ³⁵ Haú hkûn, haú yuq é nohkyap le bóng byuq luí, shô le nyhôm byuq mù, balang hkyâng hkyâng dang wó nyô bê nghut ri.

³⁶ Yesuq gi, haú hkyô ó lé le a taí kyo râ matú, yhangmoq lé hkúm kôlhang, yhangmoq gi, je hkúm le, je taí pyo akô nghut ri. ³⁷ Byu pé gi, gyai yhang mauhong byuq bùm kôluí, "Yhang gi, haí lé le, ge é dong chyat kut ri; nojit sù lé, wó gyo shoq, dang a hkyâng sù lé, wó nyô shoq, kut byi bê nghut ri." ga luí, taí bum akô nghut ri.

† 7:27 Zo wuít gâ é gi, Yudaq byu pé lé gâ é nghut lhê. ‡ 7:27 Hkuí pé gâ é gi, tungbaù pé lé gâ é nghut lhê.

8

Byù Myi Hkyîng Lé Byi Tsô É Hkyô

Mht 15:32-39

¹ Haù yoq má, gotû byù moq mó gi, lé zîng bum akô; haù bang zoshuq langhpyut to kô é yanmai, Yesuq gi, Yhâng é chángzô pé lé wut yù mù, ² "Ngò, shí bang lé wú shogyo ri; yhangmoq gi, Ngò eq rahá nghut nyi é sum nyi bò bê, haì le a myàng zo kó nghut ri. ³ Yhangmoq chyáng mâ é ram gi, mau we mai lé é bang nghut é yanmai, yhangmoq lé, zòmut gû yhùm shut nhang kat é nghut le gi, hkyolat má mutyut yut é ló hui kó rà nghut lhè." ga taì ri.

⁴ Haù hkûn, Yhâng é chángzô pé gi, Yhang lé, "Îsu é yoso má nhîng, shí myhò bang lé luq shoq byi tso rà zoshuq gi, hkâmá é yû râ lú?" ga taì akô.

⁵ Yesuq gi, "Nungmoq, muk hkâ-myhó long wó akô lú?" ga taù myi jáng, yhangmoq gi, "Nyhit long." ga, dum tû taì akô nghut ri.

⁶ Haù mù, Yhang gi, byù hpûng lé myigùng htoq má zùng nhang to luì, muk haù nyhit long lé yù mù, jeju ban hkya-on jáng, myhik hpé luì, haù bang lé gàm byi râ matú, Yhâng é chángzô pé lé byi kat ri; haù mù, yhangmoq gi, haù bang lé gàm byi akô nghut ri. ⁷ Yhangmoq gi, ngo-nú zo ratsuí le wó akô nghut ri; haù mù, Yhang gi, ngozo haù pé é matú jeju hkya-on luì, chángzô pé lé dum gàm byi nhang ri. ⁸ Yuq hkgangmó zô gyi bùm kô é htâng má, haù chángzô pé gi, amyit ahtâng lé nyhit mung bying shoq wó guq tsing yu ashî kó nghut ri. ⁹ Zô é bang gi, byù myi hkyîng kô nghut ri; Yesuq gi, haù bang lé, nhang kat luì, ¹⁰ Yhâng é chángzô pé eq rahá, lhai má wang ji mù, Dalamanuhta mau má é je akô nghut ri.

¹¹ Hparishe pé gi, lé mù, Yesuq eq dang htîng htîng lhùm akô; hau htoq agó, yhangmoq gi, mauhkûng mâ é kumlhá lé dúng é dông, Yhang lé chyam wú akô nghut ri. ¹² Yesuq gi, myit nò-kying kying luì, yhangmoq lé taì é gi, "Haì mù luì, shí ipyat lhè é byu pé gi, limik kumlhá dúng akô lú? Ngò teng za taì kôlé, shí ipyat mâ é bang lé, hai kumlhá le tûn shit rà a nghut." gâ ri. ¹³ Hau htâng, Yhang gi, yhangmoq lé pyâm to mù, lhai má dum taù wang ló luì, tû tap shut gû dap e ló bê nghut ri.

Hparishe Pé Eq Herut É Múnchi Mht 16:5-12

¹⁴ Haù chángzô pé gi, muk yu chùng rà lé tô-myhî pyám kôluì, lhai hkaù má muk ralong za ru wó akô nghut ri. ¹⁵ Yesuq gi, yhangmoq lé, "Nungmoq gi, Hparishe pé eq Herut é múnchi* lé, sidiq luì, koi pyâm nyi keq." ga taì ri.

¹⁶ Haù hkûn, yhangmoq gi, "Nga-nhûng chyáng muk a bo é yanmai, haù su ga taì é nghut ri." ga luì, rayuq eq rayuq taì lhùm bum akô nghut ri.

¹⁷ Haù su ga taì lhùm nyi kô é lé Yesuq sé jáng, yhangmoq lé, "Nungmoq gi, muk a bo é hkyô lé, haì mù taì lhùm nyi akô lú? Ahkuì je shoq, nungmoq gi, a byu-myàng, a sê gyo shi kó lú? Nungmoq é myit nhikhum gi, ru htan nyi ashî kó lú? ¹⁸ Myoq dap to kôluì nhîng, a myàng kó lú? Nohkyap dap to kôluì nhîng, a wó gyo kó lú? ¹⁹ Ngò, muk ngo long lé myhik hpé mù, byù ngo hkyîng lé byi tsô é hkûn, zô myhit shuq htâng lé, nungmoq hkâ-myhó mung wó guq tsing yu é lé, bun ashî kó lú?" ga myi jáng, yhangmoq gi, "Raxe í mung." ga tû taì akô.

²⁰ Dum, Yesuq gi, "Ngò, muk nyhit long lé myhik hpé mù, byù myi hkyîng lé byi tsô é hkûn, zô myhit tó

* 8:15 Shí má taì é múnchi gi, Hparishe pé eq Herut é mhoqshit hkyô lé, lhoq pyo é lé gâ lhè.

é ajap azo lé, nungmoq hkâ-myhó mung wó guq tsing yù kô é lhú?" ga myi jáng, yhangmoq gi, "Nyhit mung." ga dum tú tai akô.

²¹ Haú hkûn, Yesuq gi, "Haú nghut le nhing, ahkuí le, a sê gyo shi kó lhú?" ga, yhangmoq lé myi ri.

Myoqjit Sû Rayuq Lé Lhoq Gê Byi É Hkyô

²² Yhangmoq gi, Bet-saida wà mó má jé lò kô é hkûn, byù ra-am gi, myoqjit é byù rayuq lé, Yesuq chyáng shuí lé lò mù, haú yuq lé záng byi râ matú, dúng tôngbán akô.

²³ Yesuq gi, myoqjit sù haú yuq é loq lé zui mù, wà shinggan shut shuí htoq ló luí, yhâng é myoq má sôkan byé tik byi mù, loq ke byi luí, "Nàng, rajung jung lé myang ri lhú?" ga myi kat ri.

²⁴ Haú jáng, yhang gi, tu wú kat luí, "Byu pé gi, sikgâm su dut luí, hkyô sô wún é lé, ngò myang ri." ga tái ri.

²⁵ Hau htâng, Yesuq gi, haú yuq é myoq má Yhâng é loq dum ke byi ri; haú hkûn, haú yuq é myoq gi, bóng lô mù, ge byuq luí, hai lé le san za myàng bê nghut ri. ²⁶ Yesuq gi, haú yuq lé, "Wà hkaú má hkâwang ló lo." ga tái luí, yhâng é yhùm shut ló nhang kat bê nghut ri.

Hkrisduq Ga, Petruq Yin Yu É Hkyô

Mht 16:13-20; Luk 9:18-21

²⁷ Yesuq eq Yhâng é chángzô pé gi, Kesare-Hpilipi wà mó awui ayàm mâ é wà pé shut e ló é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, tái akô lhú?" ga myi ri.

²⁸ Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoi rayuq yuq nghut ri ga tái akô." ga, Yhang lé tú tái akô.

²⁹ Yesuq gi, "Nungmoq gi, ngo lé ó yuq nghut lhê nghu akô lhú?" ga, yhangmoq lé xoq myi jáng, Petruq gi, "Nàng gi, Hkrisduq† nghut ri." ga tái tái ri.

³⁰ Yesuq gi, haú hkyô ó lé le a tái kyo râ matú, yhangmoq lé tái hkúm ri.

Byu Yhangzo Gi, Sat Pyâm É Hui Luí, Dum Dui Toq Râ Hkyô

Mht 16:21-28; Luk 9:22-27

³¹ Hau htâng, Yhang gi, yhangmoq lé mhòqshit é má, "Haú Byu Yhangzo gi, zing-rí é myo myo hui zo luí, suwún wuí, hkyangjong agyi pé, tarâ sará pé eq he-ngik pyâm é hui mù, sat pyâm é hui ra râ nghut lhê; nghut kôlhang, sum nyí nghû râ buinyi má, dum dui toq râ nghut lhê." gâ ri. ³² Yesuq gi, haú hkyô lé san za dut shoq tái nyi é yanmai, Petruq gi, Yhang lé rahkyam shut shuí htoq yù mù, Yhang lé tân ri.

³³ Nghut kôlhang, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut ri." ga tân kat ri.

³⁴ Hau htâng, Yhang gi, byù moq mó eq Yhâng é chángzô pé lé wut yù mù, tái é gi, "Ngá htâng cháng naú sù ó yuq nghut kôle, yhumsing gùng yhumsing he-ngik pyám mù, yhumsing é tapzing lé waq chùng luí, cháng ra râ nghut lhê. ³⁵ Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai le, haú gabú danglù é yanmai le, yhumsing é asak sùm pyâm é sù kúm gi, asak hkyi yu é hui rá nghut lhê. ³⁶ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhâng é matú, hai akyú bò râ lhú? ³⁷ Byù gi, yhumsing é asak

† 8:29 Grik dong Hkrisduq gâ é gi, xù but hui Sù gâ é lichyúm nghut mù, Hebre dong "Mesai" gâ é eq rajung za nghut lhê.

woi-nyí lé, hai èq wó htaí yù rá lhu? ³⁸ Yubak mara myô é eq su-myi sulàng shut é ipyat shí má, Ngò eq Ngá é dang lé hoq pyâm é sú ó yuq lé le, haú Byu Yhangzo gi, Yhâng Wá é hpungwup shing kang bo é èq, haú chyoiyúng maumang lagyô pé eq rahá jé lé é hkûn, hoq pyám rá nghut lhê."* gâ ri.

9

¹ Hau htâng, Yesuq gi, yhangmoq lé, "Ngò, nungmoq lé teng za tai kôlé, shí má yap tô é bang ra-am gi, Garai Gasâng é mingdán, hpungwup a-tsâm èq jé lé lo é lé, a myang é za shí kó rá a nghut." ga tai ri.

Yesuq É Ihpyô Isâm Htaí Lo É Hkyô

Mht 17:1-13; Luk 9:28-36

² Hkyuq nyí lai htâng má, Yesuq gi, Petruq lé le, Yakuq eq Yohan lé le, shuí chùng mù, yhangmoq baú myhang é bùm ralhum má doq ló akô; haú hkûn, yhangmoq é myoq hí tê má, Yesuq é ihpyô isâm htaí lo ri. ³ Hau htoq agó, Yhâng é mebu gi, wik wik duq hpyu zan lo ri; myidám htoq má, ó yuq le haú-i hpyú shoq a wó xaú hpyu wú é nghut lhê. ⁴ Eliyaq eq Mosheq gi, yhangmoq é hí má htoq shit mù, Yesuq eq dâng nyo lhum nyi akô.

⁵ Haú mù, Petruq gi, Yesuq lé, "Rabai ê, shí jowò má nga-nhung nyi le ge ri; haú mù, Náng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhum saí nhâng laq." ga tai ri. ⁶ Hkâsu mù gâ le, yhangmoq gi, gyai yhang gyuq dan bùm kô é yanmai, Petruq gi, hai tai rá le a sé mù, haú su gâ é nghut ri.

⁷ Hau htâng, mhut htoq lô luí, yhangmoq lé htup zing lô mù, mhut hkaú mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhâng é dang gyo keq." gâ ri.

⁸ Haú hkûn jáng, chángzô pé gi, lhinghkyuq má wú kat le, Yesuq za yhangmoq eq rahá nghut nyi é mai lai luí, ó lé le, a myàng lo kó nghut ri.

⁹ Yhangmoq, bùm mai taú gyó lô kô é hkûn, Yesuq gi, haú Byu Yhangzo shi é mai a dum dui toq toq gi, yhangmoq myang é hkyô lé, ó lé le a tai kyo rá matú tai hkûn tô ri. ¹⁰ Chángzô pé gi, dang haú lé myit má kat to kôluí, "Shi é mai dum dui toq rá." gâ é lichyúm lé, rayuq eq rayuq myí lhum bum akô nghut ri.

¹¹ Hau htâng, yhangmoq gi, "Eliyaq hí lé ra rá nghut lhê ga, tará sará pé hai mù tai kô é lhu?" ga, Yesuq lé myí akô.

¹² Haú hkûn, Yesuq gi, "Eliyaq hí jé lé é gi, teng bê nghut luí, lhunglhâng lé dum lajâng tô é nghut ri. Nghut kôlhang, haú Byu Yhangzo gi, myo myo hpuzo luí, hengik pyâm é hui ra nghut lhê ga le, Chyúmdang má kê to ashí, a nghut kó lhu? ¹³ Ngò, nungmoq lé tai kôlé, Eliyaq gi, jé lé bê nghut mù, yhang eq séng luí Chyúmdang má kê tô é eq rajung za, yhangmoq gi, ô nau é dông banshoq kut bekô nghut ri." ga tú tai ri.

Nat Dap É Yuqgè Zo Rayuq Lé Lhoq Gê Byí É Hkyô

Mht 17:14-20, 22-23; Luk 9:37-45

¹⁴ Yhangmoq gi, chángzô pé chyáng dum taú jé lô kô é hkûn, haú bâng é lhinghkyuq má byu moq mó zing lé é lé le, tará sará pé, haú bang eq dang htíng htíng lhum nyi kô é lé le, myang akô. ¹⁵ Haú má nyi tô é lhunglhâng bang gi, Yesuq lé myang kat é eq, maú byuq kôluí, din é mù, é shi-kyâm akô nghut ri.

¹⁶ Haú hkûn, Yesuq gi, yhangmoq lé, "Nungmoq gi, yhangmoq eq hai lé dang htíng htíng lhum nyi akô lhu?" ga myí ri.

* 8:38 Yer 3:8; Ezk 23:37; Hos 2:2-10

¹⁷ Byù hpúng hkaû mã é rayuq tũ taí kat é gi, "Sará ê! Nhut jit nhang é nat wang júng tô é ngá é yuqzo lé, Náng chyáng shuí lé lo lhê. ¹⁸ Nat haû gi, yhang chyáng wàng hkanmó, yhang lé myi htoq má lhoq leqbat nhang ri; haû mù, yhang gi, nhut mai guttsû htoq lhê, zuì kyik kyik lhê, langhtan lo lhê, dut ri; hau é yanmai, nat haû lé hkat htoq pyám byi rá matú, Náng é chángzô pé lé dúng wú kôhang, yhangmoq a wó dut kó nghut ri." gâ ri.

¹⁹ Haú hkûn, Yesuq gi, "Lumjúng myit a bo é amyú pé ê, Ngò gi, hkâ-myháng jé shoq nungmoq eq rahá nyi mù, wó jân nyi rá lúhú? Yuqgè zo haû lé, Ngá chyáng shuí lé lô keq." ga taí kat ri.

²⁰ Haû mù, yhangmoq gi, yuqgè zo haû lé shuí lé lo akô; nat haû gi, Yesuq lé myang kat é eq yhang, yuqgè zo haû lé langhtan nhang ri; yuqgè zo haû gi, myigùng má lêng leq luí goleng leng mù, nhut mai tsú-myup htoq nyi ri.

²¹ Haú hkûn, Yesuq gi, yhangwa lé, "Yhang, isu dut é hkâ-myháng myáng bê lúhú?" ga myi jáng, yhang wa gi, "Zoshâng hkûn mai nghut bê. ²² Nat haû gi, yhang lé lhoq sat pyám naú mù, myi má le, wui má le, anum num lêng wàng nhang wú bê nghut lhê; nghut kôhang, Náng, rajung jung wó kut byi é nghut le gi, ngá hpe lé shogyo yù laq, garúm yù laq." ga tũ taí ri.

²³ Yesuq gi, "'Náng, wó kut byi é nghut le gi,' nghú, haí mù taí lhê lúhú? Lumjúng myit bò su é matú gi, haí le wó dut lhê." ga, yhang lé taí ri.

²⁴ Haû zôshang é yhangwa gi, radá dâm, "Ngò lumjúng lhê; nghut kôhang, ngá é lumjúng myit gi, shaû ashí nghut é yanmai garúm yù laq." ga taí garú ri.

²⁵ Yesuq gi, byù hpúng din zîng lé lô kô é lé, myàng jáng, haû age

ashop é nat lé, "Nojit, nhutjit nhang é nat ê! Ngò, nang lé hkunmó hkyô lhê, yhang chyáng mai htoq ló aq; hkâ-nhám le, yhang chyáng hkâdum wàng lo." ga tân kat ri.

²⁶ Haú hkûn, nat haû gi, garu mù, zoshâng haû lé wum kat langhtan nhâng luí, htoq ló byuq bê. Zoshâng haû gi, shí mâng gùng su dut byuq é yanmai, byù myo myo gi, "Yhang shí bê nghut ri." ga taí akô. ²⁷ Nghut kôhang, Yesuq gi, zôshang é loq má zuì luí, tu toq kat ri; haû mù, zoshâng gi, yap to bê nghut ri.

²⁸ Yesuq, yhúmkaû mã wang ló é htâng, Yhâng é chángzô pé gi, "Ng-amoq gi, haí mù, nat haû lé a wó hkat htoq é lúhú?" ga, tsik za Yhang lé myi akô.

²⁹ Yesuq gi, "Haú jung nat lé gi, kyúdùng é đông za a nghut jáng, wó hkat htoq rá a nghut." ga, yhangmoq lé tũ taí ri.

³⁰ Yhangmoq gi, haú jowò mai htoq ló mù, Galile mau mai lai ló akô; nghut kôhang, Yesuq gi, ó lé le a sé nhâng naù nghut ri. ³¹ Haí mù gâ le, Yhang gi, "Haú Byu Yhangzo gi, byu pé é loq má ap pyám é hui rá nghut lhê; haú bang gi, Yhang lé sat pyám kó rá nghut lhê; nghut kôhang, Yhang gi, shi é htâng sum nyi nghú rá nyi má, dum dui toq rá nghut lhê." ga, Yhâng é chángzô pé lé mhoqshit byi nyi é yanmai nghut ri. ³² Yhâng é chángzô pé gi, dang haú lé a sê gyo kôhang, Yhâng chyáng a wám myi kó nghut ri.

Kô Dik Sû Gi, Ó Yuq Nghut Lhê Lhú?

Mht 18:1-5; Luk 9:46-48

³³ Yhangmoq gi, Kaperna-um wá mã jé e akô nghut ri. Yesuq gi, yhúmkaû mã nyi tô é hkûn, chángzô pé lé, "Hkyô má, nungmoq, hai hkyô lé dang chyin chyin lhum kô é lúhú?" ga myi ri. ³⁴ Nghut kôhang, yhangmoq gi, zim za nyi tô akô; hkâsu mù gâ le, ko dik sù gi, ó yuq nghut lhê nghú é hkyô lé,

hkyolat má, yhangmoq dang chyin chyin lhum kô é yanmai nghut ri.

³⁵ Yesuq gi, zùng mù, haù chángzo raxe í yuq lé, wut yù luí, "Kô dik naù sù ó yuq nghut kôle, tiq dik sù eq banshoq bâng é dui-nhâng zoshâng dut ra râ nghut lhê." ga tai ri.

³⁶ Hau htâng, Yhang gi, zoshâng rayuq lé shuí yù mù, yhangmoq é gung gûng má shap to luí, dum bún yù mù, yhangmoq lé tai é gi, ³⁷ "Shí sù é zoshâng lé, Ngá é myîng mai hap yu é sù ó yuq nghut kôle, Ngo lé hap yu é sù nghut bê; Ngo lé hap yu é sù ó yuq nghut kôle, Ngo lé za hap yu é a nghut, Ngo lé nhang kat é Sù lé hap yu é le nghut lhê." gâ ri.

Nga-nhúng Lé Gyè A Kut É Sù Gi, Nga-nhúng É Hkyam Shut Nghut Lhê Gâ É Hkyô

Luk 9:49-50

³⁸ Haù hkûn, Yohan gi, "Sarâ é! Náng é myîng lang luí, nat gâng pé lé hkat pyám byi wún é byù rayuq lé, ngamoq myang ri. Yhang gi, nga-nhúng chyáng a lòm sù nghut é yanmai, yhang lé ngamoq hkûm pyám é nghut lhê." ga tai ri.

³⁹ Yesuq kúm gi, "Yhang lé hkâhkúm kó; Ngá myîng lé lang luí, laklai kumlhá kut é sù gi, razup za má, Ngò eq séng luí, a ge é hkyô pé lé tai râ a nghut; ⁴⁰ Hkâsu mù gâ le, nga-nhúng lé gyè a kut é sù gi, nga-nhúng é hkyam shut nghut lhê. ⁴¹ Ngò, nungmoq lé teng za tai kôlé, nungmoq gi, Hkrisduq eq séng é bang nghut lhê gâ é yanmai, ngá é myîng lé lang luí, nungmoq lé, uchyam ragóm byi huq é sù ó yuq nghut kôle, zuihpau lé hkyak myang hkam yù râ za nghut lhê.

Mara Shut Nhang É Hkyô

Mht 18:6-9; Luk 17:1-2

⁴² Ngo lé lumjîng é zoshâng wui mâ é rayuq lé, mara kut shut nhang

é sù gi, yhâng é lingzing má luqluí long mó tuí hut byi luí, wuimau má é dú hkyó pyám é huí é nghut lé gi, yhang é matú je gè râ nghut lhê. ⁴³ Náng é loq èq, nang lé mara kut shut nhang é nghut le gi, haù lé hpyit dú pyám aq; loq í loq dap luí, hkâ-nhám le, myiduq a dat shum é ngaraí ming wàng râ htoq má, loq raloq eq za ahtum abyuq é asak wó râ shut wàng le gi, náng é matú je ge ri. ⁴⁴ (Haù ngaraí ming gi, 'yhangmoq lé hkê nyi é luq le a shí, myiduq le a shúm' é jowò nghut lhê.)* ⁴⁵ Náng é hkyi èq, nang lé mara kut shut nhang é nghut le gi, haù lé hpyit dú pyám aq; hkyi í hkyi dap luí, hkâ-nhám le, myiduq a dat shum é ngaraí ming má dú hkyô pyám é huí râ htoq má, hkyi rahkyi za dap luí, ahtum abyuq é asak wó râ shut wang le gi, náng é matú je ge ri. ⁴⁶ (Haù ngaraí ming gi, 'yhangmoq lé hkê nyi é luq le a shí, myiduq le a shúm' é jowò nghut lhê.) ⁴⁷ Náng é myoqjí èq, nang lé mara kut shut nhang é nghut le gi, haù lé lap choq pyám aq; myoqjí í jí dap gû, ngaraí ming má dú hkyó pyám é huí râ htoq má, myoq rají eq za, Garaí Gâsâng é mingdán má wang le gi, náng é matú je ge ri.

⁴⁸ (Haù ngaraí ming gi, 'yhangmoq lé hkê nyi é luq le a shí, myiduq lé a shúm' é jowò nghut lhê.)*

⁴⁹ Hkâsu mù gâ le, hkungga sho lé xo kat luí lhoq sansêng é su, myi gi, yuq hkanmó lé lhoq sansêng râ nghut lhê.*

⁵⁰ Xo gi, ge lhê. Nghut kôlhâng, xomân kân byuq jáng gi, hkâsu kut dum wó lhoq ngam yù râ lhú? Nungmoq gi, xo su ngam nyi mù, rayuq eq rayuq nguingón nyi keq." ga tai ri.

10

* **9:44** Bun zo 44, 46, gi, Chyúmlaiká myo myo má a bo é nghut lhê. ✧ **9:48** Esai 66:24 ✧ **9:49** Nhung 2:13

Myi, Làng Gâng É Hkyô

Mht 19:1-12; Luk 16:18

¹ Hau htâng má, Yesuq gi, Kaperna-um mai htoq ló mù, Yuda mau má é maukyo má ê jé luí, Yodan làng tũ tap má dap ló bê nghut ri; byù myo myo gi, Yhâng chyáng dum zing lé lô kôluí, Yesuq gi, Yhang lhaq kut nyi é eq rajung za, haú bang lé mhoqshit byi ri.

² Hparishe pé ra-am gi, lé jé kômù, "Byù rayuq, yhumsing é yhangmyi lé lhoq kâng pyâm le, tarâ wang lhê lú?" ga myi é dong, Yhang lé chyam wú akô.

³ Yesuq gi, "Mosheq gi, nungmoq lé, hkâsu ga hkunmó hkyó tô é lú?" ga tũ myi ri.

⁴ Haú hkûn, yhangmoq gi, "Yuggè rayuq gi, lhoq kang laiká ká mù, yhangmyi lé wó nhang pyâm lhê ga, Mosheq, ahkáng byi tô ri." ga tũ taí akô.

⁵ Yesuq dum tũ taí é gi, "Nungmoq é myit nhiklum htân kô é yanmai, Mosheq gi, tarâ haú lé kâ tô é nghut lhê. ⁶ Nghut kôhang, mau htoq xâng hkun lé, Garai Gasang gi, 'yuggè eq myiwe lé hpan é nghut lhê.'* ⁷ 'Hau é yanmai, yuggè gi, yhumsing înu îwâ chyáng mai htoq luí, yhangmyi eq rahá rading ralhũm za kut nyi mù, ⁸ yhangnhik gi, gungsho ralhũm za dut byuq kó rá nghut lhê.* Haú mù luí, yhangnhik gi, í yuq a nghut lo é za, rayuq za dut bê nghut ri. ⁹ Haú mù luí, Garai Gasang lhoq tsũm tô é lé, byù gi, a lhoq kang sháng gaq." gâ ri.

¹⁰ Yhumhkaú má, yhangmoq nyi tô é hkûn lé, chángzô pé gi, haú hkyô eq séng luí, Yhang lé dum saí myi akô. ¹¹ Haú hkûn, Yhang gi, "Yhumsing é yhangmyi lé kâng pyám mù, myiwe gotũ dum hâng yu é sũ ó yuq nghut kôle, su-myi lú é sũ dut bê nghut mù, yhangmyi lé shut é sũ nghut bê. ¹² Myiwe

rayuq le, yhumsing é yhanglâng lé kâng pyám mù, yuggè góyuq eq dum hâng é nghut le gi, sulàng lú é hkyô lé kut bê nghut ri." ga tũ taí ri.

Zoshâng Wuì Eq Yesuq É Hkyô

Mht 19:13-15; Luk 18:15-17

¹³ Byu pé gi, zoshâng wuì lé Yesuq záng byi sháng gaq ga, Yesuq chyáng shuí lé lo akô; nghut kôhang, chángzô pé gi, yhangmoq lé lhom tân hkũm akô nghut ri.

¹⁴ Haú lé Yesuq myàng jáng, Yhang gi, wú nhik-yo naú luí, "Haú zoshâng wuì lé, Ngá chyáng lé nhâng keq; yhangmoq lé hkâhkũm zing to kó; hkâsu mù gâ le, Garai Gasâng é mingdán gi, haú su é bâng é mingdán ru nghut lhê. ¹⁵ Ngò, nungmoq lé teng za taí kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haú má wó wâng rá a nghut." ga yhangmoq lé taí ri. ¹⁶ Hau htâng, Yesuq gi, zoshâng wuì lé bún yũ mù, yhangmoq ahtoq má loq ke luí, shimân byi ri.

Sùt Wó É Zorâm Rayuq É Hkyô

Mht 19:16-30; Luk 18:18-30

¹⁷ Yesuq gi, hkyô dum so xoq e ló é hkûn, byù rayuq gi, din lé lô mù, Yhâng é hí má hkyihput htuq luí, "Ge é Sará ê, ahtum abyuq é asak wó yũ rá matú, ngò haí kut ra rá lú?" ga myi ri.

¹⁸ Haú mù, Yesuq gi, "Haí mù, Ngo lé ge é Sará nghu lhê lú? Garai Gasang mai lai luí, ge é ó yuq le a nyi. ¹⁹ Jep e tarâ má, 'Byù hkâsat, su-myi sulàng hkâlú, hkâhkau, a teng a mán é saksé hkâhkâm, hkâmô zo, nángnu nángwa lé hkungga aq!*' ga bo tô é lé, náng sê lhê." ga tũ taí ri.

²⁰ Haú hkûn, haú yuq gi, "Sará ê, haú pé banshoq lé, ngò, zoshâng hkûn mai cháng bê nghut lhê." ga taí ri.

21 Yesuq gi, haú yuq lé wú tsuq to mù, yhang lé chytidap luí, taí é gi, "Nàng kut rá rajung rá tô ashí; ló mù, nàng wó miwó lé ùng pyám luí, myùng bang lé byí pyám aq; haú jáng, nàng, mauhkùng htoq má sutzè wó rá nghut lhê; haú mù, Ngá htâng lé cháng aq." gâ ri.

22 Haú yuq gi, dang haú lé wó gyo jáng, sutzè gyai wó sù nghut é yanmai, myoqdong shum byuq mù, gyai yhang myit a ngón é eq ló byuq bê nghut ri.

23 Yesuq gi, lhínghkyuq byu wú mù, Yhâng é chángzô pé lé, "Sutzè wó bang gi, Garai Gasâng é mingdán má wàng rá matú, haú-í yhang wuí ri-nhung!" ga taí ri.

24 Chángzô pé gi, Yhang taí é dâng é yanmai, mauhong bum akó nghut ri. Nghut kôhang, Yesuq dum xoq taí é gi, "Zo wuí ê, Garai Gasâng é mingdán má wàng rá matú, haú-í yhang wuí ri-nhung!"
25 Sutzè wó sù rayuq, Garai Gasâng é mingdán má wó wàng rá htoq, gola-uq radu âpno mai wó wang lai rá gi, je lui rá nghut lhê." gâ taí ri.

26 Haú hkún, chángzô pé gi, je riyhang maú byuq kômù, rayuq eq rayuq, "Haú su ru nghut le gi, ó yuq za hkyi yu é hui rá nghut lhê thú?" ga, taí lhùm bum akó nghut ri.

27 Haú hkún, Yesuq gi, yhangmoq lé wú kat mù, "Haú hkyô lé, byù mai gi, wó kut rá a nghut; nghut kôhang, Garai Gasang gi, wó dut lhê; hkâsu mù gâ le, Garai Gasang gi, lhunglháng lé wó kut é Sù nghut lhê." ga taí ri.

28 Haú hkún, Petruq gi, Yhang lé, "Ngamoq gi, wó é gú lhunglháng lé tô pyâm to luí, Náng htâng cháng bê nghut lhê." ga taí ri.

29 Haú mù, Yesuq tû taí é gi, "Ngò, nungmoq lé teng za taí kôlé, Ngá é yanmai le, gabú danglu é yanmai le, yhumsing é yhùm, gumang gu-nhá, Ìnu İwa, zo dù wui eq yò pé lé tô pyâm tô é sù ó yuq nghut kôle, 30 shí

pyat lhê é yhùm pé, gumang gu-nhá wuí, Ìnu pé, zo dù wui eq yò pé lé, rashò tú wó hkam yù luí, zing-rí é hkyô pé lé le hui kó rá nghut é htoq agó, htang pyat má le, ahtum abyuq é asak wó yû rá nghut lhê.
31 Nghut kôhang, hí nghut nyi é bang myo myo gi, htâng gyó byuq kó rá nghut mù, htâng gyó nyi bang yuq gi, hí bekô rá nghut lhê." gâ ri.

Yesuq, Yhang Shí Râ Hkyô Lé Dum Taí É Hkyô

Mht 20:17-19; Luk 18:31-34

32 Yhangmoq gi, Yerusalem wà mó shut doq ló nyi kô é u lé, Yesuq gi, yhangmoq é hí má sô tô ri; haú hkún, htâng má sô é bang gi, gyuq nyi bùm kô é u lé, haú chángzô pé gi, maú byuq bum akó nghut ri; Yesuq gi, haú chángzo raxe í yuq lé gotú kut dum wut yù mù, Yhâng chyáng dut lò rá hkyô, yhangmoq lé taí kyô é gi, 33 "Wú keq, ngan-húng gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tarâ sará pé é loq má ap byí pyâm é hui rá nghut lhê; haú bang gi, Yhang lé, shí rá mara byi luí, túngbaù pé é loq má ap byí pyám kó rá nghut lhê. 34 Haú bang gi, Yhang lé, wuizui kut pyâm é, sôkan byé gyùn é, nhuq bat é kut yû mù, sat pyám kó rá nghut lhê. Hau htâng sum nyi má, Yhang dum dui toq ló rá nghut lhê." gâ ri.

Yakuq eq Yohan nhik dung é hkyô

Mht 20:20-28

35 Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù, "Sarâ é, ngá-nhik dúng é gú banshoq, Nàng kut byi rá lé, ngá-nhik ô nau ri." ga taí akô.

36 Haú hkún, Yhang gi, "Ngò, nungnhik lé haí kut byi rá ô nau akó thú?" ga myí ri.

37 Yhangnhik gi, "Náng é hpung-wup shing kang hkaú má, ngá-nhik tâng lé, Náng é loqyò hkyam má

rayuq, loqpaî hkyam má rayuq kut, zùng nhâng laq." ga tù taí akô.

³⁸ Nghut kôlhang, Yesuq gi, "Nungnhik haî dúng nyi é lé, nungnhik a sé kó nghut ri. Ngò shuq râ góm* lé, nungnhik wó shuq kó râ lúhú? Ngò hkam yù râ baptisma lé, nungnhik wó hkam yù kó râ lúhú?" ga yhangnhik lé tù taí ri.

³⁹ Haú hkûn, yhangnhik gi, "Nga-nhik wó dut lhê." ga tù taí kôjáng, Yesuq gi, "Ngò shuq râ góm lé, nungnhik shuq kó râ nghut lhê; ngò hkam yù râ baptisma lé le, nungnhik hkam yù kó râ nghut lhê.

⁴⁰ Nghut kôlhang, Ngá é loqyò, loqpaî hkyam má zùng râ ahkáng lé gi, Ngò byí jung a nghut. Jowò haú pé gi, hen to byí é hui bâng matú za nghut lhê." ga yhangnhik lé taí ri.

⁴¹ Haú su gâ é hkyô lé, haú gotú chángzo raxê yuq wó gyo kôjáng, yhangmoq gi, Yakuq eq Yohan nhik lé nhik-yô akô nghut ri. ⁴² Yesuq gi, yhangmoq banshoq bang lé wut tsíng yù luí, "Túngbaù pé lé uphkang é ga bang gi, túngbaù pé lé up zô nyi kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chùng mù, up zô nyi kô é hkyô lé le, nungmoq sê lhê. ⁴³ Nghut kôlhang, nungmoq chyáng gi, haú su a dut kó sháng gaq, nungmoq má, byù mó dut nau sù ó yuq nghut kôle, nungmoq é dui-nhâng zoshâng dut ra râ nghut lhê. ⁴⁴ Hau htoq agó, nungmoq má ushuq dut nau sù ó yuq nghut kôle, banshoq bâng é jùn dut ra râ nghut lhê. ⁴⁵ Hkâsu mù gâ le, haú Byu Yhangzo lháng gi, dojaú é lé hkam yù râ matú jé lé é a nghut e za, dojaú râ matú eq byù myo myô é matú, shîltaí gunglik hkungga dông, Yhâng é asak lé byi pyám râ matú sheq, jé lé é ru nghut lhê." ga,

yhangmoq lé taí ri.

Myoqjit Sû Barateme, Myoq Dum Myang É Hkyô

Mht 20:29-34; Luk 18:35-43

⁴⁶ Hau htâng, yhangmoq gi, Yer-ihko wà má jé ló akô nghut ri. Yesuq eq Yhâng é chángzô pé gi, byù moq mó eq rahá, wà mai htoq ló nyi kô é hkûn, Barateme (Teme é yhangzo) gâ é myoqjit sù rayuq gi, hkyô yàm má dung zô zung tô ri. ⁴⁷ Yhang gi, Nazaret wà byù Yesuq laí ló é lé wó gyo jáng, "Dawiq é Yhangzo Yesuq é, ngo lé shogyo yù laq ô!" ga garû kat ri.

⁴⁸ Haú mù, byù myo myo gi, zim za nyi râ matú yhang lé tân hkûm akô; nghut kôlhang, yhang gi, "Dawiq é Yhangzo é, ngo lé shogyo yù laq ô!" ga, je riyhang garû kat ri.

⁴⁹ Haú mù luí, Yesuq gi, yap nô kat mù, "Yhang lé ji kat keq." ga taí jáng, yhangmoq gi, "Myit ngón aq hkoi; Yhang, náng lé ji nyi ri; toq aq." ga myoqjit sù haú lé taí akô. ⁵⁰ Haú hkûn, haú yuq gi, yhâng é buhîng lé hkyut pyám mù, byam chy luí, Yesuq chyáng lé jé ri.

⁵¹ Yesuq gi, yhang lé, "Ngò, nang lé haî kut byi râ ô nau ri lúhú?" ga myi jáng, yhang gi, "Sarâ é, ngò myoq myâng nau ri." ga tù taí ri.

⁵² Yesuq gi, "Ló aq hkoi, náng é lumjîng myit gi, náng lé lhoq gê byi bê nghut ri." ga taí kat é hkûn jáng, yhang gi, myoq wó myâng mù, Yesuq e ló é hkyô shut cháng e ló bê nghut ri.

11

Yesuq, Yerusalem Wà Mó Má Wang Ló É Hkyô

Mht 21:1-11; Luk 19:28-40; Yhn 12:12-19

¹ Yesuq eq Yhâng é chángzô pé gi, Yerusalem wà mó eq chyáng lo nyi kô é hkûn, Tsanlun Bùm mâ é Bethpage wà eq Behtani wà má jé

* **10:38** Góm eq baptisma gâ é gi, jamjau hui râ eq shî râ lé, taí nau é nghut lhê.

ló kôjáng, Yesuq gi, Yhâng é chángzo í yuq lé, ² "Nungnhik, hí mâ é wá má é keq; wá haú má wang é hkún jáng, ó le a jí wú shí é logúng zo tuí to láng é lé, ê myâng kó rá nghut lhê; haú lé hpyi yù mù, Ngá chyáng she lò keq. ³ Byù rayuq yuq mai, 'Haí mù, haú su kut nyi akô lú?' ga nungnhik lé lhom myi jáng, 'Shí du lé, haú Yhumsîng rá ri ga, razup má dum taú dé byi rá nghut lhê.' nghú tû taí keq." ga pyîng luí, nhang kat ri.

⁴ Haú nhik gi, e ló mù, hkyô mó yâm mâ é hkumdong nàm má tuí tô é logúng zo radu lé, ê myâng kôluí, haú lé tuí hpyi nyi akô. ⁵ Haú hkún, haú má yap tô é bang ram gi, "Haí mù, logúng tuí hpyi nyi akô lú?" ga myí akô. ⁶ Haú jáng, yhangnhik gi, Yesuq pying kat é eq rajung za taí kyo kôjáng, yhangmoq gi, she ló rá ahkáng byí kat akô nghut ri. ⁷ Yhangnhik, logúng zo haú lé Yesuq chyáng she jé lo é hkún, logúng hau é gùng htoq má, yhangmoq é buhîng pé buí jáng, hau é ahtoq má, Yesuq doq jí ri. ⁸ Byù myo myo gi, yhangmoq é buhîng pé lé, hkyô má hkyut hkang byí akô; ra-am gi, yò pé má zân yu é mhandíng lé hkang byí akô nghut ri. ⁹ Hí má so bang eq htâng má châng é bang gi,

"Hosana!"

Haú Yhumsîng é myîng mai jé lé lô Sû gi, hkungsô wó nyí sháng gaq ô!

¹⁰ Jé lé lô rá nghut é, nga-nhûng é íwa Dawiq é mingdán gi, hkungsô wó nyí sháng gaq ô!

Htoq tsáng myhâng má hosana nghut sháng gaq ô!"[✱]
ga luí, taí garû bum akô nghut ri.

¹¹ Yesuq gi, Yerusalem wá mó má jé mù, noqkuq yhûm má wang é luí, lhîngkyuq má é jung hkangmó

lé wú ri; nghut kôlhang, buí gyum ló bê nghut é yanmai, Yhâng é chángzo raxe í yuq eq rahá, Behtani wá shut htoq é ló bekô nghut ri.

Maihpáng Gâm Ashi A Zui Râ Matú Tai É Hkyô

Mht 21:18-19

¹² Hau htang nyí, yhangmoq, Behtani wá mai htoq ló kô é hkún, Yesuq gi, zo mut bê nghut ri. ¹³ Yhang gi, ahaq wúm é maihpáng gâm ragâm lé, we we mai byu-myang kat jáng, agâm haú má ashí zuí lhê laq ga é jé wú le, ahaq mai lai luí, haí le a myàng nghut ri. Haí mù gà le, maihpáng-shi zuí yâm a nghut é yanmai nghut ri. ¹⁴ Haú mù, Yesuq gi, shigâm haú lé, "Ahkuí mai gi, náng chyáng mâ é ashí, ó yuq le a myàng zo lo kó sháng gaq." ga taí ri. Yhâng é chángzô pé gi, haú su ga taí é dang lé wó gyô yu akô nghut ri.

Yesuq, Noqkuq Yhûm Lé Lhoq Sansêng Pyâm É Hkyô

Mht 21:12-17; Luk 19:45-48; Yhn 2:13-22

¹⁵ Yhangmoq, Yerusalem wá mó má jé é hkún, Yesuq gi, noqkuq yhûm má wang é mù, haú má é zè ung zè wuì kut nyi é bang lé, hkat htoq pyám luí, ngùn htaí zo bâng é siboí pé eq hpûngkyui ung zo bâng é tanghkuq pé lé tu mhuq pyám byí ri. ¹⁶ Hau htoq agó, Yhang gi, ó yuq lé nghut kôle, ung zè lé noqkuq yhûm mai a waq lai nhâng kut pyâm ri. ¹⁷ Yesuq, yhangmoq lé mhogshít é gi,

""Ngá yhûm gi, byù myû lhunglhâng bâng é matú, kyûdung yhûm ga rá nghut lhê."[✱]

ga kâ tô é a nghut kó lú? Nghut kôlhang, nungmoq gi, 'damaq hkyûng' kut pyám bekô nghut ri." gâ ri.[✱]

* **11:9** Hebre dang má, hosana gâ é gi, "ahkuí hkyi yù laq" gâ é nghut lhê. Nghut kôlhang, bun zo 9, 10 má gi, hkya-on dang dông chung é nghut lhê. ✱ **11:10** Hkya-on 118:25-26 ✱ **11:17** Esai 56:7 ✱ **11:17** Yer 7:11

¹⁸ Hkyangjong agyi pé eq tará sará pé gi, haú lé wó gyo kômù, Yhang lé hkâsu kut wó sat pyám râ hkyô ho nyi akô; nghut kôlhang, shiwa byu pé gi, Yhang mhoqshit é hkyô má, myit zing zuq bùm kô é yanmai, yhangmoq gi, Yhang lé gyuq bum akô nghut ri.

¹⁹ Myinhtâng jé jáng, Yesuq eq Yhâng é chángzô pé gi, wà hkaú mai htoq ló bekô nghut ri.

Maihpáng Gâm Nyhuí Shi Byuq É Hkyô

Mht 21:20-22

²⁰ Htang napkyó, yhangmoq sô lai ló le, maihpáng gâm gi, amyit mai yhang nyhuí kyuq shi byuq é lé myang akô. ²¹ Petruq gi, myit bûn kat lui, "Rabai ê, wú aq! Nang nhing pyâm é maihpáng gâm gi, nyhuí shi byuq bê nghut ri." ga lui, Yesuq lé tai ri.

²² Haú hkûn, Yesuq gi, "Garai Gasang lé lumjîng keq. ²³ Ngò, nungmoq lé teng za tai kôlé, ó yuq nghut kôle, i-myit má úng-âng é hkyô a bo é za, yhumsîng tai é hkyô gi, dut lò râ nghut lhê ga lumjîng kô é nghut le gi, bùm shí lé, 'Htot mù, wuimau má ló gyó wâng aq.' ga tai le lháng, haú hkyô dut byi râ nghut lhê. ²⁴ Haú mù lui, Ngò, nungmoq lé tai kôlé, nungmoq hai dúng le le wó yû râ nghut lhê nghû lumjîng kô é nghut le gi, wó yû kó râ za nghut lhê. ²⁵ Mauhkûng htoq mâ é nungmoq é Íwa gi, nungmoq é mara lé hkyut pyám byi sháng gaq, nungmoq gi, kyúdúng yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyám byi keq; ²⁶ (Nghut kôlhang, nungmoq mai mara a hkyut pyám byi é nghut le gi, mauhkûng htoq mâ é nungmoq é Íwa le, nungmoq é mara lé hkyut pyám byi râ a nghut.)" ga tù tai ri.†

Yesuq É Ahko Ahkáng Lé Myí Chyam É Hkyô

Mht 21:23-27; Luk 20:1-8

²⁷ Yhangmoq, Yerusalem wà mó má dum jé mù, Yesuq gi, noqkuq yhûm wàng hkaú má sô yông wún é u lé, hkyangjong agyi pé, tará sará pé eq suwún wui gi, Yhâng chyáng lé jé kômù, ²⁸ "Hai ahko ahkâng èq, Nang, shí pé lé kut nyi lhê lhú? Haú su kut râ ahko ahkáng, Nang lé ó yuq byi é lhú?" ga myí akô.

²⁹ Haú jáng, Yesuq gi, "Ngò le, nungmoq lé rajung myí wú kôlé, tù tai wú keq; haú hkûn, hai ahko ahkâng èq, Ngò, shí pé kut é hkyô lé tai kyo râ nghut lhê. ³⁰ Yohan byi é baptilma gi, mauhkûng mai lhú? A nghut jáng, byu chyáng mai lhú? Tai wú keq!" ga tù myí kat ri.

³¹ Haú hkûn, yhangmoq chôm hpyê lhum kô é gi, "Mauhkûng mai nghut lhê' nghû nga-nhúng tai jáng le, 'Haú nghut le nhing, hai mù, yhang lé a lumjîng kô é lhú?' ga râ nghut; ³² 'Byu chyáng mai nghut lhê.' nghû jáng le..." gâ ri. (Yohan gi, myiqhtoi rayuq gè gè nghut lhê ga, lhunglhang bang lumjîng bùm kô é yanmai, yhangmoq gi, haú byu pé lé gyuq bum akô nghut ri.)

³³ Haú mù, yhangmoq gi, Yesuq lé, "Ngamoq a sé." ga tù tai akô.

Haú hkûn, Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a tai kyo." ga, yhangmoq lé tai ri.

12

Tsibiyiq Hkyâm Saí Bang Lé Dangtú Yu É Hkyô

Mht 21:33-46; Luk 20:9-19

¹ Hau htâng, Yesuq, dangtú dông yhangmoq lé tai é gi, "Byú rayuq gi, tsibiyiq hkyâm rahkyam saí to mù, lhíngkyuq kyâm to lui, tsibiyiq wing pyik htoq râ dongkong dû to mù, machya ralhum saí tô ri.

† 11:26 Bun zo shí gi, Chyúmlaiká ra-am má za bo lhê.

Hau htâng, yhang gi, hkyâm haú lé, hkyâm saí zo bâng chyáng ngho byí to mù, gó ming shut e ló byuq bê nghut ri. ² Kyôshu yoq jé jáng, yhang gi, yhang yù âng é tsibiyiq shi ê yù rà matú, dui-nhâng zoshâng rayuq lé, hkyâm saí zo bâng chyáng nhang kat ri. ³ Nghut kôlhang, haú bang gi, haú yuq lé lhom chyup bat luí, loq kôm taú nhang kat akô. ⁴ Haú mù, yhang gi, gotú dui-nhâng zoshâng rayuq lé, yhangmoq chyáng dum nhang kat ri; yhangmoq gi, haú yuq lé le, ulhum má lhom bat cheq byi kôluí, hoq lhoq hpû kat akô nghut ri. ⁵ Hau htâng, rayuq lé dum nhang kat jáng, haú yuq lé gi, lhom sat pyám akô; Yhang gi, góbang myo myo lé le, yhangmoq chyáng nhang kat ashí nghut ri; yhangmoq kúm gi, ra-am lé lhom bat, ra-am lé lhom sat pyám, kut akô nghut ri.

⁶ Ló htáng má, yhang gi, yhang chyitdap é zo lé nhang kat rá za ru nghut alô; haú mù, yhang gi, 'Ngá zo lé gi, yhangmoq lhom hkungga kó rá nghut lhê.' ga, yhangzo lé nhang kat ri.

⁷ Nghut kôlhang, haú bang gi, 'Shí yuq gi, silí wunlí sing yù rà sù nghut lhê; lé keq, yhang lé sat pyám sháng, haú jáng sheq, silí wunlí pé lé nga-nhúng wó yù rà nghut lhê.' ga rayuq eq rayuq taí lhúm bum akô. ⁸ Haú mù, yhang lé chyup yù luí, sat pyám mù, hkyâm shinggan shut dú htoq pyám akô nghut ri.

⁹ Haú jáng, tsibiyiq hkyâm yhumsîng gi, yhangmoq lé hkâsu kut rá lhú? Yhang gi, ê mù, haú hkyâm saí zo bang lé sat pyám luí, hkyâm haú lé, góbang lé htot ngho byí pyám rá nghut lhê.

¹⁰ Chyúmdang má,

'Yhúm saí bâng eq hkyin htoq pyám é luqgok gi, htungchyûn má é ahkyak dik é luqgok dut bê.

¹¹ Shí hkyô gi, haú Yhumsîng kut é nghut luí, nga-nhúng é myoq hí má mauhoq dut bê nghut ri.' ga bò tô é lé, nungmoq a nghap wú kó lhú?"^{*}

gâ ri.

¹² Hau htâng, yhangmoq gi, dangtú haú, yhangmoq lé lhoq ang luí taí é hkyô lé, sé kô é yanmai, Yhang lé chyup yù rà matú hkyô ho nyi akô. Nghut kôlhang, yhangmoq gi, byù moq mó lé gyuq kô é yanmai, Yhang lé nyhi pyám to luí, htoq ló byuq bekô nghut ri.

Kehtaq Lé Kang Kat Byí É Hkyô Mht 22:15-22; Luk 20:20-26*

¹³ Hau htâng má, yhangmoq gi, Yesuq é dang má mara hô luí Yhang lé chyup yù rà matú, Hparishe pé ra-am eq Herut é byu pé ra-am lé, Yesuq chyáng nhang kat akô.

¹⁴ Haú bang gi, Yhâng chyáng lé jé kômù, "Sarâ ê, Nàng gi, tengmán sù nghut é lé, ngamoq sê lhê. Nàng gi, ó haí ga rá lé le haí su a ngàm sù nghut é yanmai, ó yuq é myoqdong lé le a tê byí é za, Garai Gasâng é hkyô lé, tengmán é dông mhoqshit é sù nghut ri. Haú mù, Kehtaq lé kang kat byí le gi, ge lhê lhú? ¹⁵ Ngamoq kat ra rá lhú? A kat ra rá lhú?" ga Yhang lé taí akô.

Yesuq kúm gi, yhangmoq, gegùn labyoq kut nyí kô é lé sé mù, "Nungmoq gi, haí mù, Ngo lé lé chyam wú akô lhú? Denari ngùn rachap yu lé keq, ngò wú wú bá." ga taí kat ri. ¹⁶ Haú hkûn, yhangmoq yu jé lô jáng, Yhang gi, "Shí má, ó yuq é alhô eq masat laiká dap tô ri lhú?" ga myí ri.

Yhangmoq gi, "Kehtaq é nghut ri." ga tú taí akô.

¹⁷ Haú mù, Yesuq gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taí jáng,

* 12:11 Hkya-on 118:22-23 * 12:12 Kehtaq gâ é gi, "hkoséng" gâ é nghut lhê.

yangmoq gi, maú byuq bùm bekô nghut ri.

Saduke Pé, Yesuq Lé Myî Chyam É Hkyô

Mht 22:23-33; Luk 20:27-40

¹⁸ Haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myî akô. ¹⁹ Yangmoq myî kô é gi, "Sarâ ê, myiwe wó é byu rayuq gi, zo dù a dap é za shi byuq é nghut jáng, yanggu gi, yangmang é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kâ to byî ri. ²⁰ Hí hpyang lé, gumang nhiktâng wui nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. ²¹ Lanong yuq gi, yangmang mó é chui lé gon mù, zo dù a dap é za shi ló byuq bê. Lalaq yuq le, haú eq rajung za dut byuq bê nghut ri. ²² Haú nhiktâng wui nyhit yuq gi, zo dù a dap é chyat shi ló byuq bùm bekô nghut ri. Htâng má, myiwe myhí haú le châng shi ló byuq bê nghut ri. ²³ Haú mù luí, haú dum dui toq é buinyi má, myiwe myhí haú gi, hká yuq é yangmyi nghut râ lhú? Hkâsu mù gâ le, yang gi, haú nyhit yuq é yangmyi dut wú bê sú nghut ri." gâ akô.

²⁴ Yesuq gi, yangmoq lé, "Nungmoq hkyô nghoq é gi, Chyúmdang eq Garai Gasang é wum-o a-tsam lé, a sé kô é yanmai nghut lhê, a nghut kó lhú? ²⁵ Haú shi byuq bê bang dum dui toq é hkûn gi, myi byi myi yù hkyô joq lo râ a nghut; yangmoq gi, mauhkúng htoq má é maumang lagyô pé su dut byuq kó râ nghut lhê. ²⁶ Shi é mai dum lhoq dui toq é hkyô eq séng luí, Mosheq kâ tô é laiká má lháng, haú nyé duq nyi é mhanpúng mai, Garai Gasang gi, yang lé, 'Ngò gi, Abraham é Garai Gasang, Isak é Garai Gasang,

Yakup é Garai Gasang nghut lhê. ²⁷ ga ká tô é lé, nungmoq a nghap wú kó lhú? ²⁷ Garai Gasang gi, shi bê bâng é Garai Gasang a nghut, dui nyi bâng é Garai Gasang sheq ru nghut lhê. Nungmoq gi, shut dik bekô nghut ri." ga tâi ri.

Ahkyak Dik É Jep É Tarâ

Mht 22:34-40; Luk 10:25-28

²⁸ Tarâ sarâ rayuq gi, lé lô mù, yangmoq tâi htíng lhum nyi kô é lé, lé wó gyô ri. Yang gi, haú bang lé, Yesuq rago tú tai nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê lhú?" ga myî ri.

²⁹ Haú jáng, Yesuq gi, "Ahkyak dik é jep é tarâ gi, 'Israelaq byu pé ê, gyo wú keq! Nga-nhúng é Yhumsíng Garai Gasang za, Garai Gasang nghut lhê. ³⁰ Haú Yhumsíng náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq, náng é wum-o banshoq eq, chyitdap râ lhê. ³¹ gâ é nghut lhê. ³¹ Hau htang lhum gi, 'Náng gùng lé nàng chyitdap é su, náng é chyangnâm mâ é bang lé le chyitdap aq. ³² gâ é nghut lhê. Shí í lhum htoq kô é tarâ gotû a joq lo." ga yangmoq lé tú tai ri.

³² Haú hkûn, tarâ sarâ haú yuq gi, "Gyo naú bê, Sarâ ê! Garai Gasang rayuq za nghut lhê, gotû a nyi lo ga nàng tai é gi, têng ri. ³³ Garai Gasang lé, náng é myit nhiklhum banshoq eq le, náng é sê gyo é nyan banshoq eq le, náng é wum-o banshoq eq le, chyitdap râ lhê gâ é eq, náng gùng lé nàng chyitdap é su, náng é chyangnâm mâ é bang lé le chyitdap râ lhê gâ é gi, myi nyhé hkungga eq gotû hkungga pé banshoq htoq má, je ahkyak lhê." ga tâi ri.

³⁴ Yesuq gi, yang hpaqchyí bo é đông tú tai nyi é lé myàng jáng,

"Nàng gi, Garai Gasâng é mingdán eq a we lo nghut ri." ga yhang lé tai kat ri. Haú hkûn mai gi, ó yuq le, Yhang lé dangmyi a wám myi lo kó nghut ri.

Hkrisduq Gi, Ó Yuq É Yhangzo?
Mht 22:41-46; Luk 20:41-44

³⁵ Yesuq, noqkuq yhûm má mhoshit nyi é hkûn lé tai é dang gi, "Haú mù, haú tarâ sará pé gi, Hkrisduq lé, Dawiq é yhangzo za nghut lê gâ akô lúhú? ³⁶ Dawiq gi, Chyoiyung Woi-nyí eq tai nhang é má, 'Haú Yhumsing Garai gi, ngá é Yhumsing lé, "Ngò, náng é gumlau gye pé lé,

náng é hkyiwa ô má tô pyâm é hkying jé shoq, Ngá é loqyo hkyam shut zung nyi shi aq." ga tai ri.^{*}

gâ ri. ³⁷ Haú mù, Dawiq yhang lhang, Hkrisduq lé, Yhumsing gâ é nghut le gi, yhangzo za hkâsu ge nghut râ lúhú?" gâ ri.

Byù hpûng mó gi, Yhâng é dang lé, gabú myit eq gyô nyi bum akô nghut ri.

³⁸ Yesuq gi, mhoshit uchang tai é má, "Tarâ sará pé lé sidiq nyi keq. Yhangmoq gi, réng é buhng wut chûng mù, sô yông wún lui, gai pé má lhom shi-kyâm yù râ lé le, ³⁹ tarajong pé má é ahkyak dik é zung jang pé eq poi pé má é réng é zung jowó pé má myang zung râ lé le, ô nau nyi bum akô.

⁴⁰ Yhangmoq gi, chuimó pé é yhûm-yò pé lé hpyoq zo hpyoq shuq kôluí, kyû hing hing dúng shit mhaú é bang nghut akô. Haú su é bang gi, dam byí é je riyhang hui zo kó râ nghut lê." gâ ri.

Chuimó Myhi Kat É Alu Ngùn
Luk 21:1-4

⁴¹ Yesuq gi, alu sidek nàm má zung to mù, noqkuq yhûm má é alu sidek haú má, byù moq mó ngùn kat nyi é lé wú nyi ri. Sút wó bang

myo myo gi, ngùn ga-myhó myhó kat bum akô. ⁴² Haú hkûn, myung é chuimó myhi rayuq gi, lé mù, gyi htingchap ngùn zo í chap lé kat ri.

⁴³ Yesuq gi, Yhâng é chángzô pé lé wut yù mù, "Ngò, nungmoq lé teng za tai kôlé, shí myung é chuimó myhi gi, góbang banshoq htoq má je myo kat bê nghut ri. ⁴⁴ Haú góbang banshoq gi, yhumsing agùn agó wó é mâ é lé, lé kat akô; yhang kúm gi, myung sú nghut kôle, yhâng é asak lé baú râ ngùn banshoq lé, kat bê nghut ri." ga tai ri.

13

Ló Htâng Buinyi Má Dut Lò Râ Hkyô

Mht 24:1-21, 29-35; Luk 21:5-33

¹ Yesuq, noqkuq yhûm mai htoq ló é hkûn, Yhâng é chángzo rayuq gi, "Sará ê, wú aq; hkâ-í ko é luq-gok pé! Hkâ-í hkik é yhûm pé!" ga Yhang lé tai kat ri.

² Haú hkûn, Yesuq gi, "Nàng, yhûm mó shí pé lé myang lê a nghut lúhú? Luqgok shí pé gi, rachâm htoq racham lhang a kê lhum loshoq, hpyoq hpyi pyâm é hui râ nghut lê." gâ tù tai ri.

³ Yesuq gi, Tsanlun Bùm má, noqkuq yhûm shut hû mù zung tô é hkûn, Petruq, Yakuq, Yohan eq Andre pé gi, Yhâng chyáng lé jé kômù, ⁴ "Haú hkyô pé gi, hkâ-nhâm dut lò râ lúhú? Haú dut lò râ hkûn, hkâsu é kumlhá htoq lô râ nghut lê lúhú? Ngamoq lé tai kyô wú laq." ga Yhang lé baú myi akô nghut ri.

⁵ Haú mù, Yesuq gi, yhangmoq lé, "Nungmoq lé, ó yuq eq le a wó shuí ngoq sháng gaq, sidiq nyi keq. ⁶ Hkâsu mù gâ le, 'Ngò gi, haú yuq* nghut lê.' ga, Ngá mying lé llang é byù myo myo pô htoq lô mù, byù myo myo lé shuí ngoq kó râ nghut lê. ⁷ Nungmoq gi, majan dut nyi é hkyô eq majan eq sêng é danglám

* 12:36 Hkya-on 110:1 * 13:6 Haú yuq gâ é gi, Hkrisduq lé gâ é nghut lê.

pé lé, wó gyo kôjáng, hkâgyuq dàn kó. Haú hkyô pé gi, dut lò râ za nghut lhê; nghut kôlhang, lò htâng é buinyi gi, a nghut shi. ⁸ Byù ramyû eq ra-myû, mingdán ralhüm eq ralhüm majan zân lhum lò kó râ nghut lhê. Jowò myo myo má, layàng nún é, mutmó gyó é pé dut lò râ nghut lhê. Haú pé gi, wuîhke jamjau hkyo é apûn awang za ru nghut ashî.

⁹ Nungmoq gùng nungmoq sidiq nyi keq. Hkâsu mù gâ le, yhangmoq gi, nungmoq lé, tarâ rûng pé má é ap pyám kó râ nghut é htoq agó, tarajong pé má nungmoq lé nhuq bat kó râ nghut lhê. Hau htoq agó, nungmoq gi, Ngá mying é yanmai, mauzau wuî eq hkohkam pé é hí má, saksé dông yap ra kó râ nghut lhê. ¹⁰ Haú gabú danglù gi, amyû banshoq lé hí hko kyo ra râ nghut lhê. ¹¹ Nungmoq gi, chyup yu é hui luî, jep huî é hkûn, haî taî râ lé, hkâ-myit chiq kó. Ahkyíng jé jáng, nang lé myit htoq lô nhang é dong za taî aq; hkâsu mù gâ le, dang haú pé gi, nungmoq taî é a nghut, haú Chyoiyúng Woi-nyî eq taî nhang é ru nghut lhê.

¹² Nhiktâng gi, nhiktâng yhangchang, îwa gi, yhangzo lé, shî shoq ap pyâm lhum kó râ nghut lhê; zo wuî gi, mó wuî lé gumlau toq mù, sat pyám nhâng kó râ nghut lhê. ¹³ Byù lhunglhang bang gi, Ngá é yanmai, nungmoq lé a nguî kut kó râ nghut lhê; nghut kôlhang, jîhtûm jé shoq wó hkam jân nyi é sù gi, hkyi yu é hui râ nghut lhê.

¹⁴ 'Haú lhoq hten lhoq hpyoq é achag achyut hkyô^{*} gi, yhang a nyi âng é jowò má yap tô é lé, nungmoq myáng kôjáng (laiká nghap é sù gi, sê gyo sháng gaq), Yuda mau má nyi é bang gi, bùm pé shut hpang doq ló kó sháng gaq. ¹⁵ Yhumhkûng htoq má nyi tô é sù gi, yhúmhaú má é zè haî lé le, a ló gyó wang

yù lo sháng gaq. ¹⁶ Yò má nyi tô é sù gi, yhâng é buhîng lé a ló taú yu nyi lo sháng gaq. ¹⁷ Haú buinyi pé má, zogùng dut é myiwe wuî eq naú huq ashî nghut é înu wuî gi, hkâ-í yhang wuîhke bekó nghut ri myhi-nhung. ¹⁸ Haú hkyô gi, gyoqmyò má a dut sháng gaq, kyûdûng nyi keq. ¹⁹ Hkâsu mù gâ le, Garai Gasang, mingkan lé hpan tô é hkûn mai ahkuî jé shoq, hkâ-nhâm le a dut wú shî é wuîhke jamjau mó gi, haú buinyi pé má dut lò râ nghut lhê; haú su é hkyô gi, htângnùng má hkâ-nhâm le dum dut lò râ a nghut. ²⁰ Buinyi haú pé lé, haú Yhumsîng Garai mai a lhoq shaú é nghut le gi, ó yuq le asak wó lut râ a nghut. Nghut kôlhang, Yhang hkyin yù bê nghut é, hkyin yù hui bâng é matú gi, buinyi haú pé lé, Yhang lhoq shaú pyám byi bê nghut ri. ²¹ Haú ahkyíng má, byù rayuq yuq mai, nungmoq lé, 'Wú keq, shî má Hkrisduq nyi ri.' ga le, 'Wú keq, Yhang hê má nyi ri.' ga le, taî jáng, nungmoq hkâjîng kó. ²² Hkâsu mù gâ le, Hkrisduq apyoq pé eq my-íqhtoi pyoq pé pò htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá pé eq laklaî kumlhá pé lé kut shit kó râ nghut lhê. ²³ Haú mù, nungmoq sidiq nyi keq; ahkyíng a jé shî mai, ngò, nungmoq lé, jung hkangmó taî kyô nyi gù nghut lhê.

²⁴ Buinyi haú pé má, wuîhke jamjau haú pé lai é htâng,

'Buî gi, noq byuq mù, lhamó gi, a tsò dut byuq râ nghut lhê;

²⁵ kyî pé gi, mauhkûng mai byit gyó lo bùm mù, mauhkûng má é wum-o a-tsam pé gi, lhoq nhûn é huî bùm kó râ nghut lhê.^{*}

²⁶ Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shingkan eq le, gyó lé lo é lé, byu pé byu-myáng

kó rã nghut lhê. ²⁷ Hau htâng má, Yhang gi, Yhâng é maumang lagyô pé lé nhang kat mù, maumyí chyún hkangmó eq myigùng htum shoq, mauhkùng htáng shoq mai, Yhang hkyin yu tô é bang lé shuú tsing yú nhâng rã nghut lhê.

²⁸ Maihpáng gãm lé wú mù, mhoq yú keq; agãm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê. ²⁹ Haú eq rajung za, shí hkyô pé dut nyi é lé, nungmoq myàng kôjáng, Yhang gi, chyâng bê nghut mù, hkúmdong má lháng nghut nyi bê hkyô lé, nungmoq sé lo keq. ³⁰ Ngò, nungmoq lé teng za taí kôlé, shí pyat má é byu pé a ban shi byuq shimá, haú hkyô pé banshoq dut byuq rã nghut lhê. ³¹ Mauhkùng eq myigùng gi, a joq lo dut byuq rã nghut lhê; nghut kôlhang, Ngá é dang gi, ru joq nyí rã nghut lhê.

Haú Buinyi Eq Ahkyíng Lé, Ó Le A Sé

Mht 24:36-44

³² Buinyi eq ahkyíng haú lé gi, ó yuq le a sé; mauhkùng htoq má é maumang lagyô pé lháng a sé; haú Zo le a sé; haú Íwa za ru sê lhê. ³³ Haú mù, nungmoq gi, ahkyíng haú hkâ-nhám jé rã lé, a sé kô é yanmai, sidiq nyi keq! Machya nyi keq! ³⁴ Haú gi, byú rayuq, yhâng é dui-nhâng zoshâng wui lé, ó le ó eq sêng é mú lé gãm byi to mù, hkum zúng sù lé le, machya nyi rã matú pying to luí, yhâng yhúm lé, haú dui-nhâng zoshâng wui chyáng ap pyám to mù, byin we shut htoq ló byuq é sù eq pung ri.

³⁵ Haú mù, haú Yhumsing hpó gi, myinhâng laq, myín gunggãm laq, woqtún hkun laq, maubó zó laq, hkâ-nhám jé lô rã lé nungmoq a sê kô é yanmai, sidiq machya nyi keq. ³⁶ Haú a nghut jáng, Yhang, dàn loq tung tau jé lo é hkùn, nungmoq

yhup myhí tô é lé, lo myang pyám rã nghut lhê. ³⁷ Ngò, nungmoq lé, 'sidiq machya nyi keq,' nghú taí é eq rajung za, yuq hkangmó lé le, taí é nghut lhê." ga taí ri.

14

Yesuq, Xú But Byi Huí É Hkyô
Mht 26:1-16; Luk 22:1-6; Yhn 11:45-53; 12:1-8

¹ Ahkuí, haú Lhoqlhai Poí eq múnchi a kat é Muk Zo Poí jé rã í nyí za ru ra alô hkùn, hkyangjong agyi pé eq tará sará pé gi, Yesuq lé hkâsu kut wó haq chyup yú mù, sat pyám rã matú, hkyô ho nyi akô nghut ri. ² Nghut kôlhang, yhangmoq gi, "Byu pé gabyông lô kó abe, poi gyoro má gi, a kut shí sháng." ga taí akô.

³ Yesuq gi, Behtani wà má nyi é manggãm dap wú sù Simún é yhúm, siboí má nghe zung tô é hkùn, myiwe myhí rayuq gi, nardu amyit mai za saí yu é, gyai hpaú é namngón xú bo é alabasta (luq hpyú) bông yu lé lô mù, bông haú lé llang hkyuí luí, namngón xú haú lé Yesuq é ulhum má hut gyun byi ri.

⁴ Haú má nyi tô é bang ra-am gi, wú nhik-yô é myit èq, rayuq eq rayuq taí lhum kô é gi, "Haí mù, namngón xú lé aha agó kut pyâm lhê laq? ⁵ Haú namngón xú lé, denari* súm sho èq ung luí, myùng bang lé byi le ge lhê mhaí!" gâ akô. Yhangmoq gi, myiwe myhí hau lé le, gyai chôm tân akô.

⁶ Nghut kôlhang, Yesuq gi, yhangmoq lé, "Myiwe zo haú lé, hkâtân nyi kó; haí mù, yhang lé i-myt lhoq myo nhang nyi akô lúh? Yhang gi, Ngá é ahtoq má ge é hkyô kut bê nghut ri. ⁷ Haú myùng bang gi, nungmoq eq rahá hkâ-nhám le nyi rã nghut lhê mù, nungmoq garúm nau é hkùn, yhangmoq lé wó garúm lhê. Nghut kôlhang, ngò gi, shí má nungmoq eq rahá ayang

* 14:5 Denari rachap gi, byú rayuq é ra-nyí lhê é zuihpau eq wuí ri.

nyi nyi râ sù a nghut. ⁸ Yhang gi, yhang wó dut é í kut bê nghut ri. Yhang, Ngá gûng má, namngón xù hut gyûn é gi, Ngá gûng lé yhum râ matú, hí hen lajâng tô é ru nghut lhê. ⁹ Ngò, nungmoq lé teng za taí kôlé, haú gabú danglù lé mingkan gón hko kyô é jowò hkangmó má, yhang lé myit bûn é dông, yhang kut é hkyô shî lé, taí kyo bekô râ nghut lhê." ga taí kyo ri.

¹⁰ Hau htâng, haú chángzo raxe í yuq má bo é Yudaq Iskarut gi, Yesuq lé ap pyám râ ga, hkyangjong agyi pê chyáng e ri. ¹¹ Haú bang gi, haú hkyô lé lhom wó gyo kôjáng, gyô gabú luí, yhang lé ngùn byi râ ga, danggidig byi akò. Haú mù, yhang gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mht 26:17-30; Luk 22:7-23; Yhn 13:21-30

¹² Haú htûngli joq é eq rajung za, Lhoqlhai Poí hkungga sauzo jau byi é, múnchi a kat é Muk Zo Poí sâng-hi nyí má, Yesuq é chángzô pé gi, Yesuq lé, "Nàng zo râ Lhoqlhai Poí lé, ngamoq hkâmá ê món to râ lhú?" ga myí akò.

¹³ Haú mù, Yhang gi, chángzo í yuq lé, "Nungnhik, myuq hkaú shut wang ló keq, wui yambú waq é byù rayuq lhom hui râ nghut lhê; haú hkûn, nungnhik gi, yhâng htâng cháng keq. ¹⁴ Haú yuq, wang ló é yhûm má é yhumsing lé, 'Ngò, Ngá é chángzô pé eq rahá, Lhoqlhai Poí lé zo râ bíng wap hkâmá nghut lhê lhú ga, Sará myí nhang kat ri.' nghú taí keq. ¹⁵ Haú hkûn, hen to gû nghut é, ahtoq má é wap mó lé lhom tûn shit râ nghut lhê. Wap haú má, nga-nhûng é matú ê hen to keq." ga taí luí, nhang kat ri.

¹⁶ Chángzo haú nhik gi, htoq e ló mù, myuq hkaú má wang e ló le, Yesuq taí kat é eq roq za é myâng kômù luí, Lhoqlhai Poí lé, món to bekô nghut ri.

¹⁷ Myinhâng jé lô jáng, Yesuq gi, haú chángzo raxe í yuq eq rahá, haú má lé jé bekô nghut ri. ¹⁸ Yhangmoq gi, siboí má nghê mù, zô nyi bùm kô é u lé, Yesuq gi, "Ngò, nungmoq lé teng za taí kôlé, Ngò eq rahá zô nyi é bang nungmoq má é rayuq sù gi, Ngo lé ap pyám râ nghut lhê." ga taí ri.

¹⁹ Haú hkûn, yhangmoq gi, gyô yón kômù, rayuq htâng rayuq, "Ngò, a nghut hkai?" ga Yhang lé myí akò.

²⁰ Haú hkûn, Yhang gi, "Haú yuq gi, haú raxe í yuq má é rayuq nghut lhê. Ngò eq rahá, hkoq shí má muk jùmzo sù nghut lhê. ²¹ Haú Byu Yhangzo gi, Yhang eq séng luí ká tô é eq rajung za, shí râ za nghut lhê. Nghut kôlháng, haú Byu Yhangzo lé ap pyám é sù gi, dingnyé wó ri; haú yuq gi, a hku lé le lháng, je ge ri.

²² Yhangmoq zo nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shî gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byi ri.

²³ Hau htâng, Yhang gi, góm lé le, yù mù, jeju hkya-on luí, yhangmoq lé byi ri; yhangmoq banshoq bang gi, haú lé yù shuq akò nghut ri.

²⁴ Yesuq gi, yhangmoq lé, "Shî gi, byù myo myô é matú htoq pyám é, dangshikaq eq séng é Ngá sui nghut lhê. ²⁵ Ngò, nungmoq lé teng za taí kôlé, Ngò, Garai Gasâng é mingdán má, tsibiyiq wing asik lé shuq é buinyi a jé jé, tsibiyiq wing lé dum shuq râ a nghut lo." ga taí ri.

²⁶ Yhangmoq gi, hkya-on mahkôn ralhúm ban hkôn jáng, Tsanlun Bùm shut htoq e ló bekô nghut ri.

Petruq He-ngik Râ Hkyô Lé, Te Taí É Hkyô

Mht 26:31-35; Luk 22:31-34; Yhn 13:36-38

²⁷ Yesuq gi, yhangmoq lé, "Nungmoq lhunglhâng bang gi, myit lingbat kó râ nghut lhê; hkâsu mù gâ le,

'Haù sau zúng sù lé, Ngò bat sat pyám mù, sau pé gi, lhoq pyo pyám é hui kó rà nghut lhê.'^{*} ga kâ tô ri. ²⁸ Nghut kôlhang, Ngò gi, lhoq duì toq é huì htâng má, Galile mau shut, nungmoq é hí má e ló láng rà nghut lhê." ga taì ri.

²⁹ Haù hkùn, Petruq gi, "Góbang banshoq myit lingbat kôlhang, ngò gi, myit lingbat rà a nghut." ga taì kat ri.

³⁰ Haù mù, Yesuq gi, "Ngò, nàng lé teng za taì lé, hkù-nyí, hkù-myín yhang jáng, woq í dâm a tún shimá, nàng, Ngo lé sum dâm he-ngik pyám rà nghut lhê." ga tũ taì ri.

³¹ Nghut kôlhang, Petruq gi, "Ngò, Nàng eq rahá shí rà dut kôlhang, Nang lé ngò he-ngik pyám rà a nghut." ga zuq zuq taì ri. Góbang banshoq le, haù su ga châng taì bum akò nghut ri.

Get-samane Gâ é Jowò Má Kyûdûng É Hkyô

Mht 26:36-46; Luk 22:39-46

³² Yhangmoq gi, Get-samane gâ é jowò má jé ló kômù, Yesuq gi, Yhâng é chángzô pé lé, "Ngò, kyû é dúng nyi é u lé, shí má zùng láng keq." ga taì ri. ³³ Yesuq gi, Yhang eq rahá Petruq, Yakuq, Yohan pé lé, shuí chùng ri. Haù hkùn, Yhang gi, myit gyai a ngón é eq myit wuìhke é hui mù, ³⁴ yhangmoq lé, "Ngò gi, shí rà í yhang myit yón nyi ri; nungmoq gi, machyâ luí, shí má láng nyí keq." ga taì ri.

³⁵ Yesuq gi, haù mai ratsuí zo sô é mù, myigùng má gop byên to luí, ahkyíng haù lé ge lhoq lhai pyám byí le gi, Yhâng chyáng mai lhoq lhai pyám byi rà matú, ³⁶ "Aba, † Áwa ê, Nang gi, haì le wó dut é Sù nghut lhê. Góm ‡ shí lé, Ngá chyáng mai yu pyám byi laq. Nghut kôlhang, Ngò ô nau é đông a nghut, Nang ô nau

é đông sheq nghut sháng gaq." ga kyûdúng ri.

³⁷ Hau htâng, Yhang gi, Yhâng é chángzô pé chyáng dum taù lo le, yhangmoq yhup myhí to kô é lé lo myang ri. Haù mù, Yhang gi, Petruq lé, "Simun, nàng yhup ngón nyi lhê lú? Razup za lhang a wó machya nyi lú? ³⁸ Gunglaú é a hui sháng gaq, machyâ luí, kyûdúng nyi keq. Haù woi-nyí gi, kâm nyi kôlhang, gungsho gi, wum nyhôm nyi ri." ga taì ri.

³⁹ Yesuq gi, radàm dum ê mù, hí lé dúng é dang lé za, ê dung ri. ⁴⁰ Yhang dum taù lo le, yhangmoq gi, myoqkuq lai kô é yanmai, yhup myhí to láng kô é lé, lo dum myang ri. Yhangmoq gi, Yhang lé haì taì rà a sé dut byuq akò nghut ri.

⁴¹ Yesuq gi, sum dâm nghú rà lhang má, yhangmoq chyáng dum taù jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lú? Gé bê! Haù ahkyíng gi, jé bê nghut luí, haù Byu Yhangzo gi, yubak dap bâng é loq má ap pyám é hui rà nghut bê. ⁴² Toq keq! Ló losháng hkoi! Ngo lé ap pyám rà sù gi, jé lé lô bê nghut ri." ga taì ri.

Yesuq, Chyup Yú Huí É Hkyô

Mht 26:47-56; Luk 22:47-53; Yhn 18:3-12

⁴³ Yesuq, dáng nyo nyi ashí u lé, haù chángzo raxe í yuq má bo é Yudaq gi, haù hkyangjong agyi pé, tarâ sará pé eq suwún wui chyáng mai nhang kat é bang nghut é, shâm eq dumbáng pé chung tô é byú moq mó eq rahá jé lé lo ri.

⁴⁴ Yesuq lé ap pyám rà sù gi, yhangmoq lé, "Ngò bopuq puq é sù gi, haù yuq nghut bê; Yhang lé chyup yú mù, zúng shuí ló keq." ga kumlhá byí to bê nghut ri. ⁴⁵ Yudaq gi, Yesuq chyáng hkyê za ê mù,

^{*} 14:27 Zhk 13:7 † 14:36 Aba gâ é gi, Aramaik dang đông "Áwa" gâ é lichyúm nghut lhê.

‡ 14:36 Góm gâ é gi, Yesuq, jamjau hui rà hkyô eq shí rà hkyô lé, taì nau é nghut lhê.

"Rabai ê." ga taí luí, Yhang lé bopuq puq byí ri. ⁴⁶ Haú hkûn, yhangmoq gi, Yesuq lé chom zui zing mù, chyup yú bekô nghut ri. ⁴⁷ Haú mù, nàm má yap tô é byù rayuq gi, yhang é shâm lé she htoq yù mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁴⁸ Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chùng mù, lé lo akô lúhú? ⁴⁹ Ngò gi, nyí wuí, nungmoq eq rahá nyí luí, noqkuq yhùm má mhoqshit byí nyí kôlhâng, nungmoq, Ngo lé a chyup yú kô é nghut lhê. Nghut kôlhâng, Chyúmdang pé gi, dik ra râ nghut lhê." ga taí ri. ⁵⁰ Haú hkûn, haú chángzô pé gi, Yesuq lé tô pyâm to kôluí, hpang byo byuq bekô nghut ri.

⁵¹ Buhîng za wut é zorâm rayuq gi, Yesuq htâng cháng wún ri. Yhangmoq gi, haú yuq lé, wó kyaq zui kô é hkûn, ⁵² yhang gi, buhîng lé hkyut hkyô pyâm to mù, gùngchín hpang ló byuq bê nghut ri.

Yudaq Byìn Tú Wapdoq Má Jéyáng Huí É Hkyô

Mht 26:57-68; Luk 22:54-55, 63-71; Yhn 18:13-14, 19-24

⁵³ Yhangmoq gi, Yesuq lé, hkyangjong mó chyáng shuí e akô; haú hkyangjong agyi pé lhunglhâng bang, suwún wuí eq tarâ sará pé le, lé zup zing bum akô. ⁵⁴ Petruq gi, hkyangjong mó é yhumwàng hkaú má châng jé wâng shoq, we we mai Yesuq htâng châng tô ri. Yhang gi, haú má, zúng bang eq rahá, myihkyóm yâm má gyoq bang zung tô ri.

⁵⁵ Haú hkyangjong agyi pé eq Yudaq byìn tú wapdoq gón gi, Yesuq lé sat râ saksé hô kôlhâng, haí le a myàng kó nghut ri. ⁵⁶ Byù myo

myo gi, a têng é saksé hkám kôlhâng, yhangmoq é dang gi, a tsùng lhum kó nghut ri.

⁵⁷ Hau htâng, ra-am gi, toq yap mù, a têng é saksé hkám kô é gi, ⁵⁸ "Yhang gi, 'Byu loq èq saí é noqkuq yhùm shí lé, Ngò hpyoq hpyi pyám mù, sum nyí gyoro má, byu loq èq a saí é, gotú ralhum dum saí râ nghut lhê.' ga taí é lé, ngamoq wó gyô ri." ga akô. ⁵⁹ Nghut kôlhâng, yhangmoq é saksé gi, a tsùng lhum kó nghut ri.

⁶⁰ Hau htâng má, hkyangjong mó gi, yhangmoq é hí má toq yap mù, "Nàng, haí le a tú taí luq? Shí bang, Nang lé mara hun nyí é saksé gi, hká dông nghut lhê lúhú?" ga luí, Yesuq lé myí ri. ⁶¹ Nghut kôlhâng, Yesuq gi, jit le a ga nyi tô ri.

Haú mù, hkyangjong mó gi, Yesuq lé, "Nàng gi, hkungsô wó Su é yhangzo, Hkrisduq nghut lhê lúhú?" ga dum myí ri.

⁶² Haú hkûn, Yesuq gi, "Nghut lhê; haú ngò Byu Yhangzo gi, a-tsam bo dik Su é loqyo hkyamS má zung tô é lé le, mhuthtui ji mù, mauhkûng mai lé lo é* lé le, nungmoq myàng kó râ nghut lhê." ga taí ri.

⁶³ Haú hkûn, hkyangjong mó gi, yhang é bu lé lêng cheq pyám mù, "Nga-nhúng, hai saksé râ ashí lúhú? ⁶⁴ Yhang, Garai Gasang lé rhoi dang taí é lé nungmoq wó gyo bê nghut lhê. Nungmoq hkâsu wó myit akô lúhú?" ga myí ri; yhangmoq ban-shoq bang gi, shí gíng sù nghut ri ga, chom myit huí akô. ⁶⁵ Haú mù, ra-am gi, Yhang lé sôkan byé gyun é eq, myoq má nghop pyám byi luí, loqtsup èq htui byí lhê kut mù, "Nang lé ó yuq htui é, myiqhtoi htoí wú aq." ga taí akô. Haú zúng bang gi, Yhang lé shuí yù mù, nhuq bat akô nghut ri.

§ 14:62 Loqyò hkyam gâ é gi, ahko ahkáng wó é jowò lé gâ é nghut lhê.

* 14:62 Mhuthtui ji

mù, mauhkûng mai lé lo é gâ é gi, Danielaq 7:14 má bò lhê.

Yesuq Lé, Petruq He-ngik Pyâm É Hkyô

Mht 26:69-75; Luk 22:56-62; Yhn 18:1-18, 25-27

⁶⁶ Petruq gi, wàng hkaû má nyi tô é u lé, haû hkyangjong mó é dui-nhâng zoshâng myhí rayuq jé lé lo ri. ⁶⁷ Haû yuq gi, Petruq gyoq gang nyi é lé myàng jáng, yhang lé rago wú mù, "Nàng le, Nazaret wà byù Yesuq eq rahá nyi sù nghut ri." ga taí ri.

⁶⁸ Nghut kôlhâng, yhang gi, "Nàng taí é hkyô lé, ngò, sé le a sé, gyo le a sê gyo." ga he pyám luí, wàng hkúmdong shut htoq e ló bê nghut ri.†

⁶⁹ Dui-nhâng zoshâng myhí haû gi, Petruq lé, haû má dum myàng jáng, awui ayâm má yap tô é bang lé, "Shí yuq le, haû hpúng má lom é sù rayuq nghut ri." ga dum taí ri.

⁷⁰ Petruq gi, radàm dum he pyâm ri; hau htâng razup zo má, haû nàm má yap tô é bang gi, Petruq lé, "Nàng gi, Galile byù rayuq nghut é yanmai, haû hpúng má é byù rayuq hkyak nghut lhê." ga taí akô.

⁷¹ Haû hkún, yhang gi, yhanggùng yhang nhing luí, "Haû nungmoq taí é byù lé, ngò a sé." ga dakam ri.

⁷² Haû u yhang, woq radàm dum tun kat bê nghut ri. Haû mù, Petruq gi, "Woq í dâm a tún shimá, nàng, Ngo lé sum dâm he-ngik pyám râ nghut lhê." ga, Yesuq, yhang lé taí é dang lé, myit bûn kat mù, wum kat ngau ri.

15

Pilat Hí Má Yesuq Jé Nyi É Hkyô

Mht 27:1-2, 11-26; Luk 23:1-5, 13-25; Yhn 18:28-19:16

¹ Haû napkyó noq za má, hkyangjong agyi pé gi, suwún wui, tarâ sará pé, Yudaq byin tú wapdoq gón bang eq rahá kut, chôm bóng yú kômù, Yesuq lé tuí yú luí, shuí htoq

é kômù, mauzau Pilat chyáng é ap byi akô nghut ri.

² Pilat gi, Yesuq lé, "Nàng gi, Yudaq byu pé é hkohkâm nghut lhê lhú?" ga myi jáng, Yesuq gi, "Nàng taí é eq rajung za nghut lhê." ga, tú taí ri.

³ Haû hkyangjong agyi pé gi, Yhang lé mara gyai myo shoq chôm hun akô. ⁴ Haû mù, Pilat gi, Yesuq lé, "Wú aq, yhangmoq, nàng lé mara haû myhó hun nyi le, nàng, haí le a tú taí lhú?" ga myi ri.

⁵ Nghut kôlhâng, Yesuq gi, haí le a tú taí kut jáng, Pilat gi, maú byuq bê nghut ri.

⁶ Haû Lhoqlhai Poí u lé, mingbyù wui dúng é htóng byù rayuq yuq lé, mauzau mai lhaq lhoq htoq byi byi kut é htung joq ri. ⁷ Haû hkún, Barabaq gâ é byù rayuq gi, gumlau gabyông é hkún, byù sat é gumlau bang eq rahá, htóng gyó tô ri. ⁸ Byù hpúng mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi râ matú, dúng akô.

⁹ Haû mù, yhang gi, "Yudaq byu pé é hkohkâm lé nhang htoq kat byi râ lé, nungmoq ô nau akô lhú?" ga myi ri. ¹⁰ Pilat, haû su ga myi é gi, haû hkyangjong agyi pé, Yesuq lé manôn kôluí, yhang chyáng lé ap byi kô é hkyô lé sê é yanmai nghut ri.

¹¹ Nghut kôlhâng, haû hkyangjong agyi pé gi, Barabaq lé sheq nhâng byi râ matú, Pilat chyáng dung kó sháng gaq ga, haû byù moq mó lé i-myit lhoq toq byi akô.

¹² Pilat gi, "Haû jáng, nungmoq mai Yudaq byu pé é hkohkâm ga sù yuq lé, ngò hkâsuk kut râ lhú?" ga yhangmoq lé myi ri.

¹³ Haû hkún, yhangmoq gi, "Yhang lé tapzîng má jén sat pyâm aq." ga chôm garu akô.

¹⁴ Haû jáng, Pilat gi, "Haí mù luí lhú? Yhang haí kut shut bê lhú?" ga dum myi jáng, yhangmoq gi, htê

† 14:68 Chyúmding ra-am má Haû hkún jáng, woq tún bê nghut ri gâ é le bo ri.

mó èq, "Yhang lé tapzîng má jén sat pyám aq." ga je riyhang garú lo bum akô nghut ri.

¹⁵ Pilat gi, haû byù moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzîng má jén sat pyám râ matú, ap byi kat bê nghut ri.

Gyezô Pé Gi, Yesuq Lé Rhoi É Hkyô

Mht 27:27-30; Yhn 19:2-3

¹⁶ Gyezô pé gi, Yesuq lé, Pretori yhumwàng (mauzau hpô é yhumwàng) mó hkaû má shuí wang ló kômù, gyedap gón lé ji tsîng yu akô. ¹⁷ Hau htâng, yhangmoq gi, Yesuq lé buhîng nè radung hut byi mù, zujanmaú saî yù kôluí, Yhâng é ulhum má tsung byi akô. ¹⁸ Hau htâng, yhangmoq gi, "Yudaq byu pé é hkohkâm hpó é! Chyung hîng xê hing nyi sháng gaq ô!" ga wut garú akô. ¹⁹ Hau htoq agó, yhangmoq gi, Yhâng é ulhum má dumbáng èq adàm dàm bat kômù, sôkan byé gyun luí, Yhâng hí má hkyihput htuq mù, paî mhaû akô nghut ri. ²⁰ Yhangmoq gi, Yhang lé rhoi jihkyoi ban kut yù kôjáng, Yhang wut tô é buhîng nè lé hkyut yù kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e ló bekô nghut ri.

Yesuq Lé Jén Pyám É Hkyô

Mht 27:31-44; Luk 23:27-43; Yhn 19:17-27

²¹ Alesander eq Ruhpu nhiktang é yhângwa, Kuruni myuq byú nghut é Simun ga sù gi, yosô wà mai lò mù, haû jowò mai laí ló ri. Haû hkûn, gyezô pé gi, yhang lé, tapzîng waq nhang akô nghut ri. ²² Yhangmoq gi, Yesuq lé, Golgahta gâ é jowò má shuí e akô (Golgahta gâ é gi, ugyap joq é jowò lé gâ é

nghut ri). ²³ Hau htâng, yhangmoq gi, Yhang lé, mura* eq nyhò tô é tsi-byiq wing huq akô; nghut kôlhang, Yhang gi, a lhom shuq byi nghut ri. ²⁴ Hau htâng má, yhangmoq gi, Yhang lé tapzîng má jén tap to kôluí, Yhâng é mebu pé lé, hkyîn shosé shê mù, âng é dông gam yu pyám byi akô nghut ri.

²⁵ Yhangmoq, Yesuq lé tapzîng má jén tap pyám é hkûn gi, napkyó gau hkyîng nghut bê nghut ri. ²⁶ Hau htoq agó, Yhang lé mara hun é dông kê tap to kô é gi, "YUDAQ BYU PÊ É HKOHKÂM" gâ ri. ²⁷ Yhangmoq gi, damyaq í yuq lé le, Yhâng é loqyo hkyam shut rayuq, loqpaí hkyam shut rayuq kut, tapzîng htoq má jén tap tô akô nghut ri. ²⁸ (Haû gi, "Yhang gi, yubak dap bâng chyáng nghap lhôm é hui bê nghut ri."* gâ é Chyúmdang lé lhoq dik é nghut ri.)† ²⁹ Hkyô sô laí ló é bang gi, nyhap é dông u-ngut ngut mù, taí kô é gi, "Noqkuq yhûm lé hpyoq pyám luí, sum nyí gyoro má dum wó saí lhê ga Sù é! ³⁰ Náng gùng nàng hkyi yù luí, tapzîng mai gyó lò wú aq mhaí!" ga akô nghut ri.

³¹ Haû eq rajung za, hkyangjong agyi pé eq tarâ sará pé le, yhangmoq hkaû má, "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhi-nhung! ³² Nganhúng wó myâng mù, lumjîng râ matú, shî, Israelaq byu pé é hkohkâm, Hkrisduq gi, tapzîng mai gyó lo wú sháng gaq." ga, Yhang lé rhoi dang taí akô. Yhang eq rahá tapzîng má jén tap to huí é su nhik le, Yhang lé rhoi dang taí akô nghut ri.

Yesuq, Shi É Hkyô

Mht 27:45-56; Luk 23:44-49; Yhn 19:28-30

* 15:23 Mura gi, chi wó kut jung xù nghut lhê. chyúmding axau ra-am pé má za bo é nghut lhê.

† 15:28 Esai 53:12 † 15:28 Bun zo shí gi,

³³ Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri. ³⁴ Myinhâng sum hkyíng jé é hkûn, Yesuq gi, "Eloi, Eloi, lama sabakhtani."* ga, htê mó èq garû kat ri. Haú é lichyúm gi, "Ngá Garai ê, Ngá Garai ê, Nang, haí mù, Ngo lé tô pyâm tô lê lú?" ga é nghut ri.

³⁵ Haú nâm má yap tô é bang ram gi, haú lé wó gyo kôjáng, "Gyô wú keq. Yhang gi, myiqhtoí Eliyaq lé wut nyi ri." ga, tai akô.

³⁶ Haú hkûn, byù rayuq gi, din e ló mù, wuimaù lé tsibiyiq wíng chyín má jum yù luí, jàm-yang má tuí tap mù, Yesuq shuq sháng ga yhun byi luí, "Eliyaq gi, lé lô mù, Yhang lé lé lhoq hkyô yù abe, nganhúng chóm láng wú sháng." ga tai ri.

³⁷ Yesuq gi, htê mó èq garû kat luí, káng byit byuq bê nghut ri.

³⁸ Noqkuq yhûm mâ é pán-gyang gi, ahtoq mai a-ô í hkyam byáng dut byuq bê nghut ri. ³⁹ Yesuq é hí má yap tô é shô up gyezau hpó gi, Yesuq é garu htê lé wó gyo mù, Yhang hkâsu kut shi é lé myàng jáng, "Shí yuq gi, gè gè yhang, Garai Gasâng é Yhangzo nghut rinhung!" ga tai ri.

⁴⁰ Myiwe wuì ra-am gi, we we mai wú nyi bum akô. Haú bang má, Magadalaq wà mâ é Mariq, Yakuq tiq sù yuq eq Yose nhiktang é yhângnu Mariq eq Salome pé le bo akô nghut ri. ⁴¹ Haú bang sum yuq gi, Galile mau má, Yesuq htâng cháng mù, Yhâng râ é hkyô pé lé cháng kut byi é bang nghut akô. Yesuq eq rahá, Yerusalem wà mó má doq lé lo é myiwe wuì, góbang myo myo le haú má nyi tô bum akô nghut ri.

Yesuq Lé, Myhup Pyâm É Hkyô

Mht 27:57-61; Luk 23:50-56; Yhn 19:38-42

* 15:34 Hkya-on 22:1

⁴² Haú nyi gi, Hên Lajang Buinyi (Bánno buinyi é hí nyi) nghut ri. Haú mù, myinhâng jé lô jáng, ⁴³ Yudaq uphkâng hpúng má bo é, aróng wó é, Garai Gasâng é mingdán lé láng nyi é sù, Aramahti wà byù Yosep gi, myit wum lhoq kíng yù mù, Pilat chyáng wàng luí, Yesuq é gungsôm lé ê dúng ri. ⁴⁴ Pilat gi, Yesuq shi bê gâ é hkyô lé wó gyo jáng, maù byuq ri; haú mù, yhang gi, shô up gyezau lé wut yù mù, Yesuq shi teng bê lú ga myí ri. ⁴⁵ Shi teng bê hkyô lé, shô up gyezau chyáng mai wó sê yù jáng, Pilat gi, Yesuq é gungsôm lé yù râ ahkáng, Yosep lé byi kat ri. ⁴⁶ Haú mù, Yosep gi, pán yúng lé wui yù luí, gungsôm lé yu hkyô mù, htup yup luí, luqgok lé kyûng tô é lup hkaù má é kat tô ri. Hau htâng, yhang gi, luphkum má, luqlông èq lhêng chî pyâm tô ri. ⁴⁷ Magadalaq wà mâ é Mariq eq Yose é yhângnu Mariq gi, Yesuq lé, hkâmá lheq tô é lé, é myang akô nghut ri.

16

Dum Dui Toq Lo É Hkyô

Mht 28:1-8; Luk 24:1-12; Yhn 20:1-10

¹ Bánno buinyi lai jáng, Magadalaq wà mâ é Mariq, Yakuq é yhângnu Mariq eq Salome pé gi, Yesuq é gùng má, é but byi râ matú namngón jung é wui akô. ² Bánno buinyi htang napkyó bui htoq lo é hkûn yhang, yhangmoq gi, lup shut e ló akô. ³ Yhangmoq gi, "Luphkum mâ é luqgok lé, ó yuq chyûn lhêng pyám byi râ lú?" ga, rayuq eq rayuq tai lhum akô.

⁴ Nghut kôlháng, yhangmoq tu wú kat kô é hkûn, luqlong haú gi, lhoq lhêng to láng é lé, myàng akô nghut ri; luqlong haú gi, gyai kô é nghut lhê. ⁵ Yhangmoq gi, lup hkaù má wang é kô é hkûn, hpyu

é buhîng wut é zorâm rayuq, lo-
qyo hkyam má zung tô é lé, myàng
kôjáng, gyuq dan bum akô.

⁶ Haú hkûn, haú yuq gi, "Hkâgyuq
dàn kó! Nungmoq gi, haú tapzîng
má jén sat huí é, Nazaret wà byù
Yesuq lé ho akô, a nghut lhú?
Yhang dui toq ló bê! Yhang gi, shí
má a nyi lo. Yhang lé, lheq tô é jowò
lé wú wú keq. ⁷ Ahkuí, nungmoq gi,
ló mù, 'Yesuq gi, nungmoq hí má,
Galile mau shut so láng râ nghut
lhê. Nungmoq lé, Yhang taí tô é
eq rajung za, nungmoq gi, Yhang lé
haú má ló myâng kó râ nghut lhê.'
nghû, Yhâng é chángzô pé eq Petruq
lé ló taí kyo keq." ga lhom taí kat ri.

⁸ Haú mù, myiwe myhi haú bang
gi, byòdàn gyuq nán é eq, lup mai
hpang htoq ló akô; yhangmoq gi,
lúm gyuq byuq kô é yanmai, ó yuq
lé lé, haí le a taí kó nghut ri.

(Bun zo 9 mai 20 jé shoq gi,
chyúmding axau ra-am pé má a bo
é nghut lhê.)

Yesuq Htoq Shit É Hkyô

*Mht 28:9-10, 16-20; Luk 24:13-
53; Yhn 20:11-23; Lgyo 1:6-11*

⁹ Yesuq gi, Bánno buinyi htang
napsûn lé, Yhang dui toq é htâng,
Yhang mai nat gang nyhit du hkat
htoq pyám byi bê sù, Magadalaq
wà má é Mariq lé hí htoq shit ri.

¹⁰ Mariq haú gi, ló mù, haú Yesuq
eq nyi laí lò bê bang, yón ngau nyi
kô é hkûn, haú hkyô lé ló taí kyô
ri. ¹¹ Yhangmoq gi, Yesuq dum dui
bê gâ é hkyô lé le, Yhang lé, Mariq
myang é gâ é hkyô lé le, wó gyo
kôlhang, a jîng kó nghut ri.

¹² Hau htâng má, Yesuq gi, yosô
wà shut htoq e ló nyi é chángzo í
yuq lé, gotû gunghkyâng dong htoq
shit ri. ¹³ Haú nhik gi, taú lò mù,
gotû chángzô pé lé haú hkyô lò shit
kyo akô; nghut kôlhang, yhangmoq
gi, haú lé le a jîng byi kó nghut ri.

¹⁴ Hau htâng má, Yesuq gi, haú
chángzo raxe rayuq baú za zang zô

nyi kô é hkûn, yhangmoq chyáng
lé htoq shit ri. Yhangmoq chyáng
lumjîng myit a bò kô é yanmai le,
Yhang dui toq é htâng má, Yhang lé
myang é bang taí kyo kô é dang lé,
a jîng é za myit htan to kô é yanmai
le, Yhang gi, yhangmoq lé tân ri.

¹⁵ Hau htoq agó, Yesuq gi, yhang-
moq lé, "Mingkan jâm shoq htoq
ê mù, waxâng zo wuí lhunglhang
lé, haú gabú danglù hko kyo keq.

¹⁶ Lumjîng mù, wui-myhup hkâm
yu é sù ó yuq nghut kôle, hkyi yu é
hui râ nghut lhê. Nghut kôlhang, a
lumjîng é sù ó yuq nghut kôle, mara
byi é hui râ nghut lhê. ¹⁷ Lumjîng
é bang wó kut shit râ kumlhá pé
gi, Ngá é myîng lé lang luí, nat gâng
pé lé wó hkat htoq kó râ eq laklai
é myîng pé lé dat nyò kó râ nghut
lhê; ¹⁸ yhangmoq gi, lhangmui pé lé
le, wó kui zui kó râ nghut lhê; muí
shi jung duq lé, shuq kôlhang, haí
dut kó râ a nghut. Nò bâng é htoq
má, yhangmoq é loq ke byi jáng, nò
bang ge byuq kó râ nghut lhê." ga
taí ri.

¹⁹ Haú Yhumsîng Yesuq gi,
yhangmoq lé dang ban taí é htâng
má, mauhkûng shut shuí toq yu
é hui luí, Garai Gasâng é loqyo
hkyam má zung to bê nghut ri.

²⁰ Hau htâng, haú chángzô pé gi,
htoq ê mù, jowò hkangmó má
mungdang é hko kyô akô nghut
ri; haú Yhumsîng gi, yhangmoq
eq rahá nghut nyi mù luí, Yhâng é
mungdang têng é hkyô lé tún shit râ
matú, yhangmoq lé, kumlhá pé wó
kut é a-tsam byi é nghut ri. Amen.

LUKAQ é Gabú Danglù Laiká (The Gospel of Luke)

¹ Aróng wó dik é sù Htohpilug ê, ngamoq chyáng dut lai lò bê hkyô pé lé, sâng-hi mai yhumsing myoq eq yhang, myang é bang eq, mung-dang wùn waq é bang mai shap kyô gyó lô mù luí, ² byù myo myo gi, shikut luí kê to bekô nghut ri. ³⁻⁴ Ngò le haú pé banshoq lé awang mai ahpyo hpyot jihkúm nuqguq ho myí yù luí, nàng wó sê yu to bê hkyô pé gi, je lhoq gíng é dut sháng gaq nghú, nàng é matú banshoq tok za kê kat byi râ lé, ngò wó myit ri.

*Wui-myhup Sará Yohan Hku Lé
Lô Râ Gà É Hkyô*

⁵ Yuda mau má Herut hkohkâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myi gi, Arun amyú má é, Elizabet ga sù nghut ri. ⁶ Haú nhik gi, Yhumsing Garaí é jep é tará eq htúngtará banshoq lé, rago za cháng mù, Garaí Gasâng é hí má dingmán é su nhik nghut akô. ⁷ Nghut kôhlang, Elizabet gi, baùdung dung sù nghut é yanmai, yháng nhâm gi, zo dù a dap kó. Yhangnhik gi, asak ipyat le ko bekô nghut ri.

⁸ Ahkuí, Zahkariq gi, dum lhing hkyuq lo é hkyangjong mù lé, yhâng é hpúng eq rahá, Garaí Gasâng é hí má lé zui le, ⁹ haú Yhumsing é noqkuq yhúm ahkaú má namngón hkungga ê wang nyhé râ matú, hká yuq nghut râ lé hkyangjong pé é htúngli eq rajung za byù hkyín shosé she wú é hkûn, yhâng chyáng âng ri. ¹⁰ Haú mù yhang namngón hkungga lé nyhé é u lé, shiwa byù banshoq gi, yhumpán má, kyúdung nyi akô.

¹¹ Haú hkûn, Yhumsing Garaí é maumang lagyo gi, namngón jung nyhé é hkungga gyap é lo-yyo hkyam má, Zahkariq lé, lé yap shit ri. ¹² Zahkariq gi, maumang lagyo haú lé myàng jáng, dan gyuq nyi ri. ¹³ Nghut kôhlang, maumang lagyo gi, "Zahkariq ê, hkâgyuq, náng é kyúdung dang lé Garaí Gasang gyo byi bê. Haú mù luí, náng é yhumsing myhí Elizabet gi, náng é matú yuqzo rayuq bau byi berá nghut lhê; nàng gi, yhang lé Yohan nghú myhíng byi ra râ nghut lhê. ¹⁴ Yhang gi, náng é matú gabú hpo eq nguingón é hkyô dut berá nghut lhê. Yhang lé baù lo é yanmai, byù myo myo le gabú lo bùm berá nghut lhê. ¹⁵ Hkâsu mù gà le, yhang gi, haú Yhumsing Garaí é hí má ahko ahkáng wó mù luí, byù mó dut râ sù nghut lhê. Yhang gi, tsibiyiq wing eq lhpe lé ge shuq râ sù a nghut; yhâng nú é unghkaú mai yhang, Chyoiyúng Woi-nyí eq byíng nyí râ sù nghut lhê. ¹⁶ Yhang gi, Israelaq yhangzo yhangshú pé myo myo lé, Yhumsing yhangmoq é Garaí Gasâng chyáng lhing lò nhâng râ sù nghut lhê. ¹⁷ Íwâ pê é myit nhikhum lé gi, zô wui shut, nyo é a gyo bang lé gi, dingmán bâng é hpaqchyí hkyô shut lhing lò nhâng luí, haú Yhumsing jé lé râ matú hen tô é byù myú dut nhâng râ matú, Yohan gi, Eliyaq é woi-nyí wum-o wó é eq, Yhumsing é hí má e ló râ nghut lhê." ga luí, yhang lé taí ri.

¹⁸ Haú hkûn, Zahkariq gi, "Haú hkyô lé ngò hkâsu kut wó sé râ lhú? Ngò le mang byuq bê, ngá é yhumsing myhí le asak ipyat ko bê." ga luí, maumang lagyo lé tû taí ri.

¹⁹ Maumang lagyo haú gi, "Ngò gi, Garaí Gasang eq rahá nyi é sù Gabrielaq nghut lhê. Nang lé gabú danglù shí taí kyo aq ga luí, Yhang, ngo lé nhang kat é nghut lhê. ²⁰ Ahkyíng jé jáng, ngá dang gi,

gè gè dut lò râ nghut lhê. Dang shí pé lé nàng a lumjìng é yanmai, mù haù dut lo é buinyì jé shoq, nàng gi, nhut jit byuq rà nghut lhê." ga luí, yhang lé tù tái ri.

²¹ Haù u, shiwa byu pé gi, Zahkariq noqkuq yhùm ahkaù má haù-í myáng shoq lúng byuq é hkyô lé láng maù nyi akô. ²² Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haù mù luí, yhangmoq gi, noqkuq yhùm ahkaù má yhang myoqwup shing-rán rajung jung myàng ang bê lé, wú sê yu akô nghut ri.

²³ Ahkuí, Zahkariq gi, hkyangjong jong àng é buinyì ngap jáng, yhùm shut dum taù ló byuq bê. ²⁴ Hau htàng má, yhâng é yhumsìng myhí Elizabet gi, zogùng dut lò mù luí, hká le a htoq e za lhamó ngo hkyap yhùmhaù má lúng byuq ri. ²⁵ Haù hkùn, yhang gi, "Byu pé hí má ngò huí zô é hoq hpu hkyô lé, Garai Gasang gi, myàng byi luí, shí su dut nhang é dông mai huí sêng pyám byí é buinyì má, Yhang ge é hkyô lé, ngo lé tùn shit bê nghut ri." ga tái ri.

Yesuq Hku Lé Lô Berâ Gâ É Hkyô

²⁶ Ahkuí, Elizabet zogùng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wà má nyi é, zomyi gyíng rayuq chyáng nhang kat ri. ²⁷ Zomyi hau é myìng gi, Mariq gâ ri; yhang gi, Dawiq amyû mâ é Yosep gá su eq dúng tô é zomyi nghut ri. ²⁸ Maumang haù gi, Mariq chyáng jé jáng, "Mariq é, nguìngón nyí sháng gaq; Nàng, hkungso wó nyi ri; Haù Yhumsìng Garai gi, nàng eq rahá nyi nyi ri ò!" ga tái ri.

²⁹ Mariq gi, dang haù lé gyo sing nán mù, shí su gâ é dang gi, haí jung gá naù é nghut lhê lhú ga

luí, myit maù nyi ri. ³⁰ Haù hkùn, haù maumang lagyo gi, "Mariq é, hkâgyuq, nàng gi, Garai Gasang é hí má myoqdong wó bê nghut ri.

³¹ Wú aq, nàng zogùng dut lò mù luí, yuqzo rayuq bau rà nghut lhê. Yhâng é myìng lé gi, 'Yesuq' nghù luí, nàng myhíng byi ra rà nghut lhê. ³² Yhang gi, hpung bô sù dut rà nghut mù, Myhang htàng htúm Su é Yhangzo gâ é huí rà nghut lhê. Yhumsìng Garai Gasang gi, yhang lé, yhâng é íchyí íwa Dawiq é hkohkâm tanghkuq lé, byi rà nghut mù luí, ³³ Yhang gi, Yakup yhùm* lé hkâ-nhám le ru-up nyi rà nghut lhê. Yhâng é mingdán le htum nghu é joq rà a nghut." ga luí, yhang lé tái ri.

³⁴ Haù hkùn, Mariq gi, "Ngò gi, zomyi gyíng ru nghut ashí, haù gi, hkâsu wó dut rà lhú?" ga luí, maumang lagyo lé tù tái ri.

³⁵ Haù maumang lagyo gi, "Chyoiyúng Woi-nyí nàng é ahtoq má jé lé mù, Myhang htàng htúm Su é wum-o a-tsam gi, nàng lé shum gum to byi luí, haù baù lò rá Chyoiyúng sù le gi, Garai Gasang é Yhangzo ga kó rà nghut lhê. ³⁶ Hau htoq agó, wú aq, nàng é amyû su-isho baùdung myhí Elizabet lháng, mang bê le yuqgè zo wun to bê. Ahkuí, zogùng dut é lhamó hkyuq hkyap wàng bê nghut ri. ³⁷ Hkâsu mù gâ le, Garai Gasang a wó kut é haí le a joq." ga luí, yhang lé tù tái ri.

³⁸ Haù hkùn, Mariq gi, "Yhumsìng é jùnmyhí ngò nghut nyi lhê; nàng é dang eq rajung za ngá chyáng dut lò sháng gaq." ga tù tái ri. Hau htàng, maumang lagyo gi, yhâng chyáng mai ló byuq bê.

Elizabet Lé Mariq Ê Huí É Hkyô

³⁹ Hau htàng hkâ-í a myáng má, Mariq gi, Yuda mau bum mau mâ é wà rawà shut hân hân e ló luí, ⁴⁰ Zahkariq é yhùm má wàng

* 1:33 Yakup yhùm nghu e gi, Israelaq amyû lé gâ lhê.

mù, Elizabet eq huì nyo lhùm ri.
 41 Mariq é danghtë lé Elizabet wó gyo jáng, yhâng é unghkaù má é zoshâng gi, byam chyû lo ri.
 42 Elizabet le, Chyoiyúng Woi-nyí byíng to mù luí, Mariq lé htê mó èq taí é gi, "Myiwe banshoq má, nàng gi, hkungsô wó dik sù nghut ri. Náng é unghkaù má é zoshâng le hkungsô wó nyi ri ô! 43 Ngá Yhumsing é yhângnu ngá chyáng jé lé é jeju gi, hai é yanmai nghut bê lhu? 44 Wú aq, náng danghtë lé wó gyo kat jáng, ngá unghkaù má é zoshâng gi, gabú luí byam chyû nyi ri. 45 Haù Yhumsing taí é dang gi, gè gè dik lò rà nghut lhê ga luí, lumjíng é myiwe gi, hkungsô wó nyi ri." gâ ri.

Mariq É Hkya-on Dang

46 Haù hkùn, Mariq gi,
 "Ngá é i-myt mai haù Yhumsing lé hkya-on nyi lhê,
 47 ngá é woi-nyí le, Garai Gasang ngá é hkyi yù Sù má gabú nyi lhê.
 48 Ngò Yhâng é jùnmyhí myit nyhum nyi é lé, Yhang myàng byi bê nghut ri.
 Wú aq, ahkuí mai ipyat dedu má, ngo lé gi, hkungsô wó nyí sù, gâ nyi bekô rà nghut lhê.
 49 hkâsu mù gâ le, Wum-o Bo Dik é Garai Gasang gi, ngo lé mauhpo mù mó kut byi bê nghut ri,
 Yhâng é myíng gi, chyoiyúng nyi ri ô.
 50 Yhang lé gyuq hoq nyí bâng é ah-toq má, Yhang shogyo nhik-myín é hkyô gi,
 pyat bán hkangmó jé shoq hkâ-nhám le joq nyi rà nghut lhê.
 51 Yhâng é wum-o bo é loq èq mauhpo mù mó pé lé túnshit bê.
 Yhumsing myit é hkyô má nghutbùn nyi é bang lé, Yhang lhoq pyo pyám bê.

52 Zaugun suwún wuílé gi, zau zúng tanghkuq mai lhoq hkyô pyám mù,
 i-myt nyhùm bang lé gi, lhoq myhâng bê nghut ri.
 53 Zòmud hui bang lé gi, ge é zoshuq gyi shoq byi tso mù,
 sutzè wó bang lé gi, akôm nhang kat bê nghut ri.
 54-55 Nga-nhùng é ichyí íwâ pé lé taí tô é dang eq rajung za, Abraham eq yhangzo yhangshu pé lé,
 hkâ-nhám le shogyo nhikmyín nyi rà gâ e lé myit bún nyi é yan-mai,
 Yhâng é dui-nhâng zoshâng Is-raelaq byu pé lé hku baù nyi ri."
 ga luí, taí ri.

56 Mariq gi, Elizabet chyáng lhamó sum hkyap kô nyi mù luí, yhùm shut dum taù lò byuq bê.

Wui-myhup Sará Yohan Baù É Hkyô

57 Hau htâng, Elizabet gi, zoshâng bau rà buinyi jé mù, yuqgè zo bau bê. 58 Yhang lé haù-í kô é jeju Yhumsing túnshit é hkyô lé, yhâng é yhumkyo buinùm wui eq mung moq gumang wui wó gyo kojáng, yhang eq rahá gabú nyi akô.
 59 Ahkuí shit nyí jé jáng, yhang-moq gi, zoshâng haù lé ahyo-kuq hpyit byi rà matú lé kôluí, yhâng wá é myíng eq rajung za, Zahkariq ga myhíng byi rà dà akô. 60 Nghut kôhang, yhâng nu gi, "A nghut, Yohan nghù sheq myhíng rà nghut lhê." ga tù taí ri.
 61 Yhangmoq gi, "Náng é amyú suisho má le, haù su gâ é myíng rayuq le a bo wú shi." ga luí, yhang lé taí akô.
 62 Haù hkùn, zoshâng haù lé hkâsu nghù myhíng nau lhê laq ga, yhâng wa lé loq lik lik shit mù myí akô. 63 Zahkariq gi, kâjung longpá dúng yù mù, "Yhâng é myíng gi, Yohan nghut lhê." ga kâ

shit ri. Haù mù, lhunglhâng bang gi, maù byuq bum akô. ⁶⁴ Haù hkûn jáng, Zahkariq gi, nhut hkum bóng lô mù, dang wó nyô lui, Garai Gasang lé hkyá-ôn nyi ri. ⁶⁵ Haù su dut é hkyô lé, wó gyô é awui ayàm lhinghkyuq mâ é lhunglhâng bang gi, gyuq maù byuq bùm kômù, Yuda mau bum mau ramau gón taí pyo ló bum akô. ⁶⁶ Wó gyô é lhunglhâng bang gi, haù hkyô lé yhumsing é i-myt unghkaù má kat to mù, "Zoshâng shí gi, hkâsu dut lò râ sù nghut lhê lú?" ga myit wú nyi akô. Haí mù gà le, haù Yhumsing é loq gi, yhang eq rahá nghut nyi é yanmai nghut ri.

Zahkariq É Myiqhtoi Dang

⁶⁷ Haù hkûn, zôshang é yhângwa Zahkariq gi, Chyoiyúng Woi-nyí byíng lô mù, myiqhtoi dang dong taí é gi,

⁶⁸ "Haù Yhumsing, Israelaq é Garai Gasang lé hkyá-on sháng ô!
Haí mù gà le, Yhang gi, Yhâng é amyû lé, lé kûm wú mù lui, lé hkyi yù bê nghut ri.

⁶⁹ Garai Gasang gi, Yhâng é dui-nhâng zoshâng, Dawiq é amyû mai nga-nhûng é matú wum-o bo é hkyi yu é hkyuí† lé, yuq htoq lô nhâng bê.

⁷⁰ Shí hkyô gi, a-nham pyat mai yhâng é chyoiyúng myiqhtoi pé é nhut mai taí tô é eq rajung za nghut ri.

⁷¹ Haù hkyuí gi, nga-nhûng lé nga-nhûng é gye pê chyáng mai le, a nguì a naù bang ban-shoq é loq mai le, hkyi yù râ nghut lhê.

⁷² Íwa Garai gi, nga-nhûng é íchyí íwa pé lé shogyo nhikmyin hkyô lé tún shit râ matú, Yhang byí tô é chyoiyúng

dangshikaq lé a tô-myhí nghut ri.

⁷³ Haù gi, nga-nhûng é chyiké Abraham lé byi tô é danggidiq nghut lhê.

⁷⁴⁻⁷⁵ Nga-nhûng lé gye pê loq mai hkyi yù râ eq, nga-nhûng asak dui tô é buinyì banshoq má,

Yhâng é hí má a gyuq a kyum é za, chyoiyúng é eq dingmán é hkyô mai,

Yhang lé wó dojaú nyí nhâng râ matú, Yhang jé lé é nghut lhê.

⁷⁶ Ngá zo é, nàng gi, Yhumsing é hí má, e ló mù lui, Yhâng é hkyô lé hen lajang byi râ sù nghut é yanmai,

nang lé Myhang htáng htúm Su é myiqhtoi ga kó râ nghut lhê.

⁷⁷ Nàng gi, Garai Gasâng é byu pé lé, yhangmoq é yubak mara hkyut pyám byí é dong, hkyi yu é hui râ hkyô lé taí kyo râ sù nghut lhê.

⁷⁸ Haí mù gà le, Garai Gasâng é shogyo nhikmyin é yanmai, napsûn bui‡ gi, mauhkûng mai nga-nhûng chyáng htoq lé lô râ nghut lhê.

⁷⁹ Yhang gi, mauchut hkaù§ eq shí wup hkaù má lúng to bang lé builoq su duqbó byi râ eq, nga-nhûng lé nguínón simsaq é hkyô shut shuí e ló râ sù nghut lhê." ga ri.

⁸⁰ Zoshâng haù gi, kô lò mù, woi-nyí wum-o bo lò lui, Israelaq byu pé chyáng htoq shit lo é buinyì jé shoq, yoso pé má nyi nyi ri.

2

*Betlehem Wà Mó Má Yesuq Hku
Lo É Hkyô
Mht 1:18-25*

† **1:69** Hkyi yu é hkyuí gi, Yhumsing Yesuq lé taí é nghut ri. ‡ **1:78** Napsûn bui gà é gi, Yesuq lé taí é nghut lhê. § **1:79** Mauchut hkaù gà é gi, Garai lé a sé mù woi-nyí má shi tô é bang lé gà lhê.

¹ Buinyì haú pé má, Romaq hkoséng ming banshoq má é byù lhunglhâng bang gi, myìng jihpán kat râ matú, hkoséng Kehtaq Augustuq chyáng mai mungdang htoq ri. ² Jihpán haú lé sâng-hi dàm guq hi é gi, Kuireni ga sù Suriq mau má mauzau kut nyi é hkûn nghut ri. ³ Haú hkûn, byù du jup gi, myìng jihpán kat râ matú, ó le ô é wà shut ló bum akô.

⁴ Haú mù, Yosep le Dawiq é awut ashín nghut é yanmai, Galile mau Nazaret wà mai, Yuda mau má é Betlehem gà é Dawiq é wà shut, ⁵ yhang dúng tô é myiwe Mariq eq rahá myìng kat lhóm râ matú jé doq ló akô; Mariq kúm gi, gungloq lái to bê nghut ri. ⁶ Haú Betlehem má nyi tô ashî le, Mariq gi, zo hkû râ buinyì jé mù, zomún yuqzo lé bau bê. ⁷ Yhang gi, zoshâng haú lé panchoq eq htup mù no tso langhkang má lheq tô ri; haí mù gà le, bíng yhùm má yhangmoq nyi râ jowò a joq lo é yanmai nghut ri.

Sau Zúng Bang Yesuq Chyáng Jé Lé É Hkyô

⁸ Ahkuí, haú ginwáng má é sau zúng zo bang gi, sau zúng jang má yhangmoq é sau hpúng lé, myín lé zúng nyi akô. ⁹ Haú hkûn, Yhumsíng é maumang lagyo gi, yhangmoq é hí má lé htoq yap shit to mù, Yhumsíng é hpungwup shingkang gi, awui ayàm má duqbang lò luí, yhangmoq gyai gyuq bum akô. ¹⁰ Maumang lagyo gi, "Hkâgyuq kó, byù lhunglhâng bâng é matú, gyai yhang gabú é danglù, ngò nungmoq chyáng wun lé lo lhê. ¹¹ Hkû-nyí lhê buinyì má, Hkrisduq* nghu é Yhumsíng nghut é hkyí yù Sù gi, Dawiq é wà má nungmoq é matú hku to bê. ¹² Nungmoq é matú kumlhá gi, zoshâng nyheqnú rayuq panchoq eq htup mù, no tso langhkang má

lheq to lánq ra nghut lhê." ga luí, yhangmoq lé tai ri.

¹³ Haú hkûn jáng yhang, mauhkûng bang rajùm rayò htoq lò mù, maumang lagyo haú eq rahá Garai Gasang lé hkyá-ôn é dang gi, ¹⁴ "Htoq tsáng myhâng má, Garai Gasang gi, hpungwup shingkang bo nyi sháng gaq ô!

Myigùng htoq má le, Yhang ô nau é byu pé má, nguínón é gi, hká-nhám le joq nyi sháng gaq ô!"

gâ akô.

¹⁵ Maumang lagyo pé, yhangmoq chyáng mai, mauhkûng shut dum ló byuq jáng, sau zúng bang gi, "Sà! Betlehem wà mó má jé shoq yhang, nga-nhúng é mù, ahkuí za Yhumsíng nga-nhúng lé lé shit kyô lái lò bê hkyô lé é gôn wú sháng." ga luí, rayuq eq rayuq tai lhùm akô.

¹⁶ Hau htâng, yhangmoq gi, hân hân ê luí, Mariq eq Yosep lé le, no tso langhkang má lheq tô é zoshâng nyheqnú lé le, ê myàng akô. ¹⁷ Zoshâng haú lé, yhangmoq myàng kôjáng, zoshâng haú eq séng luí yhangmoq lé, lé tai kyô é dang lé, tai pyô kat bekô. ¹⁸ Wó gyô é bang banshoq gi, haú sau zúng bang tai kyô é dang lé, maú byuq bum akô. ¹⁹ Mariq kúm gi, dut lo é hkyô pé eq wó gyô é dang banshoq lé unghkaú má matsíng yù mù luí, nik nik myit wú nyi ri. ²⁰ Sau zúng bang gi, yhangmoq lé maumang lagyo tai kyô kat é dang eq rajung za, wó gyô yù, wó myang yu é hkyô pé banshoq é yanmai, Garai Gasang lé hkyá-on kungtôn uchang dum tai lò bekô nghut ri.

Yesuq Lé, Noqkuq Yhùm Má Shuí E É Hkyô

²¹ Zoshâng haú, shit nyí jé mù ahpyo-kuq hpyit byi râ buinyí má, yhang unghkaú má a lúng shi mai

* 2:11 Grik dong Hkrisduq gà é gi, xù but hui Sù gà é lichyúm nghut mù, Hebre dong "Mesaia" gà é eq rajung za nghut lhê.

maumang lagyo myhîng tô é myîng eq rajung za, yhang lé, "Yesuq" ga luí, myhîng byí akô.

²² Mosheq é tarâ eq rajung za, yhangmoq é lhoq san lhoq sêng é buinyî byîng jáng, Yhumsing é tarâ má, "Zomún yuqzo hkangmó gi, haú Yhumsing é hí má chyoiyúng sù wó nghû râ matú, Yhumsing chyáng ê ap byi râ lhê."* gâ é eq, ²³ "Hpûngkyui razúm, haú a nghut jáng, nghoqmyhû zo í du,"* hkungga byi râ lhê ga kê tô é eq rajung za, ²⁴ Mariq eq Yosep gi, zoshâng haú lé shui mù Yerusalem wà mó shut é akô.

²⁵ Haú hkún, Simeon gâ é mangzo rayuq, Yerusalem wà mó má nyi ri. Haú yuq gi, dingmán é eq tarâ cháng sù nghut mù, Israelaq lé nhik lhoq túng râ ahkyíng lé láng nyí sù nghut ri; haú Chyoiyúng Woi-nyí le, yhâng é ahtoq má nyi nyi ri. ²⁶ Yhang gi, haú Yhumsîng Hkrisduq lé a myang é za, shí râ a nghut, ga Chyoiyúng Woi-nyí eq tûn shit tô é hui sù nghut lhê. ²⁷ Yhang gi, Chyoiyúng Woi-nyí eq shui mù, noqkuq yhúmhaú má é jé nyi tô é hkún lé, Mariq eq Yosep gi, zoshâng Yesuq lé htûng tarâ eq rajung za kut byi râ matú, noqkuq yhúmhaú má shuí wang ló kôjáng, ²⁸ Simeon gi, zoshâng lé loq eq lhom bún yû mù, Garai Gasang lé hkya-ôn é dang gi, ²⁹ "Yhumsîng ê, náng é danggidiq gi, dik bê nghut ri; hkú-nyí náng é jùn ngò gi, nguîngón é eq wó shi ló berâ nghut lhê.

³⁰ Haí mù gâ le, byù lhunglhang bâng é matú, náng lajang tô é hkyi yù hkyô lé, ngá myoq eq yhang wó myâng bê.

³¹ Haú gi, byù myú chângjup wó myâng râ matú, náng lajang to byí é nghut mù,

³² tûngbau pé lé, tengmán hkyô má bui su duqbó mù hpông shit râ matú le, náng é

amyú Israelaq é hpungwup shîngkâng matú le nghut nyi ri."

gâ ri.

³³ Yhângnu eq yhângwâ nhik gi, zoshâng Yesuq é hkyô lé Simeon taí é yanmai, maú byuq akô.

³⁴ Simeon gi, yhangmoq lé shimân byi mù, Yhâng nu Mariq lé, "Wú aq, zoshâng shí gi, Israelaq ming má é byù myo myô é matú lingbat jowò eq myo myô é matú kê lò myhang lò râ hkyô le, byù myo myo taí he pyám râ kumlhá matú le, hkyin tô é hui sù nghut ri. ³⁵ Haú mù, byù myo myô é unghkaú má, myit mi-myit lé lhoq htoq shit râ nghut lhê. Náng é myit nhiklhum má, shâm chûn eq htaú kyâng kat é su gâ é lé, náng hui zo râ nghut lhê." ga taí ri.

³⁶ Ashe amyú má é Hpanuelaq é yhangzo, Annaq gâ é myiqhtoí myhí rayuq nyi ri; yhang gi, ípyat gyai ko bê. Yhang gi, zomyí pyat mai, yhanglâng eq nyhit zân za nyi luí, shit xe myi zân jé shoq chuimó mó nyi to sù nghut ri. ³⁷ Myiwe haú gi, noqkuq yhúm mai a htoq é za, nyí myín a ga noqkuq dojaú nyí mù, zoshuq gám luí kyûdûng nyi ri. ³⁸ Simeon dang ban taí jáng, Annaq gi, hui lé lô mù, Garai Gasâng jeju lé hkya-on luí, Yerusalem wà mó lé Garai Gasang hkyi yù râ gâ é lé, myit lum to bang lhunglhang lé, zoshâng hau é hkyô taí kyô ri.

³⁹ Yosep eq Mariq gi, kut râ pé lé haú Yhumsing é tarâ joq é dông ban kut jáng, Galile mau má é yhangmoq wà Nazaret shut dum taú ló bekô. ⁴⁰ Zoshâng haú gi, kê lò mù, wum-o bò lo é eq, hpaqchyí byéng-yá le byîng nyi ri. Garai Gasâng jeju le, Yhâng é ahtoq má joq nyi ri.

Noqkuq Yhúmhaú Má Zoshâng Yesuq Jé Nyi É Hkyô

⁴¹ Yhângnu yhângwâ nhik gi, Lhoqlhai Poí jé hkangmó, zàn wui

Yerusalem wà mó má ê ê kut akô. ⁴² Yesuq raxe í zân jé jáng, poi haũ, ê bo lòm ra htungli joq é eq rajung za, yhangme wui yhanghe wui doq ló akô. ⁴³ Haũ poi buinyi lai lui, dum taũ lo é hkũn, zoshâng Yesuq gi, Yerusalem wà mó má nyi gyó tô ri; nghut kôlhang, yhângnu yhângwâ nhik gi, a sé kó. ⁴⁴ Yesuq lé rahá lo é luzúm wui chyáng bò rà su ngàm kômù lui, Yosep eq Mariq gi, ranyí buigyùm chap sô ló bê htâng má, mung moq wui eq, sê lhùm é buinùm ji-myi wui chyáng Yhang lé châng ho akô. ⁴⁵ Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà mó má dum taũ jé e ló bekô. ⁴⁶ Ahkuĩ, sum nyi nghũ rà nyi sheq, noqkuq yhúmhaũ má, tará sará pê é gung gũng má zũng to mù, yhangmoq é dang lé gyo yù lui, dum taũ myi myi kut nyi é lé, yhangnhik é myàng akô. ⁴⁷ Yhâng é dang wó gyó é bang banshoq gi, Yhâng é u-nuq nyau é hkyô lé le, Yhang tũ taĩ é dang lé le, maũ nyi akô. ⁴⁸ Yhang lé myàng jáng, yhangnhik maũ byuq kômù lui, yhângnu gi, "Ngá zo é, haĩ mù lui ngá-nhik lé isu kut lhê lú? Wú aq, náng wa eq ngá-nhik gi, myit myo myit chiq é èq, nàng lé jaq châng ho pyám bê." ga lui, Yhang lé taĩ ri.

⁴⁹ Yhang gi, "Haĩ mù lui, ngo lé châng ho akô lú? mauhkũng mã é ngá Wá é yhùm má ngò nyi rà lhê le gi, nungnhik a sé kó lú?" ga lui, yhangnhik lé tũ taĩ ri. ⁵⁰ Nghut kôlhang, yhangnhik gi, Yesuq taĩ é dang lichyúm lé, a sé gyo kó.

⁵¹ Yesuq kúm gi, yhangnhik eq rahá Nazaret wà shut taũ jé gyó ló lui, yhangnhik nyo é dang lé gyo mù nyi tô ri. Yhângnu Mariq gi, dut lai lò bê hkyô pé banshoq lé, yhâng é myit nhiklhum má matsing tô ri. ⁵² Yesuq gi, hpaqchyĩ byéng-yá kũng zet lo é eq, gunglhyáng kó myhang

lò mù, Garai Gasâng é hí má le, byu hí má le, myoqdong wó lo nyi ri.

3

Wui-myhup Sará Yohan Mhoqshit É Hkyô

Mht 3:1-12; Mrk 1:1-8; Yhn 1:19-28

¹ Romaq hkoséng Kehtaq Tiberuq gi, hkó zung é raxe ngo zân nghut é hkũn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má; ² Anna eq Kayahpaq gi, hkyangjong mó mù má, kut nyi akô. Haũ hkũn, Garai Gasâng é mungdang gi, yoso má nyi tô é, Zahkariq é yhangzo Yohan chyáng jé lé ri. ³ Haũ mù, yhang gi, Yodan làng yàm jowò hkangmó má, sô jón wún lui, yubak mara hkyut pyám byĩ é hui rà matú myit lhing mù, wui-myhup hkâm* yù rà hkyô lé, hko kyô nyi ri. ⁴ Haũ gi, myiqhtoi Esai-aq laiká má,

"Haũ yoso má, byù rayuq garũ taĩ é hté gi,

'Haũ Yhumsing é matú, hkyô hen to keq, Yhâng é matú hkyô lhoq nyhang to keq;

⁵ wuihkung langhkop hkangmó lé lhoq pying ra rà nghut lhê; bùm eq wingkáng hkangmó lé hpyit pyám ra rà nghut lhê; agoĩ aguq é hkyô hkat hkangmó lé lhoq nyhâng ra rà nghut lhê; ahkung ahkop dut é hkyô hkat hkangmó lé lhoq rhá ra rà nghut lhê.

⁶ Haũ hkũn, byù banshoq gi, Garai Gasâng é hkyi yù hkyô lé myàng rá nghut lhê.^{11*}

ga lui, ká tô é eq rajung za nghut ri.

⁷ Shiwa byù rajùm rayò gi, Yohan é loq má wui-myhup hkâm yù rà ga

* 3:3 Wui-myhup hkâm gá é gi, baptisma lé gá é nghut lhê. ✱ 3:6 Esai 40:3-5

luí htoq lé lô kôjáng, Yohan taí é gi, "Duq htan é lhangmuí amyû pé† ê, jé lô râ yubak dam mai wó h pang lut kó sháng gaq ga, nungmoq lé ó yuq taí pún é lhú? 8 Myit lhing hkyô eq gingdán é ashí zui keq. 'Nga-nhúng gi, Abraham é yhangzo yhangshû pé nghut lhê. ‡ nghû luí, yhumsing é i-myt unghkaú má hkâtaí kó. Hkâsu mù gà le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. 9 Ahkuí lhang, Garai Gasang gi, Yhâng é wazung lé haú sikgâm wang pé má tô to bê nghut ri; haú mù, ge é ashí a zui é agàm hkangmó lé gi, htuoq lhêng pyám mù, myi má dú kat pyám râ nghut lhê." gà ri. §

10 Haú hkûn, shiwa byu pé gi, "Haú nghut le gi, ngamoq hkâsu kut le gè râ lhú?" ga luí, yhang lé myí akô.

11 Yhang gi, "Bu í dung wó sù gi, bu a wó sù lé, gàm byi sháng gaq; zo shuq wó sù le, a wó sù lé, gàm byi sháng gaq." ga luí, yhangmoq lé tú taí kat ri.

12 Kang guq bang le, wui-myhup hkâm yù râ ga lé lô mù, "Sarâ é, ngamoq gi, hkâsu kut le ge râ lhú?" ga luí, yhang lé myí akô.

13 Yhang gi, "Nungmoq hkyui yù râ masat tô é htoq lai shoq hkâyú kó." ga luí, yhangmoq lé taí ri.

14 Gyezô pé ra-am le, "Ngamoq gi, hkâsu kut le gè râ lhú?" ga luí, yhang lé lé myí akô.

Yohan gi, "Ó lé le hkâkyuq zo ko; a tara é dông mara le hkâhûn kó; nungmoq wó e ahpaú eq gé bûn nyi keq." ga luí, yhangmoq lé taí ri.

† 3:7 Lhangmuí amyû pé gà é gi, Lukaq 3:7-10 má bo é Hparishe eq Saduke pé lé taí é nghut ri.

‡ 3:8 Nga-nhúng gi, Abraham é yhangzo yhangshû pé nghut lhê gà é gi, Abraham é yhangzo yhangshu nghut é yanmai, Garai Gasang jéyáng é lé a hui râ ga, myit yu é hkyô nghut ri. § 3:9 Bun zo shí lhûm é lichyúm gi, myit a lhing bang lé, Garai Gasang jéyáng é buinyi jé râ nghut lhê ga naú é nghut ri. * 3:17 Haú eq rajung za, Hkrisduq gi, a ge é byu pé eq ge é byu pé lé gam hkoq pyám râ nghut lhê.

15 Shiwa byu pé kúm gi, Hkrisduq lé myit láng nyi tô é bang nghut é yanmai, Yohan lé haú yuq nghut lhê laq ga yhumsing é i-myt unghkaú má myit wú nyi bum akô. 16 Haú hkûn, banshoq bang lé Yohan taí é gi, "Ngò gi, nungmoq lé, wui eq za wui-myhup hkâm byí lhê; nghut kôlhang, ngá htoq má wum-o a-tsam je bo é sù rayuq jé lé lô râ nghut lhê. Ngò gi, yhâng é hkyí-tsung tui lé hpyí râ lhang a gingdán; Yhang gi, Chyoiyung Woinyi má le, myi má le, nungmoq lé wui-myhup hkâm byi râ nghut lhê. 17 Yhang gi, loq má byò chung to mù, guq chyaráng má é guq bùm lé hik sân pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí eq nyhê hkyô pyám râ nghut lhê." gà ri. * 18 Haú mù, Yohan gi, byù haú bang lé gotú dang myo myo eq lhoq pun lhoq kying mù, gabú danglù lé hko kyô nyi ri.

19 Nghut kôlhang, hkâ-myháng a myáng má mauzau Herut gi, yhanggû é yhangmyi Herudiaq lé lú yu é hkyô eq, yhang kut shut é gotú a ge é mù banshoq é yanmai, Yohan gi, yhang lé tân mhoqshit bê nghut ri. 20 Mara haú pé htoq agó, Herut dum kut jat yu é mara gi, Yohan lé htóng má lhung kat é nghut ri.

Yesuq, Wui-myhup Hkâm Yu É Hkyô

Mht 3:13-17; Mrk 1:9-11

21 Yohan lé htóng má a lhung kat shimá, byù myo myo gi, wui-myhup hkâm yu nyi kô é hkûn, Yesuq le Yohan chyáng wui-myhup hkâm yù mù, kyúdüng nyi le,

mauhkûng bóng lô mù, ²² haú Chyoiyúng Woi-nyí gi, hpûngkyui gunghkyâng sù é dông mai Yhâng ahtog má lé gyó nô ri. Haú hkûn, "Nàng gi, Ngò chyitdap é Ngá zo nghut lhê; Náng é ahtog má Ngò gabú myit ngón nyi lhê." ga mauhkûng mai danghtë htoq lo ri.

Yesuq É Byù Xik Shap Kyô É Hkyô Mht 1:1-17

²³ Yesuq gi, Yhang mù zû hi é hkûn, asak sum xê zàn kô nghut bê; Yhang lé byù hkyam dông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo, ²⁴ Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo, ²⁵ Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo, ²⁶ Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo, ²⁷ Yodaq gi, Yohan é yhangzo, Yoanan gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo, ²⁸ Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo, ²⁹ Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo, ³⁰ Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Eliakim é yhangzo, ³¹ Eliakim gi, Mela é yhangzo, Mela gi, Menaq é

yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, Dawiq é yhangzo, ³² Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo, ³³ Nashon gi, Aminada é yhangzo, Aminada gi, Arni é yhangzo, Arni gi, Hesrun é yhangzo, Hesrun gi, Hparet é yhangzo, Hparet gi, Yudaq é yhangzo, ³⁴ Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo, ³⁵ Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo, ³⁶ Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo, ³⁷ Lamek gi, Mehtusela é yhangzo, Mehtusela gi, Eruk é yhangzo, Eruk gi, Yaret é yhangzo, Yaret gi, Mahelela é yhangzo, Mahelela gi, Kainan é yhangzo, ³⁸ Kainan gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é yhangzo nghut ri.

4

Yesuq Lé Tsadán Gunlaú É Hkyô

Mht 4:1-11; Mrk 1:12-13

¹ Yesuq gi, Chyoiyúng Woi-nyí èq byíng mù, Yodan làng mai dum taú lo é hkûn, Chyoiyúng Woi-nyí gi, Yhang lé yoso shut shuí e ri. ² Haú má, Yesuq gi, buinyi myi xê nyí jé shoq, nat Tsadán èq gunlaú é huí ri. Buinyi haú gyoro má, Yesuq gi, haí le a zô é yanmai, zòmut huí bê nghut ri.

³ Haú mù luí, nat Tsadán gi, "Nàng, Garai Gasâng é Yhangzo nghut le gi, luqqok shí lé muk dut nhâng aq." ga luí, Yhang lé taí ri.

⁴ Haú hkûn, Yesuq gi, "'Byù gi, muk èq za asak duì rà a nghut.' ga luí, Chyúmdang má kâ tô ri."[☆] ga yhang lé tù taí ri.

⁵ Hau htâng, nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq lé razup má za tûn shit luí, ⁶ "Shí ahkáng ayá banshoq eq haú mingdán é hkikhkâm hkyô banshoq, ngò nang lé wó byí lhê; hkâsu mù gà le, haú pé banshoq gi, ngo lé ap byí to bê nghut mù, ngò byí nau é sù ó yuq lé nghut kôlháng, byi rà nghut lhê. ⁷ Haú mù, Nàng, ngo lé noq é nghut jáng, shí pé banshoq Nàng é dut rà nghut lhê." ga, Yesuq lé taí ri.

⁸ Haú hkûn, Yesuq gi, "'Haú Yhumsîng náng é Garai Gasang lé za, nâng noqkuq dojaú ra rà nghut lhê."[☆] ga luí, Chyúmdang má kâ tô ri." ga luí, yhang lé tù taí ri.

⁹ Nat Tsadán gi, Yesuq lé Yerusalem wà mó má shuí è mù, noqkuq yhum je myhang é shùhtâng htoq má yap nhang to luí, "Nàng, Garai Gasâng é Yhangzo nghut le gi, shí mai byam gyó kat wú aq. ¹⁰ Hkâsu mù gà le,

'Nang lé upzúng byí nyi rà matú, Garai Gasang gi, Yhâng é maumang lagyô pé lé taí to rà nghut mù,

¹¹ luqqok má náng é hkyí a ló htung shoq, yhangmoq é loq èq Nàng lé lhom bún yú kó rà nghut lhê."[☆]

ga luí, Chyúmdang má kâ tô ri." ga taí ri. ¹² Nghut kôlháng, Yesuq gi, "'Haú Yhumsîng, nungmoq é Garai Gasang lé, wó chyam wú rà

a nghut."[☆] ga luí, Chyúmdang má bo tô ri." ga, yhang lé tù taí ri.

¹³ Nat Tsadán gi, gungláu é hkyô pé banshoq ban kut jáng, ahko ahkáng láng wú uchyang yhâng chyáng mai byam gâng nyi byuq ri.

Yesuq Lé Nazaret Wà Bang Hengik Pyâm É Hkyô

Mht 4:12-17; 13:53-58; Mrk 1:14-15; 6:1-6

¹⁴ Yesuq kúm gi, Chyoiyúng Woinyi wum-o byíng é èq Galile mau shut dum taú lo ri. Haú mau jowò hkangmó má, Yhâng é hkyô lé taí pyo ló bùm bekô. ¹⁵ Yhangmoq é tarajong pé má, Yesuq mhoqshit byi mù, lhunglhâng bang gi, Yhang lé taí hkya-ôn nyi bum akô.

¹⁶ Hau htâng má, Yhang nyi kô lo é Nazaret wà má dum taú jé ló bê; Yhang gi, hkâ-nhám le kut nyi é eq rajung za, Bánno buinyi* lé tarajong má wang è mù, laiká ng-hap rà ga toq yap é hkûn, ¹⁷ Yhang lé myiqhtoi Esai-aq chyúmding byi kôjáng, Yhang chyúmding haú lé hpông kat le,

¹⁸ "Yhumsîng é Woi-nyí gi, ngá é ahtoq má nyi nyi ri;

hkâsu mù gà le, ashò awuí é bang lé gabú danglù hkô kyo rà matú, Yhang ngo lé hkyin yù bê.

Htóng lúng bang lé lhoq htoq rà hkyô eq, myoqjit bang lé myoq dum myàng nhâng rà hkyô hkô kyo rà matú le,

zik zo huí é bang lé nhang kat nhâng rà eq,

¹⁹ Yhumsîng, Yhâng é byu pé lé hkyi yù rà ahkyíng zanwut lé hkô kyo rà matú le, Yhang, ngo lé nhang kat bê nghut ri."[☆]

ga luí, kâ tô é jowò lé myang záng mù nghap ri.

²⁰ Hau htâng, Yesuq gi, chyúmding haú lé ding mù, shuí-u sú lé tau

☆ 4:4 Tarâ Pun 8:3 ☆ 4:8 Tarâ Pun 6:13 ☆ 4:11 Hkya-on 91:11-12 ☆ 4:12 Tarâ Pun 6:16

* 4:16 Bánno buinyi gà é gi, Yudaq byu pé nòmu é buinyi lé gà lhê. Ahkui lhê é dông ga jáng, Bánno buinyi gi, bat htoq hkyuq nyi lé âng ri. ☆ 4:19 Esai 61:1-2

byí pyám luí, dum zung tô ri; tara-jong má é byù lhunglhâng bang gi, Yesuq lé chôm wú tô é hkûn, ²¹ Yesuq gi, "Nungmoq é nohkyap má, ahkuí wó gyô é Chyúmdang shí gi, hkû-nyí yhang lo dik bê." ga luí, yhangmoq lé taí hi kat ri.

²² Lhunglhâng bang gi, Yhang ge é hkyô lé saksé hkám byi kômù, Yhâng é nhut mai htoq é jeju bo é dang lé le, maú kôluí, "Shí yuq gi, Yosep é yhangzo a nghut lúhú?" ga taí bum akô.

²³ Haú mù luí, Yesuq gi, "Nungmoq gè gè yhang, 'Chi sará ê, yhum-sing gùng lé lhoq ge yù aq.'† gâ é sanghkyang èq le, 'Nàng, Kaperna-um wà má kut shit wú é hkyô ngamoq wó gyo bê, haú eq rajung za, nàng, nàng é yhum mau má le, kut shit wú aq.' ga luí le, ngo lé taí kó rá nghut lhê." ga taí ri.

²⁴ Yhang dum xoq taí é gi, "Ngò, nungmoq lé teng za taí kôlé, my-iqhtoi ó yuq le yhumsing é yhum mau má myoqdong wó wú é a nghut. ²⁵ Ngò, nungmoq lé teng za taí kôlé, Eliyaq é pyat lé, Israelaq ming má chuimó myo myo nyi bum akô. ²⁶ Nghut kôlhâng, haú ming má sùm zan eq lhamó hkyuq hkyap yhang, mau a wò dut byuq mù, mutmó gyó tô é hkûn, Garai Gasang gi, yhangmoq má é rayuq chyáng le, Eliyaq lé a nhang kat é za, Sidun mau Zarephta wà má é, chuimó myhí rayuq chyáng sheq nhang kat byí é nghut lhê. ²⁷ Myiqhtoi Elisha é pyat má le, Israelaq ming má, manggâm dap é byù myo myo nyi kôlhâng, yhangmoq chyáng má é rayuq le wó sân-yúng yù kô é a nghut; Suriq byù Naman ga sù tungbaù hpó za sheq wó sân-yúng é nghut lhê." ga taí ri.

²⁸ Tarajong hkaú má é lhunglhâng bang gi, haú hkyô lé wó gyo kôjáng, gyai yhang nhik-yo nau

bùm kômù, ²⁹ toq yap luí, Yhang lé wà mai hkat htoq mù, yhangmoq é wà xuq tô é bùm gùng htoq má é gampyoq má, é chyùn hpyit hkyô pyám rá ga shuí e ló akô. ³⁰ Nghut kôlhâng, Yesuq kúm gi, byù hpûng haú mai so hkoq htoq ló byuq bê nghut ri.

Agè Ashop É Nat Lé Yesuq Hkat Htoq É Hkyô

Mrk 1:21-28

³¹ Hau htâng, Yesuq gi, Galile mau má é Kaperna-um wà má jé é mù, Bánno buinyi má byu pé lé mhoqshit hi ló bê nghut ri. ³² Yhangmoq gi, Yhang mhoqshit é hkyô lé mauhong nyi akô; hkâsu mù gâ le, Yhang gi, ahko ahkáng bo é dang dông taí nyi é yanmai nghut ri.

³³ Yesuq, tarajong hkaú má mhoqshit byí nyi é hkûn, nat gang wang júng é byù rayuq htê mó o mó èq taí é gi, ³⁴ "Ê, Nazaret wà byù Yesuq é, ngamoq gi, Nàng eq haí sêng lhê lúhú? Ngamoq lé lhoq hten rá matú, Nàng jé lé é nghut lhê lúhú? Nàng gi, Garai Gasâng é Chyoiyúng Sù nghut é lé, ngò sê lhê." gâ ri.

³⁵ Haú hkûn, Yesuq gi, "Hkâjop, yhâng chyáng mai htoq ló aq." ga yhang lé tân kat jáng, nat gi, haú yuq le yhangmoq é gung gùng má lhoq lhez to mù, a nò nhang é za, yhâng chyáng mai htoq ló byuq ri.

³⁶ Haú mù luí, shiwa byù ban-shoq bang gi, gyai yhang maú byuq kômù, rayuq eq rayuq, "Shí yuq é dang gi, hkasú é dang wá nghut lhê lúhú? Yhang gi, ahkáng ayá èq le, wum-o bo é èq le, agè ashop é nat pé lé hkunmó hkyó jáng, haú bang htoq ló byuq akô." ga taí lhùm bum akô. ³⁷ Haú hkûn, haú mau má é awui ayám jowò hkangmó má jam shoq, Yhâng é hkyô lé taí pyo hú ló bùm bekô nghut ri.

† 4:23 Chi sará ê, yhumsing gùng lé lhoq ge yù aq gâ é sanghkyang gi, "Mesaia nghut le gi, mauhpo mù wó tún shit rá nghut lhê." gâ é nghut lhê.

Yesuq Nòhpyo Lhoq Gê Byí É Hkyô

Mht 8:14-17; Mrk 1:29-34

³⁸ Yesuq gi, haù tarajong mai toq lò mù, Simun é yhùm má wang lò ri. Simun é yhâng-aumó gi, ali gyai nyé no nyi é nghut mù luí, lhoq gê byí râ matú, Yesuq lé garúm dung byí akô. ³⁹ Yesuq gi, Simun é yhâng-aumó nàm má yap to mù, nòhpyo haù lé tân kat jáng, Simun é yhâng-aumó gi, ge lò byuq bê; haù hkún jáng, yhang gi, toq mù, yhangmoq lé gai tso gai huq bê nghut ri.

⁴⁰ Bui wang lò jáng, nòhpyo hui bang eq awáng nòhpyo ajung jung dap é bang lhunglhang lé, Yesuq chyáng shuí lé lô kômù, yhangmoq rayuq htâng rayuq é ahtuq má Yesuq gi, loq ke byi luí, lhoq gê byí ri. ⁴¹ Nat gâng pé gi, Yesuq lé, "Nàng gi, Garai Gasâng é Yhangzo nghut ri." ga luí, wut tái mù byù myo myô chyáng mai htoq lò byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó tái loshoq, Yesuq tân pyâm ri.

⁴² Maubó lô jáng, Yesuq gi, htoq lò mù, gaù é jowò yoso hkaù má é nyi tô ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai a lò byuq râ matú châng hkùm wú akô. ⁴³ Nghut kôlhang, Yesuq gi, "Garai Gasâng é mingdán é gabú danglù lé, gó wâ pé má le ngò hko kyo râ râ ashí, haù é matú, Garai Gasang gi, ngo lé nhang kat bê nghut lhê." ga luí, yhangmoq lé tái ri. ⁴⁴ Haù mù, Yesuq gi, Yuda mau mâ é tarajong pé má, hko kyô wún nyi ri.

5

Sâng-hi Ji Yù Huí É Chángzô Pé

Mht 4:18-22; Mrk 1:16-20

¹ Radàm má lé, Yesuq gi, Gene-sarat nhông yàm má yap tô le, Garai Gasâng é mungdang gyo râ ga, shiwa byu pé, Yhâng chyáng chyin

chyap wang lé lô kô é hkún, ² nhông gin-gau yàm má lhai razúm joq tô é lé, Yhang myang kat ri. Ngogún dú bang kúm gi, lhai mai htoq mù, yhangmoq é gùn pé lé chí nyi akô. ³ Yesuq gi, Simùn é lhai má wàng mù gin-gau mai rachyit lhoq kang nhâng luí, haù lhai htoq má zung to mù, shiwa byu pé lé mhoqshit tái kyô nyi ri.

⁴ Dang ban tái jáng, Yesuq gi, Simun lé, "Wui nik é shut hui luí, ngozo wó kông yù râ matú, nungmoq é gùn pé lé dú hkyô kat keq." ga tái ri.

⁵ Simun gi, "Yhumsíng ê, ngamoq amàn ra-myin mau shikut wú kôlhang, haì le a wó; nghut kôlhang, nàng dang é yanmai, ngò gùn dú hkyô kat râ nghut lhê." ga tái ri.

⁶ Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq lò râ su dut é yanmai, ⁷ lhai gó lhum mâ é luzúm wui lé, lé garúm yù râ matú loq lik lik kat kôjáng, haù bang lé lô mù, haù lhai í lhum aluq myup lò shoq ngozo lé kat pyíng bekô.

⁸ Simun Petruq gi, haù lé myàng jáng, Yesuq é hkyí wang má hkyihput huq mù, "Yhumsíng ê, ngá chyáng mai lò byuq aq, haì mù gâ le, ngò gi, yubak dap é byù nghut nyi lhê." ga tái ri. ⁹ Haì mù luí gâ le, Simun le, yhang eq nyi tô é lhunglhang bang le, haù su ngozo wó yu é yanmai, mau nyi bùm kômù nghut ri. ¹⁰ Simùn é luzúm nhik, Zebedi é yhangzo Yakuq eq Yohan le, haù su chòm maú byuq akô.

Hau htâng, Yesuq gi, "Hkâgyuq, ahkuí mai nàng gi, byù lé châng kóng sù dut râ nghut lhê." ga luí, Simun lé tái ri. ¹¹ Yhangmoq gi, wuiyàm má jé jáng, lhai pé eq yhangmoq é zè banshoq lé tô pyâm to luí, Yesuq htâng cháng bekô nghut ri.

Manggâm Dap Bang Lé Yesuq Lhoq Gê Byî É Hkyô

Mht 8:1-4; Mrk 1:40-45

¹² Radâm lé, Yesuq gi, wà rawà má nyi tô lé, ragùngdû é manggâm dap é byù rayuq lé lo ri; haú yuq gi, Yesuq lé myàng jáng, hkyihput htuq luí, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga dúng wut ri.

¹³ Yesuq gi, loq lhâm kat mù, haú yuq lé ê zàng luí, "Ngò dóng lhê, sân-yúng aq hkoi." ga taí ri; haú hkûn jáng, haú yuq é manggâm gi, ge byuq bê nghut ri.

¹⁴ Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tún shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé taí hkûm kat ri.

¹⁵ Nghut kôlhang, Yesuq é hkyô gi, je riyhang taí pyo hù jam ló mù luí, shiwa byù rajum rayò gi, Yhâng é dang gyo râ matú le, yhangmoq é nòhpyo lhoq gê byí nhâng râ matú le, lé zup míng tô akô. ¹⁶ Yesuq kúm gi, Yhang baú tsik za yoso shut htoq é mù, kyû é dung dung kut ri.

Gùngjum Shí Sû Lé, Yesuq Lhoq Gê Byî É Hkyô

Mht 9:1-8; Mrk 2:1-12

¹⁷ Ra-nyí lé, Yesuq mhoqshit nyi é hkûn, Hparishe pé eq tarâ sará pé le, Yesuq nâm má zung tô akô; haú bang gi, Galile mau wà hkyap hkangmó mà é bang eq Yuda mau, Yerusalem wà mó mà é bang nghut akô. Yhumsîng Garaí é wum-o a-tsam le nòhpyo lhoq gê râ matú Yesuq eq rahá nghut nyi ri. ¹⁸ Haú hkûn, byù ra-am gi, gùngjum shí sù rayuq lé taphkang mai waq lé lô kômù, haú yuq lé, yhúmhaú má nyi tô é Yesuq é hí má, wó lheq byi shoq ga hkyô ho nyi akô. ¹⁹ Byù lúm myô

chyîn chyap to mù, haú nò sù lé hká dóng le a wó shuí wàng kôluí, haú yhumhkûng htoq shut waq doq ló mù, haú yuq lé taphkang eq roq, shiwa hpong gung gûng, Yesuq é hí ang ang má hkyô hang kat akô.

²⁰ Yesuq gi, yhangmoq é lumjîng myit lé byu myàng jáng, "Byù nàng ê! Náng é yubak mara lé hkyut pyám byi bê." ga taí ri.

²¹ Haú hkûn, Hparishe pé eq tarâ sará pé gi, "Shí su ga luí, Garaí Gasang lé rhoi dang taí é sù gi, ó yuq wá nghut lhê lhú? Garaí Gasang za a nghut jáng, yubak mara wó hkyut pyám byi sù gi, ó yuq wá nghut lhê lhú?" ga luí, myit són wuí nyi bum akô.

²² Yesuq gi, yhangmoq myit són wuí nyi é hkyô lé sé mù, "Nungmoq é i-myt hkaú má, haí mù shí pé lé myit són wuí nyi akô lhú? ²³ Náng é yubak mara lé hkyut pyám byi bê.' nghú taí râ eq, 'Toq luí, hkyô so aq.' nghú taí râ má, hká hkun je taí lui lhê lhú? ²⁴ Nghut kôlhang, haú Byu Yhangzo* gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê." ga mù, haú gùngjum shí sù lé, "Ngò, nàng lé taí bá, toq aq, náng é taphkang yu chùng luí, yhùm taú ló aq hkoi." ga taí ri. ²⁵ Haú hkûn jáng, yhang gi, yhangmoq é hí má toq yap mù, yhâng é taphkang waq chùng luí, yhâng é yhùm shut Garaí Gasang lé hkya-on kungtôn uchyang ló byuq bê. ²⁶ Byù ban-shoq bang gi, gyai maú byuq kômù luí, Garaí Gasang lé hkya-on kung-ton akô nghut ri. Yhangmoq gyai gyuq maú dik é èq le, "Hkû-nyí, nga-nhúng, mauhpo amù pé lé myàng bê." ga taí nyi akô.

Yesuq Gi, Lewiq É Yhùm Má Yubak Dap Bang Eq Rahá Zo Shuq

* 5:24 Byu Yhangzo gâ é gi, Yesuq Yhânggùng yhang lé le taí e nghut lhê, Mesaia lé le taí é nghut lhê.

É Hkyô

Mht 9:9-13; Mrk 2:13-17

²⁷ Hau htâng má, Yesuq sô e ló le, Lewiq gâ é kang guq sù ranguq yhâng é kang guq zúm má zung tô é lé é myàng mù, haú yuq lé, "Ngá htâng cháng aq." ga tai ri. ²⁸ Lewiq gi, haú má é zè banshoq lé tô pyâm to mù, toq luí, Yhâng htâng cháng bê nghut ri.

²⁹ Hau htâng, Lewiq gi, yhâng é yhùm má Yesuq é matú zoshuq poi mó kut byí ri; poi haú má kang guq bang myo myo eq byú góbang le, yhangmoq eq rahá za zô zung nyi bum akô. ³⁰ Haú mù luí, Hparishe pé eq yhangmoq hpúng má é tarâ sará pé kúm gi, "Nungmoq gi, haí mù luí kang guq bang eq yubak dap bang eq rahá zo shuq nyi akô lhú?" ga, Yhâng é chángzô pé lé mara hùn dang tai akô.

³¹ Yesuq gi, yhangmoq lé, "Wángzán bang chí sará a ra kó, nòhpyo hui bang za sheq ru rá lhê. ³² Ngò gi, dingmán bang lé wut yù rá matú jé lé é a nghut, yubak dap bang myit lêng rá matú sheq jé lé é ru nghut lhê." ga tú tai ri.

Zoshuq Gám Hkyô Eq Séng Luí, Yesuq Tai É Hkyô

Mht 9:14-17; Mrk 2:18-22

³³ Dum, yhangmoq gi, "Yohan é chángzô pé gi, zoshuq gám mù kyúdung dung kut akô; Hparishe pé é chángzô pé le, haú su kut akô; nghut kôhang, náng é chángzô pé gi, haí mù zô nyi shuq nyi akô lhú?" ga Yesuq lé tai akô.

³⁴ Yesuq, yhangmoq lé tú tai é gi, "Bíng pé gi, lusik eq rahá nghut nyi to ashí hkún, yhangmoq lé zo shuq wó gám nhâng rá lhú?" ³⁵ Nghut kôhang, lusik† lé yhangmoq chyáng mai shuí yu pyâm é hkyíng jé rá nghut lhê; haú buinyi pé má kúm

gi, yhangmoq, zoshuq gám kó rá nghut lhê." gâ ri.

³⁶ Dangtú dông mai le, Yesuq, yhangmoq lé tai é gi, "Mebu sik má é lêng cheq yú mù, mebu xau má hpo é gi, ó a kut wú kó; haú su kut é nghut jáng, mebu sik lé le lêng cheq pyâm é dut mù, pán jap sik le mebu xau eq du lhum rá a nghut. ³⁷ Tsibiyiq wing asik lé le, shokuq htùng axau má ó a kat wú kó. Kat é nghut jáng, tsibiyiq wing asik gi, htùng lé lhoq buq goq nhâng mù, tsibiyiq wing le yui shun byuq, htùng le htên byuq, dut rá nghut lhê. ³⁸ Haú su a dut shoq gi, tsibiyiq wing asik lé, shokuq htùng asik má kat ra rá nghut lhê. ³⁹ Tsibiyiq wing axau shuq nyi bê sù gi, asik lé a shuq naú nghut rá; hkâsu mù gâ le, 'Axau sheq je nghâm ri.' ga tai rá." gâ ri.

6

Bánno Buinyi Má, Yesuq É Chángzô Pé Kyôshi Shap Zô É Hkyô

Mht 12:1-8; Mrk 2:23-28

¹ Bánno buinyi ra-nyí má, Yesuq gi, Yhâng é chángzô pé eq yò hkaú mai sô lai ló é hkún, Yhâng é chángzô pé gi, kyôshi ratsuí langshap yú mù, loq eq nè hpuq zô akô. ² Haú mù luí, Hparishe pé ra-am gi, "Bánno buinyi má a ge kut jung lé, nungmoq gi, haí mù luí haú su kut akô lhú?" ga tai akô.

³ Yesuq gi, yhangmoq lé, "Dawiq lháng gi, yhâng htâng cháng é bang eq rahá zòmut hui é hkún, hkâsu kut é hkyô lé, nungmoq a nghap wú kó lhú?" ⁴ Dawiq gi, Garai Gasâng é yhùm* hkaú má wang é mù, hkyangjông pé mai lai luí, ó le a ge zô é, kyâng tô é muk lé yù zo mù, yhâng htâng châng é bang lé le, byi tsó é a nghut kó lhú?" ga tú tai ri. ⁵ Hau htâng, Yhang gi,

† 5:35 Lusik gâ é gi, Yesuq lé tai nau é nghut lhê. Yerusalem wà mó má joq é saksé zúm lé gâ é nghut lhê.

* 6:4 Garai Gasâng é yhùm nghu é gi,

"Haú Byu Yhangzo gi, haú Bánno buinyi é Yhumsing nghut lhê." ga yhangmoq lé tai ri.

Loq Jum Shî Sû Lé Yesuq Lhoq Gê Byí É Hkyô

Mht 12:9-14; Mrk 3:1-6

⁶ Gotû Bánno buinyi má le, Yesuq gi, tarajong má wàng mù mhoqshit nyi é hkûn, loqyo loq ajum shi byuq é byù rayuq haú má nyi tô ri. ⁷ Haú hkûn, tarâ sará pé eq Hparishe pé gi, Bánno buinyi má nôhpyo lhoq gê byi râ lhu ga luí, Yhang lé mara wó hûn shoq ga gyám wú nyi akô. ⁸ Yesuq kúm gi, yhangmoq é i-myyit lé sé sù nghut luí, loq jum shî sù lé, "Toq mù, banshoq bâng é hí má, yap shit aq." ga tai kat ri. Haú yuq le, toq mù yap tô ri.

⁹ Haú hkûn, Yesuq gi, "Ngò nungmoq lé myí wú kôlé, Bánno buinyi má, ge é muzó kut râ, a ge é muzó kut râ, byù asak hkyí râ eq lhoq hten râ pé má hká lhum kut le sheq tarâ wang lhê lhu?" ga luí, yhangmoq lé tai ri.

¹⁰ Hau htâng má, yhangmoq banshoq lé lhing wú mù, haú loq jum shî sù lé "Náng é loq nyhang kat aq." ga tai kat é hkûn lé, yhang le loq nyhang kat luí, yhâng é loq gi, shoq za ge byuq bê nghut ri. ¹¹ Nghut kôlhang, yhangmoq gi, myoq chum nôh chik yhang nhik-yo naú kômù luí, "Yesuq lé hkâsu wá kut pyám râ lhu?" ga luí, rayuq eq rayuq tai lhum nyi akô.

Raxe Í Yuq Lé Lagyo Ga Myhîng Yu É Hkyô

Mht 10:1-4; Mrk 3:13-19

¹² Haú yoq ra-nyí má, Yesuq gi, kyûdung râ ga bùm shut htoq e ló luí, ra-myin mau Garai Gasang lé kyûdung nyi ri. ¹³ Maubó jáng Yhâng é chángzô pé lé wut yù mù, yhangmoq chyáng mâ é raxe

í yuq lé hkyin yù luí, lagyô pé ga myhîng to byí ri. ¹⁴ Haú bang gi, Yesuq eq Petruq ga mying myhing byí é Simun eq, yhanggu Andre, Yakuq eq Yohan, Hpilip eq Barhtol-ume, ¹⁵ Mahte eq Htomaq, Alhpe é yhangzo Yakuq eq Zelutuq† dut é Simun, ¹⁶ Yakuq é yhangzo Yudaq eq, Yesuq lé ap pyám râ sù Yudaq Iskarut pé nghut akô.

Hkungsô Wó É Hkyô Eq Dingnyé Wó É Hkyô

Mht 4:23-25; 5:1-12

¹⁷ Yesuq gi, yhangmoq eq rahá gyó ló mù, janggyú má yap tô é hkûn; Yhâng é chángzo moq mó le mù, Yuda mau banshoq mâ é bang, Yerusalem wá mó mâ é bang, wuìshuq lung-aù ayám mâ é Turuq myuq eq Sidun myuq mâ é bang, rajùm rayô gi, ¹⁸ Yhâng é dang gyô yù râ eq yhangmoq é nôhpyo lhoq gê nhâng râ matú, rahá za zup míng tô akô. Agè ashop é nat èq zing-ri huí é bang le ge byuq akô. ¹⁹ Yhâng é gùng mai htoq é wum-ô èq byù banshoq lé lhoq gê byí nyi é yan-mai shiwa byu pé le Yhang lé wó záng shoq ga, ho nyi akô.

²⁰ Haú hkûn, Yesuq gi, Yhâng é chángzô pé lé wú kat luí tai é gi,

"Myùng bang nungmoq gi, hkungsô wó nyi ri, hkâsu mù gâ le, Garai Gasâng é mingdán‡ gi, nungmoq é mingdán nghut nyi ri.

²¹ Ahkuí, zòmut wuìshit huí nyi é bang nungmoq gi, hkungsô wó nyi ri, hkâsu mù gâ le, nungmoq nhik dik shoq myàng zô kó râ nghut lhê.

Ahkuí, ngau nyi bang nungmoq gi, hkungsô wó nyi ri, hkâsu mù gâ le, nungmoq myang wui kó râ nghut lhê.

† 6:15 Zelutuq gâ é lichyúm gi, yhumsing zui sai é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê. ‡ 6:20 Garai Gasâng é mingdán gâ é gi, Garai Gasang up é lé gâ lhê.

22 Haû Byu Yhangzô é yanmai nungmoq lé su èq a nguì é, lhoq hpyoq lhoq kâng é, hoq hpu nhang é, agè ashop nghut é dong jihpoi gamhkui huì é hkûn, nungmoq gi, hkungsô wó nyi ri.

23 Haû hkûn lé, gabú byam chyû nyi keq, hkâsu mù gà le, wú keq, nungmoq é matú kô é chyunghuq gi, mauhkûng mingdán má joq tô ri. Ngò, nungmoq lé taí lhê, hkâsu mù gà le, yhangmoq é íchyí íwa pé le myiqhtoi pé^s lé haû su kut wú bekô."

24 Nghut kôlhang, sùt wó bang nungmoq gi, dingnyé wó rà, hkâsu mù gà le, nungmoq gi, yhumsing gùng má nhik shí nhik dik é hkyô lé huì yù bekô.

25 Ahkuí, gyi gyi dau dau myàng zo myàng shuq nyi é bang nungmoq gi, dingnyé wó rà, hkâsu mù gà le, nungmoq zòmút wuìshit é hui kó rà nghut lhê.

Ahkuí, wui nyi é bang nungmoq gi, dingnyé wó rà, hkâsu mù gà le, iyon yôn é eq ngaubyi ngau-nhap htoq é hui kó rà nghut lhê.

26 Byù banshoq bang, nungmoq lé ge é byù ga kôjáng, nungmoq gi, dingnyé wó rà,

hkâsu mù gà le, yhangmoq é íchyí íwâ pé le, myiqhtoi pyoq pé* lé, haû su ga taí wú bekô.

Gye Pé Lé Chyitdap Râ Hkyô

Mht 5:38-48; 7:12

27 Hau htoq agó, ngá dang gyô nyi bang nungmoq lé ngò taí kôlé, nungmoq é gye pé lé chyitdap nyi keq; nungmoq lé a naù a wôm é bang lé ge é hkyô kut keq;

28 nungmoq lé nhîng é bang lé,

shimân byi keq; nungmoq lé rhoi é bang lé kyûdung byi keq. ²⁹ Nang lé bo-pyuq rahkyam shut pyuq byi sù lé, rahkyam dum hkâm byi shi aq; náng bumó hkyut yu é sù lé, buzo le dum hkyut byi shi aq; ³⁰ nang lé rajung jung dúng é sù lé le, byí pyám aq; náng zè yu pyám byí é su chyáng mai le, hkâdúng yù lo. ³¹ Nungmoq ô nau é dông supé lé kut nhâng nau é su, yhangmoq lé le kut byi keq.

³² Nungmoq lé chyitdap é bang lé za chyitdap kô le gi, nungmoq é matú hai akyû bò kó rà lhú? Yubak dap bang le, yhumsing lé chyitdap é bang lé gi, chyitdap nyi akô. ³³ Nungmoq lé ge é dông kut nyi é bang lé za, ge é dông kut nyi kô le gi, nungmoq é matú hai akyû bò kó rà lhú? Yubak dap bang le haû su kut nyi akô. ³⁴ Supé lé zè chyí byí le, dum wó tau byi rà su dut é bang lé za, chyí byí le gi, nungmoq é matú hai akyû bò kó rà lhú? Yubak dap bang lháng chyí byí é myhó dum wó yù shoq, yubak dap é bang lé chyí byí akô. ³⁵ Nghut kôlhang, nungmoq gi, nungmoq é gye pé lé chyitdap mù, ge é dông kut byí nyi keq. Dum wó tau yù rà lé myoq a byu é za, chyí ngho byi keq; haû su kut jáng, nungmoq wó é chyunghuq ko rà eq, Myhang htáng htúm Su é yhangzô pé dut rà nghut lhê; hkâsu mù gà le, Yhang gi, jeju a dat bun bang eq agè ashop é bang lé ge é kut nyi ri. ³⁶ Nungmoq é Íwa Garai Gasang shogyo nhikmyin sê é su, nungmoq le shogyo nhikmyin nyi keq.

A Jéyáng Râ Hkyô

Mht 7:1-5

³⁷ A jéyáng é za nyi keq; haû jáng, nungmoq le jéyáng é a hui kó rà nghut lhê. A doqđân é za nyi keq; haû jáng, nungmoq le doqđân é a

§ 6:23 Myiqhtoi pé le zing-ri huì é yanmai, yhangmoq chyunghuq wó nyi akô. Haû eq rajung za, jamjau huì é bang nga-nhúng le chyunghuq wó rà nghut lhê. * 6:26 Myiqhtoi pyoq pé gi, Garai Gasang jéyáng é hui rà.

hui kó rã nghut lhê. Mara hkyut byi keq; haũ jãng, nungmoq le mara hkyut byi é hui kó rã nghut lhê. ³⁸ Byi keq, haũ jãng, nungmoq le dum byi é hui kó rã nghut lhê. Mãn é búng mai byíng mui shũn shoq nhũn chyng, dũn chyng kat mù, nungmoq é tanghkoí hkaũ má lik kat byi é hui kó rã. Hkãsu mù gã le, nungmoq lik byi é bung eq, nungmoq lé dum lik byi rã nghut lhê." gã ri.

³⁹ Hau htoq agó, Yhang dangtũ ralhum dõng yhangmoq lé dum tai é gi, "Myoqjit sũ gi, myoqjit sũ lé hkyô wó tũn shit lhê lú? Yhanghik í yuq é dongkong má byit gyó kó rã nghut lhê, a nghut kó lú? ⁴⁰ Jongzo gi, sará htoq gyaú rã a nghut; nghut kõlhang, gũm shoq mhoq yũ bê sũ ó nghut kõlhang, yhumsing é sará su dut rã nghut lhê.

⁴¹ Yhumsing myoq hkaũ má lúng tô é siktũm† lé lhang a myit wũ é nhĩng, haĩ mù luĩ, nunggu nungmãng é myoqwàng‡ lé myang lhê lú? ⁴² Yhumsing é myoq má lúng tô é siktũm lé lhang a myàng sũ nhĩng, 'Gumang hpó ê, nãng myoq má lúng tô é myoqwàng lé, ngò choq pyám byi lé.' ngũ luĩ, nãng é gumang hpó lé hkãsu wó tai rã lú? Gegũn labyoq kut sũ ê, nãng é myoq má lúng tô é siktũm lé hí choq pyám aq. Haũ jãng sheq, nunggu nungmãng é myoq má wang tô é myoqwàng lé choq pyám byi rã matũ, nãng san za myàng rã nghut lhê.

Agãm Eq Ashi

Mht 7:17-20; 12:34-35

⁴³ A ge é ashĩ zuĩ é, ge é shigãm hkãmá le a joq. Ge é ashĩ zuĩ é, a ge é shigãm le a joq. ⁴⁴ Haũ mù luĩ, shigãm hkangmó lé, zuĩ é ashĩ lé wũ mù wó sê hkyin yu lhê. Dangké, zubyap mai maihpáng-shi

† 6:41 Siktũm ngũu e gi, yubak mara kô é lé tai lhê. ‡ 6:41 Myoqwàng ngũu e gi, yubak mara atiq azo lé tai é nghut lhê.

ó le a myang hpyoq yũ wũ, zugyóm mai le tsibiyiq shi a wó hpyoq yu wũ. ⁴⁵ Ge é sũ gi, yhumsing é i-myit unghkaũ mã é sutdò mai ge é zè pé lé lhoq htoq shit lhê. Agè ashop é sũ gi, yhumsing é i-myit unghkaũ mã é agè ashop é sutdò mai, agè ashop é zè pé lé lhoq htoq shit lhê. Haĩ mù gã le, yhang é i-myit unghkaũ mã byíng mui tô é lé za, yhang é nhut mai tai htoq lo é nghut lhê.

Luqhtãn Htoq Má Yhũm Sai Sũ Eq Myi Chĩn Dum Má Yhũm Sai Su É Hkyô

Mht 7:24-27

⁴⁶ Ngò tai é eq rajung za lhang a wó chãng kut kô é nhĩng, haĩ mù luĩ, nungmoq Ngo lé 'Yhumsing ê, Yhumsing ê.' ngũ nyi akô lú? ⁴⁷ Ngá chyáng lé mù, ngá dang gyô yũ luĩ, chãng kut é sũ ó nghut kôle, hkãsu é sũ eq wuí é lé ngò nungmoq lé shit kyo kôle. ⁴⁸ Haũ yuq gi, wahpang yhũm sai le, nik nik du luĩ a dui é lunghtãn htoq má apũn awang hi é sũ eq wuí lhê. Wui jê lò luĩ wuibaũ pé eq yhũm haũ lé lo gũn kõlhang, gĩng gĩng tĩng tĩng sai to bê nghut luĩ, haũ lé a wó gun nhũn. ⁴⁹ Ngá dang gyô yũ mù, a chãng sũ gi, apũn awang a sai é za myi chĩn dum má wahpang yhũm sai sũ eq wuí nyi ri. Wuibaũ pé eq yhũm haũ lé lo gun kat é eq, haũ hkũn jãng, lêng gyop byuq ri. Yhũm haũ byoq hten byuq é gi, yũ wũu a bò loshoq dut byuq rã nghut lhê." gã ri.

7

Romaq Gyezau Rayuq É Lumjĩng Myit

Mht 8:5-13; Yhn 4:43-54

¹ Yesuq gi, shiwa byu pé lé ban mhoqshit é htang má, Kaperna-um wà shut wang ló ri. ² Haũ hkũn, Romaq gyezau rayuq é chyitdap dui-nhãng zoshãng gi, shĩ-nò no nyi ri. ³ Haũ u lé, gyezau hpó gi, Yesuq

é hkyô lé wó gyo jáng, yhâng é dui-nhâng zoshâng lé lhoq gê byi râ matú, Yesuq lé é ji lò keq ga, Yudaq suwún wuí lé nhang kat ri. ⁴ Haú bang gi, Yesuq chyáng jé é kô é hkûn, "Yhang gi, nang shí hkyô kut byi râ matú gingdán é sù, yhang nghut nyi ri; ⁵ hkâsu mù gà le, yhang gi, nga-nhông amyû lé chyitdap é eq, ngamoq matú tara-jong le kut byi sù nghut ri." ga luí, Yhang lé zuq zuq dúng wut nyi akô. ⁶ Haú mù luí, Yesuq gi, yhangmoq eq rahá za e ló ri.

Haú yhùm eq hká hé a wê é má jé jáng, Romaq gyezau hpó, yhâng é luzúm wuí lé taí nhang kat é gi, "Yhumsing Yesuq ê, nang gûng lé hkâlhôq hkyik lo. Nang, ngá é laishîn-htâng má, lé nang râ lháng ngò má a gingdán. ⁷ Haú mù, ngò, nang chyáng jé lé râ matú gingdán é sù a nghut; Nang, dang rahkun za taí kat laq, haú hkûn, ngá é dui-nhâng zoshâng ge ló râ nghut lhê. ⁸ Hkâsu mù gà le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê, rayuq lé 'Ê aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jûn lé le, 'Shí kut aq!' nghu le, yhang kut lhê." gà ri.

⁹ Yesuq gi, dang haú lé wó gyo jáng, haú yuq é hkyô lé maú byuq luí, Yhang htâng châng é shiwa byu pé lé lhing wú mù, "Ngò, nungmoq lé taí kôlé, Israelaq amyû má lháng, shí í lumjing é sù lé, Ngò a myang wú." ga taí ri. ¹⁰ Nhang kat é bang yhùm má dum taú jé jáng, no nyi é dui-nhâng zoshâng gi, ge to lánq é lé ló myang akô.

Shí Sù Lé Dum Lhoq Tui É Hkyô

¹¹ Hau htâng hkâ-myháng a myáng má, Yesuq gi, Yhâng é chángzô pé eq, shiwa byu moq mó le mù rahá za Na-in gà é wà shut e ló akô. ¹² Haú wà wàng hkum má jé

lo é hkûn lé, chuimó myhí é yuqzo te gi, shí mù, yhâng é mâng lé waq htoq lé lo akô. Wà byu myo myo le, chuimó myhí haú eq rahá châng lé lo akô. ¹³ Yhumsing gi, haú chuimó myhí lé myàng jáng, yhang lé wú shogyo luí, "Hkâ-ngaú." ga taí ri.

¹⁴ Yesuq gi, gung shut huí é mù, loq èq é záng kat ri. Haú hkûn, waq tô é bang le jáng yap to byí akô. Yhang gi, "Zorâm ê, ngò, nang lé taí lhê, toq aq." ga taí ri. ¹⁵ Haú hkûn, shí bê sù gi, toq zûng mù dang taí lo ri. Yesuq gi, zorâm haú lé yhângnú chyáng dum ap byí ri.

¹⁶ Byù lhunglhâng bang gyuq maú bùm kôluí, Garai Gasang lé hkya-ôn é dang gi, "Myiqhtoi mó, nga-nhông chyáng lé pô htoq bê nghut ri. Garai Gasang gi, Yhâng é amyû lé garúm râ ga lé kûm wú nyi ri." ga taí nyi akô. ¹⁷ Haú Yesuq é hkyô eq sêng é ludang lé, Yuda mau eq haú mau awui ayàm jowò hkanqmó má taí pyo myhín ló bum akô.

Yesuq Eq Wui-myhup Sará Yohan É Hkyô

Mht 11:1-19

¹⁸ Haú hkûn, wui-myhup sará Yohan é chángzô pé gi, haú hkyô banshoq yhang lé lo taí kyô akô. ¹⁹ Haú mù luí, Yohan gi, yhâng é chángzo í yuq lé ji yù mù, haú Yhumsing chyáng nhang kat luí, "Nang gi, haú jé lé lô râ Sù nghut lhê lú? Haú a nghut jáng, ngamoq, góyuq lé lánq ra shirâ lú?" ga, myí nhang kat ri.

²⁰ Haú nhik gi, Yesuq chyáng jé jáng, "Nang gi, haú jé lé lô râ sù nghut lhê lú? Haú a nghut jáng, ngamoq góyuq lé myoqbyu lánq nyí ra shirâ lú?" ga luí, Wui-myhup Sará Yohan gi, ngá-nhik lé nánq chyáng myí nhang kat ri." ga taí akô.

²¹ Haú u yhang, Yesuq gi, nò zo hpyo zo, noli nojàng huí é bang eq agè ashop é nat dap jun dap

é byù myo myo lé, lhoq gê byî ri. Myoqjit bang myo myo lé le, myoq dum myàng nhang ri. ²² Haú hkûn, Yesuq gi, yhangnhik lé, "Myàng mi-myàng, wó gyo má wó gyo, Yohan lé ló taí kyo keq; myoqjit bang, myoq wó myàng bekô; hkyî hten bang le, wó so bekô; manggâm dap bang le, lhoq gê byî é hui bekô; nojit bang le, wó gyo bekô; shî bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. ²³ Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

²⁴ Yohan é chángzô nhik ló byuq é htàng má, Yesuq gi, Yohan eq séng luí, byù moq mó lé taí é gi, "Nungmoq gi, haí lé hpuq wú rá matú, haú yoso shut e akô lúhú? Lai èq hik nhûn é jamgâm lé wú rá matú nghut akô lúhú? ²⁵ Haú a nghut jáng, haí lé wú rá matú e akô lúhú? Nú-nhâm é mebu wut sù lé wú rá matú e akô lúhú? A nghut! Wú keq, gyai hpaú é mebu wut luí agùn agó wó bang gi, hkohkâm-wâng pé má sheq ru nyi lhê. ²⁶ Haú nghut le gi, haí lé wú rá matú ê kô é lúhú? Myiqhtoi rayuq lé lúhú? Haú kúm nghut ri. Ngò, nungmoq lé taí kôlé, Yohan gi, myiqhtoi htoq lháng gyaú sù nghut lhê. ²⁷ Haú yuq é hkyô lé, Chyúmdang má kâ tô é gi,

'Wú aq, Náng é hkyô lajang lángrâ matú, Ngá é lagyo lé, Náng é hí má Ngò nhang kat rá nghut lhê.'^{*}

gâ ri. ²⁸ Ngò, nungmoq lé taí kôlé, myiwe wui mai hku kat é bang má, Yohan htoq je kô é rayuq lháng a nyi, nghut kôlháng, Garai Gasâng é mingdán má je tiq dik sù gi, Yohan htoq je kô lhê." gâ ri.

²⁹ Mingbyù lunglhâng bang eq kang guq bang gi, dang haú pé lé wó gyo kôjáng, Yohan byî é bap-tisma lé hkâm yù kô é nghut mù

luí, Garai Gasâng é dingmán é hkyô lé sê gyô yu akô. ³⁰ Hparishe pé eq tará sará pé kúm gi, Yohan byî é bap-tisma a hkâm yù kômù luí, Garai Gasang hen lajang é hkyô lé yhumsing gung é matú he-ngik pyâm akô.

³¹ Yesuq dum taí é gi, "Haú mù luí, byù myû shî lé, Ngò, hai èq taí kê wú rá lúhú? Yhangmoq hai eq wui akô lúhú? ³² Yhangmoq gi, 'Nungmoq é matú, ngamoq sampyí mut byi kôlháng, nungmoq gi, a gó kó,

ngamoq ngaù hkyangsâng kôlháng, nungmoq gi, a ngaù kó.'

ga luí, gai pé má zùng uchyang rayuq eq rayuq wut taí lhùm nyi é zosháng wui eq wui akô. ³³ Hkâsu mù gâ le, Wui-myhup Sará Yohan jé lé luí, muk a zo, tsibiyiq a shuq é nyi le le, 'Yhang gi, nat gang dap sù nghut ri.' ga luí, nungmoq taí akô. ³⁴ Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô. ³⁵ Nghut kôlháng, hpaqchyí byéng-yá é yhangzô pé gi, hpaqchyí byéng-yá tengmán é hkyô lé saksé hkâm byî nyi akô.*" gâ ri.

Yubak Dap É Myiwe Rayuq, Yesuq Lé Xú But Byî É Hkyô

³⁶ Hparishe rayuq gi, Yesuq lé yhâng chyáng zang zo rá matú ji kat ri. Haú mù, Yesuq gi, haú Hparishe é yhùm má wàng luí zo rá matú zung tô ri. ³⁷ Haú hkûn, wú keq, haú wâ mâ é yubak dap é myiwe rayuq gi, Yesuq haú Hparishe é yhùm má zò zung tô é lé sé jáng, gyai hpau dap é namngón xú bo é luq hpyù bòng yu lé luí, ³⁸ Yesuq é nunghtáng hkyí wàng má ngau yap to mù, Yhâng é hkyí má ngaubyî èq záng lhoq teq byi jáng, ûxam èq but

* 7:27 Mal 3:1 * 7:35 Nghut kôlháng, Garai Gasâng é hpaqchyí byéng-yá lé lhom hap yu é banshoq bang gi, Garai Gasâng é hpaqchyí byéng-yá haú, tengmán ri ga saksé hkâm nyi akô.

sut pyám byî ri. Dum nghut jáng, nhut eq puq luî mura lé but byî ri.

³⁹ Yesuq lé ji é Hparishe wá gi, haú lé myàng jáng, "Shí yuq myiqhtoi nghut le gi, Yhang lé záng htông é sù, ó yuq nghut é eq hkâsù é yubak dap é myiwe nghut é lé, Yhang sé râ nghut lhê." ga luî, yhang é unghkaú má myit nyi ri.

⁴⁰ Yesuq gi, "Simun ê, Ngò, nang lé taí râ rajung joq ri." ga taí ri.

Simun le, "Sarâ ê, taí aq." ga taí kat ri.

⁴¹ Haú hkûn, Yesuq gi, "Ngùn chyí zo sù rayuq chyáng, chyín dap é byù í yuq nyi ri. Rayuq gi, denari† ngo shô chap, rayuq gi, ngo xê chap dap ri. ⁴² Haú nhik gi, chyín xap râ ngùn a wó kôluî, chyín yhumsîng gi, yhangnhik lé xap a ra lò gâ pyâm ri. Haú mù luî, haú nhik mâ é hká yuq gi, yhang lé je chyitdap râ lúhú?" ga myí ri.

⁴³ Simun gi, "Je myo lhoq lhut hui sù, nghut râ su ngam ri." ga tù taí ri.

Yesuq gi, "Nàng myit e đông jô ri." ga taí ri.

⁴⁴ Haú hkûn, Yesuq, myiwe zo haú lé lhing wú luî, Simun lé, "Nàng myiwe zo shí lé myang lhê lúhú? Ngò, nàng é yhûm má wang le, hkyí chí râ uchyam, nàng a byi, yhang kúm gi, ngaubyí eq ngá hkyí lé tik byi luî, yhang é xam eq sut pyám byi bê. ⁴⁵ Nàng gi, ngo lé nhut eq a puq nghut ri; yhang kúm gi, ngò yhúmkaú má wang é mai ngá hkyí má a no loshoq puq nyi râ. ⁴⁶ Nàng gi, ngá ulhum má xù a but byi wú, yhang kúm gi, ngá é hkyí má nàm ngón é mura but byi bê nghut ri. ⁴⁷ Haú su mù, ngò, nàng lé taí lé, haú myiwe gi, je chyitdap luî, yhang wó é yubak myo myo lé hkyut pyám byí é hui bê. Shau za mara hkyut pyám byí é hui sù gi, shau za chyitdap sù nghut ri." ga taí ri.

⁴⁸ Yesuq gi, myiwe haú lé le, "Ngò, nàng é yubak mara hkyut pyám byi bê." ga taí ri.

⁴⁹ Rahá zung tô é bang gi, "Yubak mara lháng wó hkyut pyám byi sù, shí yuq gi, ó wá nghut lhê lúhú?" ga luî, myit nyi bum akô.

⁵⁰ Yesuq gi, "Nàng é lumjîng myit eq nang lé hkyi yù bê, ngón za ló aq hkoi." ga luî, myiwe haú lé taí kat ri.

8

Yesuq Htâng Châng É Myiwe Wui

¹ Hau htâng hkâ-myháng a myáng má, Yesuq gi, Garai Gasâng é mingdán hkyô eq sêng é gabú danglù lé taí kyo uchyang, Yhâng é lagyo raxe í yuq eq rahá za, rawa htâng rawà jé e ló ri. ² Hau htoq agó, nat gang dap é mai le, nõhpyo mai le Yesuq eq lhoq ge yu é myiwe wui, nat nyhit nat lhoq htoq pyám byi huí é, Magadalaq wà má é Mariq le, ³ Herut é ikun zum sù Kuza é yhumsîng myhí Yoanaq le, Susannaq le, gotù myiwe wui myo myo le, Yesuq eq rahá nghut akô. Haú bang gi, yhumsîng wó du é í Yesuq eq lagyo pé lé byi zo byi huq nyi akô.

Kyôshi Sân É Hkyô

Mht 13:1-23; Mrk 4:1-20

⁴ Wà hkgang wà mó mâ é bang gi, Yesuq chyáng zup zîng lé lo bùm kômù shiwa byù moq mó zup ming tô é hkûn, Yesuq dangtú đông taí kyô é gi, ⁵ "Kyô hkyó sù rayuq gi, kyôshi san râ ga htoq e ló ri. Yhang, kyôshi sân kat é hkûn, ra-am gi, hkyô má gyó ang mù, byu eq záng nâng pyeq pyâm lhê, maulat nghoq pé eq hte zo pyâm lhê dut ri. ⁶ Ra-am gi, luqgok yò má gyó ang mù, yuq htoq lo é hkûn, myigùng a teq é yanmai nyhuí shi byuq akô. ⁷ Ra-am gi, zugyóm hkaú má gyó ang luî, zubyap eq rahá yuq htoq lô mù, wup pyâm é hui bê nghut ri.

† 7:41 Denari rachap gi, ra-nyí lhê é byù rayuq é zuihpau eq wuí ri.

⁸ Nghut kôlhang, ra-am gi, myihpún bo é jang má gyó ang mù, yuq kô lò jáng, rashô tú myô jat lo ri." ga tai ri.

Yhang haú su ga tai nyi é hkûn, "Gyô yù râ nohkyap dap sù gi, gyô yù sháng gaq!" ga le, htê mó èq tai kat ri.

⁹ Haú hkûn, Yhâng é chángzô pé gi, dangtú shî hai lichyúm nghut lhê lú ga, Yhang lé myi akô. ¹⁰ Yhang gi, "Garai Gasâng é mingdán eq sêng é sê gyo wuí é hkyô pé lé sê gyo râ ahko ahkáng, nungmoq lé byi to bê. Nghut kôlhang, góbâng matú gi, 'Wú to kôlhang, a myàng kó sháng, gyô nyi kôlhang, a sê gyo kó sháng.'[✧] nghû, ngò dangtú dông tai lhê.

¹¹ Ahkui lhê é dangtú shi é lichyúm gi, îsu nghut ri: kyôshi gi, Garai Gasâng é mungdang nghut nyi lhê. ¹² Hkyô má gyó âng é kyôshi gi, haí eq wuí lhê lú gâ le, haú mungdang lé byu pé wó gyô é htâng má, lumjîng é má le, hkyi yu é má le, a jé kó sháng gaq ga luí, yhangmoq é i-myt hkaú mai nat Tsadán èq mungdang haú lé, lé yu pyâm é hui bang eq wuí lhê. ¹³ Luqgok yò pé má gyó âng é kyôshi gi, haí eq wuí lhê lú gâ le, haú mungdang lé wó gyo jáng, gabú myit èq hap yù kôlhang, amyit a wó chín mù, rayoq rabun za lumjîng luí, gungláu hui é nyi má, dum htak ló byuq é bang eq wuí lhê. ¹⁴ Zugyóm má gyó âng é kyôshi gi, haí eq wuí lhê lú gâ le, haú mungdang lé gyô yù luí, yhumsing é asak dui e ló é hkyô má, shí ipyat lhê é myit wui myit hke hkyô, ngùn zè sutgan eq mingkan ngón hkyô má myup byuq luí, mo é ashî a zuí é bang eq wuí lhê. ¹⁵ Hpún bo é myigùng má gyó é kyôshi kúm gi, haí eq wuí lhê lú gâ le, haú mungdang lé lhumzui luí ge é i-myt èq ban gyô yù mù, ging tíng shoq zuí zìng luí, wó jân é i-myt èq ashî zuí é bang eq wuí lhê.

Myibung Htûn É Hkyô

Mrk 4:21-25

¹⁶ Myibung lé tap mù, aú èq nghop tô é le, yhupchong ô má tô tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô. ¹⁷ Hkâsu mù gâ le, a htoqzê loshoq haq tô é zè haí le a joq, a sé a byông htoq loshoq wó zaú tô é zè le haí a joq nghut ri. ¹⁸ Haú mù luí, nungmoq hkâsu wó gyô yu é hkyô lé sidiq nyi keq, haí mù gâ le, wó to sù lé gi, jat byi shirâ, a wó su chyáng mai kúm gi, yhang wó to bûn é mã é lé lháng, yu pyâm byi shirâ nghut lhê." ga tai ri.

Yesuq É Yhângnu Eq Yhanggu Pé Mht 12:46-50; Mrk 3:31-35

¹⁹ Haú hkûn, Yesuq é yhângnu eq yhanggu pé gi, Yhâng chyáng lé lô kô le, shiwa byu pé lúm chyûn chyap to kômù, Yhâng chyáng a wó wang é kó nghut ri. ²⁰ Haú hkûn, Yhang lé, "Náng nu eq nunggu pé gi, nang lé hui naú luí, shinggan má láng yap bum akô." ga tai kyo akô.

²¹ Yesuq gi, yhangmoq lé, "Garai Gasâng é mungdang lé gyô yù luí, châng é bang gi, Ngá nu eq Ngá gû pé nghut akô." ga luí, yhangmoq lé tú tai kat ri.

Laidun Mó Lé Yesuq Lhoq Zîm É Hkyô

Mht 8:23-27; Mrk 4:35-41

²² Ra-nyí lé, Yesuq gi, Yhâng é chángzô pé lé, "Nga-nhúng nhông he hpoq shut dap e ló sháng." ga tai luí, lhai má wàng mù gû dap e ló akô. ²³ Yhangmoq gû dap e ló é hkûn lé, Yesuq gi, yhup myhî tô ri. Haú u lé, nhông haú má laidun mó lò luí, lhai má wui byíng lô mù, yhangmoq myup shî râ su dut lò nyi bekô nghut ri.

²⁴ Haú mù, yhangmoq gi, Yesuq chyáng hui é luí, Yhang lé nhaú pun

mù, "Yhumsîng ê, Yhumsîng ê, nga-nhúng myup ló nyi ri." ga tai akô.

Haú hkûn, Yhang toq luí, laidun eq wuìlhêng pé lé tân kat jáng, haú pé gi, zim za dut ló byuq bê. ²⁵ Haú mù, Yesuq gi, "Nungmoq é lumjîng myit gi, hkâmá nghut akô lúhú?" ga luí, yhangmoq lé myí ri.

Yhangmoq kúm gi, gyuq mau byuq bùm kôluí, "Shí yuq gi, hkasû é byù nghut lhê lhà? Yhang hkunmó hkyó jáng, lai eq wuìlhêng pé lhang gyo byi ri-nhung!" ga luí, rayuq eq rayuq myí lhum bum akô nghut ri.

Nat Lé Hkat Htoq Byí É Hkyô

Mht 8:28-34; Mrk 5:1-20

²⁶ Hau htâng, yhangmoq gi, Galile mau tû tap mâ é Gerase byu pé é mau má jé dap e ló bekô. ²⁷ Yesuq kong shut doq ló le, haú wâ mâ é nat gang dap é sù rayuq gi, Yhang lé hui ri. Haú yuq gi, yhûm má le a nyi é za, mebu a dap é, lupdùng má myáng myáng nyi nyi sù nghut ri. ²⁸ Haú yuq gi, Yesuq lé myàng jáng, wut garu luí, yhâng é hkyí wang má paí gop to mù, "Myhang htâng é Garaí Yhangzo Yesuq ê, Nang gi, ngò eq haí séng lhê lúhú? Ngo lé a zing-ri râ matú, ngò nang lé dúng nyi lhê." ga luí, htê mó eq tai garú nyi ri. ²⁹ Hkâsu mù gâ le, Yesuq gi, agè ashop é nat lé haú yuq gùng mai htoq ló râ matú, tân pyâm é yanmai nghut ri. Byù haú yuq lé nat gâng eq adàm dàm wang júng hkangmó, loq eq hkyí má toqjâng tuí eq tuí shung, kyum xâng tô é eq, zúng tô é nghut kôlhang, lhang hpyit pyâm pyâm kut é htoq ago, nat gâng eq yhang lé yoso hkaú shut lãngmhap yù yù kut nyi ri.

³⁰ Yesuq gi, yhang lé, "Náng myíng haí gâ lhê?" ga myí kat é hkûn, yhang gi, "Legio* gâ lhê." ga tû tai ri. Haí mù gâ le, yhâng chyáng nat gang myo myo wang lúng tô é yanmai nghut ri. ³¹ Nat

jùm gi, yhangmoq lé nik dik htùm é Lasang-dong shut a kôn kat râ matú, Yesuq lé chôm dúng nyi bum akô.

³² Haú u lé, waq rajùm mó gi, bùm yàm má dù but zô nyi bum akô nghut ri. Haú mù, yhangmoq gi, waq pé chyáng wàng nhâng laq ga, Yesuq lé ahkáng dum dung dung kut kojáng, Yesuq gi, yhangmoq lé ahkáng byi kat ri. ³³ Haú mù luí, nat gang jùm gi, byù haú yuq chyáng mai htoq ló kôluí, waq pé chyáng wàng byuq bekô nghut ri. Haú hkûn, waq haú jùm gi, gampyoq mai nhông hkaú shut rut din yán wang ló kôluí, myup shi byuq bekô nghut ri.

³⁴ Waq zúng bang gi, haú su dut é lé myàng jáng, hpang din ló kômù, myuq hkaú mâ é bang eq awui ayàm mâ é bang lé ló tai kyô akô nghut ri. ³⁵ Haú mù, wó gyô é bang gi, haú hkyô lé wú râ matú htoq lé lo akô. Yhangmoq gi, Yesuq chyáng jé lé kô é hkûn, nat gang htoq byuq hui sù, Yesuq é hkyí wang má mebu wut to luí, byù gè rayuq su zùng to lãng é lé myàng kômù, gyuq dan bùm bekô nghut ri. ³⁶ Nat dap sù lé hkâsu kut luí lhoq ge yu é hkyô lé myang é bang gi, gôbang lé tai kyô akô nghut ri. ³⁷ Haú hkûn, Gerase byu pé é mau mâ é lhunglhang bang gi, gyuq dan dik kôluí, Yesuq lé yhangmoq é mau mai htoq ló byuq râ matú, chôm dúng tóngbán akô. Haú mù luí, Yesuq gi, tau ló byuq râ matú lhai má wàng bê nghut ri.

³⁸ Nat htoq byuq huí é sù gi, Yesuq htâng cháng râ matú, Yesuq lé dúng tóngbán ri. ³⁹ Nghut kôlhang, Yesuq gi, "Nang, yhûm shut sheq ló mù, Garaí Gasang, nang lé hkâ-í kut byi bê hkyô lé, ló tai kyo aq." ga luí, yhang lé ló nhâng bê nghut ri. Haú hkûn, yhang htoq ló mù, Yesuq

* 8:30 Legio gâ é lichyúm gi, gyezo 4000 eq 6000 gyoro bo é gyedap lé tai ri.

yang lé hkâ-í kut byi bê hkyô lé, haú wà rawà bang lé lô taí kyô ri.

Ya-iruaq É Yhangzo Byizô É Hkyô Eq, Yesuq É Bu Lé Lé Záng É Myiwe Rayuq É Hkyô

Mht 9:18-26; Mrk 5:21-43

⁴⁰ Ahkuí, Galile byu pé gi, Yesuq dum taú lò rà lé láng nyí kô é nghut mù, Yhang dum taú gû dap lo é hkûn gabú myit eq lhom te yu akô. ⁴¹ Haú hkûn, Ya-iruaq gâ é tarajong má up sù rayuq gi, jé lé lô mù, Yesuq é hkyí wang má hkyihput htuaq luí, yhang yhûm má lé rà matú ji nyi ri. ⁴² Hkâsu mù gâ le, raxe í zân bò bê é, yhangzo byizo te gi, shi lô nyi é yanmai nghut ri.

Haú mù, Yesuq cháng e lô le, shiwa byu pé gi, Yhang lé záng htung lo bum akô. ⁴³ Haú u lé, raxe í zân sui yuí luí ngunzè lhungháng ban pyám shoq chi sará pè chyáng yâ wú kôlhang, hká yuq le a wó yâ gè byi é† myiwe myhí rayuq le haú hkaú má bo tô ri. ⁴⁴ Myiwe haú gi, Yesuq é nunghtáng má huí lé mù, Yhang é bushi htáng má ê záng kat eq, suí yui é ana gi, ge byuq bê nghut ri.

⁴⁵ Haú hkûn, Yesuq gi, "Ngo lé, ó yuq záng bê lú?" ga luí myi jáng, lhungháng bang gi, a sé ga he nyi bùm kô é hkûn lé, Petruq gi, "Yhumsing ê, shiwa byu pé gi, nang é lînghkyuq mai nang chyáng chyín chyap wang lo bùm kô é yanmai, nang lé záng bekô rà nghut lhê?" ga taí ri.

⁴⁶ Yesuq gi, "Byù rayuq ngo lé lé záng mù, ngá chyáng mã é hpungwup a-tsam htoq lô é lé, ngò châng sé kat ri." ga taí ri.

⁴⁷ Haú jáng, myiwe myhí haú gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyí wang má ngóm gop kat luí, haí mù Yhang lé záng é hkyô eq,

hká dông ge lô byuq é hkyô pé lé, shiwa byù banshoq bâng é hí má Yesuq lé taí kyô nyi ri. ⁴⁸ Yesuq gi, "Ngá zo ê, nang é lumjing myit gi, nang lé lhoq gè byi bê nghut ri, ngón za lô aq hkoi!" ga luí, myiwe haú lé taí kat ri.

⁴⁹ Yesuq gi, dang ru taí nyi ashí hkûn, tarajong má up sù Ya-iruaq é yhûm mai byù rayuq jé lé lô luí, "Nung zo gi, shi byuq bê, haú sará lé hkâlhoo hkyik nyí lo." ga luí, Ya-iruaq lé taí kyô ri.

⁵⁰ Yesuq gi, dang haú lé wó gyo jáng, "Hkâgyuq, za lumjing aq, haú jáng, yang ge byuq rà nghut lhê." ga luí, Ya-iruaq lé taí ri.

⁵¹ Yesuq gi, Ya-iruaq é yhûm má jé é hkûn lé, Petruq, Yohan, Yakuq, eq haú myiwe zô é yhangnu eq yhangwa mai lai luí, yhûm haú má, ó lé le a wàng nhâng kut ri. ⁵² Haú u lé, lhungháng bang zoshâng hau é yanmai, ngaubyi ngau-nhap eq yón nyi akô. Yesuq kúm gi, "Hkâ-ngaú kó, yang shi byuq é a nghut, yhup myhí tô é sheq ru nghut lhê." ga luí, yhangmoq lé taí ri.

⁵³ Zoshâng gi, shi byuq bê lé yhangmoq sé kôluí, yhangmoq gi, Yesuq lé wuizui kut pyám byí akô.

⁵⁴ Yhang kúm gi, myiwe zo hau é loq má zuí to mù, "Zoshâng ê, toq aq." ga taí kat ri. ⁵⁵ Haú mù luí, yhang woi-nyí dum taú wàng mù, haú hkûn jáng toq yap ri. Haú jáng, Yesuq gi, zoshâng haú lé zôjung byi keq, ga yhangmoq lé taí kat ri. ⁵⁶ Haú myiwe zô é yhangnu eq yhangwa nhik gi, gyaí maú byuq akô. Nghut kôlhang, Yesuq gi, haú dut é hkyô ó lé le a taí kyo rà matú, yhangnhik lé taí hkûm tô ri.

9

Lagyo Raxe Í Yuq Lé Nhang Htoq Kat É Hkyô

Mht 10:5-15; Mrk 6:7-13

† 8:43 Ngunzè lhungháng ban pyám shoq chi sará pè chyáng yâ wú kôlhang, hká yuq le a wó yâ gè byi gâ é, Chyúmdang ra-am má gi, bo lhê; ra-am má gi, a bò.

¹ Yesuq gi, haù lagyo raxe í yuq lé wut yù mù, nat gang banshoq lé wó hkat htoq pyám rà matú eq, noli nojàng wó lhoq gè rà matú, yhangmoq lé wum-o a-tsam eq ahko ahkáng byí ri. ² Hau htàng má, Garai Gasâng é mingdán hkyô hko kyo rà eq, nõhpyo lhoq gè byi rà matú nhang htoq kat ri. ³ Yesuq gi, yhangmoq lé, "Hkyowui é matú, dumbáng, etap, zoshuq, ngùn eq, bu htaí lháng hkâwûn hkâchùng kó. ⁴ Nungmoq hká yhûm má wàng kôlhang, haù wâ mai dum htoq lô é buinyi jé shoq, haù yhûm má za nyi nyi keq. ⁵ Nungmoq lé a lhom hap yu é bang lé gi, yhangmoq é wâ mai htoq lô é hkûn, nungmoq lé a lhom hap yu é saksé dut sháng gaq, nungmoq é hkyiwa má dap é hpuilhaù lé yhangmoq é myoq hí má ko hkyô pyám to keq." ga taí kat ri. ⁶ Haù mù, yhangmoq gi, htoq e ló luí, wâ hkang wâ mó má haù gabú danglù hko kyo uchyang, hká jé hkâmá nõhpyo lhoq gè byi wún akô.

*Herut Maú Úng-âng É Hkyô
Mht 14:1-12; Mrk 6:14-29*

⁷ Haù su dut é hkyô banshoq lé, mauzau Herut wó gyô yù luí myit wuí nyi ri. Hkâsu mù gâ le, ra-am gi, Yohan shi é mai dum dui toq lô bê ga, ⁸ ra-am gi, Eliyaq dum pô htoq lo ri ga, haù mai, ra-am gi, hí hpyang lhé é myiqhtoi rayuq yuq dum dui toq lô bê ga luí, taí bùm kô é yanmai nghut ri. ⁹ Herut gi, "Yohan é ulhum lé, ngò hpyit pyám nhâng bê, nghut kôlhang, shí í wá taí byông bùm kô é gi, ó wâ nghut lhé lhú?" ga luí, Yesuq lé myàng shoq ga ho nyi ri.

*Byù Ngo Hkying Lé Yesuq Zoshuq
Byi Tsô É Hkyô*

Mht 14:13-21; Mrk 6:30-44; Yhn 6:1-14

¹⁰ Lagyo pé dum taù lo é hkûn, yhangmoq kut lai lo é hkyô pé, Yesuq lé taí kyô akô. Haù hkûn,

Yesuq gi, yhangmoq lé shuí chùng mù, Bet-saida gâ é wâ mó shut tsik za e ló byuq ri. ¹¹ Shiwa byu pé gi, haù hkyô lé châng sé kômù, Yhâng htàng châng e ló akô. Yesuq le yhangmoq lé lhom hap yù mù, Garai Gasâng é mingdán hkyô lé taí kyo luí, nõhpyo gè naù bang lé, lhoq gè byi ri.

¹² Buigyùm zó má, lagyo raxe í yuq gi, Yhâng chyáng huí é mù, "Haù shiwa byu pé lé, awui ayàm mâ é yhûm pé eq wâ pé má ló mù, zoshuq hô zo luí ló yhup kó sháng gaq, ló nhâng aq. Hkâsu mù gâ le, ahkuí nga-nhùng gi, yoso má nghut nyi ri." ga luí, Yhang lé taí akô.

¹³ Haù hkûn, Yesuq gi, "Nungmoq, yhangmoq lé rajung jung byi tso keq." ga tù taí ri.

Yhangmoq gi, "Shí myhò bang lé tso rà zoshuq a é wui le gi, ngamoq chyáng muk-yo muk ngo long eq ngozo í du mai lai luí, haí le a wó nghut ri." ga taí akô. (Hkâsu mù gâ le, yuqgè wui baù lháng ngo hkying kô nghut ri.)

¹⁴ Nghut kôlhang, Yesuq gi, "Shí bang lé rahpúng má ngo xê kô kut luí, zùng nhang to keq." ga luí, Yhâng e chángzô pé lé taí ri. ¹⁵ Yhangmoq lé Yesuq taí é eq rajung za, banshoq bang lé zùng nhang to bekô. ¹⁶ Haù hkûn, Yesuq gi, haù muk ngo long eq ngozo í du lé yù mù, mauhkùng shut tu wú to luí, jeju ban hkya-on jáng, haù lé ajap jap hpé luí, shiwa byu pé lé, châng to byi rà matú, Yhâng é chángzô pé lé byi kat ri. ¹⁷ Haù hkûn, yhangmoq banshoq bang zô gyí bùm kô é htàng má, haù chángzô pé gi, zô myhit tô é pé lé, raxe í mung bying shoq wó guq tsing yu ashí kô nghut ri.

*Yesuq Gi, Hkrisduq Nghut Lhé
Ga Petruq Taí É Hkyô*

Mht 16:13-28; Mrk 8:27—9:1

¹⁸ Radâm lé, Yesuq gi, Yhang baù kyûdùng nyi é hkûn, chángzô

pé le, Yhang eq rahá nghut akô. Hau htâng, Yhang gi, yhangmoq lé, "Shiwa byu pé gi, ngo lé ó yuq nghut lhê ga, taí akô lhu?" ga myí ri.

¹⁹ "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhê é myiqhtoi rayuq yuq dum dui toq lo é nghut ri ga, taí akô." ga luí, yhangmoq tú taí akô.

²⁰ Dum, Yhang gi, yhangmoq lé, "Nghut kôlhang, nungmoq gi, ngo lé ó yuq nghut lhê nghu akô lhu?" ga myí ri.

Hau hkûn, Petruq gi, "Nàng gi, Garai Gasang nhâng byí é Hkrisduq nghut ri." ga tú taí ri.

²¹ Shí hkyô ó lé le a taí kyo sháng gaq ga, Yesuq, yhangmoq lé taí hkûm pyâm ri. ²² Hau mù, Yhang gi, "Hau Byu Yhangzo gi, zing-rí é myo myo hui zo luí, suwún wui, hkyangjong agyi pé, tará sará pé èq he-ngik pyâm é hui mù, sat pyâm é hui ra rá nghut lhê, hau htâng sum nyí nghû rá buinyi má, lhoq toq yu é hui rá nghut lhê." ga taí ri.

²³ Hau htâng, banshoq bang lé Yhang dum xoq taí é gi, "Ngá htâng cháng naû sù ó yuq nghut kôle, yhumsing gùng yhumsing he-ngik pyám mù, nyí wui yhumsing é tapzìng lé waq chùng* luí, cháng ra rá nghut lhê. ²⁴ Hkâsu mù gâ le, yhumsing é asak lé hkyi yù naû sù ó yuq nghut kôle, asak sum rá nghut lhê; nghut kôlhang, Ngá é yanmai, yhumsing é asak sum pyâm é sù kúm gi, asak hkyi yu é hui rá nghut lhê. ²⁵ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, haí akyù bò rá lhu? ²⁶ Ngò eq Ngá é dang lé, lhom hap yù rá lé hoq é sù ó yuq lé le, hau Byu Yhangzo gi, yhumsing é hpungwup shing kang eq, Yhâng Wâ é hpungwup shing kang,

hau chyoyúng maumang lagyô pé é hpungwup shing kang eq jé lé é hkûn, hoq pyám rá nghut lhê. ²⁷ Ngò, nungmoq lé teng za taí kôlé, shi má yap tô é bang ra-am gi, Garai Gasâng é mingdán lé a myang é za shí kó rá a nghut." gâ ri.

Mosheq Eq Eliyaq Yesuq Lé Hui Nyo É Hkyô

Mht 17:1-8; Mrk 9:2-8

²⁸ Dang hau taí é htâng, shit nyí kô nghut jáng, Yhang gi, kyùdng rá ga Petruq, Yohan, Yakuq pé lé shuí chùng mù, bùm shut doq ló ri. ²⁹ Kyù dúng nyi le, Yesuq é myoqdong gi, ihpyô isâm htaí lò mù, Yhâng é mebu gi, lhap su duq bang lo ri. ³⁰ Hau hkûn, wú keq, Mosheq eq Eliyaq gi, hpungwup shing kang eq htoq lé lò luí, Yesuq eq dâng nyo lhum nyi akô. ³¹ Yhangmoq gi, Garai Gasang myit tô é hkyô Yerusalem wà mó má Yesuq shí hkâm é dông mai dik lò rá nghut é hkyô lé taí lhum nyi akô. ³² Petruq eq yhâng luzúm nhik gi, yhup mui nyi akô; nghut kôlhang, yhangmoq bún lo é hkûn lé, Yesuq é hpungwup shing kang lé le, Yhang eq rahá yap to su nhik lé le, myang kat akô. ³³ Hau nhik Yesuq chyáng mai gâng ló nyi é hkûn, Petruq gi, Yesuq lé, "Yhumsing ê, shí jowò má nganhúng nyi le ge ri, hau mù, Nàng é matú ralhùm, Mosheq é matú ralhùm, Eliyaq é matú ralhùm kut, ngamoq lé, zúm sùm lhum sai nhâng laq." ga taí kat kôlhang, yhang haí taí nyi é lé, yhang a sé.

³⁴ Petruq dang taí nyi ashí hkûn lé, mhut jé mù, yhangmoq lé htup zìng lo nyi ri. Mhut hau htup lo nyi é yanmai, yhangmoq gi, gyuq byuq akô. ³⁵ Hau mhut hkaú mai htoq lo é htê gi, "Shí yuq gi, Ngá zo nghut lhê; Ngò hkyin yu é Sù le nghut lhê; Yhâng é dang gyo keq." gâ ri. ³⁶ Dang htê hau zim jáng, Yesuq

* 9:23 Tapzìng lé waq chùng nghu é gi, Yesuq é yanmai jamjau hui é lé taí é nghut lhê.

yang baú nyi tô é lé, yangmoq myang akô. Yangmoq myang é hkyô lé, buinyi haú bun haú yoq má, ó lé le a taí kyô é zim za nyi byuq akô.

Nat Gang Dap É Yuqgè Zo Rayuq Lé Lhoq Gê Byi É Hkyô

Mht 17:14-18; Mrk 9:14-27

³⁷ Hau htâng nyi, yangmoq bùm haú mai gyó ló kô le, byu moq mó gi, Yesuq lé lhom te yu akô. ³⁸ Haú hkûn, byu hpúng haú mâ é byu rayuq wut garû htoq ló é gi, ³⁹ "Sarâ ê, wú aq, ngá é zo te yuqzo gi, nat wang júng mù dân so dân loq garû lo lhê, guttsû gi, agut gut dut shoq langhtân nhang lo lhê kut mù, nat gi, yang lé gyai myáng shoq zing-ri yù yù kut nyi ri. ⁴⁰ Nat haú lé hkat pyám byi kó laq nghû luí, Náng é chángzô pé lé ngò dúng wú kôhang, yangmoq a wó hkat pyám byi kó. Haú mù, ngá zo lé lhoq gê byi râ matú, ngò gi, nang lé gyai myit lum é eq dúng kat lhê." gâ ri.

⁴¹ Haú mù luí, Yesuq gi, "Lumjúng myit a bo é eq agè ashop é amyú pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lú? Nung zo lé, shí shut shuí lé lô aq." ga tù taí ri.

⁴² Zoshâng haú, lé lo nyi le lháng, nat gang gi, yang lé lhoq lhêng to mù langhtân nhang ashí. Yesuq kúm gi, haú agè ashop é nat lé tân kat luí, zoshâng haú lé lhoq gê byi mù, yhâng wa lé dum ap byi ri. ⁴³ Nyi mi-nyí gi, Garai Gasâng é kô dik é hpungwup a-tsam lé maú hong nyi bum akô.

Lhunglhâng bang gi, Yesuq kut é muzó haú lé maú nyi bùm kô le, Yesuq gi, ⁴⁴ "Haú Byu Yhangzo gi, byu pé é loq má ap pyám é hui zo râ nghut lhê. Dang shí hkun lé nungmoq é no má rago gyô wun to keq." ga luí, chángzô pé lé taí ri. ⁴⁵ Yhangmoq kúm gi, dang haú lé a sê gyo kó, hkâsu mù ga le,

haú gi, yangmoq é matú a sê gyo sháng gaq ga luí, nghop tô ashí yan-mai nghut ri. Dang hau é lichyúm lé, Yesuq chyáng yangmoq a wám myi kó nghut ri.

Ó Yuq Gi, Kô Dik Sû Nghut Râ Lhú?

Mht 18:1-5; Mrk 9:33-40

⁴⁶ Hau htâng, lagyô pé gi, hká yuq sheq, kô dik sû nghut lhê lú ga, rayuq eq rayuq taí myíng myô lhúm nyi akô. ⁴⁷ Yesuq kúm gi, yangmoq é unghkaú má myit nyi é hkyô lé sé byi luí, zoshâng rayuq lé shuí yù mù, Yhâng nàm má shap to luí, ⁴⁸ "Shí zoshâng lé Ngá é myíng mai hap sû ó yuq nghut kôle, Ngo lé hap yu é sû nghut bê; Ngo lé hap yù sû ó yuq nghut kôle, haú Ngo lé nhang kat é Sû lé hap yu é le nghut lhê. Haú mù luí, nungmoq banshoq má, je tiq sû gi, je ko sû nghut lhê." ga luí, yangmoq lé taí ri.

⁴⁹ Haú hkûn, Yohan gi, "Yhumsîng ê, Náng é myíng láng luí, nat gâng pé lé hkat pyám byi wún é byu rayuq lé, ngamoq myang ri. Yang gi, ngamoq chyáng a lòm sû nghut é yanmai, yang lé ngamoq hkûm pyám é nghut lhê." ga taí ri.

⁵⁰ Yesuq kúm gi, "Yang lé hkâhkúm kó, nungmoq é gyè hkyam shut a nyi sû gi, nungmoq é hkyam shut nyi sû nghut lhê." ga luí, yang lé taí ri.

Samariq Wà Bang Yesuq Lé A Lhom Hap Yu É Hkyô

⁵¹ Ahkuí, Yesuq gi, Yang lé mauhkûng shut shuí toq yù râ buinyi chyâng lò bê nghut mù, Yerusalem wà mó shut é râ lé myit hpyit to luí, Yhâng é hí má lagyo nhang kat ri. ⁵² Lagyo haú bang gi, Yhâng matú râ é hkyô lajang láng râ ga, Samariq wà rawà má wang ló akô. ⁵³ Nghut kôhang, Yesuq gi, Yerusalem wà mó shut laí e ló é sû nghut é yanmai, haú wà bang gi, Yang lé a lhom hap yù kó. ⁵⁴ Hau

hkûn, lagyo Yakuq eq Yohan nhik gi, haù lé myàng jáng, "Yhumsîng ê, yhangmoq lé lhoq htên pyám rà matú, ngá-nhik mauhkûng mai myi wut hkyó le, a gè lúh?" ga luí, Yesuq lé myí akô. ⁵⁵ Yhang kúm gi, lhing wú luí yhangnhik lé, tân pyâm ri, ⁵⁶ haù mù luí, yhangmoq gi, gó wá shut e ló byuq akô.

Yesuq É Htâng, Hkâsu Kut Cháng Râ Hkyô

Mht 8:19-22

⁵⁷ Yhangmoq haù hkyô má e ló kô le, byù rayuq gi, "Nàng hká e le hká ngò cháng rà." ga luí, Yesuq lé tai ri.

⁵⁸ Yesuq gi, haù yuq lé, "Wamhkuí pé gi, hkyûng wó akô, nghoq pé le, nghoqsut wó akô. Nghut kôlháng, haù Byu Yhangzo gi, ulhum to jang lháng a wó é nghut ri." ga tai pyám ri.

⁵⁹ Dum rayuq lé, "Ngá htâng cháng aq." ga tai jáng, haù yuq gi, "Yhumsîng ê, ngá wa lé, ló yhùm pyám rà ahkáng hí byi shi laq." ga tai ri.

⁶⁰ Yesuq gi, yhang lé, "Shí bê bang† gi, shí bê bang yhangchang yhùm lhum kó sháng gaq; nghut kôlháng, nàng gi, Garai Gasâng é mingdán hkyô lé, ê hko kyo aq." ga tai ri.

⁶¹ Byù rayuq dum, Yhang lé, "Yhumsîng ê, ngò le náng htâng cháng rà, nghut kôlháng, ngá yhumbyù lé hí hkyang ló shít to rà ahkáng byi shi laq." ga tai ri.

⁶² Yesuq gi, "Yò hpuy li zui mù htâng shut lhing wú sù ó yuq nghut kôlháng, Garai Gasâng é mingdán eq a gingdán." ga luí, yhang lé tai ri.

10

Yesuq, Chángzô Pé Nyhit Xê Yuq Lé, Nhang Htoq Kat É Hkyô

† **9:60** Shí bê bang gâ é gi, woi-nyí má shi to bang lé gâ lhê. * **10:1** Chyúmdang ra-am má gi, chángzo nyhit xê í yuq ga le kâ tô ri. † **10:2** Kyô nghù é gi, Yesuq lé lumjîng naù kôlháng tai kyo rà bang a nyi luí láng tô é bang nghut ri. ‡ **10:2** Kyô shu byù nghu é gi, Yesuq é hkyô gabú danglù lé tai kyo bang nghut ri.

¹ Hau htâng má, Yhumsîng gi, gotú chángzô pé nyhit xê yuq* lé hkyin yù mù, Yhang e ló rà wà eq jowò hkangmó shut í yuq razúm zúm kut luí, Yhâng é hí má é nhang kat ri. ² Yesuq gi, yhangmoq lé, "Kyô† shù yù rà myo shoq joq kôlháng, mù zui rà byù gi, shaù nyi ri. Haù mù, haù kyô Yhumsîng lé, Yhâng é kyô yò má, kyô shu byù‡ myo myo nhâng byi rà matú, dung keq. ³ Nungmoq e ló keq! Wamhkuí hpúng má nhang hâng kat é sau zô pé lé su, Ngò, nungmoq lé nhang kat é nghut lhê. ⁴ Ngùn htung eq, etap, hkyí-tsung pé hkâyú chùng kó, hkyô má ó lé le hkâshichyên kùn nyi kó.

⁵ Nungmoq gi, hká yhùm má wàng e ló kô le, 'Shi yhùm ngu-ingón nyí sháng gaq.' nghù luí, hí tai keq. ⁶ Haù yhùm má nguingón hkyô eq gingdán sù nyi é nghut le gi, nguingón hkyô haù gi, haù yuq é ahtoq má joq to rà nghut lhê. Haù a nghut jáng, nguingón hkyô haù gi, nungmoq chyáng dum tau lo byuq rà nghut lhê. ⁷ Haù yhùm má nyi to mù, yhangmoq haí byí le haí zo haí shuq keq; hkâsu mù gâ le, mù zui sù gi, zuihpau wó yú gíng lhê; haù mù, nungmoq rayhum htâng rayhùm hkâhtot nyi wún kó.

⁸ Nungmoq hká wà má wang ló kôlháng, yhangmoq lhom hap yù kô é nghut le gi, nungmoq é hí má yhangmoq htung to byí é zoshuq lé, zo keq, shuq keq. ⁹ Haù mâ é nò bang lé lhoq gè byi mù, 'Garai Gasâng é mingdán gi, nungmoq eq chyáng lò bê nghut ri.' nghù luí, yhangmoq lé tai kyo keq. ¹⁰ Nghut kôlháng, nungmoq hká wà má wang ló kô le, yhangmoq a lhom hap yu é nghut le gi, haù wá mâ é hkyô mó má htoq é mù,

11 'Ngamoq é hkyî má dap tô é nungmoq wà má é hpuilhaú lháng, nungmoq lé hkyang pû tsò nyî rá matú ngamoq ko hkyô pyâm to byi bê. Nghut kôlhang, Garai Gasâng é mingdán gi, chyàng lò bê hkyô lé, sé to keq.' nghû luí taí keq. 12 Ngò, nungmoq lé taí kôlé, haú buinyîš lé, haú wâ gi, Sodom wà htoq má je hpuzo rá nghut lhê.

13 Kurazin wà mó ê! Nàng dîngnyé wó ri! Bet-saida wà mó ê! Nàng dîngnyé wó ri! Nungmoq chyáng lé kut shit é laklai kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhîng mù, jimê tú wut lhê, myiwap kyaq gyûn lhê kut zung ngûng to bekô rá nghut lhê. 14 Haú mù, tarâ jéyáng é nyí jé jáng, nungnhik gi, Turuq myuq eq Sidun myuq htoq má je hpuzo* kó rá nghut lhê. 15 Dum mù, Kaperna-um wà nàng ê, nàng gi, mauhkûng jé shoq waq toq é hui rá l hú? A nghut, mosumhkung má sheq gyó rá nghut lhê." ga taí ri.

16 Hau htâng má, chángzô pé lé dum xoq taí é gi, "Nungmoq é dang gyo sù gi, ngá é dang gyo sù le nghut bê; nungmoq lé he-ngik é sù gi, ngo lé le he-ngik é sù nghut bê; ngo lé he-ngik é sù gi, ngo lé nhang kat sù lé le, he-ngik é sù nghut bê." ga taí ri.

Nyhit Xê Yuq Dum Taú Jé Lo É Hkyô

17 Hau htâng, haú chángzo nyhit xê yuq gi, gabú myit eq dum taú lò mù, "Yhumsîng ê, náng é myîng lé lang jáng, nat gâng pé lháng ngamoq é dang lé gyô bum akô." ga taí akô.

18 Haú su ga taí kôjáng, Yesuq tú taí é gi, "Tsadán gi, mauhkûng htoq mai lhap hpyat é su byit gyó lo é lé ngò myang kat bê. 19 Wú keq!

Ngò gi, nungmoq lé, lhangmui eq gogok pé lé wó nang rá eq gumlau gyè pé é wum-o a-tsam banshoq lé wó ûng rá ahko ahkáng lé byi bê nghut mù luí, hai eq le nungmoq lé wó lhoq hten rá a nghut lo. 20 Nghut kôlhang, nat pé nungmoq é dang gyô é lé za hkâgabú nyí kó, mauhkûng htoq mâ é asak jîhpán laiká buk má nungmoq é myîng bo to bê lé sheq gabú nyí keq." ga taí ri.

21 Haú u lé, Yesuq gi, Chyoiyúng Woi-nyí má gabú é myit byîng lô mù, "Mauhkûng eq myigung é Yhumsîng, Áwa ê, Nàng gi, haú pé lé, hpaqchyí byéng-yá bò bang eq myit hpaqchyí sé bâng é hí mai haq nghop to luí, zoshâng wui lé tûn shit bê nghut é yanmai, Ngò, Nang lé hkyâ-ôn lhê ô. Nghut bê, Áwa ê, haú gi, Nàng ô nau é hkyô nghut ri.

22 Ngá Wa gi, lhunglhang lé Ngá é loq má ap byi to bê. Garai Gasang Yhangzo ó nghut é gi, Áwa Garai Gasang mai lai luí ó le a sé; Áwa ó nghut é lé le, haú Zo eq haú Zo mai sé nhâng rá matú hkyin yu é bang mai lai luí, ó a sé." ga taí ri.

23 Hau htâng má, Yhâng é chángzô pé shut lhîng wú luí, yhangmoq lé baú za haq taí kat é gi, "Nungmoq byu-myàng é hkyô pé lé, myang é myoq pé gi, hkungsô wó nyi ri. 24 Hkâsu mù gâ le, Ngò, nungmoq lé taí kôlé, nungmoq wó myâng, wó gyô é pé lé, myiqhtoî pé eq hkohkam pé myo myo gi, myàng naú gyo naú kôlhang, a wó myâng, a wó gyo kó nghut ri." ga taí ri.

Gè É Samariq Byù

25 Haú hkûn, wú keq, tarâ sará rayuq gi, toq luí, Yesuq lé, "Sarâ é, ahtum abyuq é asak lé wó yú shoq, ngò hkâsu kut rá rá lhê l hú?" ga luí, Yhang lé myí chyam wú ri.

Š 10:12 Haú buinyî gâ é gi, Garai Gasâng tarâ jéyáng é buinyî lé gâ lhê. * 10:14 Nungnhik je hpuzô é hkyô gi, mauhpo kumlhá myo myo myang é nghut kôlhang, myit a lhîng kô é yanmai nghut ri.

26 Yesuq gi, "Mosheq é tarâ má hkâsu ga kê tô ri lúhú? Nàng haú lé hkâsu nghap yu nyi lè lúhú?" ga luí, yhang lé myí ri.

27 Haú yuq gi, "'Haú Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, náng é wum-o banshoq, náng myit é hkyô banshoq eq, chyitdap râ lèhê;*' náng gûng lé nàng chyitdap é su, náng é chyangnâm mâ é bang lé le chyitdap aq.'*" ga tû taí ri.

28 Yesuq gi, "Nàng tû taí é dang jô ri; haú su yhang kut aq, haú jáng nàng gi, asak duí râ nghut lèhê." ga yhang lé taí ri.

29 Nghut kôlhang, haú yuq gi, yhâng gungdu dingmán é lé, tûn shit naú luí, "Ngá é chyangnâm mâ é sù gi, ó yuq nghut lèhê lúhú?" ga luí, Yesuq lé myí ri.

30 Yesuq tû taí é gi, "Byù rayuq gi, Yerusalem wà mó mai Yeriho wà shut gyó ló le, damyaq eq htûng huí ri. Damyaq haú bang gi, yhâng é mebu pé lé hkyut shang pyám byi kôluí, rayúm gyut shoq bat nha mù, aluq shoí shí jáng sheq tô pyám to kôluí ló byuq bekô. 31 Haú u lé, hkyangjong rayuq gi, haú hkyô mai laí âng ló le, haú damyaq huí sù lé myàng jáng, koi laí ló byuq ri. 32 Haú eq rajung za, Lewiq rayuq le, haú mai laí ló é hkûn, haú yuq lé myàng jáng, koi laí ló byuq ri. 33 Nghut kôlhang, Samariq byù rayuq le, haú mai laí ló é hkûn, haú yuq leq tô é lé myàng jáng, wú shogyo luí yhâng chyáng huí é mù, 34 yhâng é dàm má, xú eq tsibiyiq wing shoq gyun luí, rago za htop byi mù, yhâng é logúng má, haú yuq lé bún ke luí, bing-yhûm ralhum má jé shoq shuí ló mù, gôn lajang byí ri. 35 Htang nyí lé, yhang gi, haú bing-yhûm yhumsîng lé ngùn Denari í chap shê byi mù, taí é gi, 'Shí yuq lé wú lajang byi laq, yhâng gùng má

nàng myo chung záng é banshoq lé ngò dum taú lò jáng, lo xap râ.' gá ri." gá ri.

36 Hau htâng, tarâ sará lé, "Nàng gi, byù haú bang sum yuq má damyaq huí sù é chyangnâm mâ é dông nghut sù gi, hká yuq nghut râ su ngam ri lúhú?" ga luí, Yesuq myí ri.

37 Haú tarâ sará gi, "Haú yuq lé shogyo sù nghut ri." ga taí ri.

Yesuq gi, "Nàng le haú dông ló kut aq." ga luí, yhang lé taí kat ri.

Mariq Eq Mahtaq Nhik Chyáng Yesuq Ê Jé Ê Hkyô

38 Ahkuí, Yesuq eq Yhâng é chángzô pé hkyô xoq sô e ló kô le, wà rawà má jé wang ló é hkûn, Mahtaq gá é myiwe rayuq gi, Yesuq lé yhâng yhûm má lhom te yu ri. 39 Mahtaq gi, Mariq gá é yhanggu myiwe zo rayuq wó ri. Mariq haú gi, Yhumsîng Yesuq é hkyí wang má zung to mù, Yhang mhoqshit é dang lé gyô nyi ri. 40 Mahtaq kúm gi, saí tso saí huq é amû myo luí, gýn bôn nyi ri. Haú mù luí, yhang huí é mù, "Yhumsîng ê, ngá gu gi, saí tso saí huq é amû má, ngo lé baú za rap kut tô é lé, nàng a bo myàng byi lúhú? Ngo lé, lé garúm sháng gaq, yhang lé taí byi laq." ga luí, Yesuq lé taí ri.

41 Haú hkûn, Yhumsîng gi, "Mahtaq, Mahtaq, nàng gi, muzó lé za ma nyi mù, myit myo myit chiq é huí nyi ri. 42 Nghut kôlhang, je ahkyak é hkyô gi, rahkat za nghut lèhê. Mariq kúm gi, haú je ge é hkyô lé hkyin yù bê nghut ri. Haú lé yhâng chyáng mai wó yu pyám byi râ a nghut." ga luí, yhang lé tû taí ri.

11

Yesuq Mhoqshit Ê Kyûdung Dang Mht 6:9-13; 7:7-11

¹ Ra-nyí lé, Yesuq gi, jowò rawò má kyûdung nyi ri. Yhang kyû ban

dung jáng, Yhâng é chángzo rayuq gi, "Yhumsing ê, Yohan gi, yhâng é chángzô pé lé kyûdung rá hkyô mhoq byi é su, ngamoq lé le mhoq byi laq." ga Yhang lé tái ri.

² Haú hkûn, Yhang gi, "Nungmoq kyûdung le,

'Mauhkûng htoq tsáng myhâng mâ é ngamoq é Áwa ê,

Náng é mying gi, chyoiyung nyi sháng gaq.

Náng é mingdán jé lô sháng gaq.

³ Ngamoq nyi wui rá é zoshuq lé, ngamoq lé nyi wui byi laq.

⁴ Ngamoq lé shut é byù banshoq bâng é mara lé, ngamoq hkyut pyám byi é yanmai, ngamoq é mara lé le hkyut pyám byi laq.

Ngamoq lé, agúng alaú hkyô má hkâwâng nhâng.'

ngû keq." ga luí, yhangmoq lé mhoqshit ri.

⁵ Yesuq yhangmoq lé dum tái é gi, "Dangké, nungmoq chyáng mâ é rayuq sù gi, buinùm wó é ngû sháng, yhang gi, gunggàm yoq má haú yuq chyáng ê luí, 'Buinùm hpó ê, ngo lé muk sùm long byam chyí byi kat laq, ⁶ haí mù gâ le, ngá buinùm rayuq byin we mai ngá chyáng jé nyi tô ri. Ngò gi, yhang lé byi tso rá haí le a joq byam dut tô ri.' ga tái é hkûn, ⁷ yúmhmaú shut mâ é sù gi, 'Ngo lé, hkâlê lhoq hkyik lo, hkum le myhí pyám bê, ngá zoshâng wui le ngò eq rahá yhupjang má yhup to bekò. Ngò, nang lé haí le a wó toq yû byi lo.' ga tu kat ri. ⁸ Ngò, nungmoq lé tái kôlé, buinùm nghut é yanmai za gi, muk a kâm toq byi lo kôhang, zuq zuq dúng nyi é yanmai, haú yuq lé, yhang ra châ é banshoq toq yû byi rá nghut lhê.

⁹ Haú mù, ngò, nungmoq lé dum tái kôlé, dung keq, haú jáng, nungmoq lé byi rá nghut lhê; hô keq, haú

jáng, nungmoq myàng kó rá nghut lhê; hkum má kok keq, haú jáng, nungmoq lé hpóng byi rá nghut lhê.

¹⁰ Hkâsu mù gâ le, ó yuq nghut kôle, dung sù wó rá; hô sù myàng rá; hkum kok sù lé gi, hpóng byi rá nghut lhê.

¹¹ Nungmoq îwâ pé má, ó yuq wá, yhumsing yhangzo muk dúng le, luqgok byi kó rá lhú? Ngozo dúng le, lhangmui byi kó rá lhú?

¹² Woq-ú dúng le, gogok byi kó rá lhú? ¹³ Agè ashop é bang nungmoq lhang gi, nungmoq é zo wui lé, ge é chyunghuq dat byi kô le nhing, mauhkûng htoq tsáng myhâng mâ é nungmoq é Íwa gi, Yhang lé dúng é bang lé, je riyhang haú Chyoiyung Woi-nyí byi rá nghut lhê." ga tái ri.

Mara Hûn É Dang Lé Yesuq Tú Tái É Hkyô

Mht 12:22-30, 43-45; Mrk 3:20-27

¹⁴ Radàm lé, Yesuq gi, byù rayuq lé dang a wó nyô shoq kut tô é nat gang lé, haú yuq chyáng mai hkat htoq pyám ri. Nat haú htoq ló byuq é htáng má, dang a wó nyô sù gi, dang wó nyo nyi é yanmai, byù moq mó gi, chòm maú byuq bum akô. ¹⁵ Nghut kôhang, yhangmoq chyáng mâ é ra-am gi, "Yhang gi, nat gâng pê é zau Bezebulaq é wum-o a-tsam eq za, nat gâng pé lé wó hkat pyám é nghut ri." ga tái bum akô nghut ri. ¹⁶ Ra-am le, Yhang lé, mauhkûng mâ é kumlhá tún shit wú laq ga dúng chyam wú akô.*

¹⁷ Yesuq kúm yhangmoq myit nyi é hkyô lé sé mù tái é gi, "Íkun byoq é mingdán hká lhum nghut kôle, hten byuq rá za nghut lhê; haú eq rajung za, ikun byù yhangchang rayuq eq rayuq byoq lhùm é yhùm htú gi, byoq gâng lhum rá za nghut lhê. ¹⁸ Nat pé le yhangmoq yhangchang byoq gâng

* **11:16** Byu pé gi, Yesuq lé Garai Gasang nhang kat é hkyô lé saksé myàng nàu luí, mauhpo kumlhá dúng nyi akô.

lhùm nyi kô é nghut le gi, Tsadán é mingdán gi, hkâsu kut wó gíng to râ lhú? Ngò isu nghu taí é gi, nungmoq ngo lé Bezebulaq é wum-o a-tsâm eq za, nat gâng pé lé hkat pyâm ri ga kô é yanmai nghut lhê. ¹⁹Ngò gi, Bezebulaq é wum-ô eq za, nat gâng pé lé hkat htoq é nghut jáng, nungmoq é chángzô pé gi, ó yuq é wum-o a-tsâm eq za, nat gâng pé lé hkat pyám kô é nghut lhê lhú? Haû mù luí, yhangmoq gi, nungmoq lé jéyáng é bang dut bekô râ nghut lhê. ²⁰Nghut kôlhang, Ngò gi, Garai Gasâng é wum-ô eq nat gâng pé lé hkat htoq pyâm é nghut jáng, Garai Gasâng é mingdán† gi, nungmoq chyáng jé bê nghut ri.

²¹Wum-o bo é sù rayuq gi, yhâng é yhùm lé, shâm, lhâm chùng luí zúng tô é nghut jáng, yhâng é sutzè pé gi, rago za wó joq to râ nghut lhê. ²²Nghut kôlhang, yhâng htoq wum je bo é sù lé luí, haú yuq lé, lé zân ung pyâm é nghut le gi, yhang lum tô é shâm, lhâm lé, hkyom yu pyám byi luí, yhâng é sutzè pé lé, gam yu pyám byi râ nghut lhê.‡

²³Ngá hkyam shut a dap sù gi, Ngo lé gyè kut sù nghut lhê. Ngò eq rahá a shuí tsing sù gi, lhoq pyo pyâm é sù nghut nyi ri.

²⁴Haû agè ashop é nat gi, byù rayuq chyáng mai htoq lô mù, kyuq huí é jowò pé má sô yông e lô luí, no râ jowò hkat ho wú le, a myang hô nghut ri. Haú hkûn, yhang gi, 'Ngò nyi lai lo é yhùm má dum taù lô wú râ.' ga taí ri. ²⁵Yhang dum taù jé lô wú le, yhùm haú gi, shum pyám mù san za rago dut to láng é lé lô myang ri. ²⁶Haú jáng, yhang gi, dum taù é mù, yhâng htoq je wuí é nat nyhit nat lé shuí lò luí, haú má lo wàng nyi to bekô. Haû mù, haú yuq é nyi

yap sâmlai gi, hí lhê htoq má je wuí lò bê nghut ri." ga taí ri.

²⁷Haû su ga, Yesuq taí nyi é hkûn, haú shiwa hpong mâ é, myiwe zo rayuq htê mó o mó eq Yhang lé taí é gi, "Nang lé wun é ûng wam eq nàng shuq é nauwang gi, hkungsô wó nyi ri ô!" gâ ri.

²⁸Yesuq gi, "Garai Gasâng é mungdang gyô yù luí châng kut é bang gi, je riyhang hkungsô wó kó râ nghut lhê." ga taí ri.

Mauhpo Kumlhá Lé Dung Kô É Hkyô

Mht 12:38-42; Mrk 8:12

²⁹Shiwa byu pé jat myô zup zîng lo é hkûn lé, Yesuq taí é gi, "Shí ipyat lhê é byu pé gi, agè ashop é bang nghut akô. Yhangmoq gi, limik kumlhá dúng nyi bùm kôlhang, Yonaq é kumlhá mai lai luí, gotû haí le tûn shit râ a nghut. ³⁰Yonaq gi, Ninewe wà byù pé hí má kumlhá§ dut é su, haú Byu Yhangzo gi, shí pyat lhê é byu pé hí má, kumlhá dut râ nghut lhê. ³¹Maupyí mâ é hkohkâm myhí gi, maumyí lô htâng é mai lé lô mù, Sholumon é hpaqchyí dang lé, lé gyô yù bê nghut mù, haú tará jéyáng é buinyi má, shí ipyat mâ é byu pé eq rahá toq lô luí, yhangmoq lé mara hùn râ nghut lhê. Wú keq, Sholumon htoq ko sù gi, ahkuí shí má jé nyi to bê. ³²Ninewe wà byu pé gi, Yonaq, mungdang hko kyô é hkûn myit lhíng kô é nghut mù, tará jéyáng é buinyi má, shí ipyat eq rahá toq lô luí, yhangmoq lé mara hùn kó râ nghut lhê. Wú keq, Yonaq htoq ko sù gi, ahkuí shí má jé nyi to bê.

Myibung Su Duqbó Râ Hkyô

Mht 5:15; 6:22-23

† **11:20** Garai Gasâng é mingdán gâ é gi, byù htoq má le, nat htoq má le, Garai Gasâng yhang uphkan é lé gâ é nghut lhê. ‡ **11:22** Haû eq rajung za, Yesuq gi, Tsadán lé zân ûng bê nghut é yanmai, agè ashop é nat pé lé byu pé chyáng mai, wó hkat pyám bê nghut ri. § **11:30** Kumlhá gi, Yonaq, ngozô wamdaù má sum nyi lúng é su, Yesuq le, shí bê mai sum nyi nghú râ nyi má, dum duí toq lô râ hkyô lé taí nau é nghut ri.

³³ Myibung lé tuq mù go pyâm é jowò má tô tô é le, mũng eq nghop tô é le, ó a kut wú kó. Nghut kôlhang, wang lé lô bang myoq wó myâng rá matú kúm gi, tsungjang má tsung to to chyat kut akô. ³⁴ Náng é myoq gi, náng gungdu é myibung* nghut nyi ri. Náng é myoqjí ge é nghut le gi, náng é gungdu gón má maubó byíng mui to rá nghut lhê. Nghut kôlhang, náng myoq a ge é nghut le gi, náng é gungdu gón gi, mauchut tuq dut nyi rá nghut lhê. ³⁵ Haù mù, náng chyáng bo é maubó gi, mauchut byuq é, a chut byuq é lé wú nyi aq. Náng lumjínq é hkyô eq náng myit é hkyô gi, mauchut tuq a dut sháng gaq, sidiq nyi aq. ³⁶ Náng é ragúngdu gón má duqbó é nghut le gi, rawò má le mauchut é jowò a joq é za, myibung nang lé duqbó byi nyi é su, náng gungdu gón má duqbó nyi rá nghut lhê." ga tai ri.

Hparishe Pé Eq Tarâ Sará Pé Lé, Yesuq Mara Hun É Hkyô

Mht 23:1-36; Mrk 12:38-40; Luk 20:45-47

³⁷ Yesuq haù su ga ban tai é htâng má, Hparishe rayuq gi, yhang eq zang rahá zo rá matú, Yesuq lé ji ri. Haù mù, Yesuq gi, haù yhùm má wang ê mù zang zo rá ga siboí nàm má zung tô ri. ³⁸ Nghut kôlhang, Hparishe wá gi, zang zo rá hí má Yesuq loq a chí é lé, myàng luí maú nyi ri.†

³⁹ Haù mù luí, Yhumsing Yesuq yhang lé tai é gi, "Nungmoq Hparishe pé gi, góm eq zanghkoq lé ahtog shut za chí yúng nyi kômù, nungmoq é unghkaù má gi, lú zo lú shuq é eq agè ashop é hkyô pé byíng zan tô ri. ⁴⁰ Byù bâm pé ê, ahte‡ lé le, ahtog§ lé le, sai sù gi, Garai Gasang rayuq za nghut é lé, a sé kó lúh? ⁴¹ Nghut kôlhang, ahte

má bo é zè pé lé, ra châ é bang lé byi pyám keq; haù hkûn, nungmoq é matú banshoq gi, sân-yúng lô rá nghut lhê.

⁴² Hparishe pé ê, nungmoq gi, dingnyé wó ri, hkâsu mù gà le, nungmoq gi, gau-tsáng, shingtón pé eq zangxun mhan-haq ajù jù mã é, xê gambùm ragambùm lé gi, Garai Gasang lé byi nyi kômù, tarâ dingmán é hkyô eq Garai Gasang chyitdap é hkyô lé gi, lhai pyâm tô akô. Xê gambùm ragambùm byi é lé le cháng luí, tarâ dingmán é hkyô eq Garai Gasang lé chyitdap é hkyô lé le, kut nyi rá lhê.

⁴³ Hparishe pé ê, nungmoq gi, dingnyé wó ri, hkâsu mù gà le, tarajong pé mã é ahkyak dik é zúng jang pé lé le, gai pé má hkunggá é eq shichyên é dang lé le, nungmoq ô nau nyi bum akô.

⁴⁴ Nungmoq gi, dingnyé wó ri, hkâsu mù gà le, nungmoq gi, ahkô a dong lo mù, byu pé a sé luí, ahtog mai sô lai é lupdùng eq du akô." ga tai ri.

⁴⁵ Haù hkûn, tarâ sará rayuq gi, "Sará ê, náng haù su gà é gi, ngamoq lé le rhoi lhôm nyi é nghut bê." ga Yhang lé tú tai ri.

⁴⁶ Haù su ga jáng, Yesuq gi, "Nungmoq tarâ sará pé le, dingnyé wó ri. Hkâsu mù gà le, nungmoq gi, byu pé lé, wùn waq rá wui é noqkuq htùng tarâ wòlai lé wùn nhâng luí, yhumsing yhang gi, wò haù lé loqnyhuí eq lhang, a bo záng wú kó nghut ri.

⁴⁷ Nungmoq gi, dingnyé wó ri, hkâsu mù gà le, nungmoq gi, nungmoq é íchíy íwâ pé sat pyâm é myiqhtoí pé é lup lé luqtsuq tsuq akô. ⁴⁸ Haù mù luí, nungmoq gi, nungmoq é íchíy íwâ pé é muzó lé, myit bo huí é bang nghut nyi akô. Hkâsu mù gà le, yhangmoq gi, myiqhtoí

* **11:34** Myibung gà é gi, tengmán é mungdang lé wó sê yu é a-tsam lé, tai é nghut ri. † **11:38** Yudaq htùng tarâ má gi, zang a zo shi má loq chí rá lhê. ‡ **11:40** Ahte gà é gi, i-myit unghkaù lé tai ri. § **11:40** Ahtog gà é gi, gungdu lé tai ri.

pé lé sat pyám mù, nungmoq gi, lup háu pé lé luptsuq tsuq akô.⁴⁹ Haú mù luí, Garai Gasang, Yhâng é hpaqchyí byéng-yá mai taí é gi, 'Myiqhtoí pé eq lagyô pé lé, ngò yhangmoq chyáng nhang kat rá nghut lhê; háu bang má é ra-am lé gi, yhangmoq lhom sat pyám mù, ra-am lé gi, zing-ri kó rá nghut lhê.' gâ ri.⁵⁰ Haú su mù luí, mau htoq xâng hkún lhê é, Abelaq é sui mai, hkungga gyap eq noqkuq yhûm gyoro má sat pyám huí é Zahkariq é sui jé shoq, shun pyám é myiqhtoí pé é sui banshoq bâng é manglat gi, shí pyat má é byu pé lé hûn rá nghut lhê.⁵¹ Ngò, nungmoq lé taí kôlé, manglat háu pé lé gi, shí pyat má é byu pé lé, gè gè yhang hûn rá nghut lhê.

⁵² Tarâ sará pé ê, nungmoq gi, dingnyé wó ri, hkâsu mù gâ le, nungmoq gi, byu pé Garai Gasang lé sé ra zoqshi lé yu pyám byi kômù, yhumsîng yhang le a sé, sé naú bang lé le, hkûm zing tô akô nghut ri." ga taí ri.

⁵³⁻⁵⁴ Yesuq háu mai htoq ló é hkún, tarâ sará pé eq Hparishe pé gi, Yhang lé gyê kut mù, Yhâng é dang má mara wó myâng shoq ga, wuí é dangmyi myo myo myi luí, gyám wú nyi akô nghut ri.

12

Gegùn Labyoq Kut É Bang Lé Sidiq Râ Hkyô

Mht 10:28-33; 12:32; 10:19-20

¹ Haú u, byù hkyíng mun zup zîng lò mù, rayuq eq rayuq lháng záng nâng lhum shoq dut nyi é hkún, Yesuq, Yhâng é chángzô pé lé taí hi é gi, "Gegùn labyoq kut é Hparishe pé é múnchi lé koi sidiq pyám keq.² A byông htoq loshoq wó zaú nghop tô é, haí le a joq rá nghut lhê; a sé loshoq wó haq tô é le, haí a joq rá nghut lhê.³ Haú mù luí, nungmoq, mauchut hkaú má haq taí é dang banshoq lé, myoq myâng maubó

má wó gyô bùm kó rá nghut lhê. Gok hkaú má, dangsoq soq é lé le, yhumhkûng htoq mai taí pyo bùm bekô rá nghut lhê.

⁴ Ngá buinùm wuí ê, Ngò, nungmoq lé taí kôlé, gungdu lé za wó sat pyám mù, woi-nyí lé haí le a wó kut é bang lé, hkâgyuq kó.⁵ Nghut kôlháng, nungmoq ó lé za gyuq rá é lé gi, Ngò, nungmoq lé taí kyo kôlé, gungdu lé sat pyám é htáng má, woi-nyí lé ngaraí ming shut wó hkyô kat pyám é a-tsam wó sù lé kúm gi, gyuq keq. Nghut bê, Ngò, nungmoq lé taí kôlé, háu yuq lé za, gyuq nyi keq.⁶ Johkyáng ngo du lé, gyi htingchap í chap èq wó ùng pyám lhê a nghut kó lhú? Haú johkyáng radu lé lháng, Garai Gasang gi, tô-myhí pyám é a nghut.⁷ Garai Gasang gi, nungmoq é ulhum má é xâm banshoq lé lháng, nghap to gù nghut lhê. Haú mù, hkâgyuq kó; nungmoq gi, háu johkyáng myo myô htoq má lháng gù je bo é bang nghut lhê.

⁸ Ngò, nungmoq lé taí kôlé, byu pé hí má Ngo lé lhom yín yu é sù ó yuq nghut kôle, Garai Gasang é maumang lagyô pé é hí má, háu Byu Yhangzo gi, háu yuq lé lhom yín yù rá nghut lhê.⁹ Nghut kôlháng, byu pé é hí má Ngo lé he-ngik pyám é sù lé chyaú gi, Garai Gasang é maumang lagyô pé é hí má, he-ngik pyám rá nghut lhê.¹⁰ Haú Byu Yhangzo lé dang dông shut é sù gi, mara hkyut byí é wó hui ra nghut lhê; nghut kôlháng, háu Chyoiyúng Woi-nyí lé rhoi dang taí pyám é sù gi, mara hkyut byí é hui rá a nghut.

¹¹ Byu pé nungmoq lé jéyáng rá matú tarajong pé má le, agyi suwún wuí eq ahkáng ayá wó bâng é hí má le, shuí e ló kô é hkún, hkâsu kut rá lé le, hkâsu nghù tù taí rá lé le, hkâ-myit chiq kó.¹² Hkâsu mù gâ le, háu u lé yhang, Chyoiyúng Woi-nyí gi, nungmoq hkâsu taí rá hkyô

lé mhoqshit byi râ nghut lhê." ga taî ri.

Hpaqchyî A Bo É Sahtê Hpó Lé Dangtú Yu É Hkyô

¹³ Haù hkûn, shiwa hpúng hkaù mai, byù rayuq gi, "Sará ê, ngá-nhik tâng wó é muizê pé lé chôm gam lhum râ matú, ngá mang lé bo taî byi laq." ga luí, Yesuq lé taî ri.

¹⁴ Yesuq gi, "Byù nàng ê, nungn-hik tang ahtoq má tarâ agyì kut luí, ikun zè gàm byi râ gi, ngo lé ó hkyin tô é lhú?" ga luí, yhang lé tú taî ri. ¹⁵ Yesuq yhangmoq lé taî é gi, "Myoqnoq é hkyô banshoq mai, nungmoq é i-myt lé hkûm zing luí, koi sidiq nyi keq. Hkâsu mù gà le, byu é asak gi, agùn agó é sutzè má bo é a nghut." gà ri.

¹⁶ Dangtú ralhum dông mai le, yhangmoq lé Yesuq taî é gi, "Sahtê rayuq gi, yhâng é yò pé má guqzo muilhum gyaí já ri. ¹⁷ Haù mù luí, yhâng é unghkaù má myit é gi, 'Ngò hkâsu kut wú râ lhi? Ngá é guqzo muilhum pé lé kat to rá jowò a wó lo dut to bê.' gà ri.

¹⁸ Dum nghut jáng, yhang gi, 'Ngò ísu kut wú râ abe, ngá é chyî xau pé lé hpyoq pyám luí, je kô é chyî pé lé saí râ nghut lhê. Chyî haù pé má ngá é guqzo muilhum pé eq sutzè banshoq lé, tsing kat to luí, ¹⁹ ngá é i-myt lé ísu nghú taí râ, "I-myt ê, zanwut myáng myáng é matú, zè gè myo myo ngò tsing to bê. I-myt nàng zim za kut nyi aq hkoi. Zo mù, shuq mù, ngón ngón nyi aq." ga' gà ri.

²⁰ Nghut kôlhang, Garai Gasang gi, 'Byù gò ê, náng é asak lé, hkû-myín yhang, wup yu pyám byî é nghut jáng, nàng tsing hkong tô é zè pé gi, ó yuq é matú dut rá lhú?' ga luí, yhang lé taî ri.

²¹ Haù eq rajung za, yhumsing é matú sutzè hkong to mù luí, Garai Gasang é hí má myung nyi sù gi,

haù yuq su nghut râ nghut lhê." gà ri.

Myit A Chiq É Za Garai Lé Lumjng Râ Hkyô

Mht 6:25-34, 19-21

²² Yesuq, Yhâng é chángzô pé lé dum taî é gi, "Haù mù luí, Ngò, nungmoq lé taí kôlé, nungmoq é asak matú haì zo haì shuq râ eq nungmoq é gungdù matú haì wut haì tsang râ lé, hkâ-myt chiq kó.

²³ Asak gi, zoshuq htoq má, gungdu gi, mebù htoq má, je ahkyak lhê.

²⁴ Nghonoq pé é hkyô lé myit wú keq; yhangmoq gi, kyô hkyó kyô shu a kut kó; guqchyî eq sutdek lé a wó kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq haù pé htoq má je riyhang hpaudap nyi lhê a nghut kó lhú? ²⁵ Nungmoq má, ó yuq wá, myit chiq é èq, yhum-sing é asak lé radúng kô wó jat yù kó rá lhú? ²⁶ Haù su mù luí, tiq dik é hkyô lé lháng, nungmoq a wó kut kô é nhing, haì mù luí gotù hkyô pé lé, myit myô nyi akò lhú?

²⁷ Htutbó ban* pé hkâsu kut kô lo é lé, myit wú keq. Haù pé gi, mù le a zui, hkying le a duì kó nghut ri. Nghut kôlhang, Ngò, nungmoq lé taí kyo kôlé, Hkohlâm Sholumon hpúng kô dik u lé wut é mebu lháng, ban haù rabó lé a hkyit nghut ri.

²⁸ Lumjng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lháng, Garai Gasang haù su kut hut é nghut le gi, nungmoq lé, je riyhang hut râ a nghut kó lhú? ²⁹ Nungmoq gi, haì zo haì shuq rá lé hkâho nyi kó; haù eq séng luí lé hkâ-myt chiq nyi kó. ³⁰ Hkâsu mù gà le, Garai Gasang lé a sé bang gi, haù hkyô banshoq lé châng hkat ho nyi akò; nghut kôlhang, nungmoq é Îwa Garai Gasang gi, haù pé lé nungmoq rá é hkyô, sé byî nyi

* 12:27 Htutbó ban gi, yúng dik é yosô ban nghut lhê.

lhê. ³¹ Nungmoq kúm gi, Yhâng é mingdán lé ho nyi keq, haú jáng, haú pé, nungmoq lé puq byi rá nghut lhê.

³² Sau hpúng zô pé ê, hkâgyuq ko, hkâsu mù gâ le, nungmoq é Íwa Garai Gasang gi, Yhâng é mingdán nungmoq lé byi nau nyi ri. ³³ Nungmoq wó é zè pé lé ûng pyám luí, myùng bang lé byi keq, yhumsing é matú a dat xau a dat wôm é ngunhtung saí luí, hkau sù lé a jé, manot èq le a wó zô é sutzè lé mauhkung htoq má hkong to keq. ³⁴ Hkâsu mù gâ le, náng é sutzè joq jang má, náng é i-myt le jé nyi rá nghut lhê.

Yesuq Dum Jé Lé Lô Râ Hkyíng Lé Machya Nyi Râ Hkyó

Mht 24:45-51

³⁵ Nungmoq gi, hpyihit hit luí, (mú zui rá matú rì rì kut to keq); nungmoq é myibung lé tuq to mù, ³⁶ myiháng poi mai dum taú lò luí, hkúm lo kok é, yhumsing hpó lé radá dâm hkum lhom wó hpông hâng yù shoq, láng tô é dui-nhâng zoshâng wui su kut nyi keq. ³⁷ Haú yhumsing jé lo le, machya nyi láng é dui-nhâng zoshâng wui gi, hkungsô wó nyi rá. Hkâsu mù gâ le, ngò, nungmoq lé teng za tái kôlé, haú yhumsing hpó gi, yhangmoq lé yuq zung to nhâng luí, yhang gi, dui-nhâng zoshâng su hpyihit hit mù, saí tso saí huq rá nghut lhê.

³⁸ Gunggâm yoq lé nghut kôhang, woq tún hkún lé nghut kôhang, haú su kut machya nyi é lé, yhumsing hpó lo myang é nghut le gi, dui-nhâng zoshâng haú bang hkungsô wó nyi ri. ³⁹ Yhumsing hpó rayuq, hká u má hkau sù lé lô rá lé, sê tô é ru nghut le gi, yhang machya nyi luí, yhâng yhùm lé a wó hput htong nhâng rá nghut é lé, bûn sê nyi keq.

⁴⁰ Haú mù, nungmoq le rì rì nghut nyi keq; hkâsu mù gâ le, haú Byu Yhangzo gi, a bûn nùng má jé lé lô rá nghut lhê." gâ ri.

⁴¹ Haú hkún, Petruq gi, "Yhumsing ê, dangtú shí gi, ngamoq lé za, tái é nghut lhê lú? Haú a nghut jáng, lhunglhâng bang lé tái é dông nghut lhê lú?" ga myi ri.

⁴² Haú jáng, Yesuq gi, "Lumging é eq hpaqchyí bo é sùt zum sù gi, hká yuq nghut lhê lú? Haú yuq gi, yhâng yhumsing é dui-nhâng zoshâng wui lé ahkyíng jé jáng zoshuq gâm byi rá matú, yhumsing hpó èq hkyin to sù dut rá nghut lhê. ⁴³ Yhumsing hpó dum taú lo é hkún, haú su kut nyi láng é dui-nhâng zoshâng gi, hkungsô wó nyi ri. ⁴⁴ Ngò, nungmoq lé teng za tái kôlé, yhumsing hpó haú gi, yhâng é sutzè banshoq, dui-nhâng zoshâng haú lé ap to rá nghut lhê. ⁴⁵ Nghut kôhang, dui-nhâng zoshâng haú gi, yhâng é i-myt unghkaú má, 'Ngá é yhumsing hpó jé lô rá gyai myáng ashí.' ga myit pyám mù, dui-nhâng zoshâng luzúm wui myiwe, yuqgè lé nhuq bat é eq, zo yê shuq yê í shuq wut nyi é nghut jáng, ⁴⁶ dui-nhâng zoshâng hau é yhumsing hpó gi, yhang a myitbyu tô é buinyi eq yhang a sé tô é ahkyíng má jé lô mù, yhang lé jap pyám luí a lumjing bang eq rahá nyhi pyám rá nghut lhê.

⁴⁷ Yhumsing hpó é i-myt lé sê to kôhang, yhang ô nau é dông a cháng, rì rì le a hen tô é dui-nhâng zoshâng gi, yhâng yhumsing èq nhuq bat é lé, myo myo hui zo rá nghut lhê. ⁴⁸ Nghut kôhang, a sé mù kut shut sù kúm gi, shau za bat é hui rá nghut lhê. Haú eq rajung za, Garai Gasang gi, myo shoq wó yù su chyáng mai, myo shoq dúng yù rá nghut lhê. Myo myo ap byi tô é hui su chyáng mai, je myo shoq dum dúng yù rá nghut lhê.

Nguingón Nhâng Râ A Nghut, Lhoq Kang Nhâng Râ Ru Nghut Lhê
Mht 10:34-36

⁴⁹ Ngò jé lé é gi, myigùng htoq má, myi nyé nhâng rá matú nghut

lhê. Myi haû dap to láng é nghut le gi, ngò ô nau é hkyô jup byíng bê. ⁵⁰ Nghut kôlhang, ngò hkam yù râ é baptisma† rajung joq ashí, haû a hkam yù yù gi, ngò gyai yhang hkâm zo wuí nyi ri. ⁵¹ Ngò jé lé é gi, myidàm htoq má simsaq hkyô byi râ matú nghut nhô ngam akô lhú? Haú dông a nghut, Ngò, nungmoq lé taí kôlé, byu pé lé lhoq pyô lhoq kang râ matú sheq ru nghut lhê. ⁵² Haú su mù, ahkuí mai rayhùm za mâ é byù ngo yuq gi, rayuq eq rayuq yhangmoq yhangchang byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô râ nghut lhê. ⁵³ Yhângwa gi, yhâng é yuqzo eq, yuqzo gi, yhângwa eq, yhângnu gi, yhâng é byizo eq, byizo gi, yhângnu eq, yhangmhoí gi, yhâng dumó eq, yhâng dumó gi, yhangmhoí eq kut, ngá é yanmai, rayuq eq rayuq byoq gâng lhum bùm bekô râ nghut lhê." ga taí ri.

Dut Lò Râ Hkyô É Kumlhá Lé Sê Gam Hkoq Râ Lhé

Mht 16:2-3; 5:25-26

⁵⁴ Hau htâng shíwa byu pé lé, Yhang taí é gi, "Nungmoq gi, buiwàng hkyam shut mhut htup é lé myàng jáng, 'Maú wo lò berá.' ga radá dâm lhaq taí taí mu akô, haú eq rajung za le, dut lò lò mu ri. ⁵⁵ Dum nghut jáng, maupyí shut mâ é laí lo le, 'Bui htân berá.' ga lhaq taí taí mu akô, haú eq rajung za le dut lò lò mu ri. ⁵⁶ Gegùn labyoq kut bang ê, nungmoq gi, myigùng eq mauhkung é kumlhá lé, sê gam hkoq yu nyi akô. Haú su nghut kô le nhing, haí mù luí, shí ipyat mâ é kumlhá lé gi, a sê gam hkoq dut tô akô lhú?

⁵⁷ Haú eq rajung za, haí mù haú dingmán é hkyô lé yhumsíng yhang yhang a wó doqdân yù kô é lhú? ⁵⁸ Dangké, nang lé yui tsuq sù eq

rahá, tarâ agyì wá chyáng e ló le, hkyô má yhang eq ngón shoq byìn hpyé huí yù aq. Haú a nghut jáng, yui yhumsíng gi, nang lé tarâ agyì chyáng é dé pyám luí, tarâ agyì gi, htóng hkyô su chyáng, nang lé ap pyám luí, yhang gi, nang lé htóng má lhúng pyám râ nghut lhê. ⁵⁹ Ngò, nang lé taí lé, yuichyín haú a ban xap xap gi, htóng haú mai nàng wó htoq lò râ a nghut." ga taí ri.

13

Myit A Lhîng Jáng Shi Hten Byuq Râ

¹ Haú hkùn, haú má nyi é byù ra-am gi, mauzau Pilat èq Galile byù ra-am lé sat mù yhangmoq é sui eq yhangmoq nóng jaú é hkungga lé nyhò pyám é hkyô, Yesuq lé lé taí kyô akô. ² Yesuq gi, "Galile byù haú bang haú su kut hui zo kô é yanmai, yhangmoq gi, gotû Galile byu pé banshoq htoq má, yubak je myô akô nghû, nungmoq myit ngam akô lhú? ³ Haú su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haú eq rajung za shi hten byuq kó râ nghut lhê. ⁴ Haú htoq agó, Siloam wà mâ é machya gyop gyó luí, nhè sat huí é byù raxe shít yuq gi, Yerusalem wà mó mâ é byù banshoq bang htoq má mara je kô akô nghû, nungmoq myit ngam nyi akô lhú? ⁵ Haú su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haú eq rajung za shi hten byuq kó râ nghut lhê." ga taí ri.

⁶ Yesuq dangtú dông dum taí é gi, "Byù rayuq gi, yhâng é tsibyiq hkyâm má, maihpáng gâm ragâm hô tô ri. Yhang agâm haú má, ashí ê ho wú le, zui tô é a myàng nghut ri. ⁷ Haú hkùn, yhang gi, 'Wú aq, ngò sum zân tup maihpáng gâm haú má

† 12:50 Shí mâ é baptisma gi, Yesuq, ajung jung hpuzo mù shí hkâm é hkyô lé taí é nghut lhê.

ashi é ho wú le, a myàng nghut ri; haú lé htuq pyám aq. Haí mù, maumyí aha agó kut yuq nhang tô lhê lúhú?' ga luí, tsibiyiq hkyâm zúng sù lé taí ri.

⁸ Hkyâm zúng sù gi, 'Yhumsing ê, hkúzân za gi, yuq tô wú shi sháng gaq, shigâm hau é lnhghkyuq má ngò du lnhng to mù, mylhpún kat luí bóm byi wú shirâ. ⁹ Htang zàn má ashi zuí é nghut le gi, yuq to sháng gaq, ashi a zui é nghut le kúm gi, htuq pyám rá nghut lhê.' ga luí, hkyâm yhumsing lé tú taí ri." gâ ri.

Bánno Buinyi Má Gùng Loq Hten Sù Lé, Lhoq Gê Byí É Hkyô

¹⁰ Bánno buinyi lé, Yesuq gi, tara-jong ralhum má, mhoqshit nyi ri. ¹¹ Haú hkûn, haú má raxe shit zân tup nat dap luí, gùng loq lhoq hten huí é myiwe rayuq le nyi tô ri. Yhang gi, dàngngóm luí, gungdu ratsuí lhang a wó lhoq nyhâng lô é sù nghut ri. ¹² Yesuq gi, myiwe haú lé myàng jáng, yhâng chyáng wut yù mù, "Myiwe myhí ê, nàng, nòhpyo mai gè berâ." ga luí, ¹³ yhâng é ahtog má loq ke byí ri. Haú hkûn jáng, myiwe haú gi, nyàng za dum wó yap luí, Garai Gasang lé hkya-ôn nyi ri.

¹⁴ Haú mù, Bánno buinyi lé, Yesuq nòhpyo lhoq gê byí é yanmai, tarajong má up sù gi, wú nhik-yo luí, "Mú wó zuí é buinyi hkyuq nyí joq tô le, buinyi haú pé má, lé wó lhoq ge yù lhê. Haú mù, Bánno buinyi má gi, hkákut kó." ga luí, shiwa byu pé lé taí kat ri.

¹⁵ Haú hkûn, Yhumsing Yesuq gi, "Gegùn labyoq kut bang ê, nungmoq yuq hkangmó gi, Bánno buinyi lé, yhumsing é no, logúng pé lé, hkup mai hpông htoq yù mù uchyam byi huq huq kut akô a nghut lúhú? ¹⁶ Haú nghut le gi, raxe shit zân gón Tsadán èq tuí to huí é, Abraham é yhangzo yhangshu

myiwe zo shí lé, Bánno buinyi má Tsadán loq mai, hkyut byi a gíng rá lúhú?" ga tú taí ri.

¹⁷ Haú su ga taí jáng, Yhang eq i-myiit shai lhum é bang banshoq gi, hoq hpû byuq bum akô. Shiwa byù banshoq bang kúm gi, Yhang kut é mauhpo amû banshoq é yanmai, gabú nyi bum bekô nghut ri.

Angshi Cham Eq Munchi Dangké Mht 13:31-33; Mrk 4:30-32

¹⁸ Haú hkûn, Yesuq taí é gi, "Garai Gasang é mingdán gi, haí eq wuí lhê lúhú? Ngò hai eq taí kê wú rá lúhú? ¹⁹ Haú gi, byù rayuq mai, yhâng é hkyâm má hô tô é angshi cham eq wuí ri. Angshi cham haú gi, yuq kô lò mù agâm mó dut lò jáng, hau é akoq pé má, maulat nghoq zô pé wó zung nô yu akô." gâ ri.

²⁰ Yhang dum xoq taí é gi, "Garai Gasang é mingdán lé, ngò hai eq taí kê wú rá lúhú? ²¹ Haú gi, myiwe zo rayuq èq sungso mún sum bûng má yu nyhó luí, haú pé banshoq lé wó lhoq daú nhang é múnchi eq wuí ri." gâ ri.

Chyap É Hkúmdong Mht 7:13-14, 21-23

²² Hau htâng, Yesuq gi, Yerusalem wà mó shut lai e ló uchyang, rawà bàn rawà má wàng mù, mhoqshit byí ri. ²³ Haú hkûn, byù rayuq gi, "Yhumsing ê, hkyi yu é hui rá bang gi, shau za nghut rá lúhú?" ga luí, Yesuq lé myí ri.

²⁴ Yesuq gi, "Chyap é hkúmdong mai, Garai Gasang é mingdán má wó wàng shoq shikut keq. Hkâsu mù gâ le, ngò, nungmoq lé taí kôlé, byù myo myo gi, wó wàng shoq ga shikut wú kó rá. Nghut kôlhang, a wó wàng kó rá nghut lhê.

²⁵ Yhumsing hpó, * hkum toq myhí pyâm é htâng má sheq, nungmoq gi, hkúmdong hí má yap to mù, hkum lé kok uchyang, 'Yhumsing ê, ng-amoq lé hkum hpóng byi laq ô!'

* 13:25 Yhumsing hpó gi, Garai nghut lhê. Yhúm gi, Garai é mingdán lé taí é nghut lhê.

ga luí, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tú taí rã nghut lhê.

²⁶ Haú jáng, nungmoq gi, 'Ngamoq gi, nang eq rahá zo wú shuq wú bê bang nghut lhê; ngamoq é wà hkyô pé má le, nang mhoqshit byí wú bê nghut lhê.' ga taí bekô rã.

²⁷ Nghut kôlhang, yhumsing hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop đông kut é bang banshoq ê, ngá chyáng mai gâng ló byuq keq.' ga tú taí kat rã nghut lhê.

²⁸ Garai Gasâng é mingdán má, Abraham, Isak, Yakup pé eq myiqhtoí pé banshoq bang nyi to kô é lé, nungmoq wó myâng kôlhang, nungmoq gi, shinggan shut hkat pyâm é hui luí, haú jowò má ngaubyi ngaù nhap eq zui kyik kyik shoq hpuzô nyi bùm bekô rã nghut lhê. ²⁹ Hau hkûn, buihtoq, buiwàng, maupyí, mautsung mâ é mingdán myo myo mai byu pé lé luí, Garai Gasâng é mingdán zoshuq poí má myang zùng kó rã nghut lhê. ³⁰ Haú hkûn, ahkuí htâng gyó nyí bang gi, hí bekô rã; ahkuí hí to bang gi, htâng gyó bekô rã." ga luí, yhangmoq lé taí ri.

Yerusalem Wà Mó Eq Séng Luí, Yesuq Taí É Hkyô

³¹ Haú u lé, Hparishe pé ra-am gi, Yesuq chyáng lé luí, "Shí jowò mai htoq ló byuq aq. Hkâsu mù gâ le, Herut gi, nang lé sat rã hen nyi ri." ga luí, Yhang lé taí akô.

³² Haú jáng, Yesuq gi, "Hkû-nyí, napmá,† ngò nat gang hkat pyám luí, nò zo hpýo zo lhoq gê byí rã nghut lhê; sum nyí nghû rã buinyi‡ má sheq, ngá mù bàn rã nghut lhê.' nghû luí, agè ashop é wamhkui haú lé ló taí kyo keq. ³³ Haí wá dut

kôlhang, hkû-nyí, napmá, sânghe nyí, ngò gi, e ló rã dut ashí. Hkâsu mù gâ le, myiqhtoí pé gi, Yerusalem wà mó mai lai luí gotù jowò má a shi wú kó nghut ri.

³⁴ Yerusalem ê, Yerusalem ê, myiqhtoí pé lé sat pyám pyám kut mù, nang chyáng nhang kat é bang lé, luqgok eq dú sat sat kut é myuq nang ê, woqzìng gi, yhangzô pé lé, yhâng é dùng hkaú má tsing lhùng yu é su, nungzô pé lé, Ngò hkâ-myhó dâm shui tsing yù naù kôlhang, nang a dóng nghut ri. ³⁵ Wú keq, nungmoq é yhùm gi, nungmoq é matú chamchyuyi dut pyâm to berã nghut lhê; Ngò, nungmoq lé taí kôlé; 'Yhumsing é mying mai jé lé lo é Sù gi, hkungsô wó nyi sháng gaq.'* nghû, nungmoq a taí taí gi, Ngo lé wó myâng kó rã a nghut lo." ga luí, yhangmoq lé taí ri.

14

Hparishe Rayuq É Yhùm Má Yesuq Jé Nyi É Hkyô

¹ Bánno buinyi ra-nyí má, Yesuq gi, zang zo rã ga Hparishe suwún rayuq é yhùm má, ê wang nyi tô le, haú mâ é bang gi, Yhang lé gyui gyui chòm wú nyi bum akô. ² Haú u lé, wui wam ana dut sù rayuq gi, Yesuq é hí má jé nyi tô ri. ³ Haú mù, Yesuq gi, "Bánno buinyi má nòhpyo lé lhoq gê byí é gi, tarã wang lhê lhú, a wang é lhú?" ga luí, tarã sará pé eq Hparishe pé lé myí kat ri. ⁴ Nghut kôlhang, yhangmoq gi, zim za dut byuq akô. Haú hkûn, Yesuq gi, nòhpyo hui sù lé, zui to mù, lhoq gê byi luí, nhang kat ri.

⁵ Hau htâng, Yesuq gi, yhangmoq lé, "Nungmoq chyáng mâ é rayuq yuq gi, yhumsing é yhangzo rayuq yuq, haú a nghut jáng, no myang radu du, Bánno buinyi má, wuìhtung má byit gyó le, haú hkûn

† 13:32 Hkû-nyí, napmá gâ é gi, Yesuq mingkan htoq má mù zui rã ahkying lé taí é nghut lhê.

‡ 13:32 Sum nyí nghû rã buinyi gâ é gi, Yesuq mingkan htoq má mù ban zui é buinyi lé taí é nghut lhê. * 13:35 Hkya-on 118:26

jáng, a xe htoq yu é za, wó nyî kó rá nghut lhê lhú?" ga myî kat ri. ⁶Yhangmoq kúm gi, dang haú hkun lé, haí le a wó tú taí kó nghut ri.

⁷ Haú hkûn, Yesuq gi, ji tô é bang jé réng é zùng jowò pé hkyin yu nyî kô é lé myàng jáng, yhangmoq lé dangtú dông taí é gi, ⁸ "Byù rayuq yuq nang lé, myiháng poí má ji é nghut jáng, je réng é jowò má hkâ-ê zùng. Hkâsu mù gà le, náng htoq je aróng wó sù lé le, ji to shirâ abe. ⁹ Ji tô é nghut jáng gi, nungnhik lé ji tô é yhumsing hpó lé lô mù, 'Shí yuq lé jowò hui byi aq.' ga luí, náng lé lé taí jáng, nàng hoq hpu luí, hkyî htàng shut huí zùng ra rá nghut lhê. ¹⁰ Haú mù luí, supé nang lé ji le, hkyî htàng má ê zùng aq; haú hkûn, nang lé ji sù lé mù luí, 'Buinùm hpó ê, shí je réng é jowò má huí doq zùng aq.' ga luí, nang lé taí jáng, nàng eq rahá zung tô é bíng lhunglhàng bâng é hí má, nàng gi, myoqdong wó rá nghut lhê. ¹¹ Hkâsu mù gà le, yhumsing gùng lé waq toq é sù ó yuq nghut kôle, lhoq nyhum pyâm é hui rá nghut lhê; yhumsing gùng lé, lhoq nyhum é sù kúm gi, waq toq é hui rá nghut lhê." ga taí ri.

¹² Hau htàng, Yesuq yhang lé ji é yhumsing hpó lé taí é gi, "Napzang, a nghut jáng, myinxûn lé nàng byi tso nau le gi, náng é buinùm wuì, águ âmàng pé, mungmoq wuì, sùt wó é yhumkyo chang pé lé hkâjî tso. Haú bang lé ji tsô é nghut jáng gi, yhangmoq nang lé dum jî tsô é eq, jeju dum tau kó rá nghut lhê. ¹³ Nghut kôlhàng, nàng poí kut mù, byi tso byi huq nau é nghut le gi, myùng bang, hkyî gyui loq hten bang eq myoqjit é bang lé, jî tso aq. ¹⁴ Haú su kut jáng, nàng hkungsô wó nyî rá nghut lhê. Yhangmoq nang lé jeju a wó tau kôlhàng, dǐngmán bang dum dui toq lo é buinyi má, hau é akyû lé, nàng wó hkam yù rá nghut lhê." ga

ri.

Zoshuq Poi Mó Lé Dangtú Yu É Hkyô

Mht 22:1-10

¹⁵ Yesuq eq rahá zô zung tô é byù rayuq gi, dang haú wó gyo jáng, "Garai Gasàng é mingdán má é zoshuq poí má wó zo rá sù gi, hkungsô wó nyî sù nghut rá." ga luí, Yesuq lé taí ri.

¹⁶ Yesuq haú yuq lé tâi taí é gi, "Byù rayuq gi, myinzang byi tso rá ga, zoshuq poí mó ralhum hen to mù, byù myo myo lé ji tô ri. ¹⁷ Zang byi tso rá yàm jé jáng, yhàng é dui-nhàng zoshàng lé, jî tô é bâng chyáng 'Lé keq hkoì, zoshuq jin to bê.' ga ê châng wut nhang ri.

¹⁸ Nghut kôlhàng, haú bang ban-shoq gi, zoshuq poí má a é rá dông chyat he pyâm akô. Rayuq sù gi, 'Ngò yohtung rahkyang wui tò lhê; haú lé ê wú rá dut ri. Haú mù, ngo lé ahkáng byi shi laq.' ga yhang lé taí ri.

¹⁹ Dum rayuq le, 'Ngò, nohtó ngo zúm wui tò lhê; haú pé lé dui nhang chyam wú rá dut ri; ngo lé ahkáng byi shi laq.' ga taí wô ho ri.

²⁰ Dum rayuq le, 'Ngò myiwe hâng tô é a myàng shi mù, a wó lé.' ga taí wô ho ri.

²¹ Haú jáng, dui-nhàng zoshàng taù lò mù, yhàng é yhumsing lé haú hkyô banshoq lò taí kyô ri. Haú hkûn, yhumsing hpó gi, nhikmó gyô yo mù, 'Wà má é hkyô mó hkyô zo hkat hkangmó má hân hân é mù luí, myùng bang, hkyî gyui loq hten bang eq myoqjit bang lé, ê jî lò aq.' ga luí, yhàng é dui-nhàng zoshàng lé nhang kat ri.

²² Hau htàng má, dui-nhàng zoshàng gi, 'Yhumsing ê, nàng nhang é eq rajung za ban kut bê; nghut kôlhàng, zùng rá jowò gi, mân tô ashí.' ga taí ri.

²³ Haú su ga jáng, yhumsing hpó gi, 'Ngá yhum bying rá matú, wà yàm hkyô pé eq hkyâm yàm hkyô

pé má htoq é mù, myang é bang lé a wó le wó shoq é tsing shuí lò aq. ²⁴ Nang lé ngò tái lé, hí lé ji to huí é bang rayuq lháng, ngá é zoshuq poi lé wó chym wú rã a nghut.' ga luí, yhâng é dui-nhâng zoshâng lé tái ri." gã ri.

Yesuq É Chángzo Wó Dut Rã Matú
Mht 10:37-38; 5:13; Mrk 9:50

²⁵ Byù hpùng mó Yesuq eq rahá e ló kô é hkún, Yesuq gi, haú bang lé lhing wú luí, ²⁶ "Ngá chyáng lé sù ó yuq nghut kôle, yhumsing é inu, îwa, yhangmyi, yhangzo eq, yhanggu, yhangmang, yhâng nhammó pé lé le, haú htoq agó, yhumsing é asak lé le, ngo lé chyitdap é htoq má je chyitdap sù gi, ngá é chángzo a wó dut. ²⁷ Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo a wó dut.

²⁸ Dangké, nungmoq chyáng mã é byù rayuq yuq, tsehtung yhùm ralhum saí nau le, yhang gi, yhùm haú ban saí rã matú, ngùn hkã-myhó bàn rã eq yhang wó tô é ngùn luq a luq é lé, zùng mù luí, hí a sôn wú é byù nyi kó rã lúhú? ²⁹ Laqma mù, apùn awang gi, saí hi to mù luí, a wó lhoq pãn é nghut jáng, ³⁰ myàng é bang banshoq èq, 'Shí yuq gi, apùn awang gi, saí hi to mù luí, banshoq a wó saí pãn lo nghut ri.' ga luí, yhang lé jóng pyám bekó rã nghut lhê.

³¹ Dangké, hkohkãm rayuq gi, gye zan rã hen le, gyezo í mun eq lé sù hkohkãm lé, gyezo ramùn eq za lhom wó zãn ùng rã, a wó zãn ùng rã lé, zùng mù luí, hí a myit wú é nyi rã lúhú? ³² A ùng rã dut le gi, gye pé we we mã nyi tô ashí hkún lé, lagyo suwún pé lé nhang kat luí, simsaq rã matú htíngmãm pyám ra rã nghut lhê. ³³ Haú eq rajung za, nungmoq chyáng mã é ó yuq nghut kôlháng, yhumsing wó é zè banshoq lé, a pyám to sù gi, ngá é chángzo wó dut rã a nghut.

³⁴ Xo gi, gè lhê. Nghut kôlháng, xomãn kãn byuq jáng gi, haú lé hai èq dum wó lhoq ngam yù rã lúhú? ³⁵ Haú gi, myigung matú le, myìhpún kut rã matú le, akyú a bò lo. Haú mù luí, shinggan shut kúm gi, dú pyám sê akô.

Gyo rã nohkyap dap sù gi, gyô yù sháng gaq." ga tái ri.

15

Byuq Byuq É Sau
Mht 18:12-14

¹ Ra-nyí lé, Yesuq é dang gyo kó rã ga, kang guq bang eq yubak dap bang gi, Yhâng chyáng lé zîng bum akô. ² Haú hkún, Hparishe pé eq tarã sarã pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga tái put nyi bum akô.

³ Haú mù, Yesuq yhangmoq lé dangtú dông tái é gi, ⁴ "Nungmoq mã, sau rashô du wó luí radu byuq byuq é nghut le, gaú xe gaú du lé yoso mhan yô mã nyhi pyám to mù, byuq byuq é sau haú lé, myàng shoq a châng ho yu é, ó yuq wá nyi kó rã lúhú? ⁵ Byuq byuq é sau haú lé myang hô jáng, gyai gau é i-myit èq goqsãn htoq mã bún kê chùng mù, ⁶ yhùm mã jé jáng, yhâng é buinùm ji-myi wuì eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chòm gabú sháng.' ga tái rã nghut lhê. ⁷ Haú eq rajung za, Ngò, nungmoq lé tái kôle, myit lhing a rã é dingmán bang gaú xe gau yuq lé gabú é htoq, myit lhing é yubak dap sù rayuq é yanmai, mauhkúng htoq mã, je riyhang gabú jowò dut rã nghut lhê.

Byuq Byuq É Ngùn Chap

⁸ Dum nghut jáng, dangtú ralhum gi, myiwe rayuq, ngùn raxé chap wó é mã, rachap byuq byuq é nghut le, yhang gi, myibung tap mù rayhum é shum luí, myang yù

shoq rago za, ho wú rã a nghut lúh?
 9 Haú lé ho myàng jáng le, yhâng é buinùm ji-myi wuî eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chòm gabú sháng.' ga taí rã nghut lhê. 10 Haú eq ra-jung za, Ngò, nungmoq lé taí kôlé, myit lhing é yubak dap sù rayuq é yanmai, Garai Gasâng é maumang lagyô pé hí má, gabú jowò dut rã nghut lhê." gâ ri.

Byuq Byuq É Yuqzo

11 Yesuq xoq taí é gi, "Byù rayuq gi, yuqzo í yuq wó ri. 12 Haú nhik mâ é tiq sù yuq gi, yhâng wa lé, 'Áwa ê, ngò wó gíng é sutzè, ngo lé gàm byi laq.' ga dung jáng, yhâng wa le yhangnhik tâng lé sutzè gàm byi kat ri.

13 Hau htâng hkâ-myháng a myáng má, yhangzo tiq sù yuq gi, sutzè banshoq hkyom yu chûng mù, mau we shut ê luí, haú jowò má, mingkan ngón hkyô châng é má yhang wó é ngunzè banshoq lé langsa pyám bê. 14 Haú su kut ngunzè wó mi-wó lé ban langsa pyám é htâng má, haú mau má mutmó gyo é yanmai, yhang gi, asho awui dut lo nyi bê nghut ri. 15 Haú mù, haú mau má é byù rayuq chyáng, langchyáng ê kut le, haú yuq gi, yhang lé waq rém jang shut nhang kat mù, waq lé lhom zúng nhang ri. 16 Haú hkûn, yhang gi, waq jùm zô é shigyang cham pé lé lháng, zo naú shoq dut kôlháng, ó yuq le a byi zo kó nghut ri.

17 Haú mù, yhang myit bûn lo é gi, 'Ngá wã chyáng nyi é langchyâng pé gi, agùn agó myàng zô nyi kó rã nghut lhê. Nghut kôlháng, ngò gi, shí jowò má, zo mut wuîshit é eq shi ló rã dut bê. 18 Ahkuí, ngò toq mù, ngá wã chyáng taú ló luí, "Áwa ê, ngò gi, Garai Gasang lé le, nang lé le, shut bê. 19 Ahkuí mai ngò gi, nung zo nghû rã a gíng lo, hau é

yanmai, náng é langchyáng rayuq dông za ngo lé nyi nhâng laq." nghû luí, ló taí rã.' gâ ri. 20 Hau htâng, yhang toq luí, yhâng wã chyáng ló le, yhang we we má ru nghut ashí hkûn mai, yhâng wa gi, yhang lé lhom myàng jáng, wú shogyo luí, din é mù, yhangzô é lingzing má é po pyik dap to luí, bopuq puq byi ri.

21 Haú hkûn, yhangzo gi, 'Áwa ê, ngò gi, Garai Gasang lé le, nang lé le, shut bê. Ahkuí mai, ngò gi, nung zo nghû rã a gíng lo.' ga luí, yhâng wa lé dúng tôngbân ri.

22 Yhângwa kúm gi, yhâng é langchyáng pé lé, 'Réng dik é mebu hân hân yu lé mù, yhang lé hut byi keq; yhâng é loq má, loqchyop chyop byi keq; hkyi má le hkyi-tsung tsung byi keq. 23 Tsô myum tô é nojûng zo le yu sat keq. Haú mù, nga-nhúng gi, zoshuq poí kut mù chòm ngón sháng. 24 Hai mù gâ le, ngá zo shí yuq gi, shi byuq é mai, ahkuí dum dui bê; byuq byuq é mai le, ahkuí dum myàng bê.' ga taí ri. Haú mù, yhangmoq gi, ngón ngón zo shuq ló bekô.

25 Haú u lé, yhangzo ko sù yuq kúm gi, yò má nyi tô ri. Yhang gi, yò mai yhâm shut jé lo nyi é hkûn, zìng út bat luí gó nyi é hté lé lò wó gyô ri. 26 Haú mù, langchyáng rayuq lé wut yù luí, haú hkyô lé yhang myí wú le, 27 langchyáng haú gi, 'Nung gu dum taú jé lô bê. Haú mù, náng wa gi, nung gu wáng wáng zán zán dum taú jé lo é lé lhom myàng luí, tsô myum tô é nojûng zo lé sat bê nghut ri.' ga taí kyô ri.

28 Dang haú lé wó gyo jáng, yhang gi, gyô nhik-yo luí, yhúmhaú shut a wáng lo kut ri. Haú mù, yhâng wa htoq ê luí, yhang lé é chyuq ri. 29 Yhangzo kúm gi, 'Wú aq, ngò, shí-myháng shîlo náng é jùn dông kut luí, hkâ-nhám le náng dang lé a lu lái wú. Nghut kôlháng, ngò ngá é luzúm wuî eq ngón kún rã matú, bainám zo radu lháng radàm

le nàng a byi wú shi. ³⁰ Shiwa myhí pé eq zum yap wún luí, náng é sutzè lé lhoq pân pyám é sù nung zo haú dum taú jé lô jáng kúm gi, tsò myum tô é nojúng zo lé, yhâng é matú nàng sat byi bu-nhung!' ga luí, yhâng wa lé tú taí ri.

³¹ Yhângwa gi, 'Ngá zo ê, nàng gi, hkâ-nhám le ngò eq rahá yhang nyí nyí lhê mù, ngá é sutzè joq mijoq banshoq gi, náng é chyat nghut lhê. ³² Nghut kôlhang, shí nung gu gi, shi byuq é mai ahkuí dum duì bê; byuq byuq é mai le, dum myàng bê. Haú mù, gabú hpo nghut bê.' ga luí, yhang lé taí ri." gâ ri.

16

Hpaqchyí Ge Dâ É Sùt Zum Sù

¹ Yesuq, Yhâng é chángzô pé lé taí é gi, "Sahtê rayuq chyáng sùt zum sù rayuq nyí ri. Haú yuq gi, yhâng yhumsing é sutzè pé lé jai hpyuq pyám ri ga, yhâng yhumsing é hí má, yhang lé mara lé hun akò. ² Haú hkún, sahtê hpó gi, yhang lé wut yù mù, 'Nàng é hkyô lé ngò wó gyo bê. Haú gi, hkâsu lhú? Nàng sùt zúm é eq séng luí kut tô é jihpán laiká lé lò shit wú aq. Hkâsu mù gâ le, ahkuí mai nàng gi, sùt zum sù wó kut lo rá a nghut lo.' ga taí ri.

³ Haú jáng, sùt zum sù gi, 'Ahkuí, ngò hkâsu kut lo rá lhú? Ngá é yhumsing gi, ngo lé sùt zum ayá mai lhoq hkyô pyám bê. Myí du myí hkop zo rá le ngò wum a bò; dung zo dung shuq rá le ngò hoq ri. ⁴ Ngo lé sùt zúm é ayá mai hkyô pyám htàng má, supé ngo lé yhangmoq é yhúm má lhom hap yù rá matú, hkâsu kut rá hkyô lé ngò sé bê.' ga wó myit rot jáng, ⁵ yhang gi, yhâng yhumsing hpó lé chyín dap tô é bang rayuq htàng rayuq lé wut yù mù, sâng-hí yuq lé, 'Ngá yhumsing hpô chyáng nàng chyín hkâ-myhó dap tô lhê lhú?' ga myí jáng, ⁶ haú

yuq gi, 'Xú rashô púng dap lhê.' ga tú taí ri.

Haú jáng, sùt zum sù gi, 'Náng é jihpán yù luí, hân zùng mù, ngo xê púng kut kâ to aq.' ga yhang lé taí ri.

⁷ Dum rayuq lé, 'Nàng hkâ-myhó dap tô lhê lhú?' ga myí jáng, haú yuq gi, 'Sungsô rashô búng dap lhê.' ga tú taí ri. Sutzum sù gi, haú yuq lé, 'Náng é jihpán má shit xê búng kut kâ to aq.' ga taí ri.

⁸ Haú a dingmán é sùt zum sù lé, yhumsing hpó gi, hpaqchyí ge da sù nghut ri ga hkya-ôn ri. Ngò shí lé taí é gi, mingkan zo wú gi, yhangmoq é mingkan eq séng é hkyô pé má, maubó gung é yhangzo pè* htoq hpaqchyí je bò kô é yanmai nghut lhê. ⁹ Haú mù luí, Ngò nungmoq lé taí kyo kôle, a tara é sutzè pé eq buinùm ho nyí keq, haú mù, sutzè haú htúm byuq jáng, nungmoq lé, ahtum abyuq joq tò é yhúm má, lhom hap yu é huí kó rá nghut lhê.

¹⁰ Tiq é mù má wó lum é sù ó yuq nghut kôlhang, mù mó má le wó lúm rá nghut lhê. Tiq é mù má lhum a zuí é sù ó yuq nghut kôlhang, mù mó má le lhumzui rá a nghut. ¹¹ Haú mù, mingkan sutzè má lháng nungmoq lé a wó lúm kô é nghut le gi, haú tengmán é sutzè lé, nungmoq chyáng ó yuq wá kâm ap byi rá lhú? ¹² Supé é sutzè má, nungmoq lé a wó lúm kô é nghut le gi, nungmoq sîng âng é sutzè lé, nungmoq chyáng ó yuq wá kâm ap byi rá lhú?

¹³ Dui-nhâng zoshâng ó yuq nghut kôlhang, yhumsing í yuq lé wó dojaú rá a nghut. Hkâsu mù gâ le, yhang gi, rayuq lé a jú kut mù, rayuq lé, chyitdap rá nghut lhê; haú a nghut jáng, rayuq lé gi, lhumzui mù, rayuq lé gi, hpau a tap kut rá nghut lhê. Nungmoq gi, Garai Gasang lé le, gunzè lé le,

* 16:8 Maubó gung é yhangzô pé ngu é gi, Garai Gasâng é yhangzô pé lé taí é nghut lhê.

radá dâm wó dojaú kó râ a nghut." ga tai ri.

¹⁴ Ngùn myoqnoq é Hparishe pé gi, dang haù banshoq lé wó gyo kôjáng, Yesuq lé wuizui kut pyám byí akô. ¹⁵ Haù mù luí, Yesuq gi, yhangmoq lé, "Nungmoq gi, byu pé hí má yhumsing gùng lé yhumsing dingmán bang su kut shit mhaù é bang nghut akô; nghut kôlhang, Garai Gasang gi, nungmoq é i-myit unghkaù lé sé sù nghut lhê. Byù é hí má hpaudap é pé gi, Garai Gasang é hí má achaq achyut é nghut nyi ri.

¹⁶ Jep é tarâ† eq myiqhtoi pé é dang, ahko ahkáng wó tô é ahkyíng gi, wui-myhup sará Yohan jé lé é buinyi jé shoq nghut bê. Haù hkyíng mai gi, Garai Gasang é mingdán hkyô gabú danglù lé, hko kyô nyi mù, yuq du jup gi, haù hkyô má htung chying wang ló bum akô. ¹⁷ Jep é tarâ mâ é tiq dik é dangjí eq myihkyet zo ralhú lé wó lhoq hten râ htoq, mauhkung eq myigùng hten râ gi, je luí râ nghut lhê.

¹⁸ Dangké, yhumsing é yhangmyi lé káng pyám mù, myiwe gotú dum hâng yu é sù ó yuq nghut kôle, su-myi lú é sù nghut bê; yhumsing é yhangláng eq gang bê myiwe lé hâng yu é sù le, su-myi lú é sù dut bê nghut ri." ga tai ri.

Sahtê Hpó Eq Lazaruq

¹⁹ Yesuq dum xoq tai é gi, "Radám lé, sahtê rayuq gi, nè é eq nú-nhâm é mebu wut mù luí, nyi nyi bui bui zo ngón shuq ngón nyi ri. ²⁰ Yhâng é hkúmdong má gi, ragùngdú é jeq byi tô é Lazaruq gâ é dung zo sù rayuq lé, lé nyhi tô akô. ²¹ Haù yuq gi, sahtê wá é siboí mai gyó é agyó ahtâng lé, wú zô nau nyi ri. Hkui pé le yhâng é dâm pé má, lé yoq byí nyi akô.

²² Htâng má, haù dung zo sù shi byuq jáng, maumang lagyô pé gi, mauhkung má nyi é Abraham é tanghkoí má yhang lé shuí ló byí akô. Sahtê wá le shi byuq luí, yhúm pyám bekô nghut ri. ²³ Sahtê wá gi, ngaraí ming má dik shoq hpuzô nyi mù luí, tu wú kat le, we we má Abraham lé le, yhâng é tanghkoí mâ é Lazaruq lé le, myàng kat ri.

²⁴ Haù mù, yhang gi, 'Áwa Abraham ê, ngo lé shogyo yù laq ô. Ngò gi, shí myi htum má achyí aku nyé é hui zô nyi ri. Haù mù, Lazaruq gi, yhâng é loqnyhui ù èq wui má tik yù mù, ngá é shô má wui ra-poq zo hkâlháng lé tik cham byi sháng gaq, yhang lé ngá chyáng nhang kat byi laq ô!' ga luí, dúng wut nyi ri.

²⁵ Haù hkûn, Abraham gi, 'Ngá zo ê, asak dui tô é u lé, nang nyi ngón yuqyo tô é hkûn, Lazaruq gi, asho awui dut é lé, bûn nyi aq. Ahkuí, yhang kúm gi, shí má lo nyi byán to bê; nang chyaú gi, jamjau hui zô nyi bê. ²⁶ Haù mai gotú gi, shí mai nungmoq chyáng dap lé naù bang a wó dap shoq le, haù mai ngamoq chyáng ó a wó dap lé râ matú le, ngamoq eq nungmoq é gyoro má, nik dik é langhkung mó èq kyo pyám to bê nghut ri.' ga tú tai ri.

²⁷ Sahtê wá gi, 'Áwa ê, haù nghut le gi, ngò, nang lé dúng nau ri. Ngá gû pé ngo yuq nyi ashí; yhangmoq le ísu hpuzô é jowò má a jé sháng gaq, ²⁸ yhangmoq myit lhing shoq ló tai pun râ matú, Lazaruq lé ngá wá yhúm shut nhang kat byi laq ô!' ga luí, dúng wut ngau nyi ri.

²⁹ Abraham gi, 'Yhangmoq chyáng, Mosheq eq myiqhtoi pé nyi lhê; haù bâng dang lé gyô yù kó sháng gaq.' ga tai ri.

³⁰ Sahtê wá gi, 'Áwa Abraham ê, haù su a nghut. Shi byuq é bang mâ é rayuq yuq yhangmoq chyáng

† 16:16 Jep é tarâ gâ é gi, Garai Gasang, Mosheq mai nga-nhung lé byi tô é tarâ lé gâ lhê.

dum taû lo é nghut le kúm gi, yhangmoq myit lhing kó râ nghut lhê.' ga taí ri.

³¹ Abraham gi, 'Mosheq eq myiqhtoî pé é dang lé yhangmoq a gyo kô é nghut le gi, shi byuq é bang mâ é rayuq yuq dum dui toq ló mù, ló taí kyo kôlháng, kâm gyo kó râ a nghut.' ga luí, yhang lé tú taí ri." gâ ri.

17

Mara Hkyut É Hkyô Eq Lumjîng Myit

Mht 18:6-7, 21-22; Mrk 9:42

¹ Yesuq, Yhâng chángzô pé lé taí é gi, "Byu pé lé mara kut shut nhang é hkyô gi, joq htoq lô râ za nghut lhê. Nghut kôlháng, mara kut shut nhang é hkyô lé lhoq htoq é sù gi, dingnyé wó râ. ² Zoshâng shí bang mâ é rayuq lé, mara kut shut nhang é sù gi, yhâng é lingzing má luqluí long mó tuí hut byi luí, wuimau má é dú hkyô pyâm é huí é nghut le gi, yhang é matú je gè râ nghut lhê. ³ Nungmoq gi, yhumsîng gûng yhumsîng sidiq keq.

Nunggu nungmang nàng lé mara kut shut é nghut le gi, yhang lé tan luí, mhoqshit aq; yhang myit lhing é nghut le gi, yhang lé mara hkyut pyâm byi aq. ⁴ Ra-nyí má za, yhang nang lé nyhit dâm shut mù, 'Ngò myit lhing bê.' ga luí, nang lé nyhit dâm dum tôngbán le, tôngbán hkgámó, nàng, yhâng é mara lé hkyut pyâm byi aq." gâ ri.

⁵ Haú hkûn, lagyô pé gi, "Ngamoq é lumjîng myit lé lhoq ko byi laq." ga Yhumsîng lé dúng akô.

⁶ Haú jáng, Yhumsîng gi, "Nungmoq é lumjîng myit angshí cham í za hkâlháng bò kô é nghut le gi, shí hangwâ gâm lé, 'Sikgâm ê, amyit eq roq bún luí, wuishuq lung-aû má, ê yuq to aq ô.' gâ le, nungmoq é dang lé sikgâm haú gyo byi râ nghut lhê.

⁷ Dangké, nungmoq má é rayuq yuq chyáng, yô hpuq é, a nghut

jáng, sau zúng é dui-nhâng zoshâng rayuq nyi é nghut le, dui-nhâng zoshâng haú yohtung pá mai jé lo é hkûn, yhang lé, 'Hân zúng mù zang zo aq.' ga luí, ó yuq wá taí kó râ lhú? ⁸ Haú dui-nhâng zoshâng lé sheq, 'Ngò zo râ myinzang lajang aq. Ngò bàn zo shoq hpyidum má hpyihit hit mù, xun zang wú nyí aq. Ngò bàn zo jáng sheq nàng wó zo râ nghut lhê.' ga luí, taí râ a nghut kó lhú? ⁹ Taí mitaí banshoq lé, dui-nhâng zoshâng ban zui saí byí é nghut kôlháng, yhang lé jeju bún é dang ó yuq wá taí wú akô lhú? ¹⁰ Haú eq rajung za, nungmoq gi, taí mitaí ban kut jáng sheq, 'Nga-nhúng gi, jeju bun a gíng é dui-nhâng zoshâng pé nghut nyi lhê; kut râ é mù lé za lhoq pân é bang nghut lhê.' nghú taí keq." ga taí ri.

Manggâm Dap Bang Raxê Yuq Lé, Yesuq Lhoq Gê Byí É Hkyô

¹¹ Ahkuí, Yesuq gi, Yerusalem wá mó shut e ló nyi le, Samariq mau eq Galile mau gyoro mai laí e ló ri. ¹² Yhang, wá rawà shut wang ló é hkûn, manggâm dap é byù raxê yuq eq huí ri. Haú bang gi, we mai yap to mù, Yesuq lé, ¹³ "Yesuq, Zau ê, ngamoq lé shogyô yù laq ô." ga luí, wut garû bum akô.

¹⁴ Yesuq gi, yhangmoq lé myàng jáng, "Nungmoq é gungdu lé, hkyangjông pé chyáng ló tún shit keq." ga yhangmoq lé taí ri. Yhangmoq gi, hkyô má ru sô nyi ashí le lháng, sân-yúng ló byuq bekô.

¹⁵ Yhangmoq chyáng mâ é rayuq gi, yhumsîng gungdu ge byuq é lé myàng jáng, Yesuq chyáng dum taú é mù, htê mó eq Garai Gasang lé hkya-ôn é eq, ¹⁶ Yesuq é hkyí wang má paí gop to luí, Yhang lé jeju hkya-ôn nyi ri. Haú yuq gi, Samariq byù nghut ri.

¹⁷ Haú mù, Yesuq gi, "Sân-yúng byuq é gi, raxê yuq a nghut lhú? Gau yuq gi, hká ló byuq bekô? ¹⁸ Shí

tûngbaù rayuq mai lai lui, dum taù lé mù Garai Gasang lé hkya-ôn é byù, rayuq le a nyi lo kó lúhú?" ga tai ri. ¹⁹ Hau htâng, Yesuq gi, haù yuq lé, "Toq mù ló aq, náng é lumjínq myit gi, nang lé lhoq sân-yúng byl bê nghut ri." ga tai ri.

Garai Gasâng É Mingdán Jé Lô Râ Hkyô

Mht 24:23-28, 37-41

²⁰ Radàm lé, Hparishe pé gi, Garai Gasâng é mingdán hkâ-nhâm jé râ hkyô, Yesuq lé myi akô. Haù jáng, Yesuq gi, "Garai Gasâng é mingdán jé lé râ gi, myoq èq wú lui myàng râ a nghut. ²¹ Garai Gasâng é mingdán gi, nungmoq yuq Jup é ahkaù má nghut nyi é yanmai, 'Wú keq, shí má joq ri, mhó má joq ri.' ga lui le, byu pé gi, wó tai kó râ a nghut." ga lui, yhangmoq lé tû tai ri.

²² Chángzô pé lé le Yesuq tai é gi, "Haù Byu Yhangzô é buinyi ranyí lé, nungmoq myàng nau dik é ahkyíng jé râ. Nghut kôhang, nungmoq gi, Byu Yhangzo lé wó myàng kó râ a nghut. ²³ Haù buinyi má, byu pé gi, nungmoq lé, 'Yhang shí má nyi ri.' haù a nghut jáng, 'Yhang hê má nyi ri.' ga tai kó râ a nghut lhê. Nghut kôhang, hkâ-ê; hkâcháng kó. ²⁴ Hkâsu mù gà le, maumyí rahkyam má hpyat é maulhap gi, maumyí gó hkyam jé shoq duqbó é su, haù Byu Yhangzo dum jé lé é buinyi má le dut râ a nghut lhê. ²⁵ Nghut kôhang, haù su a dut htoq shimá, Yhang gi, zing-rí é myo myo lé le, ipyat shí má é byu pé èq he-ngik pyâm é lé le, hui shirá a nghut lhê.

²⁶ Noaq é tsîn pyat má dut é su, haù Byu Yhangzo jé lé é buinyi má le dut râ a nghut lhê. ²⁷ Byu pé gi, Noaq, wuì-sanghpo mó hkaù má wang é hkûn jé shoq, zo zo shuq shuq, myi byi myi yù, myiháng kut

lui, nyi nyi bum akô. Haù hkûn, dowuì dínq lô mù, yhangmoq ban-shoq lé lo lhoq htên pyâm bê nghut ri.

²⁸ Haù eq rajung za, Lot é pyat má le, byu pé gi, zo mù, shuq mù, ung zo wuì zo, ho zo ho shuq, yhûm kut lui nyi nyi akô. ²⁹ Nghut kôhang, Sodom wà mai Lot htoq ló é buinyi má, mauhkûng mai, myi eq hang gi, mau su wò gyó lô lui, lhunglháng lé lhoq htên pyâm bê nghut ri.

³⁰ Haù Byu Yhangzo, lé htoq shit é buinyi má le, haù eq rajung za dut râ a nghut lhê. ³¹ Haù buinyi má, yhumhkûng* htoq má nyi tô é sù gi, yhúmkaù má é zè lé, a ló gyó wang yù lo sháng gaq. Yò má nyi tô é sù gi, haù eq rajung za, yhûm shut a taù ló lo sháng gaq. ³² Lot é yhangmyi† lé bûn nyi keq. ³³ Yhumsing é asak duì hkyô hô sù ó yuq nghut kôle, asak sum râ a nghut lhê; asak sum pyâm é sù kúm gi, asak wó duì râ a nghut lhê. ³⁴ Ngò, nungmoq lé tai kyo kôlé, haù myín lé, yhupjang ralhûm má byù í yuq nyi to kô le, rayuq gi, shuì yu é hui mù, rayuq gi, myit gyó to râ a nghut lhê. ³⁵ Myiwe í yuq lui má rahá za chòm lui nyi tô le; rayuq gi, shuì yu é hui mù, rayuq gi, myit gyó pyâm to râ a nghut lhê. ³⁶ Yohtung má byù í yuq nyi to le, rayuq gi, shuì yu é hui lui, rayuq gi, myit gyó pyâm to berâ a nghut lhê." gà ri.

³⁷ Haù hkûn, chángzô pé gi, "Yhumsing Yesuq é, haù gi, hká gyo má dut râ lúhú?" ga lui, Yesuq lé myi kôjáng, Yhang gi, "Màng leq é jang má, langdâ pé, lé zínq bum râ a nghut lhê." ga lui, yhangmoq lé tû tai ri.

18

Chuimó Myhi Eq Tarâ Agyi É Hkyô Lé Dangtú Yù É Hkyô

* **17:31** Yudaq byu pé é yhumhkûng gi, rá é a nghut lhê mù, nyi kún jang kut akô. † **17:32** Lot é yhangmyi gi, Sodom wà shut dum taù lhing wú é yanmai, Garai Gasang lhoq hten pyâm é hui sù a nghut lhê.

¹ Yesuq, Yhâng é chángzô pé lé, myit wum a gyuú é za, hkâ-nhám le kyûdung nyi râ hkyô lé, dangtú dông mhoqshit é gi, ² "Wà rawá má, Garai Gasang lé le a gyuq hoq, byù lé le haí su a ngàm é tarâ agyì rayuq nyi ri. ³ Haù wâ má chuimó myhí rayuq le nyi ri. Yhang gi, haù tarâ agyì wá chyáng ê luí, 'Ngò eq amù htoq sù lé, yhâng é mara eq rajung za, jéyáng byi laq.' ga luí, é dum tái tái kut nyi ri.

⁴ Nghut kôlhang, tarâ agyì wá gi, ahkying rayoq zo jé shoq tarâ a jéyáng byi é tô tô ri. Hau htâng má, yhang gi, 'Ngò, Garai Gasang lé le a gyuq a hoq, byù lé le haí su a ngàm, ⁵ nghut kôlhang, chuimó myhí shí yuq é amù lé, ngò a jéyáng a doqdan byi é nghut le gi, yhang dum lé lé kut mù, ngo lé myit hpêbù nhâng râ dut ri. Haù mù, ngò yhâng é amù lé jéyáng byi râ.' ga, yhâng é unghkaù má myit yu ri." gâ ri.

⁶ Haù mù luí, Yhumsing Yesuq gi, "A ding a mán é tarâ agyì wá tái é dang mai mhoq yù keq. ⁷ Garai Gasang gi, Yhang lé nyí myín wut dung nyi é, Yhang hkyin yu to bê bang lé, tarâ é dông a kut byi é gi, myáng myáng nyi to râ lúhú? ⁸ Ngò, nungmoq lé tái kôlé, Garai Gasang gi, yhangmoq lé hân yhang tengmán é dông jéyáng byi berá nghut lhê. Nghut kôlhang, haù Byu Yhangzo jé lé é buinyi má, lumjing hkyô lé gi, mingkan htoq má myang wú shirâ lúhú?" ga tái ri.

Hparishe Eq Kang Guq Sù Kyûdung É Hkyô

⁹ Yhumsing gùng lé dingmán bun luí, byù góbang lé wú tiq é bang ra-am lé, Yesuq dangtú dông tái é gi, ¹⁰ "Byù í yuq kyûdung kó râ ga, noqkuq yhùm má doq e akô. Rayuq gi, Hparishe, rayuq gi, kang guq sù nghut ri. ¹¹ Hparishe hpó gi, yap to luí, 'Garai Gasang ê, ngò gi, byù góbang su lú zo lú shuq é hkyô le

a kut, agè ashop é hkyô le a cháng, su-myi le a lú é htoq agó, shí kang guq sù su le, a nghut é yanmai, ngò nàng lé jeju bûn lhê ô! ¹² Ngò gi, rabat má zoshuq í dâm gám nyi lhê; ngò wó yu é gû mâ é xê gambùm ragambùm le kat nyi lhê.' ga luí, yhang baú yhang gotú kut dung nyi ri.

¹³ Kang guq sù kúm gi, we we má yap to mù, mauhkung shut lhang a wám tu wú é za, wànggàng bat luí, 'Garai Gasang ê, shí yubak dap sù ngo lé, shogyô yù laq ò!' ga dung ri.

¹⁴ Ngò, nungmoq lé tái kôlé, kang guq sù kúm gi, Garai Gasang é hí má mara hkyut san byi é lé wó yù luí, yhùm shut dum taù ló bê; nghut kôlhang, Hparishe wá gi, a wó nghut ri. Hkâsu mù gâ le, yhum-sing gùng lé waq toq sù ó yuq nghut kôle, lhoq nyhum pyâm é hui râ nghut lhê; yhumsing gùng lé lhoq nyhum é sù kúm gi, waq toq é hui râ nghut lhê." ga tái ri.

Zoshâng Wuí Lé Yesuq Shimân Byi É Hkyô

Mht 19:13-15; Mrk 10:13-16

¹⁵ Byu pé gi, zonú wuí lé Yesuq záng htung byi sháng gaq ga, Yhâng chyáng shuí lé lo bum akô. Chángzô pé gi, haù lé myàng jáng, lhom tân hkùm akô nghut ri. ¹⁶ Nghut kôlhang, Yesuq gi, zoshâng wuí lé, wut yù luí, "Haù zoshâng wuí lé, Ngá chyáng lé nhâng keq; yhang-moq lé hkâhkùm zing to kó; hkâsu mù gâ le, Garai Gasang é mingdán gi, haù sù é bâng é mingdán ru nghut lhê. ¹⁷ Ngò, nungmoq lé teng za tái kôlé, Garai Gasang é mingdán lé, zoshâng su kut a lhom hap yu é nghut le gi, mingdán haù má gè gè yhang wó wâng râ a nghut." ga tái ri.

Ayá Wó É Sahtê Hpó

Mht 19:16-30; Mrk 10:17-31

¹⁸ Ayá wó é byù rayuq le, Yesuq lé, "Ge é Sará ê, ahtum abyuq é asak

wó yû râ matú, ngò haí kut ra râ lú?" ga myí ri.

¹⁹ Yesuq gi, "Haí mù, Ngo lé ge é Sará nghu lhê lú? Garai Gasang mai lai lú, ge é ó yuq le a nyí. ²⁰ Jep é tarâ má, "Su-myi sulàng hkâlú, byù hkâsat, hkâhkau, a teng a mán é saksé hkâhkám, nángnu nángwa lé hkungga aq. ^{*} gâ é dang pé lé, nàng sé gû bê." ga luí, yhang lé tù tai ri.

²¹ Haú yuq gi, "Haú pé banshoq lé, ngò, zoshàng hkûn mai cháng bê nghut lhê." ga tai ri.

²² Yesuq gi, dang haú lé wó gyo jáng, "Nàng kut râ rajung râ tô ashí; nàng wó miwó lé ùng pyám luí, myùng bang lé byí pyám aq; haú jáng, nàng, mauhkúng htoq má sutzè wó râ nghut lhê; haú mù, Ngá htàng lé cháng aq." ga luí, yhang lé tai ri.

²³ Haú yuq gi, dang haú lé wó gyo jáng, sutzè gyai wó sù nghut é yan-mai, gyai yhang myit a ngón dut byuq ri. ²⁴ Yesuq gi, haú yuq lé wú luí, "Sutzè wó bang gi, Garai Gasàng é mingdán má wàng râ matú, haú-í yhang wuí ri-nhung! ²⁵ Sutzè wó sù rayuq, Garai Gasàng é mingdán má wó wàng râ htoq, gola-uq radu âpno mai wó wang lai râ gi, je lui râ nghut lhê." ga tai ri.

²⁶ Dang haú lé wó gyô é bang gi, "Haú su ru nghut le gi, ó yuq za hkyi yu é hui râ nghut lhê lú?" ga myí bum akò nghut ri.

²⁷ Haú hkûn, Yesuq gi, "Byù a wó kut é hkyô lé, Garai Gasang gi, wó kut lhê." ga tai kyô ri.

²⁸ Haú hkûn, Petruq gi, Yesuq lé, "Wú aq, ngamoq gi, wó miwó tô pyâm to lui, Náng htàng cháng bê nghut lhê." ga tai jáng,

²⁹ Yesuq gi, "Ngò, nungmoq lé teng za tai kôlé, Garai Gasàng é mingdán é yanmai, yhumsing é yhùm, yhumsing é yhangmyi, yhumsing é âgu âmang, yhumsing é ìnu îwa, yhumsing é yhangzô pé lé,

pyâm to sù ó yuq nghut kôlé, ³⁰ shí pyat má, akyú myo myo wó hkam yù râ htoq agó, htang pyat má le, ahtum abyuq é asak a wó yu é gi, a nyí râ nghut lhê." ga luí, yhangmoq lé tai ri.

Yesuq, Yhang Shí Hkám Râ Lé Dum Tai É Hkyô

Mht 20:29-34; Mrk 10:46-52

³¹ Yesuq gi, Yhàng é lagyô pé raxe í yuq lé gotú kut wut yù mù, "Gyô wú keq, nga-nhung gi, Yerusalem wà mó shut doq ló nyi é nghut lhê. Haú má jé jáng, haú Byu Yhangzo eq séng lui, myiqhtoí pé kâ tô é banshoq gi, dik lò berâ nghut lhê. ³² Hkâsu mù gâ le, Byu Yhangzo gi, tungbaù pé é loq má ap pyâm é hui lui, haú bâng èq Yhang lé, wuizui kut pyâm é, rhoí rip e, sôkan byé gyùn é, nhuq bat é kut yù mù, sat pyám kó râ nghut lhê. ³³ Hau htàng sum nyí nghu râ buinyi má, Yhang gi, dum dui toq lô râ nghut lhê." ga luí, yhangmoq lé tai ri.

³⁴ Lagyo pé gi, dang haú pé rahkun lé lhang a sê gyo kó; dang hau é lichyúm gi, yhangmoq é hí má zaú nghop tô é nghut é yan-mai, Yhang hai tai nyi é hkyô pé lé yhangmoq a sé kó nghut ri.

Dung Zo É Myoqjit Sù Lé, Yesuq, Myoq Dum Myàng Nhang É Hkyô

³⁵ Ahkuí, Yesuq Yerihko wà nàm má jé lo nyi le, myoqjit é byù rayuq gi, hkyô yàm má zùng mù, dung zô nyi ri. ³⁶ Yhang gi, byù rajùm rayò sô lai ló é htê lé wó gyo jáng, haú hai dut nyi é hkyô lé, myi kat ri. ³⁷ Haú hkûn, yhangmoq gi, "Nazaret wà byù Yesuq lai ló ri." ga luí, yhang lé tai kyo akò.

³⁸ Haú su gâ é lé wó gyo jáng, yhang gi, "Dawiq é Yhangzo Yesuq é, ngo lé shogyo yù laq ô!" ga wut dúng kat ri.

³⁹ Hí má lai ló é bang gi, zim za nyi râ matú yhang lé tân hkùm akò;

nghut kôlhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang htê mó o mó êq wut dúng kat ri.

⁴⁰ Haú mù, Yesuq gi, yap kat mù, byù haú yuq lé Yhâng chyáng shuí lé lô nhang kat ri. Myoqjit sù Yhâng nàm má jé lé jáng, Yesuq gi, ⁴¹ "Ngò, nàng lé haí kut byi rá ô nau ri lú?" ga, yhang lé myi kat ri.

Haú yuq gi, "Yhumsîng ê, ngò myoq myàng nau ri." ga tũ taí ri.

⁴² Hau hkûn, Yesuq gi, "Náng myoq myàng sháng gaq! Náng é lumjîng myit gi, nang lé lhoq gê byi bê nghut ri." ga, yhang lé taí ri. ⁴³ Haú yuq gi, haú hkûn jáng, yhang myoq wó myâng mù, Garai Gasang lé hkya-on uchyang Yesuq htâng cháng bê. Lhunglhang bang haú lé myàng kôjáng, Garai Gasang lé hkya-ôn nyi bum akô.

19

Yesuq Eq Zake

¹ Yesuq gi, Yerihko wà má wàng mù, sô laí lô nyi ri. ² Haú hkûn, haú wâ má, Zake gâ é kang guq agyi rayuq nyi ri; haú yuq gi, sutzè wó sù nghut ri. ³ Yhang gi, Yesuq hká yuq nghut é lé myàng nau kôlhang, nyhùm sù nghut é htoq agó, byù rajùm rayò chyín chyap tô é yanmai, a wó myâng nghut ri. ⁴ Haú mù, yhang gi, Yesuq lé wó myâng shoq ga, Yesuq laí lô rá hkyô hí shut din ê mù, hkohùm gâm htoq má é doq zung tô ri.

⁵ Yesuq gi, haú jowò má jé jáng, tu wú kat luí, "Zake ê, hân gyó lô aq; hkû-nyí ngò náng yhùm má bíng rá nghut lhê." ga taí ri. ⁶ Haú jáng, Zake gi, hân hân gyó lô mù, gabú dik é êq Yesuq lé lhom hkulum yu ri.

⁷ Haú má nyi bang banshoq gi, haú lé myàng jáng, "Yhang gi, yubak dap sù rayuq chyáng bíng

kut rá ga wang e lô bê." ga luí, mara hùn dang taí nyi bum akô.

⁸ Zake kúm gi, toq yap mù, "Yhumsîng Yesuq ê, ngò wó é sutzè rawuí gú myùng bang lé gàm byí pyám rá; ngò záng mop zô pyâm é byù rayuq yuq nyi le gi, myi tú dum tau byi rá." ga Yhumsîng Yesuq lé taí ri.

⁹ Haú hkûn, Yesuq gi, "Shí yuq le, Abraham é yhangzo* rayuq nghut é yanmai, hkû-nyí shí yhùm má hkyi yù hkyô jé bê, ¹⁰ hkâsu mù gâ le, haú Byu Yhangzo gi, byuq byuq bê bang lé, hkat hô mù hkyi yù rá matú, jé lé sù nghut lhê." ga luí, Zake lé taí ri.

Hkohkam É Dui-nhâng Zoshâng Raxê Yuq

Mht 25:14-30

¹¹ Haú hkyô lé, yhangmoq gyó nyi bùm kô é hkûn, Yesuq gi, Yerusalem wà mó má jé rá chyâng lò bê nghut é yanmai le, Garai Gasâng é mingdán gi, radá dâm htoq shit lô berâ ga, byu pé myit ngam tô bùm kô é yanmai le, dangtú ralhùm dông dum taí jat é gi, ¹² "Aróng wó sù byù rayuq gi, hkohkâm ayá é hkam yù luí, dum taú lò rá ga, wê é ming shut é rá matú hen nyi ri. ¹³ Haú mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoí joí ap byi luí, 'Ngò dum taú jé lô shoq, shi êq hpugá gá nyí lánng keq.' ga luí, yhangmoq lé pying tô ri.

¹⁴ Yhâng é mingbyú wui kúm gi, yhang lé a ngui bum é nghut mù luí, yhang e lô é htâng má, 'Shí yuq ngamoq ahtoq má up nyi rá lé, ngamoq a ô nau.' ga luí, é taí rá matú lagyo châng nhang kat akô.

¹⁵ Nghut kôlhang, yhang kúm gi, hkohkâm ayá wó hkam yù luí, dum taú jé lô jáng, yhang ngùn ap byí tô é dui-nhâng zoshâng wui lé, hpugá

* **19:9** Abraham é yhangzo nghù é lichyúm gi, Abraham su Garai Gasang lé lumjîng é sù lé gâ lhê.

gá luí, amyat hkâ-myhó wó ho jat bê hkyô lé sé nau luí, yhangmoq lé wut nhang kat ri.

¹⁶ Haú hkûn, sâng-hî yuq gi, lé mù luí, 'Yhumsîng ê, ngò, náng é ngùn rajoí mai, amyat raxê joí wó ho jat yù bê.' ga taí ri.

¹⁷ Haú hkûn, yhumsîng hpó gi, 'Arâ! Nghut bê, kyet é dui-nhâng zoshâng ê, náng gi, je tiq é mù má lhang wó lum é sù nghut é yanmai, wá raxê lé upzo lo aq hkoi.' ga luí, yhang lé taí ri.

¹⁸ Htang yuq le, lé mù luí, 'Yhumsîng ê, ngò, náng é ngùn rajoí mai, amyat ngo joí wó ho jat yù bê.' gâ ri.

¹⁹ Yhumsîng gi, haú yuq lé, 'Nàng gi, wá ngo wá lé up lo aq hkoi.' ga taí ri.

²⁰ Dum rayuq le, lé mù luí, 'Yhumsîng ê, náng é ngùn rajoí lé a byuq shoq, ngò panchoq eq htup tô lê; wú aq, shí nghut lê. ²¹ Nàng gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é yanmai, nang lé ngò gyuq ri.' ga taí ri.

²² Haú hkûn, yhumsîng gi, 'Agè ashop é dui-nhâng zoshâng ê, náng nhut mâ é dang eq rajung za, ngò, nang lé jéyang rà nghut lê. Ngò gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é hkyô lé, náng sê to gù nghut le nhîng, ²³ ngá ngùn lé, ngò dum taú jé lô jáng, aráng eq amyat wó yú shoq, ngùn hpún kat jang má, haí mù a kat tô é lú?' ga yhang lé taí ri.

²⁴ Hau htâng, yhumsîng hpó gi, ayàm má yap tô é bang lé, 'Haú ngùn rajoí lé yhâng chyáng mai taú yù luí, raxê joí wó sù lé jat byi keq.' ga taí ri.

²⁵ Haú bang gi, 'Yhumsîng ê, yhang gi, raxê joí wó to bê lé nhîng.' ga akò.

²⁶ Haú jáng, yhang gi, 'Ngò, nungmoq lé taí kôlé, wó sù† ó yuq le, jat byí é hui shirâ nghut lê; a wó su chyáng mai kúm gi, yhang wó tô é lé lhang, yu pyám byi shirâ nghut lê. ²⁷ Ahkuí, yhangmoq ahtoq má ngò hkohkâm kut rà lé a ô nau é, ngá é gye pé lé, shí má shuí lé mù, ngá hí má sat pyám keq.' ga hkûnmó hkyô kat ri." gâ ri.

Yesuq Logúng Ji Mù, Yerusalem Wà Mó Shut Wang ELÓ É Hkyô

Mht 21:1-11; Mrk 11:1-11; Yhn 12:12-19

²⁸ Yesuq gi, shí hkyô pé lé ban taí jáng, hí má so luí, Yerusalem wá mó shut doqló nyi ri. ²⁹ Yesuq gi, Yhâng é chángzô pé eq Tsanlun Bùm mâ é Bethpage wá eq Behtani wá má jé ló kojáng, Yhâng é chángzo í yuq lé, ³⁰ "Nungnhik, hí mâ é wá má é keq; wá haú má wang é hkûn jáng, ó le a jì wú shí é logúng zo tuí tô lánng é lé, é myáng kó rà nghut lê; haú lé hpyi yù mù, Ngá chyáng she lò keq. ³¹ Byù rayuq yuq mai, 'Haú haí mù hpyi nyi akò?' ga nungnhik lé myi kôjáng, 'Shí du lé, haú Yhumsîng rà ri gâ.' nghù tù taí keq." ga pyîng luí, nhang kat ri.

³² Nhang kat é sù nhik ê jé lé, Yesuq taí kat é dông yhang, dut to lánng é lé é myang akò. ³³ Yhangnhik logúng zo haú lé hpyi nyi kô é hkûn, yhumsîng wui gi, "Haú logúng zo lé, haí mù hpyi nyi akò lú?" ga luí, yhangnhik lé myi akò.

³⁴ Haú jáng, yhangnhik gi, "Shí du lé haú Yhumsîng rà ri gâ." ga taí akò.

³⁵ Yhangnhik gi, haú logúng zo lé Yesuq chyáng she lò mù, yhangmoq é buhîng pé lé logúng ahtoq má buí luí, Yesuq lé doq ji nhang akò.

³⁶ Haú su kut, Yhang ji e ló nyi le,

† 19:26 Wó sù nghu é gi, yhumsîng a-tsam lé rago dat chûng sù lé taí é nghut lê.

byu pé gi, yhangmoq é buhîng pé lé hkyô má hksång byî akô.

³⁷ Ahkuî, Tsanlun Bùm hkêgyó gyó lô é jowò eq chyáng lo é mai gi, chángzô pé banshoq bang, yhangmoq myang é laklai kumlhá pé é yanmai, gabú myit mai htê mó o mó èq Garai Gasang lé hkya-on kô é dang gi,

³⁸ "Haù Yhumsing é myìng mai jé lé lo é hkohekâm gi, hkungsô wó nyî sháng gaq ô![✠] Mauhkûng htoq má, nguìngón nyî sháng gaq ô!

Htoq tsáng myhâng má, Garai Gasang gi, hpungwup shìngkang bo nyî sháng gaq ô!"

³⁹ Haù mù luî, haù byù hpûng hkaù má bo é Hparishe pé ra-am gi, "Sarà ê, náng é chángzô pé lé tân pyám aq." ga luî, Yesuq lé tai akô.

⁴⁰ Haù hkûn, Yesuq gi, "Ngò, nungmoq lé tai kôlé, shí bang zim za nyî kô é nghut le gi, luqgok pé garù lô rà nghut lhê." ga tù tai ri.

⁴¹ Ahkuî, Yesuq, Yerusalem wá mó eq chyâng lò luî, wá mó haù lé myàng jáng, haù wá mó é matú ngaù mù, tai é gi, ⁴² "Wà nàng è! Hkû-nyî lhê é buìnyì má, nguìngón é hkyô lé nàng bûn sé tô é nghut le gi, gè rà wá! Ahkuî kúm gi, haù hkyô lé nghop to bê nghut mù luî, nàng a sé lo nghut ri. ⁴³ Hkâsu mù gâ le, náng chyáng Garai Gasang lé kûm jé é hkûn, nàng a bun a sé wú kat é yanmai, náng é gyè pé gi, awui ayàm má gyewap xuq mù, náng é lhîng hkyuq mai nang lé lom tô é buìnyì jé lô rà nghut lhê. ⁴⁴ Haù hkûn, nang lé lhoq htên pyám luî, nung zo pé lé le, haù ahkaù má yhang dùn nhê pyet sat pyám bekô rà; nàng gi, luqgok racham htoq má racham lháng a kê lhum loshoq, dut byuq rà nghut lhê." gâ ri.

Yesuq, Noqkuq Yhùm Lé Sêng Pyâm É Hkyô

Mht 21:12-17; Mrk 11:15-19; Yhn 2:13-22

⁴⁵ Ahkuî, Yesuq gi, Yerusalem noqkuq yhùm má wàng mù, ung zo ung shuq é bang lé, "Ngá yhùm gi, kyûdung yhùm dut rà nghut lhê.[✠] ga kâ to kôlhång, ⁴⁶ nungmoq gi, jowò shí lé 'damaq hkyûng[✠] kut akô." ga tai uchyang, hkat htoq pyâm ri.

⁴⁷ Yhang gi, nyî wuî noqkuq yhùm má mhoqshit nyi ri. Hkyangjong agyi pé, tarâ sará pé eq, byu pé é suwún wuî kúm gi, Yhang lé wó sat pyám rà hkyô ho nyi akô. ⁴⁸ Nghut kôlhång, byù banshoq bang gi, Yhâng mhoqshit é dang lé gyo nau nyi kô é yanmai, wó sat rà hkyô lé, a myang hô kô nghut ri.

20

Yesuq É Ahko Ahkáng Lé Myî Chyam Wú É Hkyô

Mht 21:23-27; Mrk 11:27-33

¹ Ra-nyî lé, Yesuq gi, noqkuq yhùm wàng hkaù má, byu pé lé mhoqshit nyi é eq, gabú danglù hko kyô nyi é hkûn, hkyangjong agyi pé gi, tarâ sará pé, suwún wuî eq rahá kut, Yhâng chyáng lé jé kômù, ² "Hai ahko ahkâng èq Nàng shí pé lé kut nyi lhê lú? Ahko ahkáng shí, Nang lé ó yuq byî é lú? Ngamoq lé tai kyô wú aq." ga Yhang lé myî akô.

³ Haù hkûn, Yhang gi, "Ngò le, nungmoq lé rajung myî wú kôlé; ⁴ Yohan byî é baptisma gi, mauhkûng mai lú? A nghut jáng, byu chyáng mai lú? Ngo lé tai kyô wú keq?" ga yhangmoq lé myî ri.

⁵ Haù hkûn, yhangmoq chòm hpyê lhum kô é gi, "Mauhkûng mai nghut lhê.", nghû nga-nhúng tai jáng le, 'Haì mù, yhang lé a lumjîng

✠ 19:38 Hkya-on 118:26 ✠ 19:45 Esai 56:7

✠ 19:46 Yer 7:11

kô é lúhú?' ga râ nghut; ⁶Byu chyáng mai nghut lhê.' nghû jáng le, shiwa byu banshoq gi, Yohan lé, myiqhtoi rayuq ga lumjáng to kô é yanmai, yhangmoq, nga-nhúng lé luqgok èq dú sat kó râ nghut." ga akô.

⁷Haù mù, yhangmoq gi, "Hkâmai nghut é lé, ngamoq a sé." ga tû tai akô.

⁸Yesuq gi, "Haù jáng, Ngò le, hai ahko ahkâng èq shí pé kut é hkyô lé, nungmoq lé a tai kyo." ga, yhangmoq lé tai ri.

Tsibiyiq Hkyâm Yhumsing Eq Hkyâm Sai Zo Bang

Mht 21:3-46; Mrk 12:1-12

⁹Byu pé lé, Yesuq dangtú dông xoq tai kyô é gi, "Byu rayuq gi, tsibiyiq hkyâm ralhûm sai to mù, hkyâm sai zo bâng chyáng ngho byí to luí, gó ming shut myáng myáng é nyi byuq ri. ¹⁰Kyôshu yoq jé jáng, yhang gi, hkyâm sai zo bâng èq, hkyâm mâ é tsibiyiq shi pé lé lhom byí kat sháng gaq ga, dui-nhâng zoshâng rayuq lé yhangmoq chyáng nhang kat ri. Nghut kôlhâng, hkyâm sai zo bang gi, haù yuq lé lhom bat mù, loq kôm taù nhang kat akô. ¹¹Gotù dui-nhâng zoshâng rayuq lé, yhangmoq chyáng dum nhang kat ri. Nghut kôlhâng, yhangmoq gi, haù yuq lé le, lhom bat mù, hoq lhoq hpu luí, loq kôm dum taù nhang kat akô. ¹²Sum yuq nghû râ dui-nhâng zoshâng lé dum nhang kat ri. Yhangmoq gi, haù yuq lé le bat cheq luí, hkyâm mai hkat htoq kat akô.

¹³Haù hkûn, tsibiyiq hkyâm yhumsing gi, 'Ngò hkâsu kut wú râ lúhú? Ngò chiyitdap é ngá zo lé, nhang kat wú râ nghut ri. Yhang lé kúm gi, yhangmoq lhom hkungga kó abe.' ga tai ri.

¹⁴Hkyâm sai zo bang gi, yhumsing hpô é yhangzo lé myàng kôjáng, 'Shí yuq gi, silí wunlí sing

yù râ sù nghut lhê; nga-nhúng, silí wunlí haù pé wó yù shoq, yhang lé sat pyám sháng.' ga rayuq eq rayuq tai lhum bum akô. ¹⁵Haù mù, yhang lé hkyâm shinggan shut dú htoq kômù, sat pyâm akô.

Haù su kut kôjáng, tsibiyiq hkyâm yhumsing gi, yhangmoq lé hkâsu kut râ lúhú? ¹⁶Yhang gi, é mù, haù hkyâm sai zo bang lé sat pyám luí, hkyâm haù lé góbang lé htot ngho byí pyám râ nghut lhê." gà ri.

Dang haù lé wó gyo bang gi, "Haù su gi, hkâ-nhám le a dut sháng gaq ô!" gà akô.

¹⁷Hau htâng, Yesuq gi, yhangmoq lé byu wú luí, "Haù jáng gi, 'Yhûm sai bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.'^{*}

ga Chyúmdang má kê tô é gi, haí gá nau é nghut lhê lúhú? ¹⁸Luqgok* haù má gyó záng é sù ó yuq nghut kôle, gyuí gyop byuq râ nghut lhê. Luqgok hau èq gyó nhê záng é sù le, nhê pyeq pyâm é hui râ nghut lhê." ga tai ri.

¹⁹Tarâ sará pé eq hkyangjong agyi pé gi, dangtú shí gi, yhangmoq lé lhoq ang luí tai é hkyô lé, sé kô é yanmai, haù hkûn jáng lháng Yhang lé chyup yù râ matú hkyô ho nyi akô. Nghut kôlhâng, byu pé lé gyuq mù a chyup shi kó nghut ri.

Kang Kat É Hkyô Eq Séng Luí Myi É Dang

Mht 22:15-22; Mrk 12:13-17

²⁰Haù mù, yhangmoq gi, Yesuq é dang má mara wó chyup yù shoq ga, gegún labyoq kut bang lé jowú nhang nyi akô. Haù gi, ahkáng ayá wó é mauzaù chyáng Yhang lé wó ap pyám râ matú nghut ri. ²¹Haù jowú bang gi, "Sarâ è, nàng gi, dítg dítg mán mán tai mhoqshit é eq, byu é myoqdong lé a tê byí é za, Garai Gasâng é hkyô lé, tengmán é

* 20:17 Hkya-on 118:22 * 20:18 Luqgok nghu é gi, Yesuq lé tai ri.

dông mhoqshit é sù nghut é lé, ngamoq sê lhê. ²² Hkoséng Kehta q lé, ngamoq kang kat rã gi, tarã wang lhê lúhú? A wang é lúhú?" ga luí, Yhang lé myí wú akô.

²³ Nghut kôlhãng, Yesuq gi, haú bãng é myit goí é hkyô lé sé mù luí, yhangmoq lé, ²⁴ "Ngo lé, ngùn rachap tân shit wú keq. Ó yuq é alhô eq masat laiká dap tô ri lúhú?" ga myí jáng, ²⁵ yhangmoq gi, "Kehta q é nghut ri." ga akô.

Haú hkûn, Yesuq gi, "Haú nghut jang, Kehta q é lé gi, Kehta q lé byi keq; Garai Gasãng é lé gi, Garai Gasang lé byi keq." ga yhangmoq lé taí ri.

²⁶ Yhangmoq gi, byu pé hí má, Yhãng é dang má mara a wó ho myang é eq, Yhang tú taí é dãng é yanmai, maú hong byuq kôluí, zim byuq akô.

Dum Dui Toq Lô Rã Hkyô Eq Séng Luí Myí É Dang

Mht 22:23-33; Mrk 12:18-27

²⁷ Haú hkûn, haú dum dui toq hkyô a joq gã é Saduke pé ra-am gi, Yesuq chyáng lé jé kômù, ²⁸ "Sarã é, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmãng é awut ashín xoq byi rã matú, yhãng rhat lé chui gon ra rã nghut lhê ga, nganhúng lé, Mosheq kã to byí ri. ²⁹ Hí hpyang lé, gumang nhiktãng wuì nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. ³⁰ Lanong yuq le, yhangmang mó é chui lé gon mù, zo dù a dap é za shi ló byuq bê. ³¹ Hau htãng, Lalaq yuq mai Lahkã yuq jé shoq, chuimó haú lé rayuq htãng rayuq dum gon gon kut kôlhãng, zo dù a dap é chyat shi ló byuq bùm bekô nghut ri. ³² Ló htãng má, myiwe myhí haú le chãng shi ló byuq bê nghut ri.

³³ Haú mù luí, haú dum dui toq é buinyí má, myiwe myhí haú gi, haú nhiktãng wuì má é hkã yuq é yhangmyi nghut rã lúhú? Hkãsu mù gã le, yhang gi, haú nyhit yuq é yhangmyi dut wú bê sù nghut ri." ga luí, Yhang lé myí wú akô.

³⁴ Haú hkûn, Yesuq gi, "Shí mingkan htoq mã é byu pé gi, ikun kut é eq myí byi myí yù kut nyi bum akô. ³⁵ Shi é mai dum dui toq rã eq, haú pyat mã nyi rã gíng bãng é matú gi, ikun kut é eq myí byi myí yù hkyô joq lo rã a nghut. ³⁶ Haú bang gi, maumang lagyô pé su dut byuq luí, a dat shí lo kô rã nghut lhê. Yhangmoq gi, dum dui toq lô su é yhangzô pé† nghut é yanmai, Garai Gasãng é yhangzô pé nghut bekô. ³⁷ Haú nyé duq nyi é mhanpúng eq séng luí, Mosheq èq kã tô é má lhãng, Yhumsíng gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.†* ga bo tô é yanmai, shi é bang dum dui toq lô rã hkyô lé tân shit to bê nghut ri. ³⁸ Garai Gasang gi, shi bê bãng é Garai Gasang a nghut, dui nyi bãng é Garai Gasang ru nghut nyi lhê; hkãsu mù gã le, lhunglhãng bang gi, Garai Gasãng é hí má dui nyi é bang chyat nghut akô." ga yhangmoq lé tú taí ri.

³⁹ Haú hkûn, tarã sarã pé ra-am gi, "Sarã é, nãng taí é jô ri." ga akô. ⁴⁰ Haú mù, yhangmoq gi, Yhang lé haí le a wám myí jat lo kó nghut ri.

Hkrisduq Gi, Ó Yuq É Yhangzo?

Mht 22:41-46; Mrk 12:35-37

⁴¹ Hau htãng, Yesuq gi, yhangmoq lé, "Byu pé gi, Hkrisduq lé, Dawiq é yhangzo nghut lhê, ga hkãsu mù taí akô lúhú? ⁴²⁻⁴³ Dawiq yhang yhang lhãng gi, Hkya-on Kungtôn Laiká má,

† **20:36** Dum dui toq lô su é yhangzô pé gã é gi, Yesuq lé lumjíng luí, shi é htãng má dum dui toq lo é bang lé gã lhê. * **20:37** Htoq Lô 3:6

'Haù Yhumsing Garai gi, ngá é Yhumsing lé, "Ngò, náng é gyè pé lé, náng é hkyi nang tanghkuq kut pyám byí é hkying jé shoq, Ngá é loqyo hkyam† shut zung nyi shi aq." gâ ri.*
ga kâ tô ri. ⁴⁴Haù mù, Dawiq yhang lhang, Hkrisduq lé, Yhumsing gâ é nghut le gi, Hkrisduq gi, yhangzo za hkâsu ge nghut râ lhu?" ga tai ri.

Tarâ Sará Pé Lé Sidiq Râ Hkyô

Mht 23:1-36; Mrk 12:38-40; Luk 11:37-54

⁴⁵Byù banshoq gyô nyi é u lé, Yesuq, Yhang é chángzô pé lé tai é gi, ⁴⁶"Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún lui, gai pé má hkunggâ é eq shichyen râ lé le, tarajong pé mâ é ahkyak dik é zûng jang pé eq poi pé mâ é je réng é zûng jowò pé má myang zûng râ lé le, ô nau nyi bum akô. ⁴⁷Yhangmoq gi, chuimó pé é yhûm-yò pé lé hpyoq zo hpyoq shuq kôluí, kyû hîng hîng dúng shit mhaù é bang nghut akô. Haù sù é bang gi, je riyhang htan é dông dam byí é hui zo kó râ nghut lhê." gâ ri.

21

Chuimó Myhí Kat É Alu

Mrk 12:41-44

¹Yesuq tu wú kat é hkûn lé, noqkuq yhûm mâ é alu sidek má, wó bang alu kat nyi bùm kô é lé myang ri. ²Dum nghut jáng, gyi htîngchap ngùn zo í chap za kat é, myung é chuimó myhí rayuq lé le myang ri. ³Haù mù, Yhang gi, "Ngò, nungmoq lé teng za tai kôlé, shí myung é chuimó myhí gi, góbang banshoq htoq má je myo kat bê nghut ri. ⁴Hkâsu mù gâ le, haù góbang banshoq gi, yhumsing agùn agó wó é mâ é lé, lé kat akô; yhang kúm gi, myùng sù nghut kôle, yhang asak lé

baù ra ngùn lhunglhang lé kat bê nghut ri." ga tai ri.

Ló Htûm Buinyi Má Dut Lò Râ Hkyô

Mht 24:1-21, 29-35; Mrk 13:1-19, 24-31

⁵Noqkuq yhûm lé, yung é luq-gok pé èq le, alu chyunghuq pé èq le, mhôn tô ri ga, chángzô pé ram hkya-ôn bùm kôjáng, Yesuq gi, ⁶"Nungmoq myang nyi é shí pé gi, luqgok rachâm htoq racham lhang a kê lhum loshoq, hpyoq hpyi pyám é buinyi jé râ nghut lhê." ga tai ri.

⁷Haù su ga jáng, yhangmoq gi, "Sará è, haù nghut le gi, haù hkyô pé gi, hkâ-nhâm dut lô râ lhu? Haù dut râ chyâng lò jáng, hkasù é kumlhá htoq lô râ nghut lhê lhu?" ga, Yhang lé myi akô.

⁸Haù hkûn, Yhang gi, "Nungmoq gi, hkyô shuî nghoq é a hui kó sháng gaq, sidiq nyi keq. Hkâsu mù gâ le, 'Ngò gi, Mesaia nghut lhê.' ga le, 'Ahkying chyâng lò bê.' ga le, Ngá mying lé llang é byù myo myo pô htoq lô kó râ nghut lhê. Nghut kôlhang, nungmoq gi, yhangmoq htâng hkácháng kó. ⁹Majan htoq é eq, gumlau toq é hkyô lé, wó gyo kôjáng, hkâgyuq hkâ-kyûm kó, haù hkyô pé hí dut lò râ nghut lhê. Nghut kôlhang, lò htâng é buinyi gi, haù hkûn jáng dut râ a nghut shi." ga tai ri.

¹⁰Hau htâng, Yhang, yhangmoq lé dum tai é gi, "Ra-myú eq ra-myú, mingdán ralhûm eq ralhûm majan zân lhûm lò kó râ nghut lhê. ¹¹Jowò myo myo má, layàng mó nún lo é, noli nojàng myô lo é eq mutmó gyó lo é pé, dut lò râ nghut lhê; gyuq chiq jung pé eq kumlhá mó le, mauhkûng htoq mai htoq shit lô râ nghut lhê.

¹²Nghut kôlhang, haù hkyô banshoq a dut shimá, Ngá mying é yan-mai, byu pé gi, nungmoq lé chyup

† 20:42-43 Loqyo hkyam nghu é gi, ahko ahkáng wó é jowò nghut lhê. * 20:42-43 Hkya-on 110:1

yû luî, zing-rî yù mù, tarajong pé eq htóng pé má ap pyám kó râ nghut lhê, hau htoq agó, nungmoq gi, hkohkam pé eq zau pé chyáng é ap byí é le, hui kó râ nghut lhê. ¹³ Haú su é pé mai, nungmoq gi, ngò eq séng luî, saksé wó hkám râ hkyô htoq lô berâ nghut lhê. ¹⁴ Nghut kôlhang, hkâsu nghû lhom tú taí râ hkyô lé, hí mai a myit wuî nyi râ lé, nungmoq myit hpyit to keq. ¹⁵ Hkâsu mù gà le, nungmoq é gye pé lhunglhang bang, haí le a wó lhom tú taí loshoq, ngò, nungmoq lé dang eq hpaqchyí byi râ nghut lhê. ¹⁶ Nghut kôlhang, nungmoq gi, înu îwâ pé, âgu âmâng pé, mungmoq eq buinùm ji-myi wuî eq lhang, ap pyâm é hui kó râ nghut lhê. Yhangmoq gi, nungmoq chyáng má é ram lé lhang, sat pyám kó râ nghut lhê. ¹⁷ Byù lhunglhang bang gi, Ngá é yanmai, nungmoq lé a nguî kut kó râ nghut lhê. ¹⁸ Nghut kôlhang, nungmoq é xâm rahkat lhang wó htên byuq râ a nghut.* ¹⁹ Nungmoq gi, wó jân é hkyô mai, asak lé wó yú kô râ nghut lhê.

²⁰ Yerusalem wà mó lé gye hpúng mó eq lóm tô é lé, nungmoq myàng jáng, wà mó hau htên byuq râ ahkyíng chyâng lò bê lé, bûn sê nyi keq. ²¹ Haú hkûn lé, Yuda mau má nyi é bang gi, bùm pé shut hpang doq ló kó sháng gaq; hau wà hkaû má nyi é bang le, hpang htoq kó sháng gaq; wà tiq wà zo pé má nyi é bang le, wà hkaû shut a wàng kó sháng gaq. ²² Hkâsu mù gà le, Chyúmdang má kê to má kê to banshoq dik lò râ matú, buinyi hau pé gi, mara dam byí é buinyi pé dut râ nghut lhê. ²³ Haú buinyi pé má, zogûng dut é myiwe wuî eq nau huq ashí nghut é înu wuî gi, gyai yhang wuîhke kô râ nghut lhê; hkâsu mù gà le, shí ming ahtoq má wuîhke mó eq, shí amyu ahtoq má

Garai Gasang nhikmó-yô é jé lô râ nghut lhê. ²⁴ Yhangmoq gi, sâm lham éq sat pyám hui lhê eq, ming hkan ming mó má chyup shuí lô é le hui kó râ nghut lhê. Tûngbau pé lé byí tô é buinyi ahkyíng htáng shoq, Yerusalem wà mó gi, tûngbau pé éq nâng zik tô é hui râ nghut lhê.

²⁵ Haú hkûn, bui, kyî, lhamó pé má, kumlhá htoq shit râ nghut lhê. Wuishuq lung-aû mâ é wuîlhêng pé é mying é htê mó é yanmai, myigùng htoq má, byù myú chângjup gi, hkâsu kut râ a sé loshoq mau é eq myit wuî myit hkê é hui bekô râ nghut lhê. ²⁶ Byu pé gi, mingkan htoq má dut lò râ é hkyô pé lé, a jé shi mai myit gyuq kô é yanmai, moq byuq ló bùm kó râ nghut lhê; hkâsu mù gà le, mauhkúng mâ é wum-o a-tsam pé gi, lhoq nhún é huî bùm kô râ nghut lhê. ²⁷ Haú hkûn, hau Byu Yhangzo gi, mhut ji mù, hpungwup a-tsam mó eq le, hpungwup shingkang mó eq le, gyó lé lo é lé, yhangmoq byu-myàng kó râ nghut lhê. ²⁸ Haú hkyô pé dut hi lò jáng, ulhum tú mù wú kat keq, hkâsu mù gà le, nungmoq lé hkyi yù râ buinyi gi, chyâng lò bê nghut ri." gà ri.

²⁹ Yhang, yhangmoq lé dangtú dông xoq taí é gi, "Maih páng gâm eq siggâm banshoq lé wú wú keq. ³⁰ Sikbu nyún lo é lé myàng jáng, bui nyé nám chyâng lò bê ga luî, nungmoq yhang dat wú sê akô. ³¹ Haú eq rajung za, hau hkyô pé dut nyi é lé, nungmoq myàng kôjáng, Garai Gasang é mingdán gi, chyáng bê nghut é hkyô lé, nungmoq sé lo keq.

³² Ngò, nungmoq lé teng za taí kôlé, shí pyat má é byu pé a ban shi byuq shimá, hau hkyô pé banshoq dut byuq râ nghut lhê. ³³ Mauhkúng eq myigùng gi, a joq lo dut byuq râ nghut lhê; nghut

* 21:18 Shí má gi, asak woi-nyí a shí râ hkyô lé taí é nghut lhê.

kôlháng, Ngá é dang gi, ru joq nyí nhut lhê.

³⁴ "Nghut kôlháng, zo myo shuq myô é, í shuq wut é, mingkan htoq má é myit wui myit hkê é pé èq, nungmoq é i-myit wò laí nyí luí, haú ngò jé lé é buinyi gi, lhaí bik lo é su, nungmoq ahtog má byodàn tung a jé lò sháng gaq, sidiq nyi keq. ³⁵ Hkâsu mù gâ le, buinyi haú gi, mingkan htoq má nyi é byù ban-shoq bâng é ahtog má, haú su jé lò râ nhut lhê. ³⁶ Haú mù luí, haú dut lò râ hkyô ban-shoq mai, nungmoq wó lut lai mù, haú Byu Yhangzô é hí má, wó yap gîng é bang dut sháng gaq, hkâ-nhám le kyûdung luí, ahkyíng hkangmó má machya nyi keq." gâ ri.

³⁷ Yesuq gi, nyí wui noqkuq yhûm má mhoqshit nyí luí, myín wui Tsanlun Bùm gâ é bùm shut htoq é mù, é nyi to to kut ri. ³⁸ Byù ban-shoq bang gi, Yhang mhoqshit é dang gyo râ ga, napsûn noq noq mai noqkuq yhûm má jé lé bum akô nhut ri.

22

Yesuq Lé, Yudaq Èq Ung Zô É Hkyô

Mht 26:1-5,14,16; Mrk 14:1-2, 10-11; Yhn 11:45-53

¹ Ahkuí, Lhoqlhai Poí gâ é Azuma (múnchi a kat é Muk Zo Poí) jé râ chyâng lò bê. ² Haú mù, hkyangjong agyi pé eq tarâ sará pé gi, Yesuq lé hkâsu kut wó sat pyám râ hkyô, ho nyi akô; hkâsu mù gâ le, yhangmoq gi, mingbyû wui lé gyuq bùm kô é yanmai nhut ri. ³ Haú hkûn, lagyo raxe í yuq má bo é Iskarut gâ é Yudaq chyáng Tsadán wàng mù luí, ⁴ yhang gi, htoq é mù Yesuq lé hkâsu kut ap pyám râ hkyô lé hkyangjong agyi pé, noqkuq yhûm zúng é gyezau pé eq, é hpyê ri. ⁵ Haú mù, yhangmoq gi, gyô nguì luí, Yudaq lé ngùn byi râ hkyô myit hui bekô. ⁶ Yudaq le

hap yù luí, byù hpúng má a nhut é hkûn, Yesuq lé ap pyám râ hkyô ho nyi bê nhut ri.

Lhoqlhai Poí Lé Món É Hkyô

Mht 26:17-30; Mrk 14:12-26; Yhn 13:21-30

⁷ Ahkuí, haú Lhoqlhai Poí má é sauzo shigu hkungga sat nhông byi râ é Azuma buinyi jé bê. ⁸ Haú hkûn, Yesuq gi, Petruq eq Yohan lé, "Nga-nhúng zo râ matú Lhoqlhai Poí é món láng keq." ga luí, nhang kat ri.

⁹ Haú nhik gi, "Hkâmá é món to nhâng nau ri lú?" ga luí, Yhang lé myí akô.

¹⁰ Haú hkûn, Yesuq gi, "Nungnhik, myuq hkaú shut wang e ló le wui yambú waq é byù rayuq lhom hui râ nhut lhê; haú yuq chyáng châng ló luí, yhang wang ló é yhûm má châng wàng mù, ¹¹ yhumsîng lé, 'Ngò Ngá é chángzô pé eq rahá, Lhoqlhai Poí zo râ bíng wap hkâmá nhut lhê lú ga, Sará myí nhang kat ri.' nghû taí keq. ¹² Haú hkûn, hen tô é ahtog má é wap mó lé, nungnhik lé lhom tân shit râ nhut lhê; wap haú má é món to keq." ga taí kat ri.

¹³ Haú chángzo nhik htoq e ló le, Yesuq taí kat é eq roq za é myâng kômù, Lhoqlhai Poí lé món to bekô nhut ri.

Yhumsing É Myinzang

¹⁴ Ahkuí, ahkyíng jé jáng, Yesuq eq Yhâng é chángzô pé rahá za zohpoq má zung tô akô. ¹⁵ Haú hkûn, Yesuq gi, "Ngò wuihke jamjau hpuzô é a hui shi má, Lhoqlhai Poí shi lé nungmoq eq rahá zo râ lé, Ngò gyai ô nau nyi lhê. ¹⁶ Hkâsu mù gâ le, ngò, nungmoq lé taí kôlé, Garai Gasâng é mingdán má poi shi a ló dik dik gi, ngò haú lé dum zo râ a nhut ló." ga luí, yhangmoq lé taí ri.

¹⁷ Haú htâng, Yesuq gi, góm lé yù mù jeju ban hkya-on jáng, "Góm shi lé yù luí, nungmoq yhangchang

gàm shuq lhum keq. ¹⁸ Ngò, nungmoq lé tái kôlé, ahkuí mai gi, Ngò, Garai Gasâng é mingdán a jé jé tsi-biyi wing lé dum shuq rà a nghut lo." ga tái ri.

¹⁹ Hau htâng, Yhang gi, muk lé yù mù, jeju hkya-on luí, muk lé myhik hpé mù, yhangmoq lé byi uchang, "Shí gi, nungmoq é matú byí pyâm é, Ngá é gungdu nghut lhê; Ngo lé bún nyi rà matú, shí su kut nyi keq." ga tái ri.

²⁰ Hau eq rajung za, myinzang ban zo jáng, góm lé le yù mù, "Góm shí gi, nungmoq é matú htoq pyâm é, Ngá é sui má xuq tô é dangshikaq asik nghut lhê. ²¹ Nghut kôlhang, wú keq, Ngo lé ap pyâm rà sù gi, zang bó shí má ngò eq rahá nyi tô ri. ²² Hau Byu Yhangzo gi, hkyin to huí é eq rajung za shí rà nghut lhê; nghut kôlhang, Yhang lé ap pyâm é sù gi, dingnyé wó ri." ga tái ri. ²³ Hau su ga jáng, lagyô pé gi, yhangmoq má shí hkyô kut rà sù gi, hká yuq nghut rà lú ga, rayuq eq rayuq myí lhum bum akô.

²⁴ Hau htoq agó, yhangmoq má é hká yuq sheq je kô lhê lú ga le, rayuq eq rayuq tái htíng lhum bum akô. ²⁵ Hau mù luí, Yesuq gi, "Tùngbaù pé é hkohkam pé gi, yhangmoq byù myú pé é ahtoq má up zô nyi kô é nghut luí, byu pé gi, ahkáng ayá wó é bang lé jeju yhumsing pé ga luí, tái hkungga nyi bum akô. ²⁶ Nungmoq kúm gi, hau su hkâkut kó. Nungmoq má je ko sù gi, asak je tiq é sù su, up é sù le, dui-nhâng zoshâng su nghut nyi sháng gaq. ²⁷ Hká yuq sheq je kô lhê lú? Zô zung nyi sù lú? Hau a nghut jáng, saí tsó é sù lú? Zô zung nyi é sù sheq nghut ri. Nghut kôlhang, ngò gi, nungmoq má é saí tso sù su za nghut nyi lhê. ²⁸ Nungmoq kúm gi, Ngò jamjau huí nyi le, Ngò eq rahá nyi nyi é

bang nghut nyi akô. ²⁹ Hau su mù, Ngá wa gi, Ngo lé, mingdán ap byí é su, Ngò le, nungmoq lé mingdán ap byi rà nghut lhê. ³⁰ Hau mù, Ngá é mingdán má é, Ngá é zangbó má, nungmoq wó zo kó rà nghut lhê; nungmoq le hkohkâm-tanghkuq má zung to mù, Israelaq amyú raxe í hú lé jéyáng kó rà nghut lhê.

Yesuq Lé, Petruq (Simun) Hengik Pyâm Rá Hkyô

Mht 26:31-35; Mrk 14:27-31; Yhn 13:36-38

³¹ Simun, Simun é, wú aq, sungsô cham lé shái é su, nungmoq lé wó shái shoq ga, Tsadán wá gi, ahkáng dung bê. ³² Nghut kôlhang, náng é lumjín myit a hten sháng gaq nghú, Ngò, náng é matú kyúdung byi bê; náng dum lhing bún lò jáng, nung gu nung mâng pé lé wum-o lhoq gíng byi aq." ga tái ri.

³³ Hau hkûn, Simun gi, "Yhumsing é, htóng wâng kôlhang, shí kôlhang, ngò gi, náng eq rahá cháng rà matú myit hpyit to bê." ga tái ri.

³⁴ Yesuq gi, "Petruq é, nang lé Ngò tái lé, hkû-nyí* lháng woq a tân shí má, náng, Ngo lé a sé ga luí sum dâm he-ngik pyâm rà nghut lhê." ga tái ri.

³⁵ Hau htâng, Yesuq, yhangmoq lé tái é gi, "Ngò, nungmoq lé ngunhtùng, jìhtùng, hkyí-tsung a wùn a chùng nhang é za, nhang kat é nghut hkûn, nungmoq chyáng hái ra akô lú?" ga myi jáng, yhangmoq gi, "Hái le a ra lo." ga tái akô.

³⁶ Hau hkûn, Yhang gi, "Ahkuí kúm gi, ngunhtùng wó sù gi, yù wun sháng gaq, jìhtùng wó sù le, yù wùn sháng gaq, shâm a wó sù gi, bumó ung luí wui sháng gaq. ³⁷ Hkâsu mù ga le, Ngò, nungmoq lé tái kôlé, Ngò eq séng luí Chyúmdang má kâ tô é gi, dut lò berâ nghut lhê; 'Hau yuq gi, yubak mara wó bang

* **22:34** Yudaq byu pé é ra-nyí gi, myinhâng bui wang é mai, htang nyi bui wang é jé shoq nghut lhê. Shí má é hkû-nyí gi, nga-nhùng é matú myín àng ri. ✧ **22:37** Esai 53:12

má nghap lhôm to bê.^{1*} ga kê tô é dang gi, Ngá chyáng dik lò rá nghut lhê." ga luí, yhangmoq lé taí ri.

³⁸ Haú mù, lagyô pé gi, "Yhumsing ê, wú aq, shí má sâm í hkyam joq tô ri." ga taí kôjáng, Yesuq gi, "Gé bê." ga luí, yhangmoq lé taí ri.

Tsanlun Bùm Má Yesuq Kyûdung É Hkyô

Mht 26:36-46; Mrk 14:32-42

³⁹ Ahkuí, Yesuq gi, htoq luí, gó hkun é eq rajung za, Tsanlun Bùm shut htoq e ló bê nghut ri; Yhâng é chángzô pé le Yhang htâng châng e ló akô. ⁴⁰ Haú jowò má jé jáng, Yhang gi, "Nungmoq, gunglaú é a hui sháng gaq, kyûdung nyi keq." ga luí, yhangmoq lé taí to mù, ⁴¹ chángzô pé nyi é mai luqgok radú we kô gâng e ló luí, hkyihput htuq mù, ⁴² "Áwa ê, Náng ô nau é nghut le gi, góm† shí lé Ngá chyáng mai lhai pyám byi laq. Nghut kôlhang, Ngò ô nau é đông a nghut, Nàng ô é đông sheq nghut sháng gaq." ga kyûdung ri. ⁴³ Haú hkûn, mauhkung mai maumang lagyo rayuq htoq lé luí, Yhang lé i-myt nhik lé taí tîng ri. ⁴⁴ I-myt hkaú má dik shoq hkâm zo wú é yanmai, Yhang je riyhang kyûdung wum kat nyi ri; Yhâng é buibù le, sui hkyí sui pat su myigùng má yui gyó ri.

⁴⁵ Haú mù, kyú ban dung jáng, Yhang toq luí, chángzô pé chyáng ló wú le, yhangmoq gi, myit yón mù luí, yhup myhí to kô é lé ló myâng mù, ⁴⁶ "Haí mù yhup nyi akô lhú? Toq keq! Gunglaú é a hui sháng gaq, kyûdung nyi keq." ga luí, yhangmoq lé taí ri.

Yesuq Lé Chyup É Hkyô

Mht 26:47-56; Mrk 14:43-50; Yhn 18:3-11

⁴⁷ Haú su ga, ru taí nyi ashí le, wú keq, haú chángzo raxe í yuq

má bo é Yudaq gi, hkyô hí mù byù rajùm rayò lé shuí lé lô luí, yhang gi, Yesuq lé bopuq puq rá ga hui lé lo ri. ⁴⁸ Haú mù luí, Yesuq gi, "Yudaq ê, nàng gi, haú Byu Yhangzo lé bopuq puq é èq gyè pé chyáng ap pyâm lhê lhú?" ga luí, yhang lé lhom myí ri.

⁴⁹ Haú hkûn, Yesuq htâng cháng bang gi, haí dut lò rá lé bûn sé kô é yanmai, "Yhumsing ê, ngamoq gi, sham èq zân le, gè rá lhú?" ga myí akô. ⁵⁰ Yhangmoq chyáng mâ é rayuq gi, hkyangjong mó é dui-nhâng zoshâng lé zân kat luí, yhâng é loqyo nohkyap byit byuq bê nghut ri.

⁵¹ Yesuq kúm gi, "Gé bê. Yhangmoq ô nau é su nghut kó sháng gaq." ga tù taí mù, haú yuq é nohkyap lé ê záng luí lhoq gê byí ri.

⁵² Yesuq gi, Yhang lé chyup rá ga jé lé é hkyangjong agyi pé, noqkuq yhùm zúng é zau pé eq agyi suwún wú lé, "Nungmoq gi, damyaq rayuq lé chyup é su, sâm, dumbáng eq kut luí, lé lo akô lhú? ⁵³ Ngò gi, nyí wú, noqkuq yhùm má nungmoq eq rahá nyi kôlhang, nungmoq Ngo lé chyup yú rá ga a hen wú kó; ahkuí gi, mauchut èq up† nyi bê yanmai, nungmoq é ahkying nghut nyi ri." ga taí ri.

Yesuq Lé, Petruq Èq He-ngik Pyâm É Hkyô

Mht 26:57-58, 67-75; Mrk 14:53-54, 66-72; Yhn 18:12-18, 25-27

⁵⁴ Haú hkûn, yhangmoq gi, Yhang lé chyup yú mù she ló luí, hkyangjong mó é yhùm shut shuí wang ló akô. Petruq le we we mai châng tô ri. ⁵⁵ Ahkuí, yhangmoq gi, wàng hkaú má myi mut yú luí zung tô bum é hkûn, Petruq le yhangmoq é ahkaú má bo tô ri. ⁵⁶ Langchyáng myhí rayuq gi, myihkyom yâm má Petruq zung tô

† 22:42 góm gâ é gi, Yesuq jamjau hui rá hkyô eq shí rá hkyô lé, taí nau é nghut lhê. ‡ 22:53 Mauchut èq up gâ é gi, Tsadán èq up é lé gâ ri.

é lé, myang kat mù, yhang lé rago wú tsuq to luí, "Shí yuq le Yesuq eq rahá nyi sù nghut ri." ga tái ri.

⁵⁷ Haú hkûn, Petruq gi, "Myiwe myhí ê, nàng tái é sù lé, ngò a sé." ga he pyâm ri.

⁵⁸ Hau htâng hkâ-myháng a myáng má, byù rayuq gi, yhang lé dum myàng luí, "Nàng le yhangmoq chyáng bo nyi sù nghut ri." ga tái kat jáng, Petruq gi, "Byù hpó ê, ngò a nghut." ga tù tái ri.

⁵⁹ Hkyíng hkum rahkum kô myáng jáng, rayuq le, "Gè gè yhang, shí yuq gi, Yhang eq rahá nyi wún sù nghut ri; haí mù gâ le, yhang gi, Galile byù le nghut ri." ga zuq zuq tái ri.

⁶⁰ Petruq gi, "Byù hpó ê, nàng tái nyi é hkyô lé, ngò a sé." ga tù tái ri. Haú su ga ru tái nyi ashí le, woq tân bê nghut ri. ⁶¹ Haú hkûn, Yesuq gi, lhing luí, Petruq lé wú kat ri. Haú mù, Petruq gi, "Hkú-nyí lháng, woq a tân shi má, nàng Ngo lé sum dâm he pyám râ nghut lhê." ga luí, Yhumsing yhang lé tái é dang lé bún kat ri. ⁶² Haú mù, yhang gi, shinggan shut htoq ê luí, gyai yhang é ngau nyi ri.

Gyezô Pé Yesuq Lé Rhoi É Hkyô

⁶³ Yesuq lé zúng nyi é bang gi, Yhang lé rhoi luí nghap myíng ng-hap htê mu nyi akô. ⁶⁴ Yhangmoq gi, Yhâng é myoqdong nghop pyám byi luí, "Nang lé bat sù gi, ó yuq nghut ri lhú? Myiqhtoi htoí wú aq." ga myí akô. ⁶⁵ Yhangmoq gi, Yhang lé nyhap é dang ajung jung đông tái rhoi nyi akô.

Suwún Wui É Hí Má Yesuq Jé Nyi É Hkyô

Mht 26:59-66; Mrk 14:55-64; Yhn 18:19-24

⁶⁶ Napkyó myoqmyàng jáng, mingbyú wui é suwún hpúng bang eq rahá, hkyangjong agyi pé, tará sará pé, zup hpong kut nyi é má, Yesuq lé shuí é mù,

⁶⁷ "Nàng Hkrisduq nghut é têng le gi, ngamoq lé tái kyo laq." gâ akô.

Yesuq gi, "Ngò gi, Hkrisduq nghut lhê nguú tái kôhang, nungmoq jing kó râ a nghut. ⁶⁸ Ngò, nungmoq lé myi kôhang, nungmoq gi, tù tái kó râ a nghut. ⁶⁹ Nghut kôhang, ahkuí mai haú Byu Yhangzo gi, a-tsam bo dik é Garai Gasâng é loqyò hkyam má wó zung nyi berá nghut lhê." ga luí, yhangmoq lé tái ri.

⁷⁰ Haú hkûn, yhangmoq banshoq bang gi, "Haú nghut le gi, Nàng, Garai Gasâng é Yhangzo nghut lhê lhú?" ga myí akô.

Yesuq gi, "Nungmoq tái é eq rajung za Ngò nghut lhê." ga luí, yhangmoq lé tù tái ri.

⁷¹ Haú hkûn, yhangmoq gi, "Nga-nhúng hai jung saksé wá râ nyi ashí lhú? Yhâng é nhut mai yhang, tái htoq kat é dang lé, nga-nhúng wó gyo bê nghut lhê." ga akô.

23

Yesuq Lé Mara Hun É Hkyô

Mht 27:1-2, 11-14; Mrk 15:1-5; Yhn 18:28-38

¹ Haú hkûn, zup zing tô é bang banshoq gi, htoq mù, Yesuq lé mauzau Pilat chyáng shuí wang ê luí, ² "Shí yuq gi, mingbyú wui lé hkyô shuí nghoq é eq, hkoséng Ketaq chyáng kang kat râ hkyô lé le hkúm to luí, Yhânggùng yhang gi, haú Hkrisduq nguú é hkohkâm nghut lhê ga luí, tái nyi é lé ngamoq myang ri." ga luí, Yhang lé mara hun akô.

³ Haú hkûn, Pilat gi, Yesuq lé, "Nàng gi, Yudaq byu pé é hkohkâm nghut lhê lhú?" ga myi jáng, Yesuq gi, "Nàng tái é eq rajung za nghut lhê." ga tù tái ri.

⁴ Pilat gi, "Shí yuq lé hún râ mara ngò a myàng." ga luí, hkyangjong agyi pé eq shiwa byu pé lé tái ri.

⁵ Nghut kôhang, haú bang gi, "Shí yuq gi, Yuda mau gón má yhang

mhoqshit é đông mai, mingbyû wui é i-myt lé shuí gabyông ri. Haû gi, Galile mau mai ahkuî shî má jé shoq nghut bê nghut ri." ga zuq zuq taí bum akô.

⁶ Pilat gi, haû su ga kô é lé wó gyo jáng, Yesuq Galile byû nghut é, a nghut é hkyô lé myí wú ri. ⁷ Yesuq gi, Herut up é mau mã é byû nghut é lé Pilat sé jáng, haû u lé Yerusalem wà mó má nyi tô é Herut chyáng, ê dé kat nhang ri.

⁸ Herut gi, Yesuq lé myàng jáng, gyai yhang gabú pyám ri. Hkâsu mù gâ le, Yhâng é hkyô lé wó gyô wú mù, Yhang laklai kumlhá rahum lhum kut shit râ lé, wó myâng shoq ga, myit myoqbyu nyi é nghut luí, Yhang lé myàng nau é gyai yhang myáng bê nghut ri. ⁹ Haû mù, yhang gi, Yesuq lé dangmyi myo myô eq myí wú kôhang, Yesuq gi, dang rahkun lhang a tú taí byi nghut ri. ¹⁰ Hkyangjong agyi pé eq tarâ sará pé gi, yap to mù, Yhang lé mara gyai yhang chôm hun akô. ¹¹ Herut eq yhâng é gyezô pé gi, Yesuq lé rhoi jihkyoi kut mù, atam é đông taí hpoi kô luí, réng é mebu hut byi mù, Pilat chyáng dum taú dé nhang kat akô. ¹² Haû nyí jáng, hí hpyang gye dut lhum é Herut eq Pilat gi, buinùm dut byuq bekô nghut ri.

Yesuq Lé Sat Râ Matú Doqdan É Hkyô

Mht 27:15-26; Mrk 15:6-15; Yhn 18:39—19:16

¹³ Haû hkûn, Pilat gi, hkyangjong agyi pé eq zau suwún wui, mingbyû wui lé wut tsing to mù, ¹⁴ "Shí yuq gi, mingbyû wui lé hkyô shuí nghoq ri ga, Yhang lé nungmoq ngá chyáng shuí lé lô bekô. Ahkuî, wú keq, nungmoq é hí má, Yhang lé ngò myí wú le, Yhang má nungmoq hun é mara lé ngò a myàng nghut ri. ¹⁵ Hau htoq agó, Herut le, hai mara le a myàng mù, shí yuq lé nga-nhông chyáng dum dé kat byi

bê nghut ri; haû mù luí, wú keq, shí yuq gi, shí gíng é mara haí le a kut shut nghut ri. ¹⁶ Haû mù, ngò, Yhang lé dam byi luí, nhang pyám râ." ga luí, yhangmoq lé taí ri.

¹⁷ Nghut kôhang, Lhoqlhai Poí hkangmó má, Pilat gi, mingbyû wui lé htongbyû rayuq yuq nhang kat byi byi kut é yanmai, ¹⁸ yhangmoq banshoq bang gi, "Shí yuq lé gi, yu pyám aq; Barabaq lé kúm gi, nhang kat byi laq." ga luí, chôm wut garu bum akô. ¹⁹ Barabaq gi, wà htum má gumlau kut é eq byù sat é yanmai, htóng gyó nyí sù nghut ri.

²⁰ Pilat gi, Yesuq lé nhang pyám nau é nghut mù luí, yhangmoq lé dum puq taí ri. ²¹ Nghut kôhang, yhangmoq gi, "Yhang lé tapzîng má jén tap pyám aq, jén tap pyám aq!" ga luí, wut taí garu nyi bum akô.

²² Haû mù luí, sum dâm nghû râ hkûn, Pilat dum taí é gi, "Haí mù luí lú? Yhang gi, hai mara kut shut bê lú? Yhang má shí gíng é mara lé ngò a myàng, haû mù, ngò, Yhang lé bat, nhuq, mhoqshit luí, nhang pyám râ." ga luí, yhangmoq lé taí ri.

²³ Yhangmoq gi, Yesuq lé tapzîng má wó jén sat pyám shoq ga, zuq zuq hté mó o mó eq dúng wut nyi akô nghut é yanmai, wó taí ung yù bekô nghut ri. ²⁴ Haû mù luí, Pilat gi, yhangmoq dúng é eq rajung za myit hpyit doqdan byi ri. ²⁵ Haû su mù, yhang gi, yhangmoq dúng é eq rajung za, wà htum má gumlau kut é eq byù sat é mai, htóng gyó nyí sù lé nhang kat byi luí; Yesuq lé gi, yhangmoq ô nau é đông ap byi kat bê nghut ri.

Yesuq Lé Tapzîng Htoq Má Jén Tap É Hkyô

Mht 27:31-44; Mrk 15:21-32; Yhn 19:17-27

²⁶ Yhangmoq gi, Yesuq lé shuí htoq lô kô é hkûn, yosô wà mai lo é, Kuruni myuq byû nghut é Simun ga sù lé, chyup yù mù, tapzîng waq

nhâng luí, Yesuq htâng má cháng nhang akô. ²⁷ Byù rajùm rayò gi, Yhang htâng má châng e ló bum akô. Yhang é yanmai ngaubyi ngaù nhap eq iyon yôn é myiwe zo wui le haù má bo tô ri. ²⁸ Yesuq gi, yhangmoq shut lhâng wú luí, "Yerusalem byizo wui ê, Ngá é yanmai hkàngau nyi kó, nungmoq gi, yhumsing gùng eq yhumsing é zo dù wui é matú sheq ngaù nyi keq. ²⁹ Hkâsu mù gâ le, 'Zogùng a dut wú é eq naú a huq wú é baùdung myhí pé gi, hkungsô wó nyi ri.' ga luí, taí é buinyi gi, jé lô râ nghut lhê. ³⁰ Haù buinyi má, byu pé gi, bùm pé lé, 'Ngamoq ahtoq má byoq nhé aq!' ga luí le, kong pé lé, 'Ngamoq ahtoq má nghop aq!'^{*} ga luí le, wut taí bùm bekô râ nghut lhê. ³¹ Byu pé gi, sikgâm jùm tô ashí le isu kut kô é nghut le gi, màn jáng gi, hkâsu wá dut lò râ lú?" ga taí ri.

³² Haù hkùn, damyaq í yuq lé le, sat pyám râ ga, Yesuq eq rahá shuí htoq ló akô. ³³ Ahkuí, Ugyap nghu é kong má jé jáng, Yesuq lé tapzîng htoq má jén tap tô é hkùn, damyaq í yuq lé le, loqpai loqyò shut kut luí tapzîng má jén tap tô akô. ³⁴ Haù hkùn, Yesuq gi, "Áwa ê, yhangmoq lé mara hkyut pyám byi laq; hkâsu mù gâ le, yhangmoq kut é hkyô lé yhangmoq a sé kó nghut ri." ga taí ri. Gyezô pé gi, Yhâng é mebu pé lé lháng, hkyîn shosé she é đông gam yu pyám byi akô.

³⁵ Mingbyù wui gi, yap to mù tu wú nyi akô. Zau suwún wui Yhang lé nyhap é gi, "Yhang gi, byù góbang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhânggùng yhang le hkyi yu wú sháng gaq." ga akô.

³⁶ Gyezô pé le, huí ê mù, rhoí nyaú nyaú akô. Yhangmoq gi, chyîn wing lé yhun byi kôluí,

³⁷ "Nàng gi, Yudaq byu pé é hkohkâm nghut é nghut le gi, Náng gùng yhang nàng, hkyi yu wú aq." ga Yhang lé taí akô.

³⁸ Yhâng é ulhum ahtoq má le, (Grik đông le, Latin đông le, Hebre đông le) "SHÍ YUQ GI, YUDAQ BYU PÊ É HKOHKÂM." gâ é laiká kâ tap tô akô.

³⁹ Tapzîng htoq má bat tap lhâng to huí é damyaq rayuq gi, "Nàng gi, Hkrisduq nghut lhê, a nghut lú? Haù Náng gùng nàng le, ngá-nhik lé le, hkyi yu aq." ga luí, Yhang lé rhoí ri.

⁴⁰ Damyaq góyuq sù kúm gi, "Nàng le shí yuq eq rajung za jén tô é hui luí nhâng, Garai Gasang lé a gyuq lú? ⁴¹ Nga-nhik gi, yhumsing kut shut é mara eq rajung za, jéyáng hui zo gíng é sù nhik nghut lhê; shí yuq kúm gi, hai mara lé kut shut wú sù a nghut." ga luí, haù yuq lé tân kat ri.

⁴² Haù htâng, yhang Yesuq lé taí é gi, "Yesuq ê, Nàng, Náng é mingdán má jé ló jáng, ngo lé myit bun laq ô." gâ ri.

⁴³ Haù hkùn, Yesuq gi, "Ngò, nang lé teng za taí lé, hkù-nyí yhang nàng Ngò eq rahá hparadisú* má nyi râ nghut lhê." ga luí, yhang lé tù taí kat ri.

Yesuq Soqkang Byit É Hkyô

Mht 27:45-56; Mrk 15:33-41; Yhn 19:28-30

⁴⁴ Haù ahkyíng gi, nyí káng raxe í hkyíng nghut luí, myinhâng sum hkyíng jé shoq ramau gón mauchut tuq dut byuq bê nghut ri;† ⁴⁵ hkâsu mù gâ le, builoq shum byuq é yanmai nghut ri. Noqkuq yhùm má é pán-gyang le, í hkyam byáng dut byuq bê nghut ri. ⁴⁶ Haù hkùn, Yesuq gi, "Áwa ê, Ngò, Ngá é woi-nyí náng é loq má ap byí lhê." ga htê mó

* **23:30** Hos 10:8 * **23:43** Hparadisú nghu é gi, mauhkúng mingdán lé taí ri. † **23:44** Nga-nhùng é nyí káng raxe í hkyíng gi, Yudaq byù pé é napkyó hkyuq hkyíng nghut lhê; yhangmoq é gau hkyíng gi, nga-nhùng é myinhâng sum hkyíng nghut bê.

èq garû kat ri. Haù su ga ban taí eq, Yhang kâng byit bê nghut ri.

⁴⁷ Shô up gyezau hpó gi, haù su dut é lé myàng jáng, "Shí yuq gi, gè gè yhang, dǐngmán sù nghut ri." ga luí, Garai Gasang lé hkya-on kung-ton ri. ⁴⁸ Haù hkyô lé wú râ ga, lé zǐng tô é byù lhunglhang bang le, haù su dut é hkyô pé lé myàng kôjáng, myit yón kôluí, wànggàng bat mù, dum taù ló byuq bekô. ⁴⁹ Nghut kôlhang, Yhang lé sê é bang eq Galile mau mai Yhang htàng châng é myiwe wuì gi, we we má yap to mù, haù hkyô pé lé byu wú nyi akô.

Yesuq É Màng Lé Lup Hkaù Má Kat É Hkyô

Mht 27:57-61; Mrk 15:42-47; Yhn 19:38-42

⁵⁰ Haù hkûn, Yuda mau Aramahti gâ é myuq má, Yosep gâ é sù rayuq nyi ri. Haù yuq gi, nhik bo é sù eq dǐngmán é sù nghut é htoq agó, Garai Gasang é mingdán jé râ hkyô lé myit myoqbyu to sù le, nghut mù luí, ⁵¹ yhang gi, Yudaq uphkàng hpúng má é rayuq nghut kôlhang, hpyé lhûm é hkyô má le, zui saí é hkyô má le, myit a bo huí lom é sù nghut ri. ⁵² Yhang gi, Pilat chyáng wàng luí, Yesuq é gungsôm lé dǔng yu ri. ⁵³ Haù mù, gungsôm haù lé tapzǐng mai hkyut hkyô yù luí, pán yúng èq htup yup mù, ó lé lhang a kat wú shí é, luqgok lé kyúng tô é luqgok lup hkaù má kat tô ri. ⁵⁴ Haù nyí gi, Hên Lajang Buinyi nghut luí, Bánno buinyi jé râ za nghut bê.

⁵⁵ Galile mau mai Yesuq eq rahá htoq lé lo é myiwe zo wuì le, Yosep htàng má châng ê luí, lup haù lé le, Yesuq é gungsôm lé le, hkâsu kut tô é lé, ê myang akô. ⁵⁶ Hau htàng, yhangmoq gi, yhûm shut taù lò mù, Yesuq é gung sôm lé but byi râ matú, namngón é jung eq mura xú lé hen tô akô. Bánno buinyi má kúm gi,

tarâ joq é eq rajung za, yhangmoq yuban bân nyi bum akô nghut ri.

24

Yesuq, Dum Dui Toq É Hkyô

Mht 28:1-10; Mrk 16:1-8; Yhn 20:1-10

¹ Bánno buinyi htang napsûn noq le, myiwe wuì gi, yhangmoq hen tô é namngón jung pé lé yu chûng mù, lup shut e ló akô. ² Yhangmoq gi, lup má é luqhkum lêng bǒng to lánq é lé, ê myàng kômù, ³ wang e wú kô le, haù Yhumsǐng Yesuq é gungsôm lé, a myàng lo kó nghut ri. ⁴ Yhangmoq maú úng-âng nyi bùm kô é hkûn, radá dâm mauhap su duqbo é mebu wut é byù í yuq, yhangmoq é nàm má yap tô akô. ⁵ Haù mù, myiwe haù bang gi, gyuq dan bum kôluí, myigùng shut myoqdong ngóm gop tô bum é u lé, haù nhik gi, "Nungmoq gi, dui sù lé, shi to bâng chyáng haí mù ho nyi akô lúhú? ⁶ Yesuq gi, shí má a nyi lo; Yhang dui toq lo bê! Yhang gi, nungmoq eq rahá Galile mau má nyi tô ashí hkûn lé, ⁷ Haù Byu Yhangzo gi, yubak dap bâng é loq má ap pyâm é hui luí, tapzǐng má jén sat to huí é htàng, sum nyi nghû é buinyi má lhoq dui toq yu é hui rá nghut lhê." ga nungmoq lé taí tô é dang lé myit bun keq." ga luí, yhangmoq lé taí ri. ⁸ Haù hkûn, yhangmoq gi, Yesuq é dang lé bûn kat bekô nghut ri.

⁹ Yhangmoq gi, lup mai dum taù lò mù, lagyo raxe rayuq eq gotù lhunglhang bang lé, haù hkyô ban-shoq lo taí kyô akô. ¹⁰ Lagyo pé lé lo taí kyo bang gi, Magadalaq wà má é Mariq, Yoanaq, Yakuq é yhangnu Mariq eq, yhangmoq eq rahá nyi é myiwe góbang le nghut akô. ¹¹ Lagyo pé kúm gi, yhangmoq é dang lé dangsôm su ngam pyám kôluí, a jǐng byi kó nghut ri. ¹² Nghut kôlhang, Petruq gi, toq luí lup má òn jé é mù ngóm wú kat le, mǎng

htup é pán leq tô é lé za myàng mù luí, haũ su dut é hkyô lé maú é eq, yhũm shut dum taũ lò byuq bê nghut ri.

Chángzo Í Yuq Lé Yesuq Htoq Shit É Hkyô

Mrk 16:12-13

¹³ Haũ ra-nyí má za, Yesuq é chángzô pé má é í yuq gi, Yerusalem wà mó mai nyhit deng kô wê é Ema-u gâ é wà shut e lô akô. ¹⁴ Yhangnhik gi, dut laí ló é hkyô pé banshoq lé, rayuq eq rayuq taí lhũm nyi akô. ¹⁵ Yhangnhik gi, haũ hkyô pé lé rayuq eq rayuq taí hpyê lhũm e lô kô le, Yesuq gi, yhangnhik chyáng jé lé lô mù, yhangnhik eq rahá sô nyi ri. ¹⁶ Nghut kôlhang, yhangnhik gi, myoq hpuq hpuq pyám byí é hui kômù, Yhang lé a sê wú byuq kó nghut ri.

¹⁷ Hau hkũn, Yesuq gi, yhangnhik lé, "Nungnhik hkyô so uchyang taí lhũm lé lo é gi, haí jung wá nghut akô lhú?" ga myí kat jáng, yhangnhik gi, myoqdong shũm kut luí, hkyíng yap tô akô. ¹⁸ Yhangnhik má é Hklupa gâ é sũ gi, "Nàng gi, Yerusalem wà mó má lé bíng nyí luí nhĩng, shí gyoro lé haũ wá má dut lo é hkyô pé lé, a sê é bíng gi, Nàng baú za wá nghut lhê lhú?" ga myí kat ri.

¹⁹ Yhang gi, "Haí jung lhú?" ga dum myí é hkũn lé, yhangnhik gi, "Nazaret wá byù Yesuq é hkyô nghut lhê; haũ yuq gi, Garaí Gasâng é hí má le, byù lhunglhang bãng é hí má le, nhut shô hpaqchyí a-tsam eq hkyí loq a-tsam má wum-o bo é sũ myiqhtoi nghut ri. ²⁰ Nghut kôlhang, hkyangjong agyi pé eq ngamoq é zau suwún wui èq haũ yuq lé sat pyám rã matú ap byí pyám kômù, yhangmoq gi, Yhang lé tapzĩng má jén sat pyám bekô nghut ri. ²¹ Ngamoq kúm gi, haũ yuq lé, Israelaq byù myũ lé hkyi yũ rã sũ nghut lhê nghũ luí, myit myoqbyu nyi bum lhê. Nghut kôlhang, haũ su

dut laí ló é gi, hkũ-nyí sum nyí lhang bò bê. ²² Hau htoq agó, hkũ-nap noq le, lup má é wú é, ngamoq hpúng má é myiwe wui ra-am gi, ngamoq lé, lo lhoq maú akô. ²³ Yhangmoq gi, Yesuq é gungsôm lé a myàng jáng dum taũ lò mù, 'Haũ Yhumsĩng dui nyi ri.' ga luí, taí kyô é mau-mang lagyo htoq shit é shing-rán lé, myang é hkyô lé lo taí kyô akô. ²⁴ Haũ mù, ngamoq é luzúm wui ra-am gi, lup má é wú kô le, myiwe wui taí é eq rajung za, dut to lánq é lé ê myàng akô. Nghut kôlhang, haũ yuq lé gi, yhangmoq a myàng kó gâ." ga luí, Yhang lé taí kyô akô.

²⁵ Haũ hkũn, Yhang gi, "Myiqhtoi pé taí é dang banshoq lé lumjing rã matú, hpaqchyí a bo é eq ngha é sũ nhik è, ²⁶ Hkrisduq gi, haũ su é wuihke jamjau hkãm zô yu é htâng má sheq, Yhâng é hpungwup shingkang má wó wang nyi to rã, a nghut kó lhú?" ga luí, yhangnhik lé myí ri. ²⁷ Yhang gi, yhangnhik lé, Mosheq kã tô é eq myiqhtoi pé banshoq bang kã tô é Chyúmdang pé mai, Yhang má âng é dang banshoq é lichyúm lé, taí hpông kyô ri.

²⁸ Ahkuí, yhangmoq, haũ nhik e ló é wá má chyâng lò kôjáng, Yesuq gi, laí ló rã su kut ri. ²⁹ Haũ hkũn, yhangnhik gi, "Nga-nhik eq rahá wang bíng sháng; hkãsu mù gâ le, buigyũm bê mù, mau le chut lò bê nghut ri." ga luí, Yhang lé wum kat chôm lung nyi akô. Haũ mù luí, Yesuq gi, yhangnhik eq rahá wang bíng bê nghut ri.

³⁰ Yesuq gi, zang zo rã ga, yhangnhik eq rahá zung tô é hkũn, muk lé yũ luí, jeju hkya-on mù, myhik hpé luí, yhangnhik lé gãm byí ri. ³¹ Haũ hkũn, yhangnhik é myoq bóng lô luí, Yesuq nghut é lé bũn sé kat bekô. Yesuq kúm gi, yhangnhik chyáng mai byuq byuq bê nghut ri. ³² Haũ mù, yhangnhik gi, "Yhang gi, hkyô má ngã-nhik eq dang nyo lhũm é eq Chyúmdang é

lichyúm taí hpóng shit é hkûn, ngá-nhik gi, i-myit unghkaû má, aчыí aku dut bê a nghut lhú?" ga luí, yhangnhik yhangchang taí lhùm akô.

³³ Yhangnhik gi, toq mù, radá dâm Yerusalem wà mó shut dum taú ló kô le, lagyo raxe rayuq eq, yhangmoq eq rahá nyi é bang zup míng to kô é lé ló myang akô. ³⁴ Haú bang gi, "Haú Yhumsing gi, teng za yhang dum dui toq ló bê; Simun lé lhang htoq shit bê nghut ri." ga taí lhùm nyi bum akô. ³⁵ Haú hkûn, yhangnhik gi, hkyô má dut lai ló é hkyô pé eq, muk hpê é hkûn má Yesuq lé bûn sé kat é hkyô lé, taí kyô akô nghut ri.

Chángzô Pé Lé Yesuq Htoq Shit É Hkyô

Mht 28:16-20; Mrk 16:14-18; Yhn 20:19-23; Lagyo 1:6-8

³⁶ Yhangmoq haú hkyô lé chôm taí nyi tô bum ashí le, Yesuq gi, Yhang gûng yhang, yhangmoq é agung má yap to luí, "Nungmoq nguóngon yuqyo nyi sháng gaq." ga luí, yhangmoq lé taí ri.

³⁷ Yhangmoq kúm gi, gyuq dan byuq bùm kômù, sobyô lé myàng bê ga myit yu pyâm bum akô. ³⁸ Haú mù luí, Yhang gi, "Nungmoq gi, hai mù dan nyi bum akô lhú? Hai mù nungmoq é i-myit unghkaû má úng-âng nyi bum akô lhú? ³⁹ Ngá é loq eq Ngá é hkyí lé wú wú keq. Ngò yhang nghut nyi lhê. Ngo lé sop wú keq. Sobyô nghú é gi, ngo lé nungmoq myang é su, sho eq showui showang bo é a nghut." ga luí, yhangmoq lé taí kyô ri.

⁴⁰ Yhang gi, haú su ga taí mù, Yhâng é hkyí loq lé tûn shit ri. ⁴¹ Yhangmoq gi, gabú é eq maú nyi bùm kômù, a wó jing shí dut tô é hkûn lé, Yesuq gi, "Nungmoq shí má zôhpo rajung jung wó akô lhú?" ga luí, yhangmoq lé myi kat ri.

⁴² Haú hkûn, yhangmoq gi, nyhîn nyhoq tô é ngozo rahtung lé, byí akô. ⁴³ Yhang gi, haú lé yù mù, yhangmoq é hí má zô shit ri.

⁴⁴ Hau htâng, Yhang, yhangmoq lé taí é gi, "Mosheq é tarâ eq, myiqhtoi laiká pé má le, Hkya-on Kungtôn Laiká pé má le, Ngò èq séng luí kâ to má kâ to banshoq gi, dik râ chyat nghut lhê nghú luí, nungmoq eq rahá nyi to ashí hkûn lé, Ngò, nungmoq lé taí kyô tô é pé gi, shí nghut bê." ga taí ri.

⁴⁵ Hau htâng, Yhang gi, Chyúmdang pé lé sê gyo shoq ga, yhangmoq é i-myit hkum hpóng byí ri. ⁴⁶ Haú mù, Yhang gi, "Hkrisduq gi, wuîhke jamjau hui zo mù, sum nyí nghú rá buinyi má, shi é mai dum dui toq lô rá hkyô lé le, ⁴⁷ Yerusalem wà mó mai hí luí, byù myú chângjup lé, Yhâng é mying lé lang luí yubak mara hkyut pyâm byi rá hkyô eq myit lhing rá hkyô lé le, hko kyo rá hkyô lé, kâ to bê nghut ri. ⁴⁸ Nungmoq gi, shí pé é saksé pé nghut nyi akô. ⁴⁹ Ngá Wa byí tô é danggidiq* lé, Ngò, nungmoq é ahtoq má nhang kat rá nghut lhê; nungmoq kúm gi, htoq tsáng myhâng mâ é wum-o a-tsam wó yu é buinyi jé shoq, Yerusalem wà mó má láng nyí keq." ga luí, yhangmoq lé taí ri.

Yesuq Mauhkûng Shut Shuí Toq Yu Hui É Hkyô

Mrk 16:19-20; Lagyo 1:9-11

⁵⁰ Hau htâng, Yhang gi, yhangmoq lé Behtani wà yâm shut shuí htoq é mù, Yhâng é loq tu toq luí, shimân byí ri. ⁵¹ Haú su kut shimân byí nyi ashí le, Yhang gi, yhangmoq chyáng mai gâng ló byuq luí, mauhkûng shut shuí toq yu é hui bê nghut ri. ⁵² Yhangmoq kúm gi, Yhang lé noqkuq kômù luí, gyai gabú é myit èq Yerusalem wà mó shut dum taú ló akô. ⁵³ Yhangmoq

* 24:49 Ngá Wâ byi tô é danggidiq nghu é gi, Chyoiyung é Woi-nyí lé taí ri.

gi, noqkuq yhûm má nyi to mù,
Garai Gasang lé hkya-on kungton
nyi bum akô nghut ri.

YOHAN é Gabú Danglù Laiká (The Gospel of John)

*Haù Mungdang, Xângzo Byù
Gùng Lé Dut É Hkyô*

¹ A-nham sâng-hi má, Mungdang joq ri; Mungdang haù gi, Garai Gasang eq rahá nghut luí, haù Mungdang yhang Garai Gasang nghut ri. ² Yhang gi, a-nham sâng-hi má, Garai Gasang eq rahá nghut nyi ri.

³ Nyi mi-nyì, joq mijoq gi, Yhang dông mai hpan tô é chyat nghut lhê; Yhang dông mai a hpan é gi, haí lhang a joq nghut ri. ⁴ Asak chyungxe gi, Yhang má nghut lhê mù, asak haù gi, byu pè é matú maubó nghut ri. ⁵ Haù maubó gi, mauchut má duqbo byì nyi kôlhang, mauchut gi, haù lé a hap yù nghut ri. ⁶ Garai Gasang mai nhang kat é, Yohan gâ é byù rayuq jé lé ri.

⁷ Yhang gi, maubó haù eq sêng é hkyô lé, saksé hkám byi luí, yhang é yanmai byù lhunglhang bang wó lumjín kó sháng gaq ga, saksé rayuq dông jé lé é sù nghut ri. ⁸ Yhang gi, haù maubó a nghut; maubó haù lé saksé hkám byi rá matú za sheq jé lé é ru nghut lhê. ⁹ Byù yuq Jup lé duqbo byi é, maubó akying haù gi, mingkan htoq má jé nyi to bê.

¹⁰ Yhang gi, mingkan htoq má nyi to bê nghut ri; mingkan lé gi, Yhang dông mai hpan tô é nghut kôlhang, mingkan haù gi, Yhang lé a wú sé nghut ri. ¹¹ Yhang gi, yhumsing mau má jé lé kôlhang, Yhang é amyû pé gi, Yhang lé a lhom hap yù kó nghut ri. ¹² Nghut kôlhang, Yhang gi, Yhang lé lhom hap yù luí, Yhang é mying lé lumjín é bang lhunglhang lé, Garai Gasang

é yhangzô pé dut râ ahkáng byi bê nghut ri. ¹³ Haù bang gi, sui sho dông hku kat é le a nghut, byù ô nau é dông hku kat é le a nghut, gungsho ô nau é dông hku kat é le a nghut e za, Garai Gasang chyáng mai hku kat é bang ru nghut lhê.

¹⁴ Haù Mungdang gi, xângzo byù gùng lé dut luí, ngamoq chyáng nyi wú bê nghut lhê. Ngamoq gi, haù jeju eq tengmán hkyô bying tô é, Yhang é hpungwup shingkang lé myang wú bê nghut lhê; haù gi, haù Íwâ é zote rayuq dông, Yhang wó yu é hpungwup shingkang nghut ri.

¹⁵ Wui-myhup Sará Yohan gi, Yhang eq sêng é hkyô lé saksé hkám é hkún, garú taí é gi, "'Ngá é htâng má jé lé é Sù gi, ngá é hí mai nyi to bê sù nghut é yanmai, ngá htoq je gyaú sù nghut ri.' ngù, ngò taí é sù gi, shí yuq nghut bê." gâ ri. ¹⁶ Yhang é gumjup é jeju ahkaù mai, nganhúng banshoq bang gi, shimán jeju lé ralhúm htoq ralhúm myang yu nyi bê nghut lhê. ¹⁷ Hkâsu mù gâ lé, haù jep é tarâ gi, Mosheq é loq dông mai byì é nghut lhê; jeju eq tengmán hkyô kúm gi, Yesuq Hkrisduq é yanmai lé joq é nghut lhê. ¹⁸ Garai Gasang lé, ó yuq eq le a myang wú wú é nghut lhê; nghut kôlhang, haù Íwâ é tanghkoí má lúng tô é, Yhang Zo zote gi, Garai Gasang é gùng lé lhoq htoq shit bê nghut ri.

*Wui-myhup Sará Yohan Hko Kyô
É Hkyô*

Mht 3:1-12; Mrk 1:1-8; Luk 3:15-17

¹⁹ Yerusalem wà mó mâ é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyô myí nhang kat kô é hkún, Yohan saksé hkám é gi, a-ô mâ é hkyô pé nghut ri. ²⁰ Yhang gi, a hê a zaú tô e za, "Ngò gi, Hkrisduq* a nghut." ga lhom taí kyô ri.

* 1:20 Grik dong Hkrisduq gâ é gi, xù but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê.

²¹ Haú hkûn, yhangmoq gi, "Haú nghut jáng, nàng gi, ó yuq nghut lhê lú? Nàng gi, Eliyaq lú?" ga myi kôjáng, yhang gi, "A nghut." ga taí ri; "Nàng gi, haú Myiqhtoi nghut lhê lú?" ga dum myi kôjáng, yhang gi, "A nghut." ga tú taí ri.

²² Haú mù, yhangmoq gi, "Ng-amoq lé nhang kat bâng chyáng ló wó taí kyo rá matú, nàng gi, ó yuq nghut lhê lú? Nàng gûng lé nàng hkâsu nghú lhê lú? Taí kyô wú laq." ga dum myí akô.

²³ Haú hkûn, Yohan gi, myiqhtoi Esai-aq é dang eq rajung za, "Ngò gi, haú yoso má, 'Yhumsing é matú hkyô lhoq nyhang to keq.' gâ é htê lé, garú taí é sù nghut lhê."* ga tú taí ri.

²⁴ Hparishe pé mai nhang kat é bang ra-am gi, yhang lé, ²⁵ "Nàng gi, haú Hkrisduq le a nghut, Eliyaq le a nghut, Myiqhtoi le a nghut é nhing, haí mù luí, wui-myhup hkám byi nyi lhê lú?" ga dangmyi myí akô.

²⁶ Haú hkûn, Yohan tú taí é gi, "Ngò gi, wui èq za wui-myhup hkám byi lhê; nghut kôlhang, nungmoq a sê é sù rayuq nungmoq chyáng yap tô ri. ²⁷ Yhang gi, ngá htàng má lé é sù yuq nghut bê; ngò gi, Yhâng é hkyî-tsung tui lé hpyî rá lhang a gingdán é nghut ri." gâ ri.

²⁸ Shí pé banshoq gi, Yohan wui-myhup hkám byi nyi é, Yodan làng hé hpoq má é Behtani wà má dut é hkyô pé chyat nghut ri.

Yesuq Gi, Garai Gasâng É Sauzo Nghut É Hkyô

²⁹ Hau htang nyí, Yohan gi, yhâng chyáng Yesuq lé lo nyi é lé myàng luí, taí é gi, "Mingkan byu pé é yubak mara lé yu pyám byi é Garai Gasâng é Sauzo lé, wú keq! ³⁰ Shí yuq gi, 'Ngá é htàng má jé lé é Sù gi, ngá é hí má nyi bê sù nghut é yanmai, ngá htoq je gyaú Sù nghut ri.' nghú, ngò taí é sù yhang nghut

bê. ³¹ Ngò gi, Yhang ó yuq nghut é lé a sê é nghut lhê, nghut kôlhang, Yhang lé, Israelaq byu pé wó sê kó sháng gaq nghú, ngò lé jé mù, wui èq wui-myhup hkám byi nyi é nghut lhê." gâ ri.

³² Hau htàng, Yohan saksé hkâm é gi, "Haú Woi-nyí gi, mauhkung mai hpûngkyui gunghkyâng sù é đông mai gyó lé mù, Yhâng chyáng lé nô tô é lé, ngò myàng ri. ³³ Ngò gi, Yhang ó yuq nghut é lé a sê é nghut kôlhang, wui èq wui-myhup hkám byi rá matú, ngo lé nhang kat é Sù, ngo lé taí kyô é gi, 'Haú Woi-nyí gyó lé lô mù, ó yuq chyáng lé nô tô é lé, nàng myàng jáng, haú yuq gi, haú Chyoiyung Woi-nyí má wui-myhup hkám byi rá sù nghut lhê.' gâ ri. ³⁴ Haú eq rajung za ngò myàng bê nghut luí, shí yuq gi, Garai Gasâng é Yhangzo nghut lhê nghú, ngò saksé hkâm lhê." gâ ri.

Sâng-hi Lhê É Chángzô Pé

³⁵ Hau htang nyí, Yohan gi, yhâng é chángzo í yuq eq rahá, haú má dum nyi tô akô. ³⁶ Haú hkûn, yhang gi, Yesuq lai ló nyi é lé myang kat jáng, "Hê, Garai Gasâng é sauzo lé, wú keq!" ga taí kat ri.

³⁷ Chángzo haú í yuq gi, yhang haú su gâ é lé wó gyo kôjáng, Yesuq é htàng cháng bekô nghut ri. ³⁸ Yesuq gi, lhing wú kat le, yhangnhik châng tô é lé myàng luí, "Nungnhik haí o akô lú?" ga myi jáng, yhangnhik gi, "Rabai é, Nàng hkâmá nyi lhê lú?" ga taú myí kat akô nghut ri. (Rabai gâ é gi, Sará gâ é lichyúm nghut lhê.)

³⁹ Haú hkûn, Yhang gi, "Lé keq, haú jáng, nungnhik myàng kó rá nghut lhê." ga tú taí ri.

(Haú-u gi, raxê hkyíng† kô nghut ri.) Haú mù luí, yhangnhik gi, châng ê mù, Yhang hkâmá nyi é lé, ê myàng kôluí, haú nyí buigyúm

* 1:23 Esai 40:3 † 1:39 Raxê hkyíng gi, myinhâng myi hkyíng záng ri.

shoq, Yhang eq rahá ê nyi nyi akô nghut ri.

⁴⁰ Yohan taí é dang lé wó gyo luí, Yesuq htâng châng é su nhik má é rayuq gi, Simun Petruq é yhanggu Andre nghut ri. ⁴¹ Andre gi, yhang-mang Simun lé hí myàng luí, "Nga-nhik gi, Mesaia lé myàng bê." ga yhang lé taí kyô ri. (Mesaia gâ é lichyúm gi, Hkrisduq gâ é nghut lhê.) ⁴² Hau htâng, yhang gi, yhang-mang lé Yesuq chyáng shuí e ri.

Yesuq gi, Simun lé lhom myàng jáng, "Nàng gi, Yohan é yhangzo Simun nghut ri; Kehpa† gâ é myìng lé, nàng wó yú râ nghut lhê." ga taí ri. (Kehpa gâ é lichyúm gi, Petruq gâ é nghut lhê.)

Hpilip Eq Nahtanelaq Lé Hkyin Yu É Hkyô

⁴³ Hau htang nyí, Yesuq gi, Galile mau shut ê râ matú, myít hpyit yú bê nghut ri. Yhang gi, Hpilip lé myàng jáng, "Ngá htâng châng aq." ga taí ri.

⁴⁴ Hpilip gi, Andre eq Petruq nhik nyi é Bet-saida và mó má é byù nghut ri. ⁴⁵ Yhang gi, Nahtanelaq lé myàng jáng, "Mosheq mai tarâ laiká má kâ tô é eq my-ightoí pé mai le lhoq ang luí kâ tô é sù, Yosep é yhangzo, Nazaret và byù Yesuq lé, ngamoq myàng bê." ga yhang lé taí kyô ri.

⁴⁶ Haú hkûn, Nahtanelaq gi, "Nazaret và ô! Haú mai, ge é jung haí wa wó htoq lhê lú?" ga myí jáng, Hpilip gi, "Ru lé wú aq." ga yhang lé taí ri.

⁴⁷ Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang luí, "Wú keq, shí yuq gi, mhaú é myit a bo é sù, Israelaq byù akying rayuq nghut ri." ga taí ri.

⁴⁸ Haú hkûn, Nahtanelaq gi, "Nàng, ngo lé hkâsu kut sê é lú?" ga

myí jáng, Yesuq gi, "Nang lé, Hpilip eq a wut yù shimá, nàng, maihpáng gâm ô má ru nyi tô ashí hkûn, Ngò, nang lé myàng bê nghut lhê." ga tú taí ri.

⁴⁹ Haú mù, Nahtanelaq gi, "Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pé é Hkohlâm le nghut ri." ga taí ri.

⁵⁰ Haú hkûn, Yesuq gi, "Ngò, nang lé, maihpáng gâm ô má myang é nghú taí kyô é yanmai, nàng lumjíng lhê a nghut lú? Hau htoq je kô é muzó pé lé, nàng myàng rá nghut lhê." ga taí ri. ⁵¹ Hau htâng, Yesuq xoq taí é gi, "Ngò, nungmoq lé teng za taí kôlé, mauhkûng bóng lô luí, haú Byu Yhangzô ahtoq má, Garai Gasâng é maumang lagyô pé doq ló gyó lô kut nyí kô é lé, nungmoq myàng kó rá nghut lhê." gâ ri.

2

Wui Lé Tsibiyiq Wing Dut Nhang É Hkyô

¹ Hau htâng, í nyí nghú râ nyí má, Galile mau má é Hkanaq và mó má, myiháng poí ralthum joq ri. Haú má Yesuq é yhângnu le, bo lom ri. ² Yesuq eq Yhâng é chángzô pé lé le, myiháng poí haú má ji akô nghut ri. ³ Tsibiyiq wing jaú tùm to kô é hkûn, Yesuq é yhângnu gi, "Yhangmoq, tsibiyiq wing a wó lo kó nghut ri." ga, Yesuq lé taí ri.

⁴ Haú hkûn, Yesuq gi, "Ánu ê,* haú, nàng gi, Ngò eq haí sêng lhê lú? Ngá é ahkyíng a jé shi é nghut lhê." ga tú taí ri.

⁵ Nghut kôlhang, Yhâng nu gi, haú dui-nhâng zoshâng wui lé, "Yhang haí taí le, haí kut keq." ga taí ri.

⁶ Haú nàm má, í sum xê galan kô wang é luqgok wúng hkyuq cham joq tô ri; haú gi, Yudaq byu pé mai, lhoq san lhoq yúng hkíng é matú, chung é jung wúng nghut ri.

† 1:42 Aramaik dang đông Kehpa gâ é eq Grik dang đông "Petruq" gâ é lichyúm gi, luqgok gâ é nghut lhê. * 2:4 Ánu é gâ é lé, Grik đông gi, "Myiwe myhi ê" ga bo tô é nghut lhê.

7 Yesuq gi, haú dui-nhâng zoshâng wuì lé, "Wúng haú pé má wuì lhoq pyíng keq." ga taí ri; haú mù, yhangmoq gi, wúng haú pé má bying shoq lhoq pyíng bekò nghut ri.

8 Hau htâng, Yhang gi, yhangmoq lé, "Ahkuí, ratsuí hkú yù mù, poi-up lé yu ló byi keq." ga taí jáng, yhangmoq gi, yu ló byi akò nghut ri.

9 Poi-up hpó gi, wuì mai dut é tsi-biyiq wing haú lé, shuq chyam wú ri; wuì hkam é dui-nhâng zoshâng wuì gi, tsibiyiq wing haú hkâmai lo é hkyô lé sê to kôhang, yhang gi, a sé nghut ri. Haú mù, yhang gi, lusik lé, ji yù luí, ¹⁰ "Yuq hkangmó gi, tsibiyiq wing mún lé hí jaú mù, bíng pé shuq gyí bùm jáng sheq, tsibiyiq wing apyâng lé ru yu htoq lhê; nghut kôhang, nàng gi, nghâm é tsibiyiq wing lé, ahkuí jé shoq wó hkong tô ri-nhung!" ga taí ri.

11 Galile mau mâ é Hkanaq wà mó má, Yesuq tân shit é limik kumlhá gi, Yhang kut é limik kumlhá pé mâ é sâng-hi dàm nghut ri. Yhang gi, Yhâng é hpungwup shing kang lé, haú đông lhoq htoq shit é nghut mù luí, Yhâng é chángzô pé gi, Yhang lé lumjíng bum akò nghut ri.

Noqkuq Yhâm Lé Lhoq Sansêng Pyâm É Hkyô

Mht 21:12-13; Mrk 11:15-17; Luk 19:45-46

12 Hau htâng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um wà má gyó ló ri; yhangmoq gi, haú má buinyi myi ngò nyi nyi akò nghut ri.

13 Yudaq byu pé é Lhoqlhai Poi jé râ nghut é hkún, Yesuq gi, Yerusalem wà mó má doq ló ri.

14 Haú hkún, noqkuq yhâm wàng má, nojúng, sau, hpúngkyui pé lé úng nyi é bang lé le, siboí má ngùn htaí zô zung nyi é bang lé le, Yhang

ló myàng ri. ¹⁵ Haú mù, Yhang gi, tui lé, nhuq râ wase sai yù mù, banshoq bang lé le, sau eq nojúng lé le, haú noqkuq yhâm wàng mai hkat htoq luí, ngùn htaí zo bâng é ngùn htingchap lé gi, tui hut pyám byi mù, yhangmoq é siboí lé gi, tu mhuc pyám byi ri; ¹⁶ haú hpúngkyui ung zô é bang lé le, "Zè shi pé lé yu htoq ló keq! Ngá Wâ é yhâm lé, hpugá jowò hkâkut kó!" ga luí nhik-yô ri.

17 Haú mù, Yhâng é chángzô pé gi, "Ngò, Náng é yhâm lé chyitdap kâng tuí é hkyô gi, Ngo lé myi su nyhê jôm pyám râ nghut lhê."* ga kâ tô é lé, myit bìn kat akò nghut ri.

18 Yudaq byu pé gi, Yhang lé, "Nàng, shí pé kut râ ahko ahkáng wó é hkyô lé saksé tân shit râ matú, ngamoq lé, haí jung limik kumlhá wó tân shit râ lú?" ga chôm myi akò nghut ri.

19 Haú hkún, Yesuq gi, "Noqkuq yhâm shí lé nungmoq hpyoq pyám keq, sum nyi gyoro má, Ngò, haú lé dum tu shap râ nghut lhê." ga, yhangmoq lé tui taí ri.

20 Haú Yudaq byu pé gi, "Noqkuq yhâm shí lé, myi xe hkyuq zân tup sai é ru nghut lhê; sum nyi gyoro má za, Nàng wó tu shap râ lú?" ga tu myi akò nghut ri. ²¹ Nghut kôhang, Yesuq taí é noqkuq yhâm gi, Yhâng é gùng lé lhoq ang luí taí é nghut ri. ²² Haú mù, Yhang, shi é mai lhoq dui toq huí é hkún sheq, Yhâng é chángzô pé gi, Yhang haú su ga taí é dang lé myit bun kômù, Chyúmdang lé le, Yesuq taí é dang pé lé le, lumjíng akò nghut ri.

23 Haú Lhoqlhai Poi nghut é u lé, Yerusalem wà mó má Yesuq nyi nyi é hkún, byu myo myo gi, Yhang kut shit é limik kumlhá pé lé myàng kômù, Yhang lé lumjíng bum akò nghut ri. ²⁴ Nghut kôhang, Yesuq gi, byu lhunglhang bâng é myit lé sê é yanmai, yhangmoq chyáng,

* 2:17 Hkya-on 69:9

Yhânggùng lé a ap to nghut ri.
 25 Yhang gi, byu é i-myt unghkaû má haî lúng tô é lé sê é yanmai, byu yhangchang saksé hkâm byî é a ra nghut ri.

3

Nikodimu Lé, Yesuq Mhoqshit É Hkyô

¹ Nikodimu gâ é Hparishe rayuq nyi ri; yhang gi, Yudaq byu pê é byin tú wapdoq má bo é sù nghut ri.
² Yhang gi, myín lé, Yesuq chyáng lé mù, "Rabai ê, Nang gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gâ le, Nang kut shit é limik kumlhá pé gi, Garai Gasang a lom é nghut jáng, ó yuq le wó kut râ a nghut." ga taî ri.

³ Haû hkûn, Yesuq gi, yhang lé, "Ngò, nang lé teng za taî kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myâng râ a nghut." ga tú taî ri.

⁴ Haû jáng, Nikodimu gi, "Ipyat kó bê é byù gi, dum hkû é hkâsu kut wó hui râ lúh? Ínû é unghkaû má dum wâng mù, dum hku é hui râ gi, gè gè yhang wó dut râ a nghut!" ga taî ri.

⁵ Haû hkûn, Yesuq gi, "Ngò, nang lé teng za taî kyo lé, ó yuq nghut kôle, wuì eq Woi-nyí mai hku kat é hui sù za a nghut le gi, Garai Gasâng é mingdán má wó wâng râ a nghut. ⁶ Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri. ⁷ 'Nungmoq gi, dum hku é hui râ lhê' nghû Ngò taî é dang lé, nang hkâmaû nyí. ⁸ Haû, lai gi, yhang nau é shut ló lhê. Lai lò htê lé nang wó gyo kôlhang, lai hkâmai lo é eq, hká shut ló é lé, nang sé râ a nghut; haû Woi-nyí mai hku kat hui é sù, ó yuq nghut kôle, haû eq rajung za nghut lhê." ga tú taî ri.

⁹ Haû hkûn, Nikodimu gi, "Haû gi, hkâsu wó dut râ lúh?" ga myî ri.

¹⁰ Yesuq tú taî é gi, "Nang gi, Israelaq byu pê é sará rayuq nghut to luí nhing, haû hkyô pé lé a sê gyo lúh? ¹¹ Ngò, nang lé teng za taî kyo lé, ngamoq gi, ngamoq sê é hkyô lé taî mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri. ¹² Ngò gi, nungmoq lé, mingkan eq sêng é hkyô lé taî kyô le lhang, a lumjínng kô é nghut le gi, mauhkûng mingdán eq sêng é hkyô lé taî kyô é nghut le gi, hkâsu kut wó lumjínng kó râ lúh? ¹³ Mauhkûng mingdán mai gyó lo é sù, haû Byu Yhangzo mai lai luí, mauhkûng mingdán má ó yuq lhang wó doq ló wú é a nghut. ¹⁴ Mosheq gi, yoso má lhangmuì lé tu shap tô é su, haû Byu Yhangzo le tu shap tô é hui ra râ nghut lhê. ¹⁵ Haû mù, haû Byu Yhangzo lé lumjínng é yuq hkangmó gi, ahtum abyuq é asak wó yú râ nghut lhê.

¹⁶ Hkâsu mù gâ le, Garai Gasang gi, mingkan lé gyai yhang chyitdap é yanmai, Yhang Zo lé lumjínng é sù ó yuq nghut kôle, htên byoq é a hui e za, ahtum abyuq é asak wó yú sháng gaq ga, rayuq za é Yhâng é Zote lé byî pyám bê nghut ri. ¹⁷ Hkâsu mù gâ le, Garai Gasang gi, mingkan lé mara byi râ matú, Yhang Zo lé mingkan htoq má nhang kat é a nghut é za, Yhang é yanmai mingkan hkyi yu é hui râ matú sheq nhang kat é ru nghut lhê. ¹⁸ Yhang lé lumjínng é sù gi, mara byí é hui râ a nghut; nghut kôlhang, Yhang lé a lumjínng é sù kúm gi, Garai Gasâng é Yhangzo zote lé a lumjínng é sù nghut é yanmai, mara byí é hui to gu bê nghut ri. ¹⁹ Maubó gi, mingkan htoq má lé jé to bê; nghut kôlhang, byu pé kut é hkyô gi, agè ashop hkyô nghut é yanmai, yhangmoq gi, maubó lé chyit râ malaî, mauchut lé chyit akò nghut ri; haû gi, mara byí é hui râ hkyô yhang nghut ri. ²⁰ Agè

ashop hkyô kut é sù ó yuq nghut kôle, maubó lé a nguì nghut ri; haú yuq gi, yhang kut é hkyô lhoq byông htoq kat râ lé gyuq é yanmai, haú maubó shut lé lô râ a nghut. ²¹ Nghut kôlhang, haú tengmán hkyô đông asak dui é sù ó yuq le, yhumsing kut é hkyô gi, Garai Gasang lom é hkyô lé, san za byu-myàng sháng gaq ga, haú maubó shut lé lo ri." gâ ri.

Yesuq Eq Séng Luí, Wui-myhup Sará Yohan Saksé Hkâm É Hkyô

²² Hau htâng má, Yesuq gi, Yhâng é chángzô pé eq rahá, Yuda mau shut wang lô mù, haú má rayoq zo nyi luí, wui-myhup hkâm byí ri. ²³ Haú u lé, Yohan gi, Salim nàm má é E-nun gâ é jowó má, wui gyaí myo joq é yanmai, wui-myhup hkâm byí nyi ri; byu pé gi, abyit alan lé lò kômù, wui-myhup lé hkâm yu nyi bum akô nghut ri. ²⁴ (Haú gi, Yohan lé htóng a lhoq hkyó shí é hkun lhê é hkyô nghut ri.) ²⁵ Haú hkûn, Yohan é chángzô pé ra-am eq Yudaq byù rayuq gi, lhoq san lhoq yúng hking eq séng luí, dang htíng htíng lhùm bum akô nghut ri. ²⁶ Hau htâng, yhangmoq gi, Yohan chyáng lé luí, "Rabai é, Yodan làng hé hpoq shut nàng eq rahá nyi luí, nàng eq saksé hkâm byí é Sù gi, ahkuí, wui-myhup hkâm byí nyi é nghut mù, yuq hkangmó gi, Yhâng chyáng e bum akô nghut ri mhai." ga, yhang lé taí akô.

²⁷ Haú eq séng luí, Yohan tú taí é gi, "Byù rayuq gi, mauhkúng mai byí é za a nghut jáng, hái le wó hap yù râ a nghut. ²⁸ 'Ngò gi, Hkrisduq a nghut, Yhang é hí má nhang kat huí é sù za nghut lhê.' nghû, ngò taí é lé, nungmoq yhang saksé nghut bum akô. ²⁹ Myisik wó é sù gi, lusik nghut ri. Lusik lé, lánng yap tô é luzúm hpó gi, lusik é hté lé wó gyô é yanmai, gyaí yhang gabú nyi ri. Haú sù é gabú hkyô gi, ngá é gabú

hkyô nghut mù, ngò má byíng jup nyi bê nghut ri. ³⁰ Yhang gi, kô jat lò ra râ nghut lhê; ngò gi, yom lô ra râ nghut lhê.

³¹ Ahtoq mai lé é Sù gi, lhunglhâng é ahtoq má nghut ri; myigùng htoq mâ é sù kúm gi, myigùng htoq eq séng é nghut luí, myigùng htoq eq séng é đông za taí ri; mauhkúng mai lé é Sù gi, lhunglhâng é ahtoq má nghut ri.

³² Yhang gi, wó myàng wó gyô é hkyô lé, saksé hkâm kôlhang, Yhang hkâm é saksé lé, ó yuq le a hap yù kó nghut ri. ³³ Yhâng é saksé lé hap yu é sù kúm gi, haú Garai Gasang gi, tengmán sù nghut ri ga, saksé shit é sù nghut bê. ³⁴ Garai Gasang eq nhang kat é hui Sù gi, Garai Gasang é mungdang lé taí ri; hkâsu mù gâ le, Garai Gasang gi, haú Woi-nyí lé, laké a kat e za byí é yanmai nghut ri. ³⁵ Haú Íwa gi, Zo lé chyitdap luí, jung hkangmó lé Yhâng é loq má ap byi bê nghut ri. ³⁶ Haú Zo lé lumjíng é sù ó yuq nghut kôle, ahtum abyuq é asak wó lhê; nghut kôlhang, haú Zo lé he-ngik pyâm é sù ó yuq nghut kôle, asak haú lé myàng râ a nghut; hkâsu mù gâ le, Garai Gasang é nhikmo-yo hkyô gi, yhâng chyáng ru joq nyi ri." gâ ri.

4

Yesuq Eq Samariq Myhí Huí É Hkyô

¹ Yesuq gi, Yohan htoq má, chángzo je lhoq myô é eq wui-myhup hkâm byí nyi ri gâ é hkyô lé, haú Hparishe pé wó gyô akô nghut ri. ² (Nghut kôlhang, gè gè ga jáng, Yesuq gi, Yhang wui-myhup hkâm byí é a nghut, Yhâng é chángzô pé sheq ru nghut akô.) ³ Haú hkyô lé, Yesuq sé jáng, Yhang gi, Yuda mau mai htoq mù, Galile mau shut dum taú lô bê nghut ri.

⁴ Ahkuí, Yesuq gi, Samariq mau mai só laí lô râ dut bê nghut ri.

⁵ Haú mù, Yhang gi, Yakup mai

yang zo Yosep lé byî é maumyî rajap eq chyâng lhûm é, Suhka ga myhîng é, Samariq mau mâ é wà mó ralhûm má lo jé ri. ⁶ Haú má, Yakup é wuîhtung le joq to luî, Yesuq gi, hkyô sô ngu é yanmai, wuîhtung hau é nàm má zung gyó tô ri. Haú u gi, nyí-káng raxe í hkyíng* nghut bê nghut ri.

⁷ Haú hkûn, Samariq myiwe myhí rayuq wuî lé hkam ri; Yesuq gi, yang lé, "Ngo lé wuî byi shuq laq." ga taí ri. ⁸ (Haú u gi, Yhâng é chángzô pé, zoshuq wuî rá matú wà hkaú shut e byuq kô é ahkyíng nghut ri.)

⁹ Haú Samariq myiwe myhí gi, Yang lé, "Nàng gi, Yudaq byu rayuq nghut to luî nhîng, ngò Samariq myiwe myhí chyáng, haí mù shuq wuî dúng lhê lú?" ga taí ri. (Hkâsu mù gà le, Yudaq byu pé gi, Samariq byu pé eq a zùm yap kó nghut ri.)

¹⁰ Haú hkûn, Yesuq gi, yang lé, "Nàng gi, haú Garai Gasâng é chyunghuq lé le, nang lé wuî dung sù ó yuq nghut é lé le, sê é nghut le gi, noq mai Yang lé dúng tóngbán luî, Yang gi, nang lé asak-wuî byi berâ nghut lhê." ga tû taí ri.

¹¹ Myiwe myhí haú gi, "Yhumsîng ê, Nàng gi, wuî hkâm rá zè haí le a wó, wuîhtung le nik ri; haú asak-wuî lé, Nàng hkâmâ é wó yû rá lú?" ¹² Ngamoq é îwa Yakup gi, ngamoq lé wuîhtung shî byî to bê nghut lhê; yang yang le, yang zo pé le, yang rém é dusak pé le, wuîhtung shî mâ é wuî shuq bekô nghut ri; Nàng gi, Yakup htoq je kô lhê lú?" ga Yang lé taí ri.

¹³ Yesuq gi, "Wuî shî lé shuq é sù ó yuq le, wuîshít é dum hui rá nghut lhê. ¹⁴ Nghut kôlhâng, Ngò byî é wuî lé shuq é sù ó yuq nghut kôle, wuîshít é hkâ-nhám a hui lo rá

nghut lhê. Ngò byî é wuî haú gi, haú yuq má, ahtum abyuq é asak matú wuîbúm dut rá nghut lhê." ga yang lé tû taí ri.

¹⁵ Myiwe myhí haú gi, Yang lé, "Yhumsîng ê, ngò gi, wuî le a shit lo, shî má wuî hkâm le a lé ra lo sháng gaq, wuî haú ngò lé byi laq." ga taí ri.

¹⁶ Haú hkûn, Yesuq gi, "Ló mù, nung làng lé ló wut lò aq." ga, yang lé taí ri.

¹⁷ Yang gi, "Ngò, làng a wó." ga taí jáng, Yesuq gi, yang lé, "Nàng, làng a wó gà é gi, têng ri. ¹⁸ Hkâsu mù gà le, nàng gi, yuqgè ngo yuq wó wú bê sù nghut ri; nàng, ahkuí wó tô é yuqgè le nung làng a nghut. Nàng gi, têng é dang taí bê nghut ri." ga taí ri.

¹⁹ Haú hkûn, myiwe myhí haú gi, "Yhumsîng ê, Nàng gi, myiqhtoi rayuq nghut é hkyô lé, ngò wú sé bê. ²⁰ Ngamoq é íchyí îwâ pé gi, bùm shî má noqkuq kô é nghut lhê; nghut kôlhâng, nungmoq Yudaq byu pé gi, Yerusalem wà mó za noqkuq jowò nghut lhê ga taí akò nghut ri." ga taí ri.

²¹ Haú hkûn, Yesuq taí é gi, "Myiwe myhí ê, Ngo lé jîng aq; bùm shî má le a nghut, Yerusalem wà mó má le a nghut e za, haú Îwa lé noqkuq rá ahkyíng, jé lò nyî bê nghut ri. ²² Nungmoq Samariq byu pé gi, yhumsîng lháng a sê é lé, noqkuq akò; ngamoq kúm gi, ngamoq sê é lé noqkuq lhê; hkâsu mù gà le, hkyi yù hkyô gi, Yudaq amyú mai lo é nghut lhê.† ²³ Nghut kôlhâng, haú têng é dông noqkuq é bang gi, woi-nyí mai le, tengmán hkyô mai le, haú Îwa lé noqkuq rá ahkyíng gi, jé lo nyî bê nghut luî, ahkuí lháng jé to bê nghut ri; hkâsu mù gà le, haú Îwa gi, haú su kut noqkuq é bang lé

* 4:6 Nyí-káng raxe í hkyíng gi, Yudaq byu pé é hkyuq hkyíng nghut ri. † 4:22 Bun zo shî má, Yesuq taí nau é gi, hkyi yù hkyô lé, Garai Gasang gi, Yudaq byu pé dông danggidiq byi to é nghut lé lé taí nau é nghut ri.

ô nau ri. ²⁴ Garai Gasang gi, woi-nyí nghut lhê; haù mù, Yhang lé noqkuq é bang gi, woi-nyí mai le, tengmán hkyô mai le, noqkuq ra rá nghut lhê." ga tái ri.

²⁵ Myiwe myhí haù gi, "Hkrisduq gâ é Mesaia jé lé râ nghut é lé gi, ngò sê lhê. Yhang jé lé jáng, nganhúng lé banshoq tái sân kyo rá nghut lhê." ga tái ri.

²⁶ Hau htâng, Yesuq gi, "Nàng eq dang nyo nyi é sủ ngò gi, haù yuq nghut lhê." ga tái ri.

Hau Chángzô Pé Dum Taù Jé Lo É Hkùn Lhê Hkyô

²⁷ Haù u lé, Yhâng é chángzô pé gi, dum taù jé lo bum akô; yhangmoq gi, Yesuq, myiwe rayuq eq dáng nyo nyi é lé lo myàng luí, maù byuq bum akô. Nghut kôlhang, "Nàng, haì ô ri lú?" ga le, "Haì mù Yhang eq dáng nyo nyi lhê lú?" ga le, Yhang lé ó yuq a myi kó nghut ri.

²⁸ Hau htâng, myiwe myhí haù gi, yhâng é wuì yambú lé tô pyâm to luí, wà shut taù wang ló mù, wà byù wuì lé ló tái kyô é gi, ²⁹ "Ngò kut laì lò bê hkyô pé lunglhang lé, tái kyô é byù rayuq lé, lé wú keq! Yhang gi, Hkrisduq nghut lhê abe?" gâ ri. ³⁰ Haù mù, yhangmoq gi, wà mai htoq lé luí, Yesuq chyáng lé lo bum akô nghut ri.

³¹ Haù u lé, Yhâng é chángzô pé gi, Yhang lé, "Rabai ê, zoshuq zo aq." ga chôm tái akô.

³² Haù hkùn, Yhang gi, yhangmoq lé, "Nungmoq a sê é jung zoshuq zo rá Ngò wó lhê." ga tũ tái ri.

³³ Haù mù, Yhâng é chángzô pé gi, "Yhang lé, rayuq yuq eq zoshuq lé dé byí é abe?" ga, rayuq eq rayuq tái lhum bum akô.

³⁴ Haù hkùn, Yesuq tái é gi, "Ngo lé nhang kat Sủ ô nau é hkyô lé kut rá eq Yhâng é muzó jizó lé lhoq pán rá hkyô gi, Ngá é zoshuq nghut bê. ³⁵ 'Kyôshu yoq jé rá gi, lhamó myi hkyap rá ashí.' ga, nungmoq

lhaq tái lhê a nghut kó lú? Ngò, nungmoq lé tái kôlé, nungmoq é myoq hpóng luí, haù yò pé má wú kat wú keq! Kyôshi gi, myhíng luí, kyô shu yoq gi, jé to bê nghut ri. ³⁶ Haù kyô hkyó sủ eq kyô shu sủ gi, rahá wó gabú kó sháng gaq ga, ahkuí lhang, haù kyô shu sủ gi, yhâng é zuihpau lé myang yù luí, ahtum abyuq é asak é matú, kyôshi shủ tsíng to bê nghut ri. ³⁷ Haù su mù, 'Rayuq gi, sán hkyó, góyuq gi, shủ yù.' gâ é sanghkyang gi, têng ri. ³⁸ Nungmoq a zui saì tô é jang mâ é shủ yù rá matú, nungmoq lé Ngò nhang kat bê nghut lhê. Góbang gi, haù má wum kat zui saì to bê nghut mù, nungmoq gi, haù bang zui saì é akyú lé shu yù bekô nghut ri." gâ ri.

Samariq Byù Myo Myo Lumjínq Kô É Hkyô

³⁹ "Yhang gi, ngò kut laì lò bê hkyô lunglhang lé, tái kyô ri." ga luí, myiwe myhí haù saksé hkâm é yanmai, haù wà mâ é Samariq byù myo myo gi, Yesuq lé lumjínq bum bekô nghut ri. ⁴⁰ Haù mù, Samariq byu pé gi, Yesuq chyáng lé jé kômù, yhangmoq eq nyi rá matú, Yhang lé lung kô é yanmai, Yhang gi, í nyi bo nyi bê nghut ri. ⁴¹ Yhâng é dang pé é yanmai, byù myo myo gi, lumjínq bang dut jat lò bekô nghut ri.

⁴² Yhangmoq gi, myiwe myhí haù lé, "Ahkuí, ngamoq lumjínq é gi, nàng tái é dang yanmai za a nghut lo; ngamoq yhang wó gyo bê nghut é htoq agó, shí yuq gi, gè gè yhang, mingkan é hkyi yù Sủ nghut é lé, ngamoq sê bê nghut é yanmai nghut lhê." ga chôm tái akô nghut ri.

Mingsuwún Hpó É Yhangzo Lé Lhoq Gê Byí É Hkyô

Mht 8:5-13; Luk 7:1-10

⁴³ Í nyi lai jáng, Yesuq gi, haù mai Galile mau shut htoq e ló bê nghut ri. ⁴⁴ "Myiqhtoi gi, yhum-sing é mau má myoqdong a wó

wú é nghut lhê." ga, Yesuq yhang saksé hkâm é nghut lhê. ⁴⁵ Yesuq gi, Galile mau má jé é hkûn, Galile byu pé gi, Yhang lé lhom hkulum yu akô; yhangmoq gi, Yerusalem và mó má, Lhoqlhai Poî ê lôm kô é nghut é yanmai, poî u lé, Yesuq kut é hkyô lhunglhang lé, myàng kô é bang nghut ri.

⁴⁶ Yesuq gi, Yhang mai haû wui lé tsibiyiq wing dut nhang é, Galile mau mâ é Hkanaq và mó má, ê dum kûm ri. Haû ming suwún rayuq é yhangzo yuqzo gi, Kaperna-um và má no nyi ri. ⁴⁷ Yesuq gi, Yuda mau mai Galile mau má jé lé bê gâ é hkyô lé, ming suwún haû wó gyo jáng, yhang gi, Yesuq chyáng ê mù, shí-nô no nyi é yhangzo lé, lé lhoq gê byi râ matú, Yhang lé dúng tôngbán ri.

⁴⁸ Haû hkûn, Yesuq gi, yhang lé, "Byù nungmoq gi, limik kumlhá pé eq mauhpô muzó pé lé za a myàng kô é nghut le gi, hkâ-nhám lé lumjúng kó râ a nghut." ga taí ri.

⁴⁹ Mingsuwún haû gi, "Yhumsing ê, ngá zo a shí shimá gyó lé laq." ga taí ri.

⁵⁰ Haû hkûn, Yesuq gi, "Nàng wó ló bê; nung zo byùn râ nghut lhê." ga tũ taí ri.

Suwún haû gi, Yesuq taí é dang haû lé gyô jing luí, tau ló bê nghut ri. ⁵¹ Yhang gi, hkyô má ru nghut nyi ashí hkûn, yhang é dui-nhang zoshang wui gi, yhang lé lé hui luí, zoshang haû gé byuq é hkyô, lé taí kyô akô nghut ri. ⁵² Yhang gi, yhang zo hkâ-nhám gè byuq é ahkying lé myi wú é hkûn, yhangmoq gi, "A-nyí nap nyí hkyuí rahkying má, gùng nyé é chám ló byuq bê nghut ri." ga taí kyô akô.

⁵³ Haû hkûn, ahkying haû gi, "Nung zo byùn râ nghut lhê." ga, yhang lé, Yesuq taí é ahkying nghut é lé, haû yhangwa bûn sé bê nghut

ri. Haû mù, yhang eq yhang yhum-byù banshoq bang gi, lumjúng bekô nghut ri.

⁵⁴ Haû gi, Yesuq, Yuda mau mai Galile mau má lé jé é htàng, í dâm nghú râ dá kut shit é limik kumlhá nghut ri.

5

Wuihtum Yàm Má, Nòhpyo Lhoq Gê Byí É Hkyô

¹ Hau htàng a myáng má, Yudaq byu pé é poí ralhũm joq é yanmai, Yesuq gi, Yerusalem và mó má doq ló ri. ² Ahkuí, haû Yerusalem và mó é Sau Hkúmdong nàm má, Hebre mying đông gi, Betzahta ga myhing é wuihtum ralhũm joq ri; hau é lhinghkyuq má, jiropp ngo lhum joq tô ri. ³ Jirop haú pé má, myoqjit bang, hkyí hten bang, gùngium shí bang ajùm ayò leq tô bum akô. (Haû bang gi, wui dui nún râ lé láng tô é bang nghut akô. ⁴ Hkâsu mù gâ le, haû Yhumsing é maumang lagyo gyó lé lé kut mù, wui lé, lé lhu nhún jáng, wuihtum haú má hí wó wang é sũ gi, hái jung ana wa dap to kôlhang, ge byuq é huí é yanmai nghut ri.)* ⁵ Sũm xe shit zân tup no nyi é byù rayuq le, haú má bo tô ri. ⁶ Yesuq gi, haú yuq no leq tô é lé myàng mù, haû su no nyi é gyai myáng bê nghut é hkyô lé sé jáng, yhang lé, "Nàng, gè nau ri lú?" ga myí ri.

⁷ Nò sũ haú yuq gi, "Yhumsing ê, wui dui nún lo é hkûn, wuihtum má wàng râ matú, ngo lé garũm râ byù ó a nyi; ngò wàng râ nghú jáng, góyuq hí, ngá hí má wàng wàng dut ri." ga tũ taí ri.

⁸ Hau htàng, Yesuq gi, yhang lé, "Toq aq! Náng é taphkang yu chũng luí, sô ló aq." ga taí ri. ⁹ Haú yuq gi, radá dâm nò ge byuq bê nghut luí, yhang é taphkang yù mù, sô ló bê nghut ri.

* **5:4** Bun zo 3 lhum má é ahtang túm eq bun zo 4 lhum gi, chyúmding myo myo má a bo é nghut lhê.

Haú nyí gi, Bánno buinyì nghut ri. ¹⁰ Haú mù, Yudaq byu pé gi, haú nò ge byuq é hui sù lé, "Hkù-nyí gi, Bánno buinyì nyí nghut é yanmai, nàng, taphkang waq é gi, tarâ lu lai bê nghut ri." ga taí akò.

¹¹ Nghut kôlháng, yhang tù taí é gi, "Haú ngo lé lhoq gê byi sù gi, ngo lé, 'Náng é taphkang yu chùng mù, sô ló aq.' ga taí é nghut lhê." gâ ri.

¹² Haú mù, yhangmoq gi, "'Náng é taphkang yu chùng mù sô ló aq.' ga, nang lé taí é sù gi, ó yuq wá nghut ri lúh?" ga myí akò.

¹³ Nghut kôlháng, haú ó yuq nghut é lé, nò ge byuq é hui sù gi, a châng sê kat nghut ri; hkâsu mù gâ le, Yesuq gi, haú má é byu moq mó má wang nyó ló byuq é yanmai nghut ri.

¹⁴ Htâng má, Yesuq gi, haú yuq lé noqkuq yhùm má myàng jáng, "Wú aq, nàng wángzán bê nghut ri; hí lhê htoq má je wuìhke é hkyô a hui zo sháng gaq, mara hkâkut shut lo." ga lú, yhang lé taí ri. ¹⁵ Haú yuq gi, htoq ló mù, yhang lé lhoq gê byí é sù gi, Yesuq nghut ri ga, Yudaq byu pé lé taí kyô ri.

Asak Wó Yû Râ Hkyô

¹⁶ Haú mù, Yudaq byu pé gi, Bánno buinyì nyí má, Yesuq, haú hkyô kut é yanmai, Yhang lé gun-jang lo akò nghut ri. ¹⁷ Haú hkùn, Yesuq gi, yhangmoq lé, "Ngá Wa gi, hkù-nyí jé shoq, hkâ-nhám le mù zuí nyi é nghut mù, Ngò le mù zuí nyi lhê." ga taí ri. ¹⁸ Haú mù lú, Yesuq gi, Bánno buinyì lé lhoq htên é htoq agó, Garai Gasang lé lháng, Yhâng Wa ga wut é dông, yhumsing gùng lé, Garai Gasang eq lhoq whuí é yanmai, Yudaq byu pé gi, Yhang lé sat pyám râ matú, je riyhang shikut lo akò nghut ri.

¹⁹ Yesuq, yhangmoq lé tù taí é gi, "Ngò, nungmoq lé teng za taí kôlé, haú Zo gi, yhumsing é myit dông haí le a wó kut; Yhâng Wa kut é hkyô lé myang é gù za wó kut é

nghut lhê; hkâsu mù gâ le, haú Íwa kut é hkyô lé za, haú Zo châng kut é yanmai nghut lhê. ²⁰ Hkâsu mù gâ le, haú Íwa gi, Zo lé chyitdap é nghut lú, Yhang kut é hkyô lhunglháng, haú Zo lé tún shit ri; nungmoq máu hông shoq, shí pé htoq je ko é hkyô pé lé lháng, haú Zo lé tún shit shirâ nghut lhê. ²¹ Haú Íwa gi, shí bê bang lé lhoq dui toq mù, yhangmoq lé asak byí é eq rajung za, haú Zo le, Yhang byí nau é bang lé, asak byi râ nghut lhê. ²² Hau htoq agó, haú Íwa lé hkunggâ é eq rajung za, haú Zo lé le, lhunglháng bang hkungga kó sháng gaq ga, haú Íwa gi, ó yuq lé le a jéyáng e za, jéyáng é hkyô lhunglháng, haú Zo lé lum to bê nghut ri. ²³ Haú Zo lé a hkunggâ é sù gi, haú Yhang lé nhang kat é sù Íwa lé le, a hkunggâ é sù nghut ri.

²⁴ Ngò, nungmoq lé teng za taí kôlé, Ngá dang lé gyo lú, Ngo lé nhang kat é Sù lé lumjǐng é sù, ó yuq nghut kôle, mara byí é a hui e za, ahtum abyuq é asak wó é nghut lhê; haú yuq gi, shi é mai lut lú, asak dui bê sù nghut ri. ²⁵ Ngò, nungmoq lé teng za taí kôlé, haú Garai Gasang é Yhangzô é htê lé, shi byuq bê bang wó gyo râ ahkyǐng gi, jé lo nyi bê nghut ri; ahkuí lháng jé to bê nghut ri. Htê haú lé gyô é bang gi, asak dui kó râ nghut lhê. ²⁶ Hkâsu mù gâ le, Garai Gasang gi, Yhânggùng má yhang, asak bo é eq rajung za, Yhang Zo lé le, Yhânggùng má yhang, asak bò nhang é yanmai nghut ri. ²⁷ Hau htoq agó, Yhang gi, haú Byu Yhangzo nghut é yanmai, Garai Gasang gi, tarâ jéyáng râ ahko ahkáng, Yhang lé byi bê nghut ri.

²⁸ Shí hkyô lé hkâ-máú hong nyi kó: lup pé má lúng tô é bang ban-shoq gi, Yhâng é htê lé wó gyo kôluí, htoq ló râ ahkyǐng jé lò râ nghut lhê. ²⁹ Ge é hkyô kut é bang gi, asak

dui rã matú, dui toq kó rã nghut lhê; agê ashop hkyô kut é bang gi, mara byi é hui zo rã matú, dui toq kó rã nghut lhê. ³⁰ Ngò gi, Ngá myit dông mai haí le a wó kut é nghut lhê; Ngò wó gyô yu é eq rajung za sheq, jéyáng é nghut luí, Ngò jéyáng é hkyô gi, tengmán lhê; hkâsu mù gâ le, Ngò gi, Ngò ô nau é dông châng é a nghut e za, Ngo lé nhang kat é Sû ô nau é dông châng é sheq ru nghut lhê.

Yesuq Eq Séng Luí, Saksé Hkâm É Hkyô

³¹ Ngá gûng lé ngò saksé hkâm é nghut jáng, ngò za saksé hkâm é hkyô gi, teng rã a nghut. ³² Ngá é hkyô lé saksé hkâm byi é Sû (Ngá Wa) góyuq nyi lhê; Ngò eq séng luí, haú yuq hkâm é saksé gi, teng é hkyô lé, Ngò sê lhê.

³³ Nungmoq gi, Yohan† chyáng byù nhang kat wú bekô nghut ri; yhang gi, haú tengmán hkyô lé saksé hkâm byi bê nghut lhê. ³⁴ Ngò gi, xângzo byu pé mai saksé hkâm byi rã lé, ra luí a nghut, nghut kôlhang, nungmoq hkyi yu é wó hui rã matú sheq, haú su nghu taí é ru nghut lhê. ³⁵ Yohan gi, duq nyi é myibung su duqbó byi é nghut mù luí, nungmoq gi, haú duqbó é hkaú má, rayoq zo ngón nau nyi akô nghut ri.

³⁶ Nghut kôlhang, Ngò wó é saksé gi, Yohan byi é saksé htoq je kô lhê; hkâsu mù gâ le, ahkuí Ngò zui saí nyi é muzó gi, Ngò lhoq pán rã matú, haú Íwa, Ngo lé ap byi tô é nghut luí, haú Íwa, Ngo lé nhang kat é hkyô lé, saksé hkâm byi nyi ri. ³⁷ Hau htoq agó, haú Ngo lé nhang kat é sù Íwa le, Ngò eq séng luí saksé hkâm byi ri; nungmoq gi, Yhâng é htê lé le, a wó gyô wú kó; Yhâng é gunghkyâng lé le, a myang wú kó; ³⁸ haú Yhâng é mungdang le,

nungmoq chyáng a bò kó nghut ri; hkâsu mù gâ le, nungmoq gi, Yhang nhang kat é Sû lé a lumjúng kô é yanmai nghut ri. ³⁹ Nungmoq gi, haú Chyúmdang mai ahtum abyuq é asak wó yú rã nghut lhê ga myit yù kô é yanmai, haú Chyúmdang má ho wú akô nghut ri; nghut kôlhang, Chyúmdang haú gi, Ngò eq séng luí saksé hkâm byi ri; ⁴⁰ nghut kôlhang, asak wó yú rã matú, nungmoq gi, Ngá chyáng a kâm lé kó nghut ri.

⁴¹ Ngò gi, byu eq hkya-ôn é lé a lhom yu é nghut lhê. ⁴² Nghut kôlhang, nungmoq lé gi, Ngò sê lhê; nungmoq é i-myit hkaú má, Garai Gasang lé chyitdap é myit a bò kó nghut ri. ⁴³ Ngò gi, Ngá Wâ é mying mai jé lé é sù nghut kôlhang, nungmoq gi, Ngo lé a lhom hap yù kó; yhâng mying yhang lang é byù, gotú rayuq jé lé é ru nghut le gi, haú yuq lé, nungmoq lhom hap yù kó rã nghut lhê. ⁴⁴ Nungmoq gi, rayuq eq rayuq hkya-ôn lhúm é lé za hap yù luí, rayuq za nghut é Garai Gasâng chyáng mai lo é hkya-ôn hkyô lé gi, a hô kô é bang nhing, hkâsu kut wó lumjúng kó rã lúh?

⁴⁵ Nghut kôlhang, haú Íwâ é hí má, Ngò, nungmoq lé mara hùn nhô hkâ-ngâm kó; nungmoq lé mara hun é sù gi, haú nungmoq mai myit myoqbyu tô é Mosheq ru nghut lhê. ⁴⁶ Mosheq lé nungmoq gè gè yhang lumjúng kô é ru nghut le gi, Ngo lé le lumjúng kó rã nghut lhê; hkâsu mù gâ le, Mosheq gi, Ngá é hkyô lé kâ tô é sù nghut ri. ⁴⁷ Nghut kôlhang, nungmoq gi, yhang kâ tô é pé lé lhang a lumjúng kô é nhing, Ngá dang lé, hkâsu kut wó lumjúng kó rã lúh?" gâ ri.

6

Byù Ngo Hkying Lé Zoshuq Byi Tsô É Hkyô

Mht 14:13-21; Mrk 6:30-44; Luk

† 5:33 Yohan shí yuq gi, Wui-myhup Sará Yohan nghut lhê.

9:10-17

¹ Hau htâng a myáng má, Yesuq gi, Tiberi nhông le gâ é, Galile nhông he hpoq shut gû dap ló bê nghut ri. ² Haú hkûn, byù ajùm ayò gi, haú nò bâng htoq má, Yhang kut shit é limik kumlhá pé lé myàng kô é yanmai, Yhang htâng châng e ló bum akô nghut ri. ³ Yesuq gi, bùm shut doq ló mù, Yhâng é chángzô pé eq rahá zung tô ri. ⁴ Yudaq byu pé é Lhoqlhai Poí gi, chyâng lo nyi bê nghut ri.

⁵ Yesuq gi, tu wú kat le, byù ajùm ayò Yhâng shut lé lo bùm kô é lé byu-myang kat luí, Hpilip lé, "Shí bang zo rá muk, nga-nhúng, hkâmá é wó wú rá lú?" ga tái ri. ⁶ Yesuq, haú su ga tái é gi, yhang lé chyam wú rá matú za nghut ri; hkâsu mù gâ le, hkâsu kut rá hkyô gi, Yhâng é myit má bo to gù bê nghut ri.

⁷ Hpilip gi, Yhang lé, "Denari* í sho èq muk wui le lhang, rayuq ratsuí tsuí ngap rá a nghut." ga tú tái ri.

⁸ Haú hkûn, Yhâng é chángzo nghut é, Simun Petruq é yhanggu Andre gi, Yhang lé, ⁹ "Muk-yo muk ngo long eq ngozo í du wó é yuqgè zo rayuq, shí má nyi ri; nghut kôlhang, byù shí myhó bang lé luq shoq, hkâsu kut wó gâm byi rá lú?" ga tái htoq kat ri.

¹⁰ Yesuq gi, "Haú shiwa byu pé lé, zùng nhâng keq." ga tái ri. Jowò haú gi, mhán htú é jang nghut mù, yuqgè wui baú lhang, ngo hkyíng kô zung tô bùm bekô nghut ri; ¹¹ hau htâng, Yesuq gi, muk long pé lé yù mù, jeju hkya-on luí, zung tô é bang lé, yhangmoq o é myhó tsing gâm byí ri. Haú eq rajung za, ngozo lé le haú su kut ri.

¹² Yhangmoq banshoq bang zo gyí bùm kô é htâng má Yhang gi, Yhâng é chángzô pé lé, "Myit gyó tô é ajap azo pé lé châng guq tsíng yù keq. Haí le a langsá pyám sháng

gaq." ga tái ri. ¹³ Haú mù, yhangmoq gi, zô myhit tô é muk-yo muk ngo long má é ajap azo pé lé châng guq tsíng le, raxe í mung byíng shoq wó guq tsíng yu akô nghut ri.

¹⁴ Haú shiwa byu pé gi, Yesuq kut é limik kumlhá lé myàng kô é hkûn, "Shí yuq gi, mingkan htoq má jé lé lô rá gâ é, Myiqhtoi yhang nghut ri-nhung!" ga tái bum akô. ¹⁵ Yesuq gi, yhangmoq lé mù, Yhang lé hkohkâm zik kut nhâng kó rá dá é hkyô lé, sê é yanmai, Yhang baú tsik za bùm shut dum haq doq ló bê nghut ri.

*Yesuq, Wui Htoq Má Sô É Hkyô
Mht 14:22-27; Mrk 6:45-52*

¹⁶ Buigyum htâng, Yhâng é chángzô pé gi, haú nhông shut gyó ló mù, ¹⁷ lhai má wang ji luí, nhông hé hpoq má é Kaperna-um wà shut gû e ló akô; haú hkûn, mauchut bê nghut kôlhang, Yesuq gi, yhangmoq chyáng a jé gyó lo shi nghut ri. ¹⁸ Haú u lé, laidun htan lo é yanmai, wuilhêng toq lô bê nghut ri. ¹⁹ Yhangmoq gi, sum myi déng kô lhai kôn e ló kô é hkûn, Yesuq gi, nhông htoq má so luí, haú lhai shut chyâng lé lo nyi é lé myàng kômù, gyuq dan bùm bekô nghut ri. ²⁰ Nghut kôlhang, Yesuq gi, "Hkâgyuq kó, Ngò ru nghut lhê." ga yhangmoq lé tái ri. ²¹ Haú mù, yhangmoq gi, Yesuq lé gabú myit èq lhai hkaú má shuí hâng yù nau akô. Haú hkûn, lhai haú gi, radá dâm yhangmoq jé nau é jang wuiyàm má jé bê nghut ri.

²² Nhông hé hpoq má nyi tô é byù moq mó gi, haú má lhai racham za joq lai lo é hkyô eq, lhai haú má Yesuq a bo doq ji e za, chángzô pé baú ji htoq ló kô é hkyô lé, hau htang nyí, bìn sê kat akô nghut ri. ²³ Haú hkûn, haú Yhumsíng, jeju hkya-ôn é htâng, byu pé muk zô é jowò nàm má, Tiberi myuq má é

* 6:7 Denari rachap gi, byù rayuq é ra-nyí é zuihpau eq wui é nghut lhê.

lhaí pé jé lé bum ri. ²⁴ Haú byù moq mó gi, Yesuq eq Yhâng é chángzô pé, haú má a nyi lo kô é hkyô lé sé kô é yanmai, Yesuq lé châng hô râ matú lhaí haú pé má wang ji mù, Kaperna-um wà shut e ló akô nghut ri.

Yesuq, Asak Muk Nghut É Hkyô

²⁵ Yhangmoq gi, nhông hé hpoq má Yesuq lé myàng kôjáng, "Rabai ê, Nàng gi, shí má hkâ-nhám jé lé é lhu?" ga, Yhang lé myi akô.

²⁶ Haú hkûn, Yesuq gi, "Ngò, nungmoq lé teng za taí kôlé, nungmoq gi, limik kumlhá pé lé myàng kô é yanmai, Ngo lé hô kô é a nghut, muk gyi shoq myàng zo kô é yanmai sheq, hô kô é ru nghut lhê. ²⁷ Htên byuq sê é zoshuq é matú, hkâshikut kó; haú Byu Yhangzo byi râ nghut é ahtum abyuq é asak é matú, ru gíng nyi é zoshuq wó yú râ lé sheq shikut nyi keq. Yhâng chyáng gi, haú Íwa Garai Gasang mai Yhâng é saksé dizik tap to bê nghut lhê." ga tú taí ri.

²⁸ Haú mù, yhangmoq gi, "Garai Gasang ô nau é muzó pé zui saí râ matú, ngamoq haí kut ra râ lhu?" ga Yhang lé myi akô.

²⁹ Haú hkûn, Yesuq gi, "Garai Gasang nhang kat é Sû lé, lumjíng é gi, Garai Gasang ô nau é muzó nghut bê." ga tú taí ri.

³⁰ Haú mù luí, yhangmoq gi, Yhang lé, "Ngamoq myoq eq wó myàng luí, Nàng lé lumjíng râ matú, Nàng, haí jung limik kumlhá kut shit râ lhu? Nàng, haí jung kut shit râ lhu? ³¹ Haú Chyúmdang má, 'Yhang gi, yhangmoq zo râ matú, mauhkûng mai muk byí ri.'* ga kâ tô é eq rajung za, ngamoq é íchyi íwa pé gi, haú yoso hkaú má man-naq muk zo bekô nghut lhê." ga taí akô.

³² Haú hkûn, Yesuq gi, yhangmoq lé, "Ngò, nungmoq lé teng za

taí kôlé, nungmoq lé mauhkûng mai muk byí é Sû gi, Mosheq a nghut, haú Ngá Wa sheq, nungmoq lé mauhkûng mai tengmán é muk byí é Sû ru nghut lhê. ³³ Hkâsu mù gâ le, Garai Gasang byí é muk gi, mauhkûng mai gyó lé luí, haú mingkan lé asak byí é Sû nghut lhê." ga taí ri.

³⁴ Yhangmoq gi, "Yhumsíng ê, ahkuí mai, ngamoq lé muk haú hkâ-nhám le byí nyi laq." ga chòm taí bum akô.

³⁵ Haú mù, Yesuq taí kyô é gi, "Ngò gi, asak muk nghut lhê. Ngá chyáng lé é sù gi, hkâ-nhám le zòmut é hui râ a nghut; Ngo lé lumjíng é sù le, hkâ-nhám le wuìshit é hui râ a nghut. ³⁶ Nghut kôlhang, Ngò, nungmoq lé taí wú bê eq rajung za, nungmoq gi, Ngo lé myang wú é nghut kôlhang, a lumjíng shi kó nghut ri. ³⁷ Haú Íwa mai Ngo lé ap byí tô é byù lhunglhang bang gi, Ngá chyáng lé kó râ nghut luí, Ngá chyáng lé é sù ó yuq lé le, Ngò gi, hkâ-nhám lé hkat htoq pyám rà a nghut. ³⁸ Hkâsu mù gâ le, Ngò, mauhkûng mai gyó lé é gi, Ngò ô nau é hkyô lé kut râ matú a nghut e za, Ngo lé nhang kat Sû ô nau é hkyô lé kut râ matú ru nghut lhê. ³⁹ Haú Ngo lé nhang kat Sû ô nau é hkyô gi, Yhang mai Ngo lé ap byí tô é bang má é rayuq lé lhang, Ngò, a lhoq hpyuq pyâm e za, jìhtùm buinyi má yhangmoq lé dum lhoq dui toq yú râ matú ru nghut lhê. ⁴⁰ Hkâsu mù gâ le, Ngá Wa ô nau é hkyô gi, haú Zo lé wú mù, Yhang lé lumjíng é sù yuq hkangmó, ahtum abyuq é asak lé wó yú râ matú nghut lhê; Ngò le, jìhtùm buinyi má haú bang lé lhoq dui toq râ nghut lhê." gâ ri.

⁴¹ Haú mù, "Ngò gi, mauhkûng mai gyó lé é muk nghut lhê." ga, Yesuq taí é yanmai, Yhang eq séng luí, Yudaq byu pé taí put kô é gi,

* 6:31 Htoq Ló 16:4

42 "Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nga-nhúng sê lhê a nghut kó lú? Haú sù é nhíng, ahkuí, 'Ngò gi, mauhkûng mai gyó lé é nghut lhê.' ga, Yhang hkâsu kut wó taí lhê lú?" gâ bum akô.

43 Haú hkûn, Yesuq gi, "Nungmoq ahkaú má hkâtaí put nyi kó.

44 Haú Ngo lé nhang kat é sù Íwa mai shuí jé é sù za a nghut jáng, ó yuq le Ngá chyáng wó jé lé rá a nghut; jé lé é sù lé gi, jihtûm buinyi má, Ngò lhoq dui toq rá nghut lhê. 45 Myiqhtoi laiká pé má, 'Yhangmoq lhunglhâng bang gi, Garai Gasâng eq mhoq byí é hui kó rá nghut lhê.'[✠] ga kâ tô é eq rajung za, haú Íwâ chyáng mai gyo yù, mhoq yu é bang yuq hkangmó gi, Ngá chyáng lé kó rá nghut lhê.

46 Haú gi, rayuq yuq mai, haú Íwa lé myang wú bê nghú nau é a nghut; Garai Gasâng chyáng mâ é Sù za sheq, haú Íwa lé myang wú é Sù nghut lhê. 47 Ngò, nungmoq lé teng za taí kôlé, lumjíng é sù gi, ahtum abyuq é asak wó lhê. 48 Ngò gi, asak muk nghut lhê. 49 Nungmoq é íchyí íwâ pé gi, haú yoso hkaú má mannaq muk zo bekô nghut lhê; nghut kôlé, shi byuq bekô nghut ri.

50 Nghut kôlhâng, shí gi, mauhkûng mai gyó lé lo é muk nghut lhê; haú lé zô é sù gi, a shí lo rá nghut lhê.

51 Ngò gi, mauhkûng mai gyó lé lo é, haú asak dui é muk nghut lhê; rayuq yuq, muk shí lé zô é nghut le gi, ahtum abyuq dui nyi rá nghut lhê; muk shí gi, mingkan zô wui é asak matú, Ngò byi rá nghut é Ngá gungsho nghut lhê." ga tú taí ri.

52 Haú mù, haú Yudaq byu pé gi, "Byù shí yuq gi, nga-nhúng lé, Yhâng é gungsho hkâsu kut wó byi tso rá lú?" ga, yhangmoq yhangchang dang htíng htíng lhûm bum akô.

53 Haú hkûn, Yesuq gi, yhangmoq lé, "Ngò, nungmoq lé teng za taí kôlé, haú Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó rá a nghut. 54 Ngá é gungsho lé zô é eq Ngá é sui lé shuq é sù, ó yuq nghut kôlé, ahtum abyuq é asak wó é nghut lhê; Ngò gi, jihtûm buinyi má, haú yuq lé lhoq dui toq yù rá nghut lhê. 55 Hkâsu mù gâ le, Ngá é gungsho gi, zojung yhang nghut lhê; Ngá é sui gi, shuqjung yhang nghut lhê. 56 Ngá é gungsho lé zô é eq Ngá é sui shuq é sù, ó yuq nghut kôlé, Ngò má nghut nyi luí, Ngò le haú yuq má nghut nyi bê nghut lhê. 57 Haú rû dui nyi é Íwa gi, Ngo lé nhang kat luí, Ngò gi, haú Íwâ é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyi rá nghut lhê. 58 Shí gi, mauhkûng mai gyó lé lo é muk nghut lhê. Nungmoq é íchyí íwâ pé gi, mannaq muk zo kôlé, shi byuq bekô nghut ri; nghut kôlhâng, muk shí lé zô é sù gi, ahtum abyuq dui nyi rá nghut lhê." ga taí ri. 59 Dang haú pé gi, Yesuq, Kaperna-um wâ mâ é tarajong má mhoqshit nyi é u lé, taí é dang nghut ri.

Chángzô Pé Myo Myo, Yesuq Lé Kâng Pyâm To Kô É Hkyô

60 Yhâng é chángzô pé myo myo gi, haú lé wó gyo kôjáng, "Dang shí gi, gyai wui ri. Ó yuq wá wó cháng rá lú?" ga taí bum akô.

61 Yesuq gi, haú eq séng luí, Yhâng é chángzô pé taí put nyi bùm kô é lé Yhâng é myit má sé luí, yhangmoq lé, "Dang shi é yanmai, nungmoq myit htên bum akô lú? 62 Haú Byu Yhangzo gi, Yhang nyi lai lò bê jowò shut taú doq ló é lé, nungmoq myàng kô é nghut le gi, hkâsu nghú kó rá lú? 63 Haú Woi-nyí gi, asak byí lhê; gungsho kúm gi, hai le a wó dut nghut ri. Nungmoq lé, Ngò

taí é dang pé gi, Woi-nyí le nghut lhê, asak le nghut lhê. ⁶⁴ Nghut kôle, nungmoq chyáng má é ra-am gi, a lumjǐng kó nghut ri." ga taí ri. Hkâsu mù gâ le, ô pé gi, a lumjǐng kó râ eq, ó yuq gi, Yhang lé ap pyám râ nghut é hkyô lé, Yesuq gi, sâng-hi mai sê to gù bê nghut ri. ⁶⁵ Yhang xoq taí é gi, "Haú su mù, haú Íwâ èq ahkáng byí é sù za a nghut le gi, ó yuq le Ngá chyáng wó lé râ a nghut nghú, Ngò, nungmoq lé taí kyo wú bê nghut lhê." gâ ri.

⁶⁶ Haú dàm mai, Yhâng é chángzô pé myo myo gi, Yhâng htâng a cháng lo kô e za, taú ló byuq bùm bekô nghut ri.

⁶⁷ Haú su mù, Yesuq gi, haú chángzo raxe í yuq lé, "Nungmoq le, ló byuq nau akô, a nghut lhú?" ga myí ri.

⁶⁸ Haú hkûn, Simun Petruq gi, "Yhumsǐng ê, Nang gi, ahtum abyuq é asak mungdang wó Sù nghut to bê lé nhǐng, ngamoq gi, ó yuq chyáng ê shirâ lhú? ⁶⁹ Nang gi, Garai Gasâng é Chyoiyǐng Sù nghut é lé, ngamoq, lumjǐng lhê, sê nyi lhê." ga, Yhang lé tú taí ri.

⁷⁰ Haú hkûn, Yesuq gi, "Nungmoq raxe í yuq lé, Ngò hkyin yù bê a nghut kó lhú? Nghut kôle, nungmoq má é rayuq gi, nat nghut ri." ga tú taí ri. ⁷¹ (Yhang gi, haú Simun Ískarut é yhangzo, Yudaq lé taí nau é nghut ri; haú yuq gi, chángzo raxe í yuq má bò sù nghut kôle, htâng má, Yhang lé ap pyám râ sù nghut ri.)

7

Yesuq Eq Yhâng É Gumang Wuí

¹ Hau htâng má, Yesuq gi, Yhang lé sat râ matú, Yudaq byu pé ho nyi bùm kô é yanmai, Yuda mau má a kâm sô wún mù, Galile mau má sô lhǐng wún ri. ² Nghut kôlhǎng, haú Yudaq byu pé é Saksé Zúm Poí chyâng lo nyi é hkûn, ³ Yesuq é yhanggu yuqzô pé gi, Yhang lé,

"Náng é chángzô pé gi, Nang kut é laklai kumlhá pé lé myàng kó sháng gaq, Nang, shǐ mai htoq ló luí, Yuda mau shut e ló aq. ⁴ Myǐng hu nau é sù gi, hkaú zaú luí haí le a kut wú é nghut lhê. Nang gi, haú pé lé kut nyí bê nghut é yanmai, mingkan lé, Náng gǐng tún shit aq." ga taí akô. ⁵ Hkâsu mù gâ le, yhanggu sǐng yuqzô pé lháng, Yhang lé a lumjǐng kó nghut ri.

⁶ Haú mù luí, Yesuq gi, yhangmoq lé, "Ngá é ahkyǐng gi, a jé shǐ nghut ri; nungmoq é ahkyǐng kúm gi, hká hkûn le joq nyi ri. ⁷ Haú mingkan gi, nungmoq lé a jú a wó kut kó nghut ri; nghut kôlhǎng, Ngo lé gi, a jú kó; haí mù gâ le, yhang kut é hkyô gi, agé ashop é nghut é lé, Ngò, saksé tún shit é yanmai nghut ri. ⁸ Nungmoq gi, poí haú shut doq ló keq. Ngò kúm gi, Ngá é ahkyǐng a jé shǐ nghut é yanmai, poí haú shut a doq ló shirâ nghut lhê." ga taí ri. ⁹ Haú su ga taí luí, Yhang gi, Galile mau má nyi gyó to bê nghut ri.

¹⁰ Nghut kôlhǎng, Yhang gu pé, haú poí shut doq ló byuq é htâng má, Yhang gi, de de a nghut é dǒng, tsik za chǎng doq ló bê nghut ri. ¹¹ Yudaq byu pé gi, haú poí má, Yhang lé chǎng hô kômù, "Haú yuq gi, hkámá nghut lhê lhú?" ga, myí wún akô nghut ri.

¹² Haú byù hpǔng hkaú má, Yhang eq séng luí taí lhúm bùm kô é má, ra-am gi, "Yhang gi, byù gè nghut ri." ga taí kǒjǎng, ra-am gi, "A nghut, Yhang gi, byu pé lé hkyô shuí nghoq sù nghut ri." ga tú taí akô. ¹³ Nghut kôlhǎng, haú Yudaq suwún wuí lé gyuq kô é yanmai, ó yuq le, Yhang eq séng é hkyô lé de de a wám taí kó nghut ri.

Haú Poí Má, Yesuq Mhoqshit É Hkyô

¹⁴ Haú poí rawuí nghut ló é hkûn, Yesuq gi, noqkuq yhúm má doq é luí, mhoqshit hí ló bê nghut ri.

15 Haú hkûn, Yudaq byu pé gi, gyô maú byuq kômù, "Shí yuq gi, mhoq yu é hkyô le a joq wú é wá, haú-í hkâsu mù sê lhê laq?" ga myi bum akô.

16 Haú mù, Yesuq tû taí é gi, "Ngò mhoqshit é dang gi, Ngá é dang a nghut; Ngo lé nhang kat Su é dang ru nghut lhê. 17 Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasang chyáng má é nghut a nghut é eq, Ngá é myit dông taí é dang nghut a nghut é lé, yhang sê gàm hkoq yû râ nghut lhê. 18 Yhumsing é myit dông taí é sù gi, yhumsing é matú aróng hô sù nghut ri; nghut kôlháng, yhumsing lé nhang kat su é matú, aróng ho é sù gi, tengmán é byû nghut ri; yhang má, a tengmán é hkyô haí le a bò nghut ri. 19 Mosheq gi, nungmoq lé jep é tarâ byí to bê, a nghut kó lúhú? Nghut kôlháng, nungmoq ó yuq le, jep é tarâ haú lé a cháng kó nghut ri. Haí mù luí, Ngo lé sat nau nyi akô lúhú?" gâ ri.

20 Haú hkûn, haú byû hpûng gi, "Nàng gi, nat gang wang to sù nghut ri-nhung! Nang lé, ó yuq wá sat nau nyi ri lúhú?" ga tû taí akô.

21 Yesuq gi, yhangmoq lé, "Ngò, laklaí kumlhá ralhum kut jáng, nungmoq banshoq bang gi, maú byuq bum akô. 22 Nghut kôlháng, nungmoq gi, ahpyo-kuq hpyit byí é hkyô lé, Mosheq byí é nghut lhê ga luí, Bánno buinyi má, zoshâng lé ahpyo-kuq hpyit byí akô (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, íchyí íwâ pê chyáng mai lo é ru nghut lhê.). 23 Haú, Mosheq é jep é tarâ lé a lhoq htên pyám sháng gaq nghû, Bánno buinyi má, zoshâng lé ahpyo-kuq hpyit byí é nghut le gi, haí mù luí, Bánno buinyi má, byû rayuq é gùng gón lé, Ngò lhoq gè byí é yanmai, Ngo lé nhikjum yô akô lúhú? 24 Byû du lé wú luí

hkâjéyáng kó; tengmán é dông sheq jéyáng keq." ga taí ri.

Yesuq Gi, Hkrisduq Nghut Lhê Lhú?

25 Haú mù luí, Yerusalem wà mó má é byu pé ra-am gi, "Haú yhangmoq sat pyám nau nyi é sù gi, shí yuq a nghut lhi? 26 Yhang gi, shí má de de dáng nyo nyi le, yhangmoq gi, Yhang lé, haí le a ga kó myhinhung! Yhang gi, Hkrisduq nghut lhê ga, haú ahkáng ayá wó bang gi, gè gè yhang, sê akô abe? 27 Haú Hkrisduq jé lé é hkûn gi, Yhang hkâmai lé lo é lé, ó yuq lháng sé rà a nghut." ga taí bum akô. Nghut kôlháng, shí yuq gi, hkâmá é sù nghut é lé, nga-nhung sê lhê;

28 Haú mù, Yesuq gi, noqkuq yhûm wàng má mhoqshit uchyang, htê mó eq taí kat é gi, "Nungmoq gi, Ngo lé sê é htoq agó, Ngò, hkâmai lé é sù nghut é lé le, sê akô nghut ri. Ngò gi, Ngá myit dông shí má lé nyi tô é sù a nghut kôlháng, Ngo lé nhang kat é Sù gi, tengmán lhê; nungmoq gi, Yhang lé a sé kôlháng, 29 Ngò gi, Yhang lé sê lhê; hkâsu mù gâ le, Ngò gi, Yhâng chyáng mai lé é sù eq Yhang mai nhang kat é sù nghut lhê." gâ ri.

30 Haú mù, yhangmoq gi, Yhang lé chyup râ dá akô; nghut kôlháng, Yhâng é ahkyíng a jé shi é yanmai, Yhang lé chyup râ matú, ó yuq le loq a jé kó nghut ri. 31 Nghut kôlháng, byû hpûng hkaú má é bang myo myo gi, Yhang lé lumjíng bûm kólú, "Haú Hkrisduq jé lé é hkûn, Yhang gi, shí yuq htoq má, limik kumlhá pé je wó kut shit râ lúhú?" ga taí bum akô nghut ri.

32 Haú Hparishe pé gi, haú byû hpûng hkaú má, Yesuq eq sêng é hkyô lé, haú su ga dangsoq soq lhum nyi kô é hkyô lé wó gyô yu akô. Haú mù, haú hkyangjong agyi pé eq Hparishe pé gi, Yhang lé é chyup râ matú, noqkuq yhûm zúng é bang lé nhang kat akô.

33 Haú hkûn, Yesuq gi, "Ngò gi, nungmoq eq rahá rayoq zo za nyi rá nghut lhê; hau htâng, Ngo lé nhang kat Su chyáng taú ló rá nghut lhê. 34 Haú hkûn, nungmoq gi, Ngo lé hô kôlhang, myang hô kó rá a nghut; Ngò nyi é jang má, nungmoq wó jé kó rá a nghut." ga taí ri.

35 Hau é yanmai, Yudaq byu pé, rayuq eq rayuq taí lhum kô é gi, "Shí yuq gi, Yhang lé nga-nhúng a myang hô loshoq, hká shut e byuq rá dá lhê lú? Yhang gi, Grik byu pé má nyi byo myín tó é nga-nhúng é byu pé nyi é jowò má é mù, Grik byu pé lé, é mhoqshit rá dá lhê lú? 36 'Nungmoq gi, Ngo lé hô kôlhang, myang hô kó rá a nghut.' gâ é eq, 'Ngò nyi é jang má, nungmoq wó jé kó rá a nghut.' gâ é, Yhang taí é dang gi, haí jung wá gá naú é nghut lhê lú?" gâ akô.

37 Haú lô htâng é eq je ahkyak é Poí buinyi má, Yesuq toq yap luí, htê mó èq taí é gi, "Wui shit sù gi, Ngá chyáng lé mù, shuq sháng gaq. 38 Ngo lé lumjínq é sù ó yuq nghut kôle, haú Chyúmdang má taí tó é eq rajung za, 'Yhâng chyáng mai asak uchyâm é wuilàng yui htoq lô rá nghut lhê.'" gâ ri. 39 Yhang haú su gâ é gi, Yhang lé lumjínq é bang myang hap yù rá nghut é, haú Woi-nyí lé taí é nghut ri. Haú hkûn jé shoq, haú Woi-nyí lé a byi kat shi nghut ri. Hkâsu mù gâ le, Yesuq gi, hpungwup shingkang dan hû é a hui nhâng shi é yanmai nghut ri.

40 Yhâng é dang pé lé wó gyo kôjáng, Ra-am gi, "Shí yuq gi, gè gè yhang, Myiqhtoi haú nghut ri." ga taí akô.

41 Ra-am gi, "Shí yuq gi, Hkrisduq nghut ri." ga taí akô. Góbang nghut jáng, "Hkrisduq wá Galile mau mai htoq lé rá nghut lhê lú? 42 Haú Chyúmdang má, Hkrisduq gi, Dawiq é awut ashín mâ é nghut

luí, Dawiq nyi lai lo é Betlehem wá mai htoq ló rá nghut lhê gâ é, a nghut lú?" ga myí bum akô nghut ri. 43 Haú mù luí, Yesuq é yanmai, shiwa byu pé gi, gàm hkoq lò byuq bekô nghut ri. 44 Ra-am gi, Yhang lé chyup yù nau bùm kôlhang, Yhang lé loq a záng kó nghut ri.

Yudaq Byu Pé Lé Shuí U É Bang A Lumjínq Kô É Hkyó

45 Hau htâng má, haú noqkuq yhúm zúng bang gi, haú hkyangjong agyi pé eq Hparishe pé chyáng taú ló kô é hkûn, haú bang gi, yhangmoq lé, "Nungmoq, haí mù luí, Yhang lé a shuí lo kô é lú?" ga lhom myí akô.

46 Haú hkûn, haú noqkuq yhúm zúng bang gi, "Shí yuq su ga taí é byù gi, ó le a nyi wú é nghut lhê." ga taí kyô akô.

47 Haú mù, haú Hparishe pé gi, "Nungmoq lé le, Yhang èq mhoq hpyoq yù bekô lú? 48 Haú zaú wui chyáng le, Hparishe pé chyáng le, Yhang lé lumjínq é byù bò akô lú? 49 A bò! Nghut kôlhang, haú jep é tará lé a sê é byù moq mó shí gi, nhing pyâm é hui bekô nghut ri." ga nhik-yô é đông tú taí kat akô nghut ri.

50 Nghut kôlhang, yhangmoq hpúng má bo é, hí hkûn Yesuq chyáng e wú bê sù nghut é, Nikodimu gi, 51 "Nga-nhúng é tará gi, byù rayuq lé, yhâng é dang hí a gyô wú é eq, yhang haí kut é lé a sê e za, mara byi lhê lú?" ga, yhangmoq lé myí ri.

52 Haú hkûn, yhangmoq gi, "Nàng le, Galile mau byù nghut lhê lú? Galile mau mai myiqhtoi rayuq lhang a htoq é hkyô lé, nàng gon wú aq, haú jáng sé rá nghut lhê." ga tú taí akô.

53 Hau htâng, yuq hkangmó gi, ó le ô yhúm shut taú ló byuq bùm bekô nghut ri.*

* 7:53 Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

8

Yesuq Lé, Lé Myî Chyam Wú Kô É Hkyô

¹ Yesuq kúm gi, Tsanlun Bùm shut e ló bê nghut ri. ² Htang napsûn noq le, Yesuq gi, noqkuq yhùm wàng hkaú má dum é luí, byu pé lhunglhang gi, Yhâng é lhíngkhyuq má lé zing bum akô; haú mù, Yhang gi, zung to luí, yhangmoq lé mhoqshit ri. ³ Haú hkûn, haú tarâ sará pé eq Hparishe pé gi, sulàng shut nyi é má myang chyup yu é su-myi rayuq lé shuí lé lô kômù, gung gung má shap to kôluí, ⁴ Yesuq lé, "Sará ê, myiwe myhí shí lé, sulàng shut nyi é má myang chyup yu é nghut lhê. ⁵ Haú Mosheq é tarâ má gi, shí su é myiwe lé, luggok èq dú sat pyám keq ga, nga-nhúng lé hkunmó hkyô tô ri. Ahkuí, Nang gi, hkâsu nghû rá lhú?" ga myî akô. ⁶ Yhangmoq haú su ga myî é hkyô gi, Yhang lé mara wó hûn shoq ga, chyam wú rá matú nghut ri.

Nghut kôlhang, Yesuq gi, ngóm mù, myigùng má loqnyhui èq htaú kê nyi ri. ⁷ Yhang lé, yhangmoq ru jang myî nyi kô é hkûn, Yhang gi, yap nyhang kat mù, yhangmoq lé, "Nungmoq má é mara a wó é sù hí, myiwe myhí shí yuq lé luggok èq dú sháng gaq." ga taí ri. ⁸ Hau htang, Yhang gi, dum ngóm luí, myigùng má kê nyi ri.

⁹ Yhangmoq gi, haú su gâ é lé wó gyo kôjáng, je mang bang mai hí luí, rayuq htang rayuq ló byuq bekô nghut luí, Yesuq baú za myit gyó tô é eq, myiwe myhí haú jang yap nân tô ri. ¹⁰ Yesuq gi, yap nyhang kat luí, yhang lé, "Myiwe myhí ê, yhangmoq hká ló bekô lhú? Ó yuq èq le, nàng lé mara a byi kó lhú?" ga myî ri.

¹¹ Yhang gi, "Yhumsîng ê, ó yuq le mara a byi kó nghut ri." ga tú taí ri.

Haú hkûn, Yesuq gi, "Ngò le, nàng lé mara a byi, ló aq hkoi, ahkuí mai mara hkâdum kut shut lo." ga taí kat ri.

Yesuq, Mingkân É Maubó

¹² Yesuq gi, shiwa byu pé lé dum nyo é hkûn, "Ngò gi, mingkân é maubó nghut lhê; Ngá htang châng é sù ó yuq nghut kôle, mauchut hkaú má hkâ-nhám le so rá a nghut, asak maubó lé wó rá nghut lhê." ga taí ri.

¹³ Haú mù, haú Hparishe pé gi, "Wú aq, Náng gung Nang saksé hkâm yu é nghut ri; Náng é saksé gi, teng rá a nghut." ga taí akô.

¹⁴ Haú hkûn, Yesuq gi, "Ngá gung Ngò saksé hkám kôlhang, Ngá é saksé gi, têng lhê; hkâsu mù gâ le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri. ¹⁵ Nungmoq gi, byù hkyam dông za jéyáng akô; Ngò gi, ó yuq lé le a jéyáng é nghut lhê. ¹⁶ Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu mù gâ le, Ngò gi, Ngò baú a nghut, haú Ngo lé nhang kat é sù Íwa eq rahá nghut nyi lhê. ¹⁷ Haú nungmoq é tarâ má yhang le, í yuq mai hkâm é saksé gi, têng lhê ga kê tô ri. ¹⁸ Ngò gi, Ngá é matú saksé hkâm yù sù nghut lhê; hau htoq agó, haú Ngo lé nhang kat é sù Íwa le, Ngá é matú saksé hkám byí é nghut lhê." ga tú taí ri.

¹⁹ Haú mù, yhangmoq gi, Yhang lé, "Náng Wa gi, hkâmá lhú?" ga myi kôjáng, Yhang gi, "Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kô é nghut le gi, Ngá Wa lé le, sé kó rá nghut lhê." ga tú taí ri. ²⁰ Dang haú pé gi, haú noqkuq yhùm wàng hkaú má é alu kat jang nâm má, Yhang mhoqshit nyi é u lé taí é dang nghut ri. Nghut kôlhang, Yhang lé, ó yuq le a chyup

kó; hkâsu mù gà le, Yhâng é ahkýing a jé shi é yanmai nghut ri.

²¹ Haû mù luí, Yesuq gi, yhangmoq lé, "Ngò gi, ló byuq rá nghut lhê, haû hkûn, nungmoq Ngo lé hô kó râ, yhumsing é mara má le shi kó râ nghut lhê. Ngò ló é jang má, nungmoq wó jé kó râ a nghut." ga, radàm dum puq taí ri.

²² Hau é yanmai, haû Yudaq byu pé gi, "'Ngò ló é jang má, nungmoq wó jé kó râ a nghut.' gà é gi, Yhânggùng yhang sat shi rá gà é nghut lhê lú?" ga myi bum akò.

²³ Nghut kôhang, Yesuq xoq taí é gi, "Nungmoq gi, a-ô mai lo é bang nghut akò; Ngò gi, ahtoq mai lé é sú nghut lhê. Nungmoq gi, mingkan shi eq sêng é bang nghut akò; Ngò kúm gi, mingkan shi eq sêng é sú a nghut. ²⁴ Haû mù, nungmoq gi, yhumsing é mara má shi kó râ nghut lhê nghû, Ngò taí é nghut lhê. Ngò gi, haû Yuq nghut lhê nghû taí é lé, nungmoq a lumjúng kô é nghut jáng, nungmoq gi, gè gè yhang, yhumsing é mara má shi kó râ nghut lhê." gà ri.

²⁵ Haû hkûn, yhangmoq gi, "Nàng, ó yuq nghut lhê?" ga myi kôjáng, Yesuq gi, "Ngò ó yuq nghut é lé, Ngò, hkâ-nhám le taí nyi bê nghut lhê. ²⁶ Ngò gi, nungmoq eq séng luí, taí rá hkyô eq jéyáng rá hkyô, myo myo joq lhê. Nghut kôhang, Ngo lé nhang kat é Sû gi, tengmán é Sû nghut lhê mù, Yhâng chyáng mai wó gyô yu é gû lé, Ngò, mingkan lé taí kyô lhê." ga tû taí ri.

²⁷ Yesuq gi, yhangmoq lé, Yhâng Wa eq séng é hkyô taí kyô nyi é lé, yhangmoq gi, a sê gyo kó nghut ri.

²⁸ Haû mù luí, Yesuq gi, "Haû Byu Yhangzo lé nungmoq tu shap* kat é hkûn sheq, Ngò gi, haû Yuq nghut é hkyô lé le, yhumsing myit đông hai le a kut e za, haû Íwa mhoq byí é đông za taí é hkyô lé le, nungmoq

sé kó râ nghut lhê. ²⁹ Haû Ngo lé nhang kat é Sû gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô chyat kut é yanmai, Yhang gi, Ngo lé baú za a tô pyâm to nghut ri." ga taí ri. ³⁰ Yhang, haû su taí nyi é u lé lhang, byù myo myo gi, Yhang lé lumjúng búm bekò nghut ri.

Abraham É Awut Ashín Pê Hkyô

³¹ Haû mù, Yesuq gi, Yhang lé lumjúng é Yudaq byu pé lé, "Ngò mhoqshit é hkyô lé châng kut nyi bekò nghut jáng, nungmoq gi, gè gè yhang, Ngá é chángzo pé nghut bekò. ³² Nungmoq gi, haû tengmán hkyô lé sé kó râ nghut luí, haû tengmán hkyô gi, nungmoq lé lhoq lhut kat rá nghut lhê." ga taí ri.

³³ Haû hkûn, yhangmoq gi, "Ngamoq gi, Abraham é awut ashín pé nghut luí, ó yuq é jùn le hkâ-nhám a dut wú é nghut lhê. Haû mù, 'nungmoq lé lhoq lhut kat rá' nghû Nàng hkâsu kut wó taí lhê lú?" ga tû taí akò.

³⁴ Yesuq dum tû taí é gi, "Ngò, nungmoq lé teng za taí kôlé, mara kut shut é sù gi, mará é jùn nghut lhê. ³⁵ Jùn gi, yhùm ikun eq hkâ-nhám le séng nyi rá a nghut; zo kúm gi, ikun eq ahtum abyuq séng lhê.

³⁶ Haû mù luí, haû Zo gi, nungmoq lé lhoq lhut kat é nghut jáng, nungmoq gi, gè gè yhang, lut berá nghut lhê. ³⁷ Nungmoq gi, Abraham é awut ashín pé nghut é lé, Ngò sê lhê. Nghut kôhang, nungmoq gi, Ngá é dang lé a lhom yù kô é yanmai, Ngo lé sat rá dâ akò nghut ri.

³⁸ Ngò gi, Ngá Wâ chyáng mai myang yu é eq rajung za, nungmoq lé taí kyô nyi lhê; nungmoq le, nungmoq é íwa chyáng mai wó gyô yu é eq rajung za kut nyi akò nghut ri." gà ri.

³⁹ Haû hkûn, yhangmoq gi, "Ngamoq é íwa gi, Abraham nghut lhê."

* **8:28** Tu shap gà é lichyúm gi, tapzúng htoq má jén sat pyám rá gà é nghut lhê.

ga tũ taí kôjáng, Yesuq gi, "Nungmoq, Abraham é yhangzô pé nghut é nghut le gi, Abraham kut é su kut kó rá nghut lhê. ⁴⁰ Nghut kôlhang, nungmoq gi, haũ Garai Gasâng chyáng mai wó gyô yu é tengmán hkyô lé taí kyo sũ nghut é Ngo lé, sat pyám nau akô nghut ri. Haũ sũ é hkyô gi, Abraham a kut é nghut lhê. ⁴¹ Nungmoq gi, nungmoq é íwa kut é muzó lé yhang, kut nyi akô." ga taí ri.

Haũ hkũn, yhangmoq gi, "Nungmoq gi, dezo amyũ a nghut; nungmoq gi, Íwa rayuq za wó lhê; haũ gi, Garai Gasang nghut lhê." ga taí he akô nghut ri.

Zô Wui É A-kyang Gi, Mó Ó Nghut É Hkyô Shit

⁴² Yesuq gi, yhangmoq lé, "Garai Gasang gi, nungmoq é Íwa nghut é nghut jáng, nungmoq gi, Ngo lé chyitdap kó rá nghut lhê; hkâsu mù gâ le, Ngò gi, Garai Gasâng chyáng mai lé jé luí, ahkuí, shí má nyi tô é nghut lhê. Ngò gi, Ngá myit dông lé lo é a nghut, Yhang sheq Ngo lé nhang kat é ru nghut lhê. ⁴³ Nungmoq gi, haĩ mù Ngá é dang lé a sê gyo kô é lhú gâ le, Ngò taí é dang lé, nungmoq a wó lhom yũ kô é yanmai nghut ri. ⁴⁴ Nungmoq gi, haũ nungmoq é íwa nghut é nat Tsadán eq sêng é bang nghut luí, nungmoq é íwa ô nau é hkyô lé kut nau bum akô. Yhang gi, anham sâng-hi mai byũ sat sũ nghut ri. Yhang má tengmán hkyô a bo é yanmai, yhang gi, haũ tengmán hkyô má a yap gíng nyi nghut ri. Yhang gi, mhaũ é hkũn, yhang é myit má bo é dông taí ri; hkâsu mù gâ le, Yhang gi, byũ mhaũ nghut luí, mhaũ hkyô pé é íwa nghut ri. ⁴⁵ Haũ su mù, Ngò, nungmoq lé, haũ tengmán hkyô taí kyô é yanmai, nungmoq gi, Ngo lé a lumjáng kó nghut ri. ⁴⁶ Nungmoq má é ó yuq wá, Ngo lé mara bo lhê nghũ saksé

wó tũn shit akô lhú? Ngò gi, haũ tengmán hkyô lé taí nyi é nghut le nhĩng, nungmoq, Ngo lé haĩ mù a lumjáng kô é lhú? ⁴⁷ Garai Gasang eq sêng é sũ gi, Garai Gasang taí é dang lé gyô lhê. Nungmoq a gyo kô é gi, nungmoq, Garai Gasang eq a sêng kô é yanmai nghut ri." ga taí ri.

Yesuq Eq Abraham

⁴⁸ Haũ hkũn, haũ Yudaq byu pé gi, Yhang lé, "Nàng gi, Samariq byũ nghut é htoq agó, nat gang wang júng to sũ nghut lhê nghũ, ngamoq taí é dang gi, jô lhê a nghut lhú?" ga myí akô.

⁴⁹ Yesuq gi, "Ngò gi, nat gang wang júng é hui sũ a nghut; Ngò gi, Ngá Wa lé sheq hkunggâ é ru nghut lhê; nungmoq kúm gi, Ngo lé taí hpoĩ nyi akô nghut ri. ⁵⁰ Ngò gi, Ngá é matú aróng ho nyi é a nghut; nghut kôlhang, hô byi Sũ rayuq nyi lhê, haũ yuq jéyáng sháng gaq. ⁵¹ Ngò, nungmoq lé teng za taí kôlé, Ngá dang lé châng é sũ gi, hkânhám le, shí rá a nghut." ga taí ri.

⁵² Haũ é yanmai, haũ Yudaq byu pé gi, "Nàng gi, nat gang wang júng to sũ nghut é lé, ahkuí, ngamoq sé bê! Abraham gi, shi byuq bê; haũ myiqhtoĩ pé le, shi byuq bekô nghut ri; nghut kôlhang, Nàng gi, 'Ngá dang lé châng é sũ gi, hkânhám le, shí rá a nghut.' ga taí ri. ⁵³ Nàng gi, ngamoq é íwa Abraham htoq hkik lhê lhú? Yhang gi, shi byuq bê; haũ myiqhtoĩ pé le, shi byuq bekô nghut ri. Nàng gũng nàng ó yuq su ngàm lhê lhú?" ga taí akô.

⁵⁴ Yesuq gi, "Ngá gũng Ngò lhoq gyaũ yu é nghut jáng, Ngá é aróng gi, haĩ hpaudap é a nghut; nghut kôlhang, haũ nungmoq é Garai Gasang nghut lhê ga nungmoq taí é sũ, Ngá Wa gi, Ngo lé lhoq gyaũ é sũ ru nghut lhê. ⁵⁵ Nungmoq gi, Yhang lé a sé kó nghut ri; nghut kôlhang, Ngò gi, sê lhê. Yhang lé a sé nghũ Ngò taí é ru nghut le gi,

Ngò le nungmoq su byù mhaú dut rã nghut lhê; nghut kôlhang, Ngò gi, Yhang lé sé luí, Yhâng é dang giog sù nghut lhê. ⁵⁶ Nungmoq é iwa Abraham gi, Ngo lé rã buinyi lé myoqbyu gabú nyi é nghut luí, myàng mù, gabú bê nghut ri." ga tũ taí ri.

⁵⁷ Haú hkún, haú Yudaq byu pé gi, Yhang lé, "Nàng gi, asak ngo xê zàn lhang a nghut shí é nhing, Abraham lé myàng wú é nghut lhê lú?" ga taí akô.

⁵⁸ Yesuq gi, "Ngò, nungmoq lé teng za taí kôlé, Abraham lhang a hkú shi má, Ngò nyi gù bê nghut lhê."* ga tũ taí ri.† ⁵⁹ Haú mù luí, yhangmoq gi, Yesuq lé, dú rã ga luqgok kui yu akô; nghut kôlhang, Yesuq gi, haú noqkuq yhúm mai haq htoq ló byuq bê nghut ri.

9

Myoqjit Sù Lé Lhoq Gê Byi É Hkyô

¹ Yesuq gi, sô yông ló nyi é u lé, hku lé é mai myoqjit to gù nghut é byù rayuq lé myang ri. ² Haú hkún, Yhâng é chángzô pé gi, Yhang lé, "Rabai é, shí yuq, myoqjit gù hku lé é gi, ó yuq kut shut é yubak é yanmai nghut lhê lú? Yhang kut shut é lú? A nghut jáng, yhâng nu yhâng wa kut shut é lú?" ga myí akô.

³ Yesuq tũ taí é gi, "Haú gi, yhang kut shut é yanmai le a nghut, yhâng nu yhâng wa kut shut é yanmai le a nghut; haú Garai Gasâng é muzó lé, yhang má wó lhoq htoq shit rã matú, haú dut é ru nghut lhê. ⁴ Nghanhúng gi, haú Ngo lé nhang kat Su é muzó lé, nyí nghut tô ashí hkún, zui saí nyi ra rã dut lhê; myín jé jáng gi, ó yuq le, mù wó zui saí rã a nghut. ⁵ Ngò gi, mingkan htoq má nyi tô é u lé, mingkân é maubó nghut lhê." gá ri.

⁶ Yhang gi, haú su ga taí luí, myigùng má sôkan byé hkyó mù, tse-nyhaq saí yù luí, haú yuq é myoqjí má but byi ri. ⁷ Hau htâng, haú yuq lé, "Haú Siloam wuihtum má é chí pyám aq." ga taí ri. (Siloam gá é gi, nhang é gá é lichyúm nghut lhê.). Haú mù, haú yuq gi, é chí mù, myoq myàng luí, yhúm shut ló bê nghut ri.

⁸ Haú yhâng é yhumkyo bang eq yhang dung zô wún é lé myang wú é bang gi, "Shí yuq gi, haú zung to mù, dung zo zo lhaq kut é sù, a nghut kó lú?" ga myí bum akô. ⁹ Ra-am gi, "Haú yuq nghut lhê." gá bum akô.

Góbang gi, "A nghut, haú yuq su dut e za ru nghut lhê." ga taí akô.

Nghut kôlhang, yhang gi, "Ngò, haú yuq yhang nghut lhê." ga taí ri.

¹⁰ Haú hkún, yhangmoq gi, "Haú nghut le gi, náng myoq hkâsu kut wó myang é lú?" ga myí akô.

¹¹ Yhang gi, "Haú Yesuq gá é byù rayuq, tse-nyhaq ratsuí saí yù luí, ngá é myoqjí má but byi mù, 'Siloam wuihtum má é chí pyám aq.' ga ngo lé taí ri; haú mù, ngò é chí pyám é htâng má, ngá myoq wó myang é nghut lhê." ga tũ taí ri.

¹² Haú hkún, yhangmoq gi, "Byù haú yuq gi, hkâmá nyi ri lú?" ga, yhang lé myí akô.

Yhang gi, "Ngò a sé." ga taí ri.

Myoq Dum Myang Byuq É Hkyô Lé, Hparishe Pé Gôn Wú É Hkyô

¹³ Yhangmoq gi, haú myoqjit wú bê sù lé, Hparishe pé chyáng shuí lé akô. ¹⁴ Yesuq, tse-nyhaq saí yù mù, haú yuq é myoq lé lhoq myâng byí é buinyi gi, Bánno buinyi nghut ri. ¹⁵ Haú mù, yhang, myoq hkâsu kut wó myang é hkyô lé, haú Hparishe pé le dum myí akô. Haú jáng, yhang gi, "Haú yuq gi, ngá é myoqjí má tse-nyhaq but byi mù, ngò gi, é chí pyám jáng, ngá myoq myàng bê nghut lhê." ga tũ taí ri.

* 8:58 Htoq Ló 3:14 † 8:58 Bun zo shí má, Yesuq gi, Yhânggùng yhang Garai Gasang nghut lhê gá nyi nghut ri.

¹⁶ Haù Hparishe pé ra-am gi, "Shí yuq gi, Bánno buinyi é tarâ lé a châng é sù nghut é yanmai, Garai Gasâng chyâng mai lé é sù a nghut." ga taí akô.

Nghut kôhang, ra-am gi, "Yubak dap sù rayuq gi, haù su é limik kumlhá pé lé, hkâsu wó kut htoq râ lú?" ga myí akô. Haù mù, yhangmoq gi, myit a huí lhum bùm lò kó nghut ri.

¹⁷ Haù mù, yhangmoq gi, haù myoqjit wú sù shut lhung mù, "Nang lé myoq lhoq myâng byí é sù gi, hkasú é byù nghut lhê nghú, nàng taí râ lú?" ga dum myí kôjáng, "Yhang gi, myiqhtoi rayuq nghut ri." ga, yhang tú taí ri.

¹⁸ Haù Yudaq byu pé gi, haù yuq myoqjit wú é hkyô lé le, ahkuí myoq dum myàng bê nghut é hkyô lé le, haù yhang nu eq yhang wa lé, é jì lò nhang é hkùn jé shoq, a lumjing kó nghut ri. ¹⁹ Haù mù, Yhangmoq gi, haù yhang nu eq yhang wa lé, "Shí yuq gi, nungnhik é yhangzo nghut lhê lú? Hku lé é hkùn mai, myoqjit gù nghut lhê lú? Yhang, ahkuí, hkâsu kut wó myang é lú?" ga myí akô.

²⁰ Haù hkùn, yhang nu eq yhang wâ nhik gi, "Yhang gi, ngá-nhik é yhangzo nghut é lé le, hku lé é hkùn mai myoqjit gù nghut é lé le, ngá-nhik sê lhê. ²¹ Nghut kôhang, yhang, ahkuí hkâsu kut wó myang é hkyô lé le, yhang é myoq lé ó yuq èq lhoq myâng byí é hkyô lé le, ngá-nhik a sé. Yhang, asak wáng bê, yhang lé myí wú keq, yhanggùng yhang dat taí kyo râ nghut lhê." ga tú taí akô. ²² Haù yhang nu eq yhang wâ nhik gi, Yudaq byu pé lé gyuq kô é yanmai, haù su ga taí kô é nghut ri; hkâsu mù gâ le, Yesuq gi, haù Hkrisduq nghut lhê ga yín yu é sù, ó yuq lé nghut kôle, haù tarajong mai lhoq htoq pyám râ nghut lhê ga, haù Yudaq suwún wú chòm myit hpyit to bekô nghut é yanmai

nghut ri. ²³ Haù é yanmai, yhang nu eq yhang wâ nhik gi, "Yhang, asak wáng bê, yhang lé myí wú keq." ga taí kô é nghut ri.

²⁴ Haù Hparishe pé gi, myoqjit wú bê sù haù yuq lé dum ji yù mù, "Garai Gasang lé za hkya-on waq toq aq! Haù yuq gi, yubak dap sù rayuq nghut é lé ngamoq sê lhê." ga taí akô.

²⁵ Haù hkùn, yhang tú taí é gi, "Yhang gi, yubak dap sù rayuq nghut lhê luq, a nghut é luq, ngò a sé. Ngò gi, hí lé myoqjit sù nghut kôle, ahkuí wó myâng bê nghut é lé za, ngò ru sê lhê." gâ ri.

²⁶ Haù htâng, yhangmoq gi, "Yhang, nang lé hái kut byí ri lú? Náng é myoq lé, yhang, hkâsu kut lhoq myâng byí ri lú?" ga, yhang lé myí akô.

²⁷ Haù hkùn, yhang gi, "Ahkuí za, ngò, nungmoq lé taí kyo bê le, nungmoq sheq a gyo kôluí nhing! Nungmoq gi, hái mù dum gyô nau akô lú? Nungmoq le, Yhang é chángzô pé dut nau akô lú?" ga taú myí ri.

²⁸ Haù mù, yhangmoq gi, yhang lé gyaí rhoi é dông mai, "Nàng gi, haù yuq é chángzo nghut ri-nhung! Ngamoq kúm gi, Mosheq é chángzô pé ru nghut lhê! ²⁹ Garai Gasang gi, Mosheq lé dáng nyo é hkyô lé, ngamoq sê lhê; nghut kôhang, haù yuq eq séng luí, Yhang gi, hkâmai lé é sù nghut é lé lhang, ngamoq a sé." ga taí akô.

³⁰ Haù hkùn, haù yuq gi, "Yhang, ngo lé myoq wó lhoq myang byí kôhang, Yhang gi, hkâmai lé é sù nghut é lé, nungmoq a sé kô é gi, mauhpo yhang nghut bê! ³¹ Garai Gasang gi, yubak dap bâng é dang lé a gyo byí é hkyô lé, nga-nhung sê lhê. Garai Gasang gi, Yhang lé noqkuq luí, Yhang ô nau é hkyô lé, kut é sù é dang lé kúm gyo byí lhê. ³² Hku lé é hkùn mai myoqjit gù nghut é byù lé, ó yuq èq myoq lhoq

myàng byí é gâ é hkyô lé, mingkan lé joq é hkûn mai, ó yuq le a wó gyo wú é nghut lhê. ³³ Haú yuq gi, Garaí Gasâng chyáng mai lé é sú za a nghut le gi, haí le wó kut râ a nghut." ga tû taí ri.

³⁴ Haú su ga jáng, yhangmoq gi, "Nàng gi, yubak htui má hku lé é sú nghut to luí nhing, ngamoq lé wám mhoqshit lhê lú?" ga tû taí kôluí, yhang lé hkat htoq pyâm akô nghut ri.

Woi-nyí Má Myoqjit É Hkyô

³⁵ Yesuq gi, haú yuq lé yhangmoq hkat htoq pyâm é hkyô lé wó gyo luí, yhang lé myàng hui jáng, "Nàng gi, haú Byu Yhangzo lé lumjینگ lhê lú?" ga myí ri.

³⁶ Haú hkûn, haú yuq gi, "Yhumsing ê, haú gi, ó yuq nghut lhê lú? Yhang lé, ngò wó lumjینگ sháng gaq, taí kyo laq." ga myí ri.

³⁷ Yesuq gi, "Nàng, haú yuq lé myàng wú bê nghut lhê; ahkuí, nàng eq dáng nyo nyi é sú gi, haú yuq yhang nghut lhê." ga taí ri.

³⁸ Haú mù, haú yuq gi, "Yhumsing ê, ngò lumjینگ lhê!" ga taí luí, Yhang lé noqkuq ri.

³⁹ Haú hkûn, Yesuq gi, "Haú myoqjit bang myoq myàng kó râ hkyô eq myoq myàng bang myoqjit kó râ hkyô lé, tarâ jéyáng râ matú, mingkan shí má Ngò jé lé é nghut lhê." ga taí ri.

⁴⁰ Yhang eq rahá nghut nyi é Hparishe pé ra-am gi, Yhang haú su ga taí é lé wó gyo kôjáng, "Hkâsu htâ? Ngamoq gi, myoqjit bang dut bê lú?" ga myí akô.

⁴¹ Haú hkûn, Yesuq gi, "Nungmoq, myoqjit é bang ru nghut le gi, yubak mara a bò kó râ nghut lhê; nghut kôlhang, ahkuí, nungmoq gi, myoq myàng bang nghut lhê ga kô é yanmai, nungmoq má yubak mara bo ashí kó nghut ri.

10

Sau Zúng Sû Eq Sau Hpúng

¹ Ngò, nungmoq lé teng za taí kôlé, haú sau hkup má, hkúmdong mai a wang e za, gó hkyô dong doq lut wang é sú gi, hkau sú eq damyaq nghut ri. ² Haú hkúmdong mai wang é sú kúm gi, sau zúng sú nghut ri. ³ Haú hkum hpóng byí é htoq agó, haú sau pé gi, yhang é htê lé gyo byí akô. Yhang gi, yhang é sau pé lé, mying lang luí wut yù mù, yhangmoq lé shuí htoq htoq kut nyi ri. ⁴ Yhang é sau pé banshoq lé hpông htoq yù mù, yhang gi, hí má sô ri; sau pé gi, yhang é htê lé sê gyo kô é yanmai, yhang é htàng má châng akô nghut ri. ⁵ Nghut kôlhang, yhangmoq gi, byù bíng é htàng má, hkâ-nhám lhang cháng kó râ a nghut e za, yhang chyáng mai kúm hpang byuq kó râ nghut lhê; hkâsu mù gâ le, haú byù bíng é htê lé, yhangmoq a sê gyo kô é yanmai nghut ri." ga taí ri. ⁶ Yesuq gi, dangtú haú lé yù mù, yhangmoq lé taí kyô ri; nghut kôlhang, yhangmoq gi, Yhang haí taí kyô nyi é lé, a sê gyo kó nghut ri.

⁷ Haú mù, Yesuq dum taí é gi, "Ngò, nungmoq lé teng za taí kôlé, Ngò gi, haú sau pé wang é hkúmdong nghut lhê. ⁸ Ngá é hí má lé é lhunglhang bang gi, hkau bang eq damyaq pé nghut akô; haú sau pé kúm gi, yhangmoq é dang lé a lhom gyo byi kó nghut ri. ⁹ Ngò gi, hkúmdong nghut lhê; Ngò mai wang é sú ó yuq nghut kôlé, hkyi yu é hui râ nghut lhê. Haú yuq gi, htoq htoq wàng wàng wó kut râ eq mhan-yô myang hô râ nghut lhê. ¹⁰ Haú hkau sú gi, hkau râ, sat râ eq lhoq htên pyâm râ matú, lé e za nghut lhê. Ngo lé é gi, yhangmoq, asak wó yù râ eq byingup é asak lé wó yù râ matú sheq nghut lhê.

¹¹ Ngò gi, ge é sau zúng sú nghut lhê; haú ge é sau zúng sú gi, sau

pê é matú, yhumsing é asak lé ap byi pyâm é nghut lhê. ¹² Haú langchyang kut sù gi, sau pé lé sing é sau zúng sù a nghut; haú mù, yhang gi, haú wamhkui lé lo é lé myàng jáng, saú pé lé pyâm to mù hpang ló byuq râ nghut lhê; haú hkûn, wamhkui gi, sau hpúng lé é htim luí, lhoq pyo pyám râ nghut lhê. ¹³ Yhang gi, langchyang hpó nghut luí, haú sau pé é matú haí le a myit chiq byí é yanmai, hpang é nghut ri.

¹⁴ Ngò gi, haú ge é sau zúng sù nghut lhê; haú Íwa gi, Ngo lé sê é nghut luí, Ngò le, haú Íwa lé sê é eq rajung za, ¹⁵ Ngá é sau pé lé, Ngò sê lhê; Ngá é sau pé le, Ngo lé sê akò nghut ri; Ngò gi, haú sau pé é matú, yhumsing é asak lé ap byi pyâm é nghut lhê. ¹⁶ Ngò gi, sau hkup shí mã é a nghut é gotú sau pé wó ashí; sau haú pé lé le, Ngò, shuí yù ra râ nghut lhê; sau haú pé le, Ngá é htê lé gyo kó râ nghut lhê; haú hkûn, sau hpúng rahpúng za dut luí, sau zúng sù le rayuq za, nghut râ nghut lhê. ¹⁷ Ngò gi, Ngá é asak lé dum wó taú yù sháng gaq nghú, yhumsing é asak lé ap byi pyâm é yanmai, Ngá Wa gi, Ngo lé chyitdap é nghut lhê. ¹⁸ Ngá é asak lé, ó yuq èq le wó yu pyâm é a nghut, Ngá é myit dông byi pyâm é ru nghut lhê. Ngò gi, yhumsing asak lé ap byi pyâm râ ahko ahkáng eq haú lé dum taú yù râ ahko ahkáng wó sù nghut lhê. Haú gi, Ngá Wá chyang mai Ngò wó yu é hkunmó nghut lhê." gâ ri.

¹⁹ Dang haú pé é yanmai, haú Yudaq byu pé gi, myit a huí lhum dum dut byuq bekò nghut ri. ²⁰ Haú mã é bang myo myo gi, "Yhang gi, nat gang wang júng to luí, nâ byuq bê nghut ri. Yhâng é dang lé, haí mù gyô nyi akò lú?" ga tai bum akò.

²¹ Nghut kôhang, góbang gi,

"Dang shi pé gi, nat gang wang júng tô é byù taí é dang a nghut. Nat gang gi, myoqjít sù lé, myoq wó lhoq myâng nhâng râ lú?" ga tai bum akò nghut ri.

Yudaq Byu Pé A Lumjúng Kô É Hkyô

²² Yerusalem wà mó má, Ap Nóng Poi* jé bê nghut ri. Haú gi, gy-oqmyò nám nghut ri. ²³ Haú hkûn, Yesuq gi, haú noqkuq yhùm wàng mã é, Sholumon é Jirop mã sô yông wún ri. ²⁴ Haú u lé, haú Yudaq byu pé gi, Yhâng é lhínghkyuq má lé zing bùm kômù, "Nàng gi, ngamoq lé hkâ-myháng jé shoq úng-áng nhang nyi râ lú? Nàng, Hkrisduq nghut le gi, ngamoq lé san za tai kyô pyám laq." ga tai akò.

²⁵ Yesuq gi, "Ngò, nungmoq lé tai kyo bê nghut lhê; nghut kôhang, nungmoq a lumjúng kó nghut ri. Ngá Wá é mying mai, Ngò kut é lak-lai kumlhá haú pé gi, Ngá é matú saksé hkám byi nyi ri. ²⁶ Nghut kôhang, nungmoq gi, Ngá é sau a nghut kô é yanmai, a lumjúng kó nghut ri. ²⁷ Ngá é sau pé gi, Ngá é htê lé dat gyô akò; Ngò gi, yhangmoq lé sê lhê; yhangmoq le, Ngá htâng châng akò nghut ri. ²⁸ Ngò gi, yhangmoq lé, ahtum abyuq é asak byi é nghut mù, yhangmoq gi, hkâ-nhám le htên byoq kó râ a nghut; ó yuq èq le, yhangmoq lé, Ngá é loq mai wó lú yù râ a nghut. ²⁹ Yhangmoq lé, Ngá é loq mã ap byi tô é sù, haú Ngá Wa gi, lhunglhâng htoq má je gyaú Sù nghut lhê; ó yuq èq le, yhangmoq lé, Ngá Wá é loq mai wó lú yù râ a nghut. ³⁰ Ngò eq haú Íwa gi, rayuq za nghut lhê." ga tú tai ri.

³¹ Haú hkûn, haú Yudaq byu pé gi, Yesuq lé, dú râ matú luqgok dum kui akò. ³² Nghut kôhang, Yesuq gi, yhangmoq lé, "Haú Íwá chyang mã

* 10:16 Esai 56:8 * 10:22 Ap Nóng Poi gâ é gi, Garai Gasâng é yhùm lé ap nóng lé ga lhê.

é laklai kumhá mó pé myo myo, Ngò, nungmoq lé tûn shit bê nghut lhê. Nungmoq, Ngo lé dú râ gi, hká lhûm é yanmai nghut akô lhú?" ga myí ri.

³³ Haú Yudaq byu pé gi, "Ng-amog, Nang lé dú râ gi, haú pé hká lhûm é yanmai le a nghut; Nang gi, byù rayuq nghut to luí, Garai Gasang nghut é đông táí whuí luí, Yhang lé rhoi dang táí é yanmai, dú râ nghú lhê." ga tû táí akô.

³⁴ Haú hkûn, Yesuq gi, yhangmoq lé, "Nungmoq gi, garaí pé nghut akô nghú, Ngò táí bê nghut lhê.* ga nungmoq é tarâ má kê to lhê a nghut kó lhú? ³⁵ Chyúmdang haú lé gi, a ge lhoq hpyoq pyâm é nghut luí, haú Garai Gasâng é mungdang lé wó yu é bang lé, 'garaí pé' gâ é nghut le gi, ³⁶ haú Íwa mai, Yhang é matú hkyin htoq yû luí, mingkan má nhang é Sû eq séng luí gi, hká đông nghú kó râ lhú? 'Ngò gi, Garai Gasâng é Yhangzo nghut lhê.' nghú táí é yanmai, Ngò gi, Garai Gasang lé táí hpoí ri nghú, nungmoq, haú mù Ngo lé mara hûn akô lhú? ³⁷ Ngá Wâ é muzó pé lé, Ngò kut é a nghut jáng, Ngo lé hkâlumjîng kó. ³⁸ Nghut kôhang, Ngò, haú pé lé kut é nghut le gi, nungmoq, Ngo lé a lumjîng kôhang, haú muzó pé lé lumjîng keq; haú hkûn, haú Íwa gi, Ngò má nghut nyi é hkyô lé le, Ngò gi, haú Íwa má nghut nyi é hkyô lé le, nungmoq wó sé luí, sê gyo kó râ nghut lhê." ga tû táí ri. ³⁹ Yhangmoq gi, Yhang lé chyup râ dum hen akô; nghut kôhang, Yhang gi, yhangmoq é loq mai wó lut ló bê nghut ri.

⁴⁰ Hau htâng, Yesuq gi, haú Yodan làng he hpoq mâ é, Yohan, wui-myhup hkám byí hi é jowò má ló jé ri. Haú má, Yhang nyi nyi é nghut luí, ⁴¹ byù myo myo gi, Yhâng

chyáng lé jé bum akô. Yhangmoq gi, "Yohan gi, limik kumhá a kut wú é nghut kôhang, shí yuq eq séng luí, Yohan táí é hkyô lunglhang gi, têng ri." ga táí bum akô. ⁴² Haú jowò má, byù myo myo gi, Yesuq lé lumjîng bùm bekô nghut ri.

11

Lazaruq Shi Byuq É Hkyô

¹ Ahkuí, Lazaruq gâ é byù rayuq gi, no nyi ri. Yhang gi, haú Mariq eq yhângnhá Mahtaq nhik nyi é Beh-tani wâ mâ é sù nghut lhê. ² Mariq haú gi, Yhumsîng lé namngón-xú hut gyun luí, hkyí má yhâng xam eq sùt byí é sù nghut ri; yhang gi, haú no nyi é Lazaruq é yhângnhá nghut ri. ³ Haú mù, haú yhângnhá nhik gi, "Yhumsîng ê, Nang chyitdap é sù gi, no nyi ri." ga, Yesuq chyáng é táí nhang akô.

⁴ Yesuq gi, dang haú lé wó gyo jáng, "Nòhpyo haú gi, shí-nò a nghut. Haú Garai Gasâng é Yhangzo gi, hau é yanmai, hpungwup shîngkang wó dan hú é hui sháng gaq ga, Garai Gasâng é hpungwup shîngkang é matú dut é ru nghut lhê. ⁵ Yesuq gi, Mahtaq eq yhanggu Mariq lé le, Lazaruq lé le, chyitdap ri. ⁶ Haú su mù, Yhang gi, haú Lazaruq no nyi ri gâ é lé, wó gyô é hkûn, haú Yhang nyi é jowò má, í nyi nyi tô ashí nghut ri.

⁷ Hau htâng, Yhang gi, Yhâng é chángzô pé lé, "Nga-nhúng gi, Yuda mau shut dum taù ló sháng." ga táí ri.

⁸ Haú hkûn, yhangmoq gi, "Rabai ê, hkû-yoq za, haú Yudaq byu pé, Nang lé luggok eq dú sat râ da kô é nghut le nhîng, ahkuí, haú shut dum taù ló râ lhú?" ga Yhang lé myí akô.

⁹ Yesuq gi, "Nyí gi, hkyíng hkum raxe í hkum bo lhê a nghut kó lhú?*" Nyí má hkyô sô é sù gi, mingkan

* 10:34 Hkya-on 82:6 * 11:9 Nyí gi, hkyíng hkum raxe í hkum bo lhê a nghut kó lhú? gâ é gi, ahkyíng a jé shimá, muzó nô é gi, a ge é nghut lhê gâ é nghut ri.

shi é maubó é yanmai myoq myàng luí, lengbat rá a nghut. ¹⁰ Myín lé hkyô sô é sù kúm gi, maubó lé a wó é yanmai, lengbat lhê." ga tú taí ri.

¹¹ Haú su ga taí é htâng má, Yhang, yhangmoq lé xoq taí kyô é gi, "Nga-nhùng é luzúm Lazaruq yhup myhí byuq bê nghut ri; nghut kôlhang, Ngò gi, yhang lé ê nhaú toq rá nghut lhê." gâ ri.

¹² Haú hkûn, Yhâng é chángzô pé gi, "Yhumsing ê, yhang yhup myhí tô é nghut le gi, ge lò rá nghut lhê." gâ taí akô. ¹³ Yesuq gi, Lazaruq shi byuq bê hkyô lé taí é nghut ri; nghut kôlhang, Yhâng é chángzô pé gi, gè gè yhup myhí tô é lé taí é su ngam pyâm akô nghut ri.

¹⁴ Haú mù luí, Yesuq, yhangmoq lé san za jáng taí kyô é gi, "Lazaruq gi, shi byuq bê nghut lhê. ¹⁵ Ngò haú má a nyi záng é gi, nungmoq wó lumjing rá matú nghut luí, nungmoq é matú Ngò gabú byi ri; yhâng chyáng e ló sháng hkoi." gâ ri.

¹⁶ Haú mù, haú Zozúm le gâ é Htomaq gi, gotú chángzô pé lé, "Nga-nhúng le, Yhang eq rahá shí sháng gaq, châng e ló sháng." ga taí ri.

Haú Ê-nhâ Nhik Lé, Yesuq Nhik Tîng Ê Hkyô

¹⁷ Yesuq gi, jé e é hkûn, haú Lazaruq lé lup má kat pyâm é myi nyi nghut bê hkyô lé, lhom taí kyô akô. ¹⁸ Behtani wà gi, Yerusalem wà mó eq í dêng kô za wê lhùm ri. ¹⁹ Haú mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik tîng byi kó rá ga lé jé nyi bum akô nghut ri. ²⁰ Mahtaq gi, Yesuq jé lé lo é hkyô lé wó gyo jáng, htoq é mù, Yhang lé é huí ri; nghut kôlhang, Mariq gi, yhùm má nyi tô ri.

²¹ Mahtaq gi, Yesuq lé, "Yhumsing ê, Nang, shí má nyi tô é ru nghut le gi, ngá gu shi byuq

rá a nghut. ²² Nghut kôlhang, ahkuí le, Garai Gasâng chyáng Nang hái dung kôlhang, Yhang byi rá nghut é lé, ngò sê lhê." ga taí ri.

²³ Yesuq gi, yhang lé, "Nung gu, dum dui toq rá nghut lhê." ga taí ri.

²⁴ Haú hkûn, Mahtaq gi, "Haú jihtùm buinyi má dum dui toq é hkûn, yhang le dum dui toq rá nghut é lé, ngò sê lhê." ga tú taí ri.

²⁵ Haú hkûn, Yesuq gi, yhang lé, "Ngò gi, dum dui toq hkyô eq asak nghut lhê. Ngo lé lumjing é sù gi, shi byuq kôlhang, dum dui rá nghut lhê. ²⁶ Asak dui nyi luí, Ngo lé lumjing é sù ó yuq nghut kôle, hkâ-nhám le shi é huí rá a nghut. Nang gi, dang shí lé lumjing lhê lú?" ga taí ri.

²⁷ Haú hkûn, yhang gi, "Yhumsing ê, ngò lumjing lhê. Nang gi, haú mingkan má jé lé lô rá nghut é, Garai Gasâng é Yhangzo, Hkrisduq† nghut é lé, ngò lumjing lhê." ga, Yhang lé taí kyô ri.

²⁸ Yhang gi, haú su ga taí é htâng má, taú lò mù, yhanggu Mariq lé, tsik za wut yù luí, "Haú Sará jé tô ri; Yhang gi, nang lé myi nyi ri." ga taí kyô ri. ²⁹ Mariq gi, haú lé wó gyo jáng, hân za toq mù, Yesuq chyáng é bê nghut ri. ³⁰ Haú u lé, Yesuq gi, haú wà hkaú má a wang ló shí e za, Mahtaq eq huí é jowò má ru nyi tô ashí nghut ri. ³¹ Haú yhùm hkaú má, Mariq lé nhik tîng nyi é Yudaq byu pé gi, yhang hân za toq luí, htoq ló é lé myàng kôjáng, yhang, lup má ê ngáu rá dâ lhê abe ga, myit yù kômù, yhang htâng châng e ló bum akô nghut ri.

³² Mariq gi, Yesuq nyi tô é jang má jé mù, Yhang lé myàng jáng, Yhâng é hkyi wang má ngóm gop to luí, "Yhumsing ê, Nang, shí má nyi tô é ru nghut le gi, ngá gu shi byuq rá a nghut." ga taí ri.

³³ Yesuq gi, Mariq ngáu nyi é lé le, haú yhang eq rahá lé lo é Yudaq

† 11:27 Hkrisduq lé Mesaia le gâ lhê.

byu pé ngau nyi kô é lé le, myàng jáng, Yhâng é myit má gyai yhang hkâm zo wuí é eq myit wui myit hke dut nyi ri. ³⁴ Haú mù, Yhang gi, "Yhang lé, hkâmá tô tô akô lú?" ga myi jáng, yhangmoq gi, "Yhumsing ê, lé wú wú aq." ga tâi akô.

³⁵ Yesuq gi, ngau bê nghut ri.

³⁶ Haú mù, haú Yudaq byu pé gi, "Wú keq, Yhang gi, Lazaruq lé, haú-í yhang chyt ri-nhung!" ga tâi akô.

³⁷ Nghut kôhang, ra-am gi, "Haú myoqjit sù lé, myoq wó lhoq myàng byi é Sù gi, shí yuq lé le, a shí lo shoq a wó kut é lú?" ga tâi bum akô nghut ri.

Lazaruq Lé Lhoq Dui Toq É Hkyô

³⁸ Yesuq gi, Yhâng é myit má radàm dum gyai yhang hkâm zo wuí é eq, lup má lé jé ri. Lup haú gi, luqhkýung dong nghut lui, luqgok rachâm eq chi tô akô. ³⁹ Haú mù, Yhang gi, "Luqgok haú lé yu pyám keq." ga tâi ri.

Haú hkûn, haú shi byuq su é yhângnhá Mahtaq gi, "Yhumsing ê, yhang lé, haú má tô tô é nyi nyi lhang nghut bê yanmai, ahkuí gi, bup nàm berâ nghut lê." ga tâi ri.

⁴⁰ Haú mù, Yesuq gi, "Nàng, lumjìng é nghut le gi, haú Garai Gasàng é hpungwup shingkang lé, wó myàng rà nghut lê nghû, Ngò, nang lé tai kyô wú bê a nghut lú?" ga tâi ri.

⁴¹ Haú mù lui, yhangmoq gi, luqgok haú lé yu pyám akô. Hau htàng, Yesuq gi, mauhkûng shut tu wú lui, "Áwa ê, Nàng, Ngá é dang lé gyo byi é yanmai, Ngò, Nang lé jeju hkyaôn lê. ⁴² Nàng gi, hkâ-nhám le, Ngá é dang lé gyo byi nyi é lé, Ngò sê lê; nghut kôhang, Nàng, Ngo lé nhang kat é hkyô lé, shí má yap tô é bang lumjìng kó sháng gaq nghû, yhangmoq é matú, Ngò, isu nghû tai é nghut lê." ga tâi ri.

⁴³ Yhang gi, haú su ga tai lui, "Lazaruq ê, htoq lô aq." ga htê mó eq wut kat ri. ⁴⁴ Haú hkûn, haú shi byuq bê sù gi, yhâng é loq hkyi pé má pân eq htup yup to gú eq, yhâng é myoqdong má hpajet eq htup to gú htoq lo ri.

Haú mù, Yesuq gi, yhangmoq lé, "Yhang lé hpyi pyám byi mù, nhang kat keq." ga tâi ri.

Yesuq Lé Sat Pyám Râ Haq Dâ É Hkyô

Mht 26:1-5; Mrk 14:1-2; Luk 22:1-2

⁴⁵ Haú mù lui, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjìng bùm bekô nghut ri. ⁴⁶ Nghut kôhang, yhangmoq chyáng mâ é ra-am gi, haú Hparishe pé chyáng ló mù, Yesuq kut é hkyô lé, ló tai kyô akô. ⁴⁷ Haú mù, haú hkyangjong agyi pé eq Hparishe pé gi, Yudaq byin tú wapdoq[†] zuphpong lé ji tsing to mù, "Byù shí yuq gi, limik kumlhá myo myo kut shit nyi ri. Nga-nhung, hkâsu kut le gè rà lú?" ⁴⁸ Nga-nhung, Yhang lé haú su ru kut nyi nhang é nghut jáng, yuq hkingmó gi, Yhang lé lumjìng kó rà nghut lê; haú hkûn, Romaq byu pé gi, jé lé mù, nga-nhung é jowò eq nga-nhung é byuhú lé, lé lhoqhtên pyám kó rà nghut lê." ga tâi akô nghut ri.

⁴⁹ Haú hkûn, yhangmoq chyáng mâ é, haú zân má hkyangjong mó nghut nyi é sù, Kayahpaq gi, yhangmoq lé, "Nungmoq gi, haú lhang a sé kó nghut ri-nhung! ⁵⁰ Haú byuhú gón htên byoq byuq rà htoq má, byuhú hau é matú, byù rayuq shí hkâm byi le gi, nungmoq é matú je gè rà hkyô lé, nungmoq, a myit jé kó nghut ri." ga tâi kat ri.

⁵¹ Yhang haú su ga tai é gi, yhum-sing myit dong a nghut e za, haú zân má, yhang gi, hkyangjong mó

[†] 11:47 Yudaq byin tú wapdoq lé Grik dong gi, San-hedrin gà lê.

nghut é eq rajung za, haú Yudaq byuhú é matú, Yesuq shí hkám byi rá nghut é hkyô lé le, ⁵² byuhú hau é matú baú a nghut e za, haú byo myín tô é, Garai Gasâng é yhangzô pé lé, shuí tsíng yù mù, rading ralhum za dut nhâng rá matú, shí hkám byi rá nghut é hkyô lé le, myiqhtoi dang taí é ru nghut lhê. ⁵³ Haú nyí mai, yhangmoq gi, Yesuq lé sat rá matú chôm da bekô nghut ri.

⁵⁴ Hau é yanmai, Yesuq gi, Yudaq byu pé gyoro má, de de a sô shit wún e za, haú mai htoq luí, haú yoso eq chyâng lhúm é mau má é, Ehprim gá é wà má é mù, Yhâng é chángzô pé eq rahá nyi nyi ri.

⁵⁵ Haú Yudaq byu pé é Lhoqlhai Poí jé rá za nghut é hkún, byù myo myo gi, Lhoqlhai Poí a jé shi má, lhoq san lhoq yúng hk-íng dông yhumsing gùng lé lhoq sân-yúng yú rá matú, yosô wà pé mai, Yerusalem wà mó shut doq ló bum akô. ⁵⁶ Haú mù, yhangmoq gi, Yesuq lé ho nyi kô é nghut luí, haú noqkuq yhúm wàng má yap to uchyang, rayuq eq rayuq, "Nungmoq, hkâsu wó myit akô lhú? Yhang gi, Poí má a lé lô rá gâ lhê là?" ga myí lhúm bum akô. ⁵⁷ Nghut kôlhang, haú hkyangjong agyi pé eq Hparishe pé gi, Yesuq lé wó chyup yú rá matú, Yesuq hkâmá nyi é lé, sê é sù ó yuq nghut kôle, yhangmoq lé lo shit kyo rá lhê ga dangmó hkyó tô akô nghut ri.

12

Yesuq, Namngón-xú But Byi Huí É Hkyô

Mht 26:6-13; Mrk 14:3-9

¹ Haú Lhoqlhai Poí jé rá hkyuq nyi rá ashí hkún, Yesuq gi, Yhâng eq shi é mai lhoq dui toq yu é sù, Lazaruq nyi é Behtani wà má ló jé ri. ² Haú má, Yesuq lé hkunggâ é dông myinzang byi tsô akô; Mahtaq gi, zoshuq jaú ri; Lazaruq gi, haú

Yesuq eq rahá siboí má zô zung nyi bang má é rayuq nghut ri. ³ Haú hkún, Mariq gi, haú nardu amyit mai za saí yu é, gyai hpaú é namngón-xú raxe í rúng kô yu lé mù, Yesuq é hkyí má hut gyun byi luí, yhâng é uxam eq sùt byí ri. Haú mù, yhúm haú gi, namngón-xú shôm byíng to bê nghut ri.

⁴ Nghut kôlhang, Yesuq lé ap pyám rá nghut é, Yhâng é chángzo rayuq nghut sù, Yudaq Iskarut gi, ⁵ "Haú myùng bang lé byí pyám rá matú, haú namngón-xú lé denari sum sho eq haí mù a ùng pyâm é lhú?" ga taí ri. ⁶ Yhang haú su ga taí é gi, myùng bang lé chiq byí é yanmai taí é a nghut, yhang gi, ngùn htúng chùng sù nghut luí, haú má kat tô é ngùn lé, yhumsing é matú lhoq yu chùng chùng kut é, hkau sù nghut é yanmai taí é nghut ri.

⁷ Yesuq gi, "Nghut shang gaq; yhang gi, Ngo lé myhup yhum rá buinyi é matú, namngón-xú shí lé hkong to byí é nghut lhê. ⁸ Haú myùng bang gi, nungmoq eq rahá hkâ-nhám le nyi rá nghut lhê; nghut kôlhang, Ngò gi, nungmoq eq rahá ayang nyi nyi rá sù a nghut." ga tú taí ri.

⁹ Haú u lé, Yudaq byu pé ajùm ayò gi, haú má Yesuq nyi é lé sé kôluí, lé lo akô; haú bang gi, Yesuq é yanmai za lé kô é a nghut, haú Yhâng eq shí bê mai lhoq dui toq yu é Lazaruq lé, lé myâng nau kô é yanmai le nghut ri. ¹⁰ Haú mù, haú hkyangjong agyi pé gi, Lazaruq lé le, sat pyám rá matú chôm hpyé lhúm akô. ¹¹ Hkâsu mù gâ le, yhâng é yanmai, haú Yudaq byu pé myo myo gi, Yesuq chyáng lhing ló kômù, Yhang lé lumjíng bùm kô é yanmai nghut ri.

Yesuq, Yerusalem Wà Mó Má Wang E Ló É Hkyô

Mht 21:1-11; Mrk 11:1-11; Luk 19:28-40

¹² Hau htang nyí, haú Poí má lé jé é byù moq mó gi, Yerusalem wà mó shut Yesuq jé doq ló é hkyô lé, wó gyô bum akô. ¹³ Haú mù, yhang-moq gi, byùm-haq pé yu chùng mù, Yhang lé é tê uchyang,

"Hosana!"*

Haú Yhumsing é myìng mai jé lé lô Sù gi, hkungsô wó nyí sháng gaq ô!

Haú Israelaq byu pê é Hkohlâm gi, hkungsô wó nyí sháng gaq!"[✧]

ga, taí garû bum akô nghut ri. ¹⁴ Haú hkûn, Yesuq gi, logúng zo radu lé myàng luí, doq jì ri;

¹⁵ haú gi, "Zi-un byizo[†] ê, hkâgyuq; wú keq, nungmoq é hkohlâm gi, logúng zo má jì mù lé lo nyi ri."[✧]

ga, kâ tô é eq rajung za nghut ri.

¹⁶ Haú pé banshoq lé, Yhâng é chángzô pé gi, sâng-hi lé a sê gyo kó; nghut kôlhang, Yesuq gi, hpungwup shingkang dan hu huí é htâng má za sheq, haú pé gi, Yhang eq séng luí kâ tô é hkyô lé le, haú eq rajung za, Yhang lé, yhangmoq mai kut bê hkyô lé le, bún sê kat akô nghut ri.

¹⁷ Haú Yesuq gi, lup hkaú mã é Lazaruq lé wut luí, shi é mai lhoq dui toq yu é hkûn, Yhang eq rahá nghut é shiwa hpúng gi, haú hkyô lé, saksé hkâm byí nyi akô. ¹⁸ Haú mù, byù myo myo gi, Yesuq tân shít é limik kumlhá hau é hkyô lé, wó gyo kô é yanmai, Yhang lé huí rá matú htoq e akô. ¹⁹ Hau é yanmai, haú Hparishe pé gi, "Wú keq, nga-nhúng, hkâsu yhang a ge kut lo nhung! Haú mingkan gón gi, Yhâng htâng châng bùm bekô." ga, rayuq eq rayuq taí lhum bum akô nghut ri.

Yesuq, Yhang Shí Râ Hkyô Lé Te Taí É Hkyô

²⁰ Haú hkûn, noqkuq rá matú Poí má doq ló é bang má, Grik pé ram le bo tô akô. ²¹ Yhangmoq gi, Galile mau, Bet-saida wà mó mã é Hpilip chyáng lé jé kômù, "Áhkaú ê, ngamoq gi, Yesuq lé myàng nau ri." ga, dung tôngbán akô. ²² Haú mù, Hpilip gi, Andre lé, ê taí kyô ri; Andre eq yháng nhik gi, Yesuq lé, ê taí kyô akô.

²³ Haú mù, Yesuq gi, "Haú Byu Yhangzo gi, hpungwup shingkang dan hu é huí rá matú, ahkyíng jé bê nghut ri. ²⁴ Ngò, nungmoq lé teng za taí kôlé, sungso racham gi, myigùng má gyó luí, shi byuq e za a nghut jáng, acham roq za dut nyi rá nghut lhê. Nghut kôlhang, shi byuq é nghut le gi, ashí myo myo lhoq htoq rá nghut lhê. ²⁵ Haú yhumsing é asak lé chyitdap é sù gi, asak sùm byuq rá nghut lhê. Mingkan shí má, haú yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to rá nghut lhê. ²⁶ Ngo lé dojaú é sù ó yuq nghut kôle, Ngá htâng châng rá lhê; Ngò, hkâmá nyi le, Ngá é dui-nhâng zoshâng le nyi rá nghut lhê. Ngá Wa gi, haú Ngo lé dojaú é sù lé, shigyaú rá nghut lhê.

²⁷ Ahkuí, Ngò, myit wuìhke nyi ri; Ngò hkâsu nghú taí rá lhi? 'Áwa ê, ahkyíng shí mai Ngo lé lhoq lhut yù laq.' nghú taí rá lhu? Nghut kôle, Ngò gi, ahkyíng shi é matú za sheq jé lé é ru nghut lhê. ²⁸ Áwa ê, Náng é myìng lé hpungwup shingkang dan hu nhâng aq hkoil!" ga taí ri.

Haú hkûn, "Ngò gi, Ngá é myìng lé hpungwup shingkang dan hu nhâng bê nghut luí, dum dan hu nhâng shirá nghut lhê." gâ é htê, mauhkúng mai htoq lo ri. ²⁹ Haú má nyi tô é byù moq mó gi, haú lé wó gyo kôjáng, "Maugum gum ri."

* **12:13** Hebre dang má, hosana gâ é gi, "ahkuí hkyi yù aq" gâ é nghut lhê. Nghut kôlhang, bun zo shí má gi, hkya-on dang dông chung é nghut lhê. ✧ **12:13** Hkya-on 118:25-26 † **12:15** Hebre myíng dông Zi-un byizo gâ é gi, Yerusalem mã é byu pé lé gâ é nghut lhê. ✧ **12:15** Zhk 9:9

gâ bum akô; ra-am gi, "Yhang lé, maumang lagyo rayuq nyo ri." ga taí bum akô nghut ri.

³⁰ Haú hkún, Yesuq gi, "Danghtê shí gi, Ngá é matú a nghut, nung-moq é matú ru nghut lhê. ³¹ Ahkuí gi, mingkan shí lé jéyáng râ ahkyíng nghut bê; mingkan shí é zau gi, ahkuí hkat htoq pyâm é hui râ nghut lhê. ³² Nghut kôlháng, Ngò gi, myigùng mai tu shap kat é huí é hkún, byù lhunglháng bang lé, Ngá chyáng shê yù râ nghut lhê." ga taí ri. ³³ Yhang haú su ga taí é gi, Yhang hkâsu kut shí râ nghut é hkyô lé shit é nghut ri.

³⁴ Haú hkún, haú byù moq mó gi, "Haú tarâ laiká má, Hkrisduq gi, ahtum abyuq dui nyi râ nghut lhê gâ é lé sheq, ngamoq wó gyô wú é ru nghut le nhíng, 'Haú Byu Yhangzo gi, tu shap é hui ra râ nghut lhê.' nghû, Nàng hkâsu kut wó taí lhê lú? Haú Byu Yhangzo gi, ó yuq nghut lhê lú?" ga, myí akô.

³⁵ Haú mù, Yesuq gi, yhangmoq lé, "Nungmoq chyáng, haú maubó joq nyi râ ahkyíng gi, a lûm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haú maubó joq nyi ashí hkún sô nyi keq; hkâsu mù gâ le, haú mauchut má sô nyi é sù gi, yhang hká shut e ló nyi é lé, a sé nghut ri. ³⁶ Nungmoq gi, maubó é yhangzô pé wó dut kó sháng gaq, haú maubó joq nyi ashí hkún, haú lé lumjíng keq." ga taí ri. Yesuq gi, dang haú ban taí jáng, yhangmoq chyáng mai htoq ló luí, haq byuq bê nghut ri.

Yudaq Byu Pé, A Lumjíng Ru Dut Nyí Kô É Hkyô

³⁷ Yesuq gi, yhangmoq é hí má, limik kumlhá haú pé banshoq kut shit kôlháng, yhangmoq gi, Yhang

lé a lumjíng shi kó nghut ri. ³⁸ Haú gi,

"Yhumsíng ê, nga-nhûng é danglù lé, ó yuq wá lumjíng byí wú é lú? Haú Yhumsíng é loq† gi, ó yuq lé htoq shit wú é lú?"^{*} ga, myíghtoi Esai-aq taí tô é dang lo dik é nghut ri.

³⁹ Yhangmoq a wó lumjíng kô é hkyô gi, Esai-aq taí é dang má,

⁴⁰ "Yhang gi, yhangmoq é myoqjí lé lhoq chit byi luí, yhangmoq é i-myit lé lhoq htan to byi bê nghut ri;

haú mù, yhangmoq gi, myoqjí èq a wó myâng, i-myit èq a wó sê gyo, Ngò, yhangmoq lé yâ ge byi râ matú, a wó lhíng taú lò kó dut râ nghut lhê."^{*}

ga le bo tô é yanmai nghut lhê. ⁴¹ Esai-aq gi, Yesuq é hpungwup shíngkang lé myang é yanmai, Yhang eq sêng é hkyô lé, haú su ga taí é nghut ri.

⁴² Nghut kôlháng, haú uphkáng bang myo myo lháng gi, haú u má, Yesuq lé lumjíng bum akô. Nghut kôle, yhangmoq gi, Hparishe pé èq tarajong mai lhoq htoq pyâm é hui râ lé, gyuq kô é yanmai, yhangmoq lumjíng bê hkyô lé a yín yu bùm kó nghut ri. ⁴³ Hkâsu mù gâ le, yhangmoq gi, Garai Gasâng chyáng mâ é aróng lé, ô nau é htoq má, byu pé chyáng mâ é aróng lé, je ô nau kô é yanmai nghut ri.

⁴⁴ Haú mù, Yesuq, htê mó èq taí é gi, "Ngo lé lumjíng é sù gi, Ngo lé baú lumjíng é a nghut; haú Ngo lé nhang kat é Sù lé le, lumjíng é nghut lhê. ⁴⁵ Ngo lé myang é sù gi, haú Ngo lé nhang kat é Sù lé le myang é nghut lhê. ⁴⁶ Ngò gi, Ngo lé lumjíng é sù ó yuq le, mauchut hkaú má a nyi sháng gaq nghû, maubó dông mingkan má lé jé é nghut lhê.

† **12:38** Yhumsíng é loq gâ é gi, Yhumsíng é hpungwup a-tsam lé gâ é nghut lhê. * **12:38** Esai 53:1 * **12:40** Esai 6:10

47 Ngò gi, Ngá é dang lé wó gyo luí, a châng é sù ó yuq lé le, jéyáng rã a nghut; hkâsu mù gã le, Ngò gi, mingkan lé jéyáng rã matú jé lé é a nghut; haú mingkan lé hkyi yù rã matú sheq, jé lé é ru nghut lhê. 48 Ngo lé he-ngik luí Ngá é dang lé a hap yu é sù lé, jéyáng rã Sù rayuq nyi lhê; Ngò taí é danghkun haú gi, haú jìhtùm buinyi má, haú yuq lé mara byi rã nghut lhê. 49 Hkâsu mù gã le, Ngò gi, Ngá é myit dông taí é a nghut; nghut kôlhang, Ngò haí taí rã eq hkâsu nghu taí rã lé gi, haú Ngo lé nhang kat é sù Íwa mai, Ngo lé hkunmó hkyô to bê nghut lhê. 50 Haú Yhâng é hkunmó gi, ahtum abyuq é asak nghut é lé, Ngò sê lhê. Haú mù luí, Ngò, haí taí kôlé, haú Íwa mai Ngo lé taí kyô é lé za, taí é nghut lhê." gã ri.

13

Chángzô Pé É Hkyi Chi Byi É Hkyô

1 Haú Lhoqlhai Poí jé rã hí má za, Yesuq gi, Yhang, mingkan shí mai Yhâng Wã chyáng htot ló rã ahkyíng jé bê hkyô lé, sê ri. Yhang gi, mingkan má nyi é, Yhâng é byu pé lé chyitdap nyi é nghut luí, jìhtùm jé shoq Yhâng é chyitdap myit lé shit rã nghut lhê.

2 Myinzang zô nyi bùm kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám rã myit kat byi to gù nghut ri. 3 Yesuq gi, haú lhunglhang lé Íwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luí, Garai Gasâng chyáng dum taú ló rã sù nghut é lé le, sê ri. 4 Haú mù, Yhang gi, zohpoq mai toq luí, Yhâng é bumó lé hkyut pyám mù, hpyidum má hpajet ralhùm eq hpyihit hit tô ri. 5 Hau htâng, Yhang gi, jirung má uchyam hut kat mù, Yhâng é chángzô pé é hkyi chi byi

luí, haú Yhâng é hpyidum má hit tô é hpajet eq sut huí byi ri.

6 Yhang gi, Simun Petruq chyáng jé jáng, Simun Petruq gi, "Yhumsing ê, Nang gi, ngá hkyi lé chi byi rã nghut lhê lú?" ga myi ri.

7 Haú hkûn, Yesuq gi, "Ngò, haí kut nyi é hkyô lé, ahkuí, nàng sê gyo rã a nghut; nghut kôlhang, htâng má sê gyo rã nghut lhê." ga tú taí ri.

8 Petruq gi, "Ngá hkyi lé, Nang, hkâ-nhám le wó chi byi rã a nghut." ga taí jáng, Yesuq gi, "Nang lé, Ngò a chi byi é nghut jáng, nàng gi, Ngò eq séng rã a nghut." ga tú taí ri.

9 Haú hkûn, Simun Petruq gi, "Yhumsing ê, haú su nghut jáng gi, ngá é hkyi lé baú za a nghut, ngá é loq eq ulhum lé le chi byi laq!" ga tú taí ri.

10 Yesuq gi, "Gùng chi bê sù gi, hkyi za chi jáng, ragùndú é sanséng bê nghut ri. Nungmoq gi, sanséng bekô; nghut kôlhang, yuq hkangmó gi, sanséng é a nghut." ga tú taí ri. 11 Hkâsu mù gã le, Yhang gi, Yhang lé ap pyám rã sù ó yuq nghut é lé, sê é yanmai, "Nungmoq gi, sanséng é bang chyat a nghut." ga taí é nghut ri.

12 Yesuq gi, yhangmoq é hkyi lé ban chi byi jáng, Yhâng é bumó lé wut mù, Yhâng é jowò má ló dum zùng luí, yhangmoq lé myi é gi, "Nungmoq gi, ahkuí, ngò kut byi é hkyô lé, sê gyo akô lú?"

13 Nungmoq, Ngo lé, 'Sarà' ga le, 'Yhumsing' ga le, wut kô é gi, a shut; hkâsu mù gã le, Ngò gi, haú yuq yhang nghut lhê. 14 Ngò, nungmoq é Sarà eq Yhumsing nghut sù lhang, nungmoq é hkyi lé chi byi é nghut le gi, nungmoq le, rayuq eq rayuq é hkyi lé chi byi lhum rã dut lhê.

15 Nungmoq gi, Ngò, nungmoq lé kut byi é su kut kó sháng gaq nghu, Ngò, nungmoq lé alik kut shit tô é nghut lhê. 16 Ngò, nungmoq lé teng za taí kôlé, dui-nhâng zoshâng gi, yhumsing htoq je kô é a nghut;

lagyo gi, nhang kat é sù htoq je kô é a nghut. ¹⁷ Ahkuí, nungmoq gi, haú pé lé sé bekô nghut luí, châng kut kô é nghut jáng, hkungsô wó kó rá nghut lhê.

Yesuq Lé Ap Pyám Râ Lé, Te Tai É Hkyô

¹⁸ Ngò gi, nungmoq banshoq bang lé lhoq ang luí tai é a nghut; Ngò hkyin yu é bang lé gi, Ngò sê lhê. Nghut kôlhang, 'Haú ngá é muk lé bo zô é sù gi, ngo lé, yhâng é hkyihtáng la-nhik eq nâng htíng rá nghut lhê.'* gâ é Chyúmdang lé, lhoq dik rá matú ru nghut lhê.

¹⁹ Haú a dut htoq shimá, Ngò, nungmoq lé tai kyô nyi é gi, haú dut é hkún, Ngò gi, haú Yuq* nghut é lé, nungmoq wó lumjínng kó rá matú nghut lhê. ²⁰ Ngò, nungmoq lé teng za tai kôlé, Ngò nhang kat é sù lé, lhom hap yu é sù ó yuq nghut kôle, Ngo lé hap yu é nghut bê; Ngo lé hap yu é sù ó yuq nghut kôle, haú Ngo lé nhang kat é Sù lé hap yu é nghut bê." gâ ri.

²¹ Yesuq gi, haú su ga tai é htâng má, myit wúihke nyi mù, saksé hkâm é gi, "Ngò, nungmoq lé teng za tai kôlé, nungmoq má é rayuq sù gi, Ngo lé ap pyám rá nghut lhê." gâ ri.

²² Haú mù, Yhâng é chángzô pé gi, ó yuq lé tai záng nyi é hkyô lé, rago a sé kô é yanmai, rayuq eq rayuq wú tsuq lhùm bum akô nghut ri. ²³ Haú Yesuq chyitdap é chángzo rayuq gi, Yesuq é tanghkoí nâm má leq nge zung tó ri. ²⁴ Haú mù, Simun Petruq gi, chángzo haú yuq lé, loq lik kat mù, "Yhang, ó yuq lé lhoq ang luí, tai nyi é hkyô lé, myi wú aq." ga tai ri.

²⁵ Haú mù, chángzo haú gi, Yesuq é tanghkoí má sai leq nge zung mù, "Yhumsing ê, haú gi, ó yuq nghut lhê lhu?" ga, Yhang lé myí ri.

²⁶ Yesuq gi, "Ngò, muk jap zo shí lé jum yù mù, byí é sù gi, haú yuq nghut lhê." ga tũ tai luí, muk jap zo haú lé jum yù mù, Simun é yhangzo Yudaq Iskarut lé byí ri. ²⁷ Yudaq gi, muk haú lé yù zo kat é eq, Tsadán gi, yhâng chyáng wàng bê nghut ri.

Haú mù, Yesuq gi, "Nàng kut rá é hkyô lé, hân kut aq hkoi." ga yhang lé tai kat ri. ²⁸ Nghut kôlhang, yhang lé, Yesuq haú su ga hái mù tai é hkyô lé, zohpoq haú má nyi tó é bang gi, rayuq lhang a sê gyo kó nghut ri. ²⁹ Haú Yudaq gi, ngùn zum sù nghut é yanmai, ra-am gi, haú Poí má rá é hkyô lé, ê wúí rá matú, Yesuq tai ri ga luí le, myùng bang lé rajung jung byí nhang ri ga luí le, myit yu bum akô nghut ri. ³⁰ Yudaq gi, muk haú lé lhom yù eq, htoq ló byuq bê nghut ri. Haú u gi, mauchut bê nghut ri.

Petruq He-ngik Pyám Râ Lé, Yesuq Te Tai É Hkyô

Mht 26:31-35; Mrk 14:27-31; Luk 22:31-34

³¹ Haú yuq htoq ló byuq jáng, Yesuq tai é gi, "Ahkuí, haú Byu Yhangzo gi, hpungwup shingkang dan hù é nghut luí, Garai Gasang gi, haú Byu Yhangzô é yanmai, hpungwup shingkang dan hu bê nghut ri. ³² Garai Gasang gi, haú Byu Yhangzô é yanmai, hpungwup shingkang dan hù é nghut jáng, Yhang le, Yhang má haú Zo lé hpungwup shingkang dan hu nhâng rá nghut lhê; radá dâm dan hu nhâng rá nghut lhê.

³³ Ngá zo pé ê, Ngò, nungmoq eq rahá nyi rá gi, razup za ru nghut aló. Nungmoq gi, Ngo lé hô kó rá nghut lhê; nghut kôlhang, 'Ngò ló é jang má, nungmoq wó jé kó rá a nghut.' nghú, haú Yudaq byu pé lé, Ngò tai é eq rajung za, ahkuí, nungmoq lé le, Ngò tai lhê.

* 13:18 Hkya-on 41:9 * 13:19 Haú Yuq gâ é gi, Hkrisduq lé gâ é nghut lhê.

³⁴ Ngò, nungmoq lé, hkunmó asik byi to kô lé, nungmoq yhangchang chyitdap lhum keq. Ngò, nungmoq lé chyitdap é su, nungmoq yhangchang chyitdap lhum râ dut lhê. ³⁵ Nungmoq yhangchang chyitdap lhum kô é nghut jáng, nungmoq gi, Ngá é chángzô pé nghut é hkyô lé, byù lunglhang bang sé kó râ nghut lhê." gâ ri.

³⁶ Haú hkûn, Simun Petruq gi, "Yhumsing ê, Nang, hká shut ló râ lú?" ga, Yhang lé myi jáng, Yhang gi, "Ngò ló é jang má, nungmoq, ahkuí a wó châng kó râ nghut lhê. Nghut kôlhang, htâng má gi, nungmoq châng ra kó râ nghut lhê." ga tû tai ri.

³⁷ Petruq gi, "Yhumsing ê, haí mù luí, ahkuí ngò Nang htâng a wó châng é lú? Ngò gi, Nang é matú, shí hkám râ rì rì nghut lhê." ga tai ri.

³⁸ Haú mù, Yesuq tai é gi, "Nang gi, gè gè yhang, Ngá é matú shí hkám râ lú? Ngò, nang lé teng za tai lé, woq a tân shimá, nang, Ngo lé sum dâm he-ngik pyám râ nghut lhê.

14

*Yesuq, Yhang É Chángzô Pé Lé
Nhik Ting É Hkyô*

¹ Nungmoq é i-myt nhikhlum lé, myit wui myit hkê hkâdut nhâng kó. Garai Gasang lé lùm keq; Ngo lé le lùm keq. ² Ngá Wá é yhûm má, nyi jowò myo myo joq lhê; a joq é ru nghut le gi, noq mai, Ngò, nungmoq lé tai kyo râ nghut lhê. Ngò, haú má ló é gi, nungmoq é nyi jowò ló hên láng râ matú ru nghut lhê. ³ Ngò gi, ló mù, nungmoq é matú nyi jowò ló hen é nghut jáng, Ngò nyi é jang má nungmoq le wó nyi shoq, Ngò eq rahá nyi râ matú, Ngò dum tau lé mù, nungmoq lé, lé shuí yù râ nghut lhê. ⁴ Ngò ló é jang

má jé é hkyô lé, nungmoq sê lhê." gâ ri.

Yesuq Za Hkyô

⁵ Haú hkûn, Htomaq gi, Yhang lé, "Yhumsing ê, Nang hká shut ló é lé lhang, ngamoq a sê le nhing, hkyô haú lé, ngamoq hkâsu kut wó sé râ lú?" ga myi ri.

⁶ Yesuq gi, "Ngò gi, hkyô nghut lhê; haú tengmán hkyô eq asak le nghut lhê. Ngò mai za a nghut jáng, ó yuq le, Íwâ chyáng wó jé é a nghut. ⁷ Nungmoq, gè gè yhang, Ngo lé sé kô é nghut le gi, Ngá Wá lé le, nungmoq sé kó râ nghut lhê. Ahkuí mai, nungmoq gi, Yhang lé sé kô é htoq agó, myàng le myang wú bekó nghut lhê." ga tû tai ri.

⁸ Haú hkûn, Hpilip gi, "Yhumsing ê, ngamoq lé, haú Íwa tân shit laq, haú hkûn, ngamoq nhik shí râ nghut lhê." ga tai ri.

⁹ Yesuq tû tai é gi, "Hpilip ê, Ngò, nungmoq eq shí myáng lhang nyi lò bê le nhing, nang, Ngo lé a sé lú? Ngo lé myang é sù gi, haú Íwa lé myàng bê nghut ri; haú nghut le nhing, 'Ngamoq lé, haú Íwa tân shit laq.' nghú, nang hkâsu wó tai lhê lú? ¹⁰ Ngò gi, haú Íwa má nghut nyi luí, haú Íwa gi, Ngò má nghut nyi é hkyô lé, nang a lumjing lú? Ngò, nungmoq lé tai é dang haú pé gi, Ngá é myit mai tai é a nghut; haú Ngò má lung nyi é Íwa sheq, Yhang é mù zuí nyi é ru nghut lhê. ¹¹ Ngò gi, haú Íwa má nghut nyi luí, haú Íwa gi, Ngò má nghut nyi lhê nghú é lé lumjing keq; haú a nghut jáng, kut shit é limik kumhá pé đông za lhang, lumjing keq. ¹² Ngò, nungmoq lé teng za tai kôlé, Ngo lé lumjing é sù gi, Ngò kut é muzó lé kut râ nghut lhê. Ngò gi, haú Íwâ chyáng ló râ nghut é yanmai, haú yuq gi, hau htoq je kô é muzó pé lé lhang kut râ nghut lhê. ¹³ Haú

Yhangzô é yanmai, Íwâ é hpung-wup shing kang wó hû lô shoq, Ngá é mying lé lang luí, nungmoq hái jung dung kôhang, Ngò gyo byi râ nghut lhê. ¹⁴ Nungmoq gi, Ngá é mying lé lang luí, hái dung kôhang, Ngò gyo byi râ nghut lhê.

Choyiyúng Woi-nyí Byi Râ Dang-gidiq

¹⁵ Nungmoq gi, Ngo lé chyitdap kô é nghut jáng, Ngò hkyô tô é hkunmó pé lé, cháng kó râ nghut lhê. ¹⁶ Haú Íwa gi, nungmoq eq ahtum abyuq nyi nyi râ nghut é, hpaqchyí byi Sû gotú rayuq, nungmoq lé byi râ matú, Ngò gi, haú Íwa lé dung râ nghut lhê. ¹⁷ Haú yuq gi, tengmán é Woi-nyí nghut lhê. Haú mingkan gi, Woi-nyí haú lé a myàng a sê é yanmai, Yhang lé a wó hap yu é nghut lhê. Nghut kôhang, Yhang gi, nungmoq eq rahá nyi nyi é nghut luí, nungmoq má nyi to râ Sû nghut é yanmai, nungmoq gi, Yhang lé sê akô. ¹⁸ Ngò gi, nungmoq lé, chuizô pé dông pyâm to râ a nghut; nungmoq chyáng Ngò dum jé lé rá nghut lhê. ¹⁹ Adé myàng má, haú mingkan gi, Ngo lé a myàng lo râ nghut lhê; nghut kôhang, nungmoq gi, Ngo lé myàng kó râ nghut lhê. Hkâsu mù gâ le, Ngò gi, asak dui nyi é nghut mù, nungmoq le dui kó râ nghut lhê. ²⁰ Ngò gi, Ngá Wâ chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haú buinyi má, nungmoq sé kó râ nghut lhê. ²¹ Ngá é hkunmó pé lé wó mù, châng kut é sù ó yuq nghut kôle, Ngo lé chyitdap é sù nghut ri. Ngo lé chyitdap é sù lé gi, Ngá Wa chyitdap râ nghut lhê; Ngò le, haú yuq lé chyitdap luí, Ngá gùng lé yhang, yhang lé shit râ nghut lhê." gâ ri.

²² Hau htâng, (Yudaq Iskarut a nghut sù) Yudaq gi, "Yhumsing ê, Nang gi, haú mingkan lé Nang gùng

a shit e za, ngamoq lé shit râ nghut é gi, haí mù nghut lhê lú?" ga myí ri.

²³ Haú hkûn, Yesuq tû taí gi, "Rayuq yuq, Ngo lé chyitdap é nghut le gi, Ngá dang lé gyo râ nghut lhê. Ngá Wa le, haú yuq lé chyitdap râ nghut luí, Ngá hpe gi, haú yuq chyáng lé mù, yhang eq rahá nyi râ nghut lhê. ²⁴ Ngo lé a chyitdap é sù gi, Ngá dang lé gyo râ a nghut. Nang wó gyô é dang shí pé gi, Ngá myit mai taí é a nghut; dang haú pé gi, Ngo lé nhang kat é Sû, haú Íwâ é ru nghut lhê.

²⁵ Ngò gi, shí pé banshoq lé, nungmoq eq rahá nyi tô ashí u lé taí bê nghut lhê. ²⁶ Nghut kôhang, Ngá é mying dông, haú Íwa nhang kat râ nghut é, hpaqchyí byi Sû nghú é, haú Choyiyúng Woi-nyí gi, nungmoq lé, jung hkangmó mhoq byi râ eq, Ngò, nungmoq lé taí kyo bê hkyô lhungláng, nungmoq lé lhoq pun râ nghut lhê. ²⁷ Ngò gi, nungmoq chyáng, nguingón hkyô tô to byi bê; Ngá é nguingón hkyô, Ngò, nungmoq lé byí é nghut lhê. Ngò gi, mingkan byí é dông, nungmoq lé byí é a nghut. Nungmoq é i-myit nhikhum lé, myit wui myit hke é eq gyuq kyûm é hkâdut nhâng kó.

²⁸ 'Ngò gi, ló byuq luí, nungmoq chyáng dum taú lé rá nghut lhê.' nghú, Ngò taí é lé, nungmoq wó gyô yù bê nghut lhê. Nungmoq, Ngo lé chyitdap kô é nghut le gi, haú Íwâ chyáng Ngò ló rá nghut é hkyô lé, nungmoq gabú kó rá nghut lhê; hkâsu mù gâ le, haú Íwa gi, Ngá htoq je ko Sû nghut lhê. ²⁹ Haú dut é hkûn, nungmoq lumjínng kó sháng gaq nghú, ahkuí, haú a dut shimá, Ngò, nungmoq lé taí kyô é nghut lhê. ³⁰ Ahkuí mai, Ngò gi, nungmoq lé, dang myo myo wó nyô râ a nghut lo; hkâsu mù gâ le, mingkan shí é zau gi, jé lé lo nyi bê nghut ri. Haú yuq gi, Ngo lé up râ ahkáng

haí a wó é sù nghut ri. ³¹ Nghut kôlhang, haù Íwa lé Ngò chyitdap é hkyô, mingkan sé sháng gaq nghû, Ngò gi, Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

15

Tsibiyiq Nuí Eq Akoq Pê É Hkyô

¹ Ngò gi, haù tsibiyiq nuí akyíng nghut lhê; Ngá Wa gi, tsibiyiq hkyâm yhumsíng nghut lhê. ² Yhang gi, ashi a zuí é akoq hkangmó lé, Ngá chyáng mai kyik pyám luí, ashi zuí é akoq hkangmó lé kúm gi, ashi je myo zuí sháng gaq ga, shang pyám byí ri. ³ Nungmoq gi, Ngò, nungmoq lé taí é mungdang hau é yanmai, sanséng gû nghut bekô nghut ri. ⁴ Ngò má nyi nyi keq; Ngò le, nungmoq má nyi nyi rá nghut lhê. Akoq hkangmó gi, tsibiyiq nuí má nuí nyi é za a nghut jáng, yhang baú ashi wó zuí é a nghut. Haù eq rajung za, nungmoq le, Ngò má nyi nyi e za a nghut jang, ashi wó zui kó rá a nghut.

⁵ Ngò gi, tsibiyiq nuí nghut lhê; nungmoq gi, akoq pé nghut akô. Byù rayuq yuq, Ngò má nyi nyi é nghut luí, Ngò gi, yhang má nyi nyi é nghut jáng, haù yuq gi, ashi myo myo zui rá nghut lhê; hkâsu mù gâ le, Ngò mai gang jáng, nungmoq gi, haí le a wó kut kô é nghut lhê. ⁶ Ngò má a nyi nyi é sù gi, haù dú pyâm é hui luí, kyuq shi byuq é akoq eq wuí ri; haù sù é akoq pé gi, byu pé èq guq yù mù, myihkyóm má dú kat pyâm é hui luí, nyé gyó byuq rá nghut lhê. ⁷ Nungmoq gi, Ngò má nyi nyi luí, Ngá é dang pé gi, nungmoq má bo nyi é nghut le gi, nungmoq ô nau é haí nghut kôlhang, dung keq; haù hkûn, nungmoq lé byi rá nghut lhê. ⁸ Nungmoq gi, haù ashi ga-myhó zuí é dông, Ngá Wá é hpungwup shingkan lé lhoq htoq shit é nghut luí, Ngá é

chángzô pé nghut é hkyô lé tûn shit nyi bekô nghut ri.

⁹ Haù Íwa gi, Ngo lé chyitdap é su, Ngò gi, nungmoq lé chyitdap é nghut lhê. Ahkuí, Ngá é chyitdap myit má gíng nyi keq. ¹⁰ Ngò gi, Ngá Wá é hkunmó lé châng é nghut luí, Yhâng é chyitdap myit má gíng nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má gíng nyi kó rá nghut lhê. ¹¹ Nungmoq má Ngá é gabú hkyô joq nyi rá eq, nungmoq é gabú hkyô wó byíng jup rá matú, Ngò, nungmoq lé, dang shí pé taí é nghut lhê. ¹² Ngò, nungmoq lé chyitdap é su, nungmoq yhangchang chyitdap lhum keq; haù gi, Ngá é hkunmó nghut lhê. ¹³ Haù yhum-sing é luzúm wui é matú, yhum-sing é asak ap byí pyâm é chyitdap myit htoq kô é, chyitdap myit gi, ó yuq chyáng le a bò nghut ri. ¹⁴ Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wui nghut bekô. ¹⁵ Ngò gi, Ngá Wá chyáng mai Ngò wó gyô yu é hkyô lhunglhang, nungmoq lé sé nhâng bê nghut é yanmai, nungmoq lé, dui-nhâng zoshâng wui nghû, a wut lô e za, luzúm wui nghû wut é nghut lhê; hkâsu mù gâ le, dui-nhâng zoshâng gi, yhâng yhumsíng hpô é muzó lé a châng sé nghut ri. ¹⁶ Nungmoq, Ngo lé hkyin yu é a nghut, Ngò sheq, nungmoq lé, htoq e ló mù, gíng nyi é ashi zui rá matú hkyin masat tô é ru nghut lhê. Hau hkûn sheq, Ngá é myíng lé lang mù, haù Íwá chyáng nungmoq haí jung dung kôle, Yhang byi rá nghut lhê. ¹⁷ Nungmoq yhangchang chyitdap lhum keq; haù gi, Ngá é hkunmó nghut lhê.

Haù Mingkan Gi, Chángzô Pé Lé A Jú É Hkyô

18 Haù mingkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq. 19 Nungmoq gi, haù mingkan eq sêng é bang nghut é nghut jáng, haù mingkan gi, yhang eq sêng é bang nungmoq lé chyitdap râ nghut lhê. Nghut kôlhang, nungmoq lé gi, Ngò, haù mingkan mai hkyin htoq yù bê nghut luí, nungmoq gi, haù mingkan eq a séng lo kô é yanmai, mingkan gi, nungmoq lé a jú é nghut ri. 20 'Dui-nhâng zoshâng gi, yhâng é yhumsing htoq je kô é a nghut.' nghû, Ngò, nungmoq lé taí é dang pé lé bún nyi keq. Ngo lé lhâng, yhangmoq zing-ri yù bekô nghut le gi, nungmoq lé le, zing-ri kó râ nghut lhê. Ngò mhoqshit é hkyô lé, yhangmoq cháng kô é nghut le gi, nungmoq mhoqshit é lé le, cháng kó râ nghut lhê. 21 Nghut kôlhang, yhangmoq gi, Ngá é mying é yanmai, nungmoq lé haù su kut kó râ nghut lhê; hkâsu mù gâ le, haù Ngo lé nhang kat é Sù lé, yhangmoq a sé kôluí nghut ri. 22 Yhangmoq lé, Ngò a lé nyo wú é nghut le gi, yhangmoq mara bò kó râ a nghut; nghut kôlhang, ahkuí gi, yhangmoq mara wó taí hkyuí râ a nghut lo. 23 Ngo lé a jú é sù gi, Ngá Wa lé le a jú é sù nghut ri. 24 Haù ó yuq lháng a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó râ a nghut; ahkuí kúm gi, laklaí kumlhá haù pé lé yhangmoq myang nyi kôlhang, Ngò eq Ngá Wa lé a jú kô é nghut ri. 25 Haù gi, 'Yhangmoq gi, jumgúyô má Ngo lé a jú kut akô nghut ri.'* ga, yhangmoq é tarâ má kâ tô é dang lé lhoq dik é nghut ri.

26 Haù Íwâ chyáng mã é, Ngò nhang kat râ nghut é, Íwâ mai htoq lé lo é tengmán é Woi-nyí nghut é, haù hpaqchyí byi Sù jé lé é hkûn, Ngá é hkyô lé saksé hkám byi râ nghut lhê. 27 Nungmoq le, Ngò eq

rahá sâng-hi mai nyi bekô nghut é yanmai, saksé hkám byi ra kó râ nghut lhê.

16

1 Nungmoq gi, myit lingbat jowò a joq kó sháng gaq nghû, haù pé banshoq lé, Ngò, nungmoq lé taí kyo bê nghut lhê. 2 Yhangmoq gi, nungmoq lé, tarajong mai hkat htoq pyám kó râ nghut lhê; ó yuq nghut kôle, yhang mai nungmoq lé sat pyám é hkûn, yhang gi, haù đông mai Garai Gasang lé dojaú nyi lhê ga myit yu é ahkyíng, gè gè yhang, jé râ nghut lhê. 3 Yhangmoq gi, haù Íwâ lé le, Ngo lé le, a sé kô é yanmai, haù su kut kó râ nghut lhê. 4 Nghut kôlhang, nungmoq lé, Ngò sidiq byí é hkyô lé, ahkyíng jé jáng nungmoq bún nyi kó sháng gaq nghû, Ngò haù hkyô taí kyô é nghut lhê. Ngò gi, nungmoq eq rahá nghut nyi é yanmai, haù hkyô lé, hí hkûn nungmoq lé a taí kyô é nghut lhê.

Chyoiyúng Woi-nyí é muzó

5 Nghut kôlhang, ahkuí, Ngò gi, Ngo lé nhang kat Su chyáng ló râ nghut lhê. Nghut kôlhang, nungmoq ó yuq le, 'Nàng, hká shut ló râ lú?' ga, Ngo lé a myi kó nghut ri. 6 Ngò, nungmoq lé, haù hkyô pé taí kyô é yanmai, nungmoq é i-myit unghkaú má iyon hkyô byíng to bekô nghut ri. 7 Nghut kôlhang, Ngò, nungmoq lé teng za taí kôlé, Ngò ló byuq é gi, nungmoq é matú je gè râ hkyô ru nghut lhê. Ngò ló byuq e za a nghut jáng, haù hpaqchyí byi Sù gi, nungmoq chyáng lé râ a nghut; Ngò ló jáng sheq, Yhang lé, Ngò, nungmoq chyáng nhang kat byi râ nghut lhê. 8 Yhang jé lé é hkûn, Yhang gi, haù mara wó é eq séng luí le, dingmán hkyô eq séng luí le, tarâ jéyáng hkyô eq séng luí le, haù mingkan lé tûn shit râ nghut lhê. 9 Haù yubak mara wó é eq séng luí ga jang, byu

* 15:25 Hkya-on 35:19; 69:4

pé gi, Ngo lé a lumjǐng kô é yanmai nghut ri. ¹⁰ Haû dǐngmán hkyô eq séng luí ga jang, Ngò gi, haû Íwâ chyáng ló râ nghut luí, nungmoq, Ngo lé a myàng lo kó râ nghut é yanmai nghut ri. ¹¹ Haû tarâ jéyáng hkyô eq séng luí ga jang, mǐngkan shí é zau gi, mara byí é huí é nghut é yanmai nghut ri.

¹² Ngò gi, nungmoq lé taí râ hkyô myo myo wó ashí; nghut kôlhang, ahkuí, nungmoq wó hkâm kó râ a nghut. ¹³ Nghut kôlhang, haû tengmán é Woi-nyí jé lé é hkûn, Yhang gi, tengmán hkyô lunglhang lé shuí sé râ nghut lhê. Yhang gi, Yhâng myit dông taí râ a nghut; Yhang, wó gyô yu é hkyô lé za taí luí, dut lò râ hkyô pé lé le, nungmoq chyáng taí pyô râ nghut lhê. ¹⁴ Yhang gi, Ngò wó é lé, yù mù, nungmoq lé taí kyô é eq sé nhang é dông, Ngá é hpungwup shingkang lé hủ ló nhâng râ nghut lhê. ¹⁵ Haû Íwa wó é lunglhang gi, Ngá é chyat nghut lhê. Hau é yanmai, haû Woi-nyí gi, Ngò wó é lé yù mù, nungmoq lé sé nhâng râ nghut lhê nghú, Ngò taí é nghut lhê.

¹⁶ Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê." gâ ri.

Changzô Pê É Iyon Hkyô Gi, Gabú Hkyô Taû Dut Râ

¹⁷ Yhâng é chángzô pé ra-am gi, "Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê.' gâ é eq 'Ngò gi, Íwâ chyáng ló râ nghut é yanmai nghut lhê.' ga, Yhang taí é gi, haí jung gá nau é nghut lhê lúhú?" ga, rayuq eq rayuq myí lhum bum akô. ¹⁸ Hau htoq agó, yhangmoq gi, "Adê myáng má,' gâ é gi, Yhang haí jung gá nau lhê lúhú? Nga-nhúng gi, Yhang haí

taí nau é lé a sê gyo." ga, taí lhum bum akô nghut ri.

¹⁹ Yesuq gi, yhangmoq myi naû kô é hkyô lé sê ri; haû mù, Yhang, yhangmoq lé taí é gi, "Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê.' nghú, Ngò taí é lé, haí jung gá nau lhê laq nghú, rayuq eq rayuq myi lhum nyí akô lúhú? ²⁰ Ngò, nungmoq lé teng za taí kôlé, haû mǐngkan gi, gabú nyi é u lé, nungmoq gi, ngaû é eq iyon yón é huí kó râ nghut lhê. Nungmoq gi, iyon yón é huí kó râ nghut lhê; nghut kôlhang, nungmoq é iyon hkyô gi, gabú hkyô taû dut râ nghut lhê. ²¹ Myiwe gi, zoshâng hkû râ nghut jáng, zohkû-nò nò râ ahkyíng jé bê nghut é yanmai, myit chiq nyi ri; nghut kôlhang, zoshâng lé wó hku htoq kat é hkûn gi, mǐngkan htoq má zoshâng rayuq wó hku to bê nghut luí, yhang gabú é yanmai, haû no hpu é hkyô lé a bun byuq lo nghut ri. ²² Haû eq rajung za, ahkuí gi, nungmoq iyon yón é ahkyíng nghut ri; nghut kôlhang, Ngò, nungmoq lé dum huí é hkûn, nungmoq gi, gabú kó râ nghut lhê; nungmoq é gabú hkyô haû lé, nungmoq chyáng mai ó yuq èq le wó yu pyám byi râ a nghut. ²³ Haû buinyí má, nungmoq gi, Ngo lé, haí le a dung lo kó râ nghut lhê. Ngò, nungmoq lé teng za taí kôlé, nungmoq gi, Ngá myíng lang luí, Ngá Wâ chyáng haí dung kôle, Yhang byi râ nghut lhê. ²⁴ Ahkuí jé shoq, nungmoq gi, Ngá myíng lé lang luí, haí le a dung wú shí kó nghut ri. Dung keq, haû hkûn, nungmoq myang hap yù kó râ nghut luí, nungmoq é gabú hkyô gi, byíng jup lò râ nghut lhê.

²⁵ Ngò gi, nungmoq lé, dangtú dông haû pé taí kyo bê nghut lhê; nghut kôlhang, Ngò gi, dangtú a chùng lô e za, haû Íwa eq séng é

hkyô, nungmoq lé san za taí kyô é ahkyíng jé rá nghut lhê. ²⁶ Háu buinyí má, nungmoq gi, Ngá é myíng lé lang luí dung kó rá nghut lhê. Ngò gi, nungmoq é matú, háu Íwâ chyáng dung byi rá nghú taí nyi é a nghut. ²⁷ Hkâsu mù gâ le, nungmoq gi, Ngo lé chyitdap kô é eq, Ngò gi, Íwa Garai Gasâng chyáng mai jé lé é Sû nghut é lé, nungmoq lumjíng kô é yanmai, háu Íwa yang, nungmoq lé chyitdap é nghut lhê. ²⁸ Ngò gi, háu Íwâ chyáng mai htoq lé mù, mingkan má lé jé wang é nghut lhê; ahkuí, Ngò gi, mingkan mai htoq mù, háu Íwâ chyáng dum taú ló rá nghut lhê." gâ ri.

²⁹ Háu hkûn, Yesuq é chángzô pé gi, "Ahkuí, Nàng gi, dangtú a chûng é dông, san za taí kyô nyi é nghut bê! ³⁰ Nàng gi, lhunglhang lé sê é sù nghut é lé le, Nàng lé, ó yuq eq le dangmyi myi nó a rá é hkyô lé le, ahkuí, ngamoq wó sé bê. Hau é yanmai, Nàng gi, Garai Gasâng chyáng mai lé é sù nghut é lé, ngamoq lumjíng lhê." ga taí bum akò.

³¹ Háu hkûn, Yesuq tû taí é gi, "Nungmoq, ahkuí lumjíng bekò lhú? ³² Nghut kôlhang, nungmoq gi, lhoq pyo pyâm é hui luí, Ngo lé baú za tô pyâm to kômù, ó le ô yhûm shut ló byuq rá ahkyíng jé lo nyi bê nghut ri; ahkuí lhang jé to bê. Nghut kôlhang, Ngò gi, Ngò baú za a nghut; hkâsu mù gâ le, Ngá Wa gi, Ngò eq rahá nghut nyi lhê.

³³ Nungmoq gi, Ngò má nguíngón hkyô wó kó sháng gaq nghú, Ngò gi, háu hkyô pé lé taí kyô é nghut lhê. Nungmoq gi, mingkan shí má, wuîhke hkyô hui kó rá nghut lhê; nghut kôlhang, myit wum lhoq kíng keq. Ngò gi, mingkan lé ung pyám bê nghut lhê." gâ ri.

17

Yesuq Kyûdung É Hkyô

¹ Yesuq gi, háu su ga taí é htâng má, mauhkûng shut tu wú luí, kyûdung é gi, "Áwa ê, ahkyíng jé bê nghut ri; háu Nung Zo gi, Nang lé hpungwup shingkan wó hu nhâng sháng gaq, Nung Zo lé hpungwup shingkan hû ló nhâng laq ô! ² Hkâsu mù gâ le, Nàng mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nàng gi, byù lhunglhang bang lé up rá ahkáng, Yhang lé byi tô é yanmai nghut ri. ³ Nàng za tengmán é Garai Gasang nghut é eq Nàng nhang kat é sù Yesuq Hkrisduq lé, sê é gi, ahtum abyuq é asak nghut lhê. ⁴ Ngò gi, Nàng, Ngo lé wùn waq nhang é muzó lé lhoq pán é dông, myidàm htoq má, Náng é hpungwup shingkan lé lhoq htoq shit bê nghut lhê. ⁵ Áwa ê, háu mingkan lhang a joq shí mai, Ngò, Nàng eq rahá chôm wó é hpungwup shingkan eq, ahkuí, Náng é myoq hí má, Ngo lé hpungwup shingkan dan hu nhâng laq.

Chángzô pé matú, Yesuq kyûdung byi é hkyô

⁶ Mingkan mai, Nàng, Ngo lé hkyin htoq yû byi é bang lé, Ngò gi, Náng é myíng lhoq htoq shit bê nghut lhê. Yhangmoq gi, Náng é byu pé nghut bekò; Nàng gi, yhangmoq lé, Ngá é loq má ap byi bê nghut luí, yhangmoq gi, Náng é dang lé cháng kut bekò nghut ri. ⁷ Nàng, Ngo lé byi é lhunglhang gi, Náng chyáng mâ é nghut é lé, ahkuí, yhangmoq sé bekò nghut ri.

⁸ Hkâsu mù gâ le, Nàng, Ngo lé byi kat é mungdang pé lé, Ngò, yhangmoq lé byi bê nghut luí, yhangmoq gi, háu pé lé hap yù bekò nghut ri; Ngò gi, Náng chyáng mai lé é sù nghut é lé le, yhangmoq hkyak sê akò; Nàng, Ngo lé nhang kat é hkyô lé le, yhangmoq lumjíng bekò

nghut ri. ⁹ Ngò gi, yhangmoq é matú kyûdung byî lê. Ngò gi, haû mingkan byu pé é matú dung byi nyi é a nghut; Nàng, Ngo lé ap byi tô é bâng é matú sheq dung byi nyi é ru nghut lê; hkâsu mù gâ le, yhangmoq gi, Náng é byu pé nghut akô. ¹⁰ Ngò wó é lhunglhang gi, Náng é chyat nghut mù, Nàng wó é lhunglhang le, Ngá é chyat nghut lê. Haû mù, Ngò gi, yhangmoq má hpungwup shingkan hû é hui bê nghut lê. ¹¹ Ngò gi, Nàng chyáng lò râ nghut lê mù, mingkan htoq má nyi nyi râ a nghut lo; nghut kôlhang, yhangmoq gi, mingkan htoq má nyi nyi shirâ nghut lê; chyoiyúng é Áwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nàng, Ngo lé byi é, haû Náng mying é a-tsam èq yhangmoq lé upzúng nyi aq. ¹² Ngò gi, yhangmoq eq rahá nghut nyi é u lé, yhangmoq lé upzúng bê nghut luí, Nàng, Ngo lé byi é mying hau èq, yhangmoq lé rago zúng bê nghut lê. Haû Chyúmdang lhoq dik sháng gaq ga, haû bang mâ é htên byoq hui râ sù mai lai luí, ó yuq le a byuq byuq é nghut lê.

¹³ Ngò gi, ahkuí, Náng chyáng lò râ nghut bê; nghut kôlhang, Ngá é gabú hkyô gi, yhangmoq chyáng bying jup sháng gaq nghû, Ngò gi, haû pé lé mingkan má tai é nghut lê. ¹⁴ Ngò gi, yhangmoq lé, Náng é mungdang byi bê nghut lê; haû mingkan gi, yhangmoq lé a jú nghut ri; hkâsu mù gâ le, Ngò gi, mingkan mâ é a nghut é su, yhangmoq le, mingkan mâ é a nghut kô é yanmai nghut ri. ¹⁵ Ngò kyûdung é gi, Nàng, yhangmoq lé mingkan mai shuí htoq yû râ matú dung é a nghut, haû agè ashop su chyáng mai, yhangmoq lé upzúng yû râ matú sheq dung é ru nghut lê. ¹⁶ Ngò gi, mingkan mâ é a nghut é su, yhangmoq le, mingkan mâ é a nghut kó. ¹⁷ Yhangmoq lé, haû

tengmán hkyo eq lhoq sân-yúng yû laq; Náng é mungdang gi, tengmán hkyô nghut ri. ¹⁸ Nàng, Ngo lé, mingkan má nhang hâng kat é su, Ngò le, yhangmoq lé, mingkan má nhang hâng kat é nghut lê. ¹⁹ Yhangmoq lé, tengmán hkyô má wó lhoq sân-yúng yû kó sháng gaq nghû, Ngò gi, yhangmoq é matú, yhumsing gùng lé lhoq sân-yúng yu é nghut lê.

Lumjǐng Bang Lhunglhang É Matú, Yesuq Kyûdung Byî É Hkyô

²⁰ Ngò gi, yhangmoq é matú baú za kyûdung byî é a nghut; Yhangmoq é danglu é yanmai, Ngo lé lumjǐng kó râ bâng é matú le, Ngò kyûdung byî é nghut lê. ²¹ Haû mù, yhangmoq banshoq bang gi, rading ralhum za dut nyi kó sháng gaq. Haû mingkan gi, Nàng, Ngo lé nhang kat é hkyô lé wó lumjǐng sháng gaq; Áwa, Nàng gi, Ngò má nyi nyi mù, Ngò gi, Nàng má nyi nyi é su, yhangmoq le, ngá hpe má nyi nyi kó sháng gaq. ²² Ngá hpe gi, ragùng za nghut é su, yhangmoq le, rading ralhum za dut nyi kó sháng gaq nghû, Ngò gi, Nàng, Ngo lé byi é hpungwup shingkan lé, yhangmoq lé byi bê nghut lê. ²³ Nàng, Ngo lé nhang kat bê hkyô eq Nàng, Ngo lé chyitdap é su, yhangmoq lé chyitdap é hkyô lé, haû mingkan wó sé râ matú, yhangmoq gi, gumjup shoq rading ralhum za wó dut kó sháng gaq nghû, Ngò gi, yhangmoq má nyi nyi luí, Nàng gi, Ngò má nyi nyi é nghut lê.

²⁴ Áwa ê, haû mingkan lháng a joq shi mai, Nàng, Ngo lé chyitdap luí byi tô é hpungwup shingkan haû lé, Nàng, Ngo lé byi tô é bang, wó myàng kó râ matú le, Ngò nyi é jang má, Ngò eq rahá wó nyi kó râ matú le, Ngò ô nau ri.

²⁵ Dingmán é Áwa ê, haû mingkan gi, Nang lé a sé kôlhang, Ngò gi,

Nang lé sê lhê; Nang, Ngo lé nhang kat é hkyô lé gi, yhangmoq sé akô nghut ri. ²⁶ Nang, Ngo lé chyitdap é chyitdap myit gi, yhangmoq má wó joq nyi rá matú le, Ngò gi, yhangmoq má wó nyi nyi rá matú le, yhangmoq lé, Ngò, Nang é hkyô sé nhâng bê nghut luí, xoq mù sé nhang nyi shirâ nghut lhê." gâ ri.

18

Yesuq Chyup Yû Huí É Hkyô

Mht 26:47-56; Mrk 14:43-50; Luk 22:47-53

¹ Yesuq gi, haú su ga kyûdûng é htâng má, Yhâng é chángzô pé eq rahá, Kedron wuihkung mai láf byit dap ló luí, haú hpoq má joq é hkyâm ralhum má wang e akô nghut ri.

² Hkyâm haú gi, Yesuq eq Yhâng é chángzô pé lhaq hui hui kut é jowò nghut é yanmai, haú Yesuq lé ap pyám rá sù Yudaq le sê ri. ³ Haú mù, Yudaq gi, haú hkyangjong agyi pé eq Hparishe pê chyáng mai nhang kat é noqkuq yhûm zûng bang ram eq gyezo rajum lé, haú jowò shut shuí wang lé lo ri. Haú bang gi, myihu, myibung eq shâm lhâm pé chung lé lo akô.

⁴ Yesuq gi, Yhang má dut lò rá hkyô lhungháng lé sé gû nghut mù, htoq ê luí, yhangmoq lé, "Nungmoq, ó yuq lé ho akô lú?" ga myí ri.

⁵ Haú hkûn, yhangmoq gi, "Nazaret wà byù Yesuq lé ho lhê." ga tû taí kôjáng, Yesuq gi, "Ngò gi, haú yuq nghut lhê." ga taí ri. (Yesuq lé ap pyám sù Yudaq le, yhangmoq eq rahá yap tô ri.) ⁶ "Ngò gi, haú yuq nghut lhê." ga Yesuq taí kat é hkûn jáng, yhangmoq gi, nungzut zut mù, myigùng má lêng leq ló bum akô nghut ri.

⁷ Yhang gi, "Nungmoq, ó yuq lé ho akô lú?" ga, yhangmoq lé dum myí kat jáng, yhangmoq gi,

"Nazaret wà byù Yesuq lé ho lhê." ga taí akô.

⁸ Haú hkûn, Yesuq gi, "Ngò gi, haú yuq nghut lhê nghú, nungmoq lé taí kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq." ga tû taí ri. ⁹ Haú gi, "Nang, Ngo lé byí tô é bang rayuq le lháng, Ngò, a lhoq hpyuq pyám." ga, Yhang taí tô é dang dik rá matú nghut ri.

¹⁰ Haú hkûn, Simun Petruq gi, shâm wun tô é nghut luí, shâm shê mù, haú hkyangjong mó é duinhâng zôshang é loqyo nohkyap lé zân hpyit kat byí ri. (Dui-nhâng zoshâng haú yuq é mying gi, Malhku gâ ri.)

¹¹ Haú mù, Yesuq gi, Petruq lé, "Náng é shâm lé, shambyâng má xâng pyám aq! Haú Íwa, Ngo lé byí é góm* lé, Ngò a shuq é wó nyi rá lú?" ga taí kat ri.

Yesuq Lé, Anna Chyáng Shuí E É Hkyô

Mht 26:57-58; Mrk 14:53-54; Luk 22:54

¹² Hau htâng, gyezo haú jûm eq yhangmoq é gyezau hpó, Yudaq byu pê é mingsuwún wui gi, Yesuq lé chyup yû mù, tuí akô nghut ri. ¹³ Yhangmoq gi, haú zân má é hkyangjong mó Kayahpaq é yhâng-tsa Anna chyáng hí, Yhang lé shuí ló akô nghut ri. ¹⁴ Kayahpaq gi, byu pê é matú rayuq shí hkám byí le je gè rá nghut lhê ga, haú Yudaq byu pé lé hpaqchyí byí é sù yuq nghut ri.

Yesuq Lé, Petruq Sâng-hi Dam Hengik Pyâm É Hkyô

Mht 26:69-70; Mrk 14:66-68; Luk 22:55-57

¹⁵ Simun Petruq eq gotû chángzo rayuq gi, Yesuq htâng châng e ló akô nghut ri. Gotû chángzo haú yuq gi, hkyangjong mó lé rago sê lhê nghut mù luí, hkyangjong

* **18:11** Góm lé shuq gâ é gi, jamjau hui rá eq shí hkám rá lé, taí nau é nghut lhê.

mó é yhumwàng hkaû shut, Yesuq é htâng má châng wang ló ri. ¹⁶ Petruq kúm gi, hkúmdong shinggan má láng yap tô ri. Haû hkyangjong mó lé rago sê é sù, gotú chángzo haû yuq gi, taû htoq ló mù, hkum zúng é myiwe myhí lé taí luí, Petruq lé shuí hâng yu ri.

¹⁷ Haû hkûn, haû hkum zúng é myiwe myhí gi, Petruq lé, "Nàng gi, haû yuq é chángzô pé mâ é rayuq a nghut lú?" ga myi jáng, yhang gi, "Ngò a nghut." ga tú taí ri.

¹⁸ Haû u lé, gyoq é yanmai, dui-nhâng zoshâng wuì eq noqkuq yhùm zúng bang gi, yhangmoq gyoq gâng rá matú myigyê eq mut tô é myihkyóm má, gyoq gang yap nyi bum akô. Petruq le, yhangmoq eq rahá gyoq gang yap tô ri.

Yesuq Lé, Hkyangjong Mó Myí Choq Wú É Hkyô

Mht 26:59-66; Mrk 14:55-64; Luk 22:66-71

¹⁹ Haû u lé, haû hkyangjong mó gi, Yesuq lé, Yhâng é chángzô pé hkyô eq Yhâng mhoqshit é hkyô eq séng luí myí ri.

²⁰ Haû hkûn, Yesuq gi, "Haû mingkan htoq má, Ngò, de de taí bê nghut lhê. Ngò gi, haû Yudaq byu pé banshoq bang chôm zîng é, tarajong pé má le, noqkuq yhùm má le, ayang mhoqshit é nghut lhê. Ngò gi, haq zaú luí taí é hkyô hai le a joq. ²¹ Nàng, hai mù Ngo lé myi lhê lú? Haû, Ngò taí é lé wó gyô é bang lé myi aq; Ngò hai taí é hkyô lé, yhangmoq gè gè sê akô nghut ri." ga tú taí ri.

²² Yesuq haû su ga taí jáng, haû nàm má nyi tô é noqkuq yhùm zúng sù rayuq gi, Yhang lé pyuq kat luí, "Hkyangjong mó lé wá, Nàng, haû su nghũ dang tú lhê lú?" ga taí ri.

²³ Haû hkûn, Yesuq gi, "Ngò taí shut é nghut le gi, shut é hkyô lé saksé tũn shit aq. Nghut kôhang, Ngò gi, têng é đông ru taí le nhíng, nàng, hai mù Ngo lé pyuq lhê lú?"

ga tú taí ri. ²⁴ Hau htâng, Anna gi, Yhang lé tuí to gù, haû hkyangjong mó Kayahpaq chyáng dé kat nhang ri.

Yesuq Lé, Petruq Xoq He-ngik Pyâm É Hkyô

Mht 26:71-75; Mrk 14:69-72; Luk 22:58-62

²⁵ Haû Simun Petruq gyoq gang yap tô é hkûn, "Nàng gi, Yhâng é chángzô pé mâ é rayuq a nghut lú?" ga, yhang lé myi kôjáng, yhang gi, "Ngò a nghut." ga, dum he pyâm ri.

²⁶ Haû Petruq èq nohkyap zân hpyit pyâm byí é huí su é buinùm nghut é sù, haû hkyangjong mó é dui-nhâng zoshâng rayuq gi, yhang lé, "Haû hkyâm má, nàng, Yhang eq rahá nghut nyi é lé, ngò a myang é su ngam lhê lú?" ga taí ri. ²⁷ Haû hkûn, Petruq gi, xoq he pyâm ri; haû u yhang, woq tũn bê nghut ri.

Pilat É Myoq Hí Má, Yesuq Jé Nyi É Hkun Lhê Hkyô

Mht 27:1-2, 11-14; Mrk 15:1-5; Luk 23:1-5

²⁸ Hau htâng, yhangmoq gi, Yesuq lé, Kayahpaq chyáng mai, haû mauzau hpô é yhumwàng shut shuí e ló akô. Haû u gi, napsũn noq ashí nghut ri. Yhangmoq gi, agot a-û a dut e za, htungli đông Lhoqlhai Poí lé wó zo rá matú, yhùmhkaû má a wàng kó nghut ri. ²⁹ Haû mù luí, mauzau Pilat gi, yhangmoq chyáng htoq è mù, "Shí yuq lé, nungmoq hai mara hũn nau akô lú?" ga myí ri.

³⁰ Haû hkûn, yhangmoq gi, "Shí yuq, a ge é muzó kut é a nghut le gi, Yhang lé, nàng é loq má ngamoq lé ap byi rá a nghut." ga tú taí akô.

³¹ Pilat gi, "Yhang lé, nungmoq yhang shuí ló mù, nungmoq é tará đông ló jéyáng keq." ga taí jáng, haû Yudaq byu pé gi, "Nghut kôhang, ngamoq gi, ó yuq lé sat rá ahkáng le a wó é nghut lhê." ga tú taí akô nghut ri. ³² Haû su dut é hkyô gi,

Yesuq, Yhang hká dông shî râ ga taí é dang lé lhoq dik râ matú nghut lhê.

³³ Haú mù, Pilat gi, yhúmhmaú má taú wang ló mù, Yesuq lé wut yù luí, "Nàng gi, Yudaq byu pé é hkohkâm nghut lhê thú?" ga myí ri.

³⁴ Haú hkûn, Yesuq gi, "Haú gi, náng é myit dông taí é nghut lhê thú? A nghut jáng, góbang mai, nang lé, Ngá é hkyô taí kyo luí nghut lhê thú?" ga taú myí ri.

³⁵ Pilat gi, "Ngò gi, Yudaq byu nghut lhê thú? Haú Náng é byu myú eq Náng é hkyangjong agyi pé sheq, Nang lé, ngá loq má ap byí é ru nghut lhê. Nàng gi, haí kut é nghut lhê thú?" ga dum myí ri.

³⁶ Haú hkûn, Yesuq gi, "Ngá é mingdán gi, mingkan shî eq a séng. Mingkan shî eq séng é ru nghut le gi, haú Yudaq byu pé, Ngo lé a wó chyup yu lo shoq, Ngá é dui-nhâng zoshâng wuì, Ngo lé chôm hung yu kó râ nghut lhê. Nghut kôlháng, Ngá é mingdán gi, mingkan shî eq a séng é ru nghut lhê." ga taí ri.

³⁷ Haú mù, Pilat gi, "Haú jáng, Nàng gi, hkohkâm nghut bê thú?" ga myí jáng, Yesuq gi, "Ngo lé, hkohkâm nghut lhê ga, nàng taí nyi é jô ri. Gè gè ga jáng, Ngò gi, hau é yanmai hku lé lo é sù nghut lhê; haú tengmán hkyô lé saksé hkám râ matú, Ngò, mingkan htoq má jé lé é nghut lhê. Haú tengmán hkyô eq séng é sù ó yuq le, Ngá é dang lé gyô ri." ga tú taí ri.

³⁸ Haú hkûn, Pilat gi, "Tengmán hkyô gâ é gi, haí jung thú?" ga myí ri. Yhang gi, haú su ga myi luí, haú Yudaq byu pé chyáng dum htoq ê mù, "Shí yuq chyáng mara hûn râ hkyô, ngò a myàng nghut ri. ³⁹ Nghut kôlháng, haú Lhoqlhai Poí u lé, nungmoq é matú, ngò, bítóng byú rayuq nhang htoq kat byi byi kut é htúng, nungmoq wó akò. Haú mù, 'Yudaq byu pé é hkohkâm' lé,

nhang htoq kat byi râ lé, nungmoq ô nau akò thú?" ga myí ri.

⁴⁰ Haú hkûn, yhangmoq gi, "Haú yuq lé a nghut! Barabaq lé sheq nhâng byi aq." ga, garú kat akò. Barabaq gi, damyaq nghut ri.

19

Yesuq Lé, Tapzîng Má Jén Sat Râ Matú Doqdân É Hkyô

Mht 27:15-31; Mrk 15:6-20; Luk 23:13-25

¹ Haú mù luí, Yesuq lé lêng she yù mù, nhuq bat râ matú, Pilat hkunmó hkyô ri. ² Haú gyezô pé gi, zujanmaú saí yù kôluí, Yesuq é ulhum má tsung byi kômù, Yhang lé, buhîng nè hut byí akò nghut ri. ³ Hau htâng, yhangmoq gi, Yhâng chyáng dum huí ê é kut luí, "Yudaq byu pé é hkohkâm é! Chyung hîng xê hîng nyi sháng gaq ô!" ga taí kômù, Yhâng é myoqdong má pyuq byí akò nghut ri.

⁴ Pilat gi, haú Yudaq byu pé chyáng radám dum htoq ê mù, "Wú keq, shí yuq chyáng mara hûn râ hkyô, ngò a myang é lé nungmoq sé sháng nghû, Yhang lé, ngò nungmoq chyáng shuí htoq lé byí lhê." ga taí ri. ⁵ Yesuq gi, haú zumuq tsûng tô é eq bu nè hîng wut to mù htoq lé jáng, Pilat gi, yhangmoq lé, "Wú keq, Yhang, shí yuq nghut lhê." ga taí ri.

⁶ Haú hkyangjong agyi pé eq yhangmoq é noqkuq yhûm zúng bang gi, Yhang lé myang kat kôjáng, "Yhang lé tapzîng má jén sat pyám aq! Yhang lé tapzîng má jén sat pyám aq!" ga garú bum akò.

Nghut kôlháng, Pilat gi, "Nungmoq shuí yù mù, tapzîng má jén sat keq. Ngò gi, Yhâng chyáng mara hûn râ hkyô a myàng." ga tú taí ri.

⁷ Haú hkûn, haú Yudaq byu pé gi, "Ngamoq chyáng tarâ rahkat joq lhê; tarâ haú dông ga jang, Yhang gi, shí gîng bê nghut ri; hkâsu mù gâ le, Yhang gi, Garai Gasâng é

Yhangzo haù nghut lhê gà ri." ga xoq taí akô.

⁸ Pilat gi, dang haù lé wó gyo jáng, je gyô gyuq luí, ⁹ yhúmhaù shut dum wang ló mù, Yesuq lé, "Nàng, hkâmâ é sù nghut lhê lú?" ga myí ri. Nghut kôlhang, Yesuq gi, dang rahkun lhang a tú taí byí nghut ri. ¹⁰ Haù hkûn, Pilat gi, "Nàng, ngo lé a tú taí kut lhê lú? Ngò gi, Nàng lé, wó lhoq lhut kat é eq tapzîng má wó jén sat pyâm é ahkáng wó sù nghut é lé, Nàng a sé lú?" ga myí ri.

¹¹ Yesuq gi, "Nàng lé, haù ahtoq mai ahkáng byí e za a nghut le gi, nàng, Ngo lé haí kut râ a-tsam le wó râ a nghut. Haù mù luí, Ngo lé, náng é loq má ap byí é sù gi, mara je bo é nghut lhê." ga tú taí ri.

¹² Haù hkûn mai, Pilat gi, Yesuq lé lhoq lhut kat byí nau nyí bê nghut ri. Nghut kôlhang, haù Yudaq byu pé gi, "Nàng, haù yuq lé nhang pyâm é nghut jáng, nàng gi, hkoséng Kehtaq é luzúm a nghut lo; yhum-sing gùng lé, hkohkâm gà é sù gi, hkoséng Kehtaq eq shai lhum é sù nghut lhê." ga, ru jâng garû nyí bum akô nghut ri.

¹³ Haù lé wó gyo jáng, Pilat gi, Yesuq lé shuí htoq é mù, Hebre myíng dông Gabahta gà é Luggok hkáng myhang to jang ngu é jowò mâ é tarâ jéyáng tanghkuq má zung tô ri. ¹⁴ Haù u gi, Lhoqlhai Poí é matú, Hên Lajâng é Buinyí nyí-káng raxe í hkyíng nghut ri.

Pilat gi, haù Yudaq byu pé lé, "Nungmoq é hkohkâm lé wú keq." ga taí ri.

¹⁵ Nghut kôlhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!" ga garû bum akô.

Haù hkûn, Pilat gi, "Nungmoq é hkohkâm lé wá, ngò, tapzîng má jén sat pyám râ lú?" ga myí jáng, haù hkyangjong agyí pé gi, "Haù hkoséng Kehtaq mai lai luí, gotú

hkohkâm ngamoq a wó." ga, tú taí akô nghut ri.

¹⁶ Hau htâng má, Pilat gi, Yesuq lé tapzîng má jén sat pyám râ matú, yhangmoq é loq má ap byí kat bê nghut ri. Haù mù luí, yhangmoq gi, Yesuq lé shuí ló bekô nghut ri.

Tapzîng Má Jén Pyâm É Hkyô
Mht 27:32-44; Mrk 15:21-32; Luk 23:26-43

¹⁷ Yesuq gi, yhum-sing é tapzîng lé waq mù, Hebre myíng dông Gol-gahta gà é, Ugyap joq é Jowò gà é jang má htoq jé e ri. ¹⁸ Yhangmoq gi, haù má, Yesuq lé tapzîng htoq má jén tap pyám akô; Yhang eq rahá, gotú í yuq lé le, rahkyam shut rayuq kut jén to kô é nghut luí, Yesuq gi, gyoro má nghut ri.

¹⁹ Pilat le, masat laiká kê yù luí, haù tapzîng htoq má tap tô ri. Haù má gi, "YUDAQ BYU PÊ É HKOHKÂM, NAZARET WÀ BYU YESUQ" gà tô ri. ²⁰ Yesuq lé jén tô é jowò gi, myuq eq chyâng lhum é htoq agó, haù masat laiká gi, Hebre dông le, Latin dông le, Grik dông le, kê tô é yanmai, haù Yudaq byu pé myo myo gi, masat laiká haù lé ng-hap bum akô nghut ri. ²¹ Haù Yudaq byu pé é hkyangjong agyí pé gi, Pilat lé, "Yudaq byu pé é hkohkâm' nghú hkáká, 'Ngò gi, Yudaq byu pé é hkohkâm nghut lhê ga, Yhang taí ri.' nghú luí sheq ká aq." ga taí akô.

²² Haù hkûn, Pilat gi, "Ngò kê é dông, ngò kê to bê nghut lhê." ga tú taí ri.

²³ Haù gyezô pé gi, Yesuq lé tapzîng má jén tap pyâm é htâng má, Yhâng é mebu pé lé yù mù, myí hkyam gàm luí, rayuq rahkyam yu akô; haù ahte bu lé le, gàm râ dâ akô; nghut kôlhang, haù gi, hkyup-shi a bo e za, awang mai ahpyo hpyot kut woq tô é nghut ri.

²⁴ Haù mù, yhangmoq gi, "Bu shí lé gi, a llang cheq e za, ó yuq myang yù ang râ laq, hkyín shosé she wú

sháng." ga, rayuq eq rayuq tái lhum akô.

Haû gi,

"Yhangmoq, Ngá é mebu lé chôm gam yù kó râ; Ngá é ahtê bû é matú, hkyîn shosé shê kó râ nghut lhê."[☆]

gâ é Chyúmdang lé lhoq dik râ matú dut é nghut lhê. Haû mù, gyezo pé gi, haû su kut bekô nghut ri.

²⁵ Haû Yesuq é tapzîng nâm má gi, Yhângnu, Yhângnú é yhanggu byizo eq, Klopa é yhangmyi Mariq eq Magadalaq wà mâ é Mariq pé, yap tô bum akô. ²⁶ Yesuq gi, Yhang nâm má, Yhang chyitdap é chángzo eq Yhâng nu yap tô é lé myang kat jáng, Yhâng nu lé, "Ánu ê* nung zo lé wú aq." ga tái mù, ²⁷ chángzo haû lé le, "Nâng nu lé wú aq." ga tái ri. Haû hkûn mai, chángzo haû yuq gi, Yesuq é yhângnu lé, yhâng é yhùm shut shuí ló bê nghut ri.

Yesuq Soqkâng Byit É Hkyô

Mht 27:45-56; Mrk 15:33-41; Luk 23:44-49

²⁸ Hau htâng, Yesuq gi, ahkuî, muzô bàn bê nghut é lé sé luí, haû Chyúmdang lhoq dik râ matú, "Ngò, wui shit ri." ga tái ri. ²⁹ Haû má, tsibiyiq wing chyîn rayambú joq tô ri; haû mù, yhangmoq gi, wuimaù lé tsibiyiq wing chyîn haû má jum yù luí, jâm-yang ahyo má tuí tap mù, Yhâng é nhutwuí jé shoq yhun byí akô nghut ri. ³⁰ Yesuq gi, tsibiyiq wing chyîn haû lé shuq yù mù, "Mù bàn bê." ga tái ri. Yhang, haû su ga tái eq yhang, ulhum nghuq ló mù, kâng byit bê nghut ri.

³¹ Htang nyí gi, ahkyak é Bánno buinyi nghut luí, haû nyí gi, Hên Lajang Buinyi nghut ri. Haû mù, Yudaq byu pé gi, Bánno buinyi má, mâng pé lé tapzîng htoq má a joq to nhâng nàu kô é yanmai, hkyí pé lé bat hkyuî pyám mù, mâng pé lé

yù hkyô pyám nhâng râ matú, Pilat chyáng dúng tôngbán akô. ³² Haû mù luí, gyezo pé gi, lé mù, Yesuq eq jén hui su nhik mã é, rayuq é hkyí lé hí bat hkyuî pyám mù, rayuq é hkyí lé dum bat hkyuî pyám akô nghut ri. ³³ Nghut kôlhang, yhangmoq gi, Yesuq chyáng jé é hkûn, Yhang shi to lánng bê nghut é lé myàng kômù, Yhâng é hkyí lé a bat hkyui byi kó nghut ri. ³⁴ Nghut kôlhang, gyezo rayuq gi, Yesuq é namcham má lham èq htaù kat byi jáng, radá dâm sui eq wui yui htoq lo ri. ³⁵ Haû lé myàng é sù gi, saksé hkám byí ri; yhâng saksé hkám é hkyô gi, tengmán ri. Haû yhang tái kyô é hkyô gi, têng é lé, yhang sé mù, nungmoq le wó lumjîng kó sháng gaq ga, saksé hkám byí é nghut ri. ³⁶ Haû hkyô pé dut é gi, "Yhâng é showui rahkat lháng a lhoq hkyui râ nghut lhê."[☆] gâ é Chyúmdang haû lhoq dik râ matú nghut lhê. ³⁷ Chyúmdang gotù ralhum má le, "Yhangmoq eq htaù htông é sù lé, yhangmoq tu wú kó râ nghut lhê."[☆] gâ é bo tô ashî nghut ri.

Yesuq Lé, Myhup Yhum É Hkyô

Mht 27:57-61; Mrk 15:42-47; Luk 23:50-56

³⁸ Hau htâng, Yesuq é chángzo dut nyi é Aramahti myuq byú Yosep gi, haû Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dúng ri. Pilat èq ahkáng byí kat jáng, yhang gi, gungsôm haû lé, lé yu ló bê nghut ri. ³⁹ Yhang gi, hí hkûn, myín lé, Yesuq lé é hui é sù, Nikodema eq rahá lé é nghut ri; Nikodema gi, mura eq achoy nyhò tô é namngón jung sum xé jói kô yu lé ri. ⁴⁰ Yhangnhik gi, Yesuq é gungsôm lé yù mù, Yudaq byu pé é mâng yhum htông eq rajung za, namngón jung eq rahá, pán yúng èq htop yup to byí akô.

☆ 19:24 Hkya-on 22:18 * 19:26 Ánu ê, gâ é lé, Grik đông gi, "myiwe myhí ê" ga bo tô é nghut lhê. ☆ 19:36 Htoq Ló 12:46; Gyung So 9:12; Hkya-on 34:20 ☆ 19:37 Zhk 12:10

41 Haú Yesuq lé tapzîng má jén sat pyâm é jowò nàm má, hkyâm ralhùm joq ri; ó yuq lé le a lheq wú shí é, lup sik ralhùm hkyâm hkaú má joq tô ri. 42 Haú nyi gi, Yudaq byu pê é Hên Lajang Buinyi nghut é yanmai le, lup haú le chyâng é yanmai le, yhangnhik gi, Yesuq lé, haú má ê lheq tô akô nghut ri.

20

Lup Akôm

Mht 28:1-10; Mrk 16:1-8; Luk 24:1-12

1 Bánno buinyi htâng, napsûn noq le mau a bó shimá, Magadalaq wà mâ é Mariq gi, haú lup má ê jé le, lup hkum má é luqlong huí hpyuq to lánq é lé myang ri. 2 Haú mù, yhang gi, Simun Petruq eq Yesuq chyitdap é chángzo góyuq chyâng din jé ló mù, "Haú Yhumsîng lé, lup mai yu htoq ló byuq bekô; hkâmá ê kat to kô é lé, ngamoq a sé." ga taí ri.

3 Haú mù, Petruq eq chángzo haú gi, lup shut e ló akô. 4 Yhangnhik í yuq é din akô; nghut kôlhàng, chángzo haú gi, Petruq htoq má wó dîn luí, lup má hí din jé e ri. 5 Haú mù, yhang gi, ahkaú shut ngóm wú kat é hkûn, haú pán yúng htui leq tô é lé myang ri; nghut kôlhàng, yhang gi, a wang é nghut ri. 6 Hau htâng, Simun Petruq gi, châng jé luí, lup hkaú shut wang e ri; haú hkûn, yhang gi, haú má pán yúng htui joq tô é lé le, 7 haú Yesuq é ulhum má htup é panchoq lé le, myang ri. Panchoq haú gi, pán yúng htui eq rahá a nghut e za htui jup leq tô ri. 8 Haú lup má hí jé é chángzo le, ahkaú má wang ê luí, myàng jáng, lumjîng bê nghut ri. 9 (Yesuq gi, shi é mai dum dui toq lô râ nghut lhê ga bo tô é Chyúmdang lé, yhangnhik gi, a sê gyo shi kó nghut ri.) 10 Hau htâng, haú chángzô nhik gi, yhùm taú ló bekô nghut ri.

Magadalaq Wà Mâ É Mariq Lé, Yesuq Htoq Shit É Hkyô

Mrk 16:9-11

11 Nghut kôlhàng, Mariq gi, lup shinggan má ngau yap tô ri. Yhang gi, ngàu uchyang lup hkaú má ngóm wú kat ri. 12 Haú hkûn, yhang gi, Yesuq é gungsôm lheq tô é jang má, hpyu é mebu wut é maumang lagyo í yuq hkyî htâng shut rayuq, umhtúng shut rayuq, zung to kô é lé, myang ri.

13 Yhangnhik gi, "Myiwe myhí ê, nàng, haí mù ngau nyi lhê lhú?" ga myi kôjáng, yhang gi, "Ngá é Yhumsîng lé yù ló hpyuq kôluí, Yhang lé hkâmá ló lheq to kô é lé, ngò a sê é yanmai nghut lhê." ga tû taí ri. 14 Haú su ga luí, yhang, lhing wú kat é hkûn, Yesuq yap tô é lé myàng kôlhàng, Yesuq nghut é lé yhang a wú sé nghut ri.

15 Yesuq gi, "Myiwe myhí ê, nàng, haí mù ngau nyi lhê lhú? Nàng gi, ó yuq lé ho wún lhê lhú?" ga myi jáng, yhang gi, hkyâm saí zo sù su ngam pyám mù, "Sarà ê, nàng, Yhang lé waq htot pyâm é nghut le gi, hkâmá ê lheq tô é, ngo lé taí kyo laq, ngò, Yhang lé yu ló râ." ga taí ri.

16 Haú hkûn, Yesuq gi, yhang lé, "Mariq ê" ga wut kat ri.

Mariq gi, Yhâng shut lhing mù, Hebre myíng dông, "Raboni!" ga wut kat ri. (Haú gi, "Sarà ê" gá é lichyúm nghut ri.)

17 Yesuq gi, "Ngo lé hkázang shi; hkâsu mù gá le, Ngò gi, haú Íwâ chyáng a taú doq ló shí é nghut lhê. Nàng gi, Ngá é gumang wui chyáng ló mù, yhangmoq lé, Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng doq ló zó nghut lhê." gá ri nghú, ló taí kyo aq." ga, yhang lé taí kat ri.

18 Magadalaq wà mâ é Mariq gi, chángzô pê chyáng ló mù, "Yhumsîng lé, ngò myàng bê!" ga

taí luí, yhang lé shit kat é pé lé, taí kyô ri.

Yesuq, Yhâng É Chángzô Pé Lé Htoq Shit É Hkyô

Mht 28:16-20; Mrk 16:14-18; Luk 24:36-49

¹⁹ Haú nyí, Bánno buinyí htang myìn lé, haú chángzô pé gi, Yudaq byu pé lé gyuq kô é yanmai, hkum tsing myhí pyám mù, zing tô bum kô é u lé, Yesuq gi, lé jé mù, yhangmoq é agùng má yap to luí, "Nungmoq nguingón yuqyo nyí sháng gaq!" ga taí ri. ²⁰ Yhang gi, haú su ga taí é htâng má, yhangmoq lé, Yhâng é loq pé eq namcham lé tân shit ri. Chángzô pé gi, haú Yhumsing lé myàng kôjáng, gyai gabú bùm bekô nghut ri.

²¹ Yesuq gi, "Nungmoq nguingón yuqyo nyí sháng gaq! Haú Iwa gi, Ngo lé nhang kat é su, Ngò gi, ahkuí, nungmoq lé nhang kat é nghut lhê." ga dum taí ri. ²² Haú su ga taí mù, Yhang gi, yhangmoq é ahtoq má soq mut luí, "Haú Chyoiyúng Woi-nyí lé hap yù keq. ²³ Ó yuq é mara pé lé nghut kôle, nungmoq hkyut byí é nghut jáng, mara haú pé gi, hkyut pyám byí é hui râ nghut lhê; nungmoq a hkyut byí é nghut jáng, mara haú pé gi, hkyut pyám é hui râ a nghut." ga taí ri.

Htomaq Lé, Yesuq Htoq Shit É Hkyô

²⁴ Haú chángzo raxe í yuq má bo é, Zozûm le gâ é Htomaq gi, Yesuq lé jé é hkûn, haú chángzô pé eq rahá a nyi to nghut ri. ²⁵ Haú mù luí, gotû chángzô pé gi, yhang lé, "Haú Yhumsing lé, ngamoq myàng bê." ga taí kyô akô.

Nghut kôhang, yhang gi, yhangmoq lé, "Ngò gi, Yhâng é loq pé mâ é shamtoq zuhkô lé myàng mù, ngá é loqnyhui èq jói wú é eq, Yhâng é namcham má, ngá é loq èq myang lap wú é za a nghut jáng, haú lé ngò lumjng râ a nghut." ga taí ri.

²⁶ Rabat myáng jáng, chángzô pé gi, haú yhúmhaú má dum nyi tô akô; Htomaq le, yhangmoq eq rahá nghut nyi ri. Haú hkum pé myhí to kôhang, Yesuq gi, lé jé mù, yhangmoq é agùng má yap to luí, "Nungmoq nguingón yuqyo nyí sháng gaq!" ga taí ri. ²⁷ Hau htâng, Yhang gi, Htomaq lé, "Náng é loqnyhui, shí má lé jói mù, Ngá é loq pé lé wú aq. Náng é loq lhâm kat mù, Ngá é namcham má lé lap wú aq. A lùm hkâkut, lumjng nyi aq." ga taí ri.

²⁸ Haú hkûn, Htomaq gi, "Ngá é Yhumsing, ngá é Garai Gasang ê!" ga Yhang lé taí ri.

²⁹ Yesuq gi, yhang lé, "Nàng gi, Ngo lé myang é yanmai, lumjng é a nghut lhú? A myàng kôhang, lumjng é bang gi, hkungsô wó nyi ri." ga taí ri.

³⁰ Laiká buk shí má a kê tô é limik kumlhá pé gotû myo myo lé le, Yesuq gi, Yhâng é chángzô pé hí má kut shit bê nghut ri. ³¹ Nghut kôhang, Yesuq gi, Garai Gasang é Yhangzo Hkrisduq nghut é lé, nungmoq wó lumjng râ matú eq, lumjng é yanmai, nungmoq Yhâng é mying má asak wó kó râ matú, shí hkyô pé lé kê tô é nghut lhê.

21

Ngozo Wó Chyup Yu É Limik Kumlhá

¹ Hau htâng má, Yesuq gi, Tiberi nhông yàm má, Yhâng é chángzô pé lé dum htoq shit ri. Yhang htoq shit é hkyô gi, a-ô mâ é đông nghut ri. ² Simun Petruq, Zozûm le gâ é Htomaq, Galile mau Hkanaq wà mó mâ é Nahtanelaq, Zebedi é yhangzo nhik eq gotû chángzo í yuq pé gi, rahá nyi to bum akô. ³ Haú hkûn, Simun Petruq gi, yhangmoq lé, "Ngò gi, ngozo kóng ê râ." ga taí jáng, yhangmoq gi, "Ngamoq le châng lé râ." ga taí akô. Haú mù luí, yhangmoq gi, htoq é mù, haú lhai má wàng bekô nghut ri; nghut

kôlhang, haú myîn, radu lhang a wó kóng kó nghut ri.

⁴ Htang napkyó maubó lo é hkûn, Yesuq gi, wuiyàm má yap tô ri; nghut kôlhang, haú chángzô pé gi, Yesuq nghut é lé a wú sé kó nghut ri.

⁵ Yesuq gi, yhangmoq lé, "Luzúm wuê, nungmoq, ngozo wó akô lhu?" ga, wut myi kat jáng, yhangmoq gi, "A wó." ga tú taí akô.

⁶ Haú hkûn, Yhang gi, "Nungmoq é gùn lé, haú lhai é loqyo hkyam shut dú hkyô kat keq; haú jáng, nungmoq wó kông yù kó rá nghut lhê." ga taí ri. Haú mù, yhangmoq gi, gùn dú hkyô kat é hkûn, ngozo lúm myô é yanmai, haú gùn lé lhang a wó lhang yù lo kó nghut ri.

⁷ Haú mù luí, haú Yesuq chyitdap é chángzo gi, Petruq lé, "Yhumsing ru nghut ri." ga taí ri. Simun Petruq gi, "Yhumsing ru nghut ri." gâ é lé wó gyo eq yhang, yhang gi, mebu hkyut pyâm tô é yanmai, buhîng mó lé, yhang é gùng má baíyup yù mù, wuê hkaú má byam wang ló bê nghut ri. ⁸ Haú chángzo góbang gi, wuiyàm eq ngo xê làm kô za wê é yanmai, ngozo bying tô é gùn lé, wuiyàm shut lhai mai she jé lo akô nghut ri. ⁹ Yhangmoq gi, wuiyàm má jé dap ló kô é hkûn, myigye gyúng é myihkyóm htoq má ngozo nyhîn tô é lé le, muk ratsuí joq tô é lé le, myang akô.

¹⁰ Yesuq gi, yhangmoq lé, "Haú, ahkuí za nungmoq wó kông yu é ngozo, ra-am yù lé keq." ga taí ri.

¹¹ Haú mù, Simun Petruq gi, lhai má doq ji luí, kô é ngozo rasho nó xe sùm du yhang bo é gùn lé, dùng yàm má she htoq tô ri. Ngozo haú myhó myo kôlhang, gùn gi, a jeq nghut ri. ¹² Yesuq gi, yhangmoq lé, "Napzang lé zo keq." ga taí ri. Chángzô pé gi, Yhang, haú Yhumsing nghut é lé sé kô é yanmai, ó yuq lhang, "Nàng, ó yuq

nghut lhê?" ga, a wám myi kó nghut ri. ¹³ Yesuq gi, lé mù, muk lé é yù luí, yhangmoq lé byí ri; ngozo lé le, haú su kut ri. ¹⁴ Yesuq gi, shi é mai lhoq dui toq yù huí é htang, Yhang é chángzô pé lé htoq shit é má, shí gi, sum dâm nghu rá dâm nghut ri.

Yesuq Eq Petruq

¹⁵ Yhangmoq bàn zô bùm kô é htang má, Yesuq gi, Simun Petruq lé, "Yohan é yhangzo Simun é, nàng gi, shí bang htoq má, Ngo lé teng za je chyitdap lhê lhu?" ga myi jáng, yhang gi, "Nghut lhê; Yhumsing é, ngò, Nàng lé chyitdap é hkyô lé, Nàng sê lhê." ga tú taí ri. Haú hkûn, Yesuq gi, "Ngá é sau zô pé lé, baú aq." ga, yhang lé taí ri.

¹⁶ Hau htang, Yesuq gi, "Yohan é yhangzo Simun é, nàng gi, Ngo lé teng za chyitdap lhê lhu?" ga dum myi jáng, yhang gi, "Nghut lhê; Yhumsing é, ngò, Nàng lé chyitdap é hkyô lé, Nàng sê lhê." ga tú taí ri. Haú hkûn, Yesuq gi, "Ngá é sau pé lé, rém aq." ga taí ri.

¹⁷ Dum radàm, Yesuq gi, yhang lé, "Yohan é yhangzo Simun é, nàng gi, Ngo lé chyit lhê lhu?" ga myi ri.

Haú hkûn, Petruq gi, "Nàng gi, ngo lé chyitdap lhê lhu?" ga, yhang lé Yesuq eq sùm dam dâm taí é yanmai, yhang myit nó luí, "Yhumsing é, Nàng gi, lhanglhang lé sê lhê; ngò, Nàng lé chyitdap é hkyô lé, Nàng sê lhê." ga taí ri.

Haú hkûn, Yesuq gi, "Ngá é sau pé lé, baú aq. ¹⁸ Ngò, nàng lé teng za taí lé, nàng, zorâm nghut é hkûn gi, yhumsing gùng yhumsing hpyihit baíyup* yù mù, é nau é jowò hkangmó má wó é é nghut lhê; nghut kôlhang, nàng mang jáng gi, loq í loq lham luí, nang lé góyuq èq hpyihit baíyup byi mù, nàng a é nau é jowò shut shuí é rá nghut lhê." ga taí ri. ¹⁹ (Yesuq haú su ga taí é gi, haú Petruq, hkásu kut shi

* **21:18** Hpyihit baíyup gâ é lichyúm gi, mebu wut luí ri ri kut tô é lé gâ lhê.

é đông mai, Garai Gasâng é hpung-wup shing kang lé dan hu nhâng râ nghut é lé, taí nau é nghut ri.) Hau htâng, Yesuq gi, yhang lé, "Ngá htâng cháng aq." ga taí ri.

²⁰ Haú hkûn, Petruq gi, lhîng wú kat le, haú Yesuq chyitdap é chángzo, yhangmoq htâng châng wún é lé myàng ri. Chángzo haú gi, hí hkûn, myinzang zô é u lé, Yesuq chyáng leq ngè mù, "Yhumsîng ê, Nang lé ap pyám râ sù gi, ó yuq lhú?" ga, myi wú é sù nghut ri.

²¹ Petruq gi, haú yuq lé myàng jáng, Yesuq lé, "Yhumsîng ê, shí yuq gi, hkâsu dut râ lhú?" ga myi ri.

²² Yesuq gi, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lhê lhú? Nàng gi, Ngá htâng cháng aq." ga tû taí ri. ²³ Dang hau é yan-mai, chángzo haú yuq a shî râ nghut lhê gâ é danglám gi, haú gumang wui chyáng byo myín to bê nghut ri. Nghut kôhlang, Yesuq gi, haú yuq a shî râ hkyô lé taí é a nghut, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lhê lhú?" ga, taí é ru nghut lhê.

²⁴ Shí pé lé saksé hkám mù, shí pé lé kê tô é sù gi, chángzo haú yuq nghut lhê. Yhâng é saksé gi, têng é lé, ngamoq sê lhê.

²⁵ Yesuq gi, gotû muzó myo myo le kut ashî nghut ri. Muzó haú pé lhum jup lé, kê htoq yu é ru nghut le gi, kê tô é laiká buk haú pé gi, mingkan gón má lhang ngo râ a nghut nghú, ngò wó myit ri.

LAGYO Laiká (Acts)

*Yesuq, Mauhkûng Má Shuî Yû
Huî É Hkyô*

¹ Htohpiluq ê, Yesuq yhang hkyin yu tô é lagyô pé lé, Chyoiyúng Woi-nyí wum-o êq dang ban pying tô é htâng má, Garai Gasang yhang lé mauhkûng shut shuî yu é buinyi jé shoq, ² Yhang kut shit é hkyô pé eq, mhoqshit é hkyô pé banshoq lé, hí lhê é laiká buk má ngò kâ kat bê nghut lhê. ³ Yesuq gi, shî hkâm é htâng má, Yhang dui toq bê hkyô lé, lungíng é saksé myo myô êq yhangmoq lé tún shit mù, buinyi myi xê nyí gyoro má yhangmoq chyáng lé htoq shit shit kut luî, Garai Gasâng é mingdán hkyô lé hko kyô ri. ⁴ Yhang, yhangmoq eq rahá zup tô é hkûn, hkunmó hkyô é gi, "Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wâ ê danggidiq byí tô é chyunghuq lé lánng nyí keq. ⁵ Hkâsu mù gâ le, Yohan gi, wui êq wui-myhup hkâm byí é nghut lhê; nghut kôlháng, nungmoq kúm gi, buinyi hkâ-myháng a myáng má, Chyoiyúng Woi-nyí mai baptsima wó hkam yû kó râ nghut lhê." gâ ri.

⁶ Lagyô pé gi, Yhang eq rahá chôm zup míng tô é hkûn, Yhang lé, "Yhumsíng ê, nàng, haû Israelaq byu pé lé mingdán dum xuq byi râ gi, ahkuí yhang nghut bê lhú?" ga myí akô.

⁷ Yesuq gi, "Áwa gi, Yhâng é ahkáng ayá êq kut to bé é ahkyíng yam-yoq pé lé, nungmoq sé nó a ra. ⁸ Nghut kôlháng, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yû mù luî, Yerusalem wà mó eq Yuda mau

banshoq, Samariq mau eq maumyí htáng shoq, ngá é saksé pé dut kó râ nghut lhê." ga luî, yhangmoq lé taí ri.

⁹ Dang haû ban taí é htâng má, yhangmoq wú nyi le, Yhang gi, mauhkûng shut shuî yu é hui mù, yhangmoq hí mai Yhang lé a myàng loshoq, mhut êq htup ló byuq bê nghut ri.

¹⁰ Yesuq doq ló nyi é u lé, yhangmoq mauhkûng shut ru wú tsuq nyi bum ashî le, hpyu é mebu wut é byù í yuq gi, radá dâm yhangmoq nàm má htoq yap lò mù, ¹¹ "Galile byu pé ê, haî mù luî mauhkûng shut wú tsuq nyi akô lhú? Nungmoq é hí mai mauhkûng shut shuî yû huî é, haû Yesuq mauhkûng shut doq ló é u lé, nungmoq myang kat é su, Yhang dum jé lé râ nghut lhê." ga taí akô.

*Yudaq É Jowò Má, Mahtiaq Lé
Hkyin Kat É Hkyô*

¹² Hau htâng má, yhangmoq gi, Tsanlun Bùm mai, Yerusalem wà mó shut taû ló bekô.* Haû gyoro gi, Bánno buinyi má ge sô é í za wê ri. ¹³ Yhangmoq jé ló kôjáng, yhangmoq nyi nyi kô é yhùm ahtoq pyâm mã é wap shut doq ló akô; haû bang gi, Petruq, Yohan, Yakuq, Andre, Hpilip eq Htomaq, Barhtolume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akô.

¹⁴ Yhangmoq lhunglhâng bang gi, myiwe wuî le, Yesuq é yhângnu Mariq le, yhanggu pé le kut mù, i-myit rahkat za kyû chôm dung dung kut nyi akô.

¹⁵ Buinyi haû yoq má, Petruq gi, lumjíng é gumang gu-nhá† wuî rasho í xê yuq kô zup zíng tô é gung gûng má, toq yap mù, ¹⁶ "Gumang gu-nhá wuî ê, Yesuq lé chyup é bang lé hkyô shuî hí é sú Yudaq

* 1:12 Tsanlun bùm eq Yerusalem gyoro gi, déng rawuí hkup kô we ri. † 1:15 Gumang gu-nhá gâ é lé, Grik má gi, gumang za gâ to lhê.

eq séng luí, hí hpyang Dawiq é nhut mai Chyoiyúng Woi-nyí taí tó é Chyúmdang gi, dik byuq bê nghut ri. ¹⁷ Yhang gi, nga-nhúng má ng-hap lhôm é hui mù, hpúng sará ayá wó bê sù nghut kôhang shí hkyô dut bê nghut ri." ga taí ri.

¹⁸ (Yudaq gi, yhang kut é agè ashop é muzó mai wó é ahpau èq myigùng ratóng wui yu é htàng, haú má yhang, a-nghop dông byit gyó mù wam buq goq luí, ú banshoq buq myín byuq bê nghut ri. ¹⁹ Haú hkyô lé Yerusalem wà mó má nyi é lhunglhâng bang wó gyo kôjáng, myigùng haú lé yhangmoq é myíng dông, 'Akeladama' ga myhíng akô; haú gi, 'Sui myigùng', gá é nghut ri.)

²⁰ Petruq xoq taí é gi, "Hkâsu mù gâ le, Hkya-on Kungtôn Laiká má, 'Yhâng é jowò chamchuyuiù dut byuq sháng gaq; haú má ó le a nyí kó sháng gaq.'^{*}

ga luí le, dum

'Yhang wó é ayá lé byù góyuq wó yu pyám byi sháng gaq.'^{*}

ga luí le, bo tó ri. ²¹⁻²² Haú mù luí, Yohan baptisma byí hi é hkûn mai, Yesuq lé nga-nhúng chyáng mai shuí yu é buinyi jé shoq, Yhumsíng Yesuq nga-nhúng eq rahá htoq htoq wàng wàng kut nyi é buinyi ban-shoq pé má, nga-nhúng eq yhang zum nyi sù rayuq lé, hkyin kat rá dut ri. Haú yuq gi, Yesuq dum dui toq é hkyô lé nga-nhúng eq rahá saksé dut rá sù nghut lhê." gâ ri.

²³ Haú hkûn, yhangmoq gi, Yustu ga le myhíng é, Barsabaq gá é Yosep eq Mahtiaq nhik lé hkyin tó akô. ²⁴⁻²⁵ Haú mù, yhangmoq kyúdung kô é gi, "Byù banshoq é i-myt lé sê é Yhumsíng ê, Yudaq Iskarut gi, yhang ló gíng é jowò shut ló rá ga, tó pyám tó é yhâng é lagyo ayá é matú shí nhik má é nàng hkyin tó é sù lé tûn shit laq ò." ga akô. ²⁶ Hau htàng, yhangmoq, byù hkyín shosé she le,

Mahtiaq chyáng ang bê. Haú mai, Mahtiaq lé gi, haú lagyo raxe rayuq má jat kat bê nghut ri.

2

Chyoiyúng Woi-nyí Jé Gyó Lo É Hkyô

¹ Penteko-ti* buinyi jé jáng, lumjíng bang banshoq gi, jowò ralhum má za, chôm zup míng nyi tó akô. ² Haú hkûn, laidun mó lo é su gâ é htê gi, byodàn ratung, mauhkûng mai myíng htoq lô mù luí, yhangmoq zing tó é yhùm byíng shoq dut to bê nghut ri. ³ Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri. ⁴ Yhangmoq lhunglhâng bang gi, Chyoiyúng Woi-nyí byíng lo bùm kômù, Woi-nyí èq taí nhang é eq rajung za, laklai dang dông nyo lo bum akô.

⁵ Haú u lé, mauhkûng ô má joq é mingdán hkangmó mâ é, tarâ hkunggâ é Yudaq byu pé gi, Yerusalem wà mó má bíng nyi bum akô. ⁶ Haú myíng é htê lé wó gyo kôjáng, byù rajùm rayò zíng lé lô kômù, ó le ô é myíng dông sê gyô yù kô é yanmai, maú úng-àng byuq bùm kôluí, ⁷ maú bùm uchyang taí kô é gi, "Wú keq, ahkuí dang taí nyi é byù shí bang lhunglháng gi, Galile byu pé chyat a nghut kó lhú? ⁸ Haú nghut é wa, hkâsu mù nga-nhúng ó le ô é yhumsing mau mâ é myíng dông sê gyô yu lhê lhú? ⁹ Parhti, Medi, Elam mau mâ é bang eq Mesopotamiaq mau, Yuda eq Kapadokia mau, Pontuq eq Asia, ¹⁰ Hprugi eq Pamhpulí, Egotuq ming má nyi é bang eq Kuruni myuq nâm má nyi é Libya ming mâ é bang, Romaq myuq mai lé bíng nyi é Yudaq byu pé eq Yudaq noqkuq htúng má lhing wang lò bang, ¹¹ Kreti zinlóng eq Arabiq mau má é bang, nga-nhúng

^{*} 1:20 Hkya-on 69:25 ^{*} 1:20 Hkya-on 109:8
htàng ngo xê nyí jé é buinyi má, kut é poi lé gâ lhê.

^{*} 2:1 Penteko-ti gâ é gi, Lhoqlhai Poi lá é

gi, yhangmoq hko kyô é Garai Gasâng é mauhpo muzó hkyô lé, yhumsing mau má é myíng dông yhang wó sê gyô yu ri-nhung." gâ ri. ¹² Yhangmoq banshoq bang gi, maú úng-âng byuq kômù, "Shí gi, haí wá nghut lhê lú?" ga le, rayuq eq rayuq myí lhùm bum akô.

¹³ Nghut kôlhang, byù ra-am gi, "Shí bang gi, í shuq wut é bang nghut akô." ga luí, taí jihpoi bum akô nghut ri.

Petruq Hko Kyô É Mungdang

¹⁴ Haú hkûn, Petruq gi, lagyo góbang raxe rayuq eq toq yap mù, htê mó èq byù haú bang lé taí é gi, "Yudaq byu pé eq Yerusalem wá mó má nyí nyí é lhunglhang bang ê, rago gyô wú keq! Ngò, nungmoq lé, shí hkyô taí kyo kôlé. ¹⁵ Shí bang gi, nungmoq sú-ngam é dông, shuq wut é bang a nghut; hkâsu mù gâ le, ahkuí gi, napkyó gau hkyíng za ru nghut ashí. ¹⁶ Shí hkyô kúm gi, myiqhtoi Yoelaq taí tô é eq rajung za dut é nghut ri. ¹⁷ Yhang taí tô é gi,

'Garai Gasang ísu gâ ri: Ló htâng é buinyí pé má, Ngò Ngá é Woi-nyí lé byù lhunglhang bâng é ahtoq má hut gyun rá nghut lhê.

Haú mù, nungmoq é yuqzo byizó pé gi, myiqhtoi htoi kó rá; nungmoq é zorâm wuì gi, myoqwup shing-rán myàng kó rá; nungmoq é hpaú mâng pé gi, yhupmoq myàng kó rá nghut lhê.

¹⁸ Buinyí haú pé má, Ngá é dui-nhâng zoshâng hpò pé eq dui-nhâng zoshâng myhí pé é ahtoq má lhang, Ngò Ngá é Woi-nyí lé hut gyun mù luí, yhangmoq gi, myiqhtoi htoi kó rá nghut lhê.

¹⁹ Ngò gi, ahtoq mauhkûng htoq má mauhpo muzó pé lé, a-ô myigùng htoq má, kumlhá pé lé, sui eq, myí eq, my-ihkau dùm pé èq kut mù tún shit rá.

²⁰ Haú Yhumsing é kô hkikhkam é buinyí a jé shimá, buì gi, mauchut byuq, lhamó gi, sui dut byuq é hí dut rá nghut lhê.

²¹ Haú hkûn, Yhumsing é myíng lé llang é bang yuq hkangmó gi, hkyi yu é hui kó rá nghut lhê.*

gâ ri.

²² Israelaq byu pé ê, dang shí lé gyô yù keq, nungmoq sê é eq rajung za, Nazaret wá byù Yesuq nungmoq é hí má tún shit é, laklaí kumlhá, mauhpo muzó eq kumlhá pé gi, Yhang lé Garai Gasang nhang kat é saksé dut bê nghut ri. ²³ Shí yuq gi, Garai Gasang myit hpyit tô é hkyô eq, hí te sê é hpaqchyí dông, nungmoq chyáng ap pyâm é hui mù, nungmoq gi, agé ashop byu pé é loq èq, Yhang lé tapzing htoq má jén sat pyâm nhâng bekó nghut ri.

²⁴ Nghut kôlhang, haú shí-nò hkyô gi, Yhang lé wó hkûm zing jung a nghut é yanmai, Garai Gasang gi, Yhang lé shí-nò jamjau mó mai, lhut pyâm byi luí lhoq dui toq yú bê nghut ri. ²⁵ Dawiq gi, shí yuq eq séng luí taí é má,

'Haú Yhumsing gi, ngá é myoq hí má hkâ-nhám le nyí nyí é lé ngò myàng bê.

Yhang ngá é loqyo hkyam má nyí nyí é yanmai, ngo lé wó lhoq nhún rá a nghut lo.

²⁶ Haú mù, ngá i-myt gi, nguínón nyí luí, ngá nhut shô gabú hkya-ôn nyí ri;

ngá é gungdu le myit myoqbyù jowó má nyí nyí rá nghut lhê.

27 Hkâsu mù gâ le, nàng, ngá é woi-nyí lé mosumhkung má tô pyâm to rá a nghut.

Nàng, náng é Chyoiyúng Sù lé bup byuq é hui nhâng rá a nghut.

28 Nàng, ngo lé asak dui é hkyô sé nhâng bê.

Náng é myoq hí má, nàng, ngo lé gabú hkyô lhoq pying byi rá nghut lhê.[†]*

gâ ri.

29 Gumang wui ê, nga-nhùng é ichyí iké Dawiq kâng byit mù, myhup pyám hui bê hkyô lé le, yhâng é lup gi, hkû-nyí jé shoq nga-nhùng chyáng joq tô é lé le, ngò, nungmoq lé a gyuq a kyum wam tái lhê.

30 Dawiq gi, myiqhtoi rayuq nghut é yanmai, yhâng é awut ashín mã é rayuq lé, yhâng é hkohkâm tanghkuq má zùng nhâng rá ga Garai Gasang byi tô é danggidiq lé sê to mù, ³¹ 'Hkrisduq† gi, mosumhkung má pyâm to a hui rá eq, Yhâng é gungsho a bup byuq é za, dum dui toq ló rá nghut lhê.', gâ é hkyô lé te sê to luí tái tô ri. ³² Garai Gasang gi, haú Yesuq lé lhoq dui toq yù bê. Ngamoq banshoq bang gi, haú hkyo é saksé pé nghut nyi ri. ³³ Haú mù, Garai Gasang gi, Yesuq lé Yhâng é loqyo hkyam má lhoq toq to bê. Yesuq gi, Garai Gasang byi tô é danggidiq Chyoiyúng Woi-nyí lé hkam yù mù, hut hkyô kat bê nghut é yanmai, ahkuí nungmoq shí su wó myâng, wó gyo bekô nghut ri. ³⁴⁻³⁵ Hkâsu mù gâ le, Dawiq gi, mauhkûng htoq tsáng myhâng má a doq ló wú kôlhang, yhang gi,

'Haú Yhumsing Garai gi, ngá é Yhumsing lé,

"Ngò, náng é gye pé lé, náng é hkyí nang tanghkuq kut pyám byí é hkyíng jé shoq,

Ngá é loqyo hkyam shut zung nyi shi aq." gâ ri.[†]*

ga luí, tái ri.

³⁶ Hau é yanmai, Garai Gasang gi, nungmoq eq tapzing má jén sat pyâm é haú Yesuq lé, Yhumsing eq Hkrisduq dut nhang é hkyô, Israe-laq byu pé lhunglhâng bang hkyak sé nyi kó sháng gaq ô." gâ ri.

Sâng-hi Lumjng É Bang

³⁷ Yhangmoq gi, haú lé wó gyô bùm kôjáng, yhangmoq é i-myt má záng kô é nghut mù luí, "Gumang wui ê, ngamoq hkâsu kut lo rá lúhú?" ga luí, Petruq eq lagyo góbang lé myí akô.

³⁸ Petruq gi, "Nungmoq yuq hkgangmó myit lhing mù, Yesuq Hkrisduq é mying mai wui-myhup hkâm yù keq; Haú jáng, nungmoq é yubak hkyut pyám byí é hui kó rá nghut lhê. Haú hkûn, Chyoiyúng Woi-nyí gâ é chyunghuq lé, nungmoq wó yù kó rá nghut lhê. ³⁹ Hkâsu mù gâ le, danggidiq haú gi, nga-nhùng é Yhumsing Garai Gasang ji yù rá bang banshoq nghut é, nungmoq eq nungmoq é yhangzo yhangshú pé eq le, mau we má nyi é lhunglhâng bang eq le, sêng lhê." ga luí, yhangmoq lé tái kyô ri.

⁴⁰ Yhang gi, dang gotù myo myô eq le saksé hkâm mù, "Shí agè ashop é amyú mai wó lut htoq lo keq ô!" ga luí, yhangmoq lé lhoq pun lhoq kyíng ri. ⁴¹ Dang haú lé guq yu é bang gi, wui-myhup hkâm yu bùm kôluí, haú nyí má byù sum hkyíng kô jat wàng lo bum bekô nghut ri.

Lumjng Bang Zùm Yap É Hkyô

⁴² Haú bang gi, lagyo pé mho-qshit é hkyô, zùm yap é hkyô, muk hpê gam é hkyô† eq akyú dúng é

* 2:28 Hkya-on 16:8-11 † 2:31 Grik dong Hkrisduq gâ é gi, xú but hui Sù gâ é lichyúm nghut mù, Hebre dong Mesaia gâ é eq rajung za nghut lhê. * 2:34-35 Hkya-on 110:1 † 2:42 Muk hpê gam hkyô gâ é lé lichyúm í dông wó yu lhê - radông gi, rahá chôm zo chôm shuq é lé gâ lhê; radông gi, Póido chôm zô é lé gâ lhê.

hkyô má, i-myt rahkat za chô m châng nyi akô. ⁴³ Lagyo pé kut shit é mauhpo muzô eq limik kumlhá pé myo myô é yanmai, lhunglhâng bang gi, gyuq maú nyi bum akô nghut ri. ⁴⁴ Lumjîng é lhunglhâng bang gi, rawò má za zup zîng to mù, azîng zè banshoq lé chô m chung nyi akô. ⁴⁵ Yhangmoq gi, yhumsing é sutzè pé lé, ùng pyám mù, yuq hkgangmó lé, yhang râ tô é eq rajung za gàm byî akô. ⁴⁶ Yhangmoq gi, nyí wuí myit rahkat zâ èq noqkuq yhûm wàng má nyi nyi akô. Yhumsing é yhûm pé má le muk hpê gam é hkûn, ⁴⁷ Garai Gasang lé hkyá-on kungtôn uchyang, gabú é eq myit huí é èq chô m zo chô m shuq nyi bum akô; byù banshoq bâng é hí má le myoqdong wó bum akô. Haú Yhumsing gi, nyí wuí yhangmoq chyáng hkyi yù hui bang jat lò nhang ri.

3

Hkyî Hten Sû Rayuq Lé, Petruq Lhoq Gê Byî É Hkyô

¹ Ahkuí, Petruq eq Yohan gi, myinhâng zó sum hkyîng lhê é kyûdung nám má, noqkuq yhûm shut doq e ló akô. ² Haú hkûn, ínû unghkaú mai hkyî hten lugù dut é byù rayuq lé, noqkuq yhûm má wang lé lô bâng chyáng mai dung zo sháng gaq ga, Yúnglho hkum ga myhîng é hkúmdong má nyí hkgang nyí mó waq lé lô mù, lé nyhi to to kut akô. ³ Yhang gi, Petruq eq Yohan, noqkuq yhûm haú má wang e ló é lé, myàng luí, lhom dîng nyi ri. ⁴ Petruq eq Yohan kúm gi, yhang lé chô m wú tsuq to mù, "Nga-nhik lé tu wú aq." gâ akô. ⁵ Haú mù, yhang, yhangnhik chyáng mai rajung jung wó yú râ lé myit myoqbyù luí, yhangnhik lé rago za saí wú tô ri.

⁶ Petruq kúm gi, "Ngùn, hîng gi, ngò a wó; nghut kôlhâng, ngò wó é nang lé byî lé: Nazaret và byù

Yesuq Hkrisduq é myîng mai toq sô ló aq." ga taí uchyang, ⁷ yhâng é loqyo loq má zui mù lîng toq kat ri; haú hkûn jâng, yhâng é hkyî kochang-chap pé wúm bo lò bê nghut ri. ⁸ Haú mù, yhang gi, radá dâm toq yap mù sô kat luí, so uchyang, byâm uchyang Garai Gasang lé hkyá-on mù, yhangnhik eq rahá noqkuq yhûm má wang ló ri. ⁹ Yhang sô e ló nyí é eq Garai Gasang lé hkyá-on kungtôn nyi é lé, lhunglhâng bang chô m myang akô. ¹⁰ Haú yuq gi, noqkuq yhum é Yúnglho hkum gâ é hkúmdong má zung to mù, dung zo sù nghut é lé yhangmoq matsîng kô é nghut mù luí, yhâng chyáng dut lò bê hkyo é yanmai, maú hong byuq bum akô nghut ri.

Petruq Hkô Kyô É Mungdang

¹¹ Petruq eq Yohan chyáng haú dung zo sù byî châng tô é hkûn, shiwa byu pé gi, wú maú uchyang, Sholumon jîrop shut, yhangmoq chyáng dîn yán wang lé lo bum akô. ¹² Petruq haú lé myàng jâng, shiwa byu pé lé taí é gi, "Israellaq byu pé è, shí yuq é hkyô lé haí mù luí maú nyi akô lhú? Nga-nhik é dîngmán hkyô eq wum-o a-tsâm èq, shí yuq lé wó so nhang é su ngâm luí, ngá-nhik lé wú tsuq bum akô lhú? Haú dîng a nghut. ¹³ Abraham, Isak eq Yakup pé é Garai Gasang, nga-nhûng é Ichylîwa pé é Garai Gasang gi, Yhâng é dui-nhâng zoshâng Yesuq lé hpungwup shîngkang lhoq htoq byî é nghut ri; nungmoq kúm gi, Yhang lé sat huí shoq ga ap pyám kômù luí, Pilat zau hpó mai Yhang lé nhang pyám râ ga myit to bê lé, nungmoq gi, Yhâng é hí má yhang, Yhang lé he-ngik pyâm akô nghut ri. ¹⁴ Haú chyoiyung dîngmán é Sù lé nungmoq he-ngik pyám kômù, byù sat sù lé sheq dîng htoq yù kôluí, ¹⁵ Asak Yhumsing lé gi, sat pyám bekô.

Garai Gasang kúm gi, haú yuq lé shi é mai lhoq dui toq yú bê nghut ri; ngá-nhik gi, haú hkyo é saksé nghut nyi lhê. ¹⁶ Yesuq é myíng lé lumjǐng é yanmai, haú lumjǐng myit mai za, shí nungmoq myang é sê é sù lé wum-o lhoq pyíng byi bê nghut ri; nghut bê, Yesuq lé lumjǐng é yanmai, shí yuq lé, nungmoq banshoq bâng é hí má, gumjup shoq lhoq ge to byi bê nghut ri.

¹⁷ Ahkuí, gumang wui ê, nungmoq é uphkâng bang kut é su, nungmoq le haú hkyô lé a sé mù kut pyâm é hkyô lé ngò sê nyi lhê. ¹⁸ Nghut kôlhang, haú hkyô gi, Garaí é Hkrisduq shí-nò jamjau hui rá nghut lhê ga luí, myiqhtoi banshoq bang lé hí hí mai taí nhang tô é Garai Gasang yhang, lhoq dik é nghut ri. ¹⁹ Hau é yanmai, haú Yhumsing chyáng mã é nguingón é ahkýing yâm yoq jé lô rá matú le, ²⁰ nungmoq é matú hkyin tô é Hkrisduq nghut é Yesuq lé, Yhang nhang kat byi rá matú le, nungmoq é yubak mara hkyut pyâm byí é hui rá matú le, nungmoq gi, myit lhǐng mù Garaí Gasang chyáng lhǐng lò keq. ²¹ Garaí Gasang gi, a-nham pyat mai, Yhâng é chyoiyúng myiqhtoi pé é nhut mai, taí nhang to bê eq rajung za, nyi minyi, joq mijoq lé asik dum sai é pyat jé shoq, Yesuq lé mauhkúng htoq má nyi nhang to rá nghut lhê. ²² Hkâsu mù gâ le, Mosheq taí tô é le, 'Haú Yhumsing Garai Gasang gi, nungmoq é yhanggu yhangmâng pé chyáng mai, nungmoq é matú ngò sù é myiqhtoi rayuq pô htoq lô nhâng rá nghut lhê; haú yuq taí mitai nungmoq gyo ra rá nghut lhê. ²³ Myiqhtoi hau é dang lé a gyo sù ó yuq nghut kôlhang, yhumsing é byù myú mai chyung hpyit pyâm é hui rá nghut lhê.'* gâ ri.

²⁴ Gè gè yhang, Samuelaq mai, yhâng é htâng má châng pô htoq lo é

myiqhtoi pé banshoq bang hko kyô lo é má le, buinyi shí pé eq séng mù taí to bekô nghut ri. ²⁵ Nungmoq gi, haú myiqhtoi pé é dang silí wunlí eq, Garaí Gasang mai, Abraham lé, 'Náng é awut ashin é yanmai, mingkan htoq mã é byù myú chângjup hkungsô wó kó rá nghut lhê!*' gâ é eq rajung za, nungmoq é íchyí íwâ pé eq tô tô é danggidiq lé wó hkam yù rá bang nghut akô. ²⁶ Garaí Gasang gi, nungmoq yuq hkanmó lé yhumsing agè ashop é hkyô mai wó lhing taú lò nhang é dông, shimân byi rá matú, Yhâng é dui-nhâng zoshâng lé pô htoq lô nhâng luí, nungmoq chyáng hí nhang kat byi bê nghut ri." gâ ri.

4

Petruq Eq Yohan Nhik Chyup Hui É Hkyô

¹ Hkyangjông pé, noqkuq yhúm zúng é suwún hpó eq Saduke pé gi, Petruq eq Yohan shiwa byu pé lé dâng nyo nyi é hkún, htoq lé lô kômù, ² yhangnhik, shiwa byu pé lé mhóqshit é eq, Yesuq é yanmai shi byuq bê bang Yesuq má dum dui toq lô rá gâ é hkyô lé taí nyi kô é yanmai, yhangmoq gyai yhang myit myô nyi bum akô. ³ Haú mù, yhangmoq gi, yhangnhik lé chyup yú luí, myinhâng mauchut lô bê nghut é yanmai, htang napkyó jé shoq htóng má lhúng tô akô. ⁴ Nghut kôlhang, mungdang lé wó gyô yu é bang myo myo gi, lumjǐng kômù luí, yuqgè ngo hkyíng kô jé shoq myô jat lô bekô nghut ri.

Yudaq Byn Tú Wapdoq Má, Yhangnhik Lé Myi Jep Wú É Hkyô

⁵ Htang nyi, yhangmoq é zau wui, suwún wui eq tará sará pé gi, Yerusalem wà mó má chôm hui zup akô. ⁶ Hkyangjong mó Anna, Kayahpaq, Yohan, Alesander pé eq hkyangjong mó é amyú pé

banshoq le, haú má bo tô akô.
 7 Haú mù, yhangmoq gi, Petruq eq Yohan lé gung gũng má nyhi to luí, "Nungnhik gi, haí a-tsam, ó yuq é myìng mai mù shí lé kut akô lhú?" ga myí akô.

8 Haú hkûn, Petruq gi, Chyoiyúng Woi-nyí bying tô é nghut mù luí, yhangmoq lé taí é gi, "Mingbyû wui é zaugun suwún wui ê, 9 hkyî hten sù shí yuq lé lhoq gê byí é jeju yanmai, yhang hkâsu kut lhoq ge yù huí é hkyô lé, hkû-nyí nungmoq ngá-nhik lé myí gôn wú naú kô é nghut le gi, 10 nungmoq lhunglhâng bang eq Israelaq byu pé banshoq lé sé nhâng kôlé, nungmoq eq tapzîng má jén sat pyám mù, Garai Gasâng eq shi é mai lhoq dui toq yu é, Nazaret wà byû Yesuq Hkrisduq é myìng mai, shí yuq gi, nungmoq é hí má ísu wáng wáng zán zán yap tô é nghut ri.

11 'Yhûm saí bang nungmoq hkyin htoq pyâm é luqgok gi, htungchyûn mâ é ahkyak dik é luqgok dut bê.'*

gâ é gi, Yesuq lé taí é dông nghut ri. 12 Hkyi yù hkyô gi, Yhang mai lai luí gotû a nyi lo, hkâsu mù gâ le, nga-nhúng hkyi yu é huí râ matú, mauhkûng a-ô má, Yhâng é myìng mai lai luí, xângzo byu pé lé byí tô é myìng gotû a joq lo é yanmai nghut ri." gâ ri.

13 Yhangmoq kúm gi, Petruq eq Yohan nhik a gyuq a kyum taí é lé myàng kôjáng, yhangnhik, jong a doq wú é, mayû byû za nghut é hkyô lé sé to kô é yanmai, maú nyi bum akô; nghut kôlhang, hí hpyang Yesuq eq zum wún wú sù nhik nghut é lé, yhangmoq bún kat akô nghut ri. 14 Hau htoq agó, lhoq gê byí é huí sù le, yhangnhik eq rahá yap tô é lé, yhangmoq myàng kô é nghut mù luí, taí râ hkyô haí le a joq lo kó nghut ri. 15 Haú mù, yhangn-

hik lé, haú Yudaq byìn tú wapdoq* mai lhoq htoq to mù, yhangmoq rayuq eq rayuq hpyè lhum kô é gi, 16 "Shí nhik lé hkâsu kut lé gè râ lhú? Yhangnhik kut shit e laklai kumlhá gi, Yerusalem wà mó má nyi é lhunglhâng bâng é hí má de za dut bê nghut é yanmai, nga-nhúng haú lé a wó hê lo nghut ri. 17 Nghut kôlhang, mingbyû wui má shí hkyô je riyhang a byo myín ló sháng gaq, ahkuí mai myìng haú lé lang mù ó lé le a taí kyo lo râ matú, yhangnhik lé kyuq hkûm pyám sháng." gâ bum akô.

18 Haú mù, yhangnhik lé dum wut hâng yù luí, Yesuq é myìng lé lang mù, haí le hkâtaí, hkâ-mhoqshit kó ga chôm hkûm akô. 19 Petruq eq Yohan kúm gi, "Garai Gasâng é mungdang lé gyo râ htoq má, nungmoq é dang gyo le gi, Garai Gasâng é hí má gè râ, a gè râ lé, nungmoq yhang doqdân yù keq. 20 Nga-nhik kúm gi, myàng yù, wó gyô yù bê é hkyô pé lé, a taí é, a wó nyí nghut lhê." ga luí, yhangmoq lé dum tú taí akô.

21 Haú hkûn, yhangmoq gi, dut lai lò bê hkyo é yanmai, shiwa byu pé Garai Gasang lé hkya-on kungton nyi bùm kôluí, yhangnhik lé dâm byi râ hkyô a myàng kô é nghut mù luí, yhangnhik lé dum tân kyuq luí nhang pyám bekô nghut ri. 22 Hkâsu mù gâ le, haú laklai kumlhá dông lhoq gê byi huí é sù gi, asak myi xê zàn chyân bê sù nghut é yanmai nghut ri.

Lumjîng Bâng É Kyûdung Dang

23 Yhangnhik gi, nhang kat pyâm é huí kôjáng, yhangnhik é luzúm wui chyáng taú ló kômù, hkyangjong agyi pé eq suwún wui eq yhangnhik lé hkyîm é dang banshoq lé, ló taí kyo akô nghut ri. 24 Haú hkyô lé wó gyo kôjáng, yhangmoq gi, myit rahkat

* 4:11 Hkya-on 118:22 * 4:15 Yudaq byìn tú wapdoq lé Grik dông gi, San-hedrin gâ lhê.

zâ èq yhumsing é htê lhoq ko mù, Garai Gasang lé kyûdung kô é gi, "Mauhking eq myigùng, wuìshuq lung-aù eq, haù pé má, nyi mi-nyì lé hpan tô é, ahko ahkáng lhunglháng wó é Yhumsing ê, ²⁵ Náng, náng é dui-nhâng zoshâng, ngamoq é íchýí iké Dawiq é nhut mai, Chyoiyúng Woi-nyì eq taì tô é gi,

'Haì mù luì, tungbaù amyû pé gi, nhikjum yô akô? haì mù luì, byu pé gi, akôm dá pyám akô lhu?

²⁶ Haù Yhumsing eq Yhâng é Hkrisduq lé gumlau toq rà matú, mingkan hkohkâm pé gi, toq mù, zau suwún wuì eq rahá zup zîng bum akô.[†]*

gâ ri. ²⁷ Gè gè yang, Herut eq Pontu Pilat nhik gi, tungbaù pé eq Israelaq byu pé le mù, wà mó shí má chòm zîng to kôluì, náng xù but byi é sù,† náng é Chyoiyúng dui-nhâng zoshâng Yesuq lé gumlau toq rà dá nyi akô. ²⁸ Náng é wum-o a-tsam eq náng ô nau é đông dut rà matú, hí hkûn mai náng myit hpyit doqđân tô é hkyô lé, yhangmoq gi, kut pyám bekô nghut ri.

²⁹ Yhumsing ê, ahkuì yhangmoq taì kyuq nyi é dang lé myàng byi laq ô! Náng é dui-nhâng zoshâng wuì, a gyuq a kyum é myit èq náng é dang lé taì rà matú wum-o byi laq! ³⁰ Náng é wum-o bo é loq lhâm kat luì, noli nojàng lé lhoq gê byi mù, náng é Chyoiyúng dui-nhâng zoshâng Yesuq é mying mai, limik kumlhá eq mauhpo muzó pé lé kut shit laq ô!" gâ akô.

³¹ Haù su, kyû ban dung kôjáng, yhangmoq zîng tô é jowô gi, dui nún lô mù, yhangmoq lhunglhâng bang gi, Chyoiyúng Woi-nyì byíng lô luì, Garai Gasang é mungdang lé a gyuq a kyum é za taì bùm bekô nghut ri.

Azîng Zê Lé Chôm Gam Chûng Kô É Hkyô

³² Haù lumjîng é lhunglhâng bang gi, i-myt rahkat za nghut nyi akô; ó yuq le, yhumsing wó é zè lé ngá é a gâ é za, banshoq eq chôm gam chung nyi akô. ³³ Lagyô pé le, haù Yhumsing Yesuq dum dui toq é hkyô lé a-tsam mó èq saksé hkâm nyi kô é nghut mù luì, yhangmoq banshoq bâng é ahtoq má jeju myo myo joq nyi ri. ³⁴ Yhangmoq chyáng a wó a lom é byù rayuq le a nyi kó. Hkâsu mù gâ le, maumyì ratóng wó é, a nghut jáng, yhùm wó é bang ó yuq nghut kôlhâng, haù pé lé adàm dâm ùng pyám luì wó yu é ngùn le gi, ³⁵ lagyô pé é hkyì wang má lé to byì akô. Haù mù luì, a wó a lòm sù ó yuq lé le ra tô é eq rajung za gàm byì akô nghut ri.

³⁶ Haù hkûn, Barnaba ga luì lagyô pé èq myhíng byi é, Kupru ming mâ é Lewiq byù Yosep le, yang wó é maumyì ratóng lé ung luì, wó yu é ngùn lé lagyô pé é hkyì wang má, lé to byì ri. ³⁷ Barnaba gâ é dang lichyúm gi, myit wum byì su é yhangzo gâ é lichyúm nghut lhê.

5

Anani Eq Sahpira Nhik É Hkyô

¹ Nghut kôlhâng, Anani ga sù gi, yhangmyi Sahpira eq rahá, yháng nhâm wó é maumyì ratóng lé ùng pyám luì, ² yhangmyi le bo sê é đông, ngùn haù ra-am lé gi, haq myhit yu to mù, ra-am lé za lagyô pé é hkyì wang má lé to byì akô.

³ Haù mù luì, Petruq gi, "Anani é, Chyoiyúng Woi-nyì lé mhaù pyám rà matú eq, maumyì hpau má é ra-am lé haq yu to rà matú, haì mù luì, náng é myit má Tsadán le byíng nhang tô lhê lhu? ⁴ Maumyì haù joq tô le, náng é zè nghut lhê a nghut lhu? Wó ung é ngùn le náng é zè

* **4:26** Hkya-on 2:1-2 † **4:27** Xù but é hkyô gi, Yudaq byu pé htùng đông xù but byi jáng, rajung jung kut rà matú hkyin masat yu é hkyô nghut lhê. Xù but byi é sù gi, Grik đông Mesaia gâ é nghut lhê.

nghut ashî, a nghut lhu? Haî mù luî, nàng haú dông dâ lê lhu? Byù lé mhaú é a nghut, Garai Gasang lé mhaú pyám bê nghut ri." ga taí ri.

⁵ Anani gi, dang haú lé wó gyo jáng, lêng mù, shi byuq bê nghut ri. Haú hkyô lé wó gyô é bang banshoq le, gyai yhang gyuq bùm bekô nghut ri. ⁶ Haú hkûn, zorâm wui gi, toq mù, yhâng é mâng lé htup luî, é waq myhup pyám akô. ⁷ Hau htâng, sum hkying kô myáng jáng, yhangmyi le, wang lé lo ri. Haú su dut é hkyô lé gi, yhang a sé nghut ri.

⁸ Haú hkûn, Petruq gi, "Ngo lé taí kyô wú aq. Nungnhik ùng é maumyî hpau gi, shí gû za nghut lê lhu?" ga myi jáng, yhang gi, "Nghut lê, haú gû za nghut bê." ga tù taí ri.

⁹ Petruq gi, "Nungnhik gi, haú Yhumsing é Woi-nyí lé isu kut chyam wú râ matú, hkâsu mù chôm myit huí akô lhu? Wú aq, náng é yhumsing hpó lé é myhup pyám bang gi, haú hkúmdong má jé bê; yhangmoq gi, nang lé le waq htoq pyám kó râ nghut lê." ga taí ri.

¹⁰ Radá dâm, yhang le lagyo hpô é hkyî wang má lêng shi byuq bê. Zorâm wui le wang lo wú le, myiwe haú shi to lánng é lé myàng kôluî, waq é mù, yhanglang é nâm má, é myhup pyám bekô. ¹¹ Hau é yanmai, haú hkun lê é hpúng byù banshoq bang eq, haú su dut é hkyô lé wó gyo má wó gyô é bang gi, gyai yhang gyuq bùm bekô nghut ri.

Byù Myo Myo Lé, Lagyo Pé Lhoq Gê Byî É Hkyô

¹² Ahkuî, lagyo pé gi, mingbyû wui é hí má limik kumlhá eq mauhpo muzó myo myo lé, kut shit nyi akô. Haú lumjing bang gi, i-myt rahkat zâ èq, Sholumon jirop má chôm hui hui kut bum akô. ¹³ Shiwa byu pé gi, yhangmoq lé hkunggâ nyi bùm kôlhang,

yhangmoq lé a wám é zum bùm kó.

¹⁴ Nghut kôlhang, haú Yhumsing lé lumjing é myiwe yuqgè wui gi, myo sheq myô jat lò kômù, yhangmoq chyáng je myô jat lò bê nghut ri.

¹⁵ Haú mù luî, byu pé gi, Petruq lai lo é hkûn, yhâng é wupzo za lháng rayuq yuq é ahtoq má zang sháng gaq ga, nôhpyo huí é bang lé, wà mã é hkyô yàm má waq htoq é mù, yhuphpú pé eq taphkang pé má lhez tô akô. ¹⁶ Hau htoq agó, Yerusalem awui ayàm mã é wà pé mai le, byù ajùm ayò gi, no é bang eq agè ashop é nat wang zing-ri huí é bang lé shuí jé lé bum akô; haú bang lhunglhâng gi, lhoq gè lhoqyô byî é huí bum akô nghut ri.

Lagyo Pé Zing-ri Huí É Hkyô

¹⁷ Hkyangjong mó eq yhâng é luzúm wui, Saduke hpúng mã é byu pé kúm gi, gyai yhang wú manon bùm kôluî, toq mù, ¹⁸ lagyo pé lé chyup yû luî, wà mã é htóng má lhung tô akô. ¹⁹ Nghut kôlhang, haú myín lé, Yhumsing é maumang lagyo rayuq gi, htóng hkum pé lé hpông pyám mù, yhangmoq lé shuí htoq yû uchyang, ²⁰ "Nungmoq htoq lô mù, noqkuq yhûm má é yap to luî, duí é asak hkyô sik eq sêng é danglù banshoq, shiwa byu pé lé taí kyo keq." ga taí ri.

²¹ Napsùn myoqmyàng zó lé, yhangmoq gi, noqkuq yhûm má wàng mù yhangmoq wó gyô yu é eq rajung za, shiwa byu pé lé, mhogshit hi lô akô.

Haú u lé, hkyangjong mó eq yhâng é luzúm wui gi, Israelaq byu pé é suwún wui lhunglhâng bang lé ji yù mù, Yudaq byin tú wapdoq chôm zung yù luî, lagyo pé lé é shuí yù râ matú htóng shut byù nhang kat akô. ²² Haú bang kúm gi, htong má jé é hkum, lagyo pé lé a myàng kôjáng, dum taù lò mù lo taí kyo kô é gi, ²³ "Htóng hkum le ging ging myhî to lánng ri, htóng zúng

bang le hkum yâm má yap tô akô. Nghut kôlhang, hpông wú le, ahkaû má ó le a nyi to lo nghut ri." gâ ri. ²⁴Noqkuq yhûm zúng é zau hpó eq hkyangjong agyi wui gi, dang haû lé wó gyo kôjáng, "Shí hkyô haî dut lô râ lú?" ga, gyai gyuq maú bum akô.

²⁵ Haû hkûn, byù rayuq wang lé lô mù, "Wú keq, nungmoq eq htóng má lhung tô é bang gi, no-qkuq yhûm má yap to mù byu pé lé mhoqshit nyi bum akô." ga luí, yhangmoq lé taí kyô ri. ²⁶ Haû mù luí, zau hpó haû gi, yhâng é a-ô má é bang eq é mù, lagyo pé lé é shuí yu akô. Nghut kôlhang, shiwa byu pé luqgok eq dú lô kó râ lé gyuq kô é yanmai, htân htân a wám kut kó nghut ri.

²⁷ Lagyo pé lé shuí jé lô kôjáng, Yudaq byin tú wapdoq hí má yhangmoq lé nyhi tô akô. Haû hkûn, hkyangjong mó gi, ²⁸ "Yesuq é mying lé lang luí a mhoqshit râ matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jam shoq, nungmoq kut bekô nghut luí, Yesuq é sui lé, ngamoq é ahtoq má ke byi râ dâ nyi akô." ga luí, yhangmoq lé taí akô.

²⁹ Haû hkûn, Petruq eq gotû lagyo pé tú taí kô é gi, "Ngamoq gi, byù dang lé gyo ra htoq má Garai Gasâng é mungdang lé je luí gyo râ dut lhê. ³⁰ Nga-nhûng é íchyí íwâ pé é Garai Gasang gi, nungmoq eq tapzîng má lhang sat pyâm é Yesuq lé, shi e mai lhoq dui toq kat bê nghut ri. ³¹ Israelaq amyû lé, myit lhung hkyô eq mara hkyut byi hkyô hpóng byi râ matú, up é ahkáng wó Sû eq hkyi yù Sû kut nhâng râ ga, Garai Gasang gi, Yhang lé, Yhâng é loqyo loq* má waq toq to bê nghut ri. ³² Ngamoq le shí hkyo é saksé

pé nghut nyi lhê; mungdang lé gyô yù luí châng é bang lé Garai Gasang byi tô é Chyoiyúng Woi-nyí le, shí pé é saksé nghut lhê." ga akô.

Gamalelaq Hpaqchyî Byî É Hkyô

³³ Yhangmoq gi, dang haû lé wó gyo kôjáng, lûm gyo nhik-yo naû kômù, lagyo pé lé sat pyám râ lhang myit akô. ³⁴ Nghut kôlhang, ming-byû banshoq bâng é hí má aróng wó é tará sará Gamalelaq gâ é Hparishe rayuq, haû Yudaq byin tú wapdoq má toq yap mù, lagyo pé lé razup zo lhoq htoq to nhâng luí, ³⁵ yhang taí é gi, "Israelaq byu pé é, shí bang lé hkâsu kut râ hkyô, rago za hí myit wú keq. ³⁶ Hkâsu mù gâ le, hí hpyang Htudaq gâ é byù rayuq pô htoq lô mù, yhanggùng yhang byù mó rayuq yuq nghut lhê ga taí jáng, byù myi shô kô yhâng chyáng châng wú bekô. Yhang sat pyâm é hui luí, yhang htâng châng é lhunglhang bang le byo myín byuq kômù, haî le a wó kut dut byuq akô nghut ri. ³⁷ Hau htâng, mying jihpán guq yu é buinyi má, Yudaq gâ é Galile byù rayuq pô htoq mù, mingbyû wui lé yhâng hkyam shut mhoq hpyoq yu ri. Yhang le sat pyâm é hui mù, yhang htâng châng é lhunglhang bang le, byo myín byuq bekô nghut ri. ³⁸ Ahkuí le, shí bang lé haî le hkâgon ko, yhangmoq kâm é đông nghut nyi kó sháng gaq; yhangmoq kut nyi é hkyô eq dâ nyi é hkyô pé gi, byù myit đông kut é nghut jáng, htên byoq byuq râ za nghut lhê. ³⁹ Nghut kôlhang, Garai Gasâng chyáng mâ é nghut le gi, nungmoq wó lhoq hkying pyám kó râ a nghut. Garai Gasâng é gyè sheq dut lô kó râ nghut lhê." gâ ri.

⁴⁰ Dang haû lé yhangmoq gyô htuk bum akô. Haû mù, lagyo pé lé wut yù mù luí, nhuq bat yù kômù, Yesuq é mying lé lang luí mhoqshit

* 5:31 Garai é loqyo loq gâ é gi, hpautap hkungga gíng é jowò lé taí nau é nghut lhê.

é hkyô a ge kut râ nghut lhê ga tai kômù, nhang pyâm akô nghut ri.

⁴¹ Lagyô pé kúm gi, Yesuq é mying é yanmai ru hpuzô é hkyô gi, gingdán nyi ri, ga myit yù kômù, Yudaq byìn tú wapdoq haù mai gabú myit èq htoq ló bekô. ⁴² Hau htâng, yhangmoq gi, nyí wui làng noqkuq yhùm má le, rayhùm htâng rayhùm má le, Yesuq gi, Hkrisduq nghut é hkyô gabú danglù lé mhoqshit hkô kyô nyi akô nghut ri.

6

Garúm Râ Byù Nyhit Yuq Lé Hkyin Yu É Hkyô

¹ Ahkuî, chángzô pé myô jat lo nyi é buinyi pé má, Grik dang nyo é Yudaq byu pé gi, yhangmoq é chuimó myhí pé lé, nyí wui lhê é gàm tso gàm huq é hkyô má rago a wó kut kô é yanmai, Hebre myíng mu é Yudaq byu pé lé mara hùn dang tai bum akô. ² Haù hkûn, lagyo raxe í yuq gi, chángzô pé lhunglhâng bang lé wut yù mù, "Ngamoq, Íwa Garai Gasâng é mungdang hko kyô é muzó lé rap pyâm to mù, zangbó amù lé za lajang nyi é nghut le gi, a htuk râ nghut lhê. ³ Haù mù luí, gumang wui ê, Chyoiyúng Woi-nyí byíng é eq hpaqchyí byéng-yá bo é nhik bo byù nyhit yuq lé nungmoq chyáng má é hkyin to keq. Haù bang lé muzó shí lhum hun to râ nghut lhê. ⁴ Ngamoq kúm gi, kyûdung é hkyô eq mungdang hkô é hkyô lé za, noqzuq tung kut nyí râ nghut lhê." ga tai akô.

⁵ Dang haù lé shiwa byù lhunglhâng bang gyô htuk kômù luí, lumjúng myit kô é, Chyoiyúng Woi-nyí byíng é Stehpan ga sú eq, Hpilip, Prokoru, Nikanora, Timun, Parmena, Yudaq noqkuq htung má lhing wang lò bê sú Antioku và mó má é Nikolaq pé lé hkyin yù mù, ⁶ lagyô pé chyáng shuí ló

akô; lagyô pé gi, kyûdung byi kômù, yhangmoq lé loq ke byí akô nghut ri.

⁷ Garai Gasâng é mungdang gi, je myô jam lò luí, Yerusalem và mó má chángzô pé gyai myô jat lawán lo é htoq agó, hkyangjông pé myo myo le, haù lumjúng hkyô má châng nyi bum akô.

Stehpan Chyup Yù Huí É Hkyô

⁸ Ahkuî, Stehpan gi, Garai Gasâng é jeju chyunghuq eq wum-o a-tsam byíng nyi é nghut mù, byu pé é hí má mauhpo muzó pé eq limik kumlhá mó pé tûn shit ri. ⁹ Haù hkûn, luthkyô ga bâng é tarajong eq sêng é Kuruni, Alesander eq Kiliki, Asia mau má é bang ra-am gi, toq mù, Stehpan eq dang chyin chyin lhùm akô. ¹⁰ Nghut kôlhâng, Stehpân é dang gi, Chyoiyúng Woi-nyí lom é hpaqchyí dang nghut é yanmai, yhangmoq a ùng kó nghut ri.

¹¹ Haù mù, yhangmoq gi, "Shí yuq, Mosheq eq Garai Gasang lé rhoi dang tai nyi é lé, ngamoq wó gyô ri." ga luí, mhaù tai nhâng râ byù haq lung tô akô.

¹² Haù mù, yhangmoq gi, ming-byù wui eq nhik bô suwún wui, tarâ sará pé lé, chun htau mù, Stehpan lé chyup yù nhâng luí, Yudaq byìn tú wapdoq má shuí nyhi tô akô. ¹³ Mhaù é saksé byu pé lé le lhoq hâng kat luí, haù bang gi, "Shí yuq, shí chyoiyúng jowò* eq jep é tarâ lé shut shai é dang ru tai nyi ri. ¹⁴ Nazaret và byù Yesuq ga sú gi, jowò shí lé hpyoq pyám mù, nga-nhúng lé Mosheq èq byí tô é htungking lé htaí pyám râ nghut lhê ga luí, yhang tai é dang lé ngamoq wó gyô é nghut lhê." ga tai akô.

¹⁵ Haù Yudaq byìn tú wapdoq má zung to bang banshoq, yhang lé chôm wú tsuq nyí kô é hkûn, yhang

* 6:13 Shí chyoiyúng jowò gi, Yerusalem noqkuq yhùm lé gà lhê.

é myoqdong gi, maumang lagyo é myoqdong su dut é lé, yhangmoq myang akò nghut ri.

7

Stephan Tai É Dang

¹ Haú hkûn, hkyangjong mó gi, "Dang haú pé têng lhê lú?" ga luí, yhang lé myi jáng,

² Stephan tú tai é gi, "Gumang wui eq íwa wui ê, gyô wú keq, nga-nhúng lhunglhang bâng é íchyí Abraham gi, Haran wà má a ló nyí shí lé, Mesopotamiaq mau má nyi tô ashí hkûn, hpungwup shingkang bo é Garai Gasang gi, yhang chyáng lé htoq shit mù, ³ 'Náng é ming eq náng é amyû mai htoq ló luí, ngò tûn shit rá ming shut e ló aq.'* ga luí, yhang lé tai ri.

⁴ Haú mù, yhang gi, Hkaldea byu pé é mau mai htoq ló luí, Haran wà má ló nyi nyi ri. Yhang wa shi byuq é htâng má, Garai Gasang gi, ahkuí, nungmoq nyi nyi é ming shí má yhang lé htot lô nhâng bê nghut ri. ⁵ Garai Gasang gi, shí ming má yhang lé silí wunlí nghú rá, hkyí rahkô nang í é myigùng lhang a byí é nghut kôlhang, yhang, zodù lhang a wò shi mai, yhang lé le, yhang é awut ashín pé lé le, maumyí shí byi rá ga danggidiq byí to bê nghut ri. ⁶ Hau htoq agó, shí hkyô lé Garai Gasang xoq tai é gi, 'Náng é awut ashín pé, tûngbaù ming má bíng nyí mù, haú ming bâng eq myi shô zàn jùn zô é eq zing-rí é lé hui kó rá. ⁷ Nghut kôlhang, yhangmoq lé jùn zô é amyû lé le, ngò jéyáng rá nghut lhê.' gá ri. 'Haú hkûn, yhangmoq gi, haú ming mai htoq ló mù, jowò shí má ngo lé noqkuq kó rá nghut lhê.* ga le, Garai Gasang tai ri.

⁸ Hau htâng, yhang lé ahpyo-kuq hpyit byi rá hkyô eq sêng é dangshikaq le, byí ri. Haú mù, Abraham gi, Isak lé hku é htâng shit nyí buinyí má ahpyo-kuq hpyit byi ri;

Isak gi, Yakup lé hkû mù, Yakup gi, íchyí íwa achyûng raxe í yuq lé hku kat bê nghut ri.

⁹ Haú íchyí íwâ pé gi, Yosep lé manôn kôluí, Egotuq ming shut jùn dông ûng kat akò. Nghut kôlhang, Garai Gasang gi, yhang eq rahá nghut nyi mù luí, ¹⁰ wuîhke jamjau banshoq mai yhang lé lhoq lhut yû mù, Egotuq hkohkâm Hpara-uq é hí má le myoqdong wó, hpaqchyí byéng-yá le bò nhang é yanmai, hkohkâm haú gi, Egotuq ming eq, yhang é hkohkâm-wâng banshoq lé up nhang ri.

¹¹ Haú u lé, Egotuq ming eq Hkanan ming banshoq má mutmó gyó lô mù, wuîhke jamjau mó hui bekô. Nga-nhúng é íchyí íwâ pé le zoshuq a myang hô zo lo dut byuq bekô nghut ri. ¹² Ahkuí, Yakup gi, Egotuq ming má guqzo joq é hkyô lé wó gyo jáng, nga-nhúng é íchyí íwâ pé lé sâng-hí dâm ê nhang ri. ¹³ Htang dâm dum ê é hkûn, Yosep gi, yhanggu yhangmâng pé lé yhang ó nghut é hkyô tai kyô ri. Hpara-uq le Yosep é yhumbyù ikun hkyô lé sê yù byi bê nghut ri. ¹⁴ Hau htâng, Yosep gi, yhang wa Yakup eq yhumbyù banshoq nyhit xe ngo yuq lé, yhang chyáng pying yù bê nghut ri. ¹⁵ Yakup le Egotuq ming má jé gyó ló luí, yhang eq nga-nhúng é íchyí íwâ pé gi, banshoq haú ming má shí ló byuq bekô nghut ri. ¹⁶ Yhangmoq é mâng lé gi, Shehkem wà má yu tau ló mù, Shehkem wà mâ é Hamora é yhangzo yhangshu pé chyáng mai, Abraham eq ngùn byi mù wui hpyit tô é lupdùng má ló myhup tô akò nghut ri.

¹⁷ Abraham lé Garai Gasang byí tô é danggidiq dik rá ahkyíng jé lo nyi é u lé, ¹⁸ nga-nhúng é amyû gi, Egotuq ming má Yosep lé a sê é hkohkâm pô htoq é pyat jé shoq, myoluq jebe lò bekô nghut ri.

¹⁹ Hkohlâm hpó haû gi, nga-nhông é amyû htoq má a ge é hpaqchyí da luí, nyheqnú pé lé shi byuq sháng gaq ga, dú pyám nhang é dông mai nga-nhông é íchyí íwâ pé lé zing-ri bê nghut lhê.

²⁰ Haû u má, Mosheq lé hkû to bê. Yhang gi, Garai Gasâng é hí má gyai yúnglô é sù nghut ri; yhang gi, yhângwâ é yhûm má lhamó sum hkyap baú tô é hui mù, ²¹ htot tô tô é hui jáng, yhang lé Hpara-uq é byizô èq xe yù mù, zosîng kut yù luí, hku kô ri. ²² Mosheq gi, Egutuq ming má é hpaqchyí byéng-yá banshoq lé mhoq yù luí, nhut shô a-tsam eq hkyí loq a-tsam gyai bò sù nghut ri.

²³ Yhang asak myi xê zàn jé lò jáng, yhâng é gumang Israelaq byu pé chyáng é kûm wú râ matú wó myit htoq kat ri. ²⁴ Ê jé jáng, zing-ri hui nyi é sù rayuq lé é myâng luí, haú yuq lé búng mù, zing-rî nyi é Egutuq byù lé, loqchoq hpuq é dông sat pyâm ri. ²⁵ Mosheq gi, yhâng é byu pé lé yhâng é loq dông Garai Gasang hkyi yù hkyô byi nyi é lé, yhâng é amyû pé sê gyo byi nhô ngàm kôlhang, yhangmoq a sê gyo byi kó nghut ri. ²⁶ Htang nyí lé, Israelaq byù yhangchang mabyoq htoq nyi é má, e ang mù, yhangnhik lé pyín nau luí, 'Ahkaú nhik è, gumang yhangchang sheq ru nghut lhê nhîng, haí mù rayuq eq rayuq byoq lhum nyi akô lú?' ga taí ngón wú ri.

²⁷ Luzúm hpó lé zing-rî nyi sù yuq gi, 'Ngamoq é ahtoq má zau eq tarâ agyí kut râ matú, nàng lé ó yuq hkyin tô é lú?' ²⁸ A-nyí nap Egutuq byù lé sat pyâm é su, ngo lé le sat pyám nau ri lú?'* ga luí, tú taí uchyang yhang lé dún chyún pyâm ri. ²⁹ Mosheq gi, dang hau é yanmai, hpâng luí Midian ming má é nyi byuq ri. Haû má yuqzo í yuq é wó ri.

³⁰ Haû ming má myi xê zàn lai jáng, Sinaq Bùm yàm, yoso hkaú má é myi gyúng tô é mhanpúng mai, maumang lagyo rayuq gi, Mosheq lé htoq shit ri. ³¹ Mosheq gi, haû lé myàng jáng, hau é yanmai maú luí, wú wú râ ga huí e ló le, Yhumsîng é htê htoq lo é gi, ³² 'Ngò gi, náng íchyí íwâ pé é Garai Gasang, Abraham, Isak, Yakup é Garai Gasang nghut nyi lhê.*' ga ri. Mosheq kúm gi, gyuq nán luí, a wám tu wú nghut ri.

³³ Haû Yhumsîng gi, 'Náng é hkyí-tsung hkyut pyám aq, nàng yap tô é jowò gi, chyoiyúng é myigùng nghut lhê. ³⁴ Egutuq ming má ngá é amyû pé zik zo huí nyi é hkyô lé, ngò gè gè yhang myàng bê; yhangmoq é ngaú nhik ngaú htê lé ngò wó gyo bê; yhangmoq lé hkyi yù râ matú ngò gyo lé é nghut lhê; ahkuí, lé aq, ngò, nang lé Egutuq ming shut nhang taú kat râ.*' ga luí, yhang lé dum taí ri.

³⁵ Yhangmoq èq, 'Nang lé zau eq tarâ agyí kut râ matú, ó yuq hkyin tô é lú?' ga luí he-ngik pyâm é Mosheq lé yhang, mhanpúng má htoq shit é maumang lagyo dông mai, Garai Gasang gi, yhangmoq é zau eq hkyi yù sù kut nhâng luí, taú nhang kat é nghut ri. ³⁶ Haû Mosheq yhang, Egutuq ming má le, Nhông Nè má le, yoso hkaú pé má le, myi xê zàn gyoro má mauhpo muzó pé eq limik kumlhá pé tûn shit uchyang, yhâng é byù myû pé lé Egutuq ming mai shuí htoq ló ri.

³⁷ Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoi rayuq lé, Garai Gasang gi, pô htoq lô nhâng râ nghut lhê.*' ga luí, taí tô é sù le Mosheq yhang nghut ri. ³⁸ Yoso hkaú má nghut nyi ashí hkûn lé, shiwa byù hpúng má, Sinaq Bùm má yhang lé dang taí é maumang lagyo eq le, nga-nhông

é íchýí íwâ pé eq le rahá nghut sù gi, yhang yhang nghut nyi ri; nga-nhúng lé ap byi rá asak dui é mung-dang lé lom yu é sù le, yhang nghut nyi ri.

³⁹ Nghut kôlhang, nga-nhúng é íchýí íwâ pé kúm gi, yhâng é dang lé a kâm gyo kômù, yhang lé he pyám luí, Egotuq ming shut táu nau é myit bo bum akô. ⁴⁰ Haù mù, Arun lé, 'Egotuq ming mai nga-nhúng lé shuí htoq lo é Mosheq gi, haì dut byuq bê hkyô lé, ng-amòq a sé lo; haù mù, nga-nhúng hí má so byi rá hpara lhô pé saí byi aq.*[†] ga taí akô. ⁴¹ Haù buinyi pé má, yhangmoq gi, nojùng zo lhô saí mù, alhò haù lé hkungga nhông byi uchyang, yhangmoq é loq èq saí tô é muzó jizó má gabú nhik dik nyi akô. ⁴² Haù mù luí, myiqhtoi pé é laiká má kâ tô é gi,

'Israelaq byu pé ê, myi xê zàn tup yoso má chung é shigu eq hkungga gi, ngo lé nhông byí é nghut akô lúh?

⁴³ Nungmoq gi, nungmoq noq rá matú saí yu é alhò, Molak é zúm eq Rehpan hpara é kyí lé sheq, waq lhing wún ko é yanmai,

Babelon lai shoq ngò nungmoq lé lhoq lhâm pyám rá nghut lhê.*[†]

ga luí, bô tô é eq rajung za, Garai Gasang gi, yhangmoq chyáng mai myoqdong lhing pyám mù, mauhkúng htoq mâ é bui, kyí, lhamó pé lé noqkuq rá matú ap pyám bê nghut ri.

⁴⁴ Mosheq lé, nàng myang é azòng eq rajung za saí aq ga, Garai Gasang taí é dng saí tô é saksé zúm lé, haù yoso má nga-nhúng é íchýí íwâ pé wó yú bekô nghut ri. ⁴⁵ Haù mù, nga-nhúng é íchýí íwâ pé gi, yhangmoq é myoq hí mai Garai Gasang èq hkat htoq pyám byí é

byù myù pê é mau má, Yoshuq eq rahá wang nyi ló kô é hkùn, saksé zúm haù lé yu wang ló akô. Haù gi, Dawiq é pyat jé shoq joq to bê nghut ri. ⁴⁶ Dawiq kúm gi, Garai Gasâng hí má myoqdong wó sù nghut mù luí, Yakup é Garai Gasâng matú nyi jowò saí rá ahkáng dung kôlhang, ⁴⁷ Sholumon èq sheq saí bê nghut ri.

⁴⁸ Nghut kôlhang, Myhang htáng htum Sù gi, byu é loq èq za saí é yhùm má nyi é a nghut, haù hkyô eq séng luí myiqhtoi wá taí tô é gi,

⁴⁹ 'Mauhkúng gi, ngá é zùng tanghkuq, myigùng gi, ngá é hkyí nang jang nghut nyi lhê;

ngá é matú hkasù é yhùm saí byi shi kó rá lúh? Ngò nô yù rá jang gi, hkámá nghut kó rá lúh?

⁵⁰ Haù banshoq lé ngá é loq èq baú saí tô é a nghut kó lúh? ga luí, haù Yhumsing taí ri.*[†]

gâ ri.

⁵¹ I-myit htân mù, i-myit eq nohkyap má ahpýo-kuq a hpyit é bang*[†] ê, nungmoq gi, nungmoq é íchýí íwâ pé su, Chyoiyúng Woi-nyí lé hkâ-nhám le lhom he-ngik pyám nyi akô; ⁵² Nungmoq é íchýí íwâ pé èq a zing-rí wú é myiqhtoi, ó yuq wá nyi lhê lúh? Haù Dingmán Sù pô htoq rá hkyô lé hko kyô é bang lé, yhangmoq sat pyám é chyat nghut akô; ahkuí, nungmoq le, haù Dingmán Sù lé ap pyám é bang eq sat pyám é bang nghut nyi akô. ⁵³ Maumang lagyô èq shit kyo byí é tará lé nungmoq wó yú kôlhang, haù lé a cháng kó nghut ri." gâ ri.

Stephan Lé Luqgok Èq Dú Sat É Hkyô

⁵⁴ Haù hkyô lé yhangmoq wó gyo kôjáng, yhangmoq é nhikhum má lùm htaù záng kô é yanmai, Stehpan lé, zuì wang ngat kyáng shoq

* 7:40 Htoq Ló 32:1 * 7:43 Amo 5:25-27 * 7:50 Esai 66:1-2 * 7:51 I-myit eq nohkyap má ahpýo-kuq a hpyit é bang gâ é gi, Garai dang lé a lùm a châng é bang lé gâ lhê.

wú nhik-yô nyi akô. ⁵⁵ Stehpan kúm gi, Chyoiyúng Woi-nyí byíng mù, mauhkúng shut tu wú kat le, Garai Gasâng é hpungwup shing kang lé le, Garai Gasâng é loqyo hkyam shut Yesuq yap tô é lé le, myang ri. ⁵⁶ Haú mù, yhang gi, "Wú keq, mauhkúng hpông tô é lé le, Garai Gasâng é loqyo hkyam shut haú Byu Yhangzo yap tô é lé le, ngò myàng ri." ga taí kat ri.

⁵⁷ Haú hkûn, yhangmoq gi, htê mó o mó garu uchyang, yhumsing é nohkyap xaú pyám mù, radá dâm yhang lé chôm htim kômù, ⁵⁸ yhang lé wà mai she htoq ló kôluí, luqgok èq chôm dú ló bekô nghut ri; saksé kut é bang gi, Sholuq gâ é zoram é hkyí wang má yhangmoq é buhîng pé lé hkyut bum tô akô.

⁵⁹ Luqgok èq dú nyi bùm kô é u lé, Stehpan gi, "Yhumsîng Yesuq ê, ngá é woi-nyí lé hap yù laq." ga kyûdûng ri. ⁶⁰ Hau htâng, yhang gi, hkyihput htug mù, "Yhumsîng ê, yhangmoq kut é mara haú lé hkyut pyám byi laq." ga luí, htê mó èq wut dûng ri; haú ban taí jáng, yhang kâng byit byuq bê nghut ri.

8

Hpúng Byú Lé Sholuq Zing-rí É Hkyô

¹ Sholuq gi, haú má nyi to mù, Stehpan lé sat pyám é muzó má myit bo huí ri.

Haú nyí mai, Yerusalem wà mó mâ é noqkuq hpúng gi, zing-ri mó huí lo é nghut mù luí, lagyô pé mai lai luí, lumjîng bang lhunglháng gi, Yuda mau eq Samariq mau jowò hkan gmó má byo myín ló bekô. ² Nghut kôlhang, tarâ hkunggâ é bang gi, Stehpan lé yhum pyám é htâng má, yhang é yanmai iyon mó huí nyi akô nghut ri. ³ Sholuq kúm gi, rayhum htâng rayhûm wàng mù, myiwe yuqgè lé she hkyut htoq yú luí, htóng má lhung tô é đông mai,

noqkuq hpúng haú lé lhoq hpyoq ló nyi ri.

Samariq Wà Má, Gabú Danglù Hkô Kyô É Hkyô

⁴ Byo htoq ló é bang kúm gi, jé é jowò hkan gmó má mungdang lé hkô kyô ló akô. ⁵ Haú hkûn, Hpilip gi, Samariq mau mâ é myuq ramyuq shut e ló mù, Hkrisduq é hkyô lé hkô kyô ri. ⁶ Byù ajùm ayò gi, Hpilip taí kyô é hkyô lé wó gyô é eq, yhang tûn shit é limik kumlhá lé myàng kôjáng, i-myt rahkat za eq yhâng é dang chôm gyô nyi bum akô. ⁷ Nat wang júng é byù myo myô pê chyáng mai, agè ashop é nat pé wut garu uchyang htoq ló byuq bum akô; gùngjum shi é bang eq hkyí htên é bang myo myo le, ge ló byuq bum akô. ⁸ Haú mù luí, haú myuq má gabú hkyô gyai yhang wó bekô nghut ri.

Myoqheq Sará Simun É Hkyô

⁹ Simun gâ é byù rayuq gi, hí lé haú myuq má myoqheq hpaqchyí kut shit mù, Samariq byu pé lé lhoq maú luí, yhâng gùng lé yhang, laklaí sù nghut lhê gâ ri. ¹⁰ Byù tiq ko banshoq le, "Byù shí yuq gi, 'haú a-tsam mó' gâ é, Garai chyáng mai hpungwup a-tsam wó yù sù nghut ri." ga luí, yhâng é dang lé gyô bum akô. ¹¹ Haú yuq gi, myáng myáng yhâng é myoqheq hpaqchyí èq yhangmoq lé lhoq maú lo é yanmai, yhâng dang lé chôm lum bum akô. ¹² Nghut kôlhang, Hpilip hko kyô é Garai Gasâng é mingdán hkyô eq, Yesuq Hkrisduq é myíng eq sêng é gabú danglù hkyô lé, lumjîng kôjáng, myiwe yuqgè wui-myhup hkâm yu bum akô. ¹³ Simun yhang yhang le lumjîng mù luí, wui-myhup hkâm yù mù, Hpilip htâng châng wún ri. Hpilip é kumlhá mó eq laklaí kumlhá pé lé myàng jáng, yhang gi, gyai maú byuq ri.

¹⁴ Garai Gasâng é mungdang lé Samariq byu pé, lhom hap yù bê hkyô lé, Yerusalem wà mó má nyi é lagyô pé wó gyô bùm kôjáng, yhangmoq gi, Petruq eq Yohan nhik lé haú má nhang kat akô.

¹⁵ Yhangnhik gi, lé jé jáng, byù haú bang Chyoiyúng Woi-nyí wó yù râ matú kyûdung byi akô. ¹⁶ Hkâsu mù gâ le, Chyoiyúng Woi-nyí gi, yhangmoq chyáng ó yuq é ahtoq má lé, a gyô lô shi; Yhumsing Yesuq é mying mai wui-myhup hkâm yu é za ru nghut bùm ashî. ¹⁷ Haú mù luí, lagyô nhik yhangmoq é ahtoq má loq ke byi jáng, yhangmoq gi, haú Chyoiyúng Woi-nyí lé wó hkâm yù bekô nghut ri.

¹⁸ Lagyô nhik é loq ke kat jáng Chyoiyúng Woi-nyí wó hkâm yu é lé, Simun myàng jáng, yhang gi, yhangnhik lé ngùn é byi wú mù, ¹⁹ "Hká yuq é ahtoq má nghut kôlhang, ngò loq ke byi jáng, haú yuq gi, Chyoiyúng Woi-nyí wó yù râ matú, haú su é a-tsam ngo lé le byi kó laq." ga dung ri.

²⁰ Petruq kúm gi, "Garai Gasâng é chyunghuq lé ngun eq wó wui yù râ nghut lê ga luí, myit é yanmai, náng é ngùn gi, nàng eq rahá htên byoq byuq sháng gaq. ²¹ Nàng gi, Garai Gasâng é hí má myit a dng sù nghut é yanmai, shí hkyô má nàng wó bo lhóm râ a nghut. ²² Haú mù luí, shí agè ashop é hkyô mai myit lhing mù, Yhumsing Garaí chyáng dng tôngbán aq. Haú hkûn, náng é unghkaú má myit pyâm é hkyô lé, mara hkyut pyám byi abe. ²³ Nàng gi, ladu lai shoq nhikhko zo mù, yubak marâ eq tuí zing to huí é lé, ngò myàng ri." ga yhang lé taí ri.

²⁴ Haú hkûn, Simun gi, "Nungnhik taí é hkyô hai le ngá chyáng a jé sháng gaq, ngá é matú haú Yhumsing chyáng kyûdung byi kó laq." ga tú taí ri.

²⁵ Yhangnhik kúm gi, haú Yhumsing é mungdang lé saksé hkâm mù ban hko kyo jáng, Samariq byu pé é wà myo myo má, haú gabú danglù lé hko kyo uchyang, Yerusalem wà mó shut dum taú lò bekô nghut ri.

Hpilip Eq U-nuk Nhik É Hkyô

²⁶ Ahkuí, Yhumsing é maumang lagyo gi, Hpilip lé, "Toq aq, Yerusalem wà mó mai Gaza shut lò é hkyô jé shoq, maupyí shut nyâng za e ló aq. Hkyô haú gi, yoso hkyô nghut lhê." ga taí ri. ²⁷ Haú hkûn, yhang toq mù e ló ri. Haú u lé, Ehtiopi ming lé up é hkohkâm myhí Kandake é hí má ahko ahkáng mó wó mù, yhâng é sutzè banshoq lé zûm é, Ehtiopi byù u-nuk rayuq gi, noqkuq râ ga Yerusalem wà mó má ê mù, ²⁸ dum taú lo é hkûn, yhâng é myanglhêng má zùng luí, myiqhtoi Esai-aq laiká lé nghap nyi ri. ²⁹ Woi-nyí gi, Hpilip lé, "Myanglhêng shut chyáng e ló aq." ga taí ri.

³⁰ Haú mù, Hpilip gi, din ê mù, myiqhtoi Esai-aq laiká nghap nyi é lé wó gyo jáng, "Nàng nghap nyi é hkyô lé sê gyo ri lhu?" ga luí, yhang lé myí ri.

³¹ Haú yuq gi, "Mhoqshit sù yuq a nyi le, ngò hkâsu kut sê gyo râ lhu?" ga tú taí mù, yhang eq rahá lo doq zùng aq ga Hpilip lé lung ri.

³² Yhang nghap é Chyúmdang gi, "Sat râ sau lé su, Yhang lé she e lò bê nghut ri;

sau zo gi, sau maú nyhám su é hí má zim za nyi tô é su, Yhang le nhut a hpông é za nyi tô ri.

³³ Yhânggùng lé lhoq shôm pyâm to huí é hkûn, Yhang lé a tara é dng doqdân pyám bekô;

Yhâng é asak lé myigùng htoq mai yù pyám bekô nghut mù luí, Yhâng é awut ashín lé ó yuq wó gôn kyo râ lhu?"*

gâ ri.

³⁴ Haú hkûn, haú u-nuk wa gi, Hpilip lé, "Haú nghut le gi, ngo lé taí kyo laq! Myiqhtoi shí yuq gi, ó lé lhoq ang luí, taí é nghut lhê lú? Yhânggùng lé taí é nghut lhê lú? Haú a nghut jáng, góyuq é hkyô lé taí é nghut lhê lú?" ga myí ri. ³⁵ Haú hkûn, Hpilip gi, Chyúmdang haú lé yù mù, Yesuq eq sêng é gabú danglù lé taí kyô ri.

³⁶ Haú su e ló kô le, wuì joq é má jé jáng, haú u-nuk hpó gi, "Wú aq, shí má wuì joq tô ri, wui-myhup hkâm yù râ matú ngo lé hkúm râ jang haí joq ashí lú?" ga taí ri. ³⁷ Hpilip gi, "Náng i-myit banshoq èq, nàng lumjáng bê nghut le gi, hkâm yu le ge lhê." ga taí ri; yhangle, "Yesuq Hkrisduq gi, Garai Gasâng é Yhangzo nghut é lé, ngò lumjáng bê." ga tù taí ri.* ³⁸ Haú hkûn, yhâng é myanglhêng hkying nhâng mù, yhangnhik wuì má gyó wâng luí, Hpilip gi, u-nuk hpó lé wui-myhup hkâm byí ri. ³⁹ Wuì hkaú mai htoq ló kô é hkûn, haú Yhumsing é Woi-nyí gi, Hpilip lé myhik za shuí ló byuq mù, u-nuk hpó le Hpilip lé dum a myàng lo; nghut kôhang, yhang gi, e ló é hkyô shut gabú myit èq xoq sô e ló bê nghut ri. ⁴⁰ Hpilip kúm gi, Azutu wà má lo htoq jé kat mù luí, Kesare wà má jé shoq haú mau má é myuq pé wà pé hkangmó má gabú danglù hkô kyô wún ri.

9

Sholuq Lhik Wang Lo É Hkyô

¹ Haú u lé, Sholuq kúm gi, Yhumsing é chángzô pé lé hkat kyuq nha ri eq sat pyám râ ga, nhikmó-yô nyi é nghut mù luí, hkyangjong mó chyáng ê mù, ² Yhumsing é Hkyô lé lumjáng é myiwe yuqgè myàng mi-myàng lé chyup yú luí, Yerusalem wà mó shut wó she ló râ matú, Damaskuq myuq mã é tarajong pé

má byi râ laiká pé lé dúng chùng ri. ³ Yhang e ló le, Damaskuq myuq eq chyáng ló nyi é hkûn, yhâng é lhinghkyuq mã mauhkung mai dàn loq tung duqbó htoq ló ri. ⁴ Yhang myigùng má lêng ngop tô é u lé, "Sholuq, Sholuq, nàng ngo lé haí mù zing-rí nyi lhê lú?" ga luí, yhang lé taí é htê wó gyô ri.

⁵ Haú hkûn, yhang gi, "Yhumsing ê, nàng gi, ó yuq nghut lhê lú?" ga myi jáng, haú Yhumsing gi, "Nàng zing-rí nyi é Yesuq nghut lhê, ⁶ toq aq, myuq shut wang ló aq. Nàng zui saí râ hkyô lé lhom taí kyo râ nghut lhê." ga tù taí ri.

⁷ Yhang eq rahá e ló é luzúm wuì gi, htê haú wó gyo kôhang, ó yuq lé le a myàng kô é yanmai, maú hong yap tô bum akô. ⁸ Sholuq toq mù, myoq hpông kat wù le, haí lé le a myàng dut byuq mù luí, yhang-moq gi, yhang lé loq mai shê mù Damaskuq myuq shut shuí wang ló akô. ⁹ Sholuq gi, sum nyí tup myoqjit byuq mù luí, a zo a shuq é nyi byuq ri.

¹⁰ Damaskuq myuq mã Anani gá é chángzo rayuq nyi ri. Yhumsing gi, yhang lé, "Anani ê." ga shing-rán đông wut ri.

Yhang gi, "Yhumsing ê, shí má nyi lhê." ga tù taí ri.

¹¹ Haú Yhumsing dum taí é gi, "Toq aq, Hkyô-Nyàng gá é wà hkyô shut ê mù, Yudaq é yhùm má, Tarshu byù Sholuq lé ê hô aq, yhang gi, kyúdùng nyi ri. ¹² Yhang gi, Anani ga sù wang lé lô mù, yhâng é myoq dum myàng sháng gaq ga, yhâng é ahtoq mã loq ke byí é lé, shing-rán đông myàng bê nghut ri." gâ ri.

¹³ Anani kúm gi, "Yhumsing ê, shí yuq gi, Yerusalem wà mó má, náng é sân-yúng bang lé a ge é đông hkâ-myhó kut lai lo é hkyanglù lé ngò myo myo wó gyô wú bê; ¹⁴ Shí

* 8:37 Bun zo 37 shí lé Chyúmlaiká ra-am má gi, bo lhê; ra-am má gi, a bò.

pé má le, náng é myìng lé lãng é bang banshoq lé chyup râ ga, hkyangjong agyi pè chyáng mã é ahko ahkàng wó yu to sù nghut ri." ga tâ ri.

¹⁵ Nghut kôhlang, Yhumsing gi, "Ru ê aq, shí yuq gi, tungbaù pé eq yhangmoq é hkohkam pè é hí má le, Israelaq byu pè é hí má le, ngá é myìng lé wùn waq râ matú, ngò chùng râ nghù luí hkyin to sù nghut lhê; ¹⁶ Ngá mying é yanmai hkâ-í hpuzo ra hkyô lé, Ngò, yhang lé tûn shit râ nghut lhê." ga tâ ri.

¹⁷ Hau htâng, Anani gi, jé ê mù, yhùm haù mã wàng luí, Sholuq é ahtoq má loq kê to mù, "Gumang Sholuq ê, náng myoq dum wó myàng mù, Chyoiyung Woi-nyí bying sháng gaq ga, nãng lé lo é hkyô mã, nãng lé htoq shit é Yhumsing Yesuq eq ngo lé nhang kat é nghut lhê." ga tâ ri. ¹⁸ Haù hkûn jáng, Sholuq é myoq mai akyap sù é wuí gyó byuq mù, yhang myoq dum wó myàng bê. Haù hkûn, yhang gi, toq mù wui-myhup hkâm yù luí, ¹⁹ zoshuq lé zo mù, wum-o dum lhoq pying yù bê nghut ri.

Sholuq, Damaskuq Myuq Má Mungdang Hko É Hkyô

Hau htâng, yhang gi, Damaskuq myuq mã é chángzô pé eq rahá rayoq zo zùm yap nyí uchyang, ²⁰ Yesuq gi, Garai Gasâng é Yhangzo nghut é hkyô, haù hkûn jáng tarajong pé má hko kyô nyi bê nghut ri. ²¹ Sholuq é dang lé wó gyô é lhunglhâng bang gi, maù byuq bùm kômù, "Shí yuq gi, Yerusalem wà mó mã mying haù lãng é bang lé lhoq hten lhoq hpyoq sù nghut lhê, a nghut kó lúh? Ahkuí, shí má le, haù su é bang lé chyup yù mù, hkyangjong agyi pè chyáng ló ap râ da luí jé lé é sù a nghut kó lúh?" ga myi bum akô. ²² Sholuq kúm gi, a-tsam je bo lò mù, Damaskuq myuq mã nyi é Yudaq byu pé lé tâi hpyi

kyo luí, Yesuq gi, Hkrisduq yhang nghut nyi é hkyô lé saksé tûn shit ri.

²³ Buinyí tsómra myáng é htâng mã, Yudaq byu pé gi, yhang lé sat pyám râ matú haq dâ akô. ²⁴ Nghut kôhlang, yhangmoq dâ é hkyô lé Sholuq sé pyám ri. Yhangmoq gi, yhang lé wó sat pyám shoq ga, nyí lé myin lé myuq hkum pé má lhom nyi akô. ²⁵ Sholuq é chángzô pé kúm gi, myin mã yhang lé shuí yù mù, manghkoq mã lúng nhâng luí, wà kyám xewâm mai lhoq nyhum hkyô kat akô nghut ri.

Sholuq, Yerusalem Wà Mó Má Taù Jé Lo É Hkyô

²⁶ Hau htâng, yhang gi, Yerusalem wà mó mã jé lo é hkûn, chángzô pé eq zùm yap râ matú shikut wú kôhlang, yhang gi, chángzo dut bê hkyô lé a jing kô é yanmai, lhunglhâng bang gi, yhang lé gyuq bum akô. ²⁷ Barnaba kúm gi, Sholuq lé lagyo pé chyáng shuí lò mù, Sholuq, hkyô mã Yesuq eq hkâsu kut huí é hkyô lé le, Yesuq eq yhang lé tâi é dang wó gyô é hkyô lé le, Damaskuq myuq mã Yesuq é myìng mai gyuq myit a bo é za hkâsu kut hko kyô é hkyô lé le, yhangmoq lé tâi kyô ri. ²⁸ Haù mù, Sholuq gi, yhangmoq eq rahá Yerusalem wà mó mã htoq htoq wàng wàng kut nyí uchyang, Yhumsing é myìng mai a gyuq a kyum é za hko kyô nyi ri. ²⁹ Grik dang nyo é Yudaq byu pé eq le, tâi he lhùm nyi akô; nghut kôhlang, yhangmoq gi, yhang lé sat pyám râ dâ akô. ³⁰ Haù hkyô lé, gumang wui sé kôjáng, yhang lé Kesare wà mó mã jé shoq dé mù, Tarshu myuq shut nhang kat akô nghut ri.

³¹ Yuda mau, Galile mau eq Samariq mau jowò hkanmó mã é noqkuq hpúng gi, haù yoq pé mã, lhoq ging lhoq ting é hkyô wó yù mù, nguingón nyi akô; haù Yhumsing lé gyuq hkunggá é hkyô

má le, Chyoiyúng Woi-nyí eq lhoq pun lhoq kyíng é hkyô pé má le châng nyí mù, myô jat lo bum bekô nghut ri.

Ainea Ge Byuq É Hkyô

³² Háu hkûn, Petruq gi, háu mau pé má hkat kûm wún uchyang, Ludaq wà mó má nyí é sân-yúng bâng chyáng é jé ri. ³³ Háu wà má, gùngjum shí luí shit zân tup yhup-jang mai a wó toq é Ainea gâ é byù rayuq lé é myang ri. ³⁴ Háu mù, Petruq gi, "Ainea ê, Yesuq Hkris-duq, nang lé lhoq gê byi bê nghut ri, toq mù, náng é yhupphú hen yù aq." ga luí, yhang lé taí ri. Háu hkûn jáng, Ainea wó toq yap bê nghut ri. ³⁵ Ludaq eq Sharon pá má nyí é lhunglhang bang gi, háu yuq lé myàng mù luí, Yhumsing Yesuq chyáng lhang wang lo bum akô.

Dorka Ga Sû Dum Dui Lo É Hkyô

³⁶ Ahkuí, Yopa myuq má Tabihta gâ é chángzo myiwe rayuq nyi ri; mying háu lé Grik dang đông gi, Dorka* gâ é nghut lhê. Myiwe háu gi, ge é muzô kut nyi é sù eq, asho awuí bang lé alu byí nyi é sù nghut ri. ³⁷ Háu u lé, yhang gi, nôhpyo hui mù shi ló bê nghut ri. Yhâng mâng lé gi, chi mù luí ahtoq gok má jang tô akô. ³⁸ Ludaq wà mó gi, Yopa myuq eq chyáng é yan-mai, háu myuq má Petruq nyi é lé chángzô pé wó gyo kôjáng, yhang-moq gi, byù í yuq lé nhang kat mù, "Ngamoq chyáng myap lé lô aq." ga jì nhang kat akô.

³⁹ Háu hkûn, Petruq gi, toq mù, háu nhik htâng châng e ló ri. Yhang jé jáng, ahtoq pyâm gok má shuí hâng yu akô. Chuimó myhí pé lhunglhang bang gi, yhang nâm má yap mù ngau uchyang, yhangmoq eq rahá nyi tô ashí hkûn Dorka hkyup é buhîng eq gotú mebu pé lé tûn shit nyi akô.

⁴⁰ Petruq kúm gi, lhunglhang bang lé htoq ló nhâng mù, hkyihput htuoq luí, kyûdung mù, mâng shut lhang wú luí, "Tabihta ê, toq aq!" ga taí ri, háu hkûn myiwe háu myoq hpóng lô mù, Petruq lé myàng jáng, toq zung lo ri. ⁴¹ Petruq gi, loq lham kat mù yhang lé lhang toq yù luí, lumjîng bang eq chuimó myhí pé lé wut yù mù, duí gú ap byí ri. ⁴² Háu hkyô lé, Yopa myuq mâ é bang banshoq wó gyô ló kômù luí, byù myo myo gi, háu Yhumsing Yesuq lé lumjîng bum akô nghut ri. ⁴³ Háu mù, Petruq gi, shokuq loqmú saí é Simun ga sù eq rahá, Yopa myuq má rayoq zo nyi nyi ri.

10

Koneli É Shing-rán

¹ Ahkuí, Kesare wà mó má gyezo rashô up é Koneli gâ é gyezau rayuq nyi ri. Yhang gi, Itali gyedap mâ é nghut lhê. ² Yhang gi, tarâ hkungga myit bò luí, yhâng é yhumbyù banshoq bang eq rahá Garai Gasang lé gyuq hkunggâ nyi lhê eq, myung bang lé alu myo myo byi uchyang, Garai Gasang lé hkâ-nhám le kyûdung nyi ri. ³ Ra-nyí lé, myinhtâng sum hkyíng kô má, Garai Gasâng é maumang lagyo rayuq gi, yhâng chyáng jé mù, "Koneli ê." ga luí, yhang lé wut é lé, shing-rán mai de de myang ri.

⁴ Háu mù, háu yuq lé wú tsuq to mù, "Yhumsing ê, hai hkyô nghut lhê lú?" ga gyuq myit eq myí ri.

Maumang kúm gi, "Náng é kyûdung dang eq alu byí é hkyô gi, Garai Gasâng é hí má, hkungga masat đông hkyâng bê nghut ri. ⁵ Ahkuí, Yopa myuq shut byù nhang kat mù, Petruq gâ é sù Simun lé é shuí lò nhâng aq. ⁶ Yhang gi, wuimau yàm mâ é, shokuq hkyup zô é Simun yhâm má bíng nyi ri." ga taí ri.

* 9:36 Dorka gâ é lichyúm gi, "chochí" gâ é nghut lhê.

⁷ Koneli gi, yhang eq dang tai é maumang lagyo ló byuq jáng, dui-nhâng zoshâng í yuq eq, yhâng chyáng hkâ-nhám le châng nyi bang má é, tarâ hkunggâ é gyezo rayuq lé ji yù mù, ⁸ dut lai lo é hkyô ban-shoq, yhangmoq lé tai kyo lui, Yopa myuq shut nhang kat ri.

Petruq É Shing-rán

⁹ Htang nyí nyí-káng u lé, yhangmoq, Yopa myuq jé ló yâm má, Petruq gi, kyúdung râ ga, yhumhkung shut doq ló ri. ¹⁰ Háu hkûn, yhang gi, zòmut lui rajung jung zô nau nyi ri; nghut kôlhang, zoshuq ru gai nyi ashí le, yhang moq byuq ló mù myoqwup shing-rán myang é gi, ¹¹ mauhkung bóng lô mù, hpajóng mó sù é lé, myi chyûn má zui lui myigùng shut lhoq hkyô kat é azíng lé myang ri. ¹² Háu hkaú má, myigùng htoq mâ é hkyí myi hkyí dap é jung dusak ahú hú eq dô yê é jung ahú hú, mau má dang é ngoq ahú hú, lúng tô ri. ¹³ "Petruq ê, toq mù, sat zo aq." gâ é danghtë le mying htoq lo ri.

¹⁴ Petruq kúm gi, "Yhumsíng ê, haú gi, a wó dut, achaq achyut é eq a sanséng é zè lé, ngò hkâ-nhám le a zô wú." ga tù tai ri.*

¹⁵ Háu hkûn, "Garai Gasang lhoq san lhoq séng bê zè lé, a sanséng hkâ-nghú." ga lui, yhang lé dum tai kat ri.

¹⁶ Háu su ga sum dâm tai é htâng má, zè haú lé radá dâm mauhkung shut wup yu ló bê nghut ri.

¹⁷ Ahkuí, Petruq gi, yhang myang é shing-rán lé hai wá nghut lhé lui ga lui, myit maú nyi é hkûn, haú Koneli nhang kat é bang gi, Simun é yhúm lé myang hô kômù, hkumtot má yap to lui, ¹⁸ Petruq gâ é sù Simun, yhúm haú má nyi a nyi é lé, wut myí wú akò.

¹⁹ Petruq gi, shing-rán haú lé ru myit wú nyi ashí le, Woi-nyí gi, "Wú

aq, byù sum yuq nang lé ho nyi akò, toq mù gyó ló aq; ²⁰ yhangmoq gi, ngò nhang kat é bang nghut é yanmai, myit hai a úng-àng é za, yhangmoq eq rahá bo ló aq." ga tai ri.

²¹ Háu mù, Petruq gi, haú bâng chyáng gyó ló lui, "Nungmoq hô nyi é sù gi, ngò nghut lhé, hai ra lui lé kô é lú?" ga myí ri.

²² Yhangmoq tai é gi, "Dingmán é, Garai Gasang lé gyuq hkunggâ é, Yudaq amyù lunglhang bâng é hí má myoqdong wó é, shò up gyezau Koneli gi, nang lé yhâng é yhúm má ji hâng yù mù, nàng tai é dang gyo yù râ matú, yhang lé chyoiyung maumang lagyo éq tai shit kyô é hkyô lé wó yù lui, ngamoq lé nhang kat é nghut lhé." ga akò. ²³ Háu mù lui, Petruq gi, yhangmoq lé wut hâng yù mù, bing nhang ri. Hau htang nyi, yhang gi, toq mù, yhangmoq eq rahá bo ló ri; Yopa myuq mâ é gumang wui ra-am le châng akò nghut ri.

Koneli Lé Petruq Huí É Hkyô

²⁴ Hau htang nyí, yhangmoq gi, Kesare wá mó shut wang ló akò. Koneli gi, yhâng é gumang wui eq buinùm ji-myi wui lé ji tsíng to mù, yhangmoq lé lánng nyi ri. ²⁵ Petruq wang ló jáng, Koneli gi, te yù mù, yhâng é hkyí wang má paí gop no-kuq ri. ²⁶ Petruq kúm gi, "Toq aq, ngò le byù ru nghut lhé." ga lui, tai uchyang yhang lé tu toq ri.

²⁷ Háu mù, Petruq gi, yhang eq dang nyô uchyang wang ló wú le, byù myo myo zup zíng tô bum é lé myang ri. ²⁸ Háu hkûn, yhang gi, yhangmoq lé, "Yudaq byù rayuq gi, noqkuq htung dòng tungbau rayuq eq a wó zùm yap é, htoq htoq wàng wàng a wó kut é hkyô lé, nungmoq sé lugù nghut akò. Nghut kôlhang, ó yuq lé le achaq achyut dut ri, a sanséng dut ri nghú a ge tai é hkyô lé gi, Garai Gasang, ngo lé tûn shit

* 10:14 Nhung 11 lé wú aq.

bê. ²⁹ Hau é yanmai, nungmoq ngo lé ji kat é hkûn, ngò a he pyâm é za châng mù lo é nghut lhê. Haú mù luí, haí ra kô é yanmai, ngo lé ji akò nghû ngò myí nau ri." ga taí ri.

³⁰ Haú hkûn, Koneli gi, "Laí lò bê myi nyí nyí, myinhâng sum hkyíng má, ngá é yhûm má, ngò kyûdûng nyi le, danso loq, duqbo é mebu wut é byù rayuq ngá é hí má yap htoq shit mù, ³¹ 'Koneli ê, Garai Gasang gi, náng é kyûdung danghtê lé le gyo byi bê; nàng alu byi é hkyô lé le, bun byi bê nghut ri. ³² Hau é yanmai, Yopa myuq shut byù nhang kat mù, Petruq gâ é Simun lé ji nhâng aq. Haú yuq gi, wuimau yâm mâ é shokuq hkyup zô é Simun yhûm má bíng nyi ri.' ga taí ri. ³³ Haú mù luí, haú hkûn jâng ngò náng chyáng byù nhang kat bê nghut lhê. Ahkuí, nàng jé é gi, gyai gê bê nghut ri. Yhumsîng yhang nang lé taí nhang é gû banshoq gyô yù râ matú, ahkuí ngamoq lhunglhang bang Garai Gasâng é hí má nghut nyi lhê." ga taí ri.

Petruq Hko Kyô É Mungdang

³⁴ Haú hkûn, Petruq dang-hi hpông é gi, "Garai Gasang, myoqdong a hkyin é hkyô lé, ahkuí ngò gè gè yhang sé bê. ³⁵ Byù myù chângjup má, Yhang lé gyuq hkunggâ é eq tengmán é muzó jizó saí é sù gi, Yhang é hí má myoqdong wó nyi ri. ³⁶ Nyi mi-nyí, joq mijoq é Yhumsîng, Yesuq Hkrisduq é yanmai, ngingón hkyô eq sêng é gabú danglù lé hko kyo sháng gaq ga, Israelaq byu pê chyáng Garai Gasang hun kat é mungdang eq rajung za, ³⁷ baptisma hkyô lé, Yohan hko é htâng, Galile mau mai Yuda mau banshoq má taí pyo ló é hkyô lé, nungmoq sé gû nghut nyi lhê. ³⁸ Haú gi, Garai Gasâng eq Chyoiyúng Woi-nyí eq wum-o atsam byí to bê sù, Nazaret wà byù

Yesuq é hkyô nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat eq zing-ri huí é bang banshoq lé lhoq gê byí wún ri.

³⁹ Haú mù, Yudaq byu pê é ming má le, Yerusalem wà mó má le, yhang zui saí bê muzó banshoq é saksé pé gi, ngamoq nghut nyi lhê. Haú yuq lé yhang, yhangmoq sik zîng má jén sat pyám bekô nghut ri. ⁴⁰ Garai Gasang kúm gi, sum nyí nghû râ buinyí má, haú yuq lé lhoq dui toq kat é nghut mù luí, byù banshoq é hí má a nghut e za, saksé kut râ matú Garai Gasang hkyin to gù nghut é bang ngamoq é hí má za htoq shit bê nghut ri. ⁴¹ Yhang shi é mai dum dui toq ló é htâng má, ngamoq yhang, Yhang eq rahá razo rashuq wó kut yu é nghut lhê. ⁴² Yhang gi, asak dui é bang eq shí bê bâng é tará agyí kut râ matú, Garai Gasâng eq Yhang lé hkyin tô é sù nghut é hkyô lé, byu pé lé hko kyo râ eq, saksé hkâm râ matú, ngamoq lé hkunmó hkyô to bê nghut ri. ⁴³ 'Yhang lé lumjîng é bang yuq hkanmó gi, Yhâng é my-íng é yanmai, yubak hkyut pyám byí é hui kó râ nghut lhê.' ga luí, taí é myiqhtoi banshoq gi, Yhâng é hkyô lé saksé hkam byí é bang nghut nyi akô." ga taí ri.

Chyoiyúng Woi-nyí Lé, Tungbaù Pé Wó Hap Yu É Hkyô

⁴⁴ Petruq gi, haú hkyô lé ru taí nyi ashí le, dang haú wó gyô é banshoq bâng ahtoq má Chyoiyúng Woi-nyí gyó jé lo ri. ⁴⁵ Tungbaù pê é htoq má lháng Chyoiyúng Woi-nyí gâ é chyunghuq lé hut hkyô kat é yanmai, Petruq eq rahá léé, ahpyo-kuq hpyit bê é lumjîng bang Yudaq byu pé gi, maú bum akô. ⁴⁶ Hkâsu mù gâ le, yhangmoq gi, laklaí dang nyo é lé le, Garai Gasang lé hkya-on kô é lé le, wó gyô bùm kô é yanmai nghut ri.

⁴⁷ Haû mù, Petruq gi, "Ngamoq su Chyoiyúng Woi-nyí hkâm yù bê bang lé, baptisma a byi nhâng râ gi, wuì lé ó yuq wó hkûm to râ lú?" ga taí ri. ⁴⁸ Hau htâng, yhang gi, yhangmoq lé Yesuq Hkrisduq é myìng lang luí wui-myhup hkâm yù râ matú pyíng tô ri. Haû hkûn, yhangmoq gi, Petruq lé buinyí ra-í nyí, nyi gyó shi aq ga chôm hkûm akô.

11

Petruq, Yhang Kut É Muzó Lé Shít Kyô É Hkyô

¹ Túngbaù pé le, Garai Gasâng é mungdang lhom yù bê gâ é hkyô lé, lagyo pé eq Yuda mau pé mâ é gumang wuì wó gyô akô. ² Haû mù, Petruq, Yerusalem wà mó má doq ló é hkûn, ahyo-kuq hpyit hkyô lé myit zuq é lumjíng bang gi, ³ "Nàng gi, ahyo-kuq a hpyit é bâng é yhûm má wàng mù, yhangmoq eq razo rashuq kut ri." ga luí, yhang lé mara lhom taí hun bum akô.

⁴ Haû hkûn, Petruq gi, haû dut lò bê hkyô lé awang mai ahyo hpyot, yhangmoq lé taí sân kyô hi kat é má, ⁵ "Ngò gi, Yopa myuq má kyûdûng nyi le, moq byuq ló mù shing-rán myang é gi, mauhkûng mai hpajóng mó sù é myi chyûn shut zui luí, ngá shut lhoq hkyô kat é zè gyó jé lo é lé, myang ri. ⁶ Haû lé rago za saí wú le, myigùng htoq má hkyî myi hkyî dap é jung dusak, yosô zè, dô yê é jung eq, maulat nghoqzô pé bo tô é lé, ngò myàng luí, myit wú nyi é hkûn, ⁷ 'Petruq ê, toq mù, sat zo aq.' gâ é danghtê lé, ngò wó gyô ri.

⁸ Ngò kúm gi, 'Yhumsîng ê, haû gi, a wó dut, achayut é eq a sansêng é zè, ngá é nhut má hkâ-nhám le a wang wú.' nghû taí kat é nghut lhê.

⁹ Haû hkûn, 'Garai Gasang lhoq san lhoq yúng bê zè lé, a sansêng hkâ-nghû.' ga luí, mauhkûng mai

dum taí kat ri. ¹⁰ Haû su ga sum dâm taí é htâng má, haû pé banshoq lé mauhkûng shut dum wup yu ló bê nghut ri.

¹¹ Haû hkûn jáng, Kesare wà mó mai, ngá chyáng nhang kat é byù sum yuq gi, ngò nyi é yhûm hkum-tot má jé nyi tô akô. ¹² Chyoiyúng Woi-nyí gi, ngo lé myit a úng-âng é za, yhangmoq htâng châng é aq ga taí ri; shí gumang hkyuq yuq le ngò eq rahá ê mù, Koneli é yhûm má ngamoq wang é. ¹³ Haû hkûn, haû yuq gi, yhâng é yhûm má maumang lagyo lé htoq shit é hkûn, yhang hkâsu myang é hkyô lé le; maumang lagyo éq yhang lé, 'Yopa myuq shut byù nhang kat mù, Petruq gâ é sù Simun lé ê jî nhâng aq; ¹⁴ nàng eq náng yhum-byù lunglhang bang hkyi yù hui râ danglù, yhang, náng chyáng wun lé lô byi râ nghut lhê.' ga taí é hkyô lé le, ngamoq lé taí kyô ri.

¹⁵ Ngò dang taí hi ló nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri. ¹⁶ Haû hkûn sheq, ngò gi, 'Yohan gi, wuì èq wui-myhup hkâm byí ri; nungmoq kúm gi, Chyoiyúng Woi-nyí èq wui-myhup hkâm byí é hui kó râ nghut lhê.' ga luí, Yhumsîng taí é dang lé bûn kat ri. ¹⁷ Haû mù luí, Yhumsîng Yesuq Hkrisduq lé lumjíng é hkûn, ngamoq lé Garai Gasâng jeju chyunghuq byí é su, Yhang, yhangmoq lé le byí é nghut le gi, ngò gi, hkâsú é byù nghut luí, Garai Gasang lé wó lhom hkûm pyám râ lú?" ga taí ri.

¹⁸ Yhangmoq gi, haû hkyô lé wó gyo kôjáng, taí jang a joq lo kômù, "Ó! Nghut bê, Garai Gasang gi, túngbaù pé lé le, asak duì râ matú myit lhung hkyô byi bu-nhung!" ga luí, Garai Gasang lé chôm hkya-ôn akô nghut ri.

Antioku Wà Mâ É Noqkuq Hpúng

¹⁹ Ahkuî, Stehpan lé sat pyám kô é htâng má, zing-ri hui kô é yanmai, byo myín ló é bang gi, Hpinisi mau, Kupru zinlóng eq Antioku wà mó jé shoq byo ló kômù, Yudaq byu pé lé baú za, mungdang haú hko kyô akô nghut ri. ²⁰ Nghut kôlhang, yhangmoq má é Kupru byù eq Kuruni byù ra-am gi, Antioku wà mó má châng jé ló kômù, Yhumsing Yesuq é gabú danglù lé, Grik pé lé le taí kyô bum akô. ²¹ Haú Yhumsing é loq gi, yhangmoq eq rahá nghut nyí mù luí, byù myo myo gi, lumjínq mù, Yhumsing chyáng lhing wang lo bùm bekô nghut ri.

²² Haú bâng é hkyô lé, Yerusalem noqkuq hpúng é no má hkyang jé ló é nghut mù luí, yhangmoq gi, Barnaba lé Antioku wà mó jé shoq nhang kat akô. ²³ Yhang jé é hkûn, Garai Gasâng jeju bo nyí é lé myàng jáng, yhang gi, gabú luí, yhangmoq é myit nhiklhum banshoq eq haú Yhumsing má lhumzuí nyí rà matú, lhunglhang bang lé myit wum byí ri. ²⁴ Hkâsu mù gâ le, Barnaba gi, byù gè nghut mù, Choyiyúng Woi-nyí le, lumjínq myit le byíng tô é sù nghut nyí ri. Haú mù, byù myo myo gi, haú Yhumsing chyáng jat wang lo bùm bekô nghut ri.

²⁵ Hau htâng, Barnaba gi, Sholuq lé é hô rà ga Tarshu myuq shut é mù, yhang lé myàng jáng, Antioku wà mó má shuí lo ri. ²⁶ Haú mù, yhangnhik gi, razàn gón noqkuq hpúng haú eq rahá zum nyí kô é nghut mù luí, byù myo myo lé wó mhoqshit akô. Chángzô pé gi, Hkristan gâ é myìng lé, Antioku wà mó má sâng-hi wó yù bekô nghut ri.

²⁷ Haú u lé, myiqhtoí pé ra-am gi, Yerusalem wà mó mai, Antioku wà mó má lé jé bum akô. ²⁸ Haú bang má é Agabu gâ é sù gi, toq yap mù, Romaq mینگan ting má mutmò gyó ló rà nghut é hkyô lé, Woi-nyí eq tún shit é đông taí kyô ri;

(Haú gi, hkohkâm Klodi é pyat má dut bê nghut lhê.) ²⁹ Haú mù luí, chángzô pé gi, Yuda mau má é gumang wui lé, ó le ó wó dut é myhó garum kat rà ga, myit hpyit yu bum akô. ³⁰ Haú eq rajung za kut kômù, yhangmoq gi, chyungluq haú pé lé Barnaba eq Sholuq nhik é loq mai suwún wui pé chyáng hun kat bekô nghut ri.

12*Petruq, Htóng Mai Wó Lut Htoq Lo É Hkyô*

¹ Haú u lé, Herut hkohkâm gi, hpúng byù ra-am lé chyup yù mù, zing-ri rà ga ngantsâ nyi ri. ² Haú mù, Yohan é yhangmanq Yakuq lé sham eq sat pyám nhang ri. ³ Haú hkyô lé Yudaq byu pé wú gabú é lé myàng jáng, yhang gi, Petruq lé le, jâng chyup yu ri. Haú dut é gi, mún a kat é muk zo poí u lé nghut ri. ⁴ Herut gi, Lhoqlhai Poí lai jáng sheq, mingbyù wui hí má jéyáng rà ga myit tô é yanmai, yhang lé chyup yu é htâng má, htóng má lhung to mù, yhang lé zúng rà matú, gyè myi yuq yuq kut myi hpúng lé ap tô ri.

⁵ Haú mù, Petruq gi, htóng má lúng tô ri; hpúng byù wui kúm gi, yhang é matú Garai Gasâng chyáng kyú gyai chòm dung byí nyi akô nghut ri.

⁶ Petruq gi, Herut eq yhang lé jéyáng rà matú she htoq yù rà hí myìn lé, shamtoq-tui í hkat eq tuí é hui luí, gyezo í yuq é gyoro má yhup myhí tô ri; zúng é bang le htóng hkum má zúng nyi bum akô. ⁷ Haú hkûn, Yhumsing é maumang lagyo rayuq lé htoq shit mù, gok haú má duqbó lo ri. Maumang lagyo haú gi, Petruq é namcham má é hpuk kat mù, "Myap toq wú aq." ga nhaú ri; haú hkûn, Petruq é loq má é toqjàng tui pé le gyut gyó ló bê nghut ri.

8 Maumang dum taí é gi, "Hpy-ihit hit mù, hkyí-tsung tsung aq." gâ ri; Petruq le taí é eq rajung za kut ri. "Náng é bumó wut mù ngá htâng cháng aq." ga yhang lé maumang lagyo dum taí ri. 9 Haú hkûn, yhang gi, htóng mai yhâng htâng châng htoq ló ri; nghut kôlhang, maumang lagyo kut é muzó haú gi, gè gè nghut é lé, yhang a sé mù, shing-rán myang é nghut ri ga myit yu ri. 10 Ahkuí, yhangnhik gi, zúng tô é jowò í wô lai mù, wà má htoq é shamtoq hkum má jé jáng, hkum haú le yhang baú bóng lô mù, yhangnhik htoq luí, wà hkyô rahkat má sô lô le, maumang lagyo gi, haú hkûn jáng, yhâng chyáng mai gâng ló byuq bê nghut ri.

11 Ahkuí, Petruq gi, dum bûn gyîng lò jáng, "Yhumsîng gi, Yhâng é maumang lagyo lé nhang kat mù, Herut é loq eq Yudaq byu pé myit myoqbyù tô é hkyô banshoq mai, ngo lé hkyi yù bê nghut é lé, ahkuí ngò gè gè sé bê." ga taí ri.

12 Haú hkyô lé myit sê kat jáng, yhang gi, byù myo myo zing mù, kyûdûng nyi é jowò, Markuq gâ é Yohan é yhângnu Mariq é yhûm má jé lô ri. 13 Haú mù, yhang gi, yhûm wàng hkum lé lô bat é hkûn, Roda gâ é dui-nhâng zoshâng myiwe zo rayuq gi, gyô wú rá ga htoq lé lo ri. 14 Yhang gi, Petruq é htê nghut é lé sê gyô kat jáng, lûm gabú luí hkum a hpóng byi shí é za, yhûmhkaú shut din wang lô mù, "Petruq gi, hkum mhó lut má lo yap tô ri." ga lô taí kyô ri.

15 Yhangmoq kúm gi, "Nàng na bê nghut ri." ga yhang lé taí akô. Yhang gi, gè gè nghut ri ga ru taí nyi ri. Dum, yhangmoq gi, "Yhâng é maumang lagyo nghut âng ri." ga taí akô.

16 Nghut kôlhang, Petruq gi, hkum ru bat nyi mù, yhangmoq hpông kat é hkûn, yhang lé myàng kôjáng, chôm maú byuq bum akô.

17 Yhang gi, yhangmoq lé zim za nyi keq ga loq lik shit mù, yhang lé Yhumsing eq htóng mai hkâsu kut shuí htoq yu é hkyô lé taí kyo luí, "Shí hkyô lé Yakuq eq gumang wui lé taí kyô kat keq." ga taí ri. Hau htâng, yhang htoq ló luí, jowò gó shut e lô bê nghut ri.

18 Ahkuí, maubó jáng, gyezô pé gi, Petruq haí dut byuq é hkyô lé a sé kô é yanmai, gyaí maú gabyông bum akô. 19 Herut kúm gi, Petruq lé ho wú le a myàng jáng, zúng é bang lé myi gôn wú mù, yhangmoq lé sat pyám rá matú hkunmó hkyô ri.

Herut Hkôhkâm Shi Byuq É Hkyô

Hau htâng, yhang gi, Yuda mau mai Kesare wà mó má gyó lô mù lô nyi nyi ri. 20 Haú gyoro má, Herut hkôhkâm gi, Turuq eq Sidun byu pé lé gyaí nhik-yô nyi ri. Haú mù luí, yhangmoq gi, myit rahkat zâ eq yhâng chyáng é mù, Blastu gâ é, hkôhkâm wa lum tô é suwún hpó lé è lûm hkaú mù, simsaq hkyô é dúng akô. Hkâsu mù gâ le, yhangmoq é zoshuq wó rá matú gi, Herut é ming lé lûm hkaú nyi kô é yanmai nghut ri.

21 Haú hkûn, ding lhûm tô é buinyi má, Herut gi, hkôhkâm hking wut chûng mù, hkôhkâm tanghkuq má zúng luí, yhangmoq lé hkôhkâm mungdang byi ri. 22 Haú jáng, mingbyù wui gi, "Htê shí gi, waxâng byu é htê a nghut, garai wá é htê sheq nghut ri." ga garú bum akô. 23 Radá dâm, Herut gi, Garai Gasâng é hpungwup shingkang lé a tê byi é yanmai, Yhumsing é maumang lagyo gi, yhang lé dâm byi luí, yhang gi, luq eq hkê é hui mù, shi byuq bê nghut ri.

24 Haú Garai Gasâng é mungdang gi, sê é bang myô jat lò mù, je riyhang byo myín lô bê nghut ri.

25 Barnaba eq Sholuq nhik gi, Yerusalem wà mó má yhangnhik saí tûm nyi é muzó ban saí jáng,

Markuq gâ é Yohan lé shuí chùng mù, Antioku wà mó shut taù lò bekò nghut ri.

13

Barnaba Eq Sholuq, Hkyin Nhang Kat Huí É Hkyô

¹ Ahkuí, Antioku wà mó mâ é noqkuq hpúng má, myiqhtoí pé eq sará pé le lom nyi akò. Haù bang gi, Barnaba, Niger* gâ é Simeon, Kuruni byù Luki, (Herut zau hpó eq zum kò lò sù) Manaen eq Sholuq pé nghut akò. ² Yhangmoq gi, zoshuq gám luí Yhumsing lé noqkuq dojau nyi é hkùn, Chyoiyúng Woi-nyí gi, "Ngá é mù wùn waq râ matú jì tô é Barnaba eq Sholuq nhik lé, hkyin to keq." ga taí ri. ³ Haù mù luí, yhangmoq gi, zoshuq gám luí kyúdung mù, yhangnhik ahtoq má loq ke byi kò é htâng, yhangnhik lé nhang htoq kat akò nghut ri.

Kupru Zinlóng Má Dut É Hkyô

⁴ Haù mù, yhangnhik gi, Chyoiyúng Woi-nyí èq nhang kat é eq rajung za, Seluki wà shut gyó lò mù, haù mâ é lhaí ji luí, Kupru zinlóng má jé lò luí, ⁵ Salami wà mó má nyi nyi é hkùn, Yudaq byu pé é tarajong pé má, Garai Gasang é mungdang hko kyô akò. Markuq gâ é Yohan le yhangnhik lé htuqluq htuqbang kut nyi ri.

⁶ Yhangmoq gi, haù zinlóng mai lai byit e lò mù Pahpu wà mó jé lò kò é hkùn, myiqhtoí pyoq nghut sù Bara-Yesuq gâ é Yudaq byu myoqheq sará rayuq eq htung hui akò. ⁷ Haù yuq gi, Sergi Poluq gâ é, myit hpaqchyí kùng é ginwáng zau hpó é byù rayuq nghut lhê. Minggyi hpó haù gi, Garai Gasang é mungdang gyó yù nau mù, Barnaba eq Sholuq nhik lé ji yu ri. ⁸ Haù hkùn, myoqheq sará gâ é lichyúm đông myhíng é Eluma le gâ é Bara-Yesuq kúm gi, ginwáng zau hpó lé haù

lumjíng hkyô má a jau lò nhâng nau é nghut mù luí, yhangnhik lé lhom he tang pyâm ri. ⁹ Haù hkùn, Poluq le gâ é Sholuq gi, Chyoiyúng Woi-nyí byíng mù, yhang lé wú tsuq to luí, ¹⁰ "Myit goí é hkyô eq hpuq lô lhik é hkyô banshoq byíng tô é, nat é yhangzo nghut sù, tengmán hkyô hkgangmó é gyè hpó é, Yhumsing é tengmán hkyô lé a lhoq hpyoq é a wó nyí lhú? ¹¹ Ahkuí, wú aq, Yhumsing é loq gi, náng chyáng jé mù, nàng gi, rayoq zo builoq a wó myang é za, myoqjit byuq râ nghut lhê." ga taí ri.

Haù hkùn jáng, yhâng é myoq gi, myhi-myhà ga luí mauchut tuq dut lò byuq ri; haù mù, yhang lé shê râ byù ho sop lhíng wún ri. ¹² Haù hkyô lé ginwáng zau hpó myàng jáng, Yhumsing eq sêng é mhoqshit é hkyô lé wú maú luí lumjíng bê nghut ri.

Antioku Wà Mó Má Dut É Hkyô

¹³ Hau htâng, Poluq eq yhâng luzúm wui gi, Pahpu wà mó mai lhaí ji mù, Pamhpuli mau mâ é Perga wà má jé lò akò. Markuq gâ é Yohan kúm gi, yhangmoq eq gang luí, Yerusalem wà mó shut taù lú byuq bê nghut ri. ¹⁴ Dum, yhangmoq gi, Perga mai toq e lò le, Pesidi ginwáng mâ é Antioku wà mó má jé lò akò. Bánno buinyí má, yhangmoq gi, tarajong má wang zung tô akò. ¹⁵ Haù hkùn, Mosheq é tarâ laiká eq myiqhtoí laiká pé lé ban nghap jáng, tarajong má up bang gi, "Gumang wui ê, mingbyù wui lé myit wum byi dang joq kò é nghut le gi, ahkuí taí lo keq." ga luí, yhangmoq chyáng taí nhang kat ri.

¹⁶ Haù hkùn, Poluq gi, toq yap mù, zím byuq kó sháng gaq ga loq tú luí, "Israelaq byu pé eq Garai Gasang lé gyuq hkunggâ é byu pé ê, chôm gyô yù keq. ¹⁷ Israelaq byu pé é Garai Gasang gi, ngamoq é íchyí

* 13:1 Grik dong Niger gâ é gi, byù noq gâ é nghut lhê.

ikê pé lé hkyin yù bê nghut mù luí, Egutuq ming má byùbing dut nyi to ashí hkùn, yhangmoq lé kô myhâng nhâng mù, hpungwup a-tsam bo é loq eq háu mau mai shuí htoq ló ri. ¹⁸ Dum, myi xê zàn kô, yoso pé má yhangmoq é a-kyang lé jân pyám byi mù, ¹⁹ Hkanaan ming má é byuhú nyhit hú lé lhoq htên pyám luí, háu bâng é mingdán má é silí wunlí yhangmoq lé gám byi ri. Háu gi, myi shô ngo xê zàn kô myáng ri.

²⁰ Hau htâng má, Garai Gasang gi, myiqhtoi Samuelaq é pyat jé shoq tará agyi pé lé to byi ri. ²¹ Hau htâng má, yhangmoq mai hkohkâm dung kômù, Garai Gasang gi, yhangmoq lé, Ben-yamyin amyû má é, Kisha é yhangzo Sholuq lé byi luí, yhang gi, myi xê zàn up bê nghut ri. ²² Hau htâng, Sholuq lé lhoq hkyô pyám mù, Dawiq lé, yhangmoq é hkohkâm kut nhang ri. Dawiq é hkyô lé Yhang saksé hkâm é gi, 'Ngò nhik dik é Yese é yhangzo Dawiq lé myàng bê; yhang gi, ngò kut nhang é hkyô banshoq lé kut rá nghut lhê.' gâ ri.

²³ Garai Gasang gi, Yhâng é dang-gidiq joq é eq rajung za, Israelaq byu pé é matú, háu yuq é awut ashín mai, hkyi yù Sû Yesuq lé, pô htoq nhâng bê nghut ri. ²⁴ Yesuq a jé lé shimá, Yohan gi, Israelaq byu pé banshoq lé myit lhing hkyô eq sêng é baptisma hkyô lé hko kyo bê nghut ri. ²⁵ Dum Yohan gi, yhang zuí é muzó ban ló é u lé, 'Ngò lé ó nghut é su ngâm tô akò lú? Ngò gi, háu yuq a nghut, wú keq, ngá é htâng má rayuq jé rá nghut lhê, háu yuq é hkyi-tsung tui hpyi rá lhang ngò a gíng.' ga tái ri.

²⁶ Abraham é yhangzo yhang-shú pé eq Garai Gasang lé gyuq hkunggá é tungbaù, gumang wui é, shí hkyi yù hkyô mungdang lé, nga-nhúng chyáng byi kat bê nghut

ri. ²⁷ Yerusalem wà mó má é bang eq, yhangmoq é zau suwún wui gi, Yhang hkyi yù sù nghut é lé le, Bánno buinyi hkangmó nghap é myiqhtoi pé é dang lé le, a sê gyo kô é yanmai, Yesuq lé sat rá doqdân é hkùn, myiqhtoi pé é dang lé lhoq dik pyám bekô nghut ri. ²⁸ Yhâng chyáng shí gíng é mara a myàng kôlhang, Yhang lé sat pyám nhâng rá matú, Pilat chyáng dúng akô. ²⁹ Yhangmoq gi, yhang eq séng luí, kê to má kê to ban lhoq dik kôjáng, Yhang lé tapzing mai yu hkyó mù, lup má kat tô akò nghut ri. ³⁰ Garai Gasang kúm gi, Yhang lé shí é mai lhoq dui toq yù bê nghut lhê. ³¹ Yhang gi, Galile mau mai Yerusalem wà mó jé shoq, hí lé Yhâng htâng châng é bâng chyáng buinyi tsómra myáng shoq htoq shit shit kut ri. Háu bang gi, ahkuí, nga-nhúng Israelaq byu pé é hí má, Yhâng é saksé dut bekô nghut ri.

³² Háu mù, í dam lhê é Hkya-on Kungtôn Laiká má, 'Nàng gi, Ngá Zo nghut ri. Hkû-nyí, Ngò gi, Nàng Wa dut bê nghut lhê.'*

ga luí, kê tô é eq rajung za, ³³ Garai Gasang gi, íchyí iwà pé lé byi tô é danggidiq lé, Yesuq lé lhoq dui toq byi é dông, yhangmoq é yhangzo yhangshu ngamoq é matú, lhoq dik byi é gabú danglù lé, nung-moq chyáng ngamoq wun lé byi bê. ³⁴ Hau htoq agó, Yhang htên byoq é hkâ-nhám a hui shoq, shí é mai lhoq dui toq yù rá hkyô eq séng luí, Garai Gasang tái é gi,

'Dawiq lé byi tô é danggidiq eq rajung za, chyoiyúng é eq lumgíng é jeju lé, ngò nung-moq lé byi rá nghut lhê.'*

gâ ri. ³⁵ Hkya-on Kungtôn Laiká gó wô má le, 'Nàng é Chyoiyúng Sù lé, Nàng htên byoq nhâng nàù rá a nghut.'* ga tái tô ri.

³⁶ Ahkuî, Dawiq gi, yhâng é pyat banshoq má Garai Gasang ô nau é đông ban wùn waq jáng, shi byuq luí, íchyl íwâ pé eq ráhá myhup pyám hui mù, htên byoq byuq é hui bê nghut ri. ³⁷ Garai Gasang lhoq dui toq yu é sù kúm gi, htên byoq hui é a nghut.

³⁸ Haú nghut é yanmai, gumang wui ê, haú yuq mai yubak wó hkyut pyám byí é hkyô lé, nungmoq lé hko kyô nyi é nghut é le, sê nyi keq. ³⁹ Hau htoq agó, Mosheq é tarâ èq mara hkyut san byí é a hui kôlhang, haú yuq lé lumjǐng é bang gi, hkyô lhumjup má mara hkyut san byí é hui rá nghut lhê. ⁴⁰ Hau é yanmai,

'Wú keq, jihpoi é bang ê, maú mù luí htum byuq keq;
nungmoq é buinyi pé má ngò ra-
jung jung kut htoq rá nghut
lhê;

⁴¹ haú hkyô lé, rayuq yuq, nung-
moq lé hkaí kyo kôlhang, jǐng
kó rá a nghut.*

ga luí, myiqhtoí pé taí é dang,
nungmoq má a ang sháng gaq,
sidiq nyi keq." ga hko kyô nyi ri.

⁴² Ahkuî, Poluq eq Barnaba nhik tarajong mai htoq ló le, htâng lhê é Bánno buinyi má le, haú pé lé dum hkaí kyo rá matú yhangmoq chôm dúng akô. ⁴³ Chôm byo htoq ló kô é hkún, Yudaq byu pé eq Yudaq noqkuq htung má lhing wang lo é tarâ hkunggá é byù myo myo gi, yhangnhik é htâng má châng bùm kô é nghut mù luí, Garai Gasang jeju má gǐng nyi rá matú, yhangnhik gi, yhangmoq lé lhoq pun lhoq kyǐng akô nghut ri.

Tungbaù Pê Chyang Lhing Lo É Hkyó

⁴⁴ Hau htang lhê é Bánno buinyi má, Garai Gasang é mungdang gyô yù rá matú, rawa bang aluq shoí banshoq, lé zup zǐng to bum akô.

⁴⁵ Yudaq byu pé kúm gi, byù moq mó haú lé myàng jáng, manon myit baú byǐng bùm kômù luí, Poluq taí é dang lé taí htǐng é eq nhǐng pyám akô.

⁴⁶ Poluq eq Barnaba le gyuq myit a bo é đông taí é gi, "Garai Gasang é mungdang lé, nungmoq lé hí taí kyo rá dut é yanmai, ngá-nhik taí bê nghut lhê. Nghut kôlhang, nungmoq gi, haú lé lhom he-ngik pyám kômù, ahtum abyuq é asak eq gǐngdán é đông yhumsing gùng lé a myit yù kô é yanmai, wú keq, ahkuî, ngá-nhik gi, tungbaù pé shut lhing ló berâ nghut lhê. ⁴⁷ Hkâsu mù gâ le, haú Yhumsing gi,

'Hkyi yù hkyô lé maumyí htum
shoq wó chùng jé rá matú,
Ngò, nàng lé tungbaù pé é
maubó dut nhâng bê.*

ga luí, ngamoq lé hkunmó hkyó kat
bê." gâ ri.

⁴⁸ Tungbaù pé gi, dang haú lé wó gyo kôjáng, gabú é eq Yhumsing é mungdang lé hkya-on kungtôn nyi bum akô. Ahtum abyuq é asak lé wó rá matú hkyin to huí é lhunglhang bang le, lumjǐng bum akô nghut ri.

⁴⁹ Yhumsing é mungdang gi, haú ming gón jam lò bê nghut ri. ⁵⁰ Yudaq byu pé kúm gi, Poluq eq Barnaba nhik lé zing-ri rá matú, aróng wó é myiwe wui mâ é tarâ hkungga bang eq, haú wà mâ é suwún wui lé, nhik lhoq yo kôluí, yhangnhik lé maukyo mai chôm hkat htoq pyám akô. ⁵¹ Yhangnhik gi, yhangmoq lé a nau é hkyô tân shit é đông, yhumsing é hkyí mâ é hpuilhaù lé yhangmoq chyang ko hkyô pyám to kômù, Ikoní wà mó shut ló byuq beko nghut ri.

⁵² Chángzô pé kúm gi, gabú é htoq agó, Chyoiyúng Woi-nyí byǐng nyí bum akô nghut ri.

14

Poluq Eq Barnaba N्हik, Ikoni Wà Mó Má Ló Jé É Hkùn Lhê Hkyô

¹ Ahkuí, Ikoni wà mó má nghut nyi é hkùn, Poluq eq Barnaba n्हik gi, Yudaq byu pé é tarajong má rahá wàng mù, Yudaq byù eq tũngbaù pé ajùm ayò lumjĩng bùm kó shoq, wum kat hko kyô akô. ² Nghut kôlhang, a lumjĩng é Yudaq byu pé gi, lumjĩng é gumang wù lé a ngui rá dõng tũngbaù pé lé mhoq hpyoq yù mù, shuĩ gum-laù akô. ³ Haù mù luĩ, yhangnhik gi, tsómra myang shoq haù má nyi mù, haù Yhumsing é matú gyuq myit a bo é za hko kyô akô; Yhang Yhumsing le yhangnhik é loq mai limik kumlhá eq mauhpo muzó dut nhang é dõng, Yhàng é jeju mungdang lé saksé hkám byĩ nyi ri. ⁴ Haù wâ mâ é bang kúm gi, myit byo ló bùm kô é nghut mù luĩ, Yudaq byu pé chyáng ra-am, lagyo pé chyáng ra-am, lom byuq ló akô. ⁵ Ahkuí, tũngbaù pé le, Yudaq byù eq yhangmoq é uphkáng bang le, yhangnhik lé rhoi mù luqgok èq dú sat rá ga htĩm lo bum akô. ⁶ Nghut kôlhang, yhangnhik gi, haù hkyô lé bũn sê kat kôjáng, Lukaoni ginwáng mâ é Lustra eq Derbe wà mó eq, hau é awui ayám wà tiq wà zo pé shut hpang e ló akô. ⁷ Haù pé má le, gabú danglù xoq hko kyô wún akô nghut ri.

Lustra Wà Mó Má Ló Jé É Hkùn Lhê Hkyô

⁸ Ahkuí, Lustra wà mó má, ìnu unghkaù mai hkyi hten mù luĩ, hkâ-nhám le hkyô a wó sô wú é sũ rayuq zung tô ri. ⁹ Yhang le Poluq taĩ é dang lé gyô nyi ri. Poluq gi, haù yuq lé wú tsuq kat é hkùn, wó lhoq gê byi hui rá nghut lhê gâ é lumjĩng myit yhàng chyáng bo tô é lé, myàng byĩ ri. ¹⁰ Haù mù, Poluq gi, "Toq yap aq!" ga luĩ, htê mó eq yhang lé taĩ kat jáng, yhang gi,

byam toq kat mù, wó so bê nghut ri.

¹¹ Haù mù, Poluq kut é muzó lé shiwa byu pé myàng kôjáng, yhangmoq gi, Lukaoni dang dõng, "Nat hparà pé gi, byù gũng dõng kut luĩ ngamoq chyáng gyó lô bekô nghut ri." ga luĩ, wut garu bum akô. ¹² Hau htàng, Poluq gi, dang myô taĩ sũ nghut é yanmai, yhang lé Herme ga, Barnaba lé gi, Zeu ga myhĩng byĩ akô. ¹³ Haù wà yám mâ é Zeu hparà noqkuq yhũm hkyangjong hpó gi, wà hkum má nohtó pé eq ban hkóng pé yu lé mù, shiwa byu pé eq rahá yhangnhik lé hkungga nhõng byi rá hen akô.

¹⁴ Nghut kôlhang, lagyo n्हik Barnaba eq Poluq gi, haù lé wó gyo kôjáng, yhumsing é mebu lãng cheq pyám kôluĩ, shiwa hpong gung gũng shut ãn wang é kômù, garú taĩ kô é gi, ¹⁵ "Hkaù pé ê, haĩ mù haù su kut lo akô lhú? Nghanhik le nungmoq eq rajung za, xãngzo byù za nghut lhê, akyũ a bo é hkyô shĩ pé lé tô pyám to mù, mauhkũng eq myigũng, wuĩshuq lung-aũ eq haù pé má nyi mi-nyĩ, joq mijoq lé hpan to sũ, rũ dui nyi é Garai Gasàng chyáng lhing wang lò kó sháng gaq nhũ luĩ sheq, nungmoq lé gabú danglù hko kyô é nghut lhê. ¹⁶ Garai Gasang gi, byù myũ chãngiup lé hí hpayang lhê é pyat bán má ó le ó kãm é dõng kut nhâng bê nghut ri. ¹⁷ Nghut kôlhang, Yhang gi, mauhkũng mai mau wô nhâng luĩ, kyôshi zui nhang é ahkying yam-yoq byi mù, nungmoq lé zoshuq agùn agó byĩ é eq, nungmoq lé i-myiit nõn nhang nyi é dõng, Yhang ge é hkyô lé tũn shit mù, Yhang nyi é hkyô lé saksé hkám nyi ri." ga akô. ¹⁸ Haù su ga taĩ kô le lháng, yhangnhik lé shiwa byu pé mai hkungga nhõng byi rá hkyô lé, yhangnhik gi, gyai wuihke luĩ sheq wó hkũm pyám akô nghut ri.

¹⁹ Hau htâng, Antioku wà mó eq Ikoni wà mó pé má é Yudaq byu pé ra-am lé jé kômù, shiwa byu pé lé shuí-u luí, Poluq lé luqgok eq chôm dú kômù, yhang lé shí byuq bê su ngàm kô é yanmai, wà shing-gan shut shê hkyut htoq pyâm akô. ²⁰ Nghut kôlhang, Poluq gi, yhâng é lhinghkyuq má chángzô pé yap tô kô é hkûn, toq mù wà shut tau wang ló ri. Hau htang nyí, yhang gi, Barnaba eq rahá Derbe wà mó shut e ló bekô nghut ri.

Antioku Wà Mó Má Taú Jé Ló É Hkyô

²¹ Háu wà má yhangnhik eq gabú danglù hkô kyo kô é yanmai, byú myo myo gi, chángzô pé dut lo akô. Hau htâng, yhangnhik gi, Lustra, Ikoni, Antioku wà mó hkyô dum taú ló kômù, ²² chángzô pé lé myit lhoq ging byi uchyang, haú lumjín hkyô má ru gín nyí rá matú myit wum byí akô. "Nga-nhúng gi, Garai Gasâng é mingdán má wàng rá matú, wúhke jamjau myo myo hui ra rá nghut lhê." ga le, mhoqshit akô. ²³ Yhangnhik gi, noqkuq hpúng hkangmó má, hpúng suwún kut rá bang lé hkyin yù mù, zoshuq gám luí kyúdung mù, yhangmoq lumjín nyí é Yhumsing Garai chyáng ap byi tô akô. ²⁴ Hau htâng, yhangnhik gi, Pesidi ginwáng mai láí byit ló mù, Pamhpuli ginwáng má jé ló akô nghut ri. ²⁵ Háu ginwáng má é Perga wà mó má mungdang hko kyo luí, Atali wà mó shut láí gyó ló akô nghut ri.

²⁶ Háu mai, lhaí ji mù, ahkuí yhangnhik wùn waq láí ló bê muzó é matú, Garai Gasâng jeju má ap luí yhangnhik lé nhang kat é Antioku wà mó má dum jé lò bekô nghut ri. ²⁷ Jé lo é hkûn, yhangnhik gi, hpúng byú wui lé wut tsing yù mù, yhangnhik đông mai Garai Gasang kut é hkyô banhoq lé le, tungbaù pé lé haú lumjín hkyô

hkum hpóng byí é hkyô lé le, shit kyô akô. ²⁸ Háu mù, yhangnhik gi, haú wà má chángzô pé eq tsómra myang shoq nyi nyi akô nghut ri.

15

Ahpyo-kuq Hpyit Hkyô Eq Sêng É Manghkáng

¹ Ahkuí, Yuda mau má é byú ram gi, Antioku wà mó má lé jé mù, gumang wui lé, "Nungmoq gi, Mosheq é htúngtarâ eq rajung za, ahpyo-kuq a hpyit é nghut jáng, hkyi yu é hui rá a nghut." ga luí, mhoqshit bum akô. ² Háu é yanmai, myit a huí lhum é hkyô htoq lô mù, Poluq eq Barnaba nhik gi, haú bang eq gyai yhang myíng myô lhum akô; haú mù luí, gumang wui gi, Yerusalem wà mó má nyi é lagyo pé eq suwún wui chyáng, haú hkyô lé ló hpyê lhum rá matú, Poluq, Barnaba nhik eq rahá, yhangmoq chyáng má é ra-am lé, nhang kat rá ga hkyin tô akô. ³ Háu mù, hpúng byú wui yhangmoq lé dé kat kôjáng, yhangmoq gi, Hpinisi mau eq Samariq mau gyoro mai sô láí ló uchyang, tungbaù pé lhing wang lò bê hkyô lé taí kyô akô. Háu má é gumang wui lé gyai yhang gabú nhang akô nghut ri. ⁴ Yhangmoq, Yerusalem wà mó má jé kô é hkûn, hpúng byú wui, lagyo pé eq suwún wui gi, yhangmoq lé lhom hkûlum yù kô é nghut mù luí, yhangmoq gi, yhangmoq đông mai Garai Gasang kut é hkyô lunglhang lé, haú bang lé shit kyô akô.

⁵ Háu hkûn, Hparishe hpúng má é lumjín bang ra-am gi, toq mù luí, "Tungbaù pé lé, ahpyo-kuq hpyit nhâng rá eq, Mosheq é tarâ đông cháng nhâng rá gi, ra yhang rá lhê." ga taí bum akô nghut ri.

Yerusalem Wà Mó Má Kut É Byin Tú Wap Hpong

⁶ Ahkuí, lagyo pé eq hpúng suwún wui gi, shí hkyô lé chôm

myit wú rã ga, zup tô bum akô.
 7 Shí hkyô lé gyai yhang dang rhâng
 lhùm bùm kô é htâng má, Petruq gi,
 toq mù luí, "Gumang wui ê, Garai
 Gasang gi, ngá nhut mai taí é, haú
 gabú danglù lé, tũngbaù pé gyô yù
 mù lumjĩng kó sháng gaq ga, hí
 hkũn nungmoq chyáng mai ngo
 lé hkyin yù bê hkyô lé, nungmoq
 sé lugù nghut bê. 8 Haú mù, myit
 nhikhlum lé sé byi sũ Garai Gasang
 gi, nga-nhúng lé byi é eq rajung
 za, yhangmoq lé le Chyoiyúng
 Woi-nyí byi é dõng, yhangmoq lé
 hap yù bê hkyô lé saksé tũn shit
 bê nghut ri. 9 Garai Gasang gi,
 yhangmoq lumjĩng luí, yhangmoq
 é myit nhikhlum lé lhoq san lhoq
 yúng byi bê nghut é yanmai, nga-
 nhúng eq yhangmoq é gyoro má
 gamhkuí é hkyô a joq nhâng lo
 nghut ri. 10 Haú nghut le gi, íchýí
 íwã pé eq le, nga-nhúng eq le a ung
 é wólai lé, haú chángzô pé é lingzing
 má ke byi é dõng mai, haí mù, ahkuí
 Garai Gasang lé chyam wú nyi akô
 lhú? 11 Nghut kôlháng, ngamoq gi,
 yhangmoq eq rajung za, Yhumsĩng
 Yesuq é jeju mai za hkyi yu é huí é
 hkyô lé lumjĩng é bang nghut lhê."
 ga luí, yhangmoq lé taí ri.

12 Haú hkũn, zup míng tô é bang
 lhunglháng gi, zim za kut luí, Barn-
 aba eq Poluq nhik mai, tũngbaù pé
 chyáng, Garai Gasang eq yhang-
 hik é loq dõng limik kumlhá pé eq
 mauhpo muzó pé kut shit é hkyô,
 taí kyô nyi é lé chõm gyô nyi akô.
 13 Yhangnhik dang ban taí kôjáng,
 Yakuq gi, "Gumang wui ê, ngá dang
 lé gyô wú keq. 14 Garai Gasang gi,
 tũngbaù pé chyáng mai Yhâng my-
 ing é matú byù ra-myû hkyin yù rã
 ga, yhangmoq lé sâng-hi mai hkãsu
 kut lé kũm nyi é hkyô lé, Simun taí
 kyo bê nghut ri. 15-16 Shí hkyô gi,
 'Hau é htâng má gi, ngò dum taù
 lò mù luí, lêng gyop byuq bê

Dawiq é yhùm* lé dum saí rã
 nghut lhê.

Haú byoq htên tô é pé lé saí saí mù,
 haú lé dum lhoq toq rã nghut
 lhê.

17 Haú hkũn sheq, ngá myĩng mai ji
 yu é tũngbaù pé eq, myit gyo
 tô é byù lhunglháng bang gi,
 Yhumsĩng Garai lé hô kó rã
 nghut lhê ga,

18 a-nham mau htoq xâng hkun
 mai, shí hkyô pé lé sé nhang
 é Yhumsĩng Garai taí ri.*

ga myiqhtoí pé kã tô é dang eq
 rajung za nghut ri.

19 Haú mù luí, ngò taí nau é
 gi, tũngbaù pé chyáng mai Garai
 Gasang shut lhing lo é bang lé, gotù
 haí le a lhoq wui é za, 20 hparã lhô
 pé lé kyáng byi é a sansêng é zoshuq
 pé lé le, ashop é dõng gungsho zùm
 yap é hkyô lé le, lingzing mai my-
 hik sat é dusak sho lé le, sui lé zô
 é hkyô lé le, koi pyám rã matú za,
 yhangmoq lé, nga-nhúng laiká mai
 wó shit kat lhê. 21 Hkãsu mù gã
 le, gó hkũn mai yhang, Mosheq é
 tarã lé wã hkangmó má hko kyô ló
 kômù, Bánno buinyi hkangmó tara-
 jong pé má nghap kyo kyo kut bùm
 kô é nghut lhê." ga taí ri.

Lumjĩng É Tũngbaù Pé Chyáng Hun Kat É Laiká

22 Haú hkũn, lagyo pé, suwún
 wui eq, hpúng byù wui lhunglháng
 bang gi, Poluq, Barnaba nhik eq
 rahá Antioku wã mó shut nhang
 kat rã byù lé, yhangmoq chyáng
 mai hkyin yù rã matú chõm myit
 hpyit akô. Haú eq rajung za,
 yhangmoq gi, gumang wui chyáng
 mã é nhik bõ suwún nhik Barsabaq
 gã é Yudaq eq Sila lé hkyin yu akô
 nghut ri. 23 Yhangnhik é loq má,
 hun kat kô é laiká gi,

"Antioku wã mó, Suriq mau eq
 Kiliki mau pé má nyi é, tũngbaù
 gumang wui ê, nungmoq é

* 15:15-16 Dawiq é yhùm gã é gi, Dawiq eq yhâng é awut ashũn pé up é hkyô lé gã é nghut lhê.

☆ 15:18 Amo 9:11-12

gumang wui nghut é, ngamoq lagyô pé eq suwún wui gi, nguóngón dang shit kyô kat lhê.

²⁴ Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dâng èq lhoq byok pyám luí, nungmoq é myit lé lhoq nhúng byí nyi é hkyô lé, ngamoq wó gyo bê. ²⁵ Haú mù, ngamoq lhunglhang bang gi, byù ra-am lé hkyin yù mù, ²⁶ nga-nhung é Yhumsing Yesuq Hkrisduq é matú, yhumsing asak lé lhang a há é nga-nhung chyitdap é Barnaba, Poluq nhik eq rahá, nungmoq chyáng nhang kat rá matú chôm myit hui bê. ²⁷ Haú mù luí, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang taí kyo kó rá nghut lhê. ²⁸ Nungmoq é matú gi, hparà lhot pé lé tîng byí é zoshuq eq sui, lingzing mai myhik sat é dusak sho eq ashop é dông gungsho zùm yap é hkyô pé lé, koi pyám rá hkyô mai lai luí, gotú wòwùn hùn rá hkyô a joq nghu luí, Chyoiyung Woi-nyí le, ngamoq le, myit hui to bê. ²⁹ Nungmoq haú pé lé koi pyám nyi kôjáng gi, gè rá nghut lhê.

Nguóngón wángzán nyí kó sháng gaq ô!" ga ká tô ri.

³⁰ Yhangmoq lé nhang kat kôjáng, yhangmoq gi, Antioku wà mó má gyó jé lô kômù, hpúng byú wui lé ji tsing to kôluí, haú hùn kat é laiká lé ap byí akô nghut ri. ³¹ Hpúng byú wui gi, laiká haú lé ban nghap kôjáng, wum-o byí é danglù hau é yanmai, gabú nyi bum akô. ³² Yudaq eq Sila gi, myiqhtoi nhik le nghut kômù luí, gumang wui lé mungdang myo myô èq lhoq pun lhoq kying kômù, wum-o lhoq gíng to byí

akô. ³³ Rayoq zo haú má nyi nyi kô é htàng má, gumang wui gi, yhangmoq lé nhang kat é bâng chyáng, ngui ngui ngón ngón dum tau lô nhâng bekô nghut ri. ³⁴ (Sila kúm gi, yhang ô nau é dông nyi gyó tô ri.)† ³⁵ Poluq eq Barnaba kúm gi, Antioku wà mó má nyi gyó to kômù, Yhumsing Yesuq é mungdang lé, góbang myo myo eq, mhoq kyo hko kyô akô nghut ri.

Poluq Eq Barnaba Njik Gâng Lhum É Hkyô

³⁶ Hau htàng, buinyi tsómra myáng jáng, Poluq gi, Barnaba lé, "Yhumsing é mungdang hko kyô lai lo wú bê, wà hkyap hkgangmó má é gumang wui chyáng tau lò luí, yhangmoq hkâsu dut nyi é hkyô lé, lô dum kùm wú lo goq." ga taí ri. ³⁷ Barnaba gi, Markuq gâ é Yohan lé le shuí chùng nau ri. ³⁸ Nghut kôlhang, Poluq gi, haú yuq lé a kâm shuí chùng nau nghut ri; hkâsu mù gâ le, yhang gi, Pamhpuli mau má yhangnhik lé tô pyám to mù, yhangnhik eq rahá muzó a kâm xoq zui nau é sù nghut é yanmai nghut ri. ³⁹ Hau é yanmai, yhangnhik gi, gyai yhang taí shai lhum kômù, rayuq eq rayuq gâng lhum bekô nghut ri. Barnaba gi, Markuq lé shuí chùng luí, lhai ji mù Kupru zinlóng shut e lô byuq bê nghut ri. ⁴⁰ Poluq kúm gi, Sila lé hkyin yù mù, gumang wui èq yhang lé Yhumsing Garaí é jeju má ap kat kô é htàng má, yhangnhik gi, htoq e lô byuq bekô. ⁴¹ Haú mù, Poluq gi, Suriq mau eq Kiliki mau mai sô lai lô uchyang, haú má é noqkuq hpúng pé lé wum-o lhoq ging byí wún bê nghut ri.

16

Poluq Eq Sila Njik Chyáng Timohi Châng É Hkyô

† 15:34 Bun zo shí lhum gi, Grik Chyúmlaiká myo myo má a bò nghut lhê.

¹ Poluq gi, Derbe wà mó má jé é htâng, Lustra wà mó má dum jé ri. Haú wà má, Timohti gâ é chángzo rayuq nyi ri. Yhâng nu gi, Yesuq lé lumjǐng é Yudaq myiwe myhí nghut ri; yhâng wa kúm gi, Grik amyú nghut ri. ² Timohti gi, Lustra wà mó eq Ikoni wà mó má nyi é gumang wui éq hkya-ôn é hui sù nghut ri. ³ Poluq gi, hkyowui má yhang lé shuí chũng nau mù luí, ahpyo-kuq hpyit byí ri. Hkâsu mù gâ le, yhâng wa gi, Grik nghut é hkyô lé haú mâ é Yudaq byu pé lhunglhâng bang sé kômù, haú bang lé myit tè byí é yanmai nghut ri. ⁴ Haú mù, yhangmoq gi, rawa htâng rawá mai lai ló uchyang, Yerusalem wà mó mâ é lagyô pé eq hpúng suwún wui, chôm myit hpyit tô é hkyô lé, cháng kó sháng gaq ga, yhangmoq lé taí kyô akô. ⁵ Haú mù luí, hpúng byú wui gi, lumjǐng hkyô má wum-o bo lò kômù, ra-nyí éq ra-nyí byú du myô jat lo nyi ri.

Makedoni Byú Rayuq Lé, Poluq Shing-rán Myang É Hkyô

⁶ Ahkuí, yhangmoq gi, Asia mau má mungdang é hko kyo rá hkyô lé Chyoiyúng Woi-nyí éq yhangmoq lé hkúm pyâm é yanmai, Hprugi mau eq Galatiq mau dông sô lai ló mù, ⁷ Musi mau kyo má jé ló kôjáng, Bihuni mau shut wang ló rá dâ akô; nghut kôlháng, Yesuq é Woi-nyí gi, yhangmoq lé ahkáng a byi nghut ri. ⁸ Haú mù, yhangmoq gi, Musi mau mai sô lai ló luí, Troa myuq má gyó jé ló akô. ⁹ Haú má, myín lé, Poluq gi, Makedoni byú rayuq lé yap to mù, "Makedoni mau shut dap lé luí, ngamoq lé le garúm yú laq." ga luí, yhang lé dung wut nyi é shing-rán myang ri. ¹⁰ Shing-rán haú lé Poluq myang é eq, Makedoni byu pé lé gabú danglù hko kyo rá matú, ngamoq lé Garai Gasang wut yú bê nghut ri nghú myit yú luí, haú hkún yhang, ngamoq gi, Makedoni mau

shut dap é rá matú rì rì kut ló bê nghut lhê.

Ludia Gâ É Myiwe Myhí Hpúng Byú Dut Lo É Hkyô

¹¹ Haú mù luí, ngamoq gi, Troa myuq mai Samohtake zinlóng ang ang shut hai ji é mù luí, htang nyí gi, Neapoli wà má jé bê nghut lhê. ¹² Haú mai lai jáng, Makedoni mau má, Romaq byu pé xuq tô é, haú ginwáng mâ é ahkyak wà mó nghut é, Hpilipi myuq má ngamoq jé mù, haú má rayoq zo nyi nyi é nghut lhê.

¹³ Bánno buinyí jé jáng, ngamoq gi, kyûdung jowò joq nhô ngam mù, wà hkum shinggan mâ é, wuilàng yàm shut htoq é luí, haú má zǐng to lánng é myiwe wui lé, zung gyó mù nyo hi é nghut lhê. ¹⁴ Haú dang gyo nyi é bang má, Garai Gasang lé no-qkuq é, Htuatira myuq byú, pán nê ung zo sù Ludia gâ é myiwe myhí rayuq bo ri; Yhumsing Garai gi, Poluq taí kyô é hkyô lé rago gyô yú sháng gaq ga, yhang lé myit hkum hpóng byí ri. ¹⁵ Yhang gi, yhang eq yhâng yhumbyú wui wui-myhup ban hkâm yú kôjáng, "Nungmoq gi, ngo lé haú Yhumsing Yesuq má lumjǐng bê sù nghut é dông, myit yú byi kô é nghut jáng, ngá yhúm má lé bíng keq." ga luí, ngamoq lé zuq zuq ji yu ri.

Poluq Eq Sila Nhik Htóng Lúng É Hkyô

¹⁶ Ra-nyí lé, ngamoq gi, haú kyûdũng é jowò shut e ló nyi le, nat wang júng luí gumhpân hpan é jùnmyhí rayuq ngamoq lé lhom huí ri. Haú yuq gi, gumhpân hpan é dông yhâng yhumsing wui lé ngunzè gyai yhang hô byí é sù nghut lhê. ¹⁷ Myiwe haú gi, Poluq eq ngamoq htâng má châng to mù, "Shí bang gi, nungmoq lé hkyi yú hkyô taí kyô wún é, Myhang Htâng é Garai Gasang é dui-nhâng zoshâng wui nghut bum akô ô!" ga

wut garú ri. ¹⁸ Buinyì myo myo haú su chyat châng garú wún é yanmai, Poluq gi, gyai yhang myit hpêbu byuq mù, lhing wú kat luí, nat haú lé, "Yesuq Hkrisduq é myìng lang luí ngò nang lé hkunmó hkyô kat lhê, yhang chyáng mai htoq ló byuq aq." ga luí, nat haú lé, nhik-yô kat ri. Haú hkún jáng, nat haú gi, yhang chyáng mai htoq ló byuq bê nghut ri.

¹⁹ Ahkuí, myiwe hau é yhumsing wui gi, ngunzè myàng zo rà myoqbyù jowò a joq lo é hkyô lé sé kôjáng, Poluq eq Sila nhik lé chyup yú mù, gai mâ é suwún wui chyáng she hkyut e akô. ²⁰ Dum, yhangmoq gi, yhangnhik lé tarâ agyì pè chyáng shuí ê mù, "Shí nhik gi, Yudaq byù nghut mù luí, ngamoq Romaq byu pé mai a ge châng é htunghking lé mhoqshit byì nyi é đông, ²¹ nga-nhùng é myuq lé gunjâng nyi akô nghut ri." ga taí akô.

²² Haú mù luí, shiwa byu pé gi, yhangnhik lé chôm htím akô. Tarâ agyì pé gi, yhangnhik é mebu lé lêng hkyut pyám luí, wumchùm hkat eq bat rà matú, hkunmó hkyô kat akô. ²³ Yhangmoq gi, yhangnhik lé gyai yhang nhuq bat yu é htâng, htong má lhúng kat mù, rago za wú zúng rà matú htóng suwún lé hkunmó hkyô tô akô. ²⁴ Htóng suwún hpó gi, haú sù é hkunmó lé wó jáng, yhangnhik lé hkyí kyum hut luí, htóng mâ é, je ahté gok má lhúng tô ri.

Htóng Suwún Hpó Hkyi Yù Huí É Hkyô

²⁵ Nghut kôlhàng, gunggàm yoq lé, Poluq eq Sila nhik gi, kyúdung luí, Garai Gasang lé mahkôn hkyâôn nyi kô é hkún, htóng byù góbang gi, yhangnhik é htê lé chôm gyô nyi bum akô. ²⁶ Haú hkún, byodân ratung layàng mó nún lô mù htóng yhùm gón le nún lô luí, hkum pé banshoq le radá dâm bóng hà

lo bum ri; dum nghut jáng, yuq hkanmó mâ é toqjâng tui pé le gyut gyó byuq bê nghut ri. ²⁷ Htóng suwún hpó gi, yhup bûn lò mù, htóng hkum pé bóng hà tô bum é lé myang kat jáng, htóng byu pé ban hpang byuq bùm bekô rà nghut lhê ga myit yù luí, shâm shê mù, yhanggùng yhang sat shí rà dâ ri.

²⁸ Nghut kôlhàng, Poluq gi, "Ê, náng gùng yhang náng haú su hkâkut, ngamoq banshoq shí má nyi tô lhê." ga luí, htê mó eq wut garu taí kat ri.

²⁹ Haú hkún, yhang gi, duq é myibung lé dúng yù mù, ahkaú shut din wang ló luí, Poluq eq Sila nhik é hí má gyuq nán é eq ngóm gop tô ri.

³⁰ Hau htâng, yhang gi, yhangnhik lé shuí htoq yú luí, "Sarâ nhik ê, ngò hkyi yu é hui rà matú, haí kut ra rà lú?" ga myi kat ri.

³¹ Haú hkún, yhangnhik gi, "Yhumsing Yesuq lé lumjáng jáng, náng eq náng yhumbyù lhunglhâng bang hkyi yu é hui rà nghut lhê." ga taí akô. ³² Hau htâng, yhangnhik gi, haú htóng suwún hpó eq yhang yhumbyù lhunglhâng lé, Yhumsing é mungdang hko kyô akô. ³³ Haú myín haú u lé yhang, htóng suwún hpó gi, yhangnhik lé shuí ê mù, yhangnhik é dâm pé lé tsing chí pyám byi luí, haú htâng, yhang eq yhang yhumbyù banshoq bang wui-myhup hkâm yù bekô nghut ri.

³⁴ Hau htâng, yhang gi, yhangnhik lé, yhang é yhúmhaú má shuí wang ló mù, zoshuq hkan byì ri. Yhang eq yhang yhumbyù banshoq bang gi, Garai Gasang lé wó lumjáng bekô nghut é yanmai, gyai gabú nyi bum akô nghut ri.

Haq Nhang Pyám Râ Lé A Đông É Hkyô

³⁵ Ahkuí, maubó jáng, tarâ agyì wui gi, "Haú nhik lé nhang pyám aq." ga, htóng suwún hpó chyáng pyata pé lé taí nhang kat akô.

³⁶ Haú hkún, htóng suwún hpó gi,

"Nungnhik lé nhang pyám aq ga, tará agyi wui mai byù nhang kat ri; haù mù, ahkuí, nungnhik gi, ngón za htoqló lo keq." ga luí, Poluqlé taí ri.

³⁷ Poluq kúm gi, "Nga-nhik gi, Romaq mingdán byù sheq ru nghut le wa, myí gôn wú é hkyô le a bo é, byu pé hí má ngá-nhik lé nhuq bat mù, htóng má hkyô kat kôluí nhîng, ahkuí tsik za haq nhang pyám râ dô akô nhung lhi? A wó dut, yhang-moq yhang sheq lé shuí htoq yú kó sháng gaq." ga luí, yhangmoq lé tú taí kat ri.

³⁸ Pyata pé gi, tará agyi wui lé dang haù pé ló taí kyo kôjáng, tará agyi wui gi, Poluq eq Sila nhik Romaq mingdán byù nghut é hkyô lé wó gyo kôjáng, gyô gyuq kôluí, ³⁹ yhangmoq yhang, yhangnhik chyáng lé mù, tóngbán luí, shuí htoq yú mù, wà haù mai htoq ló byuq râ matú chôm dúng akô. ⁴⁰ Haù mù, Poluq eq Sila nhik gi, htóng mai htoq ló é htâng, Ludia é yhùm má wang ló akô; haù má, gumang wui eq le hui kômù, yhangmoq lé wum-o byi luí, htoq ló bekô nghut ri.

17

Htesaloni Wà Mó Má Mungdang Hko Kyô É Hkyô

¹ Hau htâng, yhangmoq gi, Amhipoli wà mó eq Apolon wà mó mai sô laí ló mù, Htesaloni wà mó má jé akô. Haù wà má gi, Yudaq byu pé é tarajong ralhüm joq ri. ² Poluq gi, yhang lhaq kut nyi é eq rajung za, tarajong má wàng luí, Bánno buinyi sum nyi yhang, Chyúmdang má bo é eq séng mù, yhangmoq eq chôm mîng lhum uchyang, ³ Hkrisduq wuîhke jamjau hui mù, shí bê mai dum dui toq lô râ hkyô lé taí hkoq san kyo luí, "Nungmoq lé, ngò hko kyô nyi é haù Yesuq gi, Hkrisduq nghut lhê." ga taí ri. ⁴ Yudaq byu pé má é ra-am gi, gyô jíng kômù, Poluq eq Sila nhik chyáng lé xoq yu akô;

haù eq rajung za, Garai Gasang lé hkunggâ é Grik pé myo myo eq, ahkyak é myiwe wui tsómra myo shoq le, gyô jíng kômù, lé xoq yu akô.

⁵ Nghut kôlhang, a gyô jíng é Yudaq byu pé gi, manôn kôluí, gài má é byùgang jùm ra-am lé lung yù mù, byù moq mó tsíng yù luí, rawa é shuí gabyong kômù, shiwa byu pé é hí má Poluq eq Sila nhik lé wó shuí htoq shit shoq ga, Yason é yhùm má htím e ló akô. ⁶ Nghut kôlhang, yhangnhik lé a myàng kôjáng, yhangmoq gi, Yason eq gumang wui ra-am lé, yhangmoq é wà suwún wui chyáng lîng she é kômù, "Mingkan gón lé atau ahù kut é byù shí nhik, ahkuí shí má jé jáng, Yason gi, yhâng é yhùm má lhom hkûlum yu ri. ⁷ Yhangmoq lhunglhâng bang gi, Yesuq gâ é hkohkâm góyuq nyi lhê ga kôluí, hkoséng Kehtaq é tará lé lhoq shai é dông kut é bang nghut akô." ga taí garú bum akô. ⁸ Shiwa byu pé eq wà suwún wui gi, dang haù lé wó gyo kôjáng, myit wui myit hke dut nyi bum akô. ⁹ Hau htâng, yhangmoq gi, manghkáng a lhoq htoq râ matú Yason eq góbang lé danggidiq zè byi nhâng mù, nhang pyám bekô nghut ri.

Beria Wà Mó Bang, Mungdang Lé Lhom Yu É Hkyô

¹⁰ Haù myín jáng yhang, gumang wui gi, Poluq eq Sila nhik lé Beria wà mó shut nhang kat akô; yhangnhik gi, haù wà má jé jáng, Yudaq byu pé é tarajong má wang ló akô nghut ri. ¹¹ Haù Beria wà mó byu pé gi, Htesaloni wà mó byu pé htoq má je riyhang nhik bo bum akô; haù mù, danglù haù lé gyai ô nau é myit eq hap yù mù, danglù shí teng a têng é hkyô lé wó sé shoq ga, nyi wui Chyúmdang lé chôm nghap wú nyi akô nghut ri. ¹² Haù mù luí, Yudaq byu pé myo

myo gi, lumjǐng bum akô, haû eq rajung za, aróng wó é Grik myiwe wui eq yuqé wú myo myo le, lumjǐng bûm bekô nghut ri.

¹³ Poluq gi, Beria wà mó má le, Garai Gasâng é mungdang hko kyô nyi é hkyô lé, Htesaloni wà mó má é Yudaq byu pé sé kôjáng, yhangmoq gi, haû má lé kômù, wà byù wui lé mhoq hpyoq luí, gabyông lò nhang akô. ¹⁴ Haû hkûn, gumang wui gi, Poluq lé wuimau yàm jé shoq, radá dâm dé kat akô; nghut kôlháng, Sila eq Timohti nhik gi, Beria wà mó má nyi gyó tô akô nghut ri. ¹⁵ Poluq lé châng dé é bang gi, Ahten myuq jé shoq lé dé to kômù, Sila eq Timohti nhik lé hân hân châng ló rà matú pping kat é dang lé wun chûng mù, dum taù lò bekô nghut ri.

Poluq, Ahten Myuq Má Nyi É U Lhê Hkyô

¹⁶ Ahkuí, Poluq gi, Ahten myuq má haû nhik lé lǎng nyi tô é u lé, haû wà má rawa é hparà lhô baú dut tô é lé myàng mù luí, yhâng i-myit gyai yhang a ngón dut byuq ri. ¹⁷ Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggâ é Grik pé eq le, gai pé má hui mihui bang eq le, nyí wui taí sân kyô lhûm nyi akô nghut ri. ¹⁸ Haû mù luí, Epikuri hpaqchyí eq Sto-i hpaqchyí* lé sé é, myit wú hpaqchyí bo é bang ra-am gi, yhang eq dang chyin chyin lhûm akô; haû hkûn, yhang gi, Yesuq é hkyô eq dum dui toq hkyo é gabú danglù lé hko kyô é yanmai, ram gi, "Byù pyok shí yuq gi, haí wá taí nyi lhê lhú?" ga; ra-am gi, "Góming hparà pé é hkyô lé taí kyo sù nghut sam ri." ga, taí bum akô nghut ri. ¹⁹ Hau htâng, yhangmoq gi, Aripagu gâ é byìn tú wap shut Poluq lé shuí doq ló mù, "Nang mhoqshit é hkyô asik, ngamoq lé

sé nhang le a gè lhú? ²⁰ Nang eq taí é maú nhô za gâ é hkyô lé ngamoq wó gyô ri; haû é dang kyíng lé ngamoq sé nau ri." ga taí bum akô. ²¹ (Ahten byu pé eq haû má nyi é góming byu pé lhunglhâng bang gi, dang sik lù sik haû lé taí kún gyô kún mù, yhangmoq é ahkyíng lé lhoq pán nyi bum akô nghut ri.)

Poluq, Aripagu Zuphpong Má Mungdang Hko É Hkyô

²² Haû u lé, Poluq gi, Aripagu zuphpong má toq yap mù, "Ahten byu pé ê, nungmoq gi, hkyô hkat hkangmó má hparà lhô pé lé gyai yhang dat gyuq hkungga kô é lé, ngò myang ri. ²³ Hkâsu mù gâ le, ngò sô lhing wún mù nungmoq jaú é ze pé lé rago wú wú lé, 'A sé é Garaí matú.', ga luí, kâ tô é hkungga gyap ralhúm lé myang záng ri; haû nungmoq a sé é za jaú nyi é Garaí hkyô lé, ngò, nungmoq lé hkaí kyo kôlé.

²⁴ Myidàm htoq eq haû má joq mijoq lé hpan tô é Garaí Gasang gi, mauhkûng eq myigùng é Yhumsíng le nghut lhê mù luí, byu loq eq saí é noqkuq yhûm má nyi rà a nghut. ²⁵ Yhang gi, byù lhunglhâng bang lé asak, soq, ra mira gumjup shoq byí to sù nghut nyi é yanmai, rajung jung rà é sù lé su, byu loq eq dojaú rà sù a nghut. ²⁶ Yhang gi, gunchyung rayuq maí za byuhú chângjup myô lò nhâng mù, myidàm htoq jàm shoq má nyi nhâng luí, yhangmoq é matú hí hí mai ahkyíng yam-yoq eq nyi rà jowò masat to byi bê nghut ri. ²⁷ Yhang gi, nga-nhúng yuq hkangmó eq a we to kôle, byu pé yhang lé châng hô mù, myang hô kó sháng gaq ga shí hkyô lé kut é nghut ri. ²⁸ Hkâsu mù gâ le, nungmoq é jihkyang kat bang, 'Nga-nhúng le yhâng é awut ashín pé nghut nyi

* **17:18** Epikuri hpaqchyí gi, htang pyat a joq, ahkuí ngón yù rà za ahkyak gâ é nghut lhê. Sto-i hpaqchyí gi, haí wá dut kôlháng i-myit zim za kut mù, htang pyat matú chiq a ra gâ é nghut lhê.

lhê.' ga taí tô bum é eq rajung za, nga-nhúng gi, Yhang é yanmai wó nyí, wó dui é eq ísu wó dut é nghut lhê.

²⁹ Haú mù, nga-nhúng gi, Garai Gasâng é yhangzô pé nghut nyí é yanmai, Garaí gùng gi, byu é hpaqchyí loq èq kyúng kâ tô é hng, ngùn, luqgok pé eq púng lhê ngù luí hkâ-myt yú kó. ³⁰ Lai lò bê haú myoq a bóng shi é pyat lé, Garai Gasang gi, haí le a ga lhai pyâm to kôlhng, ahkuí gi, jowò hkangmó mâ é byù lhunglhâng bang lé, myit lhng keq ga hkunmó hkyô to bê nghut ri. ³¹ Hkâsu mù gà le, Yhang hkyin to sù mai mingkan gón lé tara é đông jéyáng râ buinyi ra-nyí masat to bê nghut ri. Shí hkyô lé, byù lhunglhâng bâng é hí má wó lum é saksé dut sháng gaq ga, Yhang haú yuq lé shi é mai lhoq dui toq yú bê nghut ri." ga taí ri.

³² Shí é mai dum dui toq lo é hkyô lé wó gyô bùm kôjáng, ra-am gi, taí hpoi pyám byí akô; ra-am kúm gi, "Nàng shí hkyô taí é lé ngamoq dum gyô wú nau ashí." ga taí akô. ³³ Hau htâng, Poluq gi, haú zuph-pong mai htoq ló byuq bê nghut ri. ³⁴ Nghut kôlhng, byù ra-am gi, Poluq é htâng cháng kômù, lumjng bang dut bekô nghut ri. Haú bang má, Aripagu zuphpong má bo é Dionisi ga sù le bo ri. Hau htoq agó, Damari gà é myiwe rayuq eq gotú byu pé le, bo bum akô nghut ri.

18

Poluq, Korinhtuq Myuq Má Nyí É ULhê Hkyô

¹ Hau htâng má, Poluq gi, Ahten myuq mai htoq luí, Korinhtuq myuq má jé lo ri. ² Haú má, yhang gi, Romaq myuq mai Yudaq byù lhunglhâng bang htoq ló byuq râ dut lhê ga, hkohkâm Klodi èq hkunmó hkyô é yanmai, a myáng shi lé Itali ming mai yhangmyi Priskila eq htoq jé lo é, Pontuq mau

byù nghut é, Akula gà é Yudaq byù rayuq lé hui luí, yhangnhik chyáng è ri. ³ Yhangmoq gi, jonghpang saí zo bang chyat nghut kô é yanmai, muzó púng kôluí, Poluq gi, yhangnhik eq rahá nyi nyi mù, muzó chôm saí akô. ⁴ Bánno buinyi hkangmó, Poluq gi, tarajong má Yudaq byù eq, Grik pé lé, taí sân kyo luí, lhoq pun lhoq kyng yu ri.

⁵ Ahkuí, Sila eq Timohti nhik Makedoni mau mai châng jé jáng, Poluq gi, mungdang hkô hkyô má za wum kat luí, haú Yesuq gi, Hkrisduq yhang nghut lhê ga, Yudaq byu pé lé saksé hkâm kyô ri. ⁶ Nghut kôlhng, Yudaq byu pé gi, lhom he-ngik pyám kômù, yhang lé rhoi dang taí pyám akô; haú mù, Poluq gi, yhâng mebu ko shit é đông yhangmoq lé a nau é hkyô tûn shit uchyang, "Nungmoq é sui mara gi, nungmoq é ulhum má jé sháng gaq, ngò eq haí a séng lo; ahkuí mai, ngò gi, tûngbau pé chyáng e ló berâ nghut lhê." ga luí, yhangmoq lé taí ri.

⁷ Hau htâng, yhang gi, tarajong mai htoq luí, jong haú eq yhep nghut é, Garai Gasang lé noqkuq é Titu Yustu ga su é yhùm má wang ló ri. ⁸ Krispu gà é tarajong má up sù gi, yhâng yhumbyù lhunglhâng bang eq rahá, Yhumsing lé lumjng akô. Korinhtuq myuq byu pé myo myo le, Poluq é dang lé gyô yù mù, lumjng luí, wui-myhup hkâm yu bum akô nghut ri.

⁹ Ra-myìn lé, shing-rán ralthum má Yhumsing mai Poluq lé taí é gi, "Hkâgyuq, taí aq, zim za hkâ-nyí. ¹⁰ Ngò nàng eq rahá nghut nyi lhê, nàng lé ó yuq èq le haí wó kut râ a nghut, hkâsu mù gà le, myuq shí má, ngá é byù myo myo nyi bum lhê." gà ri. ¹¹ Haú mù luí, Poluq gi, Garai Gasâng é mungdang mhoqshit uchyang, razàn eq lhamó hkyuq hkyap yhang, haú myuq má nyi nyi ri.

¹² Galio ga sù, Ahkaia mau mâ é ginwáng zau kut nyi é u lé, Yudaq byu pé gi, myit rahkat zâ èq Poluq lé chòm chyup yû kôluí, tarâ hpyit wap má she háng kômù, ¹³ "Byù shí yuq gi, jep é tarâ eq shai lhùm é dông, Garai Gasang lé noqkuq râ matú, byu pé lé mhoq hpyoq wún ri." ga mara hùn akô.

¹⁴ Haú hkùn, Poluq tû taí râ dá lò jáng, Galio gi, Yudaq byu pé lé, "Yudaq byu pé ê, muzó shí gi, tarâ lu laí é muzó, haú a nghut jáng, agè ashop é muzó mai, dut lo é nghut le gi, nungmoq lé ngò gyo byi râ hkyô joq lhê. ¹⁵ Nghut kôlháng, muzó shí gi, nungmoq é tarâ eq séng luí, dang eq séng luí, mying eq séng luí, tai lhum kô é hkyô nghut é yanmai, nungmoq yhang ru ló hpyit lhum keq. Haú sù é muzó má, ngò gi, tarâ agyì kut byi râ a nghut." ga taí mù, ¹⁶ tarâ hpyit wap mai yhangmoq lé hkat htoq pyám nhang ri. ¹⁷ Haú hkùn, yhangmoq lhunglhâng bang gi, tarajong má up sù Sositeni lé chyup yû mù, tarâ hpyit wap hí má chòm bat akô. Galio kúm gi, haú hkyô lé hai gùn a kut byi nghut ri.

*Poluq, Antioku Wà Mó Má Dum
Tau Jé É hkyô*

¹⁸ Poluq gi, Korinhtuq myuq má buinyi tsómra myáng shoq lumjínng bang eq nyi nyi ri. Hau htàng, yhang gi, haú bang lé shi-kyâm to luí, Priskila eq Akula nhik lé byinzùm kut mù, lhai ji luí Suriq mau shut e ló akô. Hau hí má, yhang gi, danggidiq tô tô é yanmai, Kenhkrea wà má xâm nyhâm pyâm ri.* ¹⁹ Yhangmoq Ehpesu myuq má jé kô é hkùn, Poluq gi, Priskila eq Akula nhik lé nyhi pyâm to luí, yhang baú tarajong má wàng mù, Yudaq byu pé lé tai sân kyo byi ri. ²⁰ Haú má é bang gi, yhangmoq eq rahá rayoq zo nyi shi râ dông

yhang lé dung kô é nghut kôlháng, yhang gi, a nhô lo nghut ri. ²¹ Haú mù, yhang gi, Ehpesu myuq mai lhai ji mù htoq ló uchyang, "Garai Gasang ô nau é hkyô nghut le gi, ngò nungmoq chyáng dum jé lé râ nghut lhê." ga, yhangmoq lé danggidiq byi tô ri. ²² Ahkuí, Poluq gi, Kesare wà mó má ló jé dap jáng, Yerusalem wà mó shut doq ló mù, noqkuq hpúng lé ló huí tô é htàng, Antioku wà mó má dum gyó ló ri.

²³ Yhang gi, haú wà má rayoq zo nyi é htàng, htoq ló mù, Galatiq mau eq Hprugi mau mai sô lai ló uchyang, rawa htàng rawa mâ é chángzô pé lé wum-o lhoq ging byi ri.

Apolo Zui Saí É Muzó

²⁴ Ahkuí, Alesandru myuq byù nghut é sù, Apolo gâ é Yudaq byù rayuq gi, Ehpesu myuq má jé lé ri. Yhang gi, hpaqchyí bò sù nghut é htoq agó, Chyúmdang le gyai kùng é sù nghut ri. ²⁵ Yhang gi, Yohan é baptisma hkyô lé za sé sù nghut kôlháng, Yhumsing é hkyô lé mhoq yû bê nghut luí, Yesuq é hkyô pé lé mhoq yu to bê eq rajung za wum zuq tung ga luí, hkyak hkyak mhoqshít byi ri. ²⁶ Ahkuí, yhang gi, gyuq kyúm myit a bo é za tarajong má tai hi ló ri. Haú hkùn, Priskila eq Akula nhik gi, haú lé wó gyo kôjáng, yhang lé ji yù mù, Garai Gasâng é mungdang hkyô lé azó tung tai sân kyo byi akô nghut ri.

²⁷ Apolo gi, Ahkaia mau shut dap e ló nau é hkùn, gumang wuè gi, yhang lé wum saí byi mù, yhang lé lhom hkúlum yù râ matú, chángzô pé chyáng laiká ká byi kat akô; yhang gi, jé jáng, Garai Gasâng jeju mai lumjínng bê bang lé, gyai yhang wó garúm sù dut bê nghut ri. ²⁸ Hkâsu mù gâ le, yhang mai, Yesuq gi, Hkrisduq yhang nghut nyi ri ga luí Chyúmdang má tân shit

* **18:18** Xâm nyhâm pyâm é gi, Yudaq htúng dông rajung jung kut râ matú danggidiq to luí, haú lé ban kut jáng, yhumsing xâm lé nyhâm pyâm é nghut lhê.

uchyang, byu pé hí má Yudaq byu pé lé, wum kat wó taí ung pyâm é yanmai nghut ri.

19

Poluq, Ehpesu Myuq Má Nyi U Lhê Hkyô

¹ Ahkuí, Apolo gi, Korinhtuq myuq má nyi tô é hkûn, Poluq gi, mau káng mai sô laí ló mù, Ehpesu myuq má jé ri. Haú má, yhang gi, chángzô pé ra-am eq hui luí, ² yhangmoq lé, "Nungmoq gi, lumjǐng é hkûn, Chyoiyúng Woi-nyí lé, wó yú bekô lúhú?" ga myí ri.

Haú hkûn, yhangmoq gi, "Chyoiyúng Woi-nyí nyi lhê gâ é lháng, ngamoq a wó gyô wú." ga tú taí akô.

³ Haú mù, Poluq gi, "Haú nghut jáng, nungmoq gi, haí jung baptisma hkam yú kô é lúhú?" ga luí, yhangmoq lé myí jáng, yhangmoq gi, "Yohan é baptisma hkam yu é nghut lhê." ga tú taí akô.

⁴ Haú hkûn, Poluq gi, "Yohan é baptisma nghu é gi, myít lhing mù wui-myhup hkâm yu é hkyô lé gâ lhê. Yohan gi, yhang é htâng má jé lé râ sù, haú Yesuq lé sheq lumjǐng râ lhê ga shiwa byu pé lé taí ri." ga taí ri. ⁵ Yhangmoq gi, dang haú lé wó gyo kôjáng, Yesuq é myíng lang luí baptisma byí é lé, hkam yu bum akô. ⁶ Poluq gi, yhangmoq é htoq má loq ke byí jáng, haú Chyoiyúng Woi-nyí gi, yhangmoq htoq má jé lé mù, yhangmoq gi, laklaí dang nyo lo é htoq agó myiqhtoi le htoí lo bum akô. ⁷ Haú bang lhunglháng gi, yuqgè raxe í yuq kó nghut ri.

⁸ Hau htâng, Poluq gi, tarajong má wàng luí, gyuq kyúm myít a bo é za lhamó sum hkyap Garai Gasâng é mingdán hkyô lé taí sân kyo mù, lhoq pun lhoq kyíng yu ri. ⁹ Nghut kôlhang, ra-am gi, myít htan lo bùm kôluí a kâm lumjǐng kô é htoq agó, haú Yhumsing é Hkyô lé byu pé hí má lhoq hpoí pyâm byí kôjáng, Poluq gi, yhangmoq chyáng mai

htoq luí, chángzô pé lé shuí chûng mù, Turanu gá su é hpaqchyí mhoq jong má, nyí wuí taí sân kyô lhúm nyi akô. ¹⁰ Haú su kut í zân yhang mhoqshít nyi é yanmai, Asia mau gón mâ é Yudaq byu pé eq Grik pé lhunglháng bang gi, Yhumsing é mungdang lé wó gyô yu bum akô nghut ri.

Skewa É Yhangzo Nyhit Yuq É Hkyô

¹¹ Garai Gasang gi, Poluq é loq dông laklaí kumlhá kut ri. ¹² Haú mù, Poluq chyáng mâ é hpajet eq hpyihit rajung jung lé, nò bâng chyáng yu ló mù, ló záng byí jáng lháng, yhangmoq é nòhpyo ge ló byuq é eq, agè ashop é nat pé lé yhangmoq chyáng mai htoq ló byuq bum akô.

¹³ Haú u lé, nat hkat htoq wun é Yudaq byu pé ra-am gi, agè ashop é nat pé lé, "Poluq hko taí é Yesuq é myíng mai, ngò, nungmoq lé hkat htoq lhê." ga, agè ashop é nat wang júng to bâng é ahtóq má, Yhumsing Yesuq é myíng lé lang luí, hkat chyam wú akô. ¹⁴ Skewa gâ é, Yudaq hkyangjong agyí rayuq é yuqzo nyhit yuq le haú su kut wun akô. ¹⁵ Ra-nyí lé, agè ashop é nat gi, yhangmoq lé, "Yesuq lé ngò sê lhê; Poluq é hkyô lé le ngò sê lhê; nghut kôlhang, nungmoq gi, ó pé nghut akô?" ga tú taí mù, ¹⁶ agè ashop é nat haú wang júng é byù gi, yhangmoq htoq má byam doq jí to luí, nhuq bat yú mù yhangmoq lé ung pyâm ri. Yhangmoq gi, yhúm haú mai gùngchín sui nê yang yang hpang htoq ló bekô nghut ri.

¹⁷ Haú hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunglháng bang gi, chôm gyô gyuq bum akô. Yhumsing Yesuq é myíng gi, hkyon lhoq toq é hui bê nghut ri. ¹⁸ Lumjǐng bê bang myo gi, lé mù, yhumsing kut shut é agè ashop

hkyô lé, myo myô hí má yín yu akô. ¹⁹ Myoqheq hpaqchyî kut zô é bang le, yhangmoq é laiká lé yu lé kôluí, shiwa byu pé hí má nyhê hkyô pyâm akô. Mausau háu pé é ahpau lé sôn wú le, ngùn chap ngo mun záng ri. ²⁰ Háu dông mai, háu Yhumsing é mungdang gi, ko lam lò mù, wum-o a-tsam je bo lò bê nghut ri.

Ehpesu Myuq Má Gabyông É Hkyô

²¹ Shí pé ban dut lai htâng má, Poluq gi, Makedoni mau eq Ahkaia mau dông sô lai ló mù, Yerusalem wà mó má ló jé râ ga myit hpyit yû luí, "Háu má ló jé tô é htâng má, ngò, Romaq myuq má le, jé wú râ dut ashí." ga taí ri. ²² Háu mù, yhang lé htuqbang garúm é Timohti eq Erastu nhik lé hí Makedoni mau shut nhang kat luí, yhang gi, Asia mau má rayoq rabun zo nyi gyó tô ri.

²³ Háu yoq lé, háu Yhumsing é Hkyô yanmai gyai yhang gabyông lo bum akô. ²⁴ Demetri gâ é ngùn bat zo sũ rayuq gi, Artemi hpara é ngùn yhùm zông zo sai luí, mù sai luzúm wuí lé wó sùt nhang nyi ri. ²⁵ Yhang gi, yhâng é ngùn bat zo luzúm wuí eq háu jung amû kut é góbang lé le jî tsing to mù, taí é gi, "Luzúm wuí ê, muzó shí lhùm é yanmai, nga-nhúng nyi ngón yuqyo nyi é hkyô lé, nungmoq sê lhê. ²⁶ Nghut kôle, ahkuí gi, Ehpesu myuq má za le a nghut lo, Asia mau lhang aluq jam shoq, byu loq eq sai é zè lé, garaí pé a nghut ga, shí Poluq ga sũ mai byù myo myo lé mhoq hpyoq yû mù, hkyô shuí lhoq nghoq nyi é hkyô lé, nungmoq wó myâng, wó gyô nyi akô. ²⁷ Háu mù luí, nga-nhúng é muzó shí gi, hpoí byuq râ lé chiq râ é za a nghut, hpara myhí mó Artemi é noqkuq yhùm gi, hai a dut byuq luí, Asia mau gón eq mingkan gón mai noq é

hpara myhí é shingkang hpoí byuq râ lé le myit chiq râ dut bê." gâ ri.

²⁸ Yhangmoq gi, dang háu lé wó gyô bùm kôjáng, nhik mó gyô yo kôluí, "Ehpesu myuq byu pé é Artemi gi, kô nyi sháng gaq ô!" ga chôm garú bum akô. ²⁹ Hkâ-myhâng a nghut má, rawa bang gabyông lò bekô. Shiwa byu pé gi, Poluq é byinzùm Makedoni byù Ge-u eq Aristakuq nhik lé chyup she yù mù, yhangmoq é poí wàng mó shut radá dâm chyín chyap wang ló bum akô. ³⁰ Poluq gi, moq hpúng hau hí má htoq shit naú kôlhang, chángzô pé gi, yhang lé a wàng nhâng kó nghut ri. ³¹ Poluq é luzúm wuí nghut é, háu mau mâ é suwún wuí ra-am lhang, yhang lé poí wàng hkaú má a ê râ matú, hkùm pyâm nhang akô nghut ri.

³² Zing tô é bang gi, hai hû háng le a sé lo dut byuq kômù luí, ra-am rajung ga garú bum akô. Myo mi-myo gi, hai mù luí yhangmoq háu má nyi tô é lé lhang a sê bùm kó nghut ri. ³³ Yudaq byu pé gi, Alesander lé hí má chôm chyún htoq kat kôluí, shiwa hpong mai ra-am gi, yhang hká dông taí râ hkyô lé mhoq byi kat akô. Alesander le shiwa hpong lé taí san kyo naú luí, zim byuq râ matú loq tu ri. ³⁴ Nghut kôlhang, Alesander, Yudaq byù nghut é lé sé kôjáng, yhang-moq lhunglhang bang gi, rahtê za kut kôluí, "Ehpesu myuq byu pé é Artemi gi, kô nyi sháng gaq ô!" ga hkyíng hkum í hkum kô garú bum akô.

³⁵ Háu, myuq chyare hpó gi, shiwa moq mó lé lhoq zim luí taí é gi, "Ehpesu myuq byu pé é, Ehpesu myuq shí gi, Artemi myhí mó é noqkuq yhùm eq mauhkung mai byit gyó lo é yhâng é alhò lé, wú zung nyi é wà nghut é hkyô lé, mingkan má a sê é ó yuq wa nyi lhê lúh? ³⁶ Háu mù luí, shí hkyô pé gi, wó he pyâm jung a nghut é yanmai,

zim za nyi le ge lhê, hân so hân dùn hkâkut ko. ³⁷ Shí nhik gi, no-
kquq yhùm lé hpyoq zo so nhik le
a nghut, nga-nhúng é hparà myhí
lé lhoq hpoi so nhik le a nghut kô
é le nhing, nungmoq shuí lé bekô
nghut ri. ³⁸ Demetri eq yhâng é
ngùn bat zo luzúm wuí gi, rayuq
yuq é ahtoq má mara hùn râ hkyô
joq kô é nghut jáng, tarâ rùng pé
hpông tô lhê. Tarâ agyi pé nyi lhê.
Háu má yhangmoq é kó sháng gaq.
³⁹ Nungmoq táí nau é gó hkyô ra-
jung jung joq é nghut le kúm gi,
tarâ wang zuphpong mó má chôm
taí pyám râ nghut lhê. ⁴⁰ Hkû-
nyí gabyông é mù shí má, mù htoq
wang a bo é yanmai, nga-nhúng lé
mara hùn râ chiq râ ri. Shí su kut
chôm míng é hkyô lé, hai é yanmai
nghut lhê nghû, nga-nhúng a wó táí
kyo nghut ri." gâ ri. ⁴¹ Shí pé ban
taí é htâng má, yhang gi, shiwa moq
mó lé lhoq pyo kat bê nghut ri.

20

*Makedoni Mau Éq Grik Mau
Dông Lai Lô É U Lhê Hkyô*

¹ Háu gabyông é hkyô zím byuq
é htâng má, Poluq gi, chángzô pé
lé ji yù luí, yhangmoq lé wum byi
dang taí to mù, shi-kyâm to luí,
Makedoni mau shut htoq e ló bê
nghut ri. ² Yhang gi, háu mau mai
sô lai ló uchyang, byu pé lé wum
byí é dang myo myo táí luí, Grik
mau má ló jé bê. ³ Yhang háu má
lhamó sum hkyap nyi yù mù, lhai
ji luí Suriq mau shut ê râ hen nyi
é hkûn, Yudaq byu pé gi, yhang lé
gyám nyí kô é yanmai, yhang gi,
Makedoni mau dông tau lò râ lé
myit hpyit bê nghut ri. ⁴ Yhang
eq rabyin za châng é bang gi, Beria
wà mó má é Purú yhangzo Sopata,
Htesaloni và mó má é Aristakuq
eq Sekundu nhik, Derbe và mó
má é Ge-u, Timohti, Asia mau má

é Tuhkiku eq Trohpimu nhik pé
nghut akô. ⁵ Yhangmoq gi, hí so
láng luí, ngá-nhik lé Troa myuq má
ló láng nyi akô. ⁶ Nghut kôlhang,
ngá-nhik gi, Azuma Poi* lai é htâng
má, Hpilipi và mó mai lhai ji ló le,
ngo nyí nghû jáng, Troa myuq má
yhangmoq lé hui luí, háu má nyhit
nyi chôm nyi é nghut lhê.

*Troa Và Má, Utuhku Ga Sû Lhoq
Tui Toq Hui É Hkyô*

⁷ Rabat é sâng-hi nyi lé, ngamoq
gi, muk hpê gàm râ matú lé chôm
zup zing tô é hkûn, Poluq gi, htang
nyi ló byuq râ ga hen tô é yanmai,
chángzô pé lé gunggàm jé shoq hko
kyô nyi ri. ⁸ Ngamoq zup zing nyi é
háu ahtoq pyâm wap má, myibung
myo myo le duq tô ri. ⁹ Poluq dang
nyo hing nyi é u lé, Utuhku gâ é
zorâm zo rayuq gi, hkohot hkum
yâm má yhup mui zung tô ri. Háu
yuq gi, yhupmó myi byuq luí, yhùm
sum tsáng mai byit gyó mù, yhang
lé bún toq wú le shi byuq bê nghut
ri. ¹⁰ Háu hkûn, Poluq gi, gyó ló mù,
po ngop to luí, "Hkâdân ko, yhang
soq bo ashî." ga taí ri. ¹¹ Háu mù,
yhang gi, dum tau doq ló luí, muk lé
hpé mù, zo luí, maubó shoq yhang-
moq eq dang nyo kún mù htoq ló bê
nghut ri. ¹² Zorâm zo háu lé duí gù
shuí ló kômù, nhik ting é gyai yhang
hui bekô nghut ri.

*Troa Và Eq Melitu Và Gyoro Mã
É Hkyowuì*

¹³ Poluq gi, myi hkyô ló râ matú
hen tô é yanmai, yhang lajang byí
é eq rajung za, yhang lé Asu và má
lhai lhom shuí ji râ matú, ngamoq
gi, lhai ji mù hí ló láng bê nghut lhê.
¹⁴ Háu mù, yhang gi, Asu và má ng-
amoq eq hui luí, ngamoq gi, yhang
lé lhai má shuí jí chùng mù, Mitu-
lene myuq shut e ló bê. ¹⁵ Htang
nyi, ngamoq gi, háu mai lhai ji mù,
Kiu zinlóng yâm mai lai ló luí, hau

* 20:6 Múnchi a bo é Muk zo Poi lé, Azuma Poi le gâ lhê.

htang nyí gi, Samu zínlóng má lái dap ló luí, htang nyí gi, Melitu wà mó má jé ló bê nghut lhê. ¹⁶ Poluq gi, wó dut é nghut jáng, Penteko-ti buinyi lé Yerusalem wà mó má wó jé shoq gâ é yanmai, Asia mau má buinyi a kâm lhoq htum naù mù luí, Ehpesu myuq lé lhai pyâm to rá matú, myit hpyit to bê nghut ri.

Ehpesu Hpúng Suwún Wuí Lé, Poluq Shi-kyâm Tô É Dang

¹⁷ Poluq gi, Melitu wà mó mai Ehpesu shut byù nhang kat luí, hpúng suwún wuí lé é jì nhang ri. ¹⁸ Haú bang jé lé kôjáng, yhang yhangmoq lé tái é gi, "Ngò, Asia mau má sâng-hi jé é buinyi mai, nungmoq eq hkâsu kut nyi nyi é ahkying banshoq lé le; ¹⁹ Yudaq byu pé jeq hô luí, ngò wuîhke jamjau hui zo kôlhang, haú Yhumsing é muzó lé, ngò myit gyai lhoq nyhúm é eq ngaubyi ngau nhap é eq wùn waq é hkyô lé le; ²⁰ nungmoq é matú akyú bo é hkyô banshoq lé, a myhit to loshoq tái é hkyô lé le; shiwa byu pé hí eq rayhúm htâng rayhúm má ngò nungmoq lé mhoqshit é hkyô lé le; ²¹ ngò gi, Yudaq byu pé eq Grik pé lé, myit lhing mù Garai Gasâng chyáng lhing lò ra eq, nga-nhúng é Yhumsing Yesuq lé lumjíng ra hkyô lé, saksé hkâm kyo lugù nghut bê lé le, nungmoq sê nyi akô.

²² Ahkuí, ngò gi, Woi-nyí má tui tô é hui bê yanmai, Yerusalem wà mó má e ló lhê; haú má, ngò hai ló dut râ lé kúm gi, a sé nghut ri. ²³ Ngò gi, htóng eq wuîhke jamjau hkyô ngo lé lánng tô ri ga, wà hkangmó má Chyoiyúng Woi-nyí eq lhoq pún é hkyô lé za sê nyi lhê. ²⁴ Nghut kôlhang, ngò gi, òn râ hkyô ban òn râ eq, Garai Gasâng jeju eq sêng é gabú danglù lé saksé hkâm râ matú, Yhumsing Yesuq ngo lé byi tô é muzó lé ban wùn waq râ za

nghut jáng, ngá asak lé ratsuí le a myit ha lô é nghut lhê.

²⁵ Garai Gasâng é mingdán hkyô lé hko kyô wún é hkùn, ngò eq hui é nungmoq lhunglhang bang gi, htâng nùng má ngo lé a myàng lo kó râ nghut é lé, ahkuí ngò sê to bê. ²⁶ Haú mù luí, ó yuq nghut kôlhang, yubak mara má shi byuq ló é nghut le, haú yuq é sui chyín gi, ngò má a dap lô é hkyô lé, hkù-nyí, ngò saksé hkâm tô lhê. ²⁷ Hkâsu mù gâ le, Garai Gasang ô nau é hkyô banshoq nungmoq lé hko kyo râ matú, ngò zaú tô é hkyô a joq wú é yanmai nghut lhê. ²⁸ Nungmoq gi, yhumsing gùng lé le, nungmoq lé Chyoiyúng Woi-nyí eq up zúng nhang é sau hpúng† lhunglhang lé le, zúng nyí keq. Garai Gasang Yhâng suí eq wui tô é noqkuq hpúng lé le, rém zúng nyí keq. ²⁹ Ngò ló byuq é htâng má, sau hpúng lé a shogyô é, ashop é wamhkui gi, nungmoq chyáng jé râ nghut é hkyô lé, ngò sê lhê. ³⁰ Hau htoq agó, chángzô pé lé wó mhoq hpyoq yú shoq ga, shut é òng tái é byu pé lhang nungmoq chyáng mai htoq lô râ nghut lhê. ³¹ Haú mù luí, nungmoq yuq hkangmó lé, ngò sum zân tup ngaubyi ngau-nhap eq nyí myín a hkying loshoq, lhoq pun lhoq kyíng tô é dang pé lé, nungmoq gi, myit bun mù machya nyí keq.

³² Ahkuí, ngò gi, nungmoq lé, Garai Gasâng chyáng le, nungmoq lé wó lhoq gíng lhoq títng mù, lhoq chyoiyúng é hui bê bang eq nungmoq lé silí wunlí wó byí é, Yhâng é jeju mungdang má le, ap tô lhê. ³³ Ngò gi, ó yuq é híng, ngùn, mebu pé lé le a myoqnoq wú. ³⁴ Ngá é loq shí í loq gi, ngò eq ngá htâng châng é bang ra chà é lé kut byi bê hkyô lé, nungmoq yhang sé gù nghut lhê. ³⁵ Ngò kut é muzó banshoq

† 20:28 Sau hpúng gâ é gi, lumjíng é bang lé gâ lhê.

gi, nungmoq é alik dut bê nghut luí, shí su kut shikut é đông mai, nga-nhúng gi, wum-o nyhóm bang lé htuq bang luí, 'Lhom yu é htoq má byí é gi, je riyhang hkungsô wó nyi ri.' ga luí, Yhumsing Yesuq taí é dang lé bûn nyi sháng." gâ ri.

³⁶ Poluq gi, haú su ga ban taí jáng, hkyihput htuq mù, yhangmoq lhunglhâng bang eq rahá za kyúdûng ri. ³⁷ Yhangmoq lhunglhâng bang gi, yhang lé po to luí, bopuq puq mù, chôm ngaú akô. ³⁸ Htâng nùng má, yhang lé dum myàng rá a nghut lo gâ é dang yanmai, yhangmoq gi, je riyhang yónkuq bum akô. Yhang lé, lhai má jé shoq lé châng dé kat akô nghut ri.

21

Yerusalem Wà Mó Shut Doq Ló Nyi É U Lhé Hkyô

¹ Ngamoq gi, yhangmoq lé kang pyâm to luí, lhai jí chùng mù, nyâng za Kusa zinlóng má jé é nghut lhê. Hau htang nyí gi, Rode zinlóng má jé mù, haú mai Patara wà má dum jé bê. ² Haú wâ má Hpinisi mau shut dap ló é lhai lé, ngamoq myàng luí, haú mai chôm jí chùng bê. ³ Haú hkûn, ngamoq gi, Kupru zinlóng lé myàng jáng, hau é loqyo hkyam đông lai ló luí, Suriq mau shut e ló le, hpugá zê lé hkyó rá matú, Turuq myuq má nô é nghut lhê. ⁴ Haú wâ má, chángzô pé lé myang hô luí, yhangmoq chyáng nyhit nyí bíng yu é. Chángzo hau bang gi, Choyiýung Woi-nyí eq lhoq pûn é đông Poluq lé Yerusalem wà mó shut a ló rá matú, chôm hkûm akô. ⁵ Nghut kôlhâng, nyhit nyí haú lai jáng, ngamoq gi, ngamoq é hkyowuì shut dum xoq sô htoq ló bê. Chángzô pé lhunglhâng bang gi, yhangmoq é myi zo wuì eq rahá, ngamoq lé wà shinggan jé shoq châng dé kôluí, ngamoq gi, yhangmoq eq rahá wuiyàm má hkyihput

htuq mù, kyû chôm dung bê nghut lhê. ⁶ Hau htâng, rayuq eq rayuq ban shi-kyâm lhum jáng, ngamoq gi, lhai má wàng bê; yhangmoq gi, yhûm shut dum tau ló byuq bekô nghut ri.

⁷ Ngamoq gi, Turuq myuq mai lhai jí chùng mù, Toleme wà má jé ló bê. Ngamoq gi, haú wâ má é gumang wuì lé shichyên yù mù, yhangmoq eq rahá ra-nyí chôm nyi kûn é nghut lhê. ⁸ Htang nyí gi, ngamoq haú wâ mai htoq ló mù, Kesare wà mó má dum jé bê. Haú wâ má, haú htuqluq htuqbang nyhit yuq* má bò sù, gabú danglù hko taí é Hpilip gá su é yhûm má, ngamoq wang bíng bê nghut lhê. ⁹ Yhang gi, yhang hku tô é byizo zomyi myiqhtoi myi yuq wó ri.

¹⁰ Ngamoq gi, haú yhûm má rayoq zo nyi é htâng má, Agabu gâ é myiqhtoi rayuq, Yuda mau mai jé lé ri. ¹¹ Yhang gi, ngamoq chyáng jé lé luí, Poluq é hpyihit lé yù mù, yhânggùng yhang loq eq hkyí pé má tui mù luí, taí é gi, "'Shí hpyihit yhumsing lé, Yerusalem wà mó má é Yudaq byu pé mai shí su kut lhom tui luí, tûngbau pé é loq má ap pyâm kó rá nghut lhê;' ga luí, Choyiýung Woi-nyí taí ri." gâ ri.

¹² Dang haú lé wó gyo jáng, haú má é bang eq ngamoq gi, Poluq lé Yerusalem wà mó má a doq ló rá matú, gyai yhang chôm hkûm bê nghut lhê. ¹³ Nghut kôlhâng, Poluq gi, "Nungmoq gi, haí mù luí ngaubyi ngau-nhap kut é eq, ngo lé myit wum gyui rá đông kut nyi akô lúhú? Ngò gi, Yhumsing Yesuq é yanmai, Yerusalem wà mó má, tuí é huì rá za a nghut, shí hkâm rá matú le rì rì nghut lhê." ga tú taí pyâm ri. ¹⁴ Yhang lé wó taí hkûm rá su a dut lo jáng, ngamoq gi, "Garai Gasang ô nau é đông nghut sháng gaq." nghu luí, zim za chôm nyi bùm bê.

* 21:8 Lagyo 6:1-6

¹⁵ Hau htâng má, ngamoq gi, zè món chùng mù Yerusalem và mó shut doq ló bê nghut lhê. ¹⁶ Kesare và mó má é chángzô pé ra-am le, ngamoq eq rabyìn za nghut kôluí, yhangmoq gi, ngamoq lé Kupru byù Manason ga sù, hí hí lhê é chángzo rayuq é yhùm má shuí ló mù, yhâng chyáng bíng nhang akô.

Yerusalem Và Mó Má, Yakuq Lé Ê Huí Ê Hkyô

¹⁷ Yerusalem và mó má ngamoq jé é hkùn, gumang wuì gi, ngamoq lé gabú tung lhom hkùlum yu akô. ¹⁸ Htang nyí, Poluq eq ngamoq gi, Yakuq lé é huí le, hpúng suwún wuì le zing nyi to lánng akô. ¹⁹ Poluq gi, yhangmoq eq ban shichyen jáng, yhang wùn waq lai lo é hpúng mù đông mai, Garai Gasâng eq tưngbaù pé chyáng kut byi bê hkyô pé lé, jihkùm nuqquq shit kyô ri.

²⁰ Yhangmoq gi, haù lé wó gyo kôjáng, Garai Gasang lé hkya-ôn akô. Hau htâng, Poluq lé tái kô é gi, "Ámang ê, Yudaq byu pé má lumjینگ é bang hkâ-myhó hkying mun nghut bê lé, nàng sê lhê. Haù bang lhunglhang gi, jep é tarâ má myit zuq to bê bang chyat nghut bum akô. ²¹ Nghut kôlhang, yhangmoq lhunglhang bang gi, tưngbaù pé chyáng nyó lúng tô é Yudaq byù banshoq bang lé, nàng, yhum-sing yhangzo yhangshù pé é matú ahpyo-kuq hpyit a ra ngu é eq nga-nhùng é htùng tarâ lé châng nyi a ra ngù luí, Mosheq é tarâ lé tô pyám rà đông mhoqshit ri gâ é dang lé, wó gyô yu bùm bekô nghut ri. ²² Nàng jé bê hkyô lé, yhangmoq wó gyo berâ za nghut lhê. Ahkuí, ngamoq hkâsu kut lo rà lúh? ²³ Haù mù, ngamoq tái é đông kut aq, ngamoq chyáng danggidiq mó byi bê byù myi yuq nyi lhê. ²⁴ Nàng gi, haù bang lé ji yù mù, yhangmoq eq rahá lhoq san lhoq yúng yù aq, yhangmoq lé u wó wuq

yù rà matú, ahpau le htoq byi aq. Haù hkùn sheq, byù lhunglhang bang gi, yhangmoq wó gyô tô é hkyô a têng byuq é eq, nàng yhang lhang, jep é tarâ lé, châng kut nyi sù nghut é hkyô lé, sé kó rà nghut lhê. ²⁵ Lumjینگ é tưngbaù pé é matú kùm gi, hparà lhô pé lé tưng byi é zoshuq, sui, lingzing mai myhik sat é dusak sho eq ashop é đông gungsho zùm yap é hkyô pé lé, yhangmoq koi pyám rà matú, ngamoq chôm doq-dan luí, kâ hùn kat bê nghut lhê." ga akô.

²⁶ Haù mù luí, Poluq gi, hau htang nyí haù bang lé ji yù luí, yhangmoq eq rahá, lhoq san lhoq yúng yù mù, noqkuq yhùm má wàng luí, yhangmoq yuq hkanngmó é matú hkungga wó byi shoq ga, yhangmoq é lhoq san lhoq yúng buinyi ngap bê hkyô lé, tái kyô ri.

Poluq Chyup Yù Huí Ê Hkyô

²⁷ Buinyi nyhit nyí haù ngap rà yàm má, Asia mau má é Yudaq byu pé ra-am gi, noqkuq yhùm má Poluq lé myàng kômù, shiwa byu pé lé shuí gabyong luí, yhang lé chyup yù mù, garù tái kô é dang gi, ²⁸ "Israellaq byu pé ê, garúm yù keq, shí yuq gi, nga-nhùng byuhú lé le, jep é tarâ lé le, jowò shí lé le, shut shai é đông jowò hkanngmó má é byù banshoq lé mhoqshit sù nghut ri. Hau htoq agó, noqkuq yhùm má Grik pé lé shuí háng é eq, chyoyúng jowò shí lé achay achyut kut é sù nghut ri." gâ akô. ²⁹ (Hkâsu mù gâ le, yhangmoq gi, Ehpesu myuq byù Trohpimu ga sù eq Poluq và hkaù má rahá nghut kô é lé, myàng kômù, haù yuq lé noqkuq yhùm shut shuí háng nhô ngam pyám kô é yanmai nghut ri.)

³⁰ Rawà gón gabyông lo mù, shiwa byu pé lìnhhkyuq mai ãn lé lô kôluí, Poluq lé chyup zing to uchyang, noqkuq yhùm shinggan shut she hkyut htoq ló akô. Haù hkùn jáng, hkum pé lé myhí pyám

akô nghut ri. ³¹ Poluq lé yhangmoq sat râ dô nyi kô é hkûn, Yerusalem và gôn gabyông nyi akô gâ é hkyô lé, Romaq dap up zaù é no má, lò jé ri. ³² Haù mù, yhang gi, radá dâm shô up gyezau ra-am eq gyezô pé lé shuí chùng mù, byù hpúng shut, din yán gyó lô akô. Yhangmoq gi, gyezau eq gyezô pé lé lhom myàng kôjáng, Poluq lé nhuq nyi é mai hkyíng byuq akô nghut ri.

³³ Haù hkûn, dap up zau hpó gi, Poluq chyáng ê jé mù, yhang lé chyup yû luí, toqjâng tui í hkat eq tuí to nhang ri; hau htâng, yhang ó yuq nghut é hkyô lé le, haí kut shut é hkyô lé le myí wú ri. ³⁴ Shiwa byu pé kúm gi, rayuq rajung ga garú bum akô. Haù mù, gyezau hpó gi, lûm garu kô é yanmai, têng é hkyô lé rago a wó sê yù jáng, Poluq lé gye-wap má shuí lô nhang ri. ³⁵ Poluq gi, zumhtâng wang má jé lo é hkûn, byù moq mó lûm htim chyín chyap lô kô é yanmai, gyezô pé gi, yhang lé waq doq lô akô. ³⁶ Shiwa byu pé gi, "Yhang lé sat pyám keq." ga châng garú nyi akô nghut ri.

Poluq, Yhumsing Gùng Mara A Bo É Lé Tai Sân Kyô É Hkyô

³⁷ Gyezô pé gi, Poluq lé gyewap má shuí wàng râ za nghut é hkûn, Poluq gi, dap up zau hpó lé, "Ngò nàng lé dang wó nyô râ lú?" ga myi jáng, dap up zau hpó gi, "Nàng, Grik myíng dat mu lú?" ³⁸ Nàng gi, hí hkûn gumlau kut mù, byù sat wún bang myi hkyíng lé, yoso shut shuí htoq lô é sù, Egotuq byù a nghut lú?" ga tau myi ri.

³⁹ Haù hkûn, Poluq gi, "Ngò gi, Kiliki mau Tarshu myuq mâ é Yudaq byù nghut lú; ngò nyi é và gi, và chyap và zo za a nghut, jeju mai, byù shí bang lé ngò dang tái râ ahkáng byi laq." ga dúng ri.

⁴⁰ Gyedap up zau hpó ahkáng byi jáng, Poluq gi, zumhtâng má yap to mù, shiwa byu pé shut

loq he ri. Haù hkûn, yhangmoq lunglhang bang zim byuq kômù, Poluq, yhangmoq lé Hebre myíng dông tái é gi,

22

¹ "Gumang wui eq íwa pé ê, ahkuí, ngò mara a bò nghu tái é dang lé gyô wú shi keq." gâ ri.

² Yhangmoq gi, yhang Hebre myíng dông tái é dang lé wó gyô bùm kôjáng, gyai yhang zím byuq bekô. Haù mù, Poluq xoq tái é gi, ³ "Ngò gi, Yudaq byù rayuq nghut lú. Kiliki mau Tarshu myuq má choq hpyit kôlhang, và mó shí má nyi kô lò sù nghut lú. Ngò gi, nga-nhùng íchyí íwa pé é jep é tarâ lé, Gamalelaq é loq má jihkúm nuqguq mhoq yû luí, hkû-nyí lú é nungmoq lunglhang bang su, Garai Gasang lé gyai myit zìng zuq é sù nghut lú. ⁴ Ngò gi, shí Hkyô cháng bang lé shi é jé shoq, zing-rí wú é sù eq, myiwe yuqgè ó yuq lé nghut kôlhang, chyup yû mù htóng má lhung pyám wú bê sù nghut lú. ⁵ Hkyangjong mó eq byìn tú wap suwún wui lunglhang bang gi, ngá é saksê pé nghut akô. Ngò gi, Damaskuq myuq má nyi é yhangmoq é Yudaq gumang wui lé byi râ laiká yhangmoq chyáng mai wó yu chùng luí, haù mã é bang lé le Yerusalem và mó má dam byi râ matú, chyup tuí lô râ nghú, Damaskuq myuq shut e é nghut lú.

⁶ Nyigùng tú zó lé, ngò Damaskuq myuq shut sô chyáng lô nyi é hkûn, maubó gi, ngá é lnhngkyuq má mauhkúng mai byodàn tung duqbó to bê nghut ri. ⁷ Haù mù, ngò myigùng má lêng gop tô le, wó gyô kat é dangtê gi, 'Sholuq, Sholuq, nàng ngo lé haí mù zing-rí nyi lú?' gâ ri.

⁸ Ngò le, 'Yhumsing ê, nàng ó nghut lú lú?' nghu myí kat jáng, 'Ngò gi, nàng zing-rí wún é sù, Nazaret và byù Yesuq nghut lú.'

ga luí, Yhang tú taí kat ri. ⁹ Ngò eq rahá e ló é bang kúm gi, maubó lé myàng kôlhang, ngo lé taí é danghté lé a sê gyo kó nghut ri.

¹⁰ Dum, ngò gi, 'Yhumsing ê, ngò haí kut ra rã lúhú?' nghu myi jáng, haú Yhumsing gi, 'Toq mù, Damaskuq myuq má wang ló aq, nàng kut rã matú wò byí tó é hkyô pé lhunglhang, nang lé haú má lhom taí kyo berã nghut lhê.' ga ngo lé dum taí ri. ¹¹ Haú maubó é shingkàng é yanmai, ngò myoqjit byuq mù, ngá é byinzùm wui gi, Damaskuq myuq shut ngo lé loq mai she wang ló akô.

¹² Haú hkùn, Anani gã é yuqgè rayuq ngá chyáng lé huí ri. Yhang gi, jep é tarã lé gyuq hkunggã é eq, haú má nyi é Yudaq byú lhunglhang bãng é hí má myoqdong gyai wó é sù nghut ri. ¹³ Yhang gi, ngá nãm má yap to luí, 'Gumang Sholuq ê, nãng myoq myàng aq hkoi!' ga taí ri. Haú hkùn jáng yhang, yhang lé ngò wó myang kat bê nghut lhê.

¹⁴ Yhang dum xoq taí é gi, 'Nga-nhùng íchýi íwa pé é Garai Gasang gi, nang lé, Yhang ô nau é hkyô sé sháng gaq ga luí le; Dingmán Sù lé wó myàng luí, Yhâng é nhut mã é mungdang lé wó gyo sháng gaq ga luí le, hkyin to bê nghut ri. ¹⁵ Haú mù, nàng gi, nàng myang é eq wó gyô yu é hkyô pé lé, byù lhunglhang bãng é hí má, Yhâng é matú saksé hkám byi rã su dut rã nghut lhê. ¹⁶ Ahkuí, nàng haí lé lánng nyi ashí lúhú? Toq aq, Yhâng é myiing lé lang luí wui-myhup hkám yu é eq, nàng é yubak mara pé lé chí sãn pyám aq.' gã ri.

¹⁷ Hau htàng, ngò gi, Yerusalem và mó má dum taú jé ló mù, no-qkuq yhùm má kyû é dũng nyi le, moq byuq ló mù, ¹⁸ 'Nàng, ngá é hkyô lé saksé hkám rã dang lé, yhangmoq a lhom hap yù kó rã nghut é yanmai, Yerusalem và mó

mai hãn htoq ló aq.' ga Yhumsing ngo lé taí nyi é lé, myoqwup shing-rán dõng myang ri.

¹⁹ Haú mù, ngò gi, 'Yhumsing ê, tarajong ralhùm htàng ralhum má nang lé lumjìng bang lé, htóng má chyup lhung pyám é eq, hkát bat lhung wún é hkyô lé, yhangmoq sê bum akô. ²⁰ Náng é saksé Stehpan sat hui luí suí shun u lé, ngò nãm má yhang yap to mù, haú hkyô lé myit bo hui luí, yhang lé sat pyám bãng é mebu lé zúng byí é nghut lhê.' nghũ tú taí bê.

²¹ Haú hkùn, Yhumsing gi, 'Ê aq, ngò, nang lé, wê gâng é tũngbaù pé chyáng nhang kat rã.' ga, ngo lé taí ri." gã ri.

Poluq, Romaq Mingdán Byú Nghut É Hkyô

²² Shiwa byu pé gi, dang haú hkun jé za gyô yù kômù, "Shí sù é byù gi, myigùng htoq má nyi a gíng, sat pyám keq." ga, htê mó eq garũ bum akô.

²³ Yhangmoq gi, haú su garu uchyang, yhumsing buhìng lé hkyut dú pyám lhê, hpuilhup lé mauhkùng shut kyaq tâng lhê, kut nyí kôjáng, ²⁴ dap up zau hpó gi, Poluq lé gyewap má shuí hâng yù nhâng mù, yhang lé shiwa byu pé haí mù shí su ga garũ bùm kô é hkyô lé wó sé shoq ga, nhuq bat nhâng luí, myí choq nhang ri. ²⁵ Nhuq bat rã matú shokuq tuí eq tui kôjáng, Poluq gi, nãm má yap tó é shò up gyezau lé, "Romaq mingdán byú ru nghut sù lé nhìng, lhang a jéyáng shimá, nungmoq nhuq bat le gi, tarã wang akô lúhú?" ga taí ri.

²⁶ Rashô up gyezau gi, dang haú lé wó gyo jáng, dap up zaù chyáng ló mù, "Nàng haí kut rã dã nyi lhê lúhú? Shí yuq gi, Romaq mingdán byú sheq ru nghut ri." ga luí, yhang lé ló taí kyô ri.

27 Haú mù, dap up zau gi, Poluq chyáng ê mù, "Nàng gi, Romaq mingdán byû nghut lê lú? Taí kyô wú laq." ga myí ri.

Poluq gi, "Ngò, Romaq mingdán byû nghut lê." ga tú taí ri.

28 Haú hkûn, dap up zau hpó gi, "Ngò lhang ahpau myo myo byí pyám luí sheq, Romaq mingdán byû ru wó dut é nghut lê." ga tú taí jáng, Poluq gi, "Ngò kúm gi, Romaq mingdán byû dut gú hku lé lo é sú nghut lê." ga taí ri.

29 Yhang lé myí choq wú râ gâ é bang gi, haú hkûn jáng, yhang chyáng mai huí zut ló bum bekô. Gyedap up zau hpó le, Poluq gi, Romaq mingdán byû nghut é lé sé jáng, yhang lé tuí pyám bê nghut é yanmai, gyuq byuq bê nghut ri.

Yudaq Byin Tú Wapdoq Suwún Wuí Gam Hkoq Byuq É Hkyô

30 Htang nyí, dap up zau hpó gi, Yudaq byu pé mai Poluq lé hun é mara haí nghut é hkyô lé hkyak wó sé shoq ga, Poluq lé tuí hpyi pyám byi mù, hkyangjong agyi pé eq Yudaq byin tú wapdoq suwún wuí lhunglhang lé ji tsing to luí, yhangmoq é gung gung má Poluq lé shuí wàng mù, shap to bê nghut ri.

23

1 Haú hkûn, Poluq gi, Yudaq byin tú wapdoq suwún wuí lé wú tsuq to mù, "Ngá gumang wuí ê, ngò gi, hkû-nyí jé shoq Garai Gasâng é hí má sansêng é i-myt eq asak dui nyi bê nghut lê." ga taí ri. 2 Haú mù luí, hkyangjong mó Anani gi, Poluq nâm má yap to bang lé, yhang nhut má bat byí keq gâ ri. 3 Haú hkûn, Poluq gi, yhang lé, "But hpyu tô é xewâm* nàng ê, nàng lé sheq Garai Gasâng eq bat râ nghut lê. Nàng gi, tarâ eq rajung za ngo lé jéyáng rà matú shí má zung to luí nhing, haí

mù tarâ eq shut shai é dông ngo lé bat nhang lê lú?" ga taí ri.

4 Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lê lú?" ga luí, chòm taí akô.

5 Poluq gi, "Gumang wuí ê, yhang gi, hkyangjong mó nghut é lé ngò a sé pyám mù nghut bê. Chyúmdang má le, 'Nàng amyú lé up é sú lé wó rhoi râ a nghut.'* ga le kê tô é nghut lê." ga tú taí ri.

6 Hau htang, haú zing tô é bang mâ é ra-am gi, Saduke pé, góbang gi, Hparishe pé nghut é lé, Poluq gi, sé jáng, Yudaq byin tú wapdoq suwún wuí lé, "Gumang wuí ê, ngò gi, Hparishe awut ashin mâ é, Hparishe rayuq nghut lê. Shí bê bang dum dui toq lô râ hkyô lé myit myoqbyù é yanmai, ngò jéyáng é huí nyi ri." ga luí, garú taí kat ri. 7 Yhang haú su ga taí kat jáng, Hparishe pé eq Saduke pé gi, dang jet jet lhùm lò kômù, Yudaq byin tú wapdoq hpong gi, gam hkoq ló byuq bekô nghut ri. 8 (Hkâsu mù gâ le, Saduke pé gi, dum dui toq hkyô a joq; maumang lagyo pé le, sobyo pé le, a nyi ga taí bum akô. Hparishe pé kúm gi, haú pé joq lê ga, lumjing bang nghut akô.)

9 Haú mù luí, gyai yhang taí garú bum akô. Haú hkûn, Hparishe hpúng mâ é tarâ sará pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang taí bê nghut jáng gi, hkâsu nghú kó râ lú?" ga luí, zuq zuq taí htíng lhùm akô nghut ri. 10 Haú su kut gyai yhang taí htíng lhùm lò kôjáng, dap up zau hpó gi, Poluq lé láng myha pyám kó râ lé chiq é yanmai, yhangmoq chyáng gyó é mù, Poluq lé haú bâng é gung gung mai ê lú

* 23:3 But hpyu tô é xewâm gâ é gi, gegùn labyoq kut bang lé gâ lê. ✧ 23:5 Htoq Ló 22:28

shuî lò luî, gyewap má shuî wang ló rá matú, gyezô pé lé nhang kat ri.

¹¹ Háu myîn, Yhumsîng gi, Poluq é nàm má yap to luî, "Hkâgyuq, Yerusalem wà mó má nàng ngá é hkyô lé saksé hkám bê eq rajung za, Romaq myuq má le saksé hkám ra shirâ nghut lhê." ga, yhang lé tai ri.

Poluq Lé Sat Râ Haq Dâ É Hkyô

¹² Htâng napkyó, Yudaq byu pé gi, Poluq lé sat rá hpaqchyî chôm da kômù, yhang lé a wó sat sat gi, a zo a shuq rá nghut lhê ga, ó le ó dakam yu akô nghut ri. ¹³ Hpaqchyî shî lé chôm dâ é bang gi, myî xê yuq chyân nghut bum akô. ¹⁴ Yhangmoq gi, hkyangjong agyi pé eq suwún wui chyáng é kômù, "Poluq lé a wó sat sat gi, ngamoq haî le a zo nghû, chôm dakam yu to bê nghut lhê. ¹⁵ Hau é yanmai, ahkuî nungmoq gi, Yudaq byîn tú wapdoq suwún wui eq rahá kut luî, Poluq é hkyô lé rago za myî gon wú rá nghu mhaû é đông, yhang lé nungmoq chyáng wut yû rá matú, dap up zaû chyáng dúng kat keq. Háu hkûn, ngamoq gi, hkyolat má yhang lé lhom sat pyám rá ri ri kut to rá nghut lhê." ga tai akô.

¹⁶ Nghut kôlhang, haû lhom haq sat kó rá gâ é hkyô lé, Poluq é yhang nhammó é yhangzo yuqgè zo wó gyô yû luî, yhang gi, gyewap má wang ê mù, Poluq lé é tai kyô ri.

¹⁷ Háu hkûn, Poluq gi, shô up gyezau rayuq lé ji yû mù, "Zorâm shî lé dap up zaû chyáng shuî é aq, yhang, yhang lé shit kyo rá hkyô rajung joq lhê ga." ga tai ri. ¹⁸ Háu mù luî, shô up gyezau hpó gi, zorâm haû lé dap up zaû chyáng shuî é mù, "Zorâm shî nang lé shit kyo rá hkyô rajung joq lhê gâ ri ga, yhang lé náng chyáng shuî lé rá matú, htóng byû Poluq gi, ngo lé ji yû mù tai ri." ga, yhang lé tai ri.

¹⁹ Háu jáng, dap up zau hpó gi, jauwò má zorâm haû lé yhang loq mai she ê mù, "Nàng ngo lé hai jung shit kyo nau ri lhu?" ga, yhang lé baú tsik za myî ri.

²⁰ Háu hkûn, zorâm haû gi, "Yudaq byu pé gi, Poluq lé rago za saî myî wú rá su kut mhaû mù, napmá, Yudaq byîn tú wapdoq má shuî yû rá matú, náng chyáng dung kó rá ga, myit chôm huî to bekô nghut ri.

²¹ Háu mù luî, yhangmoq ô nau é đông hkâgyo byi, hkâsu mù gâ le, Poluq lé a wó sat sat gi, haî le a zo a shuq rá nghut lhê ga, byû myi xê yuq chyân yhang, ó le ó dakam yû bekô nghut ri. Háu bang gi, yhang lé lhom chyup yû rá matú haq lhom to lánng kó rá nghut lhê. Ahkuî lánng, yhangmoq gi, mù haû kut rá matú ri ri nghut bùm bekô; náng é ahkáng lé za lánng nyi bum akô nghut ri." ga shit kyô ri.

²² Háu hkûn, dap up zau hpó gi, zorâm haû lé, "Nàng, ngo lé shí hkyô shit kyo bê hkyô lé, ó yuq lé le hkâtaî kyo." ga, sidiq byi mù, taû nhang kat bê nghut ri.

Mingzau Hpilik Chyáng Poluq Lé Dé Kat É Hkyô

²³ Hau htâng, yhang gi, shô up gyezau í yuq lé ji yû mù, "Hkû-myîn sum hkyíng[†] má Kesare wà mó shut é rá matú, gyezô pé í shô, myang ji bang nyhit xê, lhâm chùng bang í shô kut mù, ri ri hen to keq.

²⁴ Hau htoq agó, Poluq lé mingzau Hpilik chyáng ngón za wó dé kat rá matú, yhang ji rá myang pé le lajang byi keq." ga, yhangnhik lé pying kat ri.

²⁵ Laiká hun kat é le:

²⁶ "Aróng wó dik é mauzau Hpilik ê, ngò Klodi Lusi gi, nguínngón danglù shit kyô kat lhê.

²⁷ Shí yuq lé gi, Yudaq byu pé eq chyup yû mù sat pyám rá dá nyi bekô za nghut lhê. Nghut

[†] 23:23 Myîn sum hkyíng gi, nga-nhùng é myîn gau hkyíng nghut lhê.

kôlhang, ngò gi, gyezô pé eq rahá é wú le, yhang Romaq mingdán byû nghut é lé wó sê yu é yanmai, yhangmoq chyáng mai yhang lé hkyi lo é nghut lhê. ²⁸ Haú su mù, haí mù yhang lé mara hûn kô é hkyô lé sé nau é yanmai, yhangmoq é Yudaq byîn tú wapdoq má yhang lé shuí jé byi wú bê nghut lhê. ²⁹ Haú hkûn, yhangmoq é tarâ hkyô eq séng luí za mara hun bùm kô é lé ngò myang ri. Nghut kôlhang, shí gíng é eq htóng lhung gíng é mara haí le a bò nghut ri. ³⁰ Shí yuq lé sat pyám râ hpaqchyí da kô é hkyô, ngo lé shít kyo kô é hkûn, radá dâm, yhang lé ngò náng chyáng dé nhang kat bê. Yhang lé mara hûn nau é bang lé gi, nang hí má yhang hun lhum keq nghú pying kat bê nghut lhê." gâ ri.

³¹ Haú mù luí, gyezô pé gi, haú pying kat é dang eq rajung za, myín lé yhang, Antipatri wà mó jé shoq Poluq lé dé kat bekô nghut ri. ³² Htang nyí, myang ji bang lé é châng dé nhâng kômù, yhangmoq gi, gyewap shut dum taú lò bekô nghut ri. ³³ Myang jî é gyezô pé gi, Kesare wà mó má jé kô é hkûn, mauzau hpó lé laiká byi mù, Poluq lé le jâng ap byi akô nghut ri. ³⁴ Haú hkûn, mauzau hpó gi, laiká haú lé ban nghap jáng, Poluq hká mau má é byû nghut é hkyô lé myí wú luí, Kiliki mau má é byû nghut é lé sé jáng, ³⁵ "Nang lé mara hûn bang jé jáng sheq, náng mù lé ngò gôn wú rà." ga taí ri. Hau htâng, yhang gi, Poluq lé Herut é hkohkâm-wâng má byam zúng byi keq ga hkunmó hkyô tô ri.

24

Poluq, Mara Hûn Huí É Hkyô

¹ Hau htâng, ngo nyí lai jáng, hkyangjong mó Anani gi, suwún wuí ra-am eq tarâ sé sù Tertulu lé shuí gyó ló mù, mauzau hpô hí má

Poluq lé mara lé taí hun bum akô. ² Haú hkûn, Poluq lé hí má ji hâng tô é nghut mù, Tertulu, yhang lé mara hûn dang taí hi é gi, "Aróng wó dik é Hpilik ê, ngamoq gi, nyi-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Nang sê up sé hkanq é jeju lé, byû myû shí wó hkâm zô nyi é yanmai, ³ ngamoq gi, haú lé hkyô hkat hkanqmó eq jowò hkanqmó má jeju bûn é myit eq hkam yu nyi bê nghut lhê. ⁴ Nghut kôlhang, ngò nang lé lhoq hkyik é dông a dut sháng gaq, taí râ dang ratot zo lé, myit hîng hîng to mù gyo byi laq nghû dúng tôngbán lhê ô!

⁵ Shí yuq gi, byû lé gunjang sù, mingkan gón má é Yudaq byu pé lhunglhang lé shuí gabyong sù eq, haú Nazaret hpúng má é hkyô-u shê sù nghut é lé, ngamoq myang ri. ⁶ Hau htoq agó, yhang gi, noqkuq yhûm lé acháq achyut kut râ dâ nyi luí, yhang lé ngamoq chyup yû mù, (ngamoq é tarâ dông jéyáng râ hen nyi é hkûn, ⁷ dap up zau Lusi gi, lé lô mù, ngamoq é loq mai yhang lé lé lú shuí yû luí, yhang lé mara hûn bang lé, náng chyáng jé keq ga hkunmó hkyô tô é nghut lhê.) ⁸ Haú mù, nang, yhang lé myí wú jáng, ngamoq yhang lé hun é mara banshoq têng é hkyô lé, nang wó sé râ nghut lhê." gâ ri.

⁹ Yudaq byu pé le, haú pé gi, têng lhê ga bo chôm taí akô nghut ri.

Poluq, Mara A Bò É Lé Tai Hung É Hkyô

¹⁰ Mingzau hpó gi, Poluq lé dang taí râ dông loq lik kat jáng, Poluq taí é gi, "Zau ê, shí mau bâng é ahtoq má, nang zanwut myo myo jéyáng byi nyi é hkyô lé, ngò sê é yanmai, ngò gabú myit eq yhumsing matú, mara a bo é hkyô taí bá. ¹¹ Ngò, Yerusalem wà mó má noqkuq râ matú doq e é buinyi raxe í nyi lhang a chyân shi é gi, nang luí za wó sé

râ nghut lhê. ¹² Noqkuq yhûm má ngò ó yuq eq taí hting lhûm é lé lhang, tarajong, a nghut jáng, wà hkaú hká jowó má le byu pé lé shuí gabyông é lé lhang, ngo lé mara hun é bang gi, a myàng kó. ¹³ Ahkuí, ngo lé yhangmoq hun é mara pé lé, náng hí má yhangmoq saksé lhang a wó tûn shit kó nghut ri. ¹⁴ Nghut kôlhang, náng hí má ngò yín yû râ hkyô rahkat gi, yhangmoq eq shut shaí hkyô ga myhîng tô é Hkyô lé cháng luí, ngamoq é íchyí íwâ pê é Garai Gasang lé noqkuq nyi lhê. Jep é tarâ eq myiqhtoi laiká pé má ká tô é lhunglhang lé le lumjîng lhê. ¹⁵ Ngò gi, dingmán é bang eq a dingmán bâng é dum dui toq lô râ hkyô joq é lé, yhangmoq eq rajung za Garai Gasang má myit myoqbyu nyi é sù nghut lhê. ¹⁶ Haú mù luí, Garai Gasang eq byu é hí má, ngò gi, râ é hkyô a bo é za, myit é hkyô san za wó dut nyi shoq, shikut nyi lhê.

¹⁷ Zanwut tsómra lai é htâng má, ngò gi, ngá é byù myû mâ é myùng bang lé chyunghuq byi râ eq alu kat râ matú, Yerusalem wà mó shut lô jé bê nghut lhê. ¹⁸ Haú su kut nyi é hkûn, ngò eq rahá hai byù moq mó le a nyi, hái jung gabyông é hkyô le a htoq, ngò noqkuq yhûm má lhoq san lhoq yúng yû bê hkyô lé za, yhangmoq myang akô. ¹⁹ Nghut kôlhang, Asia mau má é Yudaq byù ra-am gi, haú má nyi tô é nghut lhê; yhangmoq mai ngo lé mara hûn râ hkyô joq kô é nghut le gi, shí náng é hí má yhangmoq lé jé kó ra nghut lhê. ²⁰⁻²¹ Haú a nghut jáng, shí má nyi tô é bang gi, ngò Yudaq byin tú wapdoq hí má yap to mù, 'Shi byuq bâng é dum dui toq râ hkyô é yanmai, hkû-nyí nungmoq ngo lé jéyáng nyi akô.' nghû luí, garû é dang hkûn mai lai luí, ngò má gotú mara myàng shi kô é nghut le gi, yhangmoq yhang taí kyo kó sháng gaq." gâ ri.

²² Hpilik gi, Hkyô haú lé rago sê lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi râ nghut lhê." ga luí, yhangmoq lé ahkyíng htot kat byi ri. ²³ Poluq lé le, zúng za zúng to mù, yhâng é buinùm ji-myi wuì mai yhang ra chá é hkyô lajang byi naú kô é bang nyi le gi, ahkáng byi keq ga luí, shô up gyezau lé hkunmó hkyô kat ri.

²⁴ Buinyi rayoq zo lai é htâng má, Hpilik gi, Yudaq myiwe myhí nghut é sù yhangmyi Drusila eq jé lé mù, Poluq lé ji lò nhâng luí, yhang, Hkrisduq Yesuq lé lumjîng hkyô taí kyo é le gyô yu ri. ²⁵ Poluq gi, dingmán hkyô, yhumsing gung lé hkgang é hkyô eq, jé lô râ tarâ dara hkyô lé mhoqshit jáng, Hpilik gi, gyô gyuq mù, "Nàng ahkuí wó lô bê, ngò jìn jáng sheq nang lé dum ji yû râ nghut lhê." ga taí ri. ²⁶ Hpilik kúm gi, Poluq eq ngùn haq byi râ lé myit myoqbyù mù, yhang lé anum num ji yû luí, yhang eq nyo lhum lhum kut ri.

²⁷ Zanwut í zân lai jáng, Hpilik é mauzau ayá má Porku Hpestu lé htaí kat pyâm akô. Nghut kôlhang, Hpilik gi, Yudaq byu pê é hí má myoqdong wó nau é yanmai, Poluq lé htóng má jâng lhung pyâm to bê nghut ri.

25

Poluq, Kehtaq Chyáng Jé Râ Matú Dûng È Hkyô

¹ Hpestu gi, haú mau má jé é sum nyi lai jáng, Kesare wà mó mai Yerusalem wà mó shut doq lô ri. ² Haú hkûn, hkyangjong agyi pé eq Yudaq byù hkyô-u shê bang gi, yhang lé Poluq é hkyô lé hkyang lhom shit kômù, ³ yhangmoq gi, Poluq lé hkyolat má lhom haq sat pyám râ dâ to kômù luí, jeju ralhum kut byi é dng Poluq lé Yerusalem wà mó shut dé kat byi râ matú, Hpestu lé lhom dûng akô. ⁴ Nghut

kôlhang, Hpestu gi, "Poluq lé Kesare wà mó má sheq ru lhung tô lhê, hkâ-myháng a myáng má, ngò yhang le háu má dum taú ló rà nghut lhê. ⁵ Háu mù, nungmoq má é hkyô-u shê bang ra-am, ngò eq rahá gyó ló mù, háu yuq kut shut é hkyô bo é nghut jáng gi, yhang lé mara lé hún kó sháng gaq." ga tũ taí ri.

⁶ Háu htâng, yhang gi, shit nyi, raxê nyí kô yhangmoq chyáng nyi yù luí, Kesare wà mó má taú ló mù, htang nyí gi, tarâ tanghkuq má zùng luí, Poluq lé yhâng hí má shuí wang lò rà matú hkunmó hkyô kat ri. ⁷ Poluq jé jáng, Yerusalem wà mó mai gyó lo é Yudaq byu pé gi, yhâng é lnhngkyuq má yap to kôluí, saksé a wó tún shit é mara mó myo myo lé, yhâng é ahtoq má chôm taí hun akô nghut ri.

⁸ Háu hkûn, Poluq gi, "Yudaq byu pé é jep é tarâ eq shai é dông le, noqkuq yhâm lé shut é dông le, Kehta^{*}q lé shut é dông le, ngò a kut wú." ga luí, mara a bo é hkyô taí ri.

⁹ Nghut kôlhang, Hpestu gi, Yudaq byu pé é hí má myoqdong wó naú mù, Poluq lé, "Nàng, Yerusalem wà mó má doq ló luí, shí hkyô pé lé ngò háu má doqdan byi rà matú, nàng dóng lhê lhu?" ga myí ri.

¹⁰ Poluq kúm gi, "Ngò gi, doqdan hui rà nghut jáng, shí doqdan é jowò, Kehta^{*}q é tarâ hpyit wap má ahkuí yap to bê nghut lhê. Nàng sê é eq rajung za, ngò gi, Yudaq byu pé lé haí lhang a shut wú sũ nghut lhê. ¹¹ Laq má mù, shí gíng é mara lé, ngò kut shut pyâm é nghut le gi, shí hkám rà hkyô lé ngò a he pyám; nghut kôlhang, shí Yudaq byu pé mai ngo lé mara hun é hkyô a teng é nghut jáng gi, ó yuq lhang ngo lé yhangmoq é loq má ap byi rà ahkáng wó rà a nghut, ngò gi, Kehta^{*}q chyáng wang taí rà nghut lhê." ga tũ taí ri.

¹² Háu hkûn, Hpestu gi, yhâng é byin tú wap bang eq ban hpyê lhum jáng, "Nàng Kehta^{*}q chyáng wang taí rà ga bê nghut lhê, Kehta^{*}q chyáng wang ló aq hkoí!" ga taí kat ri.

Poluq Lé, Hkohlâm Agripa Hí Má Shuí Hâng Yu É Hkyô

¹³ Háu htâng, buinyi hkâ-myháng a myáng má, Hkohlâm Agripa eq yhanggu myiwe zo Bernike gi, Kesare wà mó má jé lé mù, Hpestu lé lé huí nyo akô nghut ri. ¹⁴ Háu mù, yhangnhik tâng gi, buinyi tsómra myáng nyi nyi é htâng má sheq, Hpestu gi, háu Poluq é hkyô lé hkoikhâm wa eq taí kyô lhum é gi, "Hpilik, lhung to lánng é htóng byu rayuq nyi ri. ¹⁵ Ngò Yerusalem wà mó má nyi tô é hkûn, hkyangjong agyi pé eq Yudaq byu pé é suwún wuí gi, háu yuq é hkyô lé taí kyo kôluí, háu yuq lé mara byi rà matú ngo lé chôm dúng akô.

¹⁶ Háu hkûn, ngò gi, mara hun é hui sũ, mara hun é bang eq chyung chyoq yoq kut luí, yhangmoq hun é mara lé yhumsing matú mara a bo é hkyô a wó taí shi lé, ó yuq lé ap byi pyám rà le, Romaq htung a joq nghũ luí yhangmoq lé taí kyo bê nghut lhê. ¹⁷ Yhangmoq ngá htâng châng gyó lô kô é hkûn, ngò gi, a nô yu é za, htang nyí jáng tarâ tanghkuq má zùng luí, háu yuq lé shuí wang lò rà matú hkunmó hkyô kat é. ¹⁸ Háu hkûn, háu yuq lé yhangmoq mara chôm hun bùm kôle, ngò myit ngàm tô é su mara ralhum le a hun htoq lô kó nghut ri. ¹⁹ Yhangmoq é noqkuq htung hkyô eq, háu dui nyi ri ga Poluq eq taí é, shi byuq bê Yesuq é hkyô lé za dang jet jet lhum bum akô. ²⁰ Háu mù, ngò gi, háu hkyô lé hká dông gon yù rà le a sé lô é yanmai, háu hkyô lé Yerusalem wà mó má doqdan é ló hkam yù rà matú, yhang dóng a

* 25:8 Kehta^{*}q gâ é gi, "hkoséng" gâ é nghut lhê.

dóng é hkyô lé myî wú le, ²¹ Poluq yhang sheq, Hkoséng mó chyáng jé rá ga tai é yanmai, Kehtaq chyáng a dé kat shí é u lé, yhang lé zúng nyî shirâ matú, ngò hkunmó hkyô kat é nghut lhê." gâ ri.

²² Haú hkûn, Agripa gi, "Ngò le haú yuq é dang gyô wú nau ri." ga, Hpestu lé tai jáng, yhang gi, "Napmá, nàng wó myang gyo rá nghut lhê." ga tû tai ri.

²³ Htâng nyî, Agripa eq Bernike nhiktâng gi, shingkang bò bò za lé lô mù, dap up zau wuî eq wà mâ é agyî suwún wuî eq rahá, rûng gok mó má wang zung tô bùm kô é hkûn, Hpestu hkunmó hkyô kat jáng, Poluq lé shuí hâng tô akô. ²⁴ Haú hkûn, Hpestu tai é gi, "Hkohkâm Agripa eq ahkuî shí má zup zîng tô é lhunglhâng bang ê, Yerusalem wà mó eq shí wà mâ é Yudaq byu pé banshoq bang, ngá chyáng lé tai kôluî, shí yuq lé asak a wó duî nhang to lo ga garú bùm é gi, ahkuî nungmoq myang é shí yuq yhang nghut bê. ²⁵ Nghut kôlhâng, shí yuq zui sai é má shí gíng é mara haî lé lháng ngò a myàng nghut ri. Yhang gi, Hkoséng chyáng wàng rá ga tai é yanmai, yhang lé Romaq myuq shut dé kat rá matú ngò myit hpyit to bê. ²⁶ Dé kat bá nghû jáng le, ngá é yhumsîng Hkoséng chyáng yhang é hkyô jihkúm nuqguq kâ hun kat rá haî le a bò nghut ri. Haú mù luî, yhang lé ban myî gôn wú jáng sheq, ká rá hkyô rajung jung hkâlhâng ngò myàng abe nghû, nungmoq banshoq bâng é hí má le, je riyhang nàng Hkohkâm Agripa é hí má le, yhang lé ngò lhoq htoq shit é nghut lhê. ²⁷ Hkâsu mù gâ le, htóng byû rayuq yuq lé dé kat é hkûn, yhang lé hun é mara a wó tûn shit lé gi, a htuk nghû luî, ngò myit lhê." gâ ri.

26

Poluq É Hí Hpyang Lhê É Nyî Yap

Hkyô

¹ Haú hkûn, Agripa gi, Poluq lé, "Nàng, nàng matú dang tai rá ahkáng wó bê." ga tai ri.

Haú mù luî, Poluq loq tû kat mù mara a bo é hkyô tai é gi, ²⁻³ "Hkohkâm Agripa ê, nàng gi, Yudaq byu pé é htungking banshoq eq tai htîng lhûm é hkyô hkat hkangmó lé, gyai sê to sù nghut é yanmai, Yudaq byu pé ngo lé hun é mara hkat hkangmó lé, ngò hkûnyî nàng é hí má mara a bò é hkyô myang tai é gi, ngá matú gabú hpo yhang nghut ri nghû myit yu nyî lhê; haú mù luî, ngá dang lé myit hing é èq gyô yù byi laq nghû, dúng tóngbán kat lhê.

⁴ Ngò gi, zoshâng hkûn mai, ngá amyû má le, Yerusalem wà mó má le, hkâsu kut nyi kô lo é hkyô lé, Yudaq byu pé lhunglhâng bang gi, sé gû nghut akô. ⁵ Yhangmoq gi, ngo lé hí hkûn mai sé kô é yanmai, ngò, ngamoq é noqkuq htûng má é tarâ htan dik é hpúng má bo é Hparishe rayuq nghut é hkyô lé, saksé hkám nau kô é nghut jáng, yhangmoq wó hkâm lhê. ⁶ Nghut kôlhâng, doqdân é hui zo rá matú, ahkuî ngò shí má yap tô é gi, Garai Gasang èq ngamoq é íchýî îwa pé lé byî tô é danggididq lé myit myoqbyû nyi é yanmai nghut lhê. ⁷ Ngamoq é byû myû raxe í hú gi, danggididq jeju haú lé wó hkam yù shoq ga, Garai Gasang lé nyî myín noqkuq dojaú shikut nyi bum akô; Hkohkâm wa ê, myit myoqbyû hkyô hau é yanmai, ngo lé Yudaq byu pé mara hun bum akô nghut ri. ⁸ Garai Gasang gi, shí bê bang lé dum lhoq tui lhê gâ é hkyô lé, a wó lûm nghû, haî mù myit yu akô lúh?

⁹ Ngò le, Nazaret wà byû Yesuq é myîng eq shai lhûm é dông myo myo wó kut rá nghut lhê nghû, gè gè yhang myit yu wú bê nghut lhê. ¹⁰ Gè gè haú dông le Yerusalem wà mó má kut wú bê nghut lhê;

hkyangjong agyi pê chyáng mâ é ahkáng wó yû luí, ngò gi, sân-yúng bang myo myo lé hótong má kat pyâm é eq, yhangmoq sat hui kôjáng le, ngò myit bo huí wú bê nghut lhê. ¹¹ Ngò gi, tarajong banshoq má a lêng lêng yhangmoq lé dam byi luí, Yesuq lé rhoi dang tái kó shoq shikut wú bê nghut lhê; nhik mó góng yo luí, gó mau mâ é wà pé lhang jé shoq, yhangmoq lé châng zing-rí wú bê nghut lhê.

Poluq Hpúng Byû Dut Lo É Hkyô

¹² Haú hkûn, radàm lé, ngò gi, hkyangjong agyi pê chyáng mai ahko ahkáng eq hkunmó lé yu chûng mù, Damaskuq myuq shut e ló nyi le, ¹³ Hkôhkâm wa ê, nyigúng tu ló zó lé, bui htoq má je duq é maubó gi, haú hkyô má, ngò eq ngá é luzúm wui é lênghkyuq má, mauhkung mai duq bó htoq lo é lé myang ri. ¹⁴ Haú hkûn, ngamoq banshoq bang myigúng má lêng gop tô bum le, Hebre myíng dông, 'Sholuq, Sholuq, nàng, ngo lé hái mù zing-rí nyi lhê lú? Zuchûn lé pik le gi, náng é matú gyai yhang wui lhê.' ga luí, ngo lé tái é danghtê lé ngò wó gyô kat ri.

¹⁵ Haú mù, ngò gi, 'Yhumsîng ê, nàng gi, ó yuq nghut lhê lú?' nghû luí, myi jáng, haú Yhumsîng tú tái é gi, 'Nàng zing-rí nyi é Yesuq nghut lhê. ¹⁶ Ahkuí toq yap aq, hkâsu mù gâ le, ahkuí, nàng, ngo lé myàng bê hkyô eq, ngò, nang lé tûn shit shirâ nghut é hkyô pê é matú, ngá é mù wùn râ byû eq saksé dut nhâng râ dông nang lé hkyin to râ nghû, ngò náng chyáng lé htoq shit é nghut lhê. ¹⁷ Náng é amyû pê é loq mai le, tûngbaù pê é loq mai le, ngò, nang lé hkyi yù nyi râ nghut lhê. ¹⁸ Yhangmoq, yubak hkyut pyám byí é jeju wó yû râ eq, ngo lé lumjîng é yan-mai, lhoq sân-yúng huí é bang eq rahá silí wunlí wó hkam yû kó

sháng gaq nghû, yhangmoq é myoq lhoq hpóng byi mù, mauchot hkaú mai maubó shut, Tsadán é a-tsam hkaú mai Garai Gasàng shut yhangmoq lêng ló râ matú, ngò, nàng lé yhangmoq chyáng nhang kat râ nghut lhê.' gâ ri.

Poluq Kut É Muzó Hkyô

¹⁹ Haú mù luí, hkôhkâm Agripa ê, ngò gi, mauhkung mâ é myoqwup shing-rán haú lé a gyô é a wó é nyi nghut lhê. ²⁰ Ngò gi, yhangmoq myit lêng luí, Garai Gasàng shut lêng taù lò mù, myit lêng bê hkyô lé, hkyi zó loq zó dông mai tûn shit kó sháng gaq nghû, sân-hi má Damaskuq myuq má nyi é bâng chyáng mai hî luí, Yerusalem wà mó mâ é bâng chyáng má le, Yuda mau gón mâ é bâng chyáng má le, tûngbaù pê chyáng má le, hkô kyo bê nghut lhê. ²¹ Hau é yanmai, Yudaq byu pé gi, ngo lé noqkuq yhûm má chyup yû luí, sat pyám râ da kô é nghut lhê. ²² Nghut kôlhang, ngò gi, hkû-nyí jé shoq Garai Gasàng eq garúm é lé wó yû luí, ahkuí shî má yap to mù, tiq ko banshoq bang lé saksé wó hkâm kyô é nghut lhê. ²³ Ngò tái é má, Hkrisduq gi, hpuzo luí, shí bê bang mai sân-hi duí toq lò mù, Yhâng é amyû eq tûngbaù amyû pé lé maubó é hkyô lé wó tái kyo râ nghut lhê ga luí, dut lò râ hkyô lé, myiqhtoí pé eq Mosheq tái tô é hkyô mai lai luí, ngò gotú hái le a tái é nghut lhê." gâ ri.

²⁴ Yhang haú su ga mara a bo é hkyô tái é lé, Hpestu gi, "Poluq ê, nàng na bê! Lûm mhoq myô yu é yanmai na bê nghut ri." ga luí, htê mó eq dang lat tái hpyit kat ri.

²⁵ Poluq kúm gi, "Aróng wó dik é Hpestu ê, ngò gi, nâ é a nghut, ngò tái é dang gi, tengmán é dang eq dang gyíng nghut lhê. ²⁶ Shí hkyô lé hkôhkâm wa yhang le sê to gù nghut lhê mù, yhâng é hí má ngò a gyuq a kyum tái é nghut lhê. Hkâsu

mù gâ le, shí hkyô gi, nungwò má kut é a nghut é yanmai, hkohkâm wa yhang a bo sê é gi, haì le a joq ra nghut lhê nghú, ngò myit lum nyi lhê. ²⁷ Hkohkâm Agripa ê, nàng gi, myiqhtoí pé é dang lé lumjínghê lhú? Nàng lumjínghê é hkyô lé ngò sê lhê." ga tù taì ri.

²⁸ Haù hkûn, Agripa gi, Poluq lé, "Razup za má, nàng, ngo lé Hkristan rayuq wó dut nhâng nhô ngam ri lhú?" ga taì ri.

²⁹ Dum Poluq gi, "Razup za má nghut nghut, myáng myáng má nghut nghut, shí shamtoq-tui pé mai lai luí, nàng za a nghut, hkûnyí ngò taì é dang lé gyô nyi é lhunglhâng bang, ngò su dut rà matú, ngò gi, Garai Gasang lé kyúdung nyi lhê." ga tù taì ri.

³⁰ Haù hkûn, hkohkâm wa gi, ginwáng zau hpó eq Bernike le mù, haù má zùng tô é bang eq rahá toq yap ri. ³¹ Yhangmoq htoq ló kô é hkûn, "Shí yuq gi, sat gíng é mara eq htóng lhúng gíng é mara haì le a kut shut nghut ri." ga, rayuq eq rayuq taì lhum bum akô nghut ri.

³² Agripa gi, Hpestu lé, "Shí yuq gi, yhang mai Kehta q chyáng jé rà ga a taì tô é nghut le gi, yhang lé wó nhang pyám berâ nghut lhê." ga taì ri.

27

Poluq, Romaq Myuq Shut Wui-sanghpo Mai E Ló É Hkyô

¹ Ahkuí, ngamoq lé Itali ming shut wui-sanghpo mai gû dap ló nhâng rà matú myit hpyit to kôluí, yhangmoq gi, Poluq eq htongbyú góbang ra-am lé, Augustuq Hkosêng é gyewap mó mâ é, Yuliu gâ é shô up gyezaú é loq má ap byí kat akô. ² Haù hkûn, Asia mau má é wuimau gin-gau cháng luí wà pé má wang jón ló é, Adramuti myuq mai toq é wui-sanghpo má ngamoq wang ji

bê nghut lhê. Htesaloni wà mó mâ é Aristakuq gâ é Makedoni byù rayuq le ngamoq eq rahá nghut lhê.

³ Htang nyí, ngamoq gi, Sidun myuq má no bê nghut lhê. Yuliu gi, Poluq lé shogyo mù, yhâng chyáng rà é hkyô lé yhâng é buinùm wui mai lhom lajang byi kó sháng gaq ga, yhangmoq eq é hui rà matú ahkáng byí kat ri. ⁴ Haù mai dum toq ló é hkûn, laì tau mut é yanmai, Kupru zinlóng lé lai hkaù uchyang ji lai ló mù, ⁵ Kiliki eq Pamhpuli mau mâ é wuimau đông lai byit ló le, Laiki mau mâ é Mura myuq má jé bê nghut lhê. ⁶ Haù má, shô up gyezau hpó gi, Itali ming shut dap e ló é, Alesandru myuq mâ é wui-sanghpo lé myang hkyup luí, ngamoq lé haù má ji nhâng bê nghut ri. ⁷ Haù mai buinyí myo myo yhó yhó lé za ji e ló luí, awui ahke yhang Kidu wà mó eq ang má wó jé ló jáng, laì tau mut é yanmai, hí shut a wó lai ló lo mù, ngamoq gi, laì lé cháng luí, Kreti zinlóng lé lai hkaù mù, Salamone kongzô é tù tap âng é mai lai ló é nghut lhê. ⁸ Haù mâ é wuiyàm mai awui ahke ji ló lé, Lasea wà eq a wê lhúm é Yuqyo é Guhkan gâ é jowò má jé ri.

⁹ Ahkuí, buinyí tsómra lhoq lhaí pyám luí, haù Zoshuq gám poí lai bê nghut é yanmai, wui-sanghpo mai sô wún le gi, gyuq chiq rà nám jé bê nghut ri. Haù mù, yhangmoq lé Poluq taì pun taì kyíng é gi, ¹⁰ "Âhkaù pé ê, shí dàm lhê é wui hkyô gi, wuihke mó hui luí, wui-sanghpo eq zè pé sùm pyám rà htoq agó, nga-nhùng é asak lhang sum rà dut é hkyô lé, ngò byu myang ri." gâ ri. ¹¹ Nghut kôhang, shô up gyezau hpó gi, Poluq é dang lé gyo rà malaí, wui-sanghpo hkàng sù eq wui-sanghpo yhumsing é dang lé, je lum ri.

* **27:12** Gyoqmýò lé, haù mau má laidun mó lò lò dut mù, yông wún le gyuq chiq nám nghut lhê.

¹² Guhkan haû gi, gyoqmyò* wó lhoq lhai râ su a dut é yanmai, myò hpyang gi, Hponik guhkan má wó jé lé jé mù, haû má gyoqmyò ló nyi lhai râ matú chòm myit huí akô. Guhkan haû gi, Kreti zinlóng má maupyí buiwàng hkyam eq mautsûng buiwàng hkyam shut hu tô é jowò nghut ri.

Wuimau Má, Laidun Mó Htûng Huí É Hkyô

¹³ Maupyí shut mâ é lai yhó le hik lô jáng, yhangmoq myit tô é má hkyak nghut bê su ngam pyám kôluí, shamtoq goknghe lé lhoq toq yû kômù, Kreti zinlóng yâm đông jì e ló bê nghut lhê. ¹⁴ Nghut kôlhang, hkâ-myháng a myáng má, Buihtoq mautsûng lai gâ é laidun mó gi, haû zinlóng mai mut lò luí, ¹⁵ wuì-sanghpo lé lo mut htûng é yanmai, hí shut a wó ló lo jáng, ngamoq gi, lai mut ló é shut châng yông ló bê nghut lhê. ¹⁶ Ngamoq gi, Koda gâ é zinlóng zo lé lai hkaú uchyang yông ló nyi é hkûn, haû sakhkyílhai lé gyai shikut é èq wó lêng yù luí, ¹⁷ wuì-sanghpo ahtoq má lêng toq to bê. Wuì-sanghpo lé gi, a byoq lo shoq tuí èq tuí kîng to bê nghut lhê. Dum, yhangmoq gi, Surti gâ é semuî bùm má ló kê gyâm to râ lé chiq kô é yanmai, wuì-sanghpo mâ é panlong pé lé lhoq nyhum hkyô yù mù, châng yông ló bekô nghut ri. ¹⁸ Laidun mó lùm htan é yanmai, htang nyí yhangmoq gi, hpugá zê pé lé hkyom dú hkyó pyám bekô nghut ri. ¹⁹ Sum nyí nghu é nyí má, yhangmoq gi, wuì-sanghpo zè pé lé yhumsing é loq èq yhang hkyô pyám bekô. ²⁰ Buinyì myáng myáng, bui lé le, kyí pé lé le a myáng é eq, laidun mó za ru mut nyi é yanmai, wó lut râ nghú myit myoqbyu tô é hkyô lé, ngamoq tô pyám bê nghut lhê.

²¹ Yhangmoq zoshuq a zô é, buinyì tsómra myáng lô bê nghut mù luí, Poluq gi, yhangmoq é gung

gûng má yap to mù, "Âhkaú pé é, nungmoq ngá é dang gyo luí, Kreti zinlóng mai a htoq ló é nghut le gi, shí su htên byoq é marophui zo râ a nghut. ²² Ahkuí nghut kôlhang, ngò tai é dang lé gyô yù mù myit wum yù keq; nungmoq mâ é hká yuq lé asak sum râ a nghut, wuì-sanghpo za sheq htên byoq byuq râ nghut lhê. ²³ Hkâsu mù gâ le, ngo lé sing é, ngò dojaú nyi é Garai Gasang é maumang lagyo rayuq, amàn ngá é nàm má lé yap to mù, ngo lé tai é gi, ²⁴ 'Poluq ê, hkâgyuq, Kehtaq é hí má nàng wó yap râ nghut lhê. Wuì-sanghpo shí má nàng eq rahá jì tô é lhunglhang bâng é asak lé, Garai Gasang gi, náng é yanmai, lai lai byi râ nghut lhê.' gâ ri. ²⁵ Hau é yanmai, âhkaú pé é, myit wum yù keq, ngo lé tai kyô é eq rajung za dut lò râ nghut lhê nghú luí, Garai Gasang lé ngò lumjîng nyi lhê. ²⁶ Nghut kôlhang, nga-nhúng gi, zinlóng ralhú lhum má ló htûng chyap to râ nghut lhê." ga luí, yhangmoq lé i-myt tai tîng ri.

²⁷ Buinyì raxe myi nyí myín má, gunggâm yoq lé, ngamoq gi, Adria wuimau má yông lhing wún é hkûn, sanghpo hkàng bang gi, dùng yàm eq chyâng lo nyi é su gâ é lé sê gyo kat akô. ²⁸ Haû su mù, wuì nik é lé kê wú lé, loqlam í xê kô nik é lé wó sê akô. Razuq zo má dum kê wú le, loqlam raxe ngò kô za nik é lé myàng akô nghut ri. ²⁹ Haû mù luí, luqmó má ló záng htung râ lé chiq kômù, yhangmoq gi, wuì-sanghpo htâng shut mâ é shamtoq goknghe myí lhum lé lhoq hkyô kat luí, mau hân bó sháng gaq ga kyûdûng nyi bum akô nghut ri. ³⁰ Wuì-sanghpo hkàng bang gi, wuì-sanghpo lé tô pyâm to luí hpâng râ dâ é myit eq, wuì sanghpo-u shut mâ é shamtoq goknghe pé lé lhoq hkyô râ su kut mhaú luí, sakhkyílhai lé haû má lhoq hkyô nyi bum akô. ³¹ Haû mù, Poluq gi, shó up gyezau eq gyezô pé

lé, "Shí bang wuì-sanghpo má a nyi le gi, nungmoq wó lut râ a nghut." ga taí ri. ³² Haú hkûn, gyezô pé gi, sakhkyîlhaí lé tui tô é tui lé zân hpyit kat kôluí, sakhkyîlhaí gi, byit gyó byuq bê nghut ri.

³³ Maubó lô jáng, Poluq gi, yhangmoq banshoq bang lé zang zo râ matú myit wum byí é gi, "Nungmoq gi, myit chiq luí, zoshuq haí le a zô é, hkû-nyí raxe myi nyí myáng lô bê. ³⁴ Haú mù luí, zoshuq rajung jung zo keq! Haú gi, nungmoq wó lut râ matú nghut lhê. Nungmoq chyâng má é ó yuq é xâm rahkat lhang byuq râ a nghut." gâ ri. ³⁵ Haú su ga ban taí é eq, yhang gi, muk lé yù luí, yhangmoq banshoq bâng é hí má Garai Gasâng jeju lé hkyan on mù, muk lé hpé luí, zô hí bê nghut ri. ³⁶ Haú hkûn sheq, banshoq bang gi, myit wum wó yù kômù, zoshuq zô bùm bekô nghut ri. ³⁷ Wuì-sanghpo haú má é byù lhunglhang gi, í sho nyhit xe hkyuq yuq nghut lhê. ³⁸ Yuq hkgangmó bàn zô gyí é htâng má, wuì-sanghpo sóm râ matú, sungso pé lé wuì má dú kat pyâm akô nghut ri.

Wuì-Sanghpo Htên Gyop Byuq É Hkyô

³⁹ Myoq san za myàng jáng, yhangmoq gi, jowò haú lé a sé kôlhang, semuì-jàng chyûn ralhüm lé byu myàng kôluí, wó dut é nghut jáng, haú má sanghpo lé kôn gyam râ matú chôm doqdân yu akô nghut ri. ⁴⁰ Haú mù, yhangmoq gi, shamtoq goknghe pé lé wuimau má hkyut hkyô pyâm tô akô. Lhaishap tui lé le hkyut yù luí, wuì-sanghpo ulhum má é panlong lé lhoq toq yù mù, lai hkyô cháng luí wuiyâm shut mut lô bê nghut ri. ⁴¹ Nghut kôlhang, semuì lo bum tô é jowò ralhüm má, wuì-sanghpo lô htung chyap byuq luí, sanghpo u gi, a wó duí lo mù, sanghpo htâng lé

gi, wuìheng eq lò bat hkyop myha pyám bê nghut ri.

⁴² Haú hkûn, gyezô pé gi, htongbyù pé wuili lí hpang byuq kó râ lé gyuq kô é yanmai, yhangmoq lé sat pyám râ chôm dá akô.

⁴³ Nghut kôlhang, shô up gyezau hpó gi, Poluq lé hkyi yù naù luí, yhangmoq dá é hkyô lé hkûm pyám mù, wuili dat li bang gi, wuì má byam gyó luí wuiyâm shut hí li dap ló kó sháng ga luí le, ⁴⁴ góbang gi, siklong eq wuì-sanghpo má é gotú zè pé má zui mù, gu dap ló sháng ga le, hkunmó hkyô kat ri. Haú đông mai lhunglhang bang gi, wuiyâm shut rago wó jé dap ló bekô nghut ri.

28

Malata Zinlóng Má Jé Nyi Tô É U Lhê Hkyô

¹ Ngamoq wó lut dap ló jáng sheq, zinlóng haú gi, Malata gâ é lé sé ri. ² Zinlóng byu pé gi, ngamoq lé shogyo myit gyai lhom tûn shit akô. Mau ru jáng wo nyi luí gyoq é yanmai, yhangmoq gi, myi mut byi mù, ngamoq banshoq bang lé hkûlum yu akô. ³ Haú hkûn, Poluq gi, htang rawaq guq tsing yù mù, myihkyóm má kat kat é hkûn, myi soq htan lò jáng, duq htân lhangmuì radu gi, htoq ló mù, yhang é loq má htê zing tô ri. ⁴ Zinlóng byu pé gi, Poluq é loq má lhangmuì haú htê lhang tô é lé myàng kó jáng, "Shí yuq gi, gè gè yhang byù sat é sù teng râ dut ri; wuì mai wó lut lò kôlhang, yhang asak dui nyi râ matú, Tengmán tarâ gi, a dóng lo nhung!" ga luí, rayuq eq rayuq taí lhum bum akô nghut ri. ⁵ Poluq kúm gi, lhangmuì haú lé myihkyóm má ko hkyô kat luí, haí le a dut é za nyi tô ri. ⁶ Yhangmoq gi, yhanggùng wâm lò berâ, haú a nghut jáng, byodàn ratung shi hkyaq lêng lò berâ, ga myit láng nyi bum akô. Nghut kôlhang, myáng myáng láng wú nyi

bum le, yhang má haí le a dut lo é lé myàng kôjáng, yhangmoq é i-myt dum htaí pyám kôluí, shí yuq gi, hparà rayuq sheq nghut ri ga dum taí bum akô nghut ri.

⁷Hau é nàm má, zinlóng agyì hpó Popli sing é maumyí pé joq tô ri. Haú yuq gi, ngamoq lé lhom te yù mù, yhâng yhúm má sum nyí yhang lalúm la-nye lhom hkûlum yu ri. ⁸Haú u lé, Popli é yhângwa gi, ali nyé no nyi é eq wuiwam shun leq tô ri. Poluq gi, haú yuq chyáng wàng mù, kyûdung byi luí, yhâng é ahtaq má loq ke byi mù, yhang lé lhoq gê byí ri. ⁹Haú su dut é yanmai, zinlóng mâ é nô byù góbang banshoq le, lé luí lhoq gê byí é hui bekô nghut ri. ¹⁰Yhangmoq gi, ngamoq lé a hkyô hkyô đông hkungga kôluí, ngamoq wui-sanghpo ji mù, dum toq ló rá hkûn, ngamoq rá é gû lé châng byi kat akô nghut ri.

Romaq Myuq Má, Poluq Jé É Hkyô

¹¹Lhamó sum hkyap lai jáng, Alesandru myuq mâ é, "Hparà zozûm nhiktâng" gâ é alhô dap é wui-sanghpo má, ngamoq wang jî htoq ló bê nghut lhê. Wui-sanghpo haú gi, gyoqmyò lé zinlóng haú má joq lai é nghut ri. ¹²Surakusa wà mó má jé jáng, haú má ngamoq sum nyí nô yu é nghut lhê. ¹³Haú mai jî xoq lhing ló le, ngamoq gi, Regi wà mó má jé ri. Htang nyí gi, maupyí lai hik lô mù luí, í nyí nyí má nghut jáng, Potioli wà mó má jé lô bê nghut lhê. ¹⁴Haú mâ é gumang wui ra-am eq hui luí, ngamoq lé nyhit nyí no rá matú lùng kômù, ngamoq gi, nô yù bê; hau htâng, Romaq myuq má jé ló bê nghut lhê. ¹⁵Haú mâ é gumang wui gi, ngamoq jé lo nyi é hkyô lé wó gyo kôjáng, te yù rá ga, Api Gai gâ é wà eq Bing Yhúm Sùm Lhum gâ é wà jé shoq lé akô. Poluq gi, haú bang lé lhom

myàng jáng, Garai Gasang lé hkyon kungtôn mù, myit wum wó yù bê nghut ri. ¹⁶Ngamoq, Romaq myuq má jé wang ló é hkûn, Poluq gi, yhang lé zúng rá gyezo rayuq eq gotû san nyi rá matú, ahkáng wó ri.

Poluq, Romaq Myuq Má, Mung-dang Hko Kyô É Hkyô

¹⁷Buinyì sum nyí lai é htâng má, Poluq gi, haú má é Yudaq suwún wui lé ji yu ri. Yhangmoq jé lé bùm kôjáng, yhang gi, "Gumang wui é, ngò gi, nga-nhông é amyú lé le, íchýí iwa pê é htungking lé le, shut shai é đông haí le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pê é loq má ap byí kat é hui bê nghut lhê. ¹⁸Romaq zau wui kúm gi, ngo lé ban jep gôn wú jáng, ngá chyáng shí gíng é mara lé a myàng kô é yanmai, ngo lé nhang kat nau akô nghut ri. ¹⁹Nghut kôlhang, haú lé Yudaq byu pé a dóng kô é yanmai, ngò hkâsu a dat kut lo mù, Kehtaq chyáng jé rá matú dúng é nghut lhê. Haú nghut kôle, ngá amyú lé mara hùn rá jowò joq é yanmai gi, a nghut. ²⁰Haú mù luí, Israellaq amyú é myit myoqbyù hkyô* é yanmai, shí shamtoq-tuí eq tuí é ngò hui zô é hkyô eq séng luí, nungmoq eq nyo kún rá matú, ngò, nungmoq lé ji kat é nghut lhê." ga luí, yhangmoq lé taí ri.

²¹Haú hkûn, yhangmoq gi, "Náng é hkyô eq séng luí Yuda mau mâ é laiká ngamoq a wó yù nghut ri. Haú mai lé é gumang wui ó yuq le, nàng eq séng é a ge é luhkyang lé shit kyô é a bò kó nghut ri. ²²Nghut kôlhang, shí nàng lom é hpúng gi, jowò hkangmó má taí he pyâm é hui é hkyô lé, ngamoq sê é yanmai, nàng byu myang é hkyô lé ngamoq gyô wú nau ri." ga tù taí akô.

²³Yhangmoq gi, yhang eq hui kún rá buinyì ding to kôluí, yhang

* **28:20** Israellaq amyú é myit myoqbyù hkyô gi, Mesaia gâ é hkyi yù sù lé myoqbyù nyi é nghut lhê.

bíng é yhûm má byù myo myo lé zîng bum akô. Haù hkûn, yhang gi, napkyô mai myín htâng jé shoq, Garai Gasâng é mingdán hkyô lé saksé hkâm kyô é eq, Mosheq é tarâ eq myiqhtoî pê é dang má cháng mù, yhangmoq lé shikut luí, Yesuq é hkyô taí pun taí kyîng ri. ²⁴Yhang taí é hkyô lé, ra-am gi, lumjîng bum akô; ra-am kúm gi, a lumjîng kó nghut ri. ²⁵Yhangmoq rayuq eq rayuq haù su myit a huí lhúm bùm kô é yanmai, Poluq gi, yhangmoq lé, "Chyoiyúng Woi-nyí, Myiqhtoî Esai-aq é nhut mai nungmoq é îchyí îwâ pé lé taí é dang gi, gyai yhang têng ri. Dang haù gi,

²⁶'Byù haù hú chyáng ê mù,
"Nungmoq gyô tsuq to kôlhang, sê gyo kó râ a nghut;
wú tsuq to kôlhang, wú sé kó râ a nghut.", nghû ê taí aq.

²⁷Hkâsu mù gâ le, amyû shi é i-myit gi, htan byuq luí,
yhangmoq é nohkyap gi, htu byuq bê nghut ri;
yhangmoq é myoq gi, chûm byuq bê nghut ri;

haù a nghut le gi, yhangmoq é myoq èq myàng mù,
yhangmoq é nohkyap èq wó gyo luí,
yhangmoq é i-myit má sê hkyáng kômù,

ngá chyáng lhing lò kôluí, ngò yhangmoq lé lhoq gê byi berâ nghut lhê.^{1✧}

gâ ri.

²⁸Haù mù luí, shí Garai Gasâng é hkyi yù hkyô lé, tûngbaù pê chyáng byí kat bê nghut luí, yhangmoq lhom gyô yù berâ hkyô lé, nungmoq yhang sê nyí keq ô!" ga luí, danghkun haù taí kat é htâng má, yhangmoq gi, htoq ló byuq bùm bekô nghut ri. ²⁹(Poluq haù su ga taí é htâng má, Yudaq byu pé gi, yhangmoq yhangchang dang jet jet

lhum uchyang ló byuq bekô nghut ri.)

³⁰Poluq gi, yhang nghô lúng é yhûm má í zân tup nyí é u lé, yhâng chyáng lé má lé é bang lé lhom hkûlum yu ri. ³¹Haù mù, a gyuq a kyum é za, Garai Gasâng é mingdán hkyô lé hko taí kyô é eq, Yhumsîng Yesuq Hkrisduq eq sêng é hkyô lé mhoqshit byí ri; yhang lé, ó le a hkûm zing to kó nghut ri.

✧ 28:27 Esai 6:9,10

ROMAQ Pê Chyáng Hun Kat é Laiká (Romans)

¹ Hkrisduq Yesuq é dui-nhâng zoshâng eq lagyo dut râ matú, Garai Gasâng èq ji yu é hui luí, chyoiyúng Chyúmdang pé má, ² Garai Gasang gi, hí hí mai Yhâng é myiqhtoí pé dông danggidiq byí to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to huí é sù, ngò Poluq gi, Romaq myuq má nyi é, Garai Gasâng èq chyitdap é hui luí, sân-yúng bang dut râ matú jì yu é bang banshoq lé, dang kyô kat lhê. ³ Yhâng é Yuqzo haú gi, byù hkyam dông ga jáng, Dawiq é awut ashín nghut ri; ⁴ Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoiyúng hkyo é Woi-nyí dông mai, hpungwup a-tsâm èq sé nhâng bê nghut ri. Yhang gi, nga-nhúng é Yhumsíng Yesuq Hkrisduq nghut ri. ⁵ Yhang dông mai le, Yhâng myíng é matú le, ngamoq gi, byù myú chângjup mai byù jì yù mù, lumjíng hkyô lé châng nyi nhâng râ matú, jeju eq lagyo ayá lé wó hkam yù bê nghut lhê. ⁶ Nungmoq le, Yesuq Hkrisduq eq séng râ matú jì yù huí é bang má lòm bekô nghut ri.

⁷ Nga-nhúng é Íwa Garai Gasang eq Yhumsíng Yesuq Hkrisduq chyáng má é jeju eq nguínón hkyô gi, nungmoq chyáng ru joq nyí sháng gaq ô!

*Poluq, Romaq Myuq Má Ló Kum
Nau É Hkyô*

⁸ Nungmoq é lumjíng hkyô lé, míngkan gón má taí pyo ló bê nghut é yanmai, sân-hi má, ngò gi, Yesuq Hkrisduq é myíng mai,

nungmoq banshoq bâng é matú, ngá é Garai Gasang lé, jeju hkyaon lhê. ⁹ Ngá é kyúdung dang pé má, ngò, nungmoq lé hkâ-nhám le bûn nyi é hkyô lé, Yhâng é Yuqzô é hkyô gabú danglù lé hko kyô nyi é má, ngá é myit nhiklhum banshoq èq dojaú é Garai Gasang gi, ngá é saksé nghut lhê; ¹⁰ Garai Gasang ô nau é nghut jáng, hkâ-í a myáng má, ngò, nungmoq chyáng wó jé lé râ hkyô htong byi râ matú, ahkuí, ngò kyúdung lhê.

¹¹ Ngò gi, nungmoq lé, woi-nyí hkyô eq séng é chyunghuq wó gâm byi mù, nungmoq lé wum-o wó lhoq kíng byi râ matú, nungmoq lé gyai yhang myàng nau nyi ri. ¹² Haú su nghu é gi, nga-nhúng rayuq eq rayuq é lumjíng hkyô dông mai, nungmoq eq ngò, myit wum byí é hui râ matú nghut lhê. ¹³ Gumang wui ê, ngò gi, haú tûngbaù pê chyáng mai ashí wó yu é eq rajung za, nungmoq chyáng mai le ashí wó yú râ matú, nungmoq chyáng lé jé râ nghú adàm dàm dâ wú é nghut kôhang, ahkuí jé shoq hkûm tang pyám huí é hkyô lé, nungmoq lé sé nhâng nau ri.

¹⁴ Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyín dap to sù nghut lhê. ¹⁵ Haú nghut é yanmai, ngò gi, Romaq myuq má é bang nungmoq lé le, haú gabú danglù gyai yhang hko kyo nau nyi é nghut lhê.

¹⁶ Haú gabú danglù hkyô má, ngò gi, a hoq é nghut lhê; hkâsu mù gâ le, haú gi, sân-hi má Yudaq byu pé, hau htâng tûngbaù pé má, lumjíng é sù yuq hkangmó lé hkyi yu é wó hui nhâng râ nghut é, Garai Gasâng é hpungwup a-tsâm nghut lhê. ¹⁷ Hkâsu mù gâ le, lumjíng myit mai wó yú luí, lumjíng myit má gíng nyi é, Garai Gasâng chyáng má é díngrán hkyô lé gi, gabú danglù haú má hpông shit bê nghut ri. Haú

gi, "Haû dingmán sù gi, lumjúng myít mai asak duì rã nghut lhê."✠
ga kã tô é eq rajung za nghut ri.

*Xângzo Byu Pê Htoq Má Garai
Nhikmo-yô É Hkyô*

¹⁸ Haû tengmán hkyô lé, yhumsing é agè ashop hkyô eq zik hkùm pyâm é byu pê é agè ashop hkyô eq garai a bo é hkyô pé banshoq htoq má, mauhkúng mai Garai Gasâng é nhikmo-yo hkyô lé hpông shit bê nghut ri. ¹⁹ Haî mù gâ le, Garai Gasang gi, Yhang eq sêng é hkyô, yhangmoq lé san za tũn shit bê nghut é yanmai, Garai Gasang lé sé âng é hkyô gi, yhangmoq chyáng san za dut bê nghut ri. ²⁰ Hkãsu mù gâ le, mau htoq xâng hkun mai, hpan tô é zè pé lé wú jáng, Yhâng é a byu-myang é isâm nghut é, ah-tum abyuq é hpungwup a-tsam eq Garai é myít sãmlai lé gi, san za wó myâng, wó sê gyô é nghut lhê. Haû mù luí, byu pé gi, mara mai wó he lut rã hkyô a joq lo nghut ri.

²¹ Haî mù gâ le, yhangmoq gi, Garai Gasang lé sê to kôlhang, Yhang lé Garai dông a shigyaú kô é eq, jeju a hkya-on kó nghut ri; yhangmoq myít é hkyô pé gi, akôm dut byuq é eq, nhik a gyíng é yhangmoq é myít nhiklum gi, chut byuq bê nghut ri. ²² Yhangmoq gi, hpaqchyí bò bang nghut lhê ga kôlhang, a-ngok é bang dut byuq bekô nghut ri. ²³ Haû mù, htên byoq a sê é Garai Gasâng é hpungwup shingkang lé, htên byoq sê é byù zông, nghoq lhô, dusak lhô eq yê jung dusak lhô pê eq, htaí lhik pyám bekô nghut ri.

²⁴ Hau é yanmai, Garai Gasang gi, yhangmoq é gungdu lé rayuq eq rayuq hpau a tap lhum kó rã matú, a sansêng é gungsho zùm-yap hkyô kut rã nghut é, yhangmoq é yut yut ô nau é i-myít má, yhangmoq lé ap pyám bê nghut ri. ²⁵ Yhangmoq gi,

haû Garai Gasâng é tengmán hkyô lé, mhaû é hkyô eq htaí lhik pyám kômù, hpân Sù lé noqkuq dojaú rã malaí, mhaû hkyô nghut é hpan tô é zè pé lé noqkuq mù, dojaú akô nghut ri. Hpân Sù haû gi, ah-tum abyuq hkya-on hui sù nghut ri. Amen.

²⁶ Haû nghut é yanmai, Garai Gasang gi, yhangmoq lé, ahoq ahí é yut yut ô nau hkyô má ap pyám bê nghut ri. Yhangmoq é myiwe wui lháng gi, htũng akying lé tô pyám kômù, haû eq shai é dông htaí lhik pyám nyi akô nghut ri. ²⁷ Haû eq rajung za, yuqgè wui le, myiwe wui eq zum é htũng akying lé tô pyám kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-û hkyô kut shut lhum kôluí, yhangmoq kut shut é eq gingdán é yubak dam lé, yhumsing gùng yhumsing hkam yù nyi bekô nghut ri.

²⁸ Hau htoq agó, haû Garai Gasang lé sê é hkyô gi, akyú bo é a nghut ga yhangmoq myít yù kô é yanmai, a kut âng é hkyô kut nhâng rã matú, Garai Gasang gi, yhangmoq lé, htên byoq sê é myít má ap pyâm é nghut lhê. ²⁹ Yhangmoq gi, agè agaú hkyô ajung jung, agè ashop hkyô, myoqnoq hkyô eq a jú lhùm é hkyô pé byíng jup tô é bang dut bekô nghut ri; manon é, byù sat é, mabyoq jishùm htoq é, mhaú zô é eq myít goí bo é pé le byíng bum ri. ³⁰ Yhangmoq gi, lumu é bang, gansang é bang, Garai lé a jú é bang, byù rhoi é bang, nghutbún é bang, gyáng é bang, agè ashop kut rã hkyô lhoq htoq é bang, mó wui é jìno a gyô é bang nghut akô. ³¹ Yhangmoq gi, a gyíng a hâng é bang, gidiq a zung é bang, chyit myít a bo é bang, shogyo nhikmyin a sê é bang nghut akô. ³² Haú pé lé kut é bang gi, shí gíng lhê gâ é,

Garai Gasâng é dingmán tarâ joq é lé, yhangmoq sê to kôlhang, haú pé lé, yhangmoq xoq kut nyi kô é htoq agó, haú hkyô lé kut é bang lé le, hkya-on waq toq akô nghut ri.

2

Garai Gasang Tarâ Jéyáng É Hkyô

¹ Haú mù luí, góyuq lé tarâ jéyáng é sù nàng ê, nàng gi, mara mai wó he lut rá hkyô a joq lo; hkâsu mù gâ le, nàng yhang jéyáng nyi luí, mù haú pé lé, nàng kut nyi é yanmai, byù góbang lé jéyáng é hkún, nàng gûng nàng mara byi nyi bê nghut ri. ² Haú đông kut nyi é bang lé, Garai Gasang gi, tengmán é đông tarâ jéyáng é lé, nga-nhúng sê nyi lhê. ³ Haú mù, byù za nghut to luí, góbang lé gi, jéyáng mù, yhumsing gi, haú đông roq châng kut nyi é sù nàng ê, nàng gi, Garai Gasâng é tarâ jéyáng hkyô mai wó hpang lut rá su ngam nyi lhê lú? ⁴ Haú a nghut jáng, nàng gi, Garai Gasâng é ge é hkyo eq nang lé myit wó shuí lhang nhang é lé a sê é za, Yhâng é agùn agó é ge é hkyô lé le, myit hing é hkyô eq jân shirang é hkyô lé le, wú tiq pyâm nyi lhê lú?

⁵ Nghut kôlhang, nàng é myit htân hkyô eq myit a lhang é nhiklhum é yanmai, haú Garai Gasang dingmán é đông tarâ jéyáng shit rá nghut é, Yhâng é nhikmo-yô é buinyi má hkâm zo rá nhikmo-yo hkyô lé, yhumsing gùng yhang hkong tô nyi bê nghut ri. ⁶ Garai Gasang gi, yuq hkgangmó lé, ó le ó kut é má cháng luí, hkâm zo nhâng rá nghut lhê. ⁷ Jân shirâng mù, ge é hkyô kut nyi é đông, hpungwup shingkan lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asak byi rá nghut lhê. ⁸ Nghut kôlhang, haú yhumsing wuízat hkyô za hô luí,

tengmán hkyô lé he-ngik pyâm mù, agè ashop hkyô lé cháng bâng é matú gi, nhikmo-yo hkyô eq nhikjum yo hkyô jé rá nghut lhê. ⁹ Wuîhke hkyô eq iyon yon hkyô gi, agè ashop kut é xângzo byù yuq hkgangmó chyáng jé rá nghut lhê; sâng-hi má Yudaq byu pé chyáng jé mù, tûngbaù pé chyáng le jé rá nghut lhê. ¹⁰ Nghut kôlhang, hpungwup shingkan, aróng eq nguingón hkyô gi, haú ge é hkyô kut é bang yuq hkgangmó chyáng jé rá nghut lhê: sâng-hi má Yudaq byu pé chyáng jé mù, tûngbaù pé chyáng le jé rá nghut lhê. ¹¹ Hkâsu mù gâ le, Garai Gasang gi, myoqdong a hkyin é Sù nghut lhê.

¹² Haú jep é tarâ lé a sê é mara kut shut é bang lunglhang gi, jep é tarâ đông a nghut é za htên byoq kó rá nghut lhê. Haú jep é tarâ hkaù má mara kut shut é bang lunglhang gi, jep é tarâ đông jéyáng é hui zo kó rá nghut lhê.*

¹³ Hkâsu mù gâ le, haú jep é tarâ lé wó gyô é bang lé, Garai Gasâng é hí má dingmán bang gâ é a nghut é za, jep é tarâ lé châng kut é bang za sheq, dingmán bang gâ é hui rá nghut lhê. ¹⁴ Haú jep é tarâ lé a wó é tûngbaù pé gi, jep é tarâ hkyô lé, yhang baú yhang châng nyi kô é hkún, jep é tarâ lé a wó kôlhang, yhumsing gùng yhumsing é matú tarâ dut bekô nghut ri. ¹⁵ Yhangmoq gi, haú jep é tarâ hkyô pé lé, yhangmoq é i-myt unghkaù má kâ to bê nghut é lé, tûn shit bekô nghut mù, yhangmoq é myit má hkâm zô é hkyô le, haú lé saksé hkâm byi nyi é eq, yhangmoq myit é hkyô gi, ahkuí mara hun kat, ahkuí mara hkyut kat kut nyi ri. ¹⁶ Haú hkyô gi, ngò taí pyo é gabú danglù eq rajung za, byu pé é záu nghop tô é hkyô pé lé, Hkris-duq Yesuq đông mai Garai Gasâng

* 2:12 Haú jep é tarâ lé a sê bang gâ é gi, tûngbaù pé lé gâ é nghut luí, haú jep é tarâ hkaù má é bang gâ é gi, Yudaq byu pé lé gâ é nghut lhê.

èq tarâ jéyáng é buinyì má dut rá nghut lhê.

Yudaq Byu Pé Eq Jep É Tarâ

¹⁷ Nghut kôlhang, nàng gi, náng gùng nàng Yudaq byù rayuq nghut lhê ga mù, haù jep é tarâ lé lumhkau nyi é eq Garai Gasang lé xoq é hkyô má nghutbùn nyi é sù; ¹⁸ Yhâng ô nau é hkyô lé sê é eq haù jep é tarâ mhoqshit é hkyô wó yú bê nghut é yanmai, je ahkyak é hkyô lé sê gàm hkoq é sù; ¹⁹ haù jep é tarâ má, hpaqchyì eq tengmán hkyô é alik wó sù nghut é yanmai, haù myoqjit bâng é matú hkyô-u shê sù eq mauchut hkaù má é bâng é matú maubó nghut sù; ²⁰ byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi, ²¹ nàng, góbang lé mhoq byi sù nhîng, yhumsîng gùng yhumsîng a mhoq yú lú? A wó hkau ga hko taí luí nhîng, nàng gi, hkaù lhê a nghut lú? ²² Su-myi sulàng lú hkyô a wó kut ga byu pé lé taí luí nhîng, nàng gi, su-myi sulàng lú hkyô kut lhê a nghut lú? Hpara lô lé a jú dik sù nàng gi, noqkuq yhûm lé hpyoq zo hpyoq shuq nyi lhê a nghut lú? ²³ Jep é tarâ eq séng luí nghutbun sù nàng gi, haù jep é tarâ lé lu laí é dông, Garai Gasang lé a hkungga kut lhê a nghut lú? ²⁴ Haù gi, "Garai Gasâng é myîng gi, nungmoq é yanmai, tungbaù pê chyáng lhoq hpoí pyâm é huí ri."* ga kâ tô é eq rajung za nghut ri.

²⁵ Haù jep é tarâ lé nàng châng é nghut jáng, ahpyo-kuq hpyit hkyô gi, akyû bò bê nghut ri. Nghut kôlhang, nàng, jep é tarâ lé lu laí é nghut jáng, a hpyit é eq rajung za dut bê nghut ri. ²⁶ Ahpyo-kuq a hpyit kôlhang, jep é tarâ hkyô pé lé châng é bang lé gi, ahpyo-kuq hpyit bê bang dông ge són byi lhê a nghut kó lú? ²⁷ Kâ tô é tarâ lé wó mù,

ahpyo-kuq hpyit hkam to gù nghut é, tarâ lu laí é sù nàng lé, gungsho má ahpyo-kuq a hpyit kôlhang, jep é tarâ lé châng é sù gi, mara hûn rá nghut lhê.

²⁸ Hkâsu mù gâ le, shinggan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpyit é gi, ahpyo-kuq hpyit kyîng a nghut. ²⁹ Ahte myit hkaù má Yudaq byù nghut sù za, Yudaq byù kyîng nghut lhê. Kâ tô é tarâ dông a nghut é za, Woi-nyì èq myit má ahpyo-kuq hpyit é gi, ahpyo-kuq hpyit kyîng nghut bê. Haù yuq é hkya-on kungtôn hkyô gi, byù mai lo é a nghut, Garai mai lo é ru nghut lhê.

3

Garai É Lhumzui Hkyô

¹ Haù dông ga jang, Yudaq byù rayuq dut nyi é gi, hai akyû hkâm zo rá lú? Ahpyo-kuq hpyit hkyô gi, hai akyû bò rá lú? ² Hkyô hkangmó má gyai akyû bò lhê! Je hí má gi, haù Garai Gasâng é mung-dang lé yhang, yhangmoq lé ap byi bê nghut ri.

³ Yhangmoq má é ra-am lumjîng myit a bò é nghut le gi, hkâsu kó lú? Yhangmoq lumjîng myit a bò é yanmai, Garai Gasâng é lhumzui hkyô lé akyû a bò nhâng wó dut rá lú? ⁴ Hká dông le a wó dut!

"Haù mù, nàng dang taí é hkûn, dingmán é hkyô wó lhoq htoq rá eq, nàng jéyáng huí é hkûn, ûng rá nghut lhê."*

ga kâ tô é eq rajung za, byù yuq hkangmó gi, byù-mhaù dut kôlhang, Garai Gasang gi, tengmán nyi sháng gaq.

⁵ Nghut kôlhang, nga-nhûng é a dingmán hkyô gi, Garai Gasâng é dingmán hkyô lé san za je lhoq htoq shit é nghut lhê; haù nghut jáng, nga-nhûng hkâsu nghû taí rá

lhub? Nga-nhung lé Garai Gasang nhikmo-yô é hkyô gi, Yhang a tarâ mù nghut lhê lhub? (Ngô gi, byù hkyam dông tai hting é nghut lhê.)
 6 Ratsúí lhang a nghut! Haú su ru nghut le gi, haú mingkan lé, Garai Gasang hkâsu wó jéyáng râ lhub?
 7 Rayuq yuq, "Ngô mhaú é hkyô gi, Garai Gasang tengmán é hkyô lé lhoq ko jat mù, Yhang é hpungwup shingkan lé je wó lhoq hu nhang é nghut le nhing, hai mù luí, ngò, yubak byù rayuq dông mara byí é hui zô nyi ra shirâ lhub?" ga tai dang-rhang râ nghut lhê. 8 "Ge é hkyô htoq sháng gaq, nga-nhung, agè ashop hkyô kut sháng." nghú hai mù a tai kô é lhub? Dang haú lé ngamoq tai é nghut lhê ga luí, ngamoq lé lumù gansang é dông byù ra-am tai akô. Haú bang gi, mara dam byí é hui zo gíng bang nghut akô.

Dingmán Byù A Nyi

9 Haú jáng, hkâsu nghú lo râ lhub? Nga-nhung gi, je gè bang nghut lhê lhub? Ratsúí lhang a nghut. Yu-daq byù nghut nghut, tungbau pé nghut nghut, yubak mara hkaú mâ é bang chyat nghut lhê nghú, ngamoq tai san kyô wú bê nghut lhê.
 10 Chyúmdang má kâ tô é le,

"Dingmán é byù a nyi, rayuq lhang a nyi nghut ri;

11 Sê gyô é byù rayuq le a nyi, Garai Gasang lé ho é byù le a nyi nghut ri;

12 Lhunglhang bang gi, lhing ló byuq bekô; yhangmoq gi, hpau a dap bang chyat dut byuq bekô nghut ri.

Ge é kut sú ó a nyi, rayuq lhang a nyi nghut ri."[☆]

gâ ri.

13 "Yhangmoq é hkyung gi, hpông tô é lup pé nghut akô; yhangmoq é shô gi, mhaú akô."[☆]

"Yhangmoq é nhutwuí pé má gi, shíduq bò lhangmui é duq dap bum ri."[☆]

gâ tô ri.

14 "Yhangmoq é nhut pé gi, nhing myíng nhing htê eq myit nô danghko bau byíng zan tô ri."[☆]

gâ tô ri.

15 "Yhangmoq é hkyí pé gi, byù sat sui lhoq htoq râ matú, lawán nau akô;

16 Yhangmoq sô nyi é hkyô pé gi, htên byoq é eq wuíhké é ahkô tông tô é nghut mù,

17 nguíngón é hkyô lé gi, yhangmoq a sé kó nghut ri."[☆]

gâ tô ri.

18 "Yhangmoq é myoq hí má Garai Gasang lé gyuq hkunggâ é hkyô, a bò kó nghut ri."[☆]

gâ tô ri.

19 Byù yuq hkanmó é nhut gi, tú tai jang a joq dut byuq mù, mingkan gón gi, Garai Gasang é hí má mara bo é bang dut nyi sháng gaq ga, haú jep é tarâ má tai é lhunglhang gi, jep é tarâ ô má nyi é bang lé tai é nghut é hkyô lé, nga-nhung sê lhê. 20 Haú mù luí, jep é tarâ lé châng é dông mai, ó yuq le, Yhang é hí má dingmán sú gâ é wó hui râ a nghut; jep é tarâ dông gi, yubak mara bo é hkyô lé wó sê yu é za nghut lhê.

Lumjíng Jáng, Dingmán Sú Wó Dut É Hkyô

21 Ahkuí kúm gi, jep é tarâ dông a nghut é za, haú jep é tarâ eq myiqhtoi laiká pé mai saksé hkâm tô é Garai Gasang chyáng mâ é dingmán hkyô lé, sé nhâng bê nghut ri. 22 Garai Gasang chyáng mâ é dingmán hkyô haú gi, Yesuq Hkrisduq lé lumjíng é dông mai nghut mù, lumjíng bang banshoq htoq má jé é nghut lhê. Gamhkuí

☆ 3:12 Hkya-on 14:1-3 ☆ 3:13 Hkya-on 5:9

☆ 3:17 Esai 59:7-8 ☆ 3:18 Hkya-on 36:1

☆ 3:13 Hkya-on 140:3 ☆ 3:14 Hkya-on 10:7

é hkyô a joq. ²³ Hkâsu mù gà le, lhunglhang bang gi, yubak mara kut shut bê bang chyat nghut mù, Garai Gasâng é hpungwup shingkang lé a hkyit hkap byuq lo kó nghut ri. ²⁴ Ahkuî kúm gi, Hkrisduq Yesuq mai lo é hkyi yù hkyô dông, Garai Gasâng é jejû eq, mara hkyut san byî é laí laí wó hui bê nghut ri. ²⁵ Garai Gasang gi, Yesuq é sui lé lumjîng bâng matú, shihtáí gunglik hkungga ralhú dông, Yesuq lé byî pyám bê nghut ri. Haû gi, laí lò bê yubak mara lé lhut pyám byi shoq, Garai Gasang myit hîng byi bê nghut é yanmai, Yhâng é tengmán hkyô lé tân shit é nghut ri. ²⁶ Garai Gasang haû su kut é gi, Yhânggùng yhang dîngmán Sû nghut é eq, Yesuq lé lumjîng é sù lé mara hkyut san byî é Sû nghut râ matú, ahkuî lhê ipyat má, Yhâng é tengmán hkyô lé shit byî é nghut lhê.

²⁷ Haû su nghut jáng, nghutbun jowò joq ri lhú? A joq. Hai tarâ mai a joq dut byuq é lhú? Haû jep é tarâ châng é yanmai nghut lhê lhú? A nghut, lumjîng hkyo é yanmai sheq a joq dut byuq é nghut lhê. ²⁸ Hkâsu mù gà le, byu gi, haû jep é tarâ châng é dông a nghut é za, lumjîng luí, mara hkyut san byi hui é hkyô lé, ngamoq lum nyi lhê. ²⁹ Garai Gasang gi, Yudaq byu pê é Garai Gasang za nghut lhê lhú? Tungbaù pê é Garai Gasang le a nghut lhú? Nghut lhê, tungbaù pê é Garai Gasang le nghut lhê. ³⁰ Hkâsu mù gà le, Garai Gasang gi, rayuq za nghut é yanmai, rajung za lumjîng luí, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi râ nghut lhê. ³¹ Haû nghut jáng, nga-nhúng gi, lumjîng myit hau eq, jep é tarâ lé lhoq hpoi pyám râ lhú? Ratsuí lháng a nghut! Nga-nhúng gi, jep é tarâ haû lé lhoq ging tîng é

bang ru nghut lhê.

4

Abraham, Mara Hkyut San Hui É Hkyô

¹ Haû su nghut jáng, nga-nhúng é îchyí îwa Abraham gi, haû hkyô mai hai wó sê yu ri nghû, taí râ lhú? ² Abraham gi, zui saí é dông mai, mara hkyut san byi hui é ru nghut le gi, yhang nghutbun jang joq râ nghut lhê; nghut kôlháng, Garai Gasâng é hí má gi, yhang haû dông a nghut. ³ Chyúmdang má hkâsu gà tô ri lhú gà le, "Abraham gi, Garai Gasang lé lumjîng bê nghut mù, yhang lé, dîngmán sù ga són byi bê nghut ri."* gà ri.

⁴ Zui saí é sù gi, yhâng é zuihpau lé, chyunghuq dông wó yu é a nghut é za, wó yù gîng luí, wó yu é ru nghut lhê. ⁵ Nghut kôlháng, zui saí é hkyô dông a nghut é za, haû agè ashop hkyô lé mara hkyut san byî é Garai Gasang lé lumhkau é sù gi, yhâng é lumjîng myit é yanmai, dîngmán sù ga són byi hui é nghut lhê. ⁶ Haû eq rajung za, yhang zui saí é hkyô dông a nghut é za, Garai Gasâng eq dîngmán sù ga són byi hui é, Garai Gasâng chyáng mâ é shimân jeju wó é sù eq séng luí, Dawiq taí é gi,

⁷ "Tarâ lu laí é lé mara hkyut pyám byi hui é eq yubak mara lé nghop pyám byi hui é bang gi, hkungsô wó nyi ri.

⁸ Bo tô é mara lé, Yhumsing eq mara a són byî é hui sù gi, hkungsô wó nyi ri."*

gà ri.

⁹ Haû sù é jeju gi, ahpyo-kuq hpyit hkâm bâng é matú za nghut lhê lhú? Ahpyo-kuq a hpyit bâng é matú le nghut lhê lhú? Hkâsu mù gà le, Abraham é lumjîng myit lé, dîngmán sù ga són byi bê nghut lhê nghû, ngamoq taí nyi bê nghut lhê.

10 Haû su són byî é gi, hkâ-nhám nghut lhê lúh? Ahpyo-kuq hpyit hkâm é htâng má lúh? A nghut jáng, hí má lúh? Haû gi, ahpyo-kuq hpyit hkâm é htâng má a nghut é za, hí má ru nghut lhê. 11 Hau htoq agó, Abraham gi, yang, ahpyo-kuq hpyit a hkam yù shî é hkûn mai, lumjîng luî wó é dingmán hkyô gâ é dizik nghut é, ahpyo-kuq hpyit masat lé myang hkam yù bê nghut ri. Haû mù, yang gi, haû ahpyo-kuq hpyit a hkam yù kôlhang, lumjîng é lhunglhang bang lé dingmán bang ga són byî é wó hui râ matú, haû bâng é îwa dut bê nghut ri. 12 Haû ahpyo-kuq hpyit hkâm é za a nghut, nga-nhûng é îwa Abraham, ahpyo-kuq hpyit a hkam yù shi má wó é lumjîng hkyô é hkyî-kám lé cháng luî ahpyo-kuq hpyit bâng é îwa le, yang nghut ri.

13 Mingkân é amyû hkûng xoq pé dut râ ga, Abraham eq yhang é awut ashín pé lé byi tô é danggidiq gi, jep é tara é yanmai a nghut é za, lumjîng hkyô mai lo é dingmán hkyô dông ru nghut lhê. 14 Hkâsu mù gâ le, jep é tarâ dông nyi yap é bang gi, amyû hkûng xoq pé nghut é nghut jáng, lumjîng hkyô gi, akyû a bo é eq, danggidiq gi, hpau a dap é dut byuq lhê. 15 Haû jep é tarâ gi, nhikmo-yo hkyô lhoq htoq é nghut lhê; nghut kôlhang, jep é tarâ a joq jáng gi, tarâ lu lai hkyô le joq râ a nghut.

16 Haû mù luî, danggidiq gi, Abraham é awut ashín lhunglhang bâng chyáng, jeju mai za lo é eq gingtîng nyi é dut sháng gaq ga, lumjîng hkyô mai lo é nghut lhê. Haû gi, jep é tarâ má lòm bâng é matú baú za a nghut, Abraham é lumjîng hkyô má lòm bâng é matú le nghut lhê. Abraham gi, nga-nhúng lhunglhang bâng é îwa nghut ri. 17 "Ngò gi, nang lé, byù myû myo myô é îwa dut nhâng bê."* ga kâ tô é

eq rajung za, haû shi byuq bê bang lé wó lhoq dui é eq a joq wú é zè lé joq shoq wó kut é, yang lumjîng é sù Garai Gasâng hí má, Abraham gi, nga-nhûng é îwa nghut lhê.

18 "Náng é awut ashín pé le, haû eq rajung za myô lò râ nghut lhê."* ga yang lé taí kyô to bê eq rajung za, yang gi, myit myoqbyù jowò haí a joq kôlhang, lumjîng luî myoqbyu nyi é nghut mù, byù myû myo myô é îwa dut bê nghut ri. 19 Yang gi, rashô zàn kô jé byuq bê nghut mù, yhanggung gi, shi é gyá dut é hui zô é eq Sarah é zoyhûm shibó le shum byuq kôlhang, yang gi, lumjîng myit a yom byuq nghut ri. 20 Hau htoq agó, Garai Gasâng é danggidiq eq séng luî, a lumjîng a dut é eq hê myit mhô myit a dut é za, yhang é lumjîng myit lé saí lhoq ging tîng mù, Garai Gasang lé hkya-on kungtôn luî, 21 Garai Gasang gi, Yang byî tô é danggidiq eq rajung za wó kut râ a-tsam bò sù nghut é lé, yang myit zing nyi ri. 22 Hau é yanmai, "Yang lé, dingmán sù ga són byi bê nghut ri."* gâ tô é nghut lhê. 23 "Yang lé, són byi bê." ga, kâ tô é dang gi, yang é matú za a nghut, 24 nga-nhúng é Yhumsîng Yesuq lé, shi é mai lhoq dui toq yù sù Garai Gasang lé lumjîng luî, Yang eq dingmán bang ga són byi râ nghut é, nga-nhúng é matú le nghut lhê. 25 Yhumsîng Yesuq gi, nga-nhúng é yubak marâ é matú, shi hkâm byi râ dông ap pyâm é hui luî, nga-nhúng, mara hkyut san byi é hui râ matú, lhoq dui toq é hui bê nghut ri.

5

Nguingón Hkyô Eq Gabú Hkyô

1 Haû mù luî, nga-nhúng gi, lumjîng é dông mai mara hkyut san byi é hui bê nghut é yanmai, nga-nhúng é Yhumsîng Yesuq Hkrisduq

dông, Garai Gasang eq buinùm wó xoq yû bê nghut lâhê. ² Yesuq é yanmai, nga-nhúng gi, ahkuí wó yu to bê jeju shí má, lumjínq luí wó wâng bê nghut mù, Garai Gasâng é hpungwup shingkang lé myoqbyù luí gabú gumrong nyi lâhê. ³ Haù za a nghut, nga-nhúng gi, wuìhke jamjau hkyô pé má le gabú gumrong nyi lâhê. Hkâsu mù gà le, wuìhke jamjau hkyô gi, hkam jan hkyô lhoq htoq ri; ⁴ hkam jan hkyô gi, myit a-tsam lhoq htoq lâhê; myit a-tsam gi, myoqbyu to hkyô lhoq htoq é lé, nga-nhúng sê lâhê. ⁵ Myoqbyu to hkyô haù gi, nga-nhúng lé myit wum gyui nhang é a nghut; hkâsu mù gà le, Garai Gasang gi, Yhâng é chyitdap myit lé, Yhang mai, nga-nhúng lé byí tô é Chyoiyúng Woi-nyí dông, nga-nhúng é i-myt unghkaù má hut kat byi bê nghut ri.

⁶ Hkâsu mù gà le, nga-nhúng gi, a-tsam a bò dut tô ashí u lé, ahkyíng hkyak má yhang, Hkrisduq gi, yubak dap bang nghut é nga-nhúng é matú shí hkám byi bê nghut ri. ⁷ Gè gè ga jáng, dingmán su é matú shí hkám byi râ byù gi, shau râ nghut lâhê; nghut kôlhang, byù gè rayuq é matú kúm gi, wám shí hkâm é byù nyi sê lâhê. ⁸ Nghut kôlhang, nga-nhúng gi, yubak dap bang nghut nyi ashí hkûn, nga-nhúng é matú Hkrisduq shí hkám byí é má, Garai Gasang gi, Yhâng é chyitdap myit, nga-nhúng lé shit byi bê nghut ri.

⁹ Nga-nhúng gi, ahkuí, Yhâng é sui mai mara hkyut san byí é hui bê nghut mù, Yhâng é yanmai, Garai Gasâng é nhikmo-yo hkyô mai, hkyi yu é je riyhang hui râ nghut lâhê. ¹⁰ Hkâsu mù gà le, nga-nhúng gi, Garai Gasâng é gyè pé nghut nyi ashí u le, Yhâng Zo shí hkám byí é dông, Garai Gasang eq buinùm wó xoq yu é hui bê nghut lâhê. Wó xoq yu to bê nghut jáng, nga-nhúng gi,

Yhâng é asak dông mai, gè gè yhang hkyi yu é hui râ nghut lâhê. ¹¹ Haù su za a nghut, nga-nhúng gi, nga-nhúng é Yhumsíng Yesuq Hkrisduq dông mai, buinùm wó xoq yu é jeju lé, ahkuí wó yu to bê nghut mù, Yhâng é yanmai, Garai Gasang má le, gabú gumrong nyi lâhê.

Shi É Gi, Adam É Yanmai, Dui É Asak Gi, Hkrisduq É Yanmai

¹² Byù rayuq dông mai, yubak mara gi, míngkan má jé wâng bê nghut luí, shí-nò hkyô gi, yubak marâ é yanmai châng jé bê nghut ri; haù dông mai, byù lungghâng bang gi, yubak dap bang chyat nghut byuq mù, shí-nò hkyô gi, byù lungghâng bâng chyáng jé bê nghut ri. ¹³ Hkâsu mù gà le, haù jep é tarâ lé a byi shimá, yubak mara gi, míngkan má joq to bê nghut lâhê. Nghut kôlhang, jep é tarâ a joq shí é hkûn gi, yubak mara lé mara su a ngàm shí é nghut lâhê. ¹⁴ Haù su ga kôlhang, Adam su hkunmó lé lu lai é dông mara a kut shut bâng é ahtoq má lhang, shí-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azông nghut ri.

¹⁵ Nghut kôlhang, jeju chyunghuq gi, haù mara kut shut é hkyô su a nghut; hkâsu mù gà le, mara kut shut é byù rayuq é yanmai, byù myo myo shí pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-í yhang byíng mui nyi ri-nhung! ¹⁶ Garai Gasâng jeju chyunghuq gi, byù rayuq kut é yubak mara su a nghut; hkâsu mù gà le, tarâ jéyáng é hkyô gi, byù rayuq é mara má cháng mù, mara dam byí é hkyô lhoq htoq é nghut lâhê; nghut kôlhang, jeju chyunghuq gi, tarâ lu lai bang myo myo má cháng mù, mara hkyut san byi hkyô lhoq htoq é nghut lâhê. ¹⁷ Hau htoq

agó, byù rayuq tarâ lu lai luí, haù rayuq é yanmai, shî-nò hkyô up nyi bê nghut lhê, ahkuí kúm, haù Garai Gasâng é agùn agó shimân jeju eq dingmán hkyô é chyunghuq lé hap yu é bang gi, Yesuq Hkrisduq gâ é byù rayuq dông mai, je riyhang asak ðui hkyô má uphkanq nyi kó rá nghut lhê.

¹⁸ Haù mù luí, tarâ lu lai é hkyô ralhùm é yanmai, byù lhunglhâng bang gi, mara ðam byí é hui zo kó é su, dingmán hkyô é muzó ralhùm é yanmai, byù lhunglhâng bang gi, asak ðui hkyô eq sêng é mara hkyut san byi hkyô lé wó bê nghut ri. ¹⁹ Hkâsu mù gâ le, byù rayuq jìno a gyô é yanmai, myo myo gi, yubak ðap bang dut byuq é su, byù rayuq jìno gyô é yanmai, myo myo gi, dingmán bang gâ é hui kó rá nghut lhê.

²⁰ Haù jep é tarâ jat é gi, tarâ lu lai hkyô je myo rá matú nghut lhê. Nghut kôlhang, yubak mara myô jat é hkûn, jeju gi, je riyhang myô jat lo é nghut lhê. ²¹ Haù mù, yubak mara gi, shî-nò hkyô dông uphkâng bê su, jeju gi, nga-nhúng é Yhumsing Yesuq Hkrisduq é yanmai, ahtum abyuq é asak wó byí é dingmán hkyô dông up rá nghut lhê.

6

Hkrisduq Eq Rading Ralhum

¹ Haù nghut jáng, nga-nhúng gi, hkâsu nghû tái rá lú? Jeju myô jat lò sháng gaq nghû, nga-nhúng, yubak mara kut xoq nyi rá lú?

² Haù su a nghut sháng gaq! Nga-nhúng gi, yubak mara eq shi gang bê bang nghut lhê; hkâsu mù haù má wó ðui nyi lo rá lú? ³ Hkrisduq Yesuq eq rading ralhum za dut rá matú, wui-myhup hkâm yù bê bang nga-nhúng banshoq gi, Yhâng é shi hkâm hkyô má le rading ralhum za dut rá matú, wui-myhup hkâm yù bê nghut é lé, nungmoq

a sé kó lú? ⁴ Haù mù luí, Hkrisduq gi, Íwâ é hpungwup shingkâng eq, shi bê mai lhoq ðui toq huí é su, nga-nhúng le, asak asik dông wó ðui nyi sháng gaq nghû, nga-nhúng gi, wui-myhup hkâm é dông, Yhang eq rahá, shi hkâm é eq myhup yhum é hui bê nghut lhê.

⁵ Nga-nhúng gi, Yhang shi hkâm é hkyô má, Yhang eq rading ralhum za dut bê nghut jáng, Yhâng é dum ðui toq hkyô má le, Yhang eq rading ralhum za hkyak dut rá nghut lhê. ⁶⁻⁷ Hkâsu mù gâ le, shi bê sù gi, yubak mara mai lhoq lhut é hui bê nghut é yanmai, nga-nhúng gi, yubak marâ é jùn dut nó a ra lo mù luí, yubak mara gùng gi, lhoq htên pyâm é hui rá matú, nga-nhúng é byù xau gi, Yhang eq rahá jén sat pyâm é hui bê nghut é hkyô lé, nga-nhúng sê lhê.

⁸ Haù mù, nga-nhúng gi, Yhang eq rahá shi hkâm bê nghut jáng, Yhang eq rahá ðui nyi rá nghut lhê nghû, lumjing lhê. ⁹ Hkâsu mù gâ le, Hkrisduq gi, shi bê mai lhoq ðui toq é hui bê nghut mù, Yhang gi, dum wó shi lo rá a nghut é lé, nga-nhúng sê lhê; shi-nò hkyô gi, Yhang lé hkâm-nhám le wó sing to rá a nghut lo. ¹⁰ Yhang shi hkâm é shi-nò hkyô gi, banshoq bâng é matú, yubak mara eq séng luí radàm za shi hkâm byi bê nghut ri; nghut kôlhang, Yhang ðui nyi é asak gi, Garai Gasâng hí má ðui nyi é nghut lhê.

¹¹ Haù eq rajung za, nungmoq gi, yubak mara eq shi gang luí, Hkrisduq Yesuq dông Garai Gasâng é matú asak ðui nyi lhê nghû, sôn yù keq. ¹² Haù mù luí, nungmoq é htên byoq sê é gungdu má, yubak mara lé hkâm-uphkâng nhâng, uphkâng nhâng kô é nghut jáng, gungdu yut yut ô nau é agê ashop hkyô lé, nungmoq châng é nghut bê. ¹³ Nungmoq é gungdu showui showang pé lé, agê ashop hkyô é

chúng zè pé đông yubak mara má hkâ-ap byí pyám kó, shí bê mai lhoq dui toq yú hui é bang su, yhum-sing gùng yhumsing, Garai Gasâng chyáng kúm ap byi keq; nungmoq é gungdu showui showang pé lé, dingmán hkyo é chúng zè pé đông, Garai Gasâng chyáng ap byi keq. ¹⁴ Hkâsu mù gâ le, nungmoq gi, jep é tarâ hkaû má a nghut lô é za, jeju hkaû má nghut nyí bekô yanmai, yubak mara gi, nungmoq lé sîng sù wó dut râ a nghut lo.

Dingmán Hkyo É Jùn Pé

¹⁵ Haû jáng gi, hkâsu kó lúhú? Nga-nhúng gi, jep é tarâ hkaû má a nghut lo é za, jeju hkaû má nghut nyí bekô yanmai, mara wó kut shut kó râ lúhú? Haû su a wó kut! ¹⁶ Nungmoq gi, rayuq yuq é jìno gyo râ matú, yhumsing gùng lé jùn pé đông ap pyâm é hkún, shí-nò hui râ nghut é yubak marâ é jùn đông nghut kôlhang, dingmán hkyô wó râ nghut é jìno gyo hkyô nghut kôlhang, nungmoq châng nyi é nghut le gi, nungmoq, haû é jùn dut bê lé, a sé kó lúhú? ¹⁷ Nungmoq gi, yubak marâ é jùn dut wú bê bang nghut kôlhang, nungmoq hkam yu to bê mhoqshit hkyô lé, nungmoq é myit nhiklhum banshoq eq châng bekô nghut é yanmai, Garai Gasang lé jeju hkyon sháng. ¹⁸ Nungmoq gi, yubak mara mai lhoq lhut é hui bang nghut kômù, dingmán hkyo é jùn dut bekô nghut ri.

¹⁹ Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ đông ngò tai râ ga jáng: nungmoq gi, nungmoq é gungdu showui showang pé lé, a sansêng é hkyô eq agè ashop hkyô myô jat nhang é má jùn đông lhang ap byí wú bekô nghut é su, ahkuí gi, choyiýung hkyô wó yú râ matú, haû pé lé, dingmán hkyô má jùn đông ap byi keq. ²⁰ Nungmoq gi, yubak marâ é jùn dut nyí kô é hkún,

dingmán hkyo eq uphkanq é mai lut nyí kô é nghut lhê. ²¹ Ahkuí, nungmoq hoqjung nghû wú htoq é pé gi, haû u lé, hai akyû wó yú kô é lúhú? Haû pé gi, shi byuq é má htùm é chyat nghut ri. ²² Nghut kôlhang, ahkuí gi, nungmoq, yubak mara mai lhoq lhut é hui bekô nghut mù, Garai Gasâng é jùn dut bekô nghut ri; hau é akyû gi, choyiýung hkyô wó yu é nghut mù, ahtum abyuq é asak wó râ nghut lhê. ²³ Hkâsu mù gâ le, yubak marâ é ahpau gi, shi é hkyô nghut ri; nghut kôlhang, Garai Gasâng é chyunghuq gi, nga-nhúng é Yhumsing Hkrisduq Yesuq é yanmai, ahtum abyuq é asak nghut ri.

7

Tarâ Mai Lut É Hkyô

¹ Gumang wui ê, ngò gi, tarâ lé sê é bang nungmoq lé tai nyi lhê: haû tarâ gi, byu rayuq lé, yhang, asak dui nyi é u lé za wó uphkanq é lé, nungmoq a sé kó lúhú? ² Dangké, ikun wàng bê myiwe myhí rayuq gi, yhang é yhumsing hpó asak dui nyi é ahkying má, tarâ eq up zing tô é hui ri; nghut kôlhang, yhang é yhumsing hpó shi byuq é nghut jáng gi, haû ikun wàng tarâ mai, yhang wó lut bê nghut ri. ³ Haû nghut é yanmai, yhang é yhumsing hpó asak dui nyi ashí u lé, yuggè góyuq eq hâng lhùm é nghut jáng gi, yhang lé, sulàng lú sù ga kó râ nghut lhê. Nghut kôlhang, yhang é yhumsing hpó shi byuq é nghut jáng gi, yhang, tarâ haû mai lut bê nghut luí, yuggè góyuq eq hâng lhum kôlhang, sulàng lú sù a nghut lo.

⁴ Haû mù luí, ngá é gumang wui ê, nungmoq le, haû shi byuq é mai lhoq dui toq yú hui bê sù Yuggè chyáng wó xoq mù, nga-nhúng gi, Garai Gasang lé ashí wó zui byi sháng gaq ga, Hkrisduq é gungdu đông mai, jep é tarâ eq shi gang bê

nghut lhê. ⁵ Hkâsu mù gâ le, nga-nhúng, yubak gungsho má nghut nyi é hkûn, nga-nhúng gi, shî-nò hkyo é ashî zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhúng é gungdu pé má mù zui nyi é nghut lhê. ⁶ Nghut kôlhang, ahkuí gi, nga-nhúng lé up zing tô é jep é tarâ eq shî gang bê nghut mù, jep é tarâ mai lut bê nghut é yanmai, kê tô é hkyô xau đông a nghut é za, Woi-nyí é hkyô sik đông nga-nhúng do-jau nyi é nghut lhê.

Jep É Tarâ Eq Yubak Mara

⁷ Haû jáng, nga-nhúng hkâsu taí râ lúhú? Jep é tarâ gi, yubak mara nghut lhê lúhú? Ratsuí lháng a nghut! Gè gè ga jáng, haû jep é tarâ đông mai za a nghut le, yubak mara lé, ngò wó sê é a nghut. Hkâsu mù gâ le, "myoqnoq myit hkâbô"✱ ga jep é tarâ má a taí tô é nghut jáng, myoqnoq é hkyô lé, ngò sé râ a nghut. ⁸ Nghut kôlhang, yubak mara gi, hkunmó é ahkáng lé chùng mù, ngò má myoqnoq hkyô jung hkangmó lhoq htoq byî ri; hkâsu mù gâ le, jep é tarâ hkaû má a nghut jáng, yubak mara gi, shi é za nghut lhê. ⁹ Ngò gi, tarâ hkaû má a nghut é za asak duì wú bê nghut lhê; nghut kôlhang, haû hkunmó htoq lô jáng, yubak mara gi, duì lò mù, ngò gi, shî bê nghut lhê. ¹⁰ Haû mù luí, asak duì nhâng râ matú nghut é hkunmó haû gi, shî-nò hkyô dut byuq é lé, ngò wó sê é nghut lhê. ¹¹ Hkâsu mù gâ le, yubak mara gi, hkunmó é ahkáng lé chùng mù, ngo lé mhaû yù luí, hau eq ngo lé shî nhang ri. ¹² Hau pé lé wú jáng, jep é tarâ gi, chyoiyúng ri; haû hkunmó gi, chyoiyúng, dingsmán é eq ge é nghut ri.

¹³ Haû nghut jáng, ge é hkyô haû gi, ngá é matú shî-nò hkyô dut byuq bê lúhú? Haû đông a nghut! Nghut

kôlhang, yubak mara lé gi, yubak mara đông hkyak wó lhoq htoq shit râ matú, haû ge é hkyô đông mai, yubak mara gi, ngò má shî-nò hkyô lhoq htoq bê nghut luí, yubak mara gi, gè gè yhang agè ashop dut é lé, hkunmó đông mai tân shit é nghut lhê.

¹⁴ Hau htoq agó, jep é tarâ gi, woi-nyí eq sêng é hkyô nghut é lé, nga-nhúng sê lhê; nghut kôlhang, ngò má gi, gungsho eq sêng é hkyô za bo é nghut luí, yubak mara má jùn đông ung zô é hui bê nghut lhê. ¹⁵ Ngò haí kut nyi é hkyô lé, ngò a sé. Hkâsu mù gâ le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê. ¹⁶ Ngò a kut nau é lé kut é nghut jáng gi, haû jep é tarâ ge é lé, ngò myit huí é nghut lhê. ¹⁷ Ahkuí gi, haû lé ngò yhang kut nyi é a nghut lo, ngò má lúng tô é haû yubak sheq kut é ru nghut lhê. ¹⁸ Ngò má, nghut bê, ngá é yubak gungsho má ge é hkyô haí le a bo é lé, ngò sê lhê. Hkâsu mù gâ le, ge é hkyô lé kut nau é myit ngò má bò kôlhang, haû lé a wó kut htoq nghut ri. ¹⁹ Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri. ²⁰ Ahkuí, a kut nau é hkyô lé ngò kut nyi é nghut jáng, haû lé ngò yhang kut nyi é a nghut lo é za, ngò má lúng tô é haû yubak sheq haû lé kut nyi é ru nghut lhê.

²¹ Haû mù, ge é hkyô lé ngò kut nau é hkûn, ngò má agè ashop hkyô htoq lô lô mù é tarâ lé, ngò myang ri. ²² Hkâsu mù gâ le, ngò gi, Garai Gasâng é tarâ lé, ngá é i-myit unghkaû má myit nguì gabú nyi lhê. ²³ Nghut kôlhang, ngá é gungdu showui showang pé má bo é gotû tarâ gi, ngá é i-myit tarâ eq majan zân lhùm é nghut luí, ngá é gungdu showui showang hkaû má mù zui nyi é yubak é tarâ má,

ngo lé shúmbyû dut nhang é lé, ngo myang ri. ²⁴ Ngò gi, shogyo rayhup dut sù nghut ri-nhung! Shì nhang é gungdu shí mai, ó yuq wá, ngo lé wó hkyi yù râ lúh? ²⁵ Nga-nhúng é Yhumsîng Yesuq Hkrisduq dông mai wó lut bê nghut mù, Garai Gasang lé jeju hkya-ôn nyi lhê!

Haû mù luí, ngò yhang, myit é dông gi, Garai Gasâng é tarâ lé châng lhê, nghut kôlhang, yubak gungsho dông gi, yubak é tarâ lé châng lhê.

8

Haû Woi-nyí Mai Asak Dui É Hkyô

¹ Haû mù luí, ahkuí, Hkrisduq Yesuq má nghut nyi bâng é matú gi, mara byí é hkyô a joq lô é nghut lhê.

² Hkâsu mù gâ le, asak dui hkyô eq sêng é Woi-nyí é tarâ gi, Hkrisduq Yesuq dông, yubak mara eq shî-nò hkyo é tarâ mai, ngo lé lhoq lhut yû bê nghut lhê. ³ Haû jep é tarâ gi, yubak gungshô é yanmai, wum nyhóm luí a wó kut é hkyô lé, Garai Gasang gi, yubak mara hkungga dut nhâng râ matú, yubak byu é gungghyâng dông, Yhang Zo sîng lé nhang kat é dông kut pyám bê nghut ri. ⁴ Haû mù, Garai Gasang gi, yubak gungsho dông asak a dui é za Woi-nyí dông asak dui bang nghut é nga-nhúng má, haû jep é tarâ má bo é hkyô pé lé, wó lhoq dik râ matú, gungsho ralhú má, mara lé doqđân pyám bê nghut ri.

⁵ Haû yubak gungsho dông asak dui é bang gi, gungsho yut yut ô nau é hkyô pé lé myit zuq nyi akô; haû Woi-nyí dông asak dui é bang kúm gi, Woi-nyí ô nau é hkyô pé lé myit zuq nyi akô nghut ri. ⁶ Haû yubak byu é myit gi, shi é hkyô nghut ri; haû Woi-nyí eq hkang to huí su é myit kúm gi, asak eq ngu-íngón hkyô nghut ri. ⁷ Haû yubak

myit gi, Garaí é tarâ ô má a nyi é htoq agó, haû lé a wó cháng kut é yanmai, Garaí é gyê nghut ri. ⁸ Haû yubak gungshô eq hkang tô é huí bang gi, Garai Gasang lé a wó gabú nhâng kó nghut ri.

⁹ Nghut kôle, Garai Gasâng é Woi-nyí gi, nungmoq chyáng lúng nyí bê nghut jáng, nungmoq gi, haû yubak gungshô eq hkang to huí é bang a nghut lô é za, Woi-nyí eq hkang to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê. ¹⁰ Nghut kôlhang, náng má Hkrisduq nyi nyi é nghut jáng, náng é gungdu gi, yubak marâ é yanmai shî kôlhang, náng é woi-nyí gi, dingmán hkyo é yanmai dui nyi ri. ¹¹ Hau htoq agó, Yesuq lé shi é mai lhoq dui toq yû Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yû Sû gi, nungmoq má nyi nyi é, Yhâng é Woi-nyí dông mai, nungmoq é, shî sê é gungdu pé lé le, asak dui nhâng râ nghut lhê.

¹² Haû mù luí, Gumang wui é, nga-nhúng gi, yubak gungsho dông asak dui râ matú, wò wó é bang a nghut. ¹³ Hkâsu mù gâ le, haû yubak gungsho dông asak dui kô é nghut jáng, nungmoq gi, shí râ nghut lhê; nghut kôlhang, haû gungshô é shut shaí hkyô lé, Woi-nyí eq sat pyám kô é nghut jáng, nungmoq gi, asak dui râ nghut lhê. ¹⁴ Garai Gasâng é Woi-nyí eq shuí u é huí bang gi, Garai Gasâng é yhangzô pé nghut lhê. ¹⁵ Hkâsu mù gâ le, nungmoq gi, gyuq râ matú, nungmoq lé jùn dum taû dut nhang é woi-nyí lé, a hap yu é za, nga-nhúng lé zo yín yu é Woi-nyí lé hap yu tô é bang ru nghut lhê; haû mù, nga-nhúng gi, Yhang é yanmai, "Aba,* Áwa é" nghú wut é nghut lhê. ¹⁶ Nga-nhúng gi, Garai Gasâng é

* 8:15 Aba gâ é gi, Aramaik dang dông "âwa" gâ é lichyúm nghut lhê.

yangzô pé nghut é lé, Woi-nyí haù gi, nga-nhung é woi-nyí eq rahá saksé hkâm nyi ri. ¹⁷ Ahkuí, nga-nhung gi, zo wui nghut bê yanmai, Hkrisduq eq rahá, Garai Gasâng é amyû hkûngxoq pé wó dut é nghut lhê. Nga-nhung gi, Hkrisduq é wuihke jamjau pé lé, gè gè yang bo hui zô é nghut jáng, Yhâng é hpungwup shing kang lé le, bo myang hkam yù rà nghut lhê.

Htàngnùng Lhê É Hpungwup Shing kang

¹⁸ Nga-nhung é ahkuí lhê é wuihke jamjau hkyô pé gi, nga-nhung lé shit rà nghut é hpungwup shing kang eq whuí rà a gingdán nghù, ngò wó myit ri. ¹⁹ Haù hpan to huí é lhunglhang gi, Garai Gasâng é yangzô pé lé lhoq htoq shit byí rà lé, gyai yang myit lánng nyi akò nghut ri. ²⁰ Hkâsu mù gâ le, haù hpan to huí é lhunglhang gi, akyû a bo é chyat dut byuq bê nghut ri. Haù gi, yhumsing hkyin yu é đông a nghut é za, haù su dut nhâng Sû ô nau é đông kut é nghut ri. ²¹ Haù hpan to huí é lhunglhang gi, htên byoq byuq rà matú shúm dut é mai lhoq lhut é hui lui, Garai Gasâng é yangzô pé é hpungwup bo é luthkyô má wó wâng rà matú, myoqbyu tô é nghut lhê.

²² Haù hpan to huí é lhunglhang gi, ahkuí hkyíng jé shoq, zohkù-nò no é su nò-kying kyíng nyi kô é lé, nga-nhung sê lhê. ²³ Haù pé za a nghut, Woi-nyí é sâng-hi ashí† lé wó yù bê bang nga-nhung le, zo pé đông yín yu é jeju lé lánng uchyang, i-myit unghkaú má nò-kying kyíng é nghut lhê. Zo pé đông yín yu é jeju haù gi, nga-nhung é gungdu hkyi xe yù hkyô nghut lhê. ²⁴ Hkâsu mù gâ le, nga-nhung gi, myit myoqbyu hkyô haù mai hkyi yu é hui

bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsing myang to bê é lé, ó yuq wá myit myoqbyu shirâ lú? ²⁵ Nghut kôlhang, nga-nhung gi, a wó shí é lé myit myoqbyu é nghut jáng, myit hîng hîng kut lánng é nghut lhê.

²⁶ Haù eq rajung za, Woi-nyí gi, nga-nhung wum nyhôm é hkyô má garúm byí ri. Nga-nhung gi, haì dung rà é lé a sé kôlhang, haù Woi-nyí yang gi, dang mai a wó taí htoq é nò-kying htê đông, nga-nhung é matú bo dúng xoq byí ri. ²⁷ Nga-nhung é i-myit unghkaú lé gôn wú é Sû gi, haù Woi-nyí myit é hkyô lé sê lhê, hkâsu mù gâ le, haù Woi-nyí gi, Garai Gasang ô nau é đông, sân-yúng bâng é matú bo dúng xoq byí ri.

Banshoq Lé Je Wó Ung Pyám Râ Hkyô

²⁸ Garai Gasang gi, Yhang myit sôn tô é eq rajung za, ji yù lui, Yhang lé chyitdap bâng é matú, lhunglhang lé ge é đông chyat kut é hkyô lé, nga-nhung sê lhê. ²⁹ Hkâsu mù gâ le, Yhang Zo gi, gumang wui myo myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó pûng nhâng rà matú, hí mai masat to bê nghut ri. ³⁰ Haù htoq agó, Yhang, hí mai masat to bê bang lé gi, ji yu ri; ji yu bê bang lé gi, mara hkyut san byí ri; mara hkyut san byí é hui bang lé gi, hpungwup shing kang bò nhang ri.

³¹ Haù jáng gi, shí hkyô eq séng lui, nga-nhung haì taí shirâ lú? Garai Gasang gi, nga-nhung hkyam shut nghut jáng, nga-nhung lé, ó yuq wá gyè wám kut rà lú?

³² Yhumsing é Yhangzô lé lhang a ha bûn é za, nga-nhung banshoq bâng é matú ap byí pyâm é Sû gi,

† 8:23 Woi-nyí é sâng-hi ashí gâ é gi, Woi-nyí gi, Garai Gasang byí é chyunghuq pé má é sâng-hi lhum nghut lhê.

Yhang lé le, lhunglhang lé le, rahá laí laí byi rá a nghut lúh? ³³ Garai Gasâng eq hkyin yu to bê bang lé, ó yuq wá mara wó hún rá lúh? Garai Gasang gi, mara hkyut san byi Sú nghut ri. ³⁴ Hkrisduq Yesuq gi, shí hkám luí, shí hkâm é htoq agó, shi é mai lhoq dui toq yu é hui mù, Garai Gasâng é loqyo hkyam má nghut nyí luí, nga-nhung é matú bo dúng xoq byí nyi bê nghut é yanmai, ó yuq wá mara wó byi rá lúh? ³⁵ Hkrisduq é chyitdap myit mai, nga-nhung lé, hai eq wá wó lhoq kang rá lúh? Gunjang huí é hkyo eq luq? Wuíhke huí é hkyo eq luq? Zing-ri huí é hkyo eq luq? Mutmó huí é hkyo eq luq? Gùng chîn dut huí é hkyo eq luq? Gyuq jung eq luq? Sham eq luq? ³⁶ Haú gi,

"Náng é yanmai, ngamoq, nyí wuí sat pyâm é huí nyi ri;
sat rá matú nyhi tô é sau pé lé su, ngamoq lé myit pyâm akô."[☆]

ga kâ tô é eq rajung za nghut ri. ³⁷ A wó lhoq kang; nga-nhung lé chyitdap Su é yanmai, nga-nhung gi, haú pé banshoq lé je wó ung pyâm é nghut lhê. ³⁸ Hkâsu mù gâ le, shí kôlhang, byùn kôlhang, maumang lagyô pé nghut kôlhang, agè ashop é nat pé nghut kôlhang, shí ipyat nghut kôlhang, htang pyat nghut kôlhang, hai jung a-tsam pé nghut kôlhang, ³⁹ htoq tsáng mâ é nghut kôlhang, a-ô tsáng mâ é nghut kôlhang, hpan tô é gotú hai nghut kôlhang, nga-nhung é Yhumsing Hkrisduq Yesuq má bo é Garai Gasâng é chyitdap myit mai, nga-nhung lé wó lhoq kang pyám rá a nghut nghú, ngò gi, hkyak wó sê yu ri.

9

Garai Gasang Hkyin Yu É Israe-laq Byu Pé

¹ Ahkuí, ngò gi, Hkrisduq má tengmán é dang tái rá; ngò a mhaú é lé, haú Chyoiyung Woi-nyí gi, ngá é unghkaú myit má hkyak saksé hkâm nyi ri. ² Ngò gi, ngá é myit nhiklhum má, gyai yhang yón kuq nyi é eq ayang hpuzô nyi lhê. ³ Hkâsu mù gâ le, ngò gi, ngá é byuhú, ngá é gumang wuí é matú, nhing é huí luí Hkrisduq eq gang le lhang gè rá su gâ ri. ⁴ Haú bang gi, Israelaq byu pé nghut lhê. Zo yín yú huí é hkyô le, hpung-wup shingkang le, dangshikaq pé le, tará lé myang hap yu é hkyô le, noqkuq yhúm má noqkuq é hkyô le, danggidiq pé lé le, yhangmoq wó yu akò nghut ri. ⁵ Haú mying hú é íchýí íwâ pé gi, yhangmoq é íchýí íwâ pé nghut luí, byu é hkyam đông gon jáng, Hkrisduq gi, yhangmoq amyú mâ é nghut ri. Yhang gi, lhunglhang lé up é, ahtum abyuq hkya-on huí é Garai Gasang nghut ri! Amen.

⁶ Haú gi, Garai Gasâng é dang-gidiq akôm dut byuq bê nghú nau é a nghut. Hkâsu mù gâ le, Israelaq byu pé banshoq bang gi, Israelaq byu akying chyat a nghut kó nghut ri. ⁷ Abraham é awut ashín banshoq bang gi, yhang é zo wuí akying chyat nghú a wó tái é nghut lhê. Hau é malaí, "Isak đông mai lo é lé, náng é awut ashín nghú són byi rá nghut lhê."[☆] gâ tô ri. ⁸ Radông tái sháng ga jáng, gungsho mai hku é zo wuí gi, Garai Gasâng é zo wuí akying a nghut kó, danggidiq eq sêng é zo wuí za sheq, Abraham é awut ashín pé đông són byí é nghut lhê. ⁹ Hkâsu mù gâ le, "Masat tô é ahkýing má, ngò dum tái lé mù, Sarah gi, yuqzo hkú rá nghut lhê."[☆] ga tái tô é danggidiq é yanmai nghut lhê.

¹⁰ Haú za a nghut, Rebeka é yhangzô nhiktang é íwa gi, nga-nhung é íwa nghut su Isak rayuq

za nghut lhê. ¹¹⁻¹² Nghut kôlhang, Garai Gasang myit hpyit to mù hkyin yu é hkyô gi, muzô mai a nghut é za, hkyin ji yù Su é yanmai nghut é lé, wó gíng nyi sháng gaq ga, haû zozûm nhik a hku lé shí é htoq agó, ge é eq a ge é muzó haî lhang a kut shimá, "Haû ko sù yuq gi, tiq sù yuq lé dojaú râ nghut lhê."* ga, Rebeka lé taî kyô tô é nghut lhê. ¹³ Haû gi, "Yakup lé, ngò chyitdap lhê, nghut kôlhang, Eso lé gi, a ngui é nghut lhê."* ga kâ tô é eq rajung za nghut ri.

¹⁴ Haû nghut é yanmai, nga-nhúng hkâsu nghû taî râ? Garai Gasang gi, a tarâ é sù nghut lhê lú? Ratsú lhang a nghut! ¹⁵ Hkâsu mù gâ le,

"Ngò, shogyo nhikmyin naù sù lé, shogyo nhikmyin râ nghut lhê;

Ngò, jeju byi naù sù lé, jeju byi râ nghut lhê."*

ga, Mosheq lé Yhang taî ri. ¹⁶ Haû mù luí, haû hkyin yu é hkyô gi, byù yut yut ô nau é yanmai le a nghut, shikut é yanmai le a nghut, Garai Gasang é shogyo nhikmyin é yanmai za nghut lhê. ¹⁷ Hkâsu mù gâ le, Chyúmdang má, "Náng chyáng Ngá é a-tsam wó tân shit râ eq mingkan gón má Ngá é myìng lhoq pyo é hui râ matú sheq, Ngò, nang lé lhoq toq kat é nghut lhê."* ga, Hpara-uq lé taî ri. ¹⁸ Haû mù luí, Garai Gasang gi, shogyo nhikmyin naù sù lé, shogyo nhikmyin mù, myit lhoq htân byi naù sù lé, myit lhoq htân byi ri.

¹⁹ Nungmoq mâ é rayuq yuq, "Haû jáng, Garai Gasang gi, ng-amoq lé haî mù mara hun nyi ashî lú? Yhang ô nau é hkyô lé, ó yuq wá wó hkûm pyâm lhê lú?" ga, ngo lé taî kó râ nghut lhê. ²⁰ Nghut kôlhang, Garai Gasang lé dang tu sù byù nang gi, ó yuq wá nghut lhê

lú? Saî to hui bê é zè pé gi, "Nàng, haî mù ngo lé shî su kut saî tô lhê lú?" nghû saî é Sù lé wó taî râ lú? ²¹ Tso-au saî sù gi, tsohtung ralhun mai za, hkik é tso-au pé eq a hkik é tso-au pé saî râ ahkáng wó lhê a nghut kô lú?

²² Garai Gasang gi, Yhang é nhikmo-yo hkyô tân shit luí, Yhang é a-tsam lé sé nhâng naù kôlhang, htên byoq râ matú hen tô é, nhikmo-yo gíng é tso-au pé lé, myit hîng hîng shirang pyâm nyi é hkyô lé, taî râ jang haî joq ashî lú? ²³ Hpungwup shingkang é matú noq mai hen to bang nghut é, Yhang shogyo nhikmyin hui é bang lé, Yhang é agùn agó é hpungwup shingkang lé sé nhâng naù mù, Yhang haû su kut é nghut jáng, taî râ haî joq ashî lú? ²⁴ Haû bang gi, Yudaq byu pé mai za a nghut, tungbaù pé mai le ji yù hui é bang nga-nhúng nghut lhê. ²⁵ Haû eq rajung za, Hosea laiká má Yhang taî tô é gi,

"Ngá é byù myû a nghut é bang lé, 'Ngá é byù myû' nghû;

Ngò a chyit é byizo lé 'Ngò chyit sù' nghû wut râ nghut lhê."* gâ ri. ²⁶ Haû mù,

"Nungmoq gi, ngá é byù myû pé a nghut.' nghû yhangmoq lé taî é jowò má yhang,

yhangmoq gi, 'Rû dui nyi é Garai Gasang yhangzô pé' ga wut é hui kó râ nghut lhê."*

gâ ri.

²⁷ Esai-aq le, Israelaq byu pé eq séng luí garu taî é gi,

"Israelaq yhangzo yhangshû pé gi, wuîshuq lung-aù yàm mâ é semuî su myo kôlhang,

myit gyó tô é bang za sheq hkyi yu é hui kó râ nghut lhê.

²⁸ Hkâsu mù gâ le, haû Yhumsing gi, myidàm htoq má Yhang é tarâ jéyang hkyô lé hân hân

lhoq dik lhoq htûm pyám rã
nghut lhê."[✧]
gã ri.

²⁹ Haú eq rajung za, hí lé Esai-aq
taí tó é gi,

"A-tsam dik shoq bò sù haú
Yhumsîng za, nga-nhúng lé,
awut ashín a myhit to byí é
nghut jáng,
nga-nhúng gi, Sodom wà su dut
byuq luí, Gomoraq myuq eq
pung byuq rã nghut lhê."[✧]

gã ri.

*Israellaq Byu Pé A Lumjîng Kô É
Hkyô*

³⁰ Haú mù, nga-nhúng hkâsu
nghû taí rã lúh? Dingmán hkyô lé
a châng hkat é tûngbaù pé gi, haú lé
wó yù bekô; haú gi, lumjîng hkyo
é yanmai wó yu é dingmán hkyô
nghut ri. ³¹ Nghut kôlhang, tarâ eq
sêng é dingmán hkyô lé châng hkat
é Israellaq byu pé gi, haú lé a wó yù
kó nghut ri. ³² Haí mù a wó yù kô é
lúh? Yhangmoq gi, lumjîng myit eq
châng hkat kô é a nghut é za, muzó
pê eq châng hkat kô é yanmai, a
wó yù kô é nghut ri. Yhangmoq
gi, "htung htê rã luqgok" má htûng
leng bekô nghut ri. ³³ Haú,

"Wú keq, htûng leng rã luqgok eq
myit leqbat nhâng rã luqmó
cham lé, Ngò, Zi-un bùm má
lhez to luí,

Yhang lé lumhkaú sù gi, hkâ-
nhám le hoq hpù é hui rã a
nghut."[✧]

ga kã tó é eq rajung za nghut ri.

10

¹ Gumang wuì ê, ngò gi, haú
Israellaq byu pé hkyi yu é hui kó
sháng gaq nghû, gyai yhang myit
shirông luí, Garai Gasâng chyáng
yhangmoq é matú kyûdung byí nyi
lhê. ² Hkâsu mù gã le, yhangmoq
gi, Garai Gasâng é hkyô lé gyai

yhang myit zuq é bang nghut é lé,
ngò saksé hkâm lhê; nghut kôlhang,
yhangmoq myit zuq é hkyô gi,
hpaqchyí bo é dông a nghut kó.

³ Yhangmoq gi, Garai Gasâng
chyáng mai jé lé é dingmán hkyô
lé a sé kômù, yhumsîng dingmán
bûn é hkyô lé za ho shikut nyi kô
é yanmai, Garai Gasâng é dingmán
hkyô hkaú má a nyi kó nghut ri.

⁴ Hkrisduq gi, lumjîng bang yuq
hkanmó, dingmán é má wó jé kó
sháng gaq ga, jep é tarâ ló htûm jang
dut bê nghut ri.

⁵ Mosheq gi, "Haú pé dông châng
é sù gi, haú pé mai asak duì rã
nghut lhê."[✧] ga, jep é tarâ eq sêng
é dingmán hkyô lé kã sân kyô
tó é nghut lhê. ⁶ Nghut kôlhang,

lumjîng hkyô eq sêng é dingmán
hkyô gi, "Náng é myit nhiklhum
má, 'Mauhkûng má, ó yuq doq ló
rã lúh?'[✧] (Haú gi, Hkrisduq lé shuí
gyó lò rã gá nau é nghut lhê), ⁷ haú
a nghut jáng, 'Nik é jang má, ó yuq
gyó wâng rã lúh?'[✧] (Haú gi, Hkris-

duq lé, shi é mai dui toq nhâng rã
gá nau é nghut lhê.), nghû hkâtaí
kó." gã tó ri. ⁸ Haú jáng, hkâsu
gã tó ri lúh? "Haú mungdang gi,
nàng eq chyâng nyi ri; náng é nhut
má le, náng é myit nhiklhum má
lé nghut nyi ri."[✧] gã tó ri. Haú gi,

ngamoq hko taí é lumjîng hkyô eq
sêng é mungdang nghut lhê. ⁹ Haú
mù, "Yesuq gi, Yhumsîng nghut ri."
nghû náng é nhut eq yín yù mù,
Garai Gasang gi, Yhang lé, shi é mai
dui toq nhâng bê nghut lhê nghû,
náng é myit nhiklhum má lumjîng
é nghut jáng, nàng gi, hkyi yu é hui
rã nghut lhê. ¹⁰ Hkâsu mù gã le,

byù gi, myit nhiklhum má lumjîng
jáng, mara hkyut san byí é hui mù,
nhut mai yín yù jáng, hkyi yu huí é
nghut lhê. ¹¹ Haú Chyúmdang taí é
gi, "Yhang lé lumhkau é sù ó yuq
le, hkâ-nhám lháng hoq hpù é hui

✧ 9:29 Esai 1:9 ✧ 9:33 Esai 8:14; 28:16 ✧ 10:5 Nhong 18:5 ✧ 10:6 Tarâ Pun 30:12 ✧ 10:7
Tarâ Pun 30:13 ✧ 10:8 Tarâ Pun 30:14 ✧ 10:11 Esai 28:16

râ a nghut."✠ gâ ri. ¹² Hkâsu mù gâ le, Yudaq byù eq tûngbaù pê é gyoro má gam hkoq é hkyô haì le a joq é za, haù Yhumsing gi, banshoq bâng é Yhumsing nghut lhê mù, Yhang lé wut dung bang lhunglhang lé, agùn agó shimân byi ri. ¹³ Hkâsu mù gâ le, "Haù Yhumsing é mying lé lêng é bang yuq hkangmó gi, hkyi yu é huì râ nghut lhê."✠ gâ tô ri.

¹⁴ Haù nghut lé gi, yhangmoq a lumjing é sù lé nhing, hkâsu wó wut dung kó râ lú? Yhangmoq a wó gyô wú é sù lé nhing, hkâsu wó lumjing kó râ lú? Hko kyô é sù a nyi le nhing, hkâsu wó gyo kó râ lú? ¹⁵ Nhang kat é a huì le gi, yhangmoq hkâsu kut wó hko kyo kó râ lú? Haù eq rajung za, "Gabú danglù pé hko kyo bâng é hkyi-kám pé gi, hkâ-i yhang yung ri myi-nhung!"✠ ga kâ tô ri.

¹⁶ Nghut kôlhang, Israelaq byu pé banshoq bang gi, gabú danglù lé hap yù kô é a nghut. Hkâsu mù gâ le, Esai-aq gi, "Yhumsing ê, ngamoq é danglù lé ó yuq wá lumjing é lú?"✠ ga taì ri. ¹⁷ Haù nghut mù luì, lumjing myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê. ¹⁸ Nghut kôlhang, ngò myi kó lé: yhangmoq gi, a wó gyô wú kô é nghut lhê lú? Yhangmoq gi, wó gyo gù za nghut lhê, haù eq rajung za,

"Yhangmoq é htê gi, myidàm htoq banshoq má jam bê nghut ri; yhangmoq é mungdang pé gi, mingkan htungchyun hkangmó má jé bê nghut ri."✠

gâ tô ri. ¹⁹ Ngò dum myi kó lé: Israelaq byu pé gi, a sê gyo kô é nghut lhê lú? Mosheq sâng-hi má taì é gi,

"Byù rahú lhang a nghut bang eq, Ngò, nungmoq lé manôn

nhâng râ;

sê gyo nyan a bo é amyù eq, Ngò, nungmoq lé wú nhikyo nhâng râ nghut lhê."✠

gâ ri. ²⁰ Hau htoq agó, Esai-aq a gyuq a wàm taì é gi,

"Ngo lé a ho é bang gi, Ngo lé myang hô bekô nghut ri;

Ngá hkyô lé a myi é bang lé, Ngò htoq shit bê nghut lhê."✠

gâ ri. ²¹ Nghut kôlhang, Israelaq byu pé eq séng luì, Yhang taì é gi,

"Ngò gi, jino a gyô é eq ngegáng-htu é byù myù lé, nyi wuì Ngá loq lham mù ji nyi lhê."✠

gâ ri.

11

Israelaq Byu Pé Lé A He-ngik Pyám

¹ Haù mù luì, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lú? Ratsuí lhang a nghut! Ngò yhang le, Israelaq byu myù nghut luì, Abraham é awut ashín eq Ben-yamin hú má é sù nghut lhê. ² Garai Gasang gi, Yhang te sê to gù nghut é, Yhâng é byu pé lé a he-ngik pyám é nghut lhê. Eliyaq eq séng é hkyô Chyúmdang má bo tô é lé, nungmoq a sé kó lú? Garai Gasang é hí má, yhang, Israelaq byu pé lé mara hùn é gi, ³ "Yhumsing ê, yhangmoq gi, Náng é myihtoì pé lé sat pyám kô

é eq Náng é hkungga gyap pé lé tu lhêng pyám akô nghut ri; ngò rayuq za myit gyó tô é nghut luì, ngo lé sat râ matú le yhangmoq ho nyi akô nghut ri."✠ gâ ri. ⁴ Garai Gasang gi, yhang lé, hkâsu ga tú taì é nghut lhê lú? Haù gi, "Balaq hpara é hí má hkyihput a htuq shí é byù nyhit hkying lé, Ngá é matú myhit to lhê."✠ gâ é nghut lhê. ⁵ Haù eq rajung za, ahkuì gi, jeju yanmai hkyin yù huì é bang za myit gyó tô

✠ 10:13 Yol 2:32 ✠ 10:15 Esai 52:7 ✠ 10:16 Esai 53:1 ✠ 10:18 Hkya-on 19:4 ✠ 10:19 Tarâ Pun 32:21 ✠ 10:20 Esai 65:1 ✠ 10:21 Esai 65:2 ✠ 11:3 1 Hko 19:10,14 ✠ 11:4 1 Hko 19:18

é nghut lhê. ⁶ Jeju yanmai nghut é nghut le gi, muzó é yanmai a nghut lo; muzó đông ru nghut le gi, jeju gi, jeju a nghut lo.

⁷ Haû nghut jáng, hkâsu lhú? Israelaq byu pé gyai ho shikut kôlhang, a wó kô é lé, hkyin htoq yû huí é bang kúm gi, wó bekô nghut ri. Góbang gi, myit lhoq htân byí é hui akô nghut ri; ⁸ haû gi,

"Garai Gasang gi, hkû-nyí jé shoq, yhangmoq lé nhikshi jit é woi-nyí lé le, a wó myang é myoqjí lé le, a wó gyô é nohkyap lé le, byí to bê nghut ri."*

ga kâ tô é eq rajung za nghut ri. ⁹ Dawiq taí é le,

"Yhangmoq é zangbó gi, yhangmoq é matú, dumzo eq lhai, myit leqbat jowò eq lató hpuq hkyô dut sháng gaq;

¹⁰ Yhangmoq myoq a wó myâng shoq, myoqjí lhoq chut pyám byí é hui sháng gaq;

yhangmoq é nunghkúng gi, ayang wòlai wun goí nhang é hui sháng gaq."*

gâ ri.

Túngbaù Pé Lé Hkyi Yu É Hkyô

¹¹ Ngò dum myi kó lé: Israelaq byu pé gi, a wó dum gè râ í leqbat byuq bekô lhú? Ratsuí lhang a nghut! Yhangmoq é tarâ lu lai hkyo é yanmai, yhangmoq lé manôn nhâng râ matú, hkyi yû hkyô gi, túngbaù pé chyáng jé byuq é nghut lhê. ¹² Nghut kôlhang, yhangmoq é tarâ lu lai hkyô gi, mingkân é matú wó sùt hkyô eq, yhangmoq sum pyám é hkyô gi, túngbaù pé é matú wó sùt hkyô dut é nghut jáng, yhangmoq é byíng jup hkyô gi, jé riyhang kô é wó sùt hkyô dut râ nghut ri-nhung!

¹³ Nungmoq túngbaù pé lé ngò tai nyi lhê: ngò gi, túngbaù pé é lagyo

nghut nyi é u má, ngá é hpungmù lé hpautap nyi lhê. ¹⁴ Haû gi, ngá é amyù pé lé manôn myit wó bô nhâng mù, yhangmoq ra-am lé wó hkyi yû râ lé myit myoqbyu é hkyô nghut lhê. ¹⁵ Hkâsu mù gâ le, yhangmoq lé he-ngik pyám é hkyô gi, mingkân é matú Garai eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui toq é đông dut bê a nghut lhi? ¹⁶ Hau htoq agó, sâng-hí ashi đông nhông byí é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haû amyit gi, chyoiyúng é nghut jáng, akoq pé le chyoiyúng é nghut lhê.

¹⁷ Haû tsanlun akoq pé* ra-am gi, lhoq hkyui pyám é hui luí, yosô tsanlun a-nyuq† nghut sù nàng gi, haû pé má xoq é hui mù, haû tsanlun amyit é xù lé bo shuq lom é nghut jáng, ¹⁸ akoq haû pé lé hkâwú tiq pyám kó. Nungmoq haû su kut é nghut jáng, nungmoq gi, haû amyit lé htuq é a nghut é za, amyit haû sheq nungmoq lé htuq é hkyô lé, nungmoq myit sé keq. ¹⁹ Nungmoq kúm gi, "Ngò, haû má xoq é hui râ matú sheq, akoq haû pé gi, lhoq hkyui pyám é huí é ru nghut lhê." ga taí râ nghut lhê. ²⁰ Haû su gi, nghut lhê. Nghut kôlhang, yhangmoq gi, a lumjíng é yanmai, lhoq hkyui pyám é hui kômù, nungmoq kúm gi, lumjíng é yanmai, wó ging títng nyi é nghut lhê. Hká gumrong nyi, gyuq kyum nyi keq. ²¹ Hkâsu mù gâ le, Garai Gasang gi, akoq akying pé lé a ha bûn é nghut le gi, nungmoq lé le ha bun râ a nghut.

²² Haû mù luí, Garai Gasâng é shogyo nhikmyin hkyô eq htân htân kut pyám é hkyô lé, myit wú keq: leqbat é bang lé htân htân kut pyám kôlhang, nungmoq gi, Yhâng

* 11:8 Tarâ Pun 29:4 * 11:10 Hkyo-on 69:22-23 * 11:17 Tsanlun akoq pé gi, Israelaq byu pé lé taí nau é nghut lhê. † 11:17 Yosô tsanlun a-nyuq gi, túngbaù pé lé taí nau é nghut lhê.

é shogyo nhikmyin hkyô má xoq nyi nyi é myháng, nungmoq lé gi, shogyo nhikmyin nyi rá nghut lhê. Haû a nghut jáng, nungmoq le, zân hpyit pyâm é hui rá nghut lhê. ²³ Yhangmoq gi, a lumjáng hkyô lé tô pyám kô é nghut jáng, dum xoq yu é hui kó rá nghut lhê; hkâsu mù gâ le, Garai Gasang gi, yhangmoq lé dum wó xoq yu é Sû nghut lhê. ²⁴ Haû mù gâ le, yosô tsanlun gâm akoq nghut gù nungmoq lé hpyit yû mù, htông a nghut é dông, hô é tsanlun agâm má xoq é nghut le gi, haû akoq akying pé nghut é yhangmoq gi, ó le ó é tsanlun-ngut akying má xoq yu é lé je riyhang hui rá nghut lhê ô!

Israelaq Byu Pé Hkyi Yu É Hui Râ Hkyô

²⁵ Haû mù, gumang wui é, nungmoq a nghutbun kó sháng gaq nghû, zau tô é hkyô shî lé, nungmoq a sé dut rá lé, ngò a ô nau é nghut lhê: haû gi, tungbaù pé wang lo é laké byíng é hkûn jé shoq, Israelaq byu pé ra-am gi, myit hloq htan é huí é hkyô nghut lhê. ²⁶ Haû htàng sheq, Israelaq amyû banshoq bang hkyi yu é hui rá nghut lhê. Haû gi, "Hkyi yû Sû gi, Zi-un bùm mai htoq lô rá nghut lhê;

Yhang gi, Garai lé nunghtáng tô pyâm é hkyô lé, Yakup é awut ashín mai huí sêng pyám byi rá nghut lhê.

²⁷ Ngò, yhangmoq é yubak mara lé huí sêng pyám byi jáng, haû gi, yhangmoq lé Ngò byi tô é Ngá é dangshikaq nghut lhê."[☆]

ga kâ tô é eq rajung za nghut ri.

²⁸ Haû gabú danglù eq séng luí ga jang, yhangmoq gi, nungmoq é matú gyé nghut akô; nghut kôhang, hkyin htoq yû hkyô eq séng luí ga jang, yhangmoq gi, myíng hú é íchyí îwa pé é yanmai, chyitdap é huí

akô nghut ri; ²⁹ hkâsu mù gâ le, Garai Gasâng é chyunghuq pé eq Yhang ji yu é hkyô lé gi, wó htaí lhik pyâm é a nghut. ³⁰ Nungmoq gi, Garai Gasâng é jìno a gyô é bang radàm dut wú kô é nghut kôhang, yhangmoq jìno a gyô é yanmai, ahkuí kúm, shogyo nhikmyin hkyô wó hkam yù bekô nghut é su, ³¹ ahkuí, yhangmoq gi, nungmoq wó hkam yu é Garai Gasâng é shogyo nhikmyin hkyo é yanmai, shogyo nhikmyin hkyô lé wó hkam yù kó sháng gaq ga, yhangmoq le, ahkuí, jìno a gyo bang dut bekô nghut ri. ³² Hkâsu mù gâ le, Garai Gasang gi, byù lhunglhang bang lé, shogyo nhikmyin hkyô wó tún shit shoq ga, lhunglhang bang lé, jìno a gyo hkyo é shúm dut nhang to bê nghut ri.

Hkya-on Kungtôn Dang

³³ Ô! Garai Gasâng é agùn agó é sùt nghut é, hpaqchyí byéng-yá eq nyan hpaqchyí gi, hkâ-í yhang nik ri-nhung!

Yhâng é tará jéyáng hkyô gi, ung sê jung a nghut nhung!

Yhang kut é hkyô pé gi, hkâ-í yhang ho htoq wuí jung nghut ri-nhung!

³⁴ "Haû Yhumsing é myit lé, ó yuq wá ung sê lhê lú? Yhâng é hpaqchyí byi sù gi, ó yuq wá dut wú é lú?"[☆]

gâ ri.

³⁵ "Garai Gasâng èq jeju dum tau byi rá dut shoq, ó yuq wá, Garai Gasang lé byi wú é lú?"[☆]

gâ ri.

³⁶ Hkâsu mù gâ le, joq mijoq gi, Yhâng chyáng mai nghut mù, Yhang dông mai nghut luí,

Yhâng é matú chyat nghut ri. Haû hpungwup shingkaq gi,

Yhâng chyáng ahtum abyuq ru joq nyí sháng gaq ô! Amen.

12

Dui É Hkungga Pé Dut Râ Hkyô

¹ Haú mù luí, gumang wuì ê, nungmoq é gungdu pé lé, Garai Gasang myit nguì ô nau é eq chyoiyung é, dui é hkungga đông hông byi keq nghû, Garai Gasâng é shogyo nhikmyin hkyô mai, ngò, nungmoq lé wum byi kat lhê. Haú gi, woi-nyí hkyô đông nungmoq noqkuq dojaú é hkyô nghut lhê. ² Míngkan shí lhûm é sâmlai đông a cháng lo é za, myit sik wó yú rá đông nungmoq é a-kyang lé htaí pyám byi nhâng keq. Haú hkûn sheq, Garai Gasâng é ge é, myit nguì é eq gumjup é ô nau hkyô lé, nungmoq wó chýâm, wó sê gàm hkoq yú kó rá nghut lhê.

³ Hkâsu mù gâ le, ngo lé byi tô é jeju yanmai, nungmoq yuq hkgangmó lé ngò taí kôlé: nungmoq gi, yhumsing gùng lé lai shoq a nghutbûn é za, ó le ó lé, Garai Gasâng èq lumjîng myit tsing gàm byi tô bê eq rajung za, myit yù gíng é í za myit yù keq. ⁴ Nga-nhúng yuq hkgangmó é gungdu ralhûm má gi, gungdu showui showang pé myo myo bo é nghut luí, gungdu showui showang haú pé banshoq gi, jai chûng jang a pung é nghut lhê. ⁵ Haú eq rajung za, myo myo nghut é nga-nhúng le, Hkrisduq má gungdu ralhûm za dut luí, yuq hkgangmó gi, rayuq eq rayuq gungsho sêng lhûm é bang chyat nghut lhê. ⁶ Nga-nhúng lé byi tô é jeju yanmai, nga-nhúng wó é chyunghuq gi, gotú tù nghut lhê. Byù rayuq é chyunghuq gi, myiqhtoi htoí é nghut jáng, yhâng é lumjîng hkyô eq rajung za htoi sháng gaq; ⁷ dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq; ⁸ myit wum byi é nghut jáng, myit wum byi sháng gaq; ra châ é bang lé garúm byi é nghut jáng, a ha bûn é za byi sháng gaq; shuí u

é nghut jáng, lumluq tung shuí u sháng gaq; shogyo nhikmyin hkyô shit é nghut jáng, gabú myit èq kut sháng gaq.

Chyitdap Myit

⁹ Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tuí nyi keq. ¹⁰ Rayuq eq rayuq, gumang chyitdap myit mai lhumzúí lhum keq. Rayuq eq rayuq, yhum-sing gùng htoq je hpautap lhum keq. ¹¹ Myit zuq hkyô má, hkâ-nhám le wum a lhoq shôm é za, nungmoq é woi-nyí hkyô má myit toq nyi mù, haú Yhumsing lé dojaú nyi keq. ¹² Myit myoqbyù hkyô má gabú keq; wuìhke hkyô má hkam jan keq; kyûdung hkyô má lhumzui keq. ¹³ Ra châ tô é Garai Gasâng é byu pé lé gàm byi keq. Bíng hkulum é lé rago kut keq.

¹⁴ Nungmoq lé zing-rí é bang lé shimân byi keq; shimân byi keq, hkâ-nhing kó. ¹⁵ Gabú é bang eq rahá bo gabú keq; yón é bang eq rahá bo yón keq. ¹⁶ Rayuq eq rayuq byin hpyé gohut huí nyi keq. A nghutbûn é za, nyi yap hkyô nyhûm bang eq zùm yap keq. Hpaqchyí bo é sù su hkâ-myit ngàm kó.

¹⁷ Ó yuq lé le, agè ashop é yanmai, agè ashop é đông lató hkâhpuq kó. Yuq hkgangmó é myoq hí má ge é lé kut rá rago myit keq. ¹⁸ Wó dut é nghut jáng, nungmoq wó dut é í, yuq hkgangmó eq nguingón shoq nyi keq. ¹⁹ Ngá é buinùm wuì ê, lató a hpuq é za, Garai Gasâng é nhikmo-yo hkyô lé sheq láng nyi keq. Hkâsu mù gâ le, "Ngò sheq lató hpuq rá sù nghut lhê; ngò lató hpuq rá."* ga, haú Yhumsing taí ri ga kâ tô ri. ²⁰ Haú mù,

"Nungmoq lé gye kut sù zòmut é nghut le gi, byi tso keq; yhang wuishit é nghut le gi, rajung jung byi huq keq.

Haú dông kut jáng, nàng, yhâng é ulhum htoq má gyúng é myi-gye bum to byi é nghut lhê."[✧] ga le kê tô ri. ²¹ Agê ashop é gi, nungmoq lé a ung pyám sháng gaq, ge é hkyo èq agê ashop é lé ung pyám keq.

13

Ahkáng Ayá Wó Bàng Ô Má Nyi Râ É Hkyô

¹ Yuq hkangmó gi, up é ahkáng ayá wó bàng é a-ô má nyi ra râ nghut lhê; hkâsu mù gâ le, Garai Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng èq byi tô é chyat nghut lhê. ² Hau é yanmai, up é ahkáng ayá lé gumlau toq é sũ gi, Garai Gasang byi tô é up é ahkáng ayá lé gumlau toq é sũ nghut ri; haũ su kut é bang gi, tarâ jéyáng é hui zo râ hkyô lé ho yù nyi é bang nghut akô. ³ Hkâsu mù gâ le, uphkan é bang gi, ge é hkyô kut bàng é matú gyuq nán hpo a dut é za, shut shaí hkyô kut bàng é matú sheq dut é ru nghut lhê. Up é ahkáng wó sũ lé gyuq é mai lut nau lhê a nghut lí? Haũ jáng, ge é hkyô kut aq, haũ hkûn, yhang, nang lé hkya-on râ nghut lhê. ⁴ Hkâsu mù gâ le, yhang gi, náng é matú ge é akyû kut byi râ nghut é, Garai Gasâng é dui-nhâng zoshâng nghut lhê. Nghut kôhang, nàng, shut shaí hkyô kut é nghut le gi, gyuq nán nyi aq; haĩ mù gâ le, yhang gi, shâm lé ajè wun tô é a nghut. Yhang gi, Garai Gasâng é dui-nhâng zoshâng nghut mù, shut shaí hkyô kut sũ lé dam byi râ matú nhikmo-yo Su é gunglik nghut lhê. ⁵ Haũ mù luĩ, dam byi râ lé chiq é yanmai za a nghut, yhumsing nhik bô râ é yanmai le, haũ up é ahkáng ayá wó bàng é a-ô má nyi ra dut lhê.

⁶ Nungmoq hkansê kat râ é gi, hau é yanmai le nghut lhê; hkâsu mù gâ le, haũ up é ahkáng ayá wó bang gi, Garai Gasâng é dui-nhâng zoshâng wui nghut lhê mù, uphkan é mù lé, ahkyíng byíng shoq wun waq nyi akô nghut ri. ⁷ Yuq hkangmó lé byi âng é eq rajung za byi keq; hkansê kat byi ang sũ lé gi, hkansê kat byi keq; kang kat byi ang sũ lé gi, kang kat byi keq; gyuq kyum ang sũ lé gi, gyuq kyum keq; hkungga ang sũ lé gi, hkungga keq.

Rayuq Eq Rayuq Chyitdap Lhum Râ Hkyô

⁸ Rayuq eq rayuq chyitdap lhũm é chyín mai lai luĩ, hai chyín le hkâdap lhũm kó; hkâsu mù gâ le, góyuq lé chyitdap é sũ gi, haũ jep é tarâ lé lhoq dik bê sũ nghut ri. ⁹ "Su-myi sulàng lú hkyô hkâkut," "Byù hkâsat," "Hkâhkau," "Hkâ-myooqnoq,"[✧] gâ tô é hkunmó pé eq gotú hkunmó haĩ nghut nghut, "Náng gũng lé nang chyitdap é su, náng é chyangnâm mã é bang le le chyitdap aq."[✧] gâ é tarâ má lo jup to bê nghut lhê. ¹⁰ Chyitdap myit gi, chyangnâm mã é byù lé a ge é haĩ le a kut é nghut lhê. Haũ mù luĩ, chyitdap myit gi, haũ jep é tarâ lé lhoq dik é hkyô nghut ri.

¹¹ Haũ mù, ahkuĩ lhê é ahkyíng yàm-yoq lé sê gyo luĩ, haũ hkyô lé kut keq. Nungmoq yhup mui é mai bũn gyíng râ ahkyíng jé bê; haĩ mù gâ le, nga-nhũng é hkyi yù hkyô gi, lumjíng hi é hkun lhê htoq má ahkuĩ je chyáng bê nghut ri. ¹² Haũ myín ahkyíng gi, lai byuq ló râ za nghut bê; nyi ahkyíng gi, jé lô berâ nghut lhê. Haũ mù luĩ, mauchut é muzó lé tô pyám mù, maubó é gyehking lé wut to sháng. ¹³ Ye lhaĩ é eq shuq wut é, ashop é dông gungsho zùm yap é eq shut é dông nyi zô lhũm nau é myit bo é, mabyoq

jishûm htoq é eq manon é pé a kut é za, nyí-káng lhê su, ge é a-kyang dông nyi yap sháng. ¹⁴ Hau htoq agó, Yhumsing Yesuq Hkrisduq lé, mebu su wut to keq; yubak gungsho ô nau é dông lhoq dik râ matú hkâ-myt kó.

14

Gumang Wuì Lé A Jéyáng Râ Hkyô

¹ Lumjín myit má wum nyhóm sù lé, myíng myo nhô zâ é hkyô pé lé a jéyáng byí é za hap yù keq. ² Byù rayuq é lumjín myit gi, jung hkanmó zô ri; nghut kôhang, lumjín myit nyhóm sù gotú rayuq gi, mhan-haq hpoqnoq za zô ri. ³ Jung hkanmó zo sù gi, a zo sù lé a ge wú tiq pyám; jung hkan jung mó a zo sù gi, zo sù lé mara a ge byi; hkâsu mù gâ le, Garai Gasang gi, yhang lé hap yu to bê nghut ri. ⁴ Náng gi, ó yuq wá nghut mù, góyuq é dui-nhâng zoshâng lé jéyáng lhê lú? Yhang, yap ging kôhang, leqbat kôhang, yhâng é yhumsing myit za nghut lhê. Yhang gi, wó yap ging râ nghut lhê; hkâsu mù gâ le, haù Yhumsing gi, yhang lé wó yap ging nhâng Sù nghut lhê.

⁵ Rayuq myit é gi, buinyi ra-nyí gi, gó nyi htoq je ge lhê gâ ri; dum rayuq myit é gi, nyi wuí rajung za nghut lhê gâ ri. Yuq hkanmó gi, yhumsing myit yu é lé a úng-âng nyi sháng gaq. ⁶ Buinyi ra-nyí lé, ahkyak lhê ga myit yù sù gi, haù Yhumsing é matú kut é nghut ri. Zô é sù gi, Garai Gasang lé jeju hkya-ôn é yanmai, haù Yhumsing lé bun lú zô nyi ri; a zo sù le, haù Yhumsing lé bun lú Garai Gasang lé jeju hkya-ôn nyi ri. ⁷ Hkâsu mù gâ le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shi é a nghut. ⁸ Nga-nhúng asak dui nyi le gi, haù Yhumsing

é matú dui é ru nghut lhê; nga-nhúng shi byuq le gi, haù Yhumsing é matú shi é ru nghut lhê. Haù mù, asak dui nyi kôhang, shi byuq kôhang, nga-nhúng gi, haù Yhumsing eq sêng é bang nghut lhê.

⁹ Haù su mù, Hkrisduq gi, shi byuq bang eq asak dui bâng é Yhumsing dut sháng gaq ga, shi hkám mù dum dui toq é nghut lhê. ¹⁰ Haù mù, náng gi, haù mù náng é gumang hpó lé jéyáng nyi lhê lú? Haù mù náng é gumang hpó lé wú tiq nyi lhê lú? Nga-nhúng lhunglhâng bang gi, Garai Gasang é tarâ jéyáng tanghuq hí má yap râ bang chyat nghut lhê. ¹¹ Hkâsu mù gâ le,

"Haù Yhumsing gi, 'Ngò rú dui nyi é eq rajung za, Ngá é hí má hkyihput hkanmó htuq râ nghut lhê;

Garai Gasang lé, shô hkanmó èq yín yù kó râ nghut lhê.' ga tái ri."^{*}

ga kê tô ri. ¹² Haù mù luí, nga-nhúng yuq hkanmó gi, yhumsing kut lai lo é hkyô lé, Garai Gasang chyáng shit ra râ nghut lhê.

¹³ Haù nghut mù, nga-nhúng gi, rayuq eq rayuq tarâ jéyáng lhum é hkyô lé tô pyám sháng. Ó yuq nghut kôhang, yhumsing é gumang é hkyowuí má, myit leqbat jowò eq htung htê jowò a to byi râ matú, myit sidiq keq. ¹⁴ Haù Yhumsing Yesuq má nghut nyi é sù ngò gi, haù jung zoshuq nghut kôhang, yhang baù yhang a sansêng a dut é hkyô lé, hkyak wó sé luí, jing nyi lhê. Nghut kôhang, ó yuq le, rajung jung lé a sansêng ga myit yu é nghut jáng, yhang é matú, zè haù gi, a sansêng é nghut lhê. ¹⁵ Náng zô é zoshuq yanmai, náng é gumang hpó myit a ngón é nghut le gi, náng, chyitdap myit mai sô nyi é sù a nghut lo. Hkrisduq shi hkám byi bê sù nghut é, náng é gumang hpó

* 14:11 Esai 45:23

lé, nàng zoshuq é dông mai hkâlhoq hten pyám. ¹⁶ Nàng, ge ri nghú myit yu é hkyô lé, agè ashop é dông hkâtaí pyám nhâng. ¹⁷ Hkâsu mù gà le, Garai Gasâng é mingdán gi, zo zo shuq shuq hkyô a nghut é za, dingmán hkyô, nguingón hkyô eq Chyoiyúng Woi-nyí má gabú é hkyô ru nghut lhê. ¹⁸ Haí mù gà le, shí hkyô dông mai Hkrisduq lé dojaú é sù gi, Garai Gasang ô nau é sù eq byu pé eq hkya-ôn é hui sù nghut ri.

¹⁹ Haú mù luí, nguingón hkyô má nyí rã eq, rayuq eq rayuq wum byí lhum rã hkyô lé, shikut nyí keq. ²⁰ Zoshuq é yanmai, Garai Gasâng é muzó lé hkâlhoq hten pyám. Zoshuq lhunglhang gi, sansêng é chyat nghut lhê; nghut kôlhang, góyuq lé myit leqbat nhang é jung lé zô é sù gi, shut é nghut lhê. ²¹ Tsibiyiq wing shuq é eq sho zô é hkyô má nghut kôlhang, gotú haí jung kut é nghut kôlhang, náng é gumang hpó lé myit leqbat nhang é nghut le gi, a kut le je ge lhê.

²² Haú mù, haú pé eq séng luí, nàng lumjúng é haí nghut kôle, nàng eq Garai Gasâng gyoro má za joq nyí sháng gaq. Yhumsing ge lhê gà é èq, yhumsing gùng yhumsing mara byí jang a joq é sù gi, hkungsô wó nyí ri. ²³ Nghut kôlhang, úng-âng é myit èq zô é nghut le gi, mara byí é hui ri, haí mù gà le, yhang zô é gi, lumjúng myit mai a nghut; lumjúng myit mai a kut é haí nghut kôlhang, mara nghut ri.

15

Góyuq Lé Myit Ngón Nhâng Rã Hkyô

¹ Lumjúng hkyô má wum-o bo é nga-nhúng gi, yhumsing myit ngón rã hkyô lé a ho é za, wum-o a bò bâng é wum nyhóm hkyô lé, hkam jan byí nyí rã dut lhê. ² Nga-nhúng yuq hkanmó gi, yhumsing é chyangnâm mã é su é ge é hkyô

dut rã matú, yhang wó kô myhang lò shoq, yhang lé lhoq ngón byí nyí sháng. ³ Hkâsu mù gà le, Hkrisduq lháng gi, Yhânggùng yhang lhoq ngón é a nghut; haú gi, "Nang lé rhoi bâng é dang gi, Ngá chyáng gyó ke bê nghut ri." ⁴ Hkâsu mù gà le, laí lò bê hkún kã tô é lhunglhang gi, nga-nhúng lé mhoq byi rã matú chyat kã tô é nghut lhê; haú gi, Chyúmdang mã é hkam jan hkyô eq myit wum byi hkyô dông mai, nga-nhúng myit myoqbyu hkyô wó rã matú nghut lhê.

⁵ Haú hkam jan hkyô eq myit wum byi hkyô lé byí é Garai Gasang gi, nungmoq, Hkrisduq Yesuq é htâng châng nyi é u lé, nungmoq yhangchang rading ralhum za dut é woi-nyí byi sháng gaq; ⁶ haú jáng sheq, nungmoq gi, i-myt rahkat eq nhut htê ralhum èq za, nga-nhúng é Yhumsing Yesuq Hkrisduq é Yhângwa nghut Sù, Garai Gasang lé, wó hkya-on kungtôn kó rã nghut lhê.

⁷ Haú mù luí, Hkrisduq gi, nungmoq lé hap yù bê é eq rajung za, Garai Gasâng é hpungwup shing kang lé lhoq htoq shit rã matú, nungmoq le, rayuq eq rayuq hap yu lhum keq. ⁸ Hkâsu mù gà le, ngò, nungmoq lé taí kôlé, haú mying hù é íchí íwã pé lé byí tô é danggidiq pé lé lhoq ging rã matú, Hkrisduq gi, Garai Gasâng é tengmán hkyo é malaí, Yudaq byu pé é dui-nhâng zoshâng dut bê nghut ri. ⁹ Haú mù, Garai Gasâng é shogyo nhikmyin hkyo é yanmai, haú tũgbaù pé, Garai Gasang lé wó hkya-on kungtôn kó rã nghut lhê. Haú hkyô gi,

"Haú mù luí, tũgbaù pé chyáng má, Nang lé, ngò hkya-on rã nghut lhê;

Náng é mying lé, ngò hkya-on mahkôn rã nghut lhê." ¹⁰

ga kâ tô é eq rajung za nghut ri.
10 Dum,

"Tûngbaù pé ê, Yhâng é byu pé eq
rahá gabú nyi keq."*

gâ tô ri. 11 Dum,

"Nungmoq tûngbaù pé lhunglhang
bang ê, haù Yhumsing lé
hkya-on keq, byù myû
lunglhang bang ê, Yhang
lé hkya-on mahkôn hkôn
keq."*

gâ tô ashí nghut ri. 12 Hau htoq agó,
Esai-aq taí é gi,

"Yese é Amyit gi, yuq htoq lô luí,
Yhang gi, byù myû chângjup
é ahtoq má up râ sù nghut
lhê;

tûngbaù pé gi, Yhang má myit my-
oqbyù kó râ nghut lhê."*

gâ ri.

13 Haù myit myoqbyù hkyô byí é
Garai Gasang gi, Yhang lé lumhkau
nyi é bang nungmoq lé, gabú hkyô
banshoq eq nguingón hkyô lhoq
pyíng byí sháng gaq; haù jáng sheq,
nungmoq gi, Chyoiyúng Woi-nyí é
wum-o a-tsâm èq, myit myoqbyù
hkyô wó byíng mui nyi kó râ nghut
lhê.

*A Gyuq A Wam É Za, Poluq Laiká
Ká É Hkyô*

14 Ngá é gumang wui ê, nung-
moq gi, ge é hkyô byíng jup é
bang, hpaqchyí má gumjup é bang,
rayuq eq rayuq mhoqshit lhúm é
má kûng é bang nghut é lé, ngá
gûng ngò yhang hkyak lumjíng lhê.

15 Ngò gi, nungmoq lé dum lhoq
pûn é dông, ahkyak é pé ra-am lé
a gyuq a wám kâ kat bê nghut lhê.

16 Hkâsu mù gâ le, tûngbaù pé gi,
Chyoiyúng Woi-nyí dông mai lhoq
sân-yúng é hui luí, Garai Gasâng èq
hap yù gíng é hkungga wó dut kó
sháng gaq ga, Garai Gasâng é gabú
danglù lé hkô râ hkyangjong é wò
dông, tûngbaù pé chyáng, Hkrisduq
Yesuq é hpungmû wùn sù dut râ

matú, Garai Gasang, ngo lé jeju byí
é yanmai nghut lhê.

17 Haù mù luí, ngò gi, Garai
Gasang lé dojaù é hkyô eq séng luí,
Hkrisduq Yesuq má nghutbùn nyi
lhê. 18 Ngò gi, ngò taí é eq zui
saí é muzó dông le, haù Woi-nyí
é a-tsam chûng mù, kumlhá pé eq
laklai kumlhá pé dông le, tûngbaù
pé lé, Garai Gasâng é jino gyo shoq
shuí ù é má, ngo lé Hkrisduq nhang
é muzó hkyô lé taí é mai lai luí, gotú
haí lé le wám taí é a nghut. 19 Haù
mù luí, ngò gi, Yerusalem wà mó
mai Ilurikhkam mau jé shoq é hkyô
awui ayám jam shoq, Hkrisduq é
gabú danglù lé hko kyo bê nghut
lhê. 20 Ngò hkâ-nhám le myit tuí
nyi é hkyô gi, góyuq hi tô é apûn
awang má dum a puq saí pyâm é za,
Hkrisduq lé a sé shi é jowò má gabú
danglù hko kyo râ hkyô nghut lhê.

21 Haù gi,

"Yhâng é hkyô lé, taí kyô é a hui shí
é bang, myàng kó râ nghut
luí,

a wó gyô wú é bang, sê gyo kó
râ nghut lhê."*

ga kâ tô é eq rajung za nghut
ri. 22 Haù mù luí, ngò, nung-
moq chyáng lé jé râ lé, anum num
hkyikyo luqlhum dut nyi é gi, muzó
hau é yanmai nghut lhê.

*Romaq Myuq Lé Ló Kum Râ Sôn
É Hkyô*

23 Nghut kôlhang, ahkuí gi, shí
mau pé má ngò zui saí râ jowò
a joq lo é nghut mù, nungmoq
lé myàng nau nyi é zanwut myo
myo nghut bê eq rajung za, 24 ngò,
Sipin ming shut ló é hkûn, nung-
moq chyáng wàng râ sôn tô lhê.
Ngò gi, lai ló é hkûn, nungmoq lé
lò sô kum mù, nungmoq eq rayoq
zo zùm yap ngón é htâng má sheq,
ngá é hkyowui matú, nungmoq
haù mai htuqbang kat râ lé, ngò
myoqbyu tô lhê. 25 Ahkuí, ngò

kúm gi, Yerusalem wà mó mâ é sâ-n-yúng bang lé dojaú râ matú, haú wâ shut e ló é hkyolat má nghut nyi lhê. ²⁶ Hkâsu mù gâ le, Makedoni eq Ahkaia mau mâ é bang gi, Yerusalem wà mó mâ é sâ-n-yúng bâng chyáng mâ é myùng bâng é matú, garúm chyunghuq hkyui tsing nau bùm bekô nghut ri. ²⁷ Yhangmoq gi, haú su kut nau bùm bekô nghut ri, gè gè ga jáng, haú gi, yhangmoq chyín dap tô é đông ru nghut lhê. Hkâsu mù gâ le, haú Yudaq byu pê é woi-nyí eq sêng é shimân jeju lé, tûngbaù pé bo hkam yù bê nghut le gi, yhangmoq é sutzê shimân jeju lé, Yudaq byu pé eq chôm chúng râ chyín dap tô é đông nghut lhê. ²⁸ Haú mù luí, ngò gi, muzó shí lhum ban kut mù, garúm chyunghuq shí lé, yhangmoq wó hap yù bê lé hkyak sê é htâng má, Sipin ming shut ló râ nghut mù, lai ló uchyang, nungmoq chyáng lé sô kum râ nghut lhê. ²⁹ Ngò gi, nungmoq chyáng lé jé é hkûn, nungmoq é matú Hkrisduq é shimân jeju byíng Jup é èq jé lé rá nghut é lé, ngò sé lhê.

³⁰ Gumang wui ê, ngá é matú Garai Gasâng chyáng kyûdung byí é đông, ngò wum kat yhang shikut é hkyô má nungmoq bo wàng lòm râ matú, nga-nhùng é Yhumsîng Yesuq Hkrisduq eq Woi-nyí é chyt-dap myit é yanmai, ngò, nungmoq lé wum tai tsuq kat lhê. ³¹ Yuda mau mâ é a lumjîng bâng chyáng mai, ngò hkyi yu é wó hui luí, Yerusalem wà mó má ngò wùn waq é muzó lé, haú mâ é sâ-n-yúng bang hap yù gíng é wó dut râ matú kyû bo dung byi keq. ³² Haú jáng sheq, ngò gi, Garai Gasang ô nau é đông mai, gabú myit èq nungmoq chyáng wó jé lé mù, nungmoq eq rahá wum-o wó yù râ nghut lhê. ³³ Haú nguínghóm hkyo é Garai Gasang gi, nungmoq banshoq bang eq rahá rú nyi nyi sháng gaq ô.

Amen.

16

Shi-kyám Dang

¹ Ngò gi, Kenhkrea noqkuq hpúng mâ é hpungtê, nga-nhùng é gu-nhá Hpobe lé, nungmoq chyáng shichyen byí kat lhê. ² Nungmoq gi, sâ-n-yúng bang kut gíng é eq rajung za, haú Yhumsîng má yhang lé hap yù luí, yhang râ tô é hkyô hai nghut kôle, yhang lé htuqbang keq. Hkâsu mù gâ le, yhang gi, byù myo myo lé le, ngo lé le, gyai yhang garúm lai bê sù nghut lhê.

³ Hkrisduq Yesuq má ngò eq mù wùn luzúm nhik nghut é, Priskila eq Akula lé bo shi-kyám byi keq. ⁴ Yhangnhik gi, ngá é asak é matú, yhangnhik é asak sum râ í yhang dut wú kô é nghut mù, ngò za a nghut, tûngbaù pé é noqkuq hpúng pé banshoq le, yhangnhik lé jeju bûn lhê.

⁵ Yhangnhik é yhûm má chôm hui zup é noqkuq hpúng lé le, bo shi-kyám byi keq.

Asia mau má, Hkrisduq lé sâng-hi lumjîng wang lo é, ngò chyt-dap é Epanetu lé bo shi-kyám byi keq.

⁶ Nungmoq é matú gyai yhang shikut wú bê sù nghut é Mariq lé bo shi-kyám byi keq.

⁷ Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyi shi le nyi bê sù nhik nghut akô.

⁸ Haú Yhumsîng má, ngò chyt-dap é sù, Ampliatu lé bo shi-kyám byi keq.

⁹ Hkrisduq má, ngamoq é mù zui luzúm nghut é Orban eq ngá é chyt-dap luzúm Staku lé, bo shi-kyám byi keq.

¹⁰ Hkrisduq má chyam é hui mù, wó lùm bê sù, Apele lé bo shi-kyám byi keq.

Aristobulu eq sêng é yhumbyù wuì lé bo shi-kyám byi keq.

¹¹ Ngá é buinùm Herudion lé bo shi-kyám byi keq.

Haù Yhumsing má nghut nyi bê bang, Narkiso é yhumbyù wuì lé bo shi-kyám byi keq.

¹² Haù Yhumsing má mù zui shikut é myiwê nhik, Truhpena eq Truhposa lé bo shi-kyám byi keq.

Haù Yhumsing má mù zui gyai yhang shikut é myiwe góyuq, ngá é chyitdap luzúm Persi lé bo shi-kyám byi keq.

¹³ Haù Yhumsing má hkyin yu é hui bê sù, Ruhpu lé le, ngá nu dông nghut wú bê nghut é Ruhpù é yhangnu lé le, bo shi-kyám byi keq.

¹⁴ Asunkritu, Hpelegon, Herme, Patroba, Herma eq yhangmoq eq rahá nyi é gumang wuì lé, bo shi-kyám byi keq.

¹⁵ Hpilologu, Yulia, Nerea eq yhang é nhammó eq, Olumpa, yhangmoq eq rahá nyi é sân-yúng bang banshoq lé, bo shi-kyám byi keq.

¹⁶ Rayuq eq rayuq, chyoiyúng bopuq é eq shi-kyám lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akô nghut ri.

¹⁷ Gumang wuì ê, nungmoq é lumjing hkyô má, nungmoq mhoq hkam yù bê nghut é mhoqshit hkyô eq shai lhum é, gam hkoq hkyô pé eq myit leqbat hkyô pé lhoq htoq é bang lé sidiq keq nghû, wum tai tsuq kat lhê. Yhangmoq lé koi pyám keq.

¹⁸ Hkâsu mù gâ le, haù sù é bang gi, nga-nhung é Yhumsing Hkrisduq lé dojaù é bang a nghut é za, yhumsing é wamdaù matú do-jaù é bang nghut akô. Yhangmoq gi, myit nú-nhâm é bang lé, dang ngón dang nguì dông mhaù zô akô

nghut ri. ¹⁹ Nungmoq, jino gyo kô é hkyô lé, yuq hkangmó wó gyo bê nghut ri; haù mù, ngò gi, nungmoq é matú gyai yhang gabú nyi lhê; nghut kôlhang, ge é hkyô eq séng luí gi, nungmoq hpaqchyí bò mù, agè ashop hkyô eq séng luí gi, nungmoq a bo lòm rà lé, ngò ô nau ri.

²⁰ Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám rà nghut lhê.

Nga-nhung é Yhumsing Yesuq é jeju gi, nungmoq eq rahá nghut nyi sháng gaq ô.

²¹ Ngá é mù zui luzúm Timohti gi, nungmoq lé shi-kyám dang sang kat ri; haù eq rajung za, ngá é buinùm wuì Luki, Yason eq Sospata pé le, shi-kyám dang sang kat akô nghut ri.

²² Laiká shí lé bo ká sù ngò Tertiu gi, haù Yhumsing má nungmoq lé shi-kyám kat lhê.

²³ Ngo lé le, noqkuq hpúng gón lé le, bíng hkulum é sù Ge-u gi, nungmoq lé shi-kyám dang sang kat ri.

Haù wa mã é ngùnzui sù Erastu eq nga-nhung é gumang hpó Kuartu gi, nungmoq lé shi-kyám dang sang kat akô. ²⁴ Nga-nhung é Yhumsing Yesuq Hkrisduq é jeju gi, nungmoq lhunglhang bang eq rahá nghut nyi sháng gaq. Amen.*

²⁵ Byù myù chângjup bang lumjing luí, Yhang é jino gyo sháng gaq ga, a-nham pyat mai haq tô é hui kôlhang, ²⁶ ahkuí, ahtum abyuq é Garai Gasang é hkunmó é yanmai, myiqhtoi laiká pé dông hpông shit é eq sé nhâng bê nghut é, sê gyo wuì é hkyo é shing-rán má cháng luí, ngá é gabú danglù eq Yesuq Hkrisduq é hkyô tai pyo é dông, nungmoq lé wó lhoq ging tít byí é, ²⁷ rayuq za é hpaqchyí bo sù Garai Gasang chyáng, Yesuq Hkrisduq dông mai, hpungwup

* 16:24 Chyúmding ra-am má chyúbun 24 shí a bo é nghut lhê.

shingkang gi, ahtum abyuq ru joq
nyî sháng gaq ô! Amen.

KORINHTUQ Pê Chyáng Hî Dàm Hun Kat é Laiká (1 Corinthians)

¹ Garai Gasang ô nau é eq rajung za, Hkrisduq Yesuq é lagyo dut rá matú ji yù huí é sù ngò Poluq eq, ngamoq é gumang hpó Sositeni gi, ² jowò hkangmó má nga-nhùng é Yhumsing Yesuq Hkrisduq é mying lé lãng é bang eq rahá, chyoiyung bang dut rá matú ji yù huí é eq Hkrisduq Yesuq má lhoq sân-yung é huí é bang nghut é, Korinhtuq myuq mâ é, Garai Gasang é noqkuq hpung lé, dang kyô kat lhê; Hkrisduq gi, ngamoq é eq yhangmoq é Yhumsing nghut lhê.

³ Nga-nhùng é Íwa Garai Gasang eq Yhumsing Yesuq Hkrisduq chyáng má é jeju eq nguingón hkyô gi, nungmoq chyáng ru joq nyi sháng gaq ô.

Hkrisduq É Yanmai Wó É Jeju

⁴ Garai Gasang jeju lé Hkrisduq Yesuq dông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê. ⁵ Hkâsu mù gâ le, nungmoq gi, Hkrisduq dông mai, nungmoq dang taí é hkyô banshoq eq nungmoq é sumpsé hpaqchyí banshoq má je lhoq gumjup é hui bekô nghut ri. ⁶ Haú gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê. ⁷ Haú mù, nga-nhùng é Yhumsing Yesuq Hkrisduq dum htoq shit rá lé, nungmoq gyai myoqbyu lãng nyi é u má, nungmoq gi, woi-nyi hkyô eq sêng é chyunghuq haí lé le langhpyut kó rá a nghut. ⁸ Nga-nhùng é Yhumsing Yesuq Hkrisduq é buinyi má, nungmoq lé mara hùn rá hkyô a bò shoq, Hkrisduq gi,

nungmoq lé, htáng shoq gingting nhang nyi rá nghut lhê. ⁹ Nga-nhùng é Yhumsing nghut é Yhang Zo Yesuq Hkrisduq eq rahá zùm yap rá matú, nungmoq lé ji yù bê sù Garai Gasang gi, lhumzui Sù nghut ri.

Noqkuq Hpung Má Gam Hkoq Lhâm É Hkyô

¹⁰ Gumang wui ê, nungmoq hkaú má gam hkoq lhâm é hkyô pé a joq é za, nungmoq é myit eq myit sôn wú é hkyô má gumjup shoq rad-ing ralhum za dut nyi sháng gaq, nungmoq lhunglhâng bang rayuq eq rayuq byin hpyé gohut huí nyi keq nghù, ngò, nungmoq lé, nga-nhùng é Yhumsing Yesuq Hkrisduq é mying mai dũng tôngbán kat lhê. ¹¹ Ngá é gumang wui ê, Hkloe é yhùm byù wui gi, nungmoq hkaú má mabyoq htoq hkyô joq é lé, ngo lé hkyang lo shit akò. ¹² Ngò haú su nghù taí é gi, nungmoq má é rayuq yuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga, dum rayuq gi, "Ngò gi, Kehpa htâng châng lhê." ga, dum góyuq gi, "Ngò gi, Hkrisduq htâng châng lhê." ga, taí bùm kô é yanmai nghut lhê.

¹³ Hkrisduq gi, gam hkoq é hui bê lhú? Ngò Poluq gi, nungmoq é matú tapzing má jén sat é hui bê lhú? Nungmoq gi, ngá é mying mai wui-myhup hkâm yù kô é lhú? ¹⁴ Ngò gi, Krispu eq Ge-u nhik mai lai luí, nungmoq ó yuq lé le wui-myhup a hkâm byí wú é yanmai, ¹⁵ nungmoq ó yuq le, ngá é mying mai wui-myhup hkâm yù bê nghù a wó taí é nghut mù, ngò, Garai lé jeju hkya-ôn lhê. ¹⁶ (Stehpana é yhumbyù wui lé le, ngò wui-myhup hkâm byí é nghut lhê, haú mai lai luí gotú ó lé hkâm byí záng ashí laq, ngò a myit bun lo nghut ri.) ¹⁷ Hkâsu mù gâ le, Hkrisduq, ngo lé nhang kat é gi, wui-myhup hkâm byi rá matú a nghut,

gabú danglù hko kyo rá matú sheq nhang kat é ru nghut lhê; nghut kôlhang, waxâng zô wui é hpaqchyí byéng-yá dang đông hko kyô é a nghut mù, Hkrisduq é tapzing é a-tsam gi, akôm a dut byuq é nghut lhê.

Garai É A-tsam Eq Hpaqchyí Byéng-yá Gi, Hkrisduq

¹⁸ Hkâsu mù gâ le, tapzing má Yesuq shî hkâm é hkyô eq sêng é danglù gi, htên byoq hui rá bâng é matú, danggang dut byuq ri; nghut kôlhang, hkyi yu é huí nyi bang nga-nhông é matú gi, Garai Gasâng é a-tsam nghut ri. ¹⁹ Hkâsu mù gâ le, Chyúmdang má kê tô é gi,

"Hpaqchyí bò bâng é hpaqchyí byéng-yá lé, Ngò lhoq htên pyám rá nghut lhê; nyan bò bâng é nyan lé, Ngò, ajè dut pyám nhâng rá nghut lhê."✧

ga ri.

²⁰ Hpaqchyí byéng-yá bò bang gi, hkâmá lhú? Hpaqchyí laiká kung bang gi, hkâmá lhú? Ipyat shi é dang tái kung bang gi, hkâmá lhú? Garai Gasang gi, mingkân é hpaqchyí byéng-yá lé lhoq ngok pyám bê a nghut lhú? ²¹ Hkâsu mù gâ le, Garai Gasâng é hpaqchyí byéng-yá mai ga jang, mingkan zo wui gi, yhumsing é hpaqchyí byéng-yá đông mai Garai Gasang lé a wó sé kê é yanmai, danggang gâ pyám byi kê é mungdang lé hko kyô é đông lumjing bang lé hkyi yù rá matú, Garai Gasang myit hpyit é nghut lhê. ²² Yudaq byu pé gi, limik kumlhá pé lé dúng akô; Grik byu pé gi, hpaqchyí byéng-yá lé ho akô nghut ri. ²³ Nghut kôlhang, ng-amoq gi, tapzing má jén sat huí é Hkrisduq é hkyô lé hko kyô lhê. Haû gi, Yudaq byu pé é matú myit leqbat jowô eq tưngbaù pé é matú danggang dut byuq ri. ²⁴ Nghut kôlhang, Garai Gasâng eq ji yù huí

é Yudaq byu pé eq Grik byu pé é matú, Hkrisduq gi, Garai Gasâng é a-tsam eq Garai Gasâng é hpaqchyí byéng-yá nghut ri. ²⁵ Hkâsu mù gâ le, Garai Gasâng é ngok hkyô gâ é lháng gi, byu é hpaqchyí byéng-yá htoq má je gyaú ri; Garai Gasâng é wum nyhóm hkyô gâ é lháng gi, byu é wum-o htoq má je gyaú ri.

²⁶ Gumang wui ê, Garai Gasang, nungmoq lé ji yu é hkùn, nungmoq hkâsu dut nyi é hkyô lé myit wú keq. Waxâng zô wui é nyi yap a-tsáng đông hpaqchyí byéng-yá bo é bang, ahkáng ayá wó é bang, za-ugun suwún amyú mâ é bang a myô é nghut lhê. ²⁷ Nghut kôlhang, Garai Gasang gi, hpaqchyí byéng-yá bò bang lé hoq lhoq hpu rá matú, mingkan mâ é ngok bang gâ é lé hkyin yu é nghut lhê; Garai Gasang gi, wum bò bang lé hoq lhoq hpu rá matú, mingkan mâ é wum nyhóm bang gâ é lé hkyin yu é nghut lhê.

²⁸ Yhang gi, mingkân eq ahkyak tô é lé lhoq htên pyám rá matú, haí a nghut é lé le, mingkan mâ é aróng a bo é eq wú tiq pyám huí é lé le, hkyin yu é nghut lhê. ²⁹ Haû gi, ó yuq le, Yhâng é hí má a ge nghut-bun rá matú nghut ri. ³⁰ Garai Gasâng é yanmai, nungmoq gi, Hkrisduq Yesuq má nghut nyi bekô nghut ri; Hkrisduq gi, nga-nhông é matú, Garai Gasâng chyáng mâ é hpaqchyí byéng-yá dut bê nghut ri. Haû gi, nga-nhông é dingmán hkyô, chyoiyúng hkyô eq hkyi yù hkyô nghut ri. ³¹ Haû mù luí, "Gumrong é sù gi, haû Yhumsing má gumrông sháng gaq."✧ ga kê tô é eq rajung za nghut ri.

2

Woi-nyí Mai Lo É Garai Gasâng É Hpaqchyí Byéng-yá

¹ Gumang wui ê, ngò gi, Garai Gasang eq sêng é saksé hkyô lé nungmoq chyáng tái pyô rá matú

jé lé é hkún, dang tái kûng é eq hpaqchyî byéng-yá mó bo é đông lé é a nghut. ² Hkâsu mù gâ le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat huî é hkyô mai lai lui, jung hkgangmó lé tô-myhî pyám râ nghú myit hpyit yû bê nghut lhê. ³ Ngò gi, nungmoq chyáng jé lé é hkún, wum nyhôm é eq gyai yhang gyuq nán é nghut lhê. ⁴ Ngá é danglù eq ngò hko kyô é hkyô gi, hpaqchyî bo é eq mhuî yu é dang pé đông a nghut é za, Woi-nyí é a-tsâm eq nungmoq lé shit é đông ru nghut mù, ⁵ nungmoq é lumjîng myit gi, byù é hpaqchyî byéng-yá má a nghut é za, Garai Gasâng é hpungwup a-tsam má nghut nyi lhê.

⁶ Nghut kôlhâng, ngamoq gi, myit ðing bê bang lé hpaqchyî byéng-yá đông nyo lhê; shí pyat lhê é hpaqchyî byéng-yá eq htên byoq nyi huî é shí pyat mâ é záu wui é hpaqchyî byéng-yá đông kúm a nghut. ⁷ Ngamoq tái é gi, haq tô é eq, ahkyíng nghu é lhang a joq shi mai nga-nhung é hpungwup shingkâng é matú Garai Gasang tô to byi é hpaqchyî byéng-yá nghut é, Garai Gasâng é záu tô é hpaqchyî byéng-yá lé tái é ru nghut lhê. ⁸ Shí pyat lhê é zau wui gi, hpaqchyî byéng-yá haù lé rayuq lhang a sê gyo kó nghut ri; yhangmoq sê gyo kô é ru nghut le gi, hpungwup shingkang bo é Yhumsîng lé tapzîng má jén sat pyám kó râ a nghut. ⁹ Nghut kôlhâng, Chyúmdang má,

"Ó yuq eq le a myang wú, ó yuq eq le a wó gyô wú, ó yuq eq le a bûn myit wú é hkyô lé, Garai Gasang gi, Yhang lé chyitdap bâng é matú lajang to byi bê nghut ri."[☆]

ga kê tô é eq rajung za nghut ri. ¹⁰ Nghut kôlhâng, Garai Gasang gi,

haù hkyô lé, Yhâng é Woi-nyí đông nga-nhung lé hpông shit bê nghut ri.

Woi-nyí haù gi, jung hkgangmó lé ho gôn wú é nghut lui, Garai Gasâng é záu tô é hkyô lé lhang ho gôn wú é sù nghut ri. ¹¹ Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lhê lhu? Haù eq rajung za, Garai Gasâng é Woi-nyí za a nghut jáng, Garai Gasang myit é hkyô lé, ó yuq le wó sê é a nghut. ¹² Nga-nhung gi, mingkân é woi-nyí lé hap yu tô é a nghut é za, Garai Gasâng eq nga-nhung lé byi to bê jeju lé, ngamoq wó sê gyo râ matú, Garai Gasâng chyáng mâ é Woi-nyí lé sheq hap yu tô é ru nghut lhê. ¹³ Haù mù lui, ngamoq gi, waxâng zô wui é hpaqchyî byéng-yá eq mhoq byi é dang đông tái é a nghut, Garaí é Woi-nyí eq mhoq byi é dang đông tái é sheq ru nghut mù, woi-nyí eq sêng é tengmán hkyô lé woi-nyí eq sêng é dang đông tái sân kyô é nghut lhê. ¹⁴ Haù Woi-nyí lé a wó é sù gi, Garai Gasâng é Woi-nyí mai lo é hkyô pé lé a hap yu é nghut lhê; haì mù gâ le, haù pé gi, yhâng é matú ngok é hkyô nghut lui, woi-nyí hkyô đông mai haù hkyô lé a wú é yanmai, yhang gi, haù pé lé a wó sê gyo nghut ri. ¹⁵ Woi-nyí eq sêng é byù gi, lhunglhang lé wó jéyáng lhê, nghut kôlhâng, yhang lé kúm gi, ó yuq eq le wó jéyáng é a nghut. ¹⁶ Chyúmdang má,

"Hkâsu mù gâ le, ó yuq wá, haù Yhumsing é myit lé sé mù, Yhang lé wó mhoqshit wú é lhu?"[☆]

ga kê tô ri. Nghut kôlhâng, nga-nhung gi, Hkrisduq é myit lé wó é bang nghut lhê.

3

Noqkuq Hpúng Má Gam Hkoq Lhúm É Hkyô

¹ Gumang wuì ê, hí hkûn, ngò gi, nungmoq lé, Woi-nyí eq sêng é bang lé dông wó taí é a nghut; mingkan eq sêng é bang dông nghut kômù, Hkrisduq má zonú su dut bang lé dông sheq taí wú é nghut lhê. ² Nungmoq gi, zoshuq apat lé a wó zo shi kó nghut é yanmai, ngò gi, nungmoq lé naú byi huq é nghut lhê.* Ahkuí lhang, nungmoq gi, zoshuq apat lé a wó zo shi kó nghut ri. ³ Nungmoq gi, mingkan eq sêng é bang ru nghut nyi ashí kó nghut ri. Hkâsu mù gâ le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó luq? Mingkan zo wuí su nyi yap bum lhê a nghut kó luq? ⁴ Rayuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga taí nyi bum kô é nghut jáng, nungmoq gi, mingkan zo wuí nghut nyi bum lhê a nghut kó luq?

⁵ Apolo gi, ó wá nghut lhê? Poluq gi, ó wá nghut lhê? Nga-nhik gi, Garaí é dui-nhâng zoshâng za nghut luí, ó le ó lé, haú Yhumsing èq hun tô é muzó eq rajung za wùn waq é nghut luí, nungmoq gi, ngá-nhik dông mai wó lumjáng kô é ru nghut lhê. ⁶ Ngò gi, gabú danglù amyui lé hô kat, Apolo gi, wuí hpyun byi, nghut kôlháng, yuq kô lò nhang é gi, Garaí Gasang za ru nghut lhê. ⁷ Haú mù, amyui hô kat sù eq wuí hpyun byi sù gi, ahkyak mó a nghut, yuq kô lò nhang é Garaí Gasang za sheq ahkyak ru nghut lhê. ⁸ Amyui hô kat sù eq wuí hpyun byi su nhik myoqbyu tô é hkyô gi, rajung za nghut ri; nghut kôlháng, yhumsing shikut é eq rajung za, ó le ô é shigyaú chyunghuq wó yú kó rá nghut lhê. ⁹ Hkâsu mù gâ le, ngamoq gi, Garaí Gasang é mù zui luzúm wuí nghut lhê; nung-

moq gi, Garaí Gasang é yò, Garaí Gasang é yhùm nghut nyi akò.

¹⁰ Garaí Gasang, ngo lé byí to bê jeju eq rajung za, yhùm saí kung sù rayuq dông, ngò gi, yhùm apùn awang hí to bê nghut lhê; gotú byù gi, hau é ahtoq má saí toq jat nyi é nghut lhê. Nghut kôlháng, yuq hkanmó gi, yhumsing saí é má rago sidiq rá lhê. ¹¹ Hkâsu mù gâ le, hí to gù nghut é, Yesuq Hkrisduq nghu é yhùm apùn awang mai lai luí, ó yuq le, gotú yhùm apùn awang lé wó saí é a nghut. ¹² Yhùm apùn awang hau é ahtoq má, hîng, ngùn, hpauđap luqgok pé, sik, mhan, hkowá pé lé chûng mù saí jat kô é nghut jáng, ¹³ yuq hkanmó é muzó hkâsu nghut é hkyô lé lhoq htoq shit é hui rá nghut lhê. Haú mù luí gâ le, haú Yesuq é Buinyi gi, haú lé byu-myàng nhâng mù, haú buinyi lé gi, myí èq lhoq htoq shit rá nghut lhê. Haú myi gi, yuq hkanmó saí é muzó hkasú é nghut é lé chyâm rá nghut lhê. ¹⁴ Rayuq yuq saí é yhùm gi, ru gîng nyi é nghut jáng, haú yuq gi, yhang é shigyaú chyunghuq wó yú rá nghut lhê. ¹⁵ Nghut kôlháng, yhùm haú nyé gyó byuq é nghut jáng, yhang gi, yhùm sùm byuq é hui zo rá nghut lhê; yhang gi, asak lut kôlháng, myishâm mai wó lut é byù su dut rá nghut lhê.

¹⁶ Nungmoq gi, Garaí Gasang é noqkuq yhùm nghut luí, Garaí Gasang é Woi-nyí gi, nungmoq má lúng nyí bê hkyô lé a sé kó lú?

¹⁷ Rayuq yuq, Garaí Gasang é noqkuq yhùm lé lhoq htên é nghut jáng, Garaí Gasang gi, haú yuq lé lhoq htên pyám rá nghut lhê. Hkâsu mù gâ le, Garaí Gasang é noqkuq yhùm gi, chyoiyúng lhê; nungmoq gi, noqkuq yhùm haú nghut akò.

¹⁸ Nungmoq gi, yhumsing gùng yhumsing hkâlhoq nghoq kó. Nung-

* 3:2 Nungmoq lé naú byi huq é, gâ é gi, lui é hkyô pé lé hí mhoq byi é lé gâ lhê.

moq mâ é rayuq yuq, shí ipyat mâ é byù nyì a-tsáng đông hpaqchyì byéng-yá bò sú ga myit é nghut jáng, hpaqchyì byéng-yá akying bò sú wó dut sháng gaq, yhang gi, a-ngok sú dut râ lê. ¹⁹ Hkâsu mù gâ le, mingkan shí mâ é hpaqchyì byéng-yá gi, Garai Gasâng é hí má ngok é hkyô nghut ri. Haù gi, "Garai Gasang gi, hpaqchyì byéng-yá bò bang lé, yhangmoq é hpaqchyì má yhang myí to nhang ri."* ga kê tô é eq rajung za nghut ri. ²⁰ Hau htoq agó, "Haù Yhumsing gi, hpaqchyì byéng-yá bò bang myit é hkyô pé akôm nghut é lé sê lê."* ga le kê tô ri. ²¹ Haù mù luí, ó yuq le, byù eq sêng é hkyô má gyáng é dang a taí kó sháng gaq! Lhunglhang gi, nungmoq é chyat nghut lê. ²² Poluq le, Apolo le, Kehpa le, mingkan le, dui nyi é hkyô le, shí é hkyô le, ahkuí lê hkyô eq htàngnùng mâ é hkyô le, banshoq gi, nungmoq é chyat nghut ri. ²³ Nungmoq gi, Hkrisduq é nghut akô; Hkrisduq gi, Garai Gasâng é nghut ri.

4

Hkrisduq É Lagyô Pé

¹ Haù mù luí, byu pé gi, ngamoq lé, Hkrisduq é dui-nhâng zoshâng wui đông eq Garai Gasâng é zau tô é hkyô pé lé taí pyô râ matú ap byí tô é hui bang đông sôn yù râ lê. ² Haù đông nghut jáng, ap byí tô é hui bang gi, yhumsing lhumzui hkyô lé saksé shit râ dut lê. ³ Nungmoq eq nghut nghut, waxâng zô wui é tarâ rùng mai nghut nghut, ngo lé jéyáng kô le, ngá é matú atiq azo za nghut lê; gè gè ga jáng, ngá gûng ngò lhang a jéyáng é nghut lê. ⁴ Haù mù gâ le, ngá gûng ngò mara a bò bûn é nghut kôlhang, haù gi, ngo lé wó lhoq sân-yúng byí é a nghut. Ngo lé

jeýáng é sú gi, haù Yhumsing nghut lê. ⁵ Haù mù, masat tô é ahkying a jé shimá haì lé le a jéyáng é za, haù Yhumsing jé lé shoq, láng nyí keq. Yhang gi, mauchut hkaù má haq tô é pé lé byu-myàng nhâng mù, byu pé é myit nhiklhum má lũng é hkyô lé lhoq htoq shit râ nghut lê. Haù hkûn, yuq hkangmó gi, ó le ó wó gíng é hkya-ôn hkyô lé, Garai Gasâng chyáng mai wó yù râ nghut lê.

⁶ Gumang wui ê, ngò gi, "Kê tô é gû mai hkâlai." gâ é sanghkyâng é lichyúm lé, ngamoq chyáng mai nungmoq wó mhoq yù sháng gaq nghú, nungmoq é akyu é matú, ngò eq Apolo má haù pé lé yù mù dangtú kut é nghut lê. Haù hkûn, nungmoq gi, nghutbûn é đông, rayuq lé gi, wú ko, góyuq lé gi, wú shóm, a kut kó râ nghut lê.

⁷ Ó yuq wá, nang lé, góyuq eq shaí shoq kut lê lúhú? Nang hap yu é a nghut le gi, wó râ lúhú? Nang, hap yu é nghut le gi, a hap yu é đông haì mù nghutbûn nyi lê lúhú?

⁸ Nungmoq gi, râ é lhunglhang gumjup bang nghut bekô nhung! Nungmoq gi, wó bang dut gù nghut bekô nhung! Ngamoq a lom é za, nungmoq gi, hkohkam pé dut bekô nhung! Ngamoq pé le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô râ lé, ngò hkâ-í yhang ô nau nyi lê ô! ⁹ Nghut kôlhang, sat râ matú doqdan hui é shúm byù pé lé su, Garai Gasang gi, lagyô pé nghut é ngamoq lé de de kut htoq shit bê nghú, ngò wó myit ri. Ngamoq gi, nyì mi-nyì, joq mijoq, maumang lagyô pé eq waxâng zô wui é hí má, wú kûn jung đông dut nhang é hui nyi gù bê nghut lê. ¹⁰ Ngamoq gi, Hkrisduq é yanmai ngok é bang đông sôn yu é hui kôlhang, nungmoq kùm gi, Hkrisduq má hpaqchyì gyaí bo é

bang đông dut bekô nhung! Ng-amoq gi, wum nyhôm é bang đông sôn yu é hui kôlhang, nungmoq kúm gi, wúm bo é bang đông dut bekô nhung! Nungmoq gi, hkunggâ é huí akô; ngamoq kúm gi, hkunggâ é a hui nhung! ¹¹ Shí hkyíng shí u jé shoq, ngamoq gi, zòmut wuìshit huí é, mebu ajeq amyhá dut huí é, nhuq bat huí é, yhumsing é nyì jowò a wó é bang nghut nyì lhê. ¹² Ngamoq gi, yhumsing loq èq yhang mù zui wum kat nyì lhê. Ngamoq gi, nhing pyâm é hui jáng, shimân byi, zing-rî é hui jáng, jân pyám kut lhê. ¹³ Ngamoq gi, lumù gansang é hui jáng, dang ngón dang nguí tú nyo lhê. Ngamoq gi, ahkuí jé shoq, myidàm htoq mã é hpo-qkyuq hpoqpyâng eq mingkân é buzaq pé đông sôn yu é huí nyì lhê.

¹⁴ Ngò gi, nungmoq lé hoq lhoq hpu rá matú háu pé lé kâ é a nghut, ngá é chyitdap zo wuí lé đông lhoq pùn kying rá matú ru nghut lhê. ¹⁵ Nungmoq gi, Hkrisduq má mho-qshit bang ra mun wó kô é nghut kôlhang, íwâ pé myo shoq wó kô é a nghut; hkâsu mù gâ lé, ngò gi, háu gabú danglù đông mai, Hkris-duq Yesuq má nungmoq é íwa dut é nghut lhê. ¹⁶ Háu mù luí, ngò kut é su cháng keq nghù, ngò, nungmoq lé lung kat lhê. ¹⁷ Háu é yanmai, ngò gi, háu Yhumsing má lhumzui sù nghut é, ngò chyitdap é ngá zo đông nghut sù Timohti lé, nungmoq chyáng nhang kat é nghut lhê. Yhang gi, Hkrisduq Yesuq mã é ngá é asak ùi hkyô lé, jowò hkangmó mã é noqkuq hpúng hkangmó lé ngò mhoq byí é eq rajung za, nungmoq lé lhoq pun byi rá nghut lhê.

¹⁸ Nungmoq mã é ra-am gi, nungmoq chyáng ngò a dum jé lé rá su ngam pyám kômù, nghutbùn byuq bekô nghut ri. ¹⁹ Nghut kôlhang, háu Yhumsing gyô é nghut jáng,

ngò gi, nungmoq chyáng hân za jé lé rá nghut lhê; háu hkûn, ngò gi, nghutbùn é byù háu bang hái taí é hkyô lé za a nghut, yhangmoq hái a-tsam wó é hkyô lé le gôn htoq rá nghut lhê. ²⁰ Hkâsu mù gâ le, Garai Gasâng é mingdán gi, taí é dang má bo é a nghut, a-tsam má sheq ru nghut lhê. ²¹ Nungmoq hká đông ô nau akô lúh? Ngò gi, nungmoq chyáng, nuichùm hkat èq, a nghut jáng, chyitdap é eq nú-nhâm é myit mai lé lô ra rá lúh?

5

Ashop É Đông Gungsho Zùm Yap É Hkyô Kut É Sù Lé Lhoq Htoq Pyám Râ Hkyô

¹ Nungmoq chyáng, ashop é đông gungsho zùm yap é hkyô joq é lé, hkyak taí hù lò bekô; háu gi, a lumjing băng chyáng lhang a dut wú é hkyô nghut é, yuqgè rayuq gi, yhângwâ é myiwe eq nyì zô lhum nyì é hkyô nghut ri. ² Nghut kôle, nungmoq gi, nghutbùn nyì bum akô nhung! Háu đông a nghut é za, nungmoq gi, yón é myit tûn shit mù, háu su kut é byù lé, nungmoq é hpúng mai lhoq htoq pyâm le, a gè kó lúh? ³ Ngò gi, ngá gungdu, nungmoq eq rahá a nyì to kôlhang, ngá é i-myt gi, nungmoq eq rahá nghut nyì luí, gungdu jé nyì tô é đông mai, háu hkyô kut é sù lé jéyáng doqdan gù nghut lhê. ⁴ Nungmoq gi, nga-nhung é Yhumsing Yesuq é mying mai zup zing mù, ngá é i-myt gi, nungmoq eq rahá nghut nyì luí, nga-nhung é Yhumsing Yesuq é a-tsam le, nungmoq eq rahá nghut nyì é hkûn, ⁵ byù háu yuq lé, Tsadán é loq má ap byí pyám keq.* Háu jáng, Yhumsing é buinyì má, yhâng é woi-nyí gi, hkyi yu é hui rá matú, yhâng é yubak gungsho gi, lhoq htên pyâm é hui rá nghut lhê.

* 5:5 Tsadán é loq má ap byí pyám keq gâ é gi, hpúng byù wui eq a zùm yap nhâng lo rá lé taí é nghut lhê.

6 Nungmoq é nghutbun hkyô gi, ge é a nghut. Mún† ra tsuí zo gi, muk long gón lé wó lhoq daú nhang é lé, nungmoq a sé kó lúh? 7 Nungmoq gi, múnchi a bo é bang nghut nyí kô é eq rajung za, múnchi a bo é muk htung asik su wó dut kô sháng gaq, múnchi axau lé lhuí pyám keq. Hkâsu mù gâ le, nga-nhông é Lhoqlhai Poî sauzo, Hkris-duq gi, hkungga nhong é hui bê nghut lhê. 8 Haú mù luí, nga-nhông gi, agè agaú hkyô eq hpuzo nhâng hkyô nghut é múnchi axau bo é đông a nghut é za, lhumzui hkyô eq tengmán hkyo é muk nghut é, múnchi a bo é muk èq, Poî haú lé kut nyí sháng.

9 Ashop é đông gungsho zùm yap é bang eq hkâzùm kó nghû, ngò, nungmoq lé, ngá é laiká má kâ kat byi bê nghut lhê. 10 Nghut kôlhâng, mینگkan shí eq sêng é, ashop é đông gungsho zùm yap é bang, myoqnoq é bang, mhaú zô é bang eq hparà noq é bang lé hkâzùm yap kó nghû é gi, a nghut. Haú su ru nghut le gi, mینگkan htoq shí mai nungmoq htoq ló byuq ra kô râ nghut lhê. 11 Nghut kôlhâng, yhânggùng yhang gi, gumang ga kôle, ashop é đông gungsho zùm yap é, myoqnoq é, hparà noq é, lumù gansang é, î shuq wut é, mhaú zô é sù ó yuq eq le a ge zùm yap kô râ nghut lhê nghû, ahkuí, ngò, nungmoq lé kâ kat nau é nghut lhê. Haú sù é byù eq gi, rahá lhang hkâzo kó.

12 Haú noqkuq hpúng shinggan mâ é bang lé jéyáng râ gi, ngò eq haí sêng lhê lúh? Nghut kôlhâng, hpúng ahkaú mâ é bang lé nungmoq jéyáng râ dut lhê. 13 Hpúng shinggan mâ é bang lé gi, Garai Gasang jéyáng râ nghut lhê. Nghut kôlhâng, "Haú agè agaú é sù lé, nungmoq chyáng mai lhoq htoq

pyám keq."☆ gâ tô ri.

6

Lumjینگ Bâng Hkaú Má Jéyáng Lhùm É Hkyô

1 Nungmoq mâ é rayuq yuq gi, gumang góyuq eq dang-rhâng lhùm tô é nghut jáng, haú hkyô lé jéyáng nhâng râ matú, haú sân-yúng bâng é hí má taí râ malaí, Garai a wó bâng é hí má wám taí râ lúh? 2 Haú sân-yúng bang gi, mینگkan lé jéyáng râ nghut é hkyô lé, nungmoq a sé kó lúh? Nungmoq gi, mینگkan lé jéyáng râ bang nghut kôle nhing, tiq é mù pé lé wó jéyáng é bang a nghut kó lúh? 3 Nga-nhông gi, maumâng pé lé jéyáng râ nghut é hkyô lé, nungmoq a sé kó lúh? Haú mù, shí pyat mâ é hkyô pé lé, gè gè yhang wó jéyáng kô râ nghut lhê ô! 4 Haú mù luí, nungmoq gi, dang-rhâng lhùm é mù pé joq é nghut jáng, noqkuq hpúng má ahkyak a nghut é bang lé tará agyí kut nhâng kô râ lúh? 5 Ngò, haú su nghû taí é gi, nungmoq lé hoq hpu nhâng râ matú nghut lhê. Lumjینگ bâng chyáng dang-rhâng lhùm é hkyô lé wó jéyáng râ hpaqchyí luq shoq bo é byù, nungmoq chyáng rayuq lhang a nyi dut kô râ lúh? 6 Nghut kôlhâng, nungmoq gi, gumang yhangchang rayuq eq rayuq, a lumjینگ bâng é hí má lhang rúng shok lhum akò nhung!

7 Nungmoq hkaú má mù jéyáng lhùm é hkyô joq é nghut jáng, nungmoq gi, sum lugù nghut bê. Góyuq èq shut le lhang rú ge lhê a nghut kó lúh? Mhaú zô é hui le lhang rú gè lhê a nghut kó lúh? 8 Nghut kôle, nungmoq yhang gi, mhaú zo kô é eq shut kô é nghut luí, haú gi, nungmoq é gumang wui lé kut é nghut lhê.

† 5:6 Mún gâ é gi, yubak mara lé taí nau é nghut lhê. Lhoqlhai Poî jé jáng, Israelaq byu pé gi, yhangmoq wó é múnchi banshoq lé lhuí pyám mù, múnchi a bo é muk sai kô é nghut lhê. ☆ 5:13 Tará Pun 17:7

⁹ Agè agau é bang gi, Garai Gasâng é mingdán mã é shimân jeju a myang hkam yù kô râ nghut é hkyô lé, nungmoq a sé kô lúhú? Hkâ-nâ nyì kó. Ashop é dông gungsho zùm yap é bang le, hparà noq é bang le, su-myi sulàng lú é bang le, shiwa hpó kut é bang le, yuqgè yhangchang nyì zô lhùm é mara kut shut é bang le, ¹⁰ hkau bang le, myoqnoq bang le, î shuq wut bang le, lumù gansang é bang le, mhaú zô é bang le, Garai Gasâng é mingdán mã é shimân jeju lé myang hkam yù kô râ a nghut. ¹¹ Nungmoq mã é ra-am gi, haú su kut kô é bang nghut akô. Nghut kôlhang, nungmoq gi, nga-nhông é Garai Gasâng é Woi-nyí eq Yhumsing Yesuq Hkrisduq é mying mai, mara hkyut san byí é, lhoq sân-yúng é eq chí sân pyám byí é hui bekô nghut ri.

Ashop É Dông Gungsho Zùm Yap É Hkyô

¹² "Jung hkanmó kut râ ahkáng ngò wó lhê." Nghut kôlhang, jung hkanmó gi, akyû byí é a nghut. "Jung hkanmó kut râ ahkáng ngò wó lhê." Nghut kôlhang, hái júng eq le ngo lé wó sing pyám râ a nghut. ¹³ "Zoshuq gi, wamdaú é matú nghut mù, wamdau gi, zoshuq é matú nghut ri." ga nungmoq ra-am taí kô râ nghut lhê. Nghut kôlhang, Garai Gasang gi, haú i júng é lé lhoq htên pyám râ nghut lhê. Gungdu gi, ashop é dông gungsho zùm yap hkyô é matú a nghut é za, haú Yhumsing é matú nghut mù, haú Yhumsing gi, gungdú é matú nghut ri. ¹⁴ Garai Gasang gi, Yhâng é a-tsâm eq, haú Yhumsing lé, shi é mai lhoq dui toq yù bê nghut mù, nga-nhông lé le lhoq dui toq yù râ nghut lhê. ¹⁵ Nungmoq é gungdu pé gi, Hkrisduq é gungsho showui showang pé yhang nghut

é lé, nungmoq a sé kô lúhú? Haú nghut le nhing, Hkrisduq é gungsho showui showang pé lé yù mù, shiwa myhí pé eq rading ralhum za kut pyám nhâng kô râ lúhú? Hkâ-nhám le a ge dut nhâng! ¹⁶ Shiwa myhí eq gungsho zum é sù gi, yhang eq gungsho ralhum za dut bê hkyô lé, nungmoq a sé kô lúhú? Hkâsu mù gà le, "Yhangnhik gi, gungsho ralhum za dut kô râ nghut lhê."¹⁷ ga taí tô ri. ¹⁷ Nghut kôlhang, haú Yhumsing eq rading ralhum za dut é sù gi, woi-nyí mã Yhang eq ralhum za dut bekô nghut ri.

¹⁸ Ashop é dông gungsho zùm yap é hkyô lé koi pyám keq. Byù rayuq kut shut é gotù mara pé banshoq gi, yhâng é gungdu shinggan mã nghut lhê; nghut kôlhang, ashop é dông gungsho zùm yap é hkyô kut shut é sù gi, yhumsing gùng lé mara shut é sù nghut ri. ¹⁹ Nungmoq é gungdu gi, Garai Gasâng chyáng mai nungmoq wó yù bê nghut é, nungmoq má lúng nyi é Chyoiyúng Woi-nyí é noqkuq yhùm nghut é lé, nungmoq a sé kô lúhú? Nungmoq gi, yhumsing gùng lé sing é bang a nghut. ²⁰ Hkâsu mù gà le, nungmoq gi, ahpau ralhum byi mù wui hpyit tô é hui bê bang nghut akô. Haú mù luí, nungmoq é gungdú eq, Garai Gasang lé, hkunggá é hkyô shit nyí keq.

7

Myí Yu É Eq Sêng É Hkyô

¹ Ahkuí, nungmoq kâ kat é hkyô pé eq séng luí ga jang, yuqgè rayuq gi, myi a yu le gè ri. ² Nghut kôlhang, ashop é dông gungsho zùm yap é hkyô gyai myô é yanmai, yuqgè hkanmó gi, yhumsing é myiwe wó râ lhê; myiwe hkanmó gi, yhumsing é yuqgè wó râ lhê. ³ Haú yhumsing hpó gi, wò joq é eq rajung za, yhâng yhumsing myhí eq zùm sháng gaq; haú

dông za, yhumsing myhí le, yhang yhumsing hpó eq zùm sháng gaq. ⁴ Haù yhumsing myhí é gungdu gi, yhanggùng yhang za sêng é a nghut, yhang é yhumsing hpó eq le sêng lhê. Haù eq rajung za, yhumsing hpô é gungdu gi, yhanggùng yhang za sêng é a nghut, yhang é yhumsing myhí eq le sêng lhê. ⁵ Nungmoq myit huí lhum lui, kyúđung é má rago ap nong rá ahkýng ayoq za a nghut jáng gi, rayuq eq rayuq hkâhe lhum kó. Nungmoq yhumsing gùng lé a wó hkang é yanmai, Tsadán èq gunglau é a hui kô sháng gaq, ahkýng ayoq haù lai jáng, rahá dum zùm keq. ⁶ Ngò, haù su nghú taí é gi, hkunmó hkyô é đông a nghut, ahkáng byí kat é đông ru nghut lhê. ⁷ Byù banshoq bang gi, ngò su nyi rá lé ô nau ri. Nghut kôhang, yuq hkangmó gi, ó le ô é chyunghuq lé Garai Gasang chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

⁸ Ahkuí, myiwe a yù lô é bang eq chuimó pé lé ngò taí kôlé, ngò su, haù đông jâng nyi pyám kô é nghut le, yhangmoq é matú ge é hkyô nghut ri. ⁹ Nghut kôhang, yhumsing gùng lé a wó hkang kô é nghut le gi, yhangmoq, myi yù myi lô rá lhê; hkâsu mù gâ le, myi su nyé lui ô nau nyi rá malaí, myi yu myi lô le je ge lhê.

¹⁰ Myi yù bê bang lé, ngò, hkunmó hkyó kôlé, shí gi, ngò đông hkyô é a nghut, Yhumsing chyáng má é ru nghut lhê: Yhumsing myhí gi, yhang é yhumsing hpô chyáng mai a ge gang rá nghut lhê. ¹¹ Nghut kôhang, yhang gâng é nghut jáng, myi a dum lô é za nyi rá lhê, haù a nghut jáng, yhang é yhumsing hpó eq dum xoq yú rá lhê. Yhumsing hpó le, yhang é yhumsing myhí lé a ge kâng pyám rá nghut lhê.

¹² Góbang lé ngò shí su nghú taí kôlé, shí gi, Yhumsing chyáng má é a nghut, ngò đông mai taí é ru nghut lhê. Gumang rayuq yuq gi, lumjúng sù a nghut é yhumsing myhí wó é nghut le, myiwe haù, yhang eq rahá nyi nau é nghut jáng, yhang lé a ge kâng pyám rá nghut lhê. ¹³ Myiwe rayuq gi, lumjúng sù a nghut é yhumsing hpó wó é nghut le, yuqgê haù, yhang eq rahá nyi nau é nghut jáng, yhang eq a ge gang rá nghut lhê. ¹⁴ Hkâsu mù gâ le, haù a lumjúng sù yhumsing hpó gi, yhang yhumsing myhí đông mai lhoq sân-yúng é hui bê nghut mù, a lumjúng sù yhumsing myhí le, lumjúng sù nghut é yhang é yhumsing hpó đông mai lhoq san lhoq yúng é hui bê nghut ri. Haù a nghut jáng, nungmoq é zo wui gi, a sanséng dut kô rá nghut lhê; nghut kôhang, yhangmoq gi, haù đông mai, chyoiyúng bekô nghut ri.

¹⁵ Nghut kôhang, haù a lumjúng sù gâng lô nau jáng gi, gâng lô sháng gaq. Lumjúng é yuqgê nghut nghut, myiwe nghut nghut, haù sù é hkyô pé má gi, hkùm zing tô é hkyô a joq é nghut lhê. Garai Gasang gi, nga-nhung lé, nguingón shoq nyi sháng gaq ga ji yù bê nghut lhê. ¹⁶ Yhumsing myhí é, náng é yhumsing hpó lé wó hkyi yù rá nghú, hkâsu wó sé rá thú? Yhumsing hpó é, náng é yhumsing myhí lé wó hkyi yù rá nghú, hkâsu wó sé rá thú?

¹⁷ Hká đông nghut kôhang, yuq hkangmó gi, Garai Gasang, yhang lé ji yu tô é hkùn, haù Yhumsing mai yhang lé nyi nhang tô é đông asak dui nyi rá lhê. Haù gi, no-kuq hpúng pé banshoq má ngò tô to byí é tará nghut lhê. ¹⁸ Byù rayuq gi, ji yu é huí é hkùn, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sù đông a dut byuq sháng gaq. Byù rayuq gi, ji yu é huí é hkùn, ahpyo-

kuq hpyit a hkam yu to shî é nghut jáng, ahpyo-kuq hpyit a hkam yù sháng gaq. ¹⁹ Ahpyo-kuq hpyit hkâm hkyô gi, haí ahkyak a nghut; ahpyo-kuq hpyit a hkâm hkyô gi, haí ahkyak a nghut. Garai Gasâng é hkunmó pé lé châng nyi é za sheq ahkyak nghut lhê. ²⁰ Yuq hkangmó gi, yhang lé Garai Gasâng èq ji yu é hkûn lhê su xoq nyi nyi râ lhê. ²¹ Nàng gi, ji yù huí é hkûn jùn dut nyi é lhu? Haú hkyô lé hkâm-nyit chiq. Nghut kôlhang, nàng gi, luthkyô wó yu é nghut jáng, haú đông nyi aq. ²² Hkâsu mù gà le, haú Yhumsing èq ji yu é huí é hkûn, jùn dut nyi é sù gi, haú Yhumsing èq lhoq lhut yu é byù nghut bê. Haú eq rajung za, ji yu é huí é hkûn, luthkyô wó é sù gi, Hkrisduq é jùn nghut ri. ²³ Nungmoq gi, Garai Gasâng èq ahpau byi mù wui hpyit yu é hui bê bang nghut akô. Haú mù, byu pé é jùn hkâdut kó. ²⁴ Gumang wui ê, yuq hkangmó gi, yhumsing lé Garai Gasâng èq ji yu é huí to bê đông, Yhâng é hí má xoq nyi nyi râ lhê.

²⁵ Ahkuí, zomyi zorâm wui é hkyô taí kôlé. Haú Yhumsing chyáng mã é hkunmó gi, ngò a wó; nghut kôlhang, Yhumsing é shogyo nhikmyîn é yanmai, lumgíng sù rayuq nghut nyi é đông, ngò, nungmoq lé hkyô shit râ nghut lhê. ²⁶ Ahkuí hui zô é wuihke hkyo é yanmai, nungmoq gi, yhumsing nyi to é su xoq nyi nyi le je ge ri nghû, ngò wó myit ri. ²⁷ Nàng, myiháng bê a nghut lhi? Lhoq kang râ hkâda lo. Nàng, myi a háng shi a nghut lhi? Myi hkâhò lo. ²⁸ Nghut kôlhang, nàng, myihâng é nghut le gi, mara a nghut. Zomyi gi, myi ló é nghut jáng, mara a nghut. Nghut kôlhang, myihâng é bang gi, shi pyat má wuihke hkyô pé myo myo hui kó râ nghut mù, ngò, nungmoq lé haú

mai hkyi yù nau ri.

²⁹ Gumang wui ê, ngò taí nau é lichyúm gi, ahkyíng tot byuq bê nghut mù, ahkuí mai, myi wó é bang gi, a wó é bang đông nyi kó sháng gaq.* ³⁰ Yón ngaú huí é bang gi, a huí é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su; ³¹ haú mingkan zè pé lé chung é bang gi, haú pé lé a myit tuí é bang su, nghut kó sháng gaq. Hkâsu mù gà le, shî mingkân é ahkuí lhê é azông isâm gi, lai ló nyi é nghut lhê.

³² Ngò gi, nungmoq lé a myit myo nhâng naù. Myi a yù shî é sù gi, haú Yhumsing lé hkâsu wó gabú nhâng râ matú, haú Yhumsing é muzó lé myit chiq nyi ri. ³³ Nghut kôlhang, myi yù bê sù gi, yhâng é yhumsing myhí lé hkâsu wó gabú nhâng râ matú, mingkan shi é muzó eq séng luí myit chiq nyi ri. ³⁴ Haú mù, yhâng shirong é myit gi, byo myín nyi ri. Myi a ló é myiwe nghut nghut, zomyi gyíng nghut nghut gi, yhâng é gungdu eq woi-nyí má haú Yhumsing lé rago wó ap nóng râ matú, Yhumsing é muzó pé eq séng luí myit chiq nyi ri. Nghut kôlhang, myi ló bê myiwe gi, yhâng é yhumsing hpó lé hkâsu wó gabú nhâng râ matú, mingkan shi é muzó eq séng luí myit chiq nyi ri. ³⁵ Ngò, haú su nghû taí é gi, nungmoq é matú ge é hkyô nghut lhê; nungmoq lé tara èq zuí zing é a nghut é za, myit a byò lo shoq Yhumsing lé wó ap nóng râ matú, jô é đông asak wó duí kô sháng gaq ngu é hkyô ru nghut lhê.

³⁶ Nghut kôlhang, rayuq yuq gi, yhang dúng tô é zomyi gyíng lé a htuk é đông kut nyi é su wó myit ngàm jáng, myiwe haú asak kô lo nyi mù, hâng yù râ dut bê nghû myit é nghut le gi, yhang ô nau é đông kut sháng gaq. Yhang mara

* **7:29** A wó é bang đông nyi kó sháng gaq gà é gi, Garaí mù lé je myit zuq nyi sháng gá naù é nghut lhê.

kut é a nghut. Yhangnhik gi, hâng lhum râ lê. ³⁷ Nghut kôhâng, yhang gi, haú hkyô lé yhâng é myit mai wó lhoq zim pyâm é nghut mù, yut yut ô naú hkyô é ahkaú má a nghut é za, yhumsing ô naú é hkyô lé wó hkúm zing pyâm é sù nghut luí, haú zomyi gyíng lé a hâng yù râ matú wó myit hpyit bê sù nghut é nghut jáng, yhang gi, ge é hkyô kut bê nghut ri. ³⁸ Haú mù luí, zomyi gyíng haú lé hâng yu é sù gi, jô é hkyô kut bê nghut ri; nghut kôhâng, zomyi gyíng haú lé a hâng yu é sù gi, je ge é hkyô kut bê nghut ri.

³⁹ Myiwe rayuq gi, yhâng é yhumsing hpó rú dui nyi nyi, yhang eq xoq tô ashí nghut lê. Nghut kôhâng, yhâng é yhumsing hpó shi byuq é nghut jáng, yhang gi, myi lô râ ahkáng dum wó bê nghut lê, nghut kôle, haú yuq gi, Yhumsing eq sêng é sù dut râ lê. ⁴⁰ Ngò jéyáng é đông ga jáng, myi a dum lô é wó nyi le gi, yhâng é matú je gabú hkyô dut râ nghut lê. Ngò le, Garai Gasâng é Woi-nyí wó sù nghú wó myit ri.

8

Hpara Lhô Lé Ting Byí É Zoshuq

¹ Ahkuí, hpara lô pé lé ting byí é zoshuq hkyô: nga-nhung banshoq bang gi, haú hkyô eq séng luí sé lê. Sé é hkyô gi, nghutbun sé lê; nghut kôhâng, chyitdap myit gi, lhoq kô myhang lê. ² Byù rayuq yuq gi, rajung jung lé sé bún é nghut le, yhang sé âng é lé lhang a sé shi nghut ri. ³ Nghut kôhâng, Garai Gasang lé chyitdap é sù gi, Garai Gasâng eq sé é sù nghut ri.

⁴ Haú mù luí, hpara lô pé lé ting byí é zoshuq lé zô é eq séng luí gi: hpara lô gi, mingkan má hai lhang a nghut é hkyô lé le, Garai Gasang gi, Yhang rayuq mai lai luí gotú a nyi é lé le, nga-nhung sé lê. ⁵ Hkâsu mù gâ le, mauhkung htoq

má nghut nghut, myigùng htoq má nghut nghut, byù ra-am mai hpara pé ga bang nyi mù, "hpara pé" myo myo eq "yhumsing pé" myo myo nyi kôhâng ⁶ nga-nhung é matú gi, Iwa nghut é Garai Gasang rayuq za nyi é nghut mù, lunglhang gi, Yhang mai hpan é nghut luí, nga-nhung gi, Yhâng é matú asak dui nyi é nghut lê. Yesuq Hkrisduq nghu é Yhumsing rayuq za nyi é nghut mù, lunglhang gi, Yhang đông mai hpan é nghut luí, nga-nhung gi, Yhang đông mai asak dui nyi é nghut lê.

⁷ Nghut kôhâng, yuq hkanmó gi, haú hkyô lé sé gam hkoq yu é a nghut. Ra-am gi, ahkuí jé shoq hpara lô pé má mán byuq kô é yanmai, haú sù é zoshuq lé yhang-moq zô é hkún, hpara lô lé ting byí é zoshuq đông myit sôn yu akô. Yhangmoq myit sôn sé é hkyô wum nyhôm é yanmai, mara wó bún akô nghut ri. ⁸ Nghut kôhâng, zoshuq gi, nga-nhung lé, Garai Gasang shut shuí chyâng e é a nghut. Nga-nhung a zô é nghut le gi, je sùm byuq lô é a nghut, zô é nghut le gi, je ge lo é a nghut.

⁹ Haú su ga kôhâng, nungmoq a htung a hté zô é hkyô gi, lumjing myit wum nyhôm bang é matú myit leqbat jowò a dut shoq sidiq keq. ¹⁰ Hkâsu mù gâ le, sumsé hpaqchyí wó é bang nungmoq gi, hpara lho é noqkuq yhôm má zô nyi kô é lé, haú myit sôn sé é hkyô má wum nyhôm é sù rayuq yuq myang é nghut jáng, hpara lô pé lé ting byí é zoshuq lé, yhang wám zo râ lé wum byí é a dut kó râ lhu? ¹¹ Haú mù, Hkrisduq shi hkám byi bê nghut é, wum nyhôm é gumang hpó haú yuq gi, nungmoq é sumsé hpaqchyí eq lhoq htên pyâm é hui berâ nghut lê. ¹² Nungmoq gi, haú hkyô đông mai, nungmoq é gumang wui lé mara kut shut é eq, yhangmoq é myit sôn sé é hkyô wum nyhôm é lé

nò nhang é hkûn, Hkrisduq lé mara kut shut é nghut bekô. ¹³ Haû mù luí, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhâng sháng gaq, ngò, hkâ-nhám le, sho lé a zo lo râ nghut lhê.

9

Lagyo Rayuq É Ahko Ahkáng

¹ Ngò gi, lut sù a nghut lhú? Ngò gi, lagyo rayuq, a nghut lhú? Ngò gi, nga-nhông é Yhumsing Yesuq lé myang wú bê sù, a nghut lhú? Nungmoq gi, haû Yhumsing má, ngò zui saí é muzó é ashí pé chyat, a nghut kô lhú? ² Ngò gi, góbâng chyáng lagyo a nghut kôlháng, nungmoq chyáng gè gè nghut lhê! Hkâsu mù gà le, nungmoq gi, haû Yhumsing má, ngò lagyo nghut é hkyô saksé dizik nghut bum akô.

³ Ngá ahtoq má jéyáng bang lé, ngá gûng ngò tái hung kat kôlé. ⁴ Ngamoq gi, zo râ shuq râ ahko ahkáng a wó é bang nghut lhê lhú? ⁵ Gotû lagyo pé eq Yesuq é yhanggu yuqzô pé eq Kehpa kut é su, lumjing sù nghut é yhumsing myhí shuí chûng râ, ngamoq, ahko ahkáng a wó é nghut lhê lhú? ⁶ Ngò eq Barnaba baú za, asak duì hkyô é matú mù zui ra râ lhú?

⁷ Ó yuq wá, yhumsing zoshuq wùn luí, gye mù wùn waq râ lhú? Ó yuq wá, tsibiyiq hkyâm saí mù, haû má é tsibiyiq shi a zo kut râ lhú? Ó yuq wá, sau rém mù, sau naú a shuq kut râ lhú? ⁸ Ngò gi, shí hkyô pé lé xângzo hkyam dông za tái é nghut lhê lhú? Haû tará má le, rajung za tái tô lhê, a nghut lhú? ⁹ Hkâsu mù gà le, haû Mosheq é tará má, "Guq nâng nyi é no lé nhuttsung hkâ-tsung to byi."* ga kâ tô ri. Garai Gasang gi, no eq séng luí za chiq é nghut lhê lhú? ¹⁰ Gè gè

yhang, yhang gi, nga-nhông é matú tái é a nghut kô lhú? Nghut lhê, haû gi, nga-nhông é matú kâ to byi é nghut lhê. Haû mù gà le, yò hpuq sù, yò hpuq é eq, guq bat sù, guq bat é gi, kyô chôm shù yù râ lé myoqbyù luí, kut kô é nghut lhê. ¹¹ Ngamoq gi, nungmoq chyáng woi-nyí amyui sân kat bê nghut mù, nungmoq chyáng mâ é mingkan zè lé shù yu é nghut jáng, lûm myó é dut byuq bekô lhú? ¹² Góbâng gi, nungmoq chyáng mai garúm é ahko ahkáng wó kô é nghut jáng, ngamoq gi, haû lé je wó râ lhê a nghut kô lhú?

Nghut kôlháng, ngamoq gi, ahko ahkáng haû lé a yu é nghut lhê. Haû yù râ malaí, Hkrisduq é gabú danglù gi, hkûm zing pyâm é a hui râ matú sheq, jung hkangmó lé ngamoq hkam jân nyi lhê. ¹³ Haû noqkuq yhûm má mù zui é bang gi, yhangmoq é zoshuq lé haû noqkuq yhûm mai wó é hkyô eq, hkungga gyap má dojaú é bang gi, hkungga gyap má nhông byi é ram lé myàng zô é hkyô lé, nungmoq a sé kô lhú? ¹⁴ Haû eq rajung za, gabú danglù hko kyô é bang gi, gabú danglù hkyô mai yhangmoq é asak baú râ lhê ga, haû Yhumsing hkunmó hkyô to bê nghut ri.

¹⁵ Nghut kôlháng, ngò gi, ahko ahkáng haû pé haí lé le a yu é nghut lhê. Nungmoq, ngo lé haû su lhom kut byi râ lé myoqbyù mù, ngò, shí hkyô lé kâ é a nghut. Hkâsu mù gà le, ngò haû su gumrong é hkyô lé, rayuq yuq lhoq htên pyám byi râ htoq má, ngò shi byuq le lháng je ge ri. ¹⁶ Nghut kôlháng, gabú danglù lé ngò hko kyô é hkûn, ngò gumrông jang a joq; hkâsu mù gà le, haû gi, ngò a kut a ge é ngá wô nghut lhê. Haû gabú danglù lé ngò a hko kyô é nghut le gi, ngò dingnyé wó râ nghut lhê. ¹⁷ Yhumsing nau é myit mai ngò hko é nghut jáng, shigyaú chyunghuq wó râ nghut

lê; yhumsing nau é myit mai a nghut jáng gi, ngo lé lùm luí ap tô é lé, agon za wùn waq nyi é dut rá nghut lê. ¹⁸ Haú mù luí, ngá é shigyaú chyunghuq gi, haí nghut lê lú ga jang, haú gabú danglù lé hko kyô é hkûn, ngò gi, ahpau a yu é za wó ap nóng luí, gabú danglù hko kyo hkyô mã é ngá é ahko ahkáng pé lé ngò a yu é amyat nghut lê.

¹⁹ Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù rá matú, ngá gúng ngò, yuq hkangmó é jùn kut nyi lê. ²⁰ Ngò gi, Yudaq byu pé lé shuí lhing yù rá matú, Yudaq byu pê chyáng nghut nyi é hkûn, Yudaq byù rayuq đông dut nyi lê. Ngò gi, tará hkaú má nyi sù a nghut kôlhang, tará hkaú mã é bang lé shuí lhing yù rá matú, tará hkaú má nyi bâng chyáng nghut nyi é hkûn, tará hkaú mã é byù rayuq đông dut nyi lê. ²¹ Ngò gi, tará a wó bang lé shuí lhing yù rá matú, tará a wó bâng chyáng nghut nyi é hkûn, tará a wó sù rayuq đông dut nyi lê. Nghut kôlhang, gè gè ga jáng, Garai Gasâng é tará mai a lut htoq é za, Hkrisduq é tará hkaú má nyi sù nghut lê. ²² Ngò gi, wum nyhóm bang lé shuí lhing yù rá matú, wum nyhóm bâng chyáng nghut nyi é hkûn, wum nyhóm sù rayuq đông dut nyi lê. Ngò gi, wó dut é hkyô đông mai byù ram lé wó hkyí sháng gaq nghù, byù lhunglhang bâng chyáng, byù ajà jà đông nyi nyi lê. ²³ Ngò gi, gabú danglù mai wó é shimân jeju pé lé wó chôm hkam yù sháng gaq nghù, gabú danglù é yanmai haú pé banshoq lé kut é nghut lê.

²⁴ Din shingjóng poí má òn rá bang banshoq òn kôlhang, rayuq za shigyaú chyunghuq wó é hkyô lé, nungmoq a sé kô lú? Chyunghuq wó rá matú òn keq.

²⁵ Sup poí má shingjóng lhum é bang yuq hkangmó gi, yhumsing gúng yhumsing tará htan é đông lhoq môn yù rá lê. Yhangmoq gi, gúng nyi rá a nghut é janmaú wó rá matú, haú su kut é nghut akô; nghut kôlhang, nga-nhung gi, ahtum abyuq gingtng nyi rá nghut é janmaú wó rá matú shikut é nghut lê. ²⁶ Haú mù luí, ngò gi, jum òn òn é byù rayuq su òn é sù a nghut. Ngò gi, lai lé bat é byù rayuq su, akôm má bat é sù le a nghut. ²⁷ Ngò gi, góbâng chyáng mungdang hko é htàng má, ngá gúng ngò, shigyaú chyunghuq eq a gingdán sù a dut sháng gaq nghù, ngá gúng lé gyai yhang lhoq môn yù mù, ngá gung lé jùn kut yu nyi lê.

10

Israelaq Pê É Labaú Mai Sidiq Byí É Hkyô

¹ Gumang wui ê, ngò gi, dut lai lo é hkyô lé, nungmoq lé a sé a dut nhâng nau é nghut lê; hí hkûn, nga-nhung é íchý íwa pé banshoq bang gi, mhutdum ô má nyi mù, Nhong Nè mai wó lai byit kô é nghut lê.* ² Yhangmoq banshoq bang gi, mhutdum eq Nhong Nè má, Mosheq é chángzô pé đông baptisma hkam yu é bang chyat nghut bekô. ³ Yhangmoq banshoq bang gi, rajung zâ é woi-nyí zang zo kô é eq, ⁴ rajung zâ é woi-nyí wui shuq kô é nghut lê; hkâsu mù gâ le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lê; luqbum mó haú gi, Hkrisduq nghut bê. ⁵ Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gúng sôm lé yoso pé má myhîn so san kut pyâm é hui bekô nghut ri.

* **10:1** Bun zo ralhumi mai raxê lhum gi, Htoq Ló Laiká má bo é Mosheq htàng cháng bâng é hkyô lé kâ tô é nghut lê.

⁶ Haú hkyô pé dut htoq é gi, agè ashop hkyô má yhangmoq myit tuí bùm é su, nga-nhúng a myit tuí nyi rá matú nga-nhúng é azòng dut bê nghut ri. ⁷ "Byu pé gi, zùng mù, zo luí shuq luí, a lumjǐng bang kut é dǒng, toq mù, ye bum akô."[✱] ga kâ tô é eq rajung za, yhangmoq mâ é ra-am hparà noq é bang dut byuq é su, nungmoq hkâdut kó. ⁸ Yhangmoq mâ é ra-am gi, ashop é dǒng gungsho zùm yap é hkyô shut kǒmù, ra-nyí má za í mún sum hkyǐng yuq shi byuq é su, ashop é dǒng gungsho zùm yap é hkyô le, nga-nhúng gi, a ge kut shut rá nghut lhê. ⁹ Yhangmoq mâ é ra-am gi, haú Yhumsǐng lé chyâm luí, lhangmuí pé èq hte sat é huí bùm kô é su, haú Yhumsǐng lé, nga-nhúng gi, a ge chyâm rá nghut lhê. ¹⁰ Yhangmoq mâ é ra-am gi, nhutluq shô-myo kǒluí, lhoq htên é maumǎng èq sat pyâm é huí kô é su, nungmoq gi, nhutluq shô-myo hkâkut kó.

¹¹ Yhangmoq chyáng wú yú rá azòng dǒng haú pé dut htoq luí, ló htáng rá ipyat pé má nyi àng to bang nga-nhúng é matú sidiq byi rá dǒng kâ to bê nghut ri. ¹² Haú mù luí, nungmoq gi, yap gǐng nyi bê su ngàm kô é nghut jǎng, a leqbat rá matú sidiq nyi keq! ¹³ Byu chyáng htoq sê é gunglaú hkyô za nungmoq huí rá nghut lhê. Garai Gasang gi, lhumzui sù nghut lhê mù, nungmoq a wó jân é gunglaú hkyô lé huí nhâng rá a nghut. Nghut kǒlhang, nungmoq gunglaú huí é hkûn, Yhang gi, haú lé nungmoq wó jan rá matú, hkyô htong byi rá nghut lhê.

Hparà Lhò Noq Hkyô Lé Koi Pyám Rá Hkyô

¹⁴ Haú mù luí, ngò chyitdap é luzúm wui ê, hparà lhò noq hkyô lé koi pyám keq. ¹⁵ Nhik gyǐng bang

lé ngò taí lhê; ngò haí taí nyi é hkyô lé nungmoq gùng myit sǒn yú keq. ¹⁶ Nga-nhúng, jeju bǐn nyi é jeju góm lé shuq é hkûn, Hkrisduq é sui má chǒm zùm bê a nghut kó lhú? Nga-nhúng, myhik hpé é muk lé zô é hkûn, Hkrisduq é gungdu má chǒm zùm bê a nghut kó lhú? ¹⁷ Haí mù gâ le, muk htung ralhum za nghut mù, nga-nhúng gi, myo myo nghut kǒle ragùng za nghut nyi lhê. Hkâsu mù gâ le, nga-nhúng banshoq bang gi, haú rahtung zâ é muk lé chǒm gǎm zô é bang chyat nghut lhê.

¹⁸ Israelaq byu pé é hkyô lé myit wú keq. Haú hkungga lé zô é bang gi, hkungga gyap má chǒm lom é bang nghut lhê, a nghut kó lhú? ¹⁹ Hparà lhò, a nghut jǎng, hparà lhò lé tǐng byí é hkungga gi, rajung jung nghut lhê nghú, ngò taí é lhú? ²⁰ Haú su taí é a nghut, a lumjǐng bǎng é hkungga gi, Garai Gasang lé nhǒng byí é a nghut, nat gǎng pé lé tǐng byí é ru nghut lhê. Ngò gi, nungmoq, nat gǎng pé eq chǒm zum nyi bang dut rá lé a ô nau é nghut lhê. ²¹ Nungmoq gi, haú Yhumsǐng é góm lé le, nat gǎng pé é góm lé le, ge shuq rá a nghut; nungmoq gi, haú Yhumsǐng é zangbó má le, nat gǎng pé é zangbó má le, rahá ge bo lòm rá a nghut. ²² Nga-nhúng gi, haú Yhumsǐng lé manǒn nhâng nau é bang dut rá a nghut kó lhú? Nga-nhúng gi, Yhâng htoq je wúm bo é bang nghut lhê lhú?

Lumjǐng Su É Luthkyô

²³ "Jung hkangmó kut rá ahkáng wó lhê." nghut kǒlhang, jung hkangmó gi, akyú wó é a nghut. "Jung hkangmó kut rá ahkáng wó lhê." nghut kǒlhang, jung hkangmó gi, byú lé wó kô làm nhang é a nghut.† ²⁴ Ó yuq le, yhumsǐng é gè hkyo matú ho é a nghut é za,

✱ **10:7** Htoq Ló 32:6 † **10:23** Bun zo 23 mã é dangnho gi, Korinhtuq byu pé lhaq taí é dang nghut lhê.

góbâng é gè hkyo é matú hô râ dut lhê.

²⁵ Sho ùng gài má ùng é hái lé lé, ùng-âng é myit èq a myî gôn é za zo keq. ²⁶ Hkâsu mù gâ le, "Myidàm htoq eq haú má joq é jung hkanqmó gi, Yhumsing é chyat nghut lhê."* gâ tô ri.

²⁷ A lumjîng bang ra-am, nungmoq lé zang zo jì mù, nungmoq é nau é nghut jáng, ùng-âng é myit èq a myî gôn é za, nungmoq hí má to byî é gû lé zo keq. ²⁸ Nghut kôlhang, rayuq yuq, nungmoq lé, "Shî gi, hparâ lô lé tîng byi bê nghut lhê." ga taî kyô é nghut jáng, nungmoq lé taî kyo su é yanmai le, myit ùng-âng é yanmai le, haú lé hkâzo kó. ²⁹ Ùng-âng é myit haú gi, nungmoq é a nghut, góyuq é ùng-âng é myit lé tai nau é ru nghut lhê. Ngá é luthkyô lé, hái mù góyuq é ùng-âng é myit èq jéyâng é huí nhang lhê lúh? ³⁰ Ngò jeju bún é myit mai bo zo bo shuq yu é nghut jáng, Garai Gasang lé jeju hkya-on bê nghut é zoshuq hau é yanmai, hái mù lumu pyâm é ngò hui râ lúh?

³¹ Haú mù luî, nungmoq zo kôlhang, shuq kôlhang, hái kut kôlhang, Garai Gasâng é hpungwup shîngkâng é matú chyat kut keq. ³² Ngò gi, yuq hkanqmó lé, hkyô hkanqmó má shikut luî myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasâng é noqkuq hpúng mâ é byù lé nghut nghut, ó yuq lé le myit hkâleqbat nhâng kó. ³³ Hkâsu mù gâ le, ngò gi, yhangmoq hkyi yu é wó hui kó sháng gaq nghû, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

11

¹ Ngò gi, Hkrisduq é alik châng é su, nungmoq gi, ngá é alik châng keq.

Noqkuq É Má Htap Htuk Râ Hkyô

² Nungmoq gi, hkyô hkanqmó má ngo lé bún nyi kô é yanmai le, nungmoq lé ngò hai byi bê mhòqshít hkyô pé lé myhik zing nyi kô é yanmai le, ngò, nungmoq lé hkya-ôn lhê.

³ Ahkuî, ngò, nungmoq lé sê hkyâng nhâng nau é hkyô gi: yuqgè hkanqmó é ulhum gi, Hkrisduq nghut ri; myiwe hkanqmó é ulhum gi, yuqgè nghut ri; Hkrisduq é ulhum kúm gi, Garai Gasang nghut ri. ⁴ Yuqgè hkanqmó gi, kyûdûng le nghut nghut, myiqttoi htoî le nghut nghut, yhâng é ulhum lé nghop tô é nghut jáng, yhâng é ulhûm é aróng lé lhoq hpoi pyâm é nghut bê. ⁵ Myiwe hkanqmó gi, kyûdûng le nghut nghut, myiqttoi htoî le nghut nghut, yhâng é ulhum lé a nghop tô é nghut jáng, yhâng é ulhûm é aróng lé lhoq hpoi pyâm é nghut bê. Haú gi, yhâng é ulhum lé wuq pyâm é eq rajung za nghut ri. ⁶ Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyâm ra râ nghut lhê. Nghut kôlhang, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoi lhê nghut jáng, yhang gi, yhâng é ulhum lé nghop to ra râ nghut lhê. ⁷ Yuqgè gi, Garai Gasâng é azòng isâm eq hpungwup shîngkang nghut é yanmai, yhâng é ulhum lé a nghop râ é nghut lhê. Myiwe kúm gi, yuqgè é hpungwup shîngkang nghut ri. ⁸ Hkâsu mù gâ le, a-nham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lhê.* ⁹ Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqgè é matú hpan tô é ru nghut lhê. ¹⁰ Haú nghut é yanmai le, maumang lagyo pê é yanmai le, myiwe gi, ahko ahkáng kumlhá

dông yhang é ulhum lé nghop râ dut lhê.

¹¹ Nghut kôlhang, haû Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê. ¹² Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôlhang, jung hkanmó gi, Garai Gasang mai lo é nghut lhê.

¹³ Myiwe rayuq, ulhum a nghop é za Garai Gasang lé kyûdûng é gi, htuk kô râ lú? Nungmoq, yhumsing gung é matú doqdân yù keq.

¹⁴ Yuqgè xâm hîng tô é nghut jáng, yhang é matú aróng hpoi é hkyô dut é nghut kôle, ¹⁵ myiwe xâm hîng tô é nghut jáng, yhang é matú hpungwup shingkanq nghut é hkyô lé, htûngli éq nungmoq lé mhoqshit lhê, a nghut kô lú? Hkâsu mù gâ le, xâm hîng tô é gi, nghop râ zè dông yhang lé byi tô é nghut lhê.

¹⁶ Rayuq yuq, haû hkyô lé tai dangrháng nau é nghut jáng, ngamoq chyáng le, Garai Gasang é noqkuq hpûng pê chyáng le, gotû htûngli a joq é nghut lhê.

Yhumsing É Myinzang

¹⁷ Nungmoq é zuphpong pé gi, gè hkyô kut râ htoq má akyû a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkya-ôn é a nghut. ¹⁸ Sâng-hi má, noqkuq hpûng ralhûm dông nungmoq zup zîng é hkûn, nungmoq hkaû má gam hkoq hkyô joq é lé wó gyô é nghut luî, têng é le bò râ nghû, ngò lumjîng lhê. ¹⁹ Ô pé gi, Garai Gasang o é hkyam shut nghut é lé wó shit râ matú, nungmoq ahkaû má gam hkoq lhum hkyô joq râ dut lhê. ²⁰ Nungmoq rahá zup zîng kô é hkûn, nungmoq gi, haû Yhumsing é myinzang zô é a nghut kó. ²¹ Hkâsu mù gâ le, nungmoq zô é hkûn, góyuq lé le a lánq é za, ó le ó hí yù zô akô. Haû mù, rayuq gi, zo mut huî nyi, góyuq gi, shuq wut

to dut akô nghut ri. ²² Nungmoq gi, zo jang shuq jang yhûm a wó bang nghut akô lú? Garai Gasang é noqkuq hpûng lé wú tiq pyám kô é eq, a wó bang lé hoq hpu nhâng kô é, nghut akô lú? Nungmoq lé ngò hkâsu nghû tai kó râ lú? Haû pê é yanmai, ngò, nungmoq lé hkya-on râ lú? Ratsuí lháng a wó dut!

²³ Hkâsu mù gâ le, haû Yhumsing chyáng mai ngò wó hap yu é gû lé, nungmoq lé hai byi bê nghut lhê: Haû Yhumsing Yesuq gi, Yhang lé ap pyám huî é myin má, muk lé yù mù, ²⁴ jeju hkya-ôn é htâng má, haû lé myhik hpé mù, tai é gi, "Shî gi, nungmoq é matú Ngá é gungsho nghut lhê; Ngo lé bûn nyi râ matú, shî su kut nyi keq." gâ ri. ²⁵ Haû eq rajung za, myinzang bàn zô é htâng má, Yhang gi, góm lé le yù mù, "Góm shî gi, Ngá é sui má é dangshikaq asik nghut lhê; hkâ-nhám le, nungmoq shî shuq é hkûn, Ngo lé bûn nyi râ matú shî su kut keq." gâ tai ri. ²⁶ Hkâsu mù gâ le, nungmoq gi, muk shî lé zo luî, góm shî lé shuq é hkanmó, haû Yhumsing shî hkâm é hkyô lé, Yhang jé lé shoq, shit kyô nyi râ lhê.

²⁷ Haû mù luî, ó yuq nghut kôle, a gingdán é dông Yhumsing é muk haû lé zo mù, góm haû lé shuq é nghut jáng, haû Yhumsing é gungdu eq sui lé shut é mara wó bê nghut lhê. ²⁸ Haû mù, ó yuq le, muk zo góm shuq râ hí má, yhumsing gûng yhumsing jep wú ra râ nghut lhê. ²⁹ Hkâsu mù gâ le, ó yuq nghut kôle, haû Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhanggûng yhang mara zô bò shuq bo yu é nghut lhê. ³⁰ Haû nghut é yanmai, nungmoq mâ é byù myo myo gi, wum nyhôm é, nõhpyo huî é nghut bum akô. Ram gi, shi lô byuq bekô nghut ri. ³¹ Nghut kôlhang, nga-nhúng gi, yhumsing gûng yhumsing hí sôn

sê yu é nghut jáng tarâ jéyáng é hui rá a nghut. ³² Nga-nhúng gi, mingkan eq rahá, mara byî é a hui zo sháng gaq ga, nga-nhúng lé haú Yhumsing eq jéyáng é hkûn, nga-nhúng gi, mhoqshit é huí nyi gù bê nghut lhê.

³³ Haú mù luí, ngá é gumang wui ê, nungmoq gi, zo rá nghû rahá zup zíng é hkûn, rayuq eq rayuq lánq lhum keq. ³⁴ Nungmoq rahá zup zíng é hkûn, jéyáng é a hui zo kó sháng gaq, rayuq yuq zòmut é nghut jáng, yhùm má zô chùng rá lhê.

Gotú myit tô é hkyô pé gi, ngò jé lé é hkûn sheq shit kyo rá nghut lhê.

12

Woi-nyí Hkyô Eq Sêng É Chyunghuq Pé

¹ Gumang wui ê, woi-nyí hkyô eq sêng é chyunghuq pé lé, nungmoq a sê gyo rá lé ngò a ô nau é nghut lhê. ² Nungmoq gi, a lumjínq bang nghut nyí kô é hkûn lé, dang a nyo é hparà lhô noq rá matú hkyô shuí nghoq é hui kô é hkyô lé, nungmoq sê lhê. ³ Haú mù luí, "Yesuq gi, nhíng pyâm é hui sháng gaq." ga, Garai Gasâng é Woi-nyí mai taí é byù ó yuq le a nyi é eq, haú Chyoiyúng Woi-nyí mai za a nghut jáng, "Yesuq gi, Yhumsing nghut lhê." ga, ó yuq le a wó taí é nghut lhê nghû, ngò, nungmoq lé taí kyô é nghut lhê.

⁴ Woi-nyí hkyô eq sêng é chyunghuq ajung jung joq lhê; nghut kôlháng, Chyoiyúng Woi-nyí mai chyat nghut lhê. ⁵ Dojaú é hkyô ajung jung joq lhê; nghut kôlháng, Yhumsing rayuq lé za dojaú é nghut lhê. ⁶ Zui saí é hkyô ajung jung joq lhê, nghut kôlháng, Garai Gasang yhang za, byù lhunglháng bang má, haú pé banshoq lé kut é nghut lhê.

⁷ Woi-nyí é hpông shit hkyô gi, byù pé é gè hkyô matú, yuq

hkgangmó lé byi bê nghut ri. ⁸ Rayuq lé gi, Woi-nyí haú mai, hpaqchyí byéng-yá byíng é danglù byí é nghut ri; góyuq lé gi, Woi-nyí hau eq za, sumsé hpaqchyí byíng é danglù byí é nghut ri; ⁹ góyuq lé gi, Woi-nyí hau eq, lumjínq myit byí é nghut ri; dum góyuq lé gi, Woi-nyí hau eq, nò lhoq ge é chyunghuq byí é nghut ri; ¹⁰ dum, góyuq lé gi, hpungwup a-tsam pé; dum, góyuq lé gi, myiqhtoi htoí é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taí é ahkáng; dum, góyuq lé gi, dang haú pé é lichyúm taí sân kyô é ahkáng, byí é nghut ri. ¹¹ Chyunghuq haú pé banshoq gi, Woi-nyí hau eq za kut é loqmú chyat nghut mù, Yhang myit hpyit é đông yuq hkgangmó lé haú pé tsing gam byí é nghut ri.

Gungbun Myo Kôlháng, Ra Gùng Za

¹² Gungdu gi, gungsho showui showang pé myo myo lé pong tô é nghut kôlháng, ragùng za nghut ri; gungsho showui showang pé banshoq myo myo nghut kôlháng, gungdu ra gùng za dut tô é nghut ri. Haú eq rajung za, Hkrisduq eq le haú đông nghut ri. ¹³ Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut rá matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chôm shuq yù bê bang nghut lhê.

¹⁴ Haú gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê. ¹⁵ Haú hkyí gi, "Ngò, loq a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a sêng wó dut é a nghut. ¹⁶ Dum, haú nohkyap gi, "Ngò, myoqjí a nghut é yanmai, gungdu eq a sêng

é nghut lâh." gâ é nghut jáng, hau é yanmai, gungdu eq a séng wó dut é a nghut. ¹⁷ Ragùng dù é gi, myoqjí za nghut é nghut jáng, gyô é hkyô gi, hkâmá nghut râ lúh? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ lúh? ¹⁸ Nghut kôlhang, Garai Gasang gi, gungsho showui showang hkangmó lé, Yhang dut nhâng nau é eq rajung za, gungdu má kut to bê nghut ri. ¹⁹ Gungsho showui showang gi, ra bun za nghut é nghut jáng, gungdu gi, hkâmá nghut râ lúh? ²⁰ Hkyak ga jang, gungsho showui showang pé myô kôlhang, gungdu gi, ragùng za nghut ri.

²¹ Haù myoqjí gi, loq lé, "Ngò, nang lé a ra!" nghù a ge taí. Haù ulhum gi, hkyí lé, "Ngò, nang lé a ra!" nghù a ge taí. ²² Haù za a nghut, gungdu mâ é gungsho showui showang pé má wum je nyhôm é su dut é pé le, a bò a ge é chyat nghut lâh. ²³ Hau htoq agó, hpau a lúm tap râ su myit ngam é gungsho showui showang pé lé, nga-nhúng je hpautap râ lâh. Haù a shit é jung gungsho pé lé, nga-nhúng hpautap é đông rago nghop râ lâh. ²⁴ Nga-nhúng é wó shit é gungsho pé kúm gi, haù hkyô a ra nghut ri. Nghut kôlhang, Garai Gasang gi, gungdú é gungsho showui showang pé lé pong to mù, aróng nyhum é lé, je riyhang aróng byi bê nghut ri. ²⁵ Haù mù, gungdu má gamhkuí lhùm é hkyô a bo é za, gungsho showui showang pé ralhum eq ralhum, rajung za kut wó myit tê byí lhum kó râ nghut lâh. ²⁶ Haù gungsho showui showang ralhum jamjau huí é nghut jáng, lhum hkangmó bo jamjau râ nghut lâh. Ralhum hpautap huí é nghut jáng, lhum hkangmó bo gabú é nghut lâh.

²⁷ Ahkuí, nungmoq gi, Hkrisduq é gungdu nghut kôlú, nungmoq

yuq hkangmó gi, haù é gungsho showui showang pé nghut akô. ²⁸ Garai Gasang gi, noqkuq hpúng má, sâng-hi lé, lagyô pé, í lhum nghù râ má, myiqhtoí pé, sùm lhum nghù râ má, mhoqshit bang, hau htâng má, laklaí kumlhá pé kut râ bang, nò wó lhoq gè râ chyunghuq wó é bang lé le, góbang lé wó garúm é bang, shuí-u râ chyunghuq wó é bang, laklaí dang ahú hú ge taí é bang lé, masat to bê nghut ri. ²⁹ Banshoq bang gi, lagyô pé nghut lâh lúh? Banshoq bang gi, myiqhtoí pé nghut lâh lúh? Banshoq bang gi, mhoqshit bang nghut lâh lúh? Banshoq bang gi, laklaí kumlhá kut akô lúh? ³⁰ Banshoq bang gi, nò lhoq ge é chyunghuq wó é nghut lâh lúh? Banshoq bang gi, laklaí dang ahú hú ge taí lâh lúh? Banshoq bang gi, dang haù pé é lichyúm ge taí sân kyô lâh lúh? ³¹ Nghut kôlhang, nungmoq gi, je gyau é chyunghuq lé gyai yhang ô nau nyí keq.

Chyitdap Myit

Hau htoq agó, ahkuí, ngò, nungmoq lé, je gyau dik é hkyô ralhum shit kôlé.

13

¹ Ngò gi, byu pé é eq maumang lagyô pé é myíng pé lé sê taí é nghut kôlhang, chyitdap myit a bo é nghut jáng, myíng hung htê bo é ut eq myíng tui htê bo é chapchéng su za dut byuq râ nghut lâh. ² Ngò gi, myiqhtoí htoí é chyunghuq, zaú tô é hkyô pé banshoq lé sê gyô é nyan, sumsé hpaqchyí banshoq lé wó é eq, bùm pé lé wó htot nhang é lumjíng myit bo é nghut kôlhang, chyitdap myit a bo é nghut jáng, ngò haí a nghut sù dut berâ nghut lâh. ³ Ngò gi, wó é sutzè banshoq myùng bang lé byí pyâm é eq, ngá é gungdu lé nyhê pyâm râ matú ap pyâm é nghut kôlhang, chyitdap

myit a bo é nghut le gi, hai akyû a bò nghut ri.

⁴ Chyitdap myit gi, myit hing lhê, nú-nhâm lhê. Chyitdap myit gi, a manôn, gyáng dang a taí, a nghutbûn é nghut lhê. ⁵ Chyitdap myit gi, hpau a dap é hkyô a kut, yhumsing é akyû baú za a hô, lui za nhikjum a yo, shut é mara a matsing é nghut lhê. ⁶ Chyitdap myit gi, agê ashop é má a gabú é za, haú tengmán hkyô má gabú nyi ri. ⁷ Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

⁸ Chyitdap myit gi, hkâ-nhám le htûm byuq é a nghut. Myiqhtoi htoi é hkyô pé gi, byuq byuq râ nghut lhê; laklaí dang ahú hú ge taí é hkyô gi, zim byuq râ nghut lhê; sumpsé hpaqchyí hkyô gi, lai ló byuq râ nghut lhê. ⁹ Hkâsu mù gâ le, nga-nhúng sê é gi, ra-am rahtâng ru nghut lhê. Nga-nhúng myiqhtoi htoi é gi, ra-am rahtâng ru nghut lhê. ¹⁰ Nghut kôhlang, gumjup hkyô jé lé é hkûn, a gumjup hkyô gi, byuq byuq râ nghut lhê. ¹¹ Ngò, zoshâng nghut ashí hkûn gi, zoshâng dông dang taí, zoshâng dông myit, zoshâng dông myit sôn wú é nghut lhê. Ngò, suwún nghut jáng gi, zoshâng nyi yap hkyô pé lé tô pyám bê nghut lhê. ¹² Ahkuí, nga-nhúng gi, myoqjâm hkaú má é rago a sân é wupzo lé za myàng é nghut lhê; nghut kôhlang, htâng má, myoqdong hkyûm wó myàng râ nghut lhê. Ahkuí, ngò gi, ra-am rahtâng za sê é ru nghut lhê; nghut kôhlang, Garai Gasang gi, ngo lé gumjup shoq sê é su, ngò le, htâng má, gumjup shoq sé râ nghut lhê.

¹³ Ahkuí, lumjínng myit, myit myoqbyu hkyô, chyitdap myit shi sùm lhum myit tô ri. Nghut kôhlang, haú pé má é kô dik é gi, chyitdap myit nghut ri.

14

Myiqhtoi Htoi É Chyunghuq Pé EqLaklaí Dang Nyo É Chyunghuq Pé

¹ Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyi keq. Myiqhtoi htoi é chyunghuq lé je riyhang myit o nyi keq. ² Hkâsu mù gâ le, laklaí dang ahú hú nyo é sù ó yuq le, byu lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé haú Woi-nyí eq nyo htoq é nghut ri. ³ Nghut kôhlang, myiqhtoi htoi é sù yuq hkanngmó gi, byu pé lé wum byi dang eq nhik títng dang taí ri. ⁴ Laklaí dang rahú nyo é sù gi, yhumsing gùng lé htuqbang byi ri, nghut kôhlang, myiqhtoi htoi é sù gi, noqkuq hpúng lé htuqbang byi ri. ⁵ Ngò gi, nungmoq yuq hkanngmó laklaí dang ahú hú pé nyò râ lé ô nau ri, nghut kôhlang, nungmoq myiqhtoi htoi râ lé je ô nau é nghut lhê. Hkâsu mù gâ le, laklaí dang ahú hú nyo é sù gi, haú noqkuq hpúng lé wó htuqbang râ matú, lichyúm lé taí sân kyô é za a nghut jáng, myiqhtoi htoi sù gi, yhang htoq je gyaú é nghut lhê.

⁶ Ahkuí, gumang wui é, ngò gi, nungmoq chyáng lé jé mù, laklaí dang pé nyo é nghut kôle, shing-rân nghut nghut, sumpsé hpaqchyí nghut nghut, myiqhtoi dang nghut nghut, mhoqshit dang nghut nghut, nungmoq lé a taí kyô é nghut le gi, nungmoq é matú ngò hai akyû htoq râ lú? ⁷ Htê lhoq htoq é asak a bo jung zè pé má lhang gi, sampyí nghut nghut, títng nghut nghut, gam hkoq tô é htê a joq é nghut jáng, mut myhíng bat myhíng é htê hai nghut é lé, hkâsu wó sé râ lú? ⁸ Dum, tut htê le gam hkoq é dông a mut kyô é nghut jáng, majan htoq râ rì rì ó yuq wá hên râ lú? ⁹ Nungmoq chyáng le haú

dông nghut lhê. Nang, laklai dang ahú hú nyo le, sê gyô é danghkun mai nyo é za a nghut jáng, nang hái taí nyi é lé ó yuq wá hkâsu wó sé râ lú? Nungmoq gi, maulat má za taí hâng pyâm nyi kó râ nghut lhê. ¹⁰ Mingkan má dang ahú hú yhang joq é nghut lhê, nghut kôle, dang lichyúm a htoq é dang gi, a joq é nghut lhê. ¹¹ Haú mù luí, rayuq yuq hái taí nyi é lichyúm lé ngò a dat chyup é nghut jáng, ngò gi, haú dang taí su é matú maigan byù dut mù, yhang gi, ngá é matú maigan byù dut é nghut lhê. ¹² Nungmoq chyáng le haú dông nghut lhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyi bekô nghut mù, haú noqkuq hpúng lé kô myhâng nhang é chyunghuq pé lé je ho shikut nyi keq.

¹³ Haú nghut é yanmai, laklai dang ahú hú taí é sù ó yuq le, yhang haú taí é lichyúm wó taí sân kyo sháng gaq, kyúdung râ dut lhê. ¹⁴ Hkâsu mù gà le, laklai dang ahú hú dông ngò kyúdung é nghut jáng, ngá é woi-nyí mai dúng é nghut lhê; nghut kôlháng, ngá é myit-nyân é matú, hai akyú a wó nghut ri. ¹⁵ Haú mù, ngò hkâsu kut râ lú? Ngò gi, ngá é woi-nyí mai le kyúdung râ, ngá é myitnyan mai le kyúdung râ nghut lhê; ngò gi, ngá é woi-nyí mai le mahkôn hkôn râ, ngá é myitnyan mai le mahkôn râ nghut lhê. ¹⁶ Nungmoq gi, nungmoq é woi-nyí mai za Garai Gasang lé hkya-on kó é nghut jáng, a sê gyô é bang mâ é rayuq gi, nungmoq hái taí é lé a sê é nghut mù, nungmoq jeju hkya-ôn é hkûn, "Amen" ga hkâsu wó taí râ lú? ¹⁷ Nungmoq gi, ge dik shoq jeju hkya-on kó é abe, nghut kôlháng, góbang gi, htuqbâng é a hui kó nghut ri.

¹⁸ Ngò gi, nungmoq banshoq bâng htoq má laklai dang ahú hú

je wó taí é yanmai, Garai Gasang lé jeju bûn ri. ¹⁹ Nghut kôlháng, noqkuq hpúng má, laklai dang rahú dông danghkun ramun ngò taí râ htoq má, góbang lé mhoqshit râ akyú bo é dang ngo hkun taí râ lé ngò je ô nau ri.

²⁰ Gumang wui é, zoshâng wui su myit nyi é lé nô pyám keq. Agè ashop hkyô eq sêng é má gi, nyhe-qnú dông kut mù, nungmoq myit é hkyô má gi, ko bang dông kut keq. ²¹ Haú jep é tará má kâ tô é gi,

"A wó gyô wú é dang dông mai le, góming byu pê é nhutwui dông mai le, byù shí bang lé ngò taí râ nghut lhê;

nghut kôlháng, yhangmoq gi, ngá dang gyo kó râ a nghut.'

ga Yhumsing taí ri."*

²² Haú mù, laklai dang ahú hú nyo é hkyô gi, lumjúng bâng matú kumlhá a nghut é za, a lumjúng bâng matú sheq ru nghut lhê. Myiqhtoi dang kúm gi, a lumjúng bâng matú a nghut é za, lumjúng bâng matú sheq ru nghut lhê. ²³ Haú nghut mù, noqkuq hpúng gón chòm zing mù, yuq hkanmó laklai dang ahú hú nyò kô é nghut jáng, a sê gyô é bang nghut nghut, a lumjúng é bang nghut nghut, wang lé kô é hkûn, yhangmoq gi, nungmoq nâ bùm bekô ga a taí kó râ nghut lhê lú? ²⁴ Nghut kôlháng, yuq hkanmó, myiqhtoi dang taí nyi é u má, a lumjúng sù nghut nghut, a sê gyô é sù nghut nghut, wang lé é nghut jáng, yhang gi, yubak dap sù rayuq nghut é lé, banshoq èq lhoq pùn kyíng é hui râ eq, banshoq èq jéyáng é hui râ nghut é htoq agó, ²⁵ yhâng é i-myt má zaú tô é hkyô pé lé de de lhoq htoq shit é hui râ nghut lhê. Haú mù, yhang gi, ngóm gop luí, Garai Gasang lé noqkuq mù, "Garai Gasang gi, gè gè yhang,

* 14:21 Esai 28:11-12

nungmoq chyáng rahá nghut nyi ri!" ga tai pyo htoq kat rã nghut lhê.

Shuq Shuq Tap Tap Za Noqkuq Rã Hkyô

²⁶ Haù jáng, gumang wui ê, nga-nhúng hai tai rã lú? Nungmoq rahá lé chôm zing é hkùn, yuq hkangmó gi, Garai hkyã-on mahkôn nghut nghut, mhoqshít é dang nghut nghut, shing-rãn nghut nghut, laklai dang ahú hú nyo é hkyô nghut nghut, tai sân kyô é nghut nghut pé lé, wó le ge ri. Haù pé banshoq gi, noqkuq hpúng lé wum-o byi rã matú chyat kut é dut rã lhê. ²⁷ Rayuq yuq, laklai dang ahú hú nyo é nghut jáng, í yuq eq myô htum sum yuq mai a lai é za, rayuq htàng rayuq nyò rã dut é htoq agó, rayuq yuq haù lé tai sân kyo ra rã dut lhê. ²⁸ Tai san kyô é sù a nyi é nghut jáng, laklai dang ahú hú nyo é sù gi, noqkuq hpúng má zim za nyi rã dut mù, yhânggùng yhang eq Garai Gasang lé za nyo rã dut lhê.

²⁹ Myiqhtoi í yuq nghut nghut, sum yuq nghut nghut tai kyo rã dut lhê; góbang gi, hai tai é lé rago gyô chyam wú rã dut lhê. ³⁰ Nghut kôhang, zung tô é sù rayuq yuq chyáng shing-rãn jé é nghut jáng, hí tai nyi é sù gi, nô byuq rã dut lhê. ³¹ Hkãsu mù gã le, yuq hkangmó gi, mhoqshít é eq myit wum byi é wó hui kó sháng gaq, nungmoq banshoq bang gi, rayuq htàng rayuq myiqhtoi wó htoi é nghut lhê. ³² Haù myiqhtoi pé é woi-nyí pé gi, myiqhtoi pé uphkan é a-ô má nghut nyi ri. ³³ Hkãsu mù gã le, Garai Gasang gi, atau ahú dut é Garai Gasang a nghut é za, nuingón hkyo é Garai Gasang ru nghut lhê.

Sân-yúng bãng zing tô é hpúng banshoq mã é eq rajung za, ³⁴ myiwe wui gi, noqkuq hpúng pé má zim za nyi rã dut lhê. Yhangmoq gi, dang tai ahkáng a

wó é nghut mù, haù jep é tarã má bo é eq rajung za a-ô má nyi kó sháng gaq. ³⁵ Yhangmoq gi, rajung jung sé naù kô é nghut jáng, yhùm mã yhangmoq é yhumsing hpô pé chyáng myi kó sháng gaq; hkãsu mù gã le, myiwe rayuq noqkuq hpúng má dang tai é gi, ahoq ahí hkyô nghut ri.

³⁶ Haù Garai Gasang é mungdang gi, nungmoq chyáng mai htoq lo é nghut lhê lú? Haù gi, nungmoq chyáng za lé jé bê nghut lhê lú? ³⁷ Rayuq yuq, yhang gi, myiqhtoi, a nghut jáng, woi-nyí chyunghuq byi é hui sù nghut lhê ga myit é nghut jáng, ngò, nungmoq lé kã byi é pé gi, haù Yhumsing é hkunmó nghut é lé, yhang sê yù sháng gaq. ³⁸ Yhang gi, haù lé hai su a ngàm kut é nghut jáng, yhânggùng le, hai su a ngàm kut é hui zo rã nghut lhê.

³⁹ Haù mù lui, ngá é gumang wui ê, myiqhtoi htoi rã lé ô nau nyi mù, laklai dang ahú hú nyo é lé hkãhkum pyám kó. ⁴⁰ Nghut kôhang, jung hkangmó gi, htuk é đông eq shuq shuq tap tap zã é hkyô đông kut é dut rã lhê.

15

Hkrisduq É Dui Toq Hkyô

¹ Gumang wui ê, ngò, nungmoq lé hko kyo bê nghut mù, nungmoq le hap yù lui, nungmoq yap ging tô é jowò nghut é gabú danglù hkyô lé, ahkuí, ngò, nungmoq lé lhoq pùn kat nau ri. ² Ngò, nungmoq lé hko kyo bê é mungdang lé, nungmoq ging ging myhik zing nyi kô é nghut jáng, nungmoq gi, gabú danglù hau é yanmai hkyi yù hui é nghut akô. Haù a nghut jáng, nungmoq lumjing é gi, akôm dut bê nghut lhê.

³ Ngò hap yu tô é pé lé, sâng-hi ahkyak é đông, ngò, nungmoq lé hai byi bê nghut lhê. Haù pé gi: Chyúmdang eq rajung za, Hkrisduq gi, nga-nhúng é yubak marã é

matú shí hkám byi bê gê é nghut ri; ⁴ Yhang gi, myhup yhúm é hui lui, Chyúmdang eq rajung za sum nyí nghu é nyí má lhoq dui toq é hui bê nghut mù, ⁵ Petruq lé htoq shit lui, haú lagyo raxe í yuq lé le htoq shit ri. ⁶ Hau htâng má, Yhang gi, ra-u má za, gumang wui ngo shô yuq chyân lé htoq shit ri. Haú bang má é myo hpyang gi, ahkuí jé shoq asak dui nyi bum akô; ram kúm gi, shi ló byuq bekô nghut ri. ⁷ Hau htâng, Yhang gi, Yakuq lé htoq shit mù lagyô pé banshoq bang lé htoq shit ri. ⁸ Ló htâng má, Yhang gi, hkú buinyi a jé shí é má hku é đông nghut sủ ngo lé le htoq shit bê nghut ri.

⁹ Hkâsu mù gê le, ngò gi, lagyô pé má é tiq dik sủ nghut lhê. Haú Garai Gasâng é noqkuq hpúng lé zing-ri sủ nghut é yanmai, ngò gi, lagyo rayuq nghu rá lhang a gingdán é sủ nghut lhê. ¹⁰ Nghut kôlhang, ngò ahkuí ísu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akôm a dut é za, ngò gi, yhangmoq banshoq bâng htoq má je riyhang mù wùn waq shikut lhê. Haú gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê. ¹¹ Haú mù lui, ngò nghut nghut, yhangmoq nghut nghut, ngamoq hko kyô é gi, haú hkyô chyat nghut lui, nungmoq lumjینگ é le, haú hkyô nghut ri.

Shi Byuq Bâng É Dui Toq Hkyô

¹² Nghut kôlhang, haú Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq má é ra-am gi, shi byuq bâng é dui toq hkyô a joq nghu, hkâsu wó táí kó rá lhu? ¹³ Shi byuq bâng é dui toq hkyô a joq é ru nghut le gi, Hkrisduq le lhoq dui toq é hui berá a nghut. ¹⁴ Hau htoq agó, Hkrisduq gi, lhoq dui toq é a huí é ru nghut le gi, ngamoq hko kyô é hkyô eq, nungmoq é lumjینگ

hkyô gi, akôm dut byuq rá nghut lhê. ¹⁵ Hau htoq agó, Garai Gasang gi, haú Hkrisduq lé shi é mai lhoq dui toq bê hkyô lé, ngamoq saksé hkám bê nghut é yanmai, ngamoq gi, Garai Gasâng é hkyô má saksé apyoq pé dut byuq rá za nghut lhê. Nghut kôlhang, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui toq kat rá a nghut. ¹⁶ Hkâsu mù gê le, haú shi byuq bang lhoq dui toq é a huí é nghut jáng, Hkrisduq le, lhoq dui toq é hui berá a nghut. ¹⁷ Hkrisduq gi, lhoq dui toq é a huí é nghut jáng, nungmoq é lumjینگ hkyô gi, akôm dut lui, nungmoq gi, nungmoq é yubak mara hkaú má ru nyi nyi shi kó rá nghut lhê. ¹⁸ Haú nghut jáng, Hkrisduq má shi ló byuq bê bang le, htên byoq byuq rá za nghut lhê. ¹⁹ Nga-nhúng gi, shí ipyat lhê é matú za, Hkrisduq má myit myoqbyù hkyô wó é nghut jáng, byù banshoq bâng htoq má shogyo rayhup dut é je hui zo bang dut kó rá nghut lhê.

²⁰ Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi ló byuq bâng é sâng-hi ashi dut bê nghut ri. ²¹ Hkâsu mù gê le, shí-nò hkyô gi, byù rayuq đông mai lò bê nghut é eq rajung za, shi byuq bâng é dui toq hkyô le, byù rayuq đông mai lo é nghut lhê. ²² Hkâsu mù gê le, lunglhang bang gi, Adam é yanmai shi byuq é su, lunglhang bang gi, Hkrisduq eq rading ralhum za nghut é yanmai lhoq dui toq é hui rá nghut lhê. ²³ Nghut kôlhang, yuq hkangmó gi, ó le ó âng é hkún lhoq dui toq é hui rá nghut lhê: Hkrisduq gi, sâng-hi lhoq dui toq huí é sủ nghut lhê. Hau htâng má, Yhang jé lé é hkún, Yhang eq sêng é bang lhoq dui toq é hui rá nghut lhê. ²⁴ Hau htâng, jìhtúm jé rá nghut lhê; haú hkún, Yhang gi, up é bang banshoq, ahkáng ayá eq

a-tsam pé lé ban lhoq htên pyâm é htâng, haù Íwa nghut sù Garai Gasang lé mingdán ap byi râ nghut lhê. ²⁵ Hkâsu mù gâ le, Yhang gi, Yhâng é gye pé banshoq lé, Yhâng é hkyî wang ô má tô pyâm é hkûn jé shoq up nyi ra râ nghut lhê. ²⁶ Haù lhoq htên pyâm é hui râ nghut é ló htâng é gye gi, shî-nò hkyô nghut ri. ²⁷ Hkâsu mù gâ le, "Garai Gasang gi, jung hkanmó lé, Yhâng é hkyî wang ô má tô pyâm bê nghut ri."* gâ Chyúmdang má kê tô ri. "Jung hkanmó lé" Yhâng é a-ô má tô pyâm bê ga taí é hkûn, jung hkanmó lé Hkrisduq é a-ô má tô pyâm bê sù Garai Gasang yhang kúm a lom é hkyô, san za nghut nyi ri. ²⁸ Yhang gi, haù hkyô ban kut é htâng má, haù Zo yhang le, jung hkanmó lé Yhâng é a-ô má to byi bê sù Garai Gasang é a-ô má nyi sù dut nhang é hui râ nghut mù, Garai Gasang gi, lhunglhâng htoq má gyaù sù nghut luí, lhunglhâng lé sîng sù nghut râ nghut lhê.

²⁹ Dui toq hkyô a joq é ru nghut le gi, shi byuq bê bâng é matú wui-myhup hkám byi bùm kê é gi, hai akyû bò kó râ lúh? Haù shi byuq bang lhoq dui toq é a hui kê é ru nghut le gi, yhangmoq matú hai mù byu pé wui-myhup hkâm yù kó râ lúh? ³⁰ Ngamoq gi, ngamoq é matú, hkyíng hkanmó hai mù chiq râ jowò má nyi râ lhê lúh? ³¹ Gumang wui ê, ngò gi, nyi wuí aluq shoí shoí shi é hui zò é nghut lhê. Haù su nghú é gi, nga-nhúng é Yhumsîng Hkrisduq Yesuq má, nungmoq é hkyô lé ngò hkyak wó gumrong é yanmai nghut lhê. ³² Ngò gi, xângzo hkyam dông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyû bò râ lúh? Shi byuq bang lhoq dui toq é a hui é ru nghut le gi,

"Nga-nhúng gi, napmá shî râ nghut é yanmai,

zo sháng, shuq sháng."³³

ngû râ za nghut lhê.* ³³ "A ge é zùm yap luzúm wui gi, ge é nyi yap sâmlai lé hten nhang é nghut lhê." gâ é sanghkyang eq rajung za, hkyô shuí nghoq é hkâhui zo kó! ³⁴ Nungmoq gi, tau bûn gyîng lò mù, mara hkâkut shut lo kó; hkâsu mù gâ le, Garai Gasang lé a sê é byù ra-am nyi akò. Ngò haù su nghú taí é gi, nungmoq hoq bun râ matú nghut lhê.

Dui Toq É Gungdu

³⁵ Nghut kôlhâng, rayuq yuq gi, "Haù shi byuq bê bang, hkâsu kut lhoq dui toq é hui kó râ lúh? Yhangmoq gi, hkasû é gungdu nghut kó râ lúh?" ga myi râ nghut lhê. ³⁶ Haù-í nghâ sù ê! Nang hô hkyô kat é pé gi, shi byuq é za a nghut jáng, yuq htoq lò râ a nghut mhaí. ³⁷ Nang, kyô hkyô é hkûn, yuq lò râ nghut é agâm lé hô hkat e a nghut é za, sunsô amyui nghut nghut, gotû amyui rajung jung nghut nghut lé za hô kat é ru nghut lhê. ³⁸ Nghut kôlhâng, Garai Gasang gi, Yhang myit hpyit to bê eq rajung za haù lé gungdu ralhùm byi mù, kyôshi myui hkanmó lé, ó le ô é gungdu byi ri. ³⁹ Gungsho lhunglhâng gi, rajung za a nghut. Byù pé é gungsho gi, rajung, dusak pé é gi, gó jung, nghoq pé é gi, gó jung, ngozo pé é gi, gó jung ru nghut lhê. ⁴⁰ Mauhkûng gùng pé le joq é nghut luí, myidam gùng pé le joq ri; nghut kôlhâng, mauhkûng gùng pé é shingkan gi, rajung, myidam gùng pé é shingkan gi, gó jung ru nghut lhê. ⁴¹ Haù búi má bo é shingkan gi, rajung, lhamó mâ é gi, gó jung, kyí pé mâ é gi, gó jung ru nghut lhê; kyí racham eq rachâm é shingkan le gotû tû shai lhum lhê.

* 15:27 Hkya-on 8:6 * 15:32 Esai 22:13 * 15:32 Dang ngho shî gi, a lumjîng bang taí é dang nghut lhê.

⁴² Haù mù, shi byuq bê bang é dui toq hkyô le, haù eq rajung za nghut ri. Haù hô hkyô kat é gungdu gi, htên byoq sê é nghut luí, lhoq dui toq huí é gungdu kúm gi, htên byoq a sê é nghut lhê. ⁴³ Hô hkyô kat é hkún gi, aróng a bò, lhoq dui toq huí é hkún gi, hpungwup shing kang bo ri. Hô hkyô kat é hkún gi, wum nyhóm mù, lhoq dui toq huí é hkún gi, a-tsam bo ri. ⁴⁴ Gungsho gungdu gi, hô hkyô é hui mù, woi-nyí gungdu gi, lhoq dui toq é huí ri.

Gungsho gungdu joq é nghut le gi, woi-nyí gungdu le joq é nghut lhê. ⁴⁵ Haù nghut mù, "Haù sâng-hi yuq byù Adam gi, asak dui é xângzo dut bê nghut ri."* ga kâ tô ri. Haù ló htâng é Adam kúm gi, asak byí é woi-nyí nghut ri.† ⁴⁶ Haù woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê. ⁴⁷ Haù sâng-hi yuq byù gi, myidàm mã é tseyún lé sai é nghut mù, htang lhê yuq byù gi, mauhkúng htoq mã é nghut ri. ⁴⁸ Haù myidàm byù nghut sù su, myidàm eq sêng é bang le nghut nyi akô; haù mauhkúng htoq mã é byù nghut sù su, mauhkúng eq sêng é bang le nghut nyi akô. ⁴⁹ Nga-nhúng gi, myidàm byù é gunghkyâng isâm lé hkam yù bê nghut é su, mauhkúng htoq mã é byu é gunghkyâng isâm lé le myang hkam yù râ nghut lhê.

⁵⁰ Gumàng wui ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yù râ a nghut, htên byoq sê é le, htên byoq a sê é silí wunlí lé wó yù râ a nghut. ⁵¹ Gyo to keq, zaú tô é hkyô lé, ngò, nungmoq lé taí kyo kôlé: Nga-nhúng banshoq bang gi, shi byuq râ a nghut é za, htaí lhik é hui râ ru nghut lhê. ⁵² Haù

gi, ló htâng é tut htê mying é hkún, ralhap za, myoqkuq ralap má dut râ nghut lhê. Hkâsu mù gà le, tut htê mying râ nghut lhê, haù hkún, shi byuq bê bang gi, htên byoq a sê é shut lhoq dui toq yu é hui râ nghut mù, nga-nhúng gi, htaí lhik é hui râ nghut lhê. ⁵³ Hkâsu mù gà le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù râ dut é nghut lhê. ⁵⁴ Haù htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yu é hkún sheq, "Shî-nò hkyô gi, ùng budâng eq myui pyâm é hui bê nghut ri."* ga kâ tô é eq,

⁵⁵ "Shî-nò hkyô ê, náng é ùng budang gi, hkâmá lú? Shî-nò hkyô ê, náng é nyin gi, hkâmá lú?"*

gâ tô é sanghkyang gi, dik râ nghut lhê. ⁵⁶ Haù shî-nò hkyô é nyin gi, yubak mara nghut ri; yubak marâ é a-tsam gi, jep é tarâ nghut ri. ⁵⁷ Nghut kôlhâng, Garai Gasang lé jeju hkya-ôn lhê! Yhang gi, nga-nhúng é Yhumsing Yesuq Hkrisduq dông mai, nga-nhúng lé ùng budang byí é nghut ri.

⁵⁸ Haù mù luí, ngá é chyitdap gumang wui ê, yap gíngtíng nyi keq. Hai eq le, nungmoq lé hkâlhoq dui nún nhâng kó. Nungmoq gi, haù Yhumsing má nungmoq wùn waq é muzó akôm a nghut é lé sé kô é nghut lhê yanmai, haù Yhumsing é muzó lé ayang wùn waq shikut nyi keq.

16

Yerusalem Wà Mó Mã É Lumjítng Bâng É Matú Alu Hkyuí Râ Hkyô

¹ Ahkuí, Garai Gasâng é byu pè é matú alu hkyuí râ hkyô eq séng luí gi, haù Galatiq mau mã é noqkuq hpúng pé lé ngò kut nhang é sù kut keq. ² Ngò jé lé é hkún, alu

* 15:45 Apùn 2:7 † 15:45 Ló htâng é Adam gi, Yesuq lé taí nau é nghut lhê. * 15:54 Esai 25:8 * 15:55 Hos 13:14

hkyuî râ hkyô a kut ra râ đông, bat hkangmó mã é sâng-hi nyí mã, yuq hkangmó gi, yhumsing wó ho é mã cháng mù, gam tô to láng keq. ³ Ngò jé lé é hkùn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wà mó mã é dé nhâng râ nghut lhê. ⁴ Ngò le é ang râ dut é nghut jáng, yhangmoq gi, ngá é byinzùm kut râ nghut lhê.

Poluq Lum Kat É Hkyô Pé

⁵ Ngò gi, Makedoni mau lai byit é htâng, nungmoq chyáng jé lé râ nghut lhê. Hkâsu mù gâ le, ngò gi, Makedoni mau lai byit râ za nghut lhê. ⁶ Ngò hkâmá é kôhang, ngá é hkyowuî mã nungmoq wó garúm kat kó râ matú, ngò gi, rayoq zo nghut nghut, gyoqmyô lháng lai shoq nghut nghut, nungmoq eq rahá nyi abe. ⁷ Ngò gi, lai lô uchyang za nungmoq lé lé kum râ nghut mù, ahkuî wó myâng râ lé a nau é nghut lhê; ngò gi, haû Yhumsing dóng é nghut jáng, nungmoq eq rahá rayoq nyi râ lé myit myoqbyu lhê. ⁸ Nghut kôhang, ngò gi, Penteko-ti poi buinyi jé shoq Ehpesu myuq mã nyi râ nghut lhê. ⁹ Haû mù gâ le, ngo lé htuq htíng é bang myo myo nyi é nghut kôhang, akyû htoq é muzó é matú hkum mó ngo lé hpông to byi é yanmai nghut lhê.

¹⁰ Timohti jé lé jáng, yhang, nungmoq eq rahá nyi é u mã, gyuq é hkyô haî le a joq râ matú wú byi keq; hkâsu mù gâ le, yhang gi, haû Yhumsing é muzó lé, ngò su wùn waq wún é sù nghut lhê. ¹¹ Haû mù, ó yuq le, yhang lé hkâwú shóm kó. Yhang gi, ngá chyáng wó dum taû jé sháng gaq, yhâng é hkyowuî mã nguingón é đông nhang kat keq. Haû gumang wuî eq rahá lò kó râ lé, ngò myit láng nyi lhê.

¹² Ahkuî, nga-nhông é gumang Apolo é hkyô eq séng luî ga jang; yhang gi, haû gumang wuî eq rahá

nungmoq chyáng lé râ lé, ngò, gyai yhang wum taî tsuq lhê. Yhang kúm gi, ahkuî lé nau é myit a dé bò shi, nghut kôhang, yuqyo é ahkying wó jáng, yhang lé lô râ nghut lhê.

¹³ Machya nyi keq; lumjing hkyô mã ging ging tíng tíng yap nyi keq; gyuq kyum myit hkâbô kó; wum bo nyi keq. ¹⁴ Jung hkangmó lé, chyitdap myit eq zui saí keq.

¹⁵ Stehpana eq yhâng é yhumbyù wuî gi, Ahkaia ming mã sâng-hi hpúng wâng bang nghut luî, yhangmoq gi, yhumsing gùng lé, haû sânyúng bâng é dojaû hkyô mã ap nóng bekô lé, nungmoq sê akô nghut ri. Gumang wuî é, ngò, nungmoq lé wum taî tsuq kat kôlé, ¹⁶ haû sù é bâng é a-ô mã le, haû muzó mã bo wang lòm mù, mù zui shikut bang yuq hkangmó é a-ô mã le, nyi keq. ¹⁷ Ngò gi, Stehpana, Hportunatu eq Ahkaiku pé jé lo é hkùn, gyai gabú é nghut lhê, haî mù gâ le, yhangmoq gi, nungmoq a kut byi é hkyô lé, lhoq pying byi bekô nghut ri. ¹⁸ Hkâsu mù gâ le, yhangmoq gi, ngá é woi-nyí eq nungmoq é woi-nyí lé lhoq ngón byi bekô nghut ri. Haû sù é bang lé, hpautap nyi keq.

Ló Htâng É Shi-kyâm Dang

¹⁹ Asia mau mã é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhùm mã chôm huî é noqkuq hpúng lé, haû Yhumsing mã nungmoq lé gyai yhang shi-kyâm kat akô. ²⁰ Shí mã nyi é gumang wuî banshoq bang gi, nungmoq lé shi-kyâm kat akô. Rayuq eq rayuq chyoyúng é chyitpuq eq shi-kyâm lhum keq.

²¹ Ngò, Poluq gi, shi-kyâm dang shí lé, ngá é loq eq yhang ká é nghut lhê.

²² Rayuq yuq, haû Yhumsing lé a chyitdap é nghut jáng, haû yuq gi, nhing pyâm é huî sháng gaq. Yhumsing é, jé lé aq hkoi!

²³ Haû Yhumsîng Yesuq é jeju gi,
nungmoq eq rahá nghut nyî sháng
gaq.

²⁴ Ngá é chytđap myit gi, Hkris-
đuq Yesuq má nungmoq banshoq
bâng chyáng joq nyî sháng gaq.
Amen.

KORINHTUQ Pê Chyáng Htang Dàm Hun Kat é Laiká (2 Corinthians)

¹ Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhùng é gumang Timohti le kut, Korinhtuq myuq mâ é, Garai Gasâng é noqkuq hpúng lé le, Ahkaia mau gón mâ é sâ-n-yúng bang banshoq chyáng le, dang kyô kat lê: ² Nga-nhùng é Îwa nghut é Garai Gasang eq haû Yhumsing Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyí sháng gaq.

Nhik ting hkyô banshoq é Garai Gasang

³ Nga-nhùng é Yhumsing Yesuq Hkrisduq é Yhângwa eq Garai Gasang, shogyo nhikmyin hkyo é Îwa eq nhik ting hkyô banshoq é Garai Gasang gi, hkya-on kungton é huí nyí sháng gaq. ⁴ Garai Gasâng chyáng mai ngamoq wó yú bê nghut é nhik ting hkyo èq, hkasû é wuîhke hkyô hui bang lé le nga-nhùng wó nhik ting byí sháng gaq ga, Yhang gi, ngamoq é wuîhke hkyô banshoq má nhik ting byí ri. ⁵ Hkâsu mù gâ le, Hkrisduq hui zô é jamjau hkyô myo myo lé ngamoq bo hui zô é su, Hkrisduq đông mai, ngamoq é nhik ting hkyô le byíng mui nyí é nghut lê. ⁶ Ngamoq, myit myo uhkyí é huí é nghut jáng, nungmoq é nhik ting hkyô eq hkyi yù hkyo é matú nghut nyí ri; ngamoq, nhik ting é huí é nghut jáng, nungmoq é nhik ting hkyo é matú nghut luí, haû gi, ngamoq jamjaû é eq rajung za nghut é jamjau hkyô lé, myit hing é đông mai wó jân pyâm rà a-tsam, nungmoq chyáng lhoq htoq byí é

nghut lê. ⁷ Haû mù, ngamoq é jamjau hkyô pé má nungmoq bo lôm bekò nghut é su, ngamoq é nhik ting hkyô má le nungmoq bo lôm bekò nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lê.

⁸ Gumang wuî ê, Asia mau má, wuîhke jamjaû é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó jân é a-tsam lhang htum shoq hpuzô é nghut luí, ngamoq gi, asak duí lo rà lhang a myit myoqbyu lô é nghut lê. ⁹ Gè gè yhang, ngamoq gi, sat hui berá nghû, ngamoq é i-myt má lumjing pyâm é nghut lê. Nghut kôlhâng, haû gi, ngamoq gùng ngamoq a lumhkau é za, shí bê bang lé lhoq duí toq sù Garai Gasang lé lumhkaû rà matú dut é nghut lê.

¹⁰ Garai Gasang gi, haû sù é shí rà hkyô mai hkyi yù bê nghut mù, ngamoq lé hkyi yù rà za nghut lê. Yhang gi, ngamoq é matú nungmoq kyûdung byí nyí é u má, xoq luí ngamoq lé hkyi yù rà za nghut lê nghû, ngamoq gi, Yhang lé myit myoqbyu to bê nghut luí, ¹¹ myo myo kyûdung byí é lé gyo byí é má ngamoq shimân jeju wó mù, byù myo myo gi, ngamoq wó é shimân jejú é yanmai Garai Gasang lé jeju hkya-on kó rà nghut lê.

Poluq, Hen Tô É Muzó Htaí Pyâm É Lé Tái Hung É Hkyô

¹² Ngamoq nghutbûn é gi, Garai Gasâng chyáng mâ é chyoiyúng hkyô eq lhumzui hkyô má, mingkan zo wuî eq ngamoq asak duí bê hkyô lé le, je luí nungmoq eq zùm yap é hkyô lé le, ngamoq é myit sôn sê é hkyo èq, saksé hkâm byí é hkyô nghut lê. Ngamoq haû su kut é gi, mingkan hpaqchyí byéng-yá đông mai kut é a nghut é za, Garai Gasâng é jeju đông mai kut

é ru nghut lhê. ¹³ Hkâsu mù gà le, ngamoq gi, nungmoq a dat nghap é eq a sê gyô é haí le a ká byí kat é nghut lhê. Ngò, myit myoqbyu kat é gi, ¹⁴ nungmoq gi, ngamoq é hkyô ra-am lé wó sê gyô yù bê eq rajung za, haù Yhumsing Yesuq é buinyi má nungmoq é hkyô lé ngamoq nghutbun râ nghut é su, ngamoq é hkyô lé nungmoq wó nghutbun râ matú, nungmoq, banshoq lé sé gyo kó râ nghut lhê.

¹⁵ Haù hkyô lé, ngò hkyak myit lum to bê nghut é yanmai, nungmoq gi, akyù í dam wó hkam yù kó sháng gaq nghû, ngò gi, nungmoq chyáng hí lé kum râ matú hen to bê nghut lhê. ¹⁶ Ngò gi, Makedoni mau shut e ló é hkyowui má nungmoq lé hí lé kum mù, Makedoni mau mai nungmoq chyáng dum taù lò luí, Yuda mau shut e é hkyowui má, nungmoq, ngo lé garúm kat kó râ lé myit lum to bê nghut lhê. ¹⁷ Ngò gi, haù hkyô hen é hkûn, agon za hen hkyut é nghut lhê lhú? Haù a nghut jáng, ngò hen é pé gi, ra-u má za, "Nghut lhê, nghut lhê." nghû é eq, "A nghut, a nghut." nghu é wó taí râ matú, mingkan myit đông hen é nghut lhê lhú?

¹⁸ Gè gè yhang, Garai Gasang gi, lhumzui sù yhang nghut é eq rajung za, ngamoq é danglù gi, nungmoq chyáng "Nghut lhê" lé, "A nghut" nghu é a nghut. ¹⁹ Hkâsu mù gà le, ngò èq le, Sila èq le, Timohti èq le, nungmoq chyáng hko kyo bê nghut é sù, Garai Gasang é Yhangzo Yesuq Hkrisduq gi, "Nghut lhê" nghu é eq "A nghut" nghu é sù a nghut é za, Yhang má gi, hkâ-nhám le "Nghut lhê" nghu é za joq lhê. ²⁰ Hkâsu mù gà le, Garai Gasang gi, danggidiq hkâ-myhó to kôle, haù pé gi, Hkrisduq má "Nghut lhê" chyat nghut lhê. Haù mù, Garai Gasang é hpungwup shingkang é matú, Yhang đông mai, nga-nhung gi, "Amen" nghû taí é nghut lhê.

²¹ Ngamoq eq nungmoq lé Hkrisduq má yap gingting nhang é sù gi, Garai Gasang nghut ri. Yhang gi, nga-nhung lé masat é xù but byi mù, ²² Yhang sing lhê gà é dizik, nga-nhung lé htung tap byi luí, jé lô râ hkyô pé hkyak joq lhê nghu é masat zè đông, Yhang é Woi-nyí lé nga-nhung é i-myt unghkaù má kat byi bê nghut ri.

²³ Ngò gi, nungmoq hkyamsa râ matú, Korinhtuq myuq má a dum taù lé é hkyô têng é lé, ngá é saksé dut râ đông Garai Gasang lé wut dúng lhê. ²⁴ Haù gi, nungmoq é lumjing hkyô lé ngamoq sing pyám byí é a nghut é za, nungmoq é gabú hkyo é matú, nungmoq eq rahá chôm zui sai é ru nghut lhê; haí mù gà le, lumjing myit mai za nungmoq wó yap ging nyi bùm kô é ru nghut lhê.

2

¹ Haù mù luí, ngò gi, nungmoq lé myit nò nhang é dut râ đông, lé dum kùm é a kut râ nghû, myit hpyit to bê nghut lhê. ² Hkâsu mù gà le, nungmoq lé ngò yón kuq nhang é nghut le gi, ngò yón kuq nhang bê bang nungmoq mai lai luí, ó yuq wá ngo lé wó gabú nhang râ lhú? ³ Ngò jé lé é hkûn, ngo lé gabú nhang râ âng é bang èq, ngo lé myit nò nhang é a hui sháng gaq nghû, ngò gi, ngò kut é eq rajung za laiká ká kat bê nghut lhê. Ngá é gabú hkyô lé nungmoq banshoq bang wó bo gabú kó râ nghut lhê nghû, nungmoq banshoq bang lé ngò hkyak myit lum tô lhê. ⁴ Hkâsu mù gà le, ngò gi, nungmoq lé laiká ká é hkûn, myit myo uhkyí mó èq le, myit má yón kuq é èq le, ngaubyi ngau-nhap é èq le, ká kat bê nghut lhê. Haù gi, nungmoq lé yón kuq é hui nhang râ matú a nghut é za, nungmoq lé ngò hkâ-í chyitdap é hkyô lé sé nhang râ matú ru nghut lhê.

Mara Hkyut Byi Lhum Râ Hkyô

⁵ Yón kuq hkyô lhoq htoq é sù gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haù hkyô eq séng luí, ngò gyai wá yhang zuq zuq a tái nau é nghut lhê. ⁶ Nungmoq myo hpyâng eq yhang lé mara dam byi é hkyô gi, yhang é matú gé bê nghut ri. ⁷ Nghut kôlhang, ahkuí, nungmoq gi, yhang a wó jan loshoq myit yón é a huí zo rá matú, yhang lé mara hkyut pyám byi mù, nhik tíng byi keq. ⁸ Haù mù luí, nungmoq é chyitdap myit gi, yhang é ahtoq má dum lhoq gíng shit nyi keq nghû, nungmoq lé ngò wum tái tsuq kat lhê. ⁹ Ngò, nungmoq lé haí mù laiká ká byi kat é hkyô gi, nungmoq chyam wú huí é hkyô lé wó jân é hkyô eq jung hkanqmó má jìno gyo hkyô bò a bo é lé, wó sé rá matú le nghut lhê. ¹⁰ Nungmoq, rayuq yuq lé mara hkyut byi é nghut le gi, ngò le, haù yuq lé mara hkyut byi lhê. Mara hkyut rá rajung jung joq é nghut jáng, ngò mara hkyut é gi, Tsadán eq nga-nhúng lé a wó úng rá matú, nungmoq é yanmai, Hkrisduq é myoq hí má ngò mara hkyut byi bê nghut lhê. ¹¹ Hkâsu mù gâ le, Tsadán hen é hkyô pé lé nga-nhúng a sê é a nghut.

Dangshikaq Asik Mâ É Hpungmû Wùn Bang

¹² Ngò gi, Hkrisduq é gabú danglù hko kyo rá matú, Troa myuq má é jé é hkún, haù Yhumsing gi, ngo lé hkum hpóng byi é lé, ngò myang ri. ¹³ Nghut kôlhang, ngò gi, ngá é gumang Tituq lé haù má a myang ho é yanmai, myit myo mù, yhangmoq lé shi-kyâm to luí, Makedoni mau shut xoq e ló é nghut lhê.

¹⁴ Nghut kôlhang, Hkrisduq má, ngamoq lé hkâ-nhám le úng budang hkyô shut shu-ù yù mù, Hkrisduq lé sê é sumsé hpaqchyí é nam

ngón shôm lé, ngamoq đông mai jowò hkanqmó má tái pyo é sù, Garai Gasang gi, jeju hkya-ôn é huí nyi sháng gaq. ¹⁵ Hkâsu mù gâ le, ngamoq gi, hkyi yu é huí nyi bâng chyáng le, htên byoq ló é huí nyi bâng chyáng le, Garai Gasâng é matú Hkrisduq é nam ngón shôm nghut nyi lhê. ¹⁶ Ngamoq gi, htên byoq nyi bâng é matú shí-nò hkyo é shôm dut mù, hkyi yù huí nyi bâng é matú nghut jáng, asak hkyo é nam ngón shôm dut é nghut lhê. Haù mù, ó yuq wá muzó shí eq htuk rá lúh? ¹⁷ Ngamoq gi, amyat wó rá matú Garai Gasâng é mungdang lé hkat ung zô é byù myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé đông lhumzui myit mai tái é nghut lhê.

3

¹ Ngamoq gi, yhumsing gùng yhumsing dum owaq hi ló é nghut lhê lúh? Byù ra-am kut é su, nungmoq chyáng, ngamoq é matú htuqluq htuqbáng laiká ká byi kô é ngamoq ra rá luq, nungmoq yuq ngamoq é matú ká byi ra kó rá luq? ² Nungmoq gùng yhang gi, ngamoq é myit nhiklhum má kâ tô é, yuq hkanqmó eq nghap luí sê yu é laiká gùng pé nghut akô. ³ Nungmoq gi, nungmoq chyáng ngamoq hpungmû wùn waq é yanmai, Hkrisduq chyáng má é laiká nghut kô é hkyô lé shit nyi akô. Haù gi, kâ jung chí eq kâ tô é đông a nghut é za, rû dui nyi é Garai Gasâng é Woi-nyí eq kâ tô é nghut é htoq agó, luqlong pé má kâ tô é đông a nghut é za, xàngzo byu é myit nhiklhum long pé má kâ tô é ru nghut lhê.

⁴ Haù su nghû hkyak wó myit lum é hkyô gi, Garai Gasâng é hí má, Hkrisduq đông mai ngamoq wó yu

é nghut lhê. ⁵ Ngamoq gi, yhumsing gùng haí lé le wó kut lhê nghu é a nghut, ngamoq é a-tsam gi, Garai Gasâng chyáng mai lo é nghut lhê. ⁶ Yhang gi, ngamoq lé, dangshikaq asik lé wó wùn waq râ a-tsam byi bê nghut ri. Dangshikaq asik haú gi, tarâ laiká mai lo é a nghut é za, Woi-nyí mai lo é ru nghut lhê. Hkâsu mù gà le, laiká gi, shí dàm byi lhê, Woi-nyí kúm gi, asak byí é nghut lhê.

Dangshikaq Asik É Hpungwup Shing kang

⁷ Ahkuí, haú Mosheq é myoqdong mâ é hpungwup shing kang é yanmai, haú Israelaq byu pé gi, yhâng é myoqdong lé a wó wú tsuq to kó nghut ri. Hpungwup shing kang haú shúm lo byuq sê é nghut kôlhang, luqlong má dok kâ tô é, shí-nò hkyô lhoq htoq é tarâ muzó gi, hpungwup shing kang eq rahá jé lé é nghut lhê. ⁸ Haú su nghut jáng, haú Woi-nyí é muzó gi, hpungwup shing kang je riyhang dut râ a nghut kó lúh? ⁹ Gè gè yhang, haú byù lé mara byí é tarâ muzó lháng, hpungwup shing kang bo é nghut le gi, dingmán nhang é hkyô sik gi, je riyhang hpungwup shing kang bo é nghut lhê ô! ¹⁰ Hkâsu mù gà le, hpungwup shing kang bo é tarâ muzó gi, hpungwup shing kang je bo é dangshikaq asik eq whuí é hkûn, hpungwup shing kang a bò lo dut byuq bê nghut ri. ¹¹ Shum byuq ló é tarâ lháng gi, hpungwup shing kang eq rahá lé jé bê nghut le gi, ru gíng nyi é dangshikaq asik é hpungwup shing kang gi, je riyhang gyaú râ nghut lhê ô!

¹² Haú mù luí, ngamoq gi, haú sù é myoqbyù hkyô wó é yanmai, gyuq kyum myit a bo é hkyô shit é nghut lhê. ¹³ Ngamoq gi, Mosheq su a nghut. Yhang gi, duqbang é hkyô shúm byuq ló é hkûn, haú

Israelaq byu pé haú lé a wú tsuq râ matú, yhâng é myoqdong lé myoqgo eq nghop pyâm é sù nghut ri. ¹⁴ Nghut kôlhang, yhangmoq é myit gi, lhoq chut byí é hui bekô nghut ri; hkâsu mù gà le, hkû-nyí jé shoq, dangshikaq axau lé nghap é hkûn, rajung zâ é myoqgò gi, ru nghop to byí ashí nghut ri. Haú gi, huí sêng pyâm é a hui shí, haí mù gà le, Hkrisduq dông za haú lé wó yu pyâm é nghut lhê. ¹⁵ Hkû-nyí jé shoq lháng, Mosheq é laiká lé nghap é hkûn, yhangmoq é myit nhiklhum má myoqgò eq nghop tô é nghut ri. ¹⁶ Nghut kôlhang, ó yuq le, Yhumsing chyáng hká u líng lò kôlhang, haú hkûn jáng, myoqgò gi, hî pyâm byí é hui râ nghut lhê. ¹⁷ Yhumsing gi, haú Woi-nyí nghut mù, Yhumsing é Woi-nyí nyi é jowò má, luthkyô le joq lhê. ¹⁸ Haú Yhumsing é hpungwup shing kang lé lhoq htoq shit é bang banshoq nghut é myoqdong má myoqgò a nghop é bang nga-nhúng gi, ru myo jat nyi é hpungwup shing kang lhoq htoq byi hkyô nghut é, Yhâng é isâm shut htaí lhik wang é huí nyi bê nghut lhê. Haú hkyô gi, haú Woi-nyí nghut sù Yhumsing chyáng mai lo é nghut lhê.

4

Tseyam Pé Má Bo É Sutzé

¹ Ngamoq gi, Garai Gasâng jeju mai muzó hkyô haú wó é nghut mù, myit wum a gyuí é nghut lhê. ² Ngamoq gi, zaú tô é eq hoq htoq é hkyô pé lé tô pyám luí, mhaú zô é hkyô le a kut, Garai Gasâng é mungdang lé le ahpuq alhik a kut é bang nghut lhê. Haú su kut râ malaí, ngamoq gi, haú tengmán hkyô lé san za lhoq htoq shit é dông, Garai Gasâng é hí má yuq hkangmó é myit sôn sê é hkyô má, yhumsing gùng yhumsing htuk shoq nyi lhê. ³ Ngamoq é gabú danglù gi, myoqgo eq nghop pyâm é huí é

nghut jáng, haû gi, htên byoq nyi bâng chyáng za nghop pyám huí é ru nghut lhê. ⁴ Haû Garai Gasâng é azông isâm nghut sù, Hkrisduq é hpungwup shingkang bo é gabú danglu é maubó lé, a lumjúng bang a wó myâng kó sháng gaq ga, ipyat shi é garai* gi, yhangmoq é myit lé lhoq chit byi bê nghut ri. ⁵ Haû nghut é yanmai, ngamoq gi, yhum-sing gùng eq séng luí hko kyô é a nghut é za, Yesuq Hkrisduq gi, Yhumsing nghut é hkyô lé le, Yesuq é matú, ngamoq gùng yhang gi, nungmoq é jùn pé nghut é hkyô lé le, hko kyô é ru nghut lhê! ⁶ Hkâsu mù gâ le, "Mauchut hkaû mai maubó htoq lô sháng gaq."* ga taí é Garai Gasang gi, Yesuq Hkrisduq é myoqdong mà é Garai Gasâng é hpungwup shingkang é maubó lé sê gyô é nyan lé, nga-nhung lé byí é dông, Yhâng é maubó lé, nga-nhung é i-myt unghkaû má duqbó nhâng bê nghut ri.

⁷ Nghut kôlhang, ngamoq gi, sutzè haû bo é tseyam pé† nghut nyi lhê. Haû gi, gyaú dik é a-tsam mó gi, ngamoq chyáng mà é a nghut é za Garai Gasâng chyáng mà é nghut é hkyô lé tân shit rá matú nghut lhê. ⁸ Ngamoq gi, wuîhke hkyo èq lhíngkyuq mai gyai yhang nhê zik é hui kôlhang, a gyop byuq é nghut lhê; myit lhoq nhúng pyâm é hui kôlhang, myit a htùm byuq é nghut lhê; ⁹ zing-rî é hui kôlhang, kâng pyám huí é a nghut; bat lhêng pyâm é hui kôlhang, htên byoq huí é a nghut. ¹⁰ Haû Yesuq é asak ùi hkyô le, ngamoq é gungdu má lhoq htoq shit é hui sháng gaq nghû, ngamoq gi, Yesuq shi é hkyô lé, hkâ-nhám le, ngamoq é gungdu má wùn waq wún é nghut lhê. ¹¹ Hkâsu mù gâ le, Yesuq é asak ùi hkyô gi, nga-nhung é shí sê é gungdu má lhoq

htoq shit é hui sháng gaq nghû, asak ùi nyi é bang ngamoq gi, Yesuq é matú é yanmai, hkâ-nhám le, shi byuq hkyô shut ap pyâm é huí nyi ri. ¹² Haû mù luí, shi byuq hkyô gi, ngamoq má mù zuí nyi ri; asak ùi hkyô kúm gi, nungmoq má mù zuí nyi é nghut ri.

¹³ "Ngò gi, lumjúng bê nghut lhê, haû mù, ngò taí é nghut lhê."* ga kâ tô é eq rajung za, ngamoq le, lumjúng hkyô hau eq yhang, lumjúng bê nghut mù taí é nghut lhê. ¹⁴ Haû mù gâ le, haû Yhumsing Yesuq lé shi é mai lhoq ùi toq é Sù gi, ngamoq lé le, Yesuq eq rahá lhoq ùi toq mù, nungmoq eq rahá, ngamoq lé Yhâng é hí má shuí jé rá nghut é lé, ngamoq sê lhê. ¹⁵ Haû jeju wó é byu pé gi, je riyhang myô jat lò mù, Garai Gasâng é hpungwup shingkang é matú, jeju hkya-on é hkyô gi, byíng mui nyi sháng gaq ga, haû pé banshoq gi, nungmoq é akyu é matú nghut nyi ri.

¹⁶ Haû mù luí, ngamoq gi, myit wum a gyuí é nghut lhê. Ngamoq é shinggan gungdu gi, htên byoq ló nyí kôlhang, i-myt unghkaû gi, ra-nyí eq ra-nyí asik dut nhang é huí nyi ri. ¹⁷ Hkâsu mù gâ le, ngamoq é tiq é eq razup zâ é wuîhke hkyô pé gi, ngamoq é matú haû pé htoq gyai hkík é ahtum abyuq é hpungwup shingkang lé, wó yú nhang ri. ¹⁸ Haû mù, nga-nhung é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gâ le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

5

Mauphông Htoq Mã É Yhôm

* 4:4 Ipyat shi é garai gâ é gi, Tsadán lé gâ é nghut lhê. ✪ 4:6 Apûn 1:3 † 4:7 Tseyam pé gâ é gi, nga-nhung é wum nyhôm é gungdu lé gâ é nghut lhê. ✪ 4:13 Hkya-on 116:10

¹ Haû myidàm zúm nghut é nga-nhúng lúng nyi é gungdu gi, htên byoq sê é nghut kôlhang, byu loq êq sai é a nghut é za, mauhkúng htoq má joq é ahtum abyuq é yhûm* nghut é, Garai Gasâng chyáng mã é yhûm lé, nga-nhúng wó é hkyô lé, nga-nhúng sê lhê. ² Nghut kôlhang, ahkuí, nga-nhúng gi, nga-nhúng é mauhkúng yhûm lé tú hut byi é lé gyai yhang hui naû mù, nô-kying su kyíng nyi lhê. ³ Hai mù gà le, nga-nhúng gi, hut byi é hui jáng, gungdu a bò bang a dut lo rá nghut lhê. ⁴ Hkâsu mù gà le, nga-nhúng gi, zúm shi má lúng nyi é u lé, wôlai wùn mù, nô-kying su kyíng nyi lhê; haû gi, shi byuq sê é lé, asak dui é èq wó htaí lhik pyám sháng gaq nghû, nga-nhúng gi, a hut byi é hui rá lé a ô nau é za, nga-nhúng é mauhkúng yhûm lé tú hut byi é hui rá lé ô nau é yanmai nghut lhê. ⁵ Ahkuí kúm, jeju haû hkam yù rá matú, nga-nhúng lé lajáng to byi é sù gi, Garai Gasang nghut mù, jé lô rá hkyô gi, hkyak joq lhê nghû é masat zè đông, nga-nhúng lé haû Woi-nyi byi bê nghut ri.

⁶ Haû mù luí, ngamoq gi, hkâ-nhám le hkyak lum tô lhê. Gungdu shi má yhûm đông ru lúng nyi nyi gi, haû Yhumsing eq wê gâng nyi ashí nghut é lé ngamoq sê nyi lhê. ⁷ Ngamoq gi, byu-myang é đông mai a nghut é za, lumjing myit mai asak dui é ru nghut lhê. ⁸ Ngamoq gi, hkyak myit lum tô lhê nghû, ngò taí lhê, haû mù, gungdu shi mai wê gang luí, haû Yhumsing eq rahá nyi rá lé ngamoq je riyhang ô nau é nghut lhê. ⁹ Haû mù, ngamoq gi, gungdu shi má yhûm đông lúng nyi é nghut nghut, haû mai wê gâng é nghut nghut, ngamoq myit myoqbyu tô é jowò gi, Yhang lé gabú nhâng rá matú nghut lhê. ¹⁰ Hkâsu mù gà le, yuq hkangmó

gi, gungdu shi má yhûm đông lúng nyi é u lé, ge é nghut nghut, a ge é nghut nghut, kut é eq rajung za hkam yù rá matú, Hkrisduq é tará jéyáng tanghkuq hí má, nga-nhúng banshoq bang htoq shit ra rá nghut lhê.

Nguingón Hkyô Xoq É Muzó

¹¹ Haû mù, Yhumsing lé gyuq hkungga rá hkyô hai nghut é lé ngamoq sê é nghut luí, ngamoq gi, byu pé lé taí pùn kyíng shikut lhê. Ngamoq hai nghut é gi, Garai Gasâng chyáng san za nghut nyi mù, nungmoq é myit sôn sê é hkyô má le san za nghut rá lé, ngò myit lum lhê. ¹² Haû myit nhiklum má bo é lé gumrông rá malaí, byu-myang é lé gumrong é bang lé, nungmoq wó tú taí kó sháng gaq nghû, ngamoq gi, nungmoq chyáng yhumsing gung lé dum owaq shikut é a nghut é za, ngamoq é hkyô lé, nungmoq wó gumrông rá ahkáng, nungmoq lé byi é ru nghut lhê. ¹³ Ngamoq a gyíng é đông nghut le gi, Garai Gasâng é matú a gyíng é nghut lhê; ngamoq gyíng é đông nghut le gi, nungmoq é matú gyíng é nghut lhê. ¹⁴ Hkâsu mù gà le, Hkrisduq é chyt-dap myit èq ngamoq lé kut nhang nyi é nghut lhê. Haû gi, banshoq bâng é matú rayuq shi hkám byi bê nghut mù, banshoq bang shi é đông nghut bê nghû, ngamoq hkyak sê gyô é yanmai nghut lhê. ¹⁵ Yhang gi, asak dui nyi é bang, yhangmoq yhumsing gung é matú a dui lô é za, yhangmoq é matú shi hkám byi luí, lhoq dui toq é hui Su é matú dui kó sháng gaq ga, banshoq bâng é matú shi hkám byi bê nghut ri.

¹⁶ Haû mù, ngamoq gi, ahkuí mai, ó yuq eq séng luí le, mingkan hkyam đông mai a wú lô é nghut lhê. Ngamoq gi, hí hkùn Hkrisduq lé haû đông wú é nghut kôlhang,

* 5:1 Mauhkúng htoq má joq é ahtum abyuq é yhûm gà é gi, nga-nhúng, mauhkúng mingdán má jé é hkùn wó rá gungdu asik lé gà é nghut lhê.

haù su hkâ-nhám le a kut lô é nghut lhê. ¹⁷ Haù nghut mù luí, rayuq yuq gi, Hkrisduq má nghut nyi é nghut jáng, yhang gi, asik hpân hui sú dut bê nghut ri; haù axau gi, byuq byuq mù, lhunglhang asik dut bunhung! ¹⁸ Haù pé banshoq gi, Garai Gasâng chyáng má é chyat nghut lhê. Yhang gi, Hkrisduq đông mai nga-nhung lé Yhânggùng eq nguingón hkyô xoq yù luí, nguingón hkyô xoq é muzó ngamoq lé byi bê nghut ri. ¹⁹ Haù gi, Garai Gasang gi, byu pé é mara lé a matsing byi é za, Hkrisduq đông mingkan lé Yhânggùng eq nguingón hkyô xoq yù bê nghut luí, Yhang gi, nguingón hkyô xoq yu é mungdang haù lé, ngamoq lé ap byi to bê nghut nau é nghut lhê. ²⁰ Haù mù luí, ngamoq gi, Hkrisduq é gunglik pé nghut lhê mù, Garai Gasang gi, ngamoq đông mai nungmoq lé lhoq pùn kyíng nyi é nghut lhê. Garai Gasang eq nguingón hkyô xoq yù keq nghut, ngamoq gi, Hkrisduq é gunglik đông nungmoq lé dúng tôngbán nyi lhê. ²¹ Nga-nhung gi, Hkrisduq đông mai Garai Gasâng é dingmán bang wó dut kó sháng gaq ga, Garai Gasang gi, yubak mara a bò Sú lé, nga-nhung é matú yubak mara hkungga dut nhâng bê nghut ri.

6

¹ Ngamoq gi, Garai Gasâng é mú zui byinzùm wui nghut nyi é eq rajung za, Garai Gasâng jeju lé akyú a bo é đông hkâhap yù kó nghut, nungmoq lé wum tái tsuq kat lhê. ² Hkâsu mù gâ le,

"Ngò ô nau é ahkyíng má, nang lé ngò gyo byi bê nghut mù, hkyi yù hui rã buinyi má, nang lé ngò garúm bê nghut lhê."[☆]

ga luí, Yhang tái ri. Ngò, nungmoq lé tái kyo kôlé, ahkuí gi, Garai

Gasang ô nau é ahkyíng, ahkuí gi, hkyi yu é buinyi nghut ri.

Poluq É Wuíhke Hkyô Pé

³ Ngamoq é hpungmù gi, tái hpói pyâm é a hui sháng gaq nghut, ngamoq gi, ó yuq é hkyô má le, leqbat jung a to byi é nghut lhê. ⁴ Haù kut rã malaí, ngamoq gi, Garai Gasâng é dui-nhâng zoshâng wui nghut é hkyô lé, hkyô hkangmó má yhum-sing gùng yhumsing shit nyi lhê. Gyai hkam jân é hkyô má le, jamjau hkyô pé má le, wuíhke hkyô pé má le, myit myo uhkyi hkyô pé má le shit nyi lhê. ⁵ Nhuq bat hui é pé má le, htóng lhung hui é eq toq gabyông é má htm é hui é má le, mú zui shikut é má le, a myang yhup é myín pé má le, zòmut hui é má le, shit nyi lhê. ⁶ Sân-yúng é má le, sê gyó é hkyô má le, myit hing é eq myit ge é má le, Chyoiyúng Woi-nyi eq chyitdap myit akying má le, ⁷ tengmán é mungdang hko é má le, Garai Gasâng é a-tsam má le, loqyò loqpai má dingmán hkyô nghut é laknak pé đông le, shit nyi lhê. ⁸ Hpungwup shingkan byi é hui kô é đông eq a hkunggâ é hui kô é đông nghut kôle, a ge é luhkyang eq ge é luhkyang tái kôle, shit nyi lhê. Ngamoq gi, tengmán kôhang, mhaù zo bang đông sôn yu akó nghut ri. ⁹ Ngamoq lé sé kôhang, a sê é đông kut akó nghut ri; shi ló nyi kôhang, rú dui nyi é bang nghut lhê; nhuq bat é hui kôhang, sat pyâm é a hui shí é bang nghut lhê. ¹⁰ Yón hkyô byíng nhâng kôhang, hkâ-nhám le gabú nyi lhê; myùng kôhang, byù myo myo lé wó sùt nhang nyi lhê; haí le a wó kôhang, jung hkangmó lé sing é đông nghut lhê.

¹¹ Korinhtuq bang ê, ngamoq gi, nungmoq lé san za tái bê nghut luí, ngamoq é myit nhiklhum lé, nungmoq é matú làm shoq hpông to byi bê nghut lhê. ¹² Ngamoq gi,

ngamoq é chyitdap myit lé, nungmoq chyáng mai láng taù yu nyi é a nghut, nungmoq sheq, ngamoq chyáng mai láng taù yu nyi kô é ru nghut lhê. ¹³ Nungmoq le, myit nhiklhum lé làm shoq dum taù hpóng keq nghû, ngò gi, ngá zô pé lé đông taì lhê.

A Lumjìng Bang Eq A Nhungkut Râ Hkyô

¹⁴ A lumjìng bang eq rahá kandang hkâwaq kó. Hkâsu mù gâ le, dingmán é hkyô eq agè ashop é hkyô gi, haì sêng lhum lhê lúh? Maubó eq mauchut gi, hkâsu wó zùm yap kó râ lúh? ¹⁵ Hkrisduq eq Beliala* gi, hkâsu kut myit wó huì lhum kó râ lúh? Lumjìng sù rayuq eq a lumjìng sù gi, hkâsu wó pung lhum kó râ lúh? ¹⁶ Garai Gasâng é noqkuq yhùm eq hparà lhô pé gi, hkâsu wó hùm râ lúh? Hkâsu mù gâ le, nga-nhúng gi, rû dui nyi é Garai Gasâng é noqkuq yhùm nghut lhê. Haù gi, "Ngò gi, yhangmoq eq rahá nyi mù, yhangmoq chyáng sô nyi râ nghut luì, Ngò gi, yhangmoq é Garai Gasang dut mù, yhangmoq gi, Ngá é byu pé dut kó râ nghut lhê."☆ ga Garai Gasang taì tô é eq rajung za nghut ri.

¹⁷ "Haù mù luì, yhangmoq chyáng mai htoq lô mù, gotù san za nyi keq. A sansêng é zè lé hkâzàng kó, haù hkùn, Ngò, nungmoq lé lhom hap yù râ nghut lhê."☆ ga haù Yhumsing taì ri.

¹⁸ "Ngò gi, nungmoq é Ìwa dut mù, nungmoq gi, Ngá é byizo yuqzô pé dut kó râ nghut lhê."☆ ga haù wum-o a-tsam dik shoq bò Sù Yhumsing taì ri.

7

¹ Chyitdap é luzúm wuì ê, nga-nhúng gi, danggidiq haù pé lé wó

tô é bang nghut é yanmai, gungdu eq woi-nyì lé agot a-ù dut nhang é jung hkangmó mai, yhumsing gùng yhumsing lhoq sân-yúng yù luì, Garai Gasang lé gyuq hkunggâ é myit eq chyoyúng hkyô má lhoq gumjup yu nyi sháng.

Poluq É Gabú Hkyô

² Nungmoq é i-myt unghkaù má ngamoq lé jowò byi keq. Ngamoq gi, ó yuq lé le a shut wú, ó yuq lé le a lhoq htên wú, ó yuq lé le a mhaù zô wú é nghut lhê. ³ Ngò gi, nungmoq lé mara byi râ matú haù su taì é a nghut. Ngamoq gi, asak duì kôle, shí kôle, nungmoq eq rahá wó dut shoq, nungmoq gi, ngamoq é i-myt unghkaù má lúng nyi é nghut lhê nghû, hí hkùn ngò taì wú bê nghut lhê. ⁴ Ngò gi, nungmoq lé, hkyak yhang myit lum to bê nghut lhê. Ngò gi, nungmoq é yanmai gyai yhang gumrong nyi lhê. Ngò gi, myit wum byì é gyai yhang huì ri; jamjau hkyô pé myo myo ngamoq hui kôlhang, ngò, gyai yhang gabú nyi lhê.

⁵ Hkâsu mù gâ le, ngamoq gi, Makedoni mau má jé é hkùn, ngamoq é gungdu gi, zim za a myang nyi é htoq agó, hkyô hkangmó má ngamoq wuìhke jamjau hui zô é nghut lhê. Shingjan má gi, mabyoq htoq, ahkaù má gi, gyuq kyum nyi é nghut lhê. ⁶ Nghut kôlhang, nhik ngê bang lé nhik tìng é Garai Gasang gi, Tituq lé jé lé nhang é đông mai, ngamoq lé nhik tìng byi bê nghut ri. ⁷ Yhang jé lé é đông mai za a nghut, yhang lé nungmoq nhik tìng byì é hkyô đông mai le nghut lhê. Ngá é gabú hkyô gi, gó nám lhê htoq má je myo sháng gaq ga, yhang gi, nungmoq ngo lé myit tuí nyi é hkyô, nungmoq gyai yhang shut bân é hkyô, ngá é matú

* 6:15 Beliala gâ é gi, Tsadán é myìng rajà nghut lhê. ☆ 6:16 Nhung 26:12; Yer 32:38; Ezk 37:27

☆ 6:17 Esai 52:11; Ezk 20:34,41 ☆ 6:18 2 Sam 7:14

nungmoq gyai myit chiq byî é hkyô pé lé, ngamoq lé tai kyo bê nghut ri.

⁸ Ngá é laiká èq, nungmoq lé yón nhang é nghut kôle, ngò gi, nungngam wó é a nghut. Sâng-hi le, ngò nungngam wó é nghut kôlháng, ngá é laiká gi, nungmoq lé rayoq zo za lhoq yón nhang é lé, ngò sê lhê. ⁹ Nghut kôlháng, ngò gi, ahkuî gabú lhê; haû gi, nungmoq lé yón hui nhang é yanmai a nghut é za, nungmoq é yón hkyo èq, nungmoq lé myit lhing nhang é yanmai ru nghut lhê. Nungmoq gi, Garai Gasang ô nau é dông yón hui é bang dut bekô nghut mù, nungmoq lé, ngamoq èq hai akyû le a lhoq yôm byî é nghut lhê. ¹⁰ Hkâsu mù gâ le, Garai o é dông yón kuq hui é hkyô gi, nungngam wó hkyô a bo é za, hkyi yù hkyô wó shoq, myit lhing nhang é nghut ri. Nghut kôlháng, mingkân é yón kuq hkyô gi, shi é hkyô lhoq htoq é nghut ri. ¹¹ Garai o é dông, nungmoq chyáng akyû lhoq htoq byî é yón kuq hkyô lé wú wú keq! Haû gi, gyai yhang myit zuq é hkyô, yhumsing gùng mara a bo é lé tân shit râ lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byî é hkyô, tengmán hkyô kut râ rì ri nghut é hkyô pé nghut lhê. Nungmoq gi, haû hkyô má mara a bo é lé hkat hkingmó má saksé tân shit bekô nghut ri. ¹² Haû mù luî, ngò, nungmoq lé kâ kat é nghut kôlháng, kut shut su é yanmai le a nghut, kut shut é hui zo su é yanmai le a nghut é za, ngamoq lé nungmoq hkâ-í ap nóng byî é hkyô lé, Garai Gasang hí má nungmoq gùng nungmoq wó myâng râ matú kâ kat é sheq ru nghut lhê. ¹³ Haû pé banshoq dông mai, ngamoq gi, myit wum byî é hui ri.

Ngamoq myit wum byi hui é htoq agó, Tituq hkâ-í yhang gabú é lé myàng mù, ngamoq gi, je riyhang myit gabú é nghut lhê. Haû mù

yhang gabú é gâ lé, nungmoq banshoq bâng èq yhâng é myit lé lhoq nguínghon byi kô é yanmai nghut ri.

¹⁴ Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpû é nghut lhê. Nungmoq lé ngamoq tai é lhunglháng gi, têng é eq rajung za, Tituq hí má, nungmoq é hkyô lé ngamoq gumrong é le têng lhê. ¹⁵ Nungmoq banshoq bang jino gyo kômù, gyuq nán é myit mai yhang lé lhom hap yù kô é lé, yhang myitbûn é hkûn, yhang nungmoq lé chyitdap é myit gi, je riyhang kô dik nyi ri. ¹⁶ Ngò gi, nungmoq lé banshoq wó lum to bê lé sê é yanmai, gabú nyi lhê.

8

Byî É Hkyô

¹ Gumang wui ê, ahkuî, ngamoq gi, Makedoni mau mâ é noqkuq hpûng pé lé Garai Gasang byî é jeju eq sêng é hkyô, nungmoq lé sé nhâng nau ri. ² Yhangmoq gi, wuihke jamjau hkyô myo myô èq chyam lik é hui é nghut kôlháng, yhangmoq é a ung tai loshoq gabú é hkyô eq yhangmoq é gyai yhang myung é hkyô gi, agùn agó byi nau é myit bò nhang ri. ³ Hkâsu mù gâ le, yhangmoq gi, yhangmoq wó dut é myhó byi kô é htoq agó, yhangmoq é a-tsam lai shoq lháng byi kô é hkyô lé, ngò saksé hkám lhê. Yhangmoq gi, yhangmoq é myit hkaû mai yhang haû su kut kô é nghut ri. ⁴ Yhangmoq gi, haû sân-yúng bang lé wó bo dojaú râ matú, ngamoq lé gyai yhang ahkáng dung kô é nghut ri. ⁵ Yhangmoq gi, ngamoq myit ngam tô é htoq má lháng lai shoq, Garai Gasang ô nau é hkyô lé châng é dông, yhangmoq gùng lé hí haû Yhumsing lé ap byi pyám kômù, hau htâng sheq ngamoq lé ap kô é nghut ri. ⁶ Haû mù luî, Tituq

yhang hí kut hi nyi bê nghut é yanmai, ngamoq gi, jeju haù lé nungmoq chyáng le shuí lhoq bying jup byi râ matú, yhang lé wum byi bê nghut lhê. ⁷ Nungmoq gi, lumjینگ myit má, dang nyo é hkyô má le, sumsé hpaqchyí hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkanqmó má agùn agó dut bekò eq rajung za, nungmoq gi, byí nau é jeju shí má le agùn agó dut râ lé, bûn nyi keq.

⁸ Ngò gi, nungmoq lé hkunmó hkyô é a nghut, nghut kôlhang, góbàng é myit zuq é hkyô eq whuí wú é đông, nungmoq é chyitdap myit jet é hkyô lé chyam wú nau luí sheq ru nghut lhê. ⁹ Hkâsu mù gâ le, nungmoq gi, nga-nhùng é Yhumsing Yesuq Hkrisduq é jeju lé sê akò nghut ri. Yhang gi, Yhâng é myùng hkyô đông mai nungmoq wó bang dut kó sháng gaq ga, jung hkanqmó wó sù nghut kôlhang, nungmoq é matú é yanmai, myùng sù dut bê nghut ri.

¹⁰ Shí hkyô eq sêng é má, nungmoq é matú ge dik é hkyô ngò hpaqchyí byi kôlé: A-nhik, nungmoq gi, sâng-hi, byí hî kô é za a nghut, haù su kut nau é myit bo é bang le nghut akò. ¹¹ Nungmoq wó dut é eq rajung za, haù lé lhoq pân é đông nungmoq é gyai yhang kâm kut é myit lé wó lhoq dik ko sháng gaq, ahkuí, muzó haù lhoq pân keq. ¹² Hkâsu mù gâ le, byí nau é myit bo é nghut jáng, chyunghuq haù gi, yhang a wó é má cháng luí a nghut é za, yhang wó é má cháng luí, hap yù gíng é nghut lhê.

¹³ Nungmoq é matú gi, wòlai dut, góbang gi, hkyamsâ nyi râ lé, ngamoq ô nau é a nghut, rawuí za wó dut kó râ lé sheq ô nau é ru nghut lhê. ¹⁴ Nungmoq haù râ tô é lé, yhangmoq agùn agó wó é má é wó dum taù htuqbang byi kó

sháng gaq, ahkui lhê é ahkying má, yhangmoq haù râ tô é lé, nungmoq agùn agó wó é má é htuqbang byi keq. Haù jáng sheq, wuí wuí za wó dut kó râ nghut lhê. ¹⁵ Haù gi, "Myo myo tsing yu é sù gi, lùm myo shoq wó é a nghut, shau za tsing yu é sù gi, lùm shau shoq wó é a nghut."* ga kâ tô é eq rajung za nghut ri.

Tituq Lé Korinhtuq Myuq Shut Nhang Kat É Hkyô

¹⁶ Nungmoq é matú ngò myit chiq byí é eq rajung zâ é myit lé, Tituq é i-myt má kat byí é Garai Gasang lé, ngò jeju hkya-ôn lhê. ¹⁷ Hkâsu mù gâ le, Tituq gi, ngamoq dúng tóngbân é lé za lhom hap yu é a nghut, gyai yhang myit toq mù, yhânggùng yhang myit hpyit yù luí, nungmoq chyáng lé lô gù za nghut ri. ¹⁸ Ngamoq gi, haù gabú danglù lé dojaù é má noqkuq hpúng pé banshoq eq hkya-on huí é gumang hpó haù lé le, yhang eq rahá nhang kat lhê. ¹⁹ Hau htoq agó, ngamoq garúm râ myit bo nyi é hkyô lé tún shit mù, haù Yhumsing lé hkungga râ matú ngamoq wú gôn nyi hkyô nghut é, alu lé ngamoq yu chung é hkùn, ngamoq é byinzùm kut râ matú, noqkuq hpúng pé eq hkyin yu é sù le yhang nghut lhê. ²⁰ Ngamoq gi, myit lòm luí byí é chyunghuq shí lé ngamoq wú gôn nyi é hkyô má, ó yuq eq le mara hô râ hkyô a htoq shoq sidiq nyi lhê. ²¹ Hkâsu mù gâ le, jô é hkyô kut râ matú ngamoq shikut nyi é gi, haù Yhumsing é myoq hí má za a nghut, byu pé é myoq hí má le nghut lhê.

²² Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sù, ngamoq é gotú gumang hpó lé le yhangnhik eq rahá nhang kat lhê. Yhang gi, ahkuí lhang, nungmoq lé gyai yhang myit lum tô é yanmai, shirông myit je

riyhang bo nyi ri. ²³ Tituq é hkyô ga jáng, yhang gi, ngá é zùm yap luzùm eq ngò eq rahá nungmoq chyáng mù zui sù nghut ri. Nghanhông é gumông nhik é hkyô ga jáng, yhangnhik gi, noqkuq hpông pè é gunglik eq Hkrisduq é aróng nghut akô. ²⁴ Haù mù luí, haù noqkuq hpông pé wó myâng kó sháng gaq, nungmoq má ngamoq hai mù gumrong é hkyô eq nungmoq é chyitdap myit é saksé lé, haù bang lé tún shit keq.

9

¹ Ngò gi, haù sân-yúng bang lé htuqbang rà hkyô eq séng luí, nungmoq lé kê kat rà a ra nghut ri. ² Hkâsu mù gâ le, nungmoq gyai garúm nau é myit lé ngò sê lhê, haù mù, ngò gi, Makedoni mau bang lé, haù hkyô eq séng luí gumrong kyo mù, a-nhik mai yhang, Ahkaia mau má nungmoq byi rà rì rì nghut bê hkyô lé, yhangmoq lé tai kyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaù toq byi bê nghut ri. ³ Nghut kôlhang, shí hkyô má nungmoq eq séng luí ngamoq gumrong é gi, hká đông le dangsôm a dut byuq sháng gaq, ngò tai bê eq rajung za nungmoq rì rì wó hen to rá matú, ngò gi, gumang wui lé nhang kat é nghut lhê. ⁴ Hkâsu mù gâ le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kô é nghut jáng, nungmoq za hoq hpu rà a nghut, ngamoq le, nungmoq lé lùm yhang lum pyâm é yanmai, hoq bo hpu rà nghut lhê. ⁵ Haù mù luí, nungmoq danggidiq byi to bê nghut é, chyunghuq lé rago wó lajâng pân to rá matú, gumang wui lé wum tai tsuq mù, nungmoq lé hí, lé kum nhâng rà gi, ra yhang rà lhê ngù ngò wó myit ri. Haù hkùn

sheq, a nau é đông byi é a nghut é za, byi nau é chyunghuq đông hen tô é dut rà nghut lhê.

Agùn Agó Byi É Hkyô

⁶ Shau za sân hkyô sù gi, shau za shù yù rà nghut mù, agùn agó sân hkyô sù gi, agùn agó shù yù rà nghut lhê gâ é dang lé, myitbùn nyi keq. ⁷ Yuq hkanmó gi, a kâm byi é eq byi nhang é đông a nghut é za, yhumsing myit má byi nau é myhó lé myit hpyit yù mù byi é đông dut rà lhê. Hkâsu mù gâ le, Garai Gasang gi, gabú myit eq byi sù lé chyitdap ri. ⁸ Haù mù, ahkyíng hkanmó jung hkanmó má, nungmoq rà é banshoq wó mù, ge é muzó hkanmó lé nungmoq je myo wó kut kó sháng gaq ga, Garai Gasang gi, jeju lhunglhang lé, nungmoq lé wó byi é sù nghut lhê. ⁹ Haù gi,

"Yhang gi, a ha bân é za myùng bang lé yhâng é chyunghuq tsing gâm byi bê nghut ri; Yhâng é dingmán hkyô gi, ahtum abyuq gíng nyi ri."^{*}

ga kê to eq rajung za nghut ri. ¹⁰ Kyô hkyô sù lé kyôshi, zoshuq matú muk byi é Sù gi, nungmoq lé kyôshi byi mù, lhoq myô jat byi rà eq, nungmoq é dingmán hkyô é ashí lé myô lò nhâng rà nghut lhê. ¹¹ Nungmoq gi, ayoq abun hkanmó má agùn agó byi é bang wó dut kó rá matú, hkyô hkanmó má sùt wó é bang dut é hui kó rá nghut lhê. Nungmoq agùn agó byi é hkyô lé, ngamoq hai byi mù, Garai Gasang lé jeju hkya-ôn é hkyô dut rà nghut lhê.

¹² Nungmoq dojaú é hkyô shí gi, Garai Gasang é byu pé rá é hkyô lé lajang byi é za a nghut, Garai Gasang lé jeju bân é dang byíng mui nyi nhang é le nghut lhê. ¹³ Dojaú hkyô hau é yanmai, nungmoq lhumzui hkyô saksé tún

* 9:9 Hkya-on 112:9

shit bekô nghut mù, byu pé gi, Hkrisduq é gabú danglù lé nungmoq yín yú luí jìno gyo kô é yanmai le, yhangmoq eq yuq hkanmó lé, nungmoq é a ha bún é myit mai shuí gam chûng kô é yanmai le, Garai Gasang lé hkyá-on kó rá nghut lhê. ¹⁴ Hau htoq agó, Garai Gasang gi, nungmoq lé jeju lai shoq byí tô é yanmai nungmoq é matú yhangmoq kyúdung byí é u má, yhangmoq é myit nhikhum gi, nungmoq chyáng htoq jé rá nghut lhê. ¹⁵ A ung htoq taí é Garai Gasang é chyunghuq é yanmai, jeju hkyá-on hkyô gi, Yhâng chyáng ru nghut nyí sháng gaq ô!

10

Poluq, Yhâng É Hpungmû Lé Taí Hung É Hkyô

¹ Nungmoq eq myoqdong hkyûm nghut é hkûn gi, gyuq kyûm myit bo ri ga, wê gâng é hkûn gi, a gyuq a wám dut ri ga kô é sù, ngò Poluq gi, Hkrisduq é nûm é hkyô eq nú-nhâm é hkyô dông mai, nungmoq lé pying kat lhê. ² Shí mingkân é nyí yap a-tsang dông ngamoq asak dui ri ga myit ngam é byù ra-am lé, ngò a gyuq a wam é myit lé shit rá dâ tô lhê. Ngò jé lé é hkûn, nungmoq lé haù sù é myit a shit ra sháng gaq, ngò nungmoq lé dúng tôngbán kat lhê. ³ Hkâsu mù gà le, ngamoq gi, mingkan shí má asak dui nyí kôlhang mingkan byu pé kut é dông majan zân é a nghut. ⁴ Ngamoq majan zân é laknak gi, mingkan shi é laknak a nghut é za, shut shai é dông dang-rháng hkyô nghut é, gingtîng é gyedap pé lé lhoq htên pyám rá matú Garaí é a-tsam byíng é laknak ru nghut lhê. ⁵ Ngamoq gi, dang-rháng rhâng lhûm é hkyô pé eq Garaí Gasang lé sê é hkyô lé shut shai shoq yhumsing gùng yhumsing lhoq myhang mhaù é hkyô hkanmó lé lhoq htên pyám mù, Hkrisduq é jìno

gyo rá matú, myit sôn é hkyô hkat hkanmó lé shúm kut yu é nghut lhê. ⁶ Nungmoq é jìno gyo hkyô gi, gumjup é hkûn, jìno a gyô é hkyô hkanmó lé ngamoq dam byi rá rì rì dut rá nghut lhê.

⁷ Nungmoq gi, ahtoq pyám lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lhê ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum bún sê nyí sháng gaq. ⁸ Hkâsu mù gà le, nungmoq lé làng hkyô rá nó gi, nungmoq lé kô myhâng nhâng rá matú, ngamoq lé haù Yhumsing byí é ahko ahkáng lé gyai gumrong le lháng, ngò gi, hoq hpû é hui rá a nghut. ⁹ Ngò gi, ngá é laiká pé èq nungmoq lé kyuq é su a dut nhâng nau é nghut lhê. ¹⁰ Hkâsu mù gà le, ra-am gi, "Yhâng é laiká pé gi, gâng bo é eq wum-o bo é nghut ri; nghut kôlhang, yhânggùng gi, byuwup a bo é nghut mù, yhang taí é dang pé gi, haí a nghut." ga taí akô. ¹¹ Ngamoq gi, wê gâng é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, ngamoq zui saí rá nghut é hkyô lé, haù sù é bang sê gyo rá dut lhê.

¹² Ngamoq gi, haù yhumsing gùng yhumsing owaq é bâng é hpúng má bo lom é hkyô nghut nghut, yhangmoq eq whuí é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chin lhûm wú é eq yhangmoq gùng yhangmoq whuí lhûm wú kô é hkûn, hpaqchyí a bo é bang dut bekô nghut ri. ¹³ Nghut kôlhang, ngamoq gi, âng é mai lai shoq gumrông rá a nghut é za, ngamoq lé Garaí Gasang masat to byí é, nungmoq chyáng lháng hkyit jé shoq nghut é maukyo hkaù má za gumrông rá nghut lhê. ¹⁴ Ngamoq gi, nungmoq chyáng a jé lé wú é dông mai, gyai yang

gumrong nyi râ a nghut; hkâsu mù gâ le, ngamoq gi, Hkrisduq é gabú danglù chûng mù, nungmoq chyáng lháng lé jé bê nghut lhê. ¹⁵ Dum, ngamoq gi, góbang kut é muzó lé le, âng é mai lai lui gumrong lai é a nghut. Ngamoq myoqbyu é hkyô gi, nungmoq é lumjîng myit kô myhang jat nyi jâng sheq, nungmoq chyáng ngamoq zui sai é jowò gyai wó lhoq lâm râ nghut lhê. ¹⁶ Haû gi, nungmoq é mau lháng lai shoq, gabú danglù lé ngamoq wó hko kyo râ matú nghut lhê. Hkâsu mù gâ le, ngamoq gi, góyuq eq zui sai to bê loqzó eq séng lui, gumrông nau é a nghut. ¹⁷ Nghut kôlhang, "Gumrong é sù gi, haû Yhumsîng má gumrông sháng gaq."* ga kê tô ri. ¹⁸ Hkâsu mù gâ le, yhumsing gùng yhumsîng owaq é sù gi, hap yù huí é a nghut é za, haû Yhumsing eq owaq byí é sù sheq, hap yù huí é ru nghut lhê.

11

Lagyo Apyoq Pé Eq Poluq

¹ Ngò gi, ngá é ratsuí ngok é dang lé, nungmoq jân pyám byi râ lé myoqbyu é nghut lhê; gè gè yhang, nungmoq gi, haû su kut nyi gù nghut bekô. ² Haî mù gâ le, ngò gi, Garai Gasang mai nungmoq lé magum é myit eq, nungmoq é matú magúm byí lhê. Ngò gi, nungmoq lé, sân-yúng é zomyi gyîng lé su, Hkrisduq chyáng wó shit sháng gaq nghû, Hkrisduq nghut é yhumsîng hpô chyáng za nungmoq lé byi zo râ nghû, danggidiq byi to bê nghut lhê. ³ Nghut kôlhang, Ewaq gi, lhangmui hpaqchyí dâ é eq mhaú zô é huí é su, nungmoq myit é hkyô pé gi, Hkrisduq chyáng nungmoq é lhumzui é eq sansêng é i-myt ap nóng é hkyô mai shuí nghoq ló byuq é hui râ lé, ngò myit chiq ri. ⁴ Hkâsu mù gâ le, rayuq yuq gi, nungmoq chyáng lé jé mù,

ngamoq hko kyô é Yesuq é hkyô eq shai é đông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haû lé lui lui za lhom hap yu é dut bekô nghut ri. ⁵ Nghut kôlhang, ngò gi, "Ahkyak-lagyô pé" ga bâng é htoq má ratsuí lháng gyamgyi gyó sù a nghut nghû myit ngam é nghut lhê. ⁶ Ngò gi, dang tai hpaqchyí kung sù rayuq a nghut kôlhang, sumsé hpaqchyí bò sù nghut lhê. Ngamoq gi, hkyô hkangmó má, nungmoq lé haû hkyô hkyàng shoq sé nhâng bê nghut lhê.

⁷ Ngò, nungmoq lé, Garai Gasang é gabú danglù lé ahpau a yu é za hko kyô é đông, nungmoq lé waq toq râ matú, ngá gùng ngò lhoq nyhum é gi, ngá é mara dut byuq bê lú? ⁸ Ngò, nungmoq lé dojaú râ matú, gotù noqkuq hpûng pé mai htugbâng é lé hap yu é gi, haû bâng chyáng mai ngò zik lú yu é đông dut bê nghut lhê. ⁹ Ngò gi, nungmoq eq rahá nyi mù, rajung jung râ é hkûn, ó yuq lé le wòlai a dut nhang é nghut lhê; hkâsu mù gâ le, Makedoni mau mai lé jé é gumang wui gi, ngò haî râ é lé htugbang byi kô é yanmai nghut lhê. Hká đông nghut kôlhang, ngò gi, ngá gûng lé, nungmoq é matú wòlai a dut nhâng shoq kut bê nghut mù, xoq lui le haû đông kut nyi râ nghut lhê. ¹⁰ Haû Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau mâ é bang ó yuq lháng, ngò haû su gumrong é hkyô lé wó hkûm zîng râ a nghut. ¹¹ Haî mù lú? Ngò, nungmoq lé a chyitdap é yanmai nghut lhê lú? Ngò, nungmoq lé chyitdap é hkyô lé, Garai Gasang sê lhê. ¹² Ngò gi, yhangmoq zui sai é lé

* 10:17 Yer 9:24

gumrong é hkyô pé má ngamoq eq rawuí za són byi râ ahko ahkáng ô nau é bang lé ahkáng a byi râ matú, ngò kut nyi é su xoq luí kut shi râ nghut lhê.

¹³ Hkâsu mù gâ le, haû sù é bang gi, lagyo apyoq pé, mhaû zô é mù zui bang, Hkrisduq é lagyô pé đông kut mhaû é bang nghut akô. ¹⁴ Haû gi, maú ra hkyô a joq, hkâsu mù gâ le, Tsadán lhang gi, maubó é mau-mang lagyo rayuq đông kut mhaû é sù nghut lhê. ¹⁵ Haû mù, Tsadán é dui-nhâng zoshâng wui gi, dingmán hkyô é dui-nhâng zoshâng wui đông kut mhaû é nghut jáng, maú dân râ hkyô a joq é nghut lhê. Yhangmoq é ló htâng má gi, yhangmoq kut é eq rajung za hui zo kó râ nghut lhê.

Yhâng É Wuíhke Jamjau Hkyô Eq Séng Luí, Poluq Gumrong É Hkyô

¹⁶ Ngò puq taí kôlé, ó yuq le, ngo lé byù gò đông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsuí wó gumrông sháng gaq, byù gò lé nungmoq hap yu é su, ngo lé hap yù kó laq. ¹⁷ Ngò, haû su gumrong é hkyô gi, haû Yhumsing o é đông ngò taí nyi é a nghut, byù gò rayuq đông taí nyi é ru nghut lhê. ¹⁸ Byù myo myo gi, mingkân é hkyô đông gumrong nyi bum lhê nghut mù, ngò le gumrông râ nghut lhê. ¹⁹ Nungmoq gi, hpaqchyí lûm bo kô é nghut mù, byù go pé lé gabú myit eq jân nyi akô nhung! ²⁰ Gè gè yhang, nungmoq gi, nungmoq lé jùn kut é sù lé le, nungmoq lé rhoi zô é sù lé le, nungmoq chyáng akyû hô zô yu é sù lé le, yhang gûng yhang owaq é sù lé le, nungmoq lé bo-pyuq pyuq é sù lé le, jân nyi akô nghut ri. ²¹ Ngamoq gi, nungmoq lé haû hkyô kut râ má wum gyai nyhôm lhê nghû yín yû râ lé, ngò, hoq ri!

Rayuq yuq, haí lé wám gumrong é nghut jáng, ngò le, haû lé

wám gumrong lhê nghû, byù gò rayuq đông ngò taí nyi é nghut lhê. ²² Yhangmoq gi, Hebre byu pé nghut akô lhú? Ngò le nghut lhê. Yhangmoq gi, Israelaq byu pé nghut akô lhú? Ngò le nghut lhê. Yhangmoq gi, Abraham é awut ashin pé nghut akô lhú? Ngò le nghut lhê. ²³ Yhangmoq gi, Hkrisduq é dui-nhâng zoshâng wui nghut akô lhú? (Ngò gi, myit a gyíng é sù đông haû su taí é nghut lhê.) Ngò gi, je nghut lhê. Ngò gi, mù zui je shikut bê, htóng anum num je lúng wú bê, je riyhang bat é huí wú bê, shi râ í é adam dân huí wú bê nghut lhê. ²⁴ Ngò gi, Yudaq byu pé nuichum eq bat é myi xê dân byíng râ radàm ra ra dut é, ngo lhang hui zô wú é nghut lhê. ²⁵ Ngò gi, dumbáng eq nhuq huí é sum dân, shi sháng gaq ga luqgok eq dú huí é radàm, wui-sanghpo byoq huí é sum dân, wuimau má myû byôm é ranyí ra-myin hui zô wú bê nghut lhê. ²⁶ Ngò gi, xoq xoq hkyowui htoq e ló é hkûn, wui gû é gyuq chiq jung, damyaq huí é gyuq chiq jung, ngá é amyû wui chyáng má é gyuq chiq jung, tungbaù pé chyáng má é gyuq chiq jung, myuq hkaú pé má é gyuq chiq jung, yoso pé má é gyuq chiq jung, wuimau má é gyuq chiq jung eq gumang apyoq pé chyáng má é gyuq chiq jung pé hui zô wú bê nghut lhê. ²⁷ Ngò gi, mù lé zui nú zui hkyik mù, anum num a myang yhup shoq dut wú bê nghut lhê. Ngò gi, zòmut wui shit huí é eq zoshuq a wó é anum num huí laí lo wú bê nghut lhê. Ngò gi, gyoq hpû é eq gûngchín dut é huí wú bê nghut lhê. ²⁸ Haû pé lhunglhang htoq má, noqkuq hpûng pé banshoq é matú ngò myit chiq byi é hkyô gi, nyi wui ngò má wôlai dut nyi ri. ²⁹ Rayuq yuq wum nyhôm le, ngò le wum a nyhôm râ lhú? Rayuq yuq mara shuí kut shut é hui le, ngò myit a nyé râ lhú?

³⁰ Ngò gumrông rã dut é nghut le gi, ngò wum nyhôm é hkyô lé tũn shit é pé lé gumrông rã nghut lhê. ³¹ Ngò a mhaũ nyi é hkyô lé pyat dedu hkya-on huí é sũ, haũ Yhumsing Yesuq é Íwa eq Garai Gasang sê lhê. ³² Damaskuq myuq má, Hkohkâm Areta é a-ô mã é mauzau gi, ngo lé chyup rã matú, myuq lé zúng nhang é nghut lhê. ³³ Nghut kôlhang, ngò gi, manghkoq má lúng mù, myuq xêwâm mã é hkohot dong mai lhoq hkyô kat é hui luí, yhang é loq mai wó lut é nghut lhê.

12

Poluq É Myoqwup Shing-rán Pé

¹ Ngò gi, rũ gumrông nyi rã za nghut lhê. Akyũ wó rã a nghut kôlhang, haũ Yhumsing chyáng mai lo é myoqwup shing-rán pé eq hpông shit é shing-rán pé lé gumrông rã nghut lhê. ² Ngò gi, lai lò bê raxe myi zãn hkũn, mauhkũng sum tsáng ngu é má shuí toq yu huí é, Hkrisduq mã é byũ rayuq* é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Garai Gasang gi, sê lhê. ³ Yhang hparadisú má shuí toq yũ huí é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kôlhang, Garai Gasang gi, sê lhê. ⁴ Yhang gi, byu pé tai kyô htoq rã ahkáng a wó é hkyô pé nghut é, a wó tai sân kyô é hkyô pé lé wó gyô ri. ⁵ Ngò gi, haũ yuq sũ é byu é hkyô eq séng luí gumrông rã nghut lhê; nghut kôlhang, ngò gi, ngá é wum nyhóm hkyô eq séng luí, gumrong é mai lai luí, ngá gũng ngò gumrông rã a nghut. ⁶ Ngò gi, gumrông hkyô lé hkyin yũ rã dut é nghut jáng lhang, byũ gò dut rã a nghut, haĩ mù gã le, ngò gi, tengmán hkyô tai nyi rã nghut lhê. Nghut kôlhang, ó yuq le,

ngò kut é eq ngò tai é mai myit lum to kô é htoq má, ngo lé, je a myit lo ko sháng gaq nghũ, ngò a gumrông kut pyâm nyi lhê.

⁷ Haũ laklai dik é dõng ngo lé hpông shit é shing-rán mó pé é yan-mai, ngò a nghutbũn byuq sháng gaq ga, ngo lé gunjang rã matú, Tsadán é lagyo nghut é zu lé, ngá é gungsho má kat byĩ to bê nghut ri. ⁸ Haũ lé ngá chyáng mai yu pyám byi rã matú, ngò, Yhumsing lé sum dãm dũng tõngbán wũ bê nghut lhê. ⁹ Nghut kôlhang, Yhang gi, "Ngá é jeju gi, náng é matú luq dun é nghut lhê; hkãsu mù gã le, Ngá é a-tsam gi, wum nyhôm é hkyô má lhoq gumjup é hui ri." ga luí, ngo lé tai ri. Haũ mù luí, Hkrisduq é a-tsam gi, ngò má wó joq nyi sháng gaq nghũ, ngò gi, ngá é wum nyhôm é hkyô pé eq séng luí, gabú myit mai je riyhang gumrông rã nghut lhê. ¹⁰ Haũ nghut mù luí, ngò gi, Hkrisduq é yanmai, wum nyhôm é hkyô pé má le, rhoĩ huí é hkyô pé má le, wuĩhke jamjau huí é hkyô pé má le, zing-ri huí é hkyô pé má le, awui ahke dut é hkyô pé má le, gabú nhik dik nyi lhê. Hkãsu mù gã le, ngò wum nyhôm é hkũn sheq, ngò wum bo é nghut lhê.

Poluq Chiq Byĩ É Hkyô

¹¹ Ngò gi, ngá gũng ngò byũ gò lhoq kut yũ bê nghut ri, nghut kôlhang, haũ gi, nungmoq kut nhang é nghut lhê. Ngò gi, nungmoq eq owaq é hui ang sũ nghut lhê; hkãsu mù gã le, ngò gi, haĩ a nghut kôlhang, "Ahkyak lagyô pé" ga bãng é htoq má ratsuí lhang gyamgyi gyó sũ a nghut. ¹² Lagyo rayuq é masat kumlhá nghut é, kumlhá pé, mauhpo muzó pé eq laklai kumlhá pé lé, ngò gi, gyai yhang hkam jan mù nungmoq chyáng kut bê nghut lhê. ¹³ Ngò gi, nungmoq é matú, hkã-nhám le

* **12:2** Hkrisduq mã é byũ rayuq gã é gi, Poluq yhanggũng yhang lé tai nyi é nghut lhê.

wòlai a dut é nhîng, nungmoq gi, hkâsu mù, gotù noqkuq hpûng pé htoq má gyamgyi gyó nyi akò lúhú? Ngò, haù hkyò má shut é nghut jáng, mara hkyut pyám byi kó laq!

¹⁴ Ahkuí, ngò gi, nungmoq lé, sum lîng nghû râ dàm, lé kum râ rì rì nghut bê mù, nungmoq é matú wòlai gi, a dut râ nghut lhê. Haì mù gâ le, ngò gi, nungmoq é sutzè lé ô nau é a nghut, nungmoq lé sheq ru nghut lhê. Hká đông nghut kòle, zo wuì gi, mó wui é matú sutzè hkong to byi râ dut é a nghut, mó wuì sheq, zô wuì é matú hkong to byi râ dut é nghut lhê. ¹⁵ Haù mù luì, ngò gi, gyai yhang gabú é myit mai, ngò wó é jung hkangmó lé nungmoq é matú chung jai râ nghut mù, ngá gûng lé lhang chûng jai râ nghut lhê. Ngò, nungmoq lé myô chyitdap é yanmai, nungmoq gi, ngo lé shaù chyitdap kó râ lúhú? ¹⁶ Ngò gi, nungmoq chyáng wòlai a dut é hkyô têng lhê. Nghut kôlhang, ngò gi, hpaqchyì haq da sù dut mù, mhaù lhik é đông nungmoq lé chyup yú sù dut byuq bê ga nungmoq ra-am myit akò myhi-nhung! ¹⁷ Ngò gi, nungmoq chyáng nhang kat byì é byù đông, nungmoq chyáng amyat kut zô yù bê nghut lhê lúhú? ¹⁸ Ngò gi, Tituq lé nungmoq chyáng lé râ matú wum taì tsuq mù, ngamoq é gumang lé, yhang eq rahá nhang kat bê nghut lhê. Tituq gi, nungmoq chyáng amyat kut zô é nghut lhê lúhú? Nga-nhik gi, rajung zâ é myit đông chyat kut mù, rajung zâ é hkyô lé chyat châng é su nhik nghut lhê, a nghut kó lúhú?

¹⁹ Ngamoq gi, nungmoq hí má ngamoq gùng ngamoq taì hung yu nyi ri nghû, ahkuí jé shoq myit nyi akò lúhú? Ngamoq gi, Hkrisduq mâ é byu pé đông, Garai Gasâng hí má taì nyi é nghut lhê. Chyitdap é gumang wuì é, ngamoq kut é jung hkangmó gi, nungmoq é akyu

matú chyat nghut lhê. ²⁰ Hkâsu mù gâ le, ngo lé jé é hkûn, ngò, nungmoq lé dut nhâng nau é su, nungmoq a wó dut kó râ eq, nungmoq, ngo lé dut nhâng nau é su, ngò a wó dut râ lé, ngò myit gyuq ri. Ngò gi, mabyoq jishûm htoq é, manon é, nhik-ûn buq é, byù hpûng gam é, gansang é, lumu é, gyai nghutbùn é eq atau ahù dut é hkyô pé joq râ lé gyuq ri. ²¹ Ngò dum lé jé é hkûn, ngá é Garai Gasang gi, nungmoq é hí má ngo lé myit nyhûm nhâng mù, yhangmoq ô nau é myit châng é má shut é đông nyi zô lúm nau é i-myt, gungsho zùm yap é yubak mara eq a sân-yúng é hkyô kut shut é mai myit a lîng bang myo myô é yanmai, yón kuq é hui zo râ lé, ngò myit chiq ri.

13

Ló Htáng Má Sidiq Byì É Dang Pé

¹ Ahkuí, ngò, nungmoq chyáng lé kum râ gi, sum lîng nghû râ dàm nghut lhê. Haù gi, "Mara hun é hkyô hkangmó lé, í yuq sum yuq saksé hkâm é èq lhoq teng ra râ nghut lhê."* ga kê tô é eq rajung za nghut lhê. ² Ngò gi, í lîng nghû râ dàm nungmoq eq rahá nyi é hkûn, nungmoq lé sidiq byi gû bê nghut lhê. Ahkuí le, nungmoq eq wê gâng tô é u lé, dum taì kôlé, ngò dum jé lé é hkûn, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo râ nghut lhê. ³ Haù gi, ngò đông mai Hkrisduq dang taì nyi é hkyô saksé shit râ lé, nungmoq dúng nyi kômù nghut lhê. Yhang gi, nungmoq é hkyô lé hkâsu kut shuì-ù é hkyô má wum nyhôm é a nghut, nungmoq chyáng a-tsam mó shit sù sheq ru nghut ri. ⁴ Hkâsu mù gâ le, Yhang gi, wum nyhôm é má jén sat é hui bê nghut kôlhang, Garai Gasâng é a-tsâm èq dui nyi é gi, hkyak têng lhê. Haù eq rajung za, ngamoq

gi, Yhang su wum nyhóm kôlhang, nungmoq lé dojaú râ matú, Garai Gasâng é a-tsâm eq, Yhang eq rahá duì nyì râ nghut lhê.

⁵ Nungmoq gi, lumjîng hkyô má nghut nyì lhê luq, yhumsing gùng yhumsing myì wú keq. Yhumsing gùng yhumsing chyam wú keq. Nungmoq gi, chyam é má sùm byuq é za a nghut jáng, nungmoq chyáng Hkrisduq Yesuq lúng nyì bê hkyô lé sé kó râ nghut lhê. ⁶ Ngamoq gi, chyam é má a sùm é hkyô lé, nungmoq wó sé kó râ nghut lhê nghù, ngò hkyak lum tô lhê. ⁷ Ahkuí, ngamoq gi, nungmoq shut é hkyô haì a kut kó râ matú, Garai Gasâng chyáng kyûdung byì lhê. Haù gi, ngamoq chyâm hui luì wó lut é hkyô lé byu pé myàng kó râ matú a nghut é za, ngamoq sùm é su dut kôlhang, nungmoq ge é hkyô kut kó râ lé myàng râ matú nghut lhê. ⁸ Hkâsu mù gâ le, ngamoq gi, haù tengmán hkyô eq shaì é dông haì le a ge kut é za, tengmán hkyo é matú za kut râ dut é nghut lhê. ⁹ Ngamoq wum nyhóm kôlhang, nungmoq wúm bo é hkùn, ngamoq gabú é nghut lhê; ngamoq kyûdung é gi, nungmoq gumjup râ matú nghut lhê. ¹⁰ Ngò gi, wê gâng tô é hkùn, haù hkyô pé lé haì mù kâ é gâ le, ngò jé lé é hkùn, ahkáng ayá lé ngò chung é má htân htân a kut râ matú nghut lhê. Ahkáng ayá haù gi, nungmoq lé lhoq htên pyám râ matú a nghut, nungmoq lé kô myhang lo nhâng râ matú, haù Yhumsing ngo lé byì é sheq ru nghut lhê.

Ló Htâng É Shi-kyám Dang

¹¹ Ló htáng má ngò taí nau é gi, gumang wuì ê, nguínón yuqyo nyì keq. Gumjup hkyô shut sô nyì keq, ngò dung tôngbán é dang lé gyo keq, myit rahkat za dut nyì keq, nguínón shoq asak duì nyì keq. Haù hkùn, chyitdap hkyô eq nguínón

hkyo é Garai Gasang gi, nungmoq eq rahá nyì nyì râ nghut lhê.

¹² Chyoiyúng é bopuq puq é eq, rayuq eq rayuq shi-kyâm lhum keq. ¹³ Sânyúng bang banshoq gi, nungmoq lé shi-kyâm kat akô.

¹⁴ Haù Yhumsing Yesuq Hkrisduq é jeju, Garai Gasâng é chyitdap myit eq Chyoiyúng Woi-nyì é zùm yap hkyô gi, nungmoq banshoq bâng chyáng ru joq nyì sháng gaq ô.

GALATIQ

Mau Bâng Chyáng Hun Kat é Laiká (Galatians)

¹ Byu pê chyáng mai le a nghut, ó yuq èq nhang é le a nghut e za, haù Yesuq Hkrisduq lé shí bê mai dum lhoq dui toq yu é sù İwa Garai Gasang eq Yesuq Hkrisduq chyáng mai nhang kat é lagyo rayuq nghut sù, ngò Poluq gi, ² ngò eq rahá nyi é gumang wui banshoq bang le mù, Galatiq mau mà é noqkuq hpúng pè chyáng dang kyô kat lhê.

³ Nga-nhung é İwa Garai Gasang eq Yhumsing Yesuq Hkrisduq chyáng mà é, jeju eq nguingón hkyô gi, nungmoq chyáng ru joq nyi sháng gaq ô. ⁴ Haù Hkrisduq gi, nga-nhung é İwa Garai Gasang ô nau é eq rajung za, agè ashop é ipyat shí mai, nga-nhung lé xe yù rà ga, nga-nhung é yubak mará é matú yhanggùng lé Yhang byi pyám bê nghut ri. ⁵ Haù hpungwup shingkang gi, Garai Gasang chyáng pyat dedu ahtum abyuq ru joq nyi sháng gaq ô. Amen.

Gotú Gabú Danglù A Joq É Hkyô

⁶ Ngò gi, haù Hkrisduq é jeju mai nungmoq lé ji yù Sù lé, nungmoq haù-í han kang pyám to kôluí, shái é gabú danglù shut lling ló nyi kô é hkyô lé, gyai yhang maú nyi ri. ⁷ Danglù haù gi, gabú danglù ratsuí lhang a nghut. Byù ra-am mai nungmoq lé lhoq shuk byi luí, haù Hkrisduq é gabú danglù lé, shikut luí lhoq shái nhang pyâm nyi kô é hkyô za nghut lhê. ⁸ Nghut kôlhang, nungmoq lé ngamoq hkô kyo bê gabú danglù mai lai luí, ngamoq nghut nghut, mauhkung htoq mà é maumang lagyo rayuq nghut nghut, shái é gabú danglù, nungmoq lé hko kyô é nghut jang,

haù yuq gi, ahtum abyuq dam byi é hui zo sháng gaq ô! ⁹ Ngamoq taí wú bê eq rajung za, ahkuí le, ngò dum taí kôlé: rayuq yuq mai, nungmoq hap yu to bê é gabú danglù mai lai luí, gotú hko nyi e nghut jang, haù yuq gi, ahtum abyuq dam byi é hui zo sháng gaq ô!

¹⁰ Haù su nghu taí é gi, ahkuí, ngò, byù é hí má myoqdong wó rà matú shikut nyi é nghut lhê lhú? Haù a nghut jang, Garai Gasang é hí má myoqdong wó rà matú shikut nyi é nghut lhê lhú? Byù lé gabú nhang rà matú, ngò shikut nyi é nghut lhê lhú? Ngò gi, byu pé lé za ru gabú nhang nau nyi é nghut le gi, Hkrisduq é dui-nhang zoshang dut rà a nghut.

Poluq Lé, Garai Gasang Ji Yu É Hkyô

¹¹ Gumang wui ê, ngò hko kyô é gabú danglù haù gi, byu èq kut htoq é hkyô a nghut é lé, ngò, nungmoq lé sé nhang nau ri. ¹² Ngò gi, haù lé, byu chyáng mai wó yu é le a nghut, góyuq èq mhoq byi é le a nghut e za, Yesuq Hkrisduq èq shing-rán byi é đông wó hap yu é ru nghut lhê.

¹³ Ngò, Yudaq noqkuq htung má nghut nyi ashí hkùn, Garai Gasang é noqkuq hpúng lé ladu lai shoq hkâsu kut zing-ri luí, haù lé lhoq htên shikut wún é, ngá é hí hpyang lhê é asak dui hkyô lé, nungmoq wó gyô wú bekó rà nghut lhê. ¹⁴ Ngò gi, ngò eq ra-kyam zâ é Yudaq byu pé myo myô é htoq má, Yudaq noqkuq htung lé je cháng sù nghut é htoq agó, ngá é íchyí İwa pé é htungli lé ladu lai shoq myit zing zuq sù nghut lhê. ¹⁵ Nghut kôlhang, ngá nú é unghkaú mai yhang hkyin to luí, Yhang é jeju yanmai ngo lé ji yu é Garai Gasang gi, ¹⁶ haù Yhang Zô é hkyô gabú danglù lé, ngò mai tungbaù pè chyáng hko kyo sháng gaq ga, Yhang Zo lé ngá chyáng htoq shit nhang rà matú myit hpyit

yu é hkûn, ngò gi, ó yuq eq le a hpyé yù, ¹⁷ Yerusalem wà mó má doq ló luí, ngá hí má lagyo kut é bang lé le a ló huí e za, radá dâm Arabiq mau shut é luí, Damaskuq myuq má dum taú ló bê nghut lhê.

¹⁸ Sum zân lai é htâng má, ngò gi, Yerusalem wà mó má doq ló mù, Petruq* lé ló hui luí, yhang eq raxe ngo nyí, ló nyi nyi é nghut lhê. ¹⁹ Haú má, Yhumsing é yhanggu Yakuq mai lai luí, lagyo góbang lé ngò a myàng nghut ri. ²⁰ Nungmoq lé ngò ká byí kat é má, mhaú é hkyô a bò nghú luí, Garai Gasang hí má, hkyak, ngò taí lhê. ²¹ Hau htâng má, ngò gi, Suriq mau eq Kiliki mau má é jé é nghut lhê. ²² Haú hkûn, haú Hkrisduq má nghut é, Yuda mau má é noqkuq hpúng byú wui gi, ngo lé myoqno a shú kó nghut ri. ²³ Yhangmoq gi, "Hí hkûn, nga-nhúng lé zing-ri sù gi, yhang mai lhoq hten rá matú radàm shikut wú é lumjng hkyô haú lé, ahkuí hko nyi ri." gâ é hkyanglù lé wó gyô wú kôluí za, ²⁴ ngá é yanmai, Garai Gasang lé hkya-ôn bum akô nghut ri.

2

Poluq Lé Lagyo Pé Lhom Hap Yu É Hkyô

¹ Raxe myi zân lai é htâng má, ngò gi, Barnaba eq rahá Yerusalem wà mó má dum doq ló é hkûn, Tituq lé le shuí chung é nghut lhê. ² Garai Gasang byí é shing-rán eq rajung za doq ló luí, ngò kut wú bê muzó eq ahkuí kut é muzó pé akôm a dut pyám sháng gaq nghú, tûngbaù pé chyáng ngò hko kyô nyi é gabú danglù lé, haú suwún dut bâng é hí má za shap kyô é nghut lhê. ³ Nghut kôlhang, ngò eq rahá nghut é Tituq gi, Grik byu nghut kôle, yhang lé ahpyo-kuq a hpyit nhâng kó nghut

ri. ⁴ Haú hkaú wang lo é mhaú é gumang wui gi, Hkrisduq Yesuq má ngamoq wó é luthkyô má jowú luí, nga-nhúng lé jùn dut nhâng rá dâ kô é yanmai, haú hkyô gabyông htoq lo é nghut ri.* ⁵ Nghut kôlhang, haú gabú danglu é tengmán hkyô gi, nungmoq chyáng joq gîng nyi sháng gaq nghú, razup za lhang, yhangmoq é dang lé ngamoq gyo byí é a nghut.

⁶ Ahkyak é byú su dut é bang gi, yhangmoq hai jung kut kôlhang, ngò eq a séng nghut ri; Garai Gasang gi, du lé wú mù jéyáng é sù a nghut; byú haú bang gi, ngá é mungdang má hai le a jat kat e za, ⁷ Petruq gi, Yudaq byu pé† lé, haú gabú danglù hko kyo rá mù má lum tô é hui bê eq rajung za, ngò gi, tûngbaù pé‡ lé, haú gabú danglù hko kyo rá mù má lum tô é hui bê hkyô lé za, yhangmoq myang akô nghut ri. ⁸ Hkâsu mù gâ le, Yudaq byu pé é matú Petruq lé lagyo ayá dâng byí é sù Garai Gasang gi, tûngbaù pé matú ngo lé le lagyo ayá dâng byi bê nghut lhê. ⁹ Haú hkungmó-zing su ahkyak é, Yakuq, Petruq eq Yohan pé gi, ngo lé byi tô é jeju lé myang sé kôjáng, ngò eq Barnaba lé, zùm yap hkyô gâ é loqyo loq eq shi-kyâm yù kôluí, yhangmoq gi, Yudaq byu pé shut, ngá-nhik lé gi, tûngbaù pé shut é rá lhê ga, myit hui bekô nghut ri. ¹⁰ Yhangmoq gi, ngá-nhik mai myùng bang lé ru bún nyi rá matú za pying kat akô; haú gi, ngò gyai yhang kut nau nyi é hkyô nghut lhê.

Petruq Lé Poluq Htuq Htîng É Hkyô

¹¹ Antioku wà mó má Petruq jé lé é hkûn, yhang lé mara hûn rá hkyô joq é yanmai, ngò gi, byu hí má

* **1:18** Petruq lé Kehpa le gâ lhê. * **2:4** Yudaq byu pé ra-am gi, hpúng asik wang é bang lé Yudaq htûng tará cháng nhâng nau akô nghut ri. † **2:7** Grik má ahpyo-kuq hpyit hkam é bang ga bo tô ri. ‡ **2:7** Grik má ahpyo-kuq hpyit a hkam é bang ga bo tô ri.

yang, yang lé lhom htuq htíng é nghut lhê. ¹² Hkâsu mù gâ le, Yakuq chyáng mai lé é bang a jé shî é u lé, yang gi, tûngbaù pé eq rahá chôm zo chôm shuq lhaq kut ri. Nghut kôlhang, haù bang jé é hkûn, yang gi, ahpyo-kuq hpyit râ lhê gâ é hpúng má lom é bang lé gyuq é yanmai, tûngbaù pé chyáng mai htoq gang luí, yang baù nyi tô ri. ¹³ Yang, gegùn labyoq kut é hkyô má, gotù Yudaq byu pé le bo châng kut akô nghut mù luí, Barnaba lhang yangmoq kut é gegùn labyoq hkyô má bo châng nghoq ló bê nghut ri. ¹⁴ Haù gabú danglu é tengmán hkyô eq rajung za, yangmoq a cháng kô é lé myàng jáng, ngò gi, yangmoq banshoq bâng é hí má, Petruq lé, "Nàng gi, Yudaq byù nghut to mù luí, Yudaq byù rayuq đông a nyi e za, tûngbaù rayuq đông nyi luí nhîng, tûngbaù pé lé Yudaq byu pé é htungli hkâsu kut wó châng nhâng râ lúhú?

¹⁵ Ngamoq gi, yubak dap bang gâ é tûngbaù pé a nghut e za, hkû é buinyi mai yang, Yudaq byù nghut gû bê nghut lhê. ¹⁶ Byù gi, jep é tarâ lé cháng luí mara hkyut san byi huí é a nghut e za, Yesuq Hkrisduq lé lumjîng é yanmai sheq mara hkyut san byi huí é hkyô lé, ngamoq sê lhê. Haù mù luí, ngamoq gi, jep é tarâ lé cháng luí a nghut e za, Yesuq Hkrisduq lé lumjîng é yanmai, mara hkyut sân pyám byí é hui sháng gaq nghú, Yesuq Hkrisduq lé lumjîng bê nghut lhê; hkâsu mù gâ le, ó yuq le, jep é tarâ lé châng é yanmai, mara hkyut san byí é hui râ a nghut.

¹⁷ Ngamoq gi, Hkrisduq má ngamoq é mara hkyut san byí é hui râ hkyô ho nyi é hkûn, yubak dap é bang ngamoq nghut é lé myàng é nghut jáng, mara lé gi, Hkrisduq mai kut nhang é nghut lhê lúhú? Ratsuí le a nghut. ¹⁸ Ngò gi, ngò hpyoq pyám bê hkyô lé dum saí

kut é nghut jáng, tarâ lu lai é byù ngò nghut é lé tûn shit ri. ¹⁹ Ngò gi, jep é tarâ eq sêng é má, jep é tarâ é yanmai shî jáng sheq, Garai Gasâng é matú wó dui nyi râ nghut lhê. ²⁰ Ngò gi, Hkrisduq eq rahá jén sat é hui bê nghut mù luí, ngá gûng ngò dui nyi é a nghut lo, Hkrisduq sheq ngò má dui nyi é ru nghut lhê. Ahkuí, ngò gungsho má asak dui nyi é gi, ngo lé chyitdap luí, ngá é matú yhânggùng lé Yang byí pyám é, haù Garai Gasâng é Yangzo lé lumjîng é yanmai ru nghut lhê. ²¹ Ngò gi, Garai Gasâng é jeju lé tô pyám é a nghut, hkâsu mù gâ le, dîngmán é hkyô lé, jep é tarâ đông wó yu é ru nghut le gi, Hkrisduq shî hkâm é gi, akôm dut byuq râ nghut lhê." nghú tai é nghut lhê.

3

Lumjîng Myit Lhú? Jep É Tarâ Lhú?

¹ Galatiq mau mâ é byùbâm pé ê! Yesuq Hkrisduq gi, tapzîng má jén sat hui bê hkyô lé, nungmoq é myoq má bò nhang to bê le nhîng, ó yuq eq wá nungmoq lé lîng nghoq yù bekô lúhú? ² Nungmoq gi, haù Woi-nyí lé, jep é tarâ cháng luí wó yù kô é nghut lhê lúhú? A nghut jáng, nungmoq wó gyô yu é gabú danglù lé lumjîng luí wó yù kô é nghut lhê lúhú? Haù rahkat lé za, ngò sê yù nau ri. ³ Nungmoq gi, haù-í yang bâm akô lúhú? Haù Woi-nyí lé lumhkaù mù kut hí kôluí nhîng, ahkuí, gungsho wum-o lé lumhkaù mù, yhumsîng myit tô é hkyô lé lhoq pán râ matú shikut nyi akô lúhú? ⁴ Nungmoq, myo myo hpuzô pyám é gi, akôm nghut akô lúhú? Gè gè yang, haù gi, akôm nghut byuq bekô lúhú? ⁵ Garai Gasang, nungmoq lé Yhâng é Woi-nyí byí é htoq agó, nungmoq chyáng lak-lai kumlhá kut é gi, jep é tarâ lé nungmoq châng é yanmai nghut akô lúhú? A nghut jáng, nungmoq

wó gyô é gabú danglù lé, nungmoq lumj́ing é yanmai nghut akô lúhú?

⁶ "Abraham gi, Garai Gasang lé lumj́ing luí, yhang lé dingmán sù ga sôn yu é hui bê nghut ri."^{*} ga, Abraham eq séng luí taí tô é lé myit wú keq. ⁷ Haú mù luí, lumj́ing myit bo é bang gi, Abraham é yhangzô pé* yhang dut bê nghut é hkyô lé sé keq. ⁸ Lumj́ing myit é yanmai, tungbaù pé lé Garai Gasang mara hkyut san byi râ nghut lhê ga, Chyúmdang mai hí byu-myang to bê nghut mù luí, Abraham lé hí shit kyô tô é gabú danglù gi, "Nang é yanmai, byuhú chângjup gi, shimân jeju wó yû kó râ nghut lhê."^{*} gâ ri. ⁹ Haú mù luí, lumj́ing myit bo é bang gi, lumj́ing myit bo é Abraham eq rahá, shimân jeju lé myang hkam yù kó râ nghut lhê.

¹⁰ Jep é tarâ châng é hkyô má ngè hkau é lhunglhang bang gi, nhing pyâm é hui bang chyat nghut lhê. Hkâsu mù gâ le, "Tarâ laiká má kâ tô é lhunglhang lé a xoq kut é sù, ó yuq nghut kôle, nhing pyâm é hui kó râ nghut lhê."^{*} ga luí, kâ tô ri. ¹¹ Hau htoq agó, "Haú dingmán sù gi, lumj́ing myit mai asak duì râ nghut lhê."^{*} ga kâ tô é yanmai, ó yuq nghut kôle, Garai Gasang é hí má jep é tarâ lé châng luí, mara hkyut san byi é a hui é hkyô gi, san za nghut bê nghut ri. ¹² Haú jep é tarâ gi, lumj́ing myit eq haí a sêng é nghut luí, "Haú pé dông châng é sù gi, haú pé mai asak duì râ nghut lhê."^{*} ga kâ tô ri. ¹³ Haú Chyúmdang má, "Sik zing má jén lhang to hui é sù ó yuq nghut kôle, nhing pyâm é hui sù nghut ri."^{*} ga kâ tô é eq rajung za, Hkrisduq gi, nga-nhung é matú nhing pyâm é hui sù dut bê nghut é yanmai, jep é tarâ má é nhing é hkyô mai

nga-nhung lé hkyi yù bê nghut ri. ¹⁴ Haú Abraham lé byi tô é shimân jeju gi, Hkrisduq Yesuq é yanmai tungbaù pé chyáng le jé sháng gaq ga, Yhang nga-nhung lé hkyi yu é nghut ri; haú mù, nga-nhung gi, danggidiq byi tô é Woi-nyí haú lé, lumj́ing myit mai wó yû râ nghut lhê.

Jep E Tarâ Eq Danggidiq

¹⁵ Gumang wui ê, nyí wui é asak duì hkyô mâ é lé dangtú yù mù, ngò nungmoq lé taí kôlé, byù mai chôm tô tô é dangshikaq lé, ó yuq èq le wó lhoq hpyoq pyám râ a nghut, ó yuq èq le haú má wó jat kat rá a nghut. ¹⁶ Abraham eq yhang é awut ashín lé byi tô é danggidiq le haú eq rajung za nghut ri. "Awut ashín pé lé" gâ é dang gi, byù myo myo lé gâ lhê; nghut kôlhang, haú Chyúmdang má, haú lé taí nau é a nghut e za, "náng é awut ashín lé"^{*} ga taí nau é ru nghut lhê, haú é lichyúm gi, byù rayuq lé za taí é nghut lhê, haú gi, Hkrisduq nghut ri; ¹⁷ haú mù luí, ngò taí nau é gi, Garai Gasang, dangshikaq tô tô é htâng, myí sho sum xê zàn má lé joq é tarâ gi, dangshikaq haú lé le wó lhoq hpyoq pyám râ a nghut, danggidiq lé le wó lhoq htên pyám râ a nghut. ¹⁸ Hkâsu mù gâ le, haú silí wunlí gi, jep é tarâ eq séng lhum é nghut jáng, danggidiq eq gi, haí le a sêng lhum lo nghut ri; nghut kôlhang, Garai Gasang gi, Yhang é jeju yanmai, Abraham lé danggidiq dông silí wunlí haú byi to bê nghut ri.

¹⁹ Haú su nghut jáng, haú jep é tarâ gi, hai akyù bò râ lúhú? Haú gi, danggidiq dông lhoq âng tô é Awut ashín nghut é sù jé lé é hkûn jé shoq, mara kut shut nyi bùm kô é yanmai, jat kat tô é nghut lhê; jep

* **3:6** Apûn 15:6 * **3:7** Abraham é yhangzô pé gâ é gi, Garai Gasang é yhangzô pé lé gâ é nghut lhê. * **3:8** Apûn 12:3 * **3:10** Tarâ Pun 27:26 * **3:11** Hbk 2:4 * **3:12** Nhong 18:5 * **3:13** Tarâ Pun 21:23 * **3:16** Apûn 12:7; 13:15; 24:7 † **3:19** Gyoro so xoq byi sù gi, Mosheq nghut ri.

é tarâ haû gi, maumang lagyô pé mai gyoro sô xoq byi sù† é loq dông byi tô é ru nghut lê. ²⁰ Gyoro sô xoq byi sù gi, rahkyam shut mâ é bang eq baú sêng é a nghut, nghut kôlhang, Garai Gasang gi, rayuq za nghut lê.

²¹ Haû mù luí, jep é tarâ gi, Garai Gasâng é danggidiq pé eq htug htíng lhùm lê lú? Ratsuí le a nghut. Hkâsu mù gâ le, dui é asak wó byí é jep é tarâ lé byi to bê nghut le gi, gè gè yhang, dingmán hkyô gi, jep é tarâ mai lò râ nghut lê. ²² Nghut kôlhang, mingkan gón mâ é bang gi, yubak marâ é htongbyu pé chyat nghut akô ga Chyúmdang má bo tô ri; haû mù luí, haû byí to bê danggidiq lé gi, Yesuq Hkrisduq lé lumjîng é bang lé byi râ nghut lê.

²³ Lumjîng hkyô haû a jé shimá, nga-nhúng gi, haû jep é tara èq htongbyú dông lhúng tô é hui luí, lumjîng hkyô haû htoq shit é hkún jé shoq myhî lhúng tô é hui wú bê nghut lê. ²⁴ Haû mù luí, nga-nhúng gi, lumjîng é yanmai mara hkyut san byí é hui sháng gaq ga, jep é tarâ gi, nga-nhúng lé Hkrisduq chyáng shuí é râ matú, nga-nhúng é hkyô-u shê sù dut bê nghut ri. ²⁵ Ahkuí kúm gi, haû lumjîng hkyô jé bê nghut é yanmai, nga-nhúng gi, haû jep é tarâ mai hkyô-u shê é loq hkaú má a nghut lo.

Garai Gasâng É Yhangzô Pé

²⁶ Nungmoq lhunglhâng bang gi, Hkrisduq Yesuq lé lumjîng é yanmai, Garai Gasâng é yhangzô pé nghut bê; ²⁷ Hkrisduq má wui-myhup hkám bê é bang nungmoq banshoq gi, Hkrisduq lé mebu su wut to bekô nghut ri. ²⁸ Nungmoq lhunglhâng bang gi, Hkrisduq Yesuq má rading ralhum za nghut é yanmai, Yudaq byù nghú é eq Grik nghu é, jùn nghu é eq luthkyô

nghu é, yuggè nghu é eq myiwe nghu é, a gam hkoq lo nghut ri. ²⁹ Nungmoq gi, Hkrisduq eq séng bekô nghut jáng, Abraham é awut ashín pé le, haû danggidiq eq rajung za silí wunlí hkam yù bang le, nghut akô nghut ri.

4

¹ Ngò taí nau é lichyúm gi, haû amyú hkúng xoq dut râ sù gi, ikun sutzè banshoq lé sîng ang sù nghut kôlhang, yhang, zoshâng nghut ashí hkún gi, jùn hpó eq haí a shaí nghut ri. ² Yhang gi, yhâng wa masat tô é ahkyíng jé shoq, yhang lé zúng é sù eq yhùm lé up su é a-ô má ru lúng nyi ashí nghut ri. ³ Haû eq rajung za, nga-nhúng le zoshâng* nghut é hkún gi, mingkan uphkâng tarâ ô má jùn dut nyi é bang nghut lê. ⁴ Nghut kôlhang, ahkyíng lo ngap jáng, zo dut râ ahkáng lé byíng shoq, nga-nhúng wó yú sháng gaq ga, Garai Gasang gi, jep é tarâ hkaú má é byu pé lé hkyi yù râ matú, ⁵ jep é tarâ hkaú má, myiwe mai hku kat nhang é Yhang Zo lé, nhang kat byi bê nghut ri. ⁶ Hkâsu mù gâ le, nungmoq le, zo wui nghut bê yanmai, "Aba, Áwa ê." ga dat wut é, Yhang Zô é Woi-nyi lé, Garai Gasang gi, nga-nhúng é i-myt unghkaú má kat byi bê nghut ri. ⁷ Haû mù luí, nàng gi, jùn a nghut lô e za, zo rayuq nghut bê nghut ri; nàng gi, zo rayuq nghut é yanmai, Garai Gasang gi, nang lé Yhâng é amyú hkúng xoq dut nhâng bê nghut ri.

Galatiq Mau Bang Lé Poluq Myit Chiq Byí É Hkyô

⁸ Hí hkún, Garai Gasang lé nungmoq a sé shí é u lé, nungmoq gi, nat hparà lháng a nghut bâng é a-ô má jùn dut é bang nghut ri. ⁹ Ahkuí kúm, Garai Gasang lé nungmoq sé bê nghu é htoq agó, Garai Gasang gi, nungmoq lé sé bê nghut

* 4:3 Bun zo shí má, zoshâng gâ é lichyúm gi, Yesuq lé a lumjîng shí é bang lé gâ lê.

le nhîng, nungmoq gi, hkâsu mù, haù wum nyhôm é eq akyù a byî é, mingkan uphkan é tarâ shut dum lhîng taù ló nyi akô lúh? Nungmoq gi, haù pé eq jùn zô é dum huí zó nau akô lúh? ¹⁰ Nungmoq gi, buinyi wú, lhohkyap wú, ahkyíng yam-yoq wú, zanwut wú é hkyô pé lé, ahkyak kut nyi ashí kó nhung! ¹¹ Nungmoq chyáng ngò wum kat pyâm é hkyô gi, akôm dut bê abe nghû, nungmoq é matú ngò myit chiq nyi ri.

¹² Gumang wui ê, ngò gi, nungmoq su dut bê nghut é yanmai, nungmoq le ngò su dut keq† nghû, nungmoq lé dúng tôngbán kat lhê. Nungmoq gi, ngo lé haí le a kut shut wú kô é nghut lhê. ¹³ Sâng-hí dàm ngò nungmoq lé gabú danglù hko kyo é hkyô gi, nungmoq sê é eq rajung za, ngò nòhpyo huí é yanmai nghut lhê. ¹⁴ Ngá é nòhpyo gi, nungmoq é matú wuîhke hkyô dut kôlhang, nungmoq gi, ngo lé a wú tiq pyâm kô é htoq agó, a wú chaq pyám kó e za, Garai Gasâng é maumang rayuq lé su le, Hkrisduq Yesuq lé su yhang le, ngo lé lhom hap yù kô é nghut lhê. ¹⁵ Haù sù é nhîng, nungmoq é gabú hkyô banshoq gi, haí dut byuq bekô lúh? Nungmoq gi, ru wó dut é nghut jáng, nungmoq é myoqjí lé choq yù mù, ngo lé wám byî pyám kó rá í dut lai lò bê hkyô lé, ngò saksé wó hkâm lhê. ¹⁶ Ahkuí, ngò gi, nungmoq lé haù tengmán hkyô taí kyô é yanmai, nungmoq é gyè dut to bê nghut lhê lúh?

¹⁷ Haù byù góbang gi, nungmoq lé gyai shirong é hkyô tûn shit ri; nghut kôlhang, ge é hkyô haí a bò; yhangmoq ô nau é hkyô gi, yhangmoq lé nungmoq taù shirông kó abe ga, nungmoq lé ngamoq chyáng mai lhoq kâng yù rá matú

ru nghut lhê. ¹⁸ Ge é hkyô lé shirong é gi, ge lhê; ngò eq rahá nyi é hkûn za a nghut, hkâ-nhám le haù su shirong le ge lhê. ¹⁹ Ngò chyt-dap é zo wui ê, Hkrisduq é a-kyang nungmoq má gumjup lo é jé shoq, ngò gi, zo hkû nò no é su radàm dum hkâm zô nyi luí, ²⁰ nungmoq é hkyô lé myit wuîhke tô é yanmai, ahkuí, nungmoq eq rahá myang nyi mù, ngò taí é danghtê wó htaí rá matú, gyai yhang myoqbyu nyi lhê ô.

Hagara eq Sarah Nhik É Hkyô

²¹ Haù jep é tarâ ô má nyi nau é bang ê, nungmoq gi, jep é tarâ má taí é hkyô lé a sê gyo kô é nghut lhê lúh? Ngo lé taí kyô wú kó laq. ²² Hkâsu mù gà le, Abraham gi, yuqzo í yuq wó ri; rayuq gi, jùn myhí é yhangzo, rayuq gi, jùn myhí a nghut su é yhangzo, ga kâ tô ri. ²³ Haù jùn myhí é yhangzo gi, gungsho dông hku lé é sù nghut kôlhang, jùn myhí a nghut su é yhangzo kúm gi, danggidiq eq rajung za hku lé é sù ru nghut lhê.

²⁴ Haù hkyô pé gi, dangtú ru nghut lhê, myiwe haù í yuq gi, dangshikaq í lhum eq wui lhê; dangshikaq ralhú gi, Sinaq Bùm má é† nghut luí, jùn dut rá nghut é zo wui lé hku kat é Hagara lé taí nau é nghut ri. ²⁵ Hagara haù gi, Arabiq mau má é Sinaq Bùm lé taí nau é nghut luí, ahkuí lhê é Yerusalem eq wui nyi ri. Hkâsu mù gà le, Yerusalem haù gi, yhang zô pé eq rahá, jep é tara é jùn dut nyi kô é yanmai nghut lhê. ²⁶ Nghut kôlhang, ahtoq má é Yerusalem gi, jùn myhí a nghut sù nghut luí, nganhung é ìnu nghut ri. ²⁷ Hkâsu mù gà le,

"Zoshâng a hku é baùdung myhí ê, gabú nyí aq. Zo hkû nò a no

† 4:12 Ngò su dut keq gà é lichyúm gi, nungmoq le ngò su jep é tarâ mai lut htoq keq gá nau é nghut lhê. † 4:24 Sinaq Bùm má é dangshikaq gi, jep é tarâ eq sêng é dangshikaq nghut lhê.

wú shí é myiwe gi, gabú luí,
gabú garû nyi aq;

hkâsu mù gâ le, haû chamchuyiyui
dut é myiwe myhí gi, làng wó
é myiwê htoq má zo wuí je
myó wó bê nghut ri."
ga kâ tô ri.✧

²⁸ Gumang wuí ê, ahkuí, nung-
moq gi, Isak su, danggidiq byí tô é
zo wuí nghut bê nghut ri. ²⁹ Haú
hkûn lé, haû gungsho đông hku lé lo
é sủ gi, Woi-nyí wum-o đông hku lé
lo é sủ lé zing-rí ri. Haû eq rajung
za, ahkuí le dut nyi ri. ³⁰ Nghut
kôlhang, Chyúmdang má hkâsu ga kâ
tô ri lú gâ le, "Haû jùn myhí eq
yhangzo yuqzo lé hkat htoq pyám
aq; hkâsu mù gâ le, haû jùn myhí
é yhangzo yuqzo gi, jùn myhí a
nghut su é yhangzo yuqzo eq rahá,
silí wunlí lé wó chôm hkam yù râ
a nghut."✧ gâ ri. ³¹ Haû mù luí,
gumang wuí ê, nga-nhúng gi, jùn
myhí é yhangzô pé a nghut e za, jùn
myhí a nghut su é yhangzô pé ru
nghut lhê.

5

Hkrisduq Mâ É Luthkyô

¹ Nga-nhúng luthkyô wó râ matú,
Hkrisduq gi, nga-nhúng lé lhoq
lhut kat bê nghut ri. Haû mù luí,
haû má ru gíng nyi mù, yhumsing
gùng lé jun é wôlai hkaû má hkâtaû
bainai nyi kó.

² Ngá dang lé matsing yù keq!
Ngò Poluq, nungmoq lé tai kyo
kôlé, nungmoq ahpyo-kuq hpyit
hkam yù kô é nghut jáng, Hkris-
duq gi, nungmoq é matú hai akyû
le bò kó râ a nghut. ³ Hau htoq
agó, ahpyo-kuq hpyit hkam yu é
sủ ó yuq lé nghut kôle, ahpyo-kuq
hpyit é sủ gi, jep é tarâ lhunglhang
lé châng kut râ lhê nghû, ngò kyô
kat lhê. ⁴ Jep é tarâ châng shikut

é đông mara hkyut san byí é hui
naû bang, nungmoq gi, Hkrisduq
eq gâng lhùm to bekô nghut luí,
haû Garaí jeju mai le byit gyó byuq
bekô nghut ri. ⁵ Ngamoq kúm gi,
myit myoqbyu tô é dingmán hkyô
lé, haû Woi-nyí é yanmai lumjng
myit eq gyai yhang lánq nyi é bang
nghut lhê. ⁶ Hkâsu mù gâ le, Hkris-
duq Yesuq má gi, ahpyo-kuq hpyit
é nghut nghut, ahpyo-kuq a hpyit é
nghut nghut, hai akyû a bò nghut
ri; chyitdap myit mai htoq lo é
lumjng myit za sheq, akyû bo lhê.

⁷ Nungmoq gi, rago din wú bekô*
nghut é wá, haû tengmán hkyô lé
a cháng sháng gaq ga, nungmoq
lé ó yuq eq hkùm zing pyám kô é
lú? ⁸ Haû su kut mhoq hpyoq
yu é hkyô gi, nungmoq lé ji yù
Su chyáng mai htoq lo é a nghut.
⁹ "Mún ratsuí zo gi, muk long gón
lé wó lhoq daû lhê."† gâ é dang joq
lhê. ¹⁰ Nghut kôlhang, nungmoq
gi, gotû hkyô đông a lhom yù kó
râ nghut lhê nghû, Hkrisduq má
hkyak ngò myit lum nyi lhê. Nung-
moq lé lhoq byok byí é sủ, ó yuq
nghut kôle, yhumsing é mara eq
rajung za dam byí é hui zo râ nghut
lhê. ¹¹ Gumang wuí ê, ahpyo-kuq
hpyit é hkyô lé, ngò rû hko nyi ashí
nghut le gi, haí mù luí, zing-rí é
lé ngò hui zô nyi râ lú? Haû su
kut é nghut jáng, haû tapzîng eq
séng luí, manghkáng joq râ a nghut
lo. ¹² Nungmoq lé lhoq byok nyi é
bang gi, hau htoq chyân luí, yhum-
sing gùng yhumsing banshoq hpyit
pyám kó sháng gaq nghû, ngò wó
myit ri.

¹³ Gumang wuí ê, nungmoq gi,
luthkyô wó râ matú ji yù huí é bang
nghut akô; nghut kôlhang, nung-
moq é luthkyô ahkáng lé, yubak
gungsho má hkâcháng nhâng kó,

✧ 4:27 Esai 54:1 ✧ 4:30 Apûn 21:10 * 5:7 Rago din wú bekô gâ é gi, woi-nyí hkyô má kó
myhang lai lò bê lé tai nau é nghut lhê. † 5:9 Shut é đông mhoqshit é hkyô ratsuí gi, muk long
gón lé mún eq wó lhoq daû é su, nungmoq banshoq lé wó lhoq ngoq yu pyám lhê.

chytidap myit mai kúm gi, rayuq eq rayuq dojaú lhùm nyi keq. ¹⁴ Hkâsu mù gà le, "Náng gùng lé nàng chytidap é su, náng é chyangnâm mà é bang lé le chytidap aq."* gà é hkunmó má za, jep é tarâ banshoq lo bo to bê nghut lhê. ¹⁵ Nungmoq, rayuq eq rayuq ngat lhum myui lhùm nyi kô é nghut le gi, rayuq eq rayuq lhoq htên pyâm lhum kó rá nghut é lé, sidiq nyi keq.

Woi-nyí Èq Asak Dui Râ Hkyô

¹⁶ Nghut kôlhang, ngò tái kôlé, Woi-nyí shuí ù é đông asak dui nyi keq; haú hkùn, nungmoq gi, yubak gungsho ô nau é hkyô cháng kó rá a nghut. ¹⁷ Hkâsu mù gà le, yubak gungsho ô nau hkyô gi, Woi-nyí eq shai lhùm nyi; Woi-nyí gi, yubak gungsho ô nau hkyô eq shai lhùm nyi, dut ri. Haú í lhum gi, gyè dut lhùm ri; haú mù, nungmoq gi, yhumsing ô nau é đông hkâkut kó. ¹⁸ Nghut kôlhang, nungmoq lé Woi-nyí eq hkyô hî é nghut jáng, nungmoq gi, jep é tarâ ô má a nghut lo nghut ri.

¹⁹ Yubak gungsho é muzó gi, de de yhang nghut lhê; haú pé gi, ashop é đông gungsho zùm yap é hkyô, a sân-yúng é hkyô, shut é đông nyi zô lhum nau é myit, ²⁰ hparà noq hkyô, myoqheq mù kut é hkyô, a jú é hkyô, byoq lhùm é hkyô, manon é hkyô, nhiksoq sup é hkyô, yhumsing wuizat é hkyô, gâng lhum sê é hkyô, hpúng gam é hkyô, ²¹ ningsû é hkyô, î shuq wut é hkyô, zo yê shuq yê mù achayut kut é hkyô pé eq haú pé su kut é gotú hkyô pé nghut ri; haú su kut nyi yap é bang gi, Garai Gasâng mingdán é silí wunlí lé wó hkam yù rá a nghut nghû, ngò, hí hkùn nungmoq lé tái wú bê eq rajung za, ahkuí lé, nungmoq lé ngò sidiq byi nyi lhê.

²² Nghut kôlhang, Woi-nyí é ashí gi, chytidap hkyô, gabú hkyô, ngu-ingón hkyô, myit húng hkyô, nhik-u nú é hkyô, ge é hkyô, lhumsuzi hkyô, ²³ nùm é hkyô, yhumsing gùng lé wó hkyô pé lé hkyô pé nghut ri. Haú hkyô pé lé hkùm zing pyâm rá tarâ haí le a joq nghut ri. ²⁴ Hkrisduq Yesuq eq séng bê bang kúm gi, yubak gungsho ô nau hkyô lé le, hau é yut yut ô nau myit eq shirong é hkyô pé lé le, tapzing má jén sat pyâm bekô nghut ri. ²⁵ Nga-nhúng gi, Woi-nyí mai asak dui bê nghut mù, haú Woi-nyí htâng châng nyi sháng. ²⁶ Nga-nhúng gi, akôm gyáng dang tái luí, rayuq eq rayuq jeq ho lhùm é eq manon lhùm é bang, a dut nyi sháng gaq.

6

Lhunglhang Bang Lé, Ge É Hkyô Kut Byi Râ Hkyô

¹ Gumang wui ê, rayuq yuq gi, mara záng kut shut é nghut jáng, Woi-nyí wum-o bò bê bang nungmoq gi, nùm é myit eq haú yuq lé lhoq pun lhoq kyíng yù keq. Nghut kôlhang, nàng gi, gunglaú é a hui sháng gaq, sidiq nyi aq. ² Rayuq eq rayuq é wòlai lé tē byi lhùm nyi keq; haú đông mai, nungmoq gi, Hkrisduq é tarâ lé wó lhoq dik kó rá nghut lhê. ³ Rayuq yuq gi, yhumsing gùng haí le a nghut é wá, ahkyak su ngam é nghut jáng, haú yuq gi, yhumsing gùng lé mhaú pyâm é sù nghut ri. ⁴ Yuq hkyôgmó gi, yhumsing nyi yap é hkyô lé tái myit wú keq; haú hkùn, yhumsing gùng lé góbang eq whuí nó a rá e za, yhumsing gùng má aróng wó yù rá nghut lhê. ⁵ Hkâsu mù gà le, yuq hkyôgmó gi, ó le ô wò lé wùn waq ra rá dut lhê.

⁶ Haú mungdang lé mhoq yu é sù gi, mhoqshit byi sù lé, ge é zè banshoq gám byi sháng gaq.

* 5:14 Nhung 19:18

⁷ Garai Gasang lé gi, wó rhoi rá a nghut, yhumsing gung yhumsing mhauzô é hkâhui nhâng kó; byù gi, hô kat é eq rajung za, shù yù rá nghut lhê. ⁸ Haù yhumsing é yubak gungsho lé lhoq ngón rá matú hô kat é sù gi, myit haù mai htên byoq é hkyô lé myang hkam yù rá nghut lhê; haù Woi-nyí lé lhoq ngón rá matú hô kat é sù kúm gi, Woi-nyí haù mai ahtum abyuq é asak lé myang hkam yù rá nghut lhê. ⁹ Nga-nhung gi, ge é hkyô kut é má ngú byuq é bang a dut sháng gaq, hkâsu mù gâ le, haù lé nga-nhung a tô pyâm é nghut jáng, ahkyíng yam-yoq jé é hkún, nga-nhung gi, akyù myang hkam yù rá nghut lhê. ¹⁰ Haù mù luí, nga-nhung gi, kut rá ahkyíng wó tô é u lé, byù lhunglhang bang lé ge é hkyô kut byi sháng, haù lumjíng hkyô eq sêng é ikun byu pé lé, je riyhang kut byi sháng.

Ahpyo-kuq Hpyit É Hkyô A Nghut E Za, Byù Sik Hpân Huí É Hkyô

¹¹ Ngò, nungmoq lé, ngá é loq èq hkâ-í kô é laiká cham kâ kat byi é lé, wú wú keq!

¹² Ahtoq pyâm za ge é hkyô lé kut shit nau é bang gi, ahpyo-kuq hpyit kó sháng gaq ga, nungmoq lé zik shikut nyi é bang nghut akô; yhangmoq haù su kut é hkyô gi, Hkrisduq é tapzing é yanmai zing-ri huí é hkyô lé, koi pyám rá matú za nghut ri. ¹³ Hkâsu mù gâ le, haù ahpyo-kuq hpyit é bang lhang jep é tarâ lé a cháng kó nghut ri; nghut kôlhang, yhangmoq gi, nungmoq é gungsho eq séng luí wó gumrông kó sháng gaq ga, nungmoq lé ahpyo-kuq hpyit nhâng nau akô nghut ri. ¹⁴ Ngò kúm gi, nga-nhung é Yhumsing Yesuq Hkrisduq é tapzing eq séng luí gumrong é mai lai luí, hái má le a gumrông sháng

gaq; Yhang é yanmai, mingkan gi, ngá é matú jén sat é hui bê; ngò gi, mingkân é matú jén sat é hui bê nghut lhê. ¹⁵ Ahpyo-kuq hpyit é hkyô nghut nghut, a hpyit é nghut nghut, hai akyù a bò; byù sik hpân huí é hkyô za sheq, ahkyak é nghut lhê. ¹⁶ Tarâ haù lé châng é lhunglhang bang é ahtoq má le, haù Garai Gasang é Israelaq byu pé* é ahtoq má le, nuingón hkyô eq shogyo nhikmyin hkyô gi, ru joq nyi sháng gaq ô.

¹⁷ Ahkuí mai gi, ó yuq le ngo lé jamjau a lhoq htoq byi lo sháng gaq; hkâsu mù gâ le, ngò gi, Hkrisduq é dui-nhang zosháng nghut é saksé damhkô lé wun wún lhê.

¹⁸ Gumang wui ê, nga-nhung é Yhumsing Yesuq Hkrisduq é jeju gi, nungmoq é woi-nyí eq ru joq nyi sháng gaq. Amen.

* **6:16** Bun zo shí lhum mâ é Israelaq byu pé gâ é gi, hpúng byù wui banshoq lé tá nau é nghut lhê.

EHPESU Pê Chyáng Hun Kat é Laiká (Ephesians)

¹ Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyi é, Hkrisduq Yesuq má lhumzui bang nghut é, haù sân-yúng bang chyáng nguingón dang shit kyô kat lhê.

² Nga-nhùng é Îwa Garai Gasang eq Yhumsing Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyi sháng gaq ô!

Hkrisduq Mâ É, Woi-nyí Hkyô Shimân Jeju Pé

³ Mauhkúng htoq tsáng myhâng má, woi-nyí hkyô eq sêng é shimân jeju jung hkanmó lé, Hkrisduq má nga-nhúng lé shimân byi sù, nga-nhùng é Yhumsing Yesuq Hkrisduq é Yhângwa, Garai Gasang gi, hkungsô wó nyí sháng gaq.

⁴ Hkâsu mù gâ le, nga-nhúng gi, Garai Gasâng é hí má, chyoiyúng é bang eq mara a bo é bang dut rá matú, Garai Gasang gi, mingkan lé a hpân shi mai, Hkrisduq Yesuq má nga-nhúng lé hkyin yu to bê nghut ri. ⁵ Hau htoq agó, Yhang, nga-nhúng lé chyitdap é yanmai, Yhang myit ngui ô nau é eq rajung za, Yesuq Hkrisduq mai yhangzô pé kut yu rá matú, hí mai nga-nhúng lé masat to bê nghut ri.

⁶ Haù mù, Yhang chyitdap é Sû* má, nga-nhúng lé láí láí byi bê nghut é, hpungwup shingkan bo é jeju chyunghuq lé, chòm hkya-on sháng. ⁷ Garai Gasâng é agùn agó é jeju yanmai, nga-nhúng mara hkyut byí é hui lui, Yhang Zô é sui dông mai, nga-nhúng gi, Yhang má

hkyi yù hkyô wó yu é nghut lhê. ⁸ Jeju haù lé gi, hpaqchyí byéng-yá eq sê gyô é nyan banshoq le kut, Yhang, nga-nhúng lé agùn agó byi bê nghut lhê. ⁹ Garai Gasang gi, Yhang myit ngui é eq rajung za, Hkrisduq dông mai kut rá matú hen to bê nghut é, Yhâng é záu tô é hkyô lé, nga-nhúng lé shit bê nghut ri. ¹⁰ Sê gyo wui é hkyô haù gi, lhoq dik rá ahkying jé jáng, mauhkúng htoq eq myigùng htoq mâ é lhunglhang lé, Hkrisduq má rading ralhum za kut rá nghut é hkyô nghut lhê.

¹¹ Hkrisduq má sâng-hi myit myoqbyù bang nghut é nga-nhúng gi, Yhâng é hpungwup shingkan lé hkya-on kungtôn sháng gaq ga, ¹² Garai Gasang gi, Yhang myit sôn tô é lhunglhang lé ban kut mù, Yhâng ô nau é dông, hí mai myit hpyit doqdân to bê eq rajung za, nga-nhúng lé le, Hkrisduq má hkyin yu to bê nghut ri. ¹³ Hau htoq agó, nungmoq le, nungmoq é hkyi yù hkyô é gabú danglù gâ é tengmán mungdang lé wó gyo kô é hkùn, Hkrisduq eq sêng é bang dut bekô nghut ri. Nungmoq gi, Hkrisduq lé lumjing bekô nghut é yanmai, haù gidig byí tô é Chyoiyúng Woi-nyí dizik htung tap byí é hui bekô nghut ri. ¹⁴ Garai Gasâng é hpungwup shingkan lé hkya-on rá matú, Yhang eq sêng é byu pé hkyi xe yù hui é hkying jé shoq, Chyoiyúng Woi-nyí haù gi, nga-nhúng é muizé lé hkyak wó yù rá nghu é masat nghut ri.

Poluq Kyûdung Byí É Hkyô

¹⁵ Haù mù lui, Yhumsing Yesuq lé nungmoq lumjing é hkyô eq sân-yúng bang lhunglhang lé nungmoq chyitdap é hkyô lé, ngò wó gyô é yanmai, ¹⁶ ngò gi, ngá é kyûdung dang má nungmoq lé myit bun uchyang, anum yhang, nungmoq é

* 1:6 Yhang chyitdap é Sû gâ é gi, Yesuq lé taí nau é nghut lhê.

matú jeju hkya-ôn nyi lhê. ¹⁷ Nga-nhúng é Yhumsing Yesuq Hkrisduq é Garai Gasang nghut é, hpungwup shingkanq bò sù haú Iwa gi, Yhang lé nungmoq je sé rà matú, hpaqchyí byéng-yá wó byí é eq san za wó sé nhang é Woi-nyí, nungmoq lé byi sháng gaq nghú, ngò, Yhâng chyáng dúng nyi lhê. ¹⁸ Hau htoq agó, Yhang, nungmoq lé ji yu é myit myoqbyù hkyô, hkasú é nghut é lé le, Yhâng é hpungwup shingkanq bo é muizè gi, sân-yúng bâng chyáng agùn agó joq nyi é hkyô lé le, Yhâng é kô dik é a-tsam mó gi, lumjǐng bang nga-nhúng é matú nghut é lé le, ¹⁹ nungmoq wó sé rà matú, nungmoq é myit myoqjí lhoq gyeng byí é hui sháng gaq nghú, ngò kyúdung byí nyi lhê. A-tsam mó haú gi, Garai Gasang, Hkrisduq lé shi é mai lhoq dui toq yú mù, ²⁰ mauhkúng htoq tsáng myhâng má, Yhâng é loqyò hkyam shut zúng nhang é hkún, chung é wum-o a-tsam mó eq rajung za nghut ri. ²¹ Hkrisduq gi, uphkanq é, ahkáng ayá wó é, a-tsam bo é eq up zô é bang banshoq htoq má le, ahkuí pyat eq htang pyat má myhǐng é myǐng lhunglhǐng é htoq má le, je gyaú é sù nghut lhê. ²² Hau htoq agó, Garai Gasang gi, lhunglháng lé Yhâng é hkyiwa ô má tô to luí, haú noqkuq hpúng é matú, Yhang lé, jung hkanqmó é ushuq dut rà đông masat to bê nghut ri. ²³ Noqkuq hpúng haú gi, Hkrisduq é gungdu nghut luí, hkyô hkanqmó má jung hkanqmó lhoq byǐng jup é Hkrisduq byǐng nyi é nghut ri.

2

Hkrisduq Má Asak Dui É Hkyô

¹ Lai ló bê hkún, nungmoq gi, tarâ lu lai é eq mara kut shut é hkyô pé é yanmai, shi tô é bang dut kô é nghut lhê. ² Haú hkún, nungmoq gi, mingkan ngón hkyô pé má lhaq chǎng nyi kô é htoq agó, haú tarâ a

chǎng bǎng é myit má ahkuí mù zúi nyi é sobyô nghut é, maulat lé up sù htǎng chǎng nyi kô é bang nghut lhê. ³ Nga-nhúng banshoq bang le, yhangmoq su kut nyi lai lo é bang chyat nghut mù, yubak mara byǐng é suisho ô nau gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé đông za chǎng wú é bang nghut lhê. Haú mù, góbang eq rajung za, nga-nhúng gi, Garai Gasang é nhikmo-yo hkyô eq gingdán wú é bang chyat nghut lhê. ⁴ Nghut kôlhǎng, shogyo nhikmyin myit gyaí bo é Garai Gasang gi, nga-nhúng, tarâ lu lai luí shi byuq bê bang dut kôlhǎng, Yhâng é chyitdap myit mó èq, nga-nhúng lé chyitdap luí, Hkrisduq eq rahá asak dui nhǎng bê nghut ri. ⁵ Haú mù, nungmoq gi, Garai jejú èq za hkyi yu é hui bekô nghut ri. ⁶ Garai Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a ung taí é Yhâng é jeju lé, htang pyat má wó shit sháng gaq ga, ⁷ nga-nhúng lé, Hkrisduq eq rahá lhoq dui toq yú mù, mauhkúng htoq tsáng myhǎng má, Yhang eq rahá zúng nhang to bê nghut ri. ⁸ Hkâsu mù gǎ le, nungmoq gi, lumjǐng é đông mai Garai jejú eq za hkyi yu é hui bekô nghut ri. Haú gi, nungmoq chyáng má é a nghut, Garai Gasang jeju chyunghuq za ru nghut lhê. ⁹ Haú gi, yhumsing é muzó mai wó é a nghut é yanmai, ó yuq le nghut-bun rà hkyô a joq. ¹⁰ Hkâsu mù gǎ le, nga-nhúng gi, Garai Gasang é loqmú pé nghut mù, nga-nhúng zui saí rà matú, hí hí mai, Garai Gasang hen lajǎng tô é ge é muzó pé lé zui saí rà matú, Hkrisduq Yesuq má hpan to hui bê bang nghut lhê.

Hkrisduq Má Rading Ralhum

¹¹ Haú mù luí, nungmoq gi, hí hkún, hku lé lo é mai yhang tǔngbaú pé nghut é hkyô lé le, byu loq èq za gungsho má kut é, "ahpyo-kuq

hpyit hkâm bang" gâ é bang mai, nungmoq lé, "ahpyo-kuq hpyit a hkâm bang" ga byi kô é hkyô lé le, myitbun keq. ¹² Haú u lé, nungmoq gi, Hkrisduq eq gâng lhûm tô é bang; Israelaq mingbyû a nghut é bang; danggidiq eq sêng é dangshikaq pé má gó ming byû nghut é bang; mingkan htoq má, myoqbyû jowò a joq é eq Garai a wó é bang nghut é lé, myitbun keq. ¹³ Nungmoq gi, hí hkûn wê gâng nyi é bang nghut kôlhâng, ahkuí kúm, Hkrisduq é sui dông mai Hkrisduq Yesuq má shuí chyâng htep é hui bekô nghut ri.

¹⁴ Hkâsu mù gâ le, Yhânggùng yhang gi, nga-nhûng é nguingón hkyô nghut ri. Yhang gi, gyoro má kyo tô é madin nghut é a naù a wom hkyô lé hpyoq hpyi pyám byi luí, haú í myû* dut nyi é lé, rahú za dut nhâng bê nghut ri. ¹⁵ Haú hkunmó pé eq hkang tô é tarâ pé bo é jep é tarâ lé, Yhâng é gungsho má lhoq htûm pyám bê nghut ri. Haú mù, Yhang ô nau é hkyô gi, haú í myû dut tô é lé, Yhânggùng má yhang, byû sik ra-myû za hpan to râ matú nghut ri; haú dông, simsaq hkyô kut byi bê nghut ri. ¹⁶ Yhang gi, a naù a wôm lhûm é hkyô lé, haú tapzîng má lhoq htûm pyám byi mù, haú tapzîng dông mai, byû myu í myu é lé ragùng za kut luí, Garai Gasang eq xoq byi bê nghut ri. ¹⁷ Yhang gi, wê gâng nyi é bang† nungmoq lé le, chyâng htep nyi é bang‡ lé le, simsaq hkyo é danglù lé hko kyo bê nghut ri. ¹⁸ Hkâsu mù gâ le, nga-nhúng í myû gi, Yhang dông mai, Woi-nyí ralhûm zâ èq, haú Íwâ chyáng wàng râ hkyô dong bê nghut ri.

¹⁹ Hau é yanmai, nungmoq gi, tûngbau pé eq byû bíng pé a nghut lô é za, Garaí é byu pé eq rahá,

mingbyû wui eq yhumbyû wui chyat nghut bekô nghut luí, ²⁰ haú lagyô pé eq myiqhtoí pé, hí tô é apûn awang htoq má xuq tô é bang chyat nghut akô; Hkrisduq Yesuq yhang, haú mâ é ahkyak é htungchyûn luggok dut bê nghut ri. ²¹ Yhang má, wahpang lhum gón xoq lhûm bùm é nghut mù, haú Yhumsîng má chyoiyúng noqkuq yhûm ralhûm dut lò bê nghut ri. ²² Woi-nyí dông mai, Garaí Gasang nyi râ jang dut râ matú, nungmoq le, Yhang má, wahpang su tsuq é chôm huí nyi bùm bekô nghut ri.

3

Poluq, Tûngbau Pé É Tarâ Hkô Sará

¹ Haú su nghut mù, Hkrisduq Yesuq é hkyô lé, nungmoq tûngbau pé chyáng hko kyo é yanmai, htongbyû dut sù, ngò Poluq gi, nungmoq é matú kyûdung byí lhê.

² Nungmoq lé dojaú râ é matú, ngo lé byí tô é Garaí Gasang jeju ayá shí lé, nungmoq gè gè wó gyô wú bekô râ nghut lhê. ³ Haú gi, hí hkûn, ngò, tot é dông kê tô wú bê eq rajung za, haú zaú tô é hkyô lé, shing-rán dông ngo lé sé nhang é nghut ri. ⁴ Haú hkyô lé, nungmoq nghap wú é hkûn, Hkrisduq eq sêng é zaú tô é hkyô, ngò rago sê é lé, nungmoq wó sé kô râ nghut lhê. ⁵ Haú lé, lai lò bê ipyat pé mâ é byu pé lé a sé nhang é nghut kôlhâng, ahkuí gi, Garaí Gasang é chyoiyúng é, lagyô pé eq myiqhtoí pé lé, haú Woi-nyí èq hpông shit bê nghut ri. ⁶ Zaú tô é hkyô haú gi, gabú danglù dông mai, Hkrisduq Yesuq má, Israelaq byu pé eq rahá, tûngbau pé le, hkûng xoq bang wó dut luí, gungdu ralhûm é gungsho showui

* 2:14 I myû gâ é gi, Israelaq byu pé eq tûngbau pé lé gâ lhê. † 2:17 Wê gâng nyi é bang gâ é gi, tûngbau pé lé gâ lhê. ‡ 2:17 Chyâng htep nyi é bang gâ é gi, Israelaq byu pé lé gâ lhê.

showang pé chyat dut é eq, dang-gidiq byi tô é lé wó chôm hkam yu é bang dut é hkyô nghut ri.

⁷ Yhâng é hpungwup a-tsam mai, ngo lé byi tô é Garai Gasâng jeju chyunhuq é yanmai, ngò gi, gabú danglù shí tái râ dui-nhâng zoshâng dut é nghut lhê. ⁸ Ngò gi, haû Garai Gasâng é byu pé mâ é tiq dik sù htoq má lháng je tiq sù nghut kôlhang, haû Hkrisduq é a ung htoq tái é wó sùt hkyô lé, tûngbau pê chyáng hko kyo râ matú le, ⁹ haû lhunglháng lé hpan é Garai Gasang má, lai lò bê ipyat pé má zaú tô é, zaú tô é hkyô haû lé hkâsu kut tô é lé, yuq hkanmó lé tái sân kyo râ matú le, jeju shí, ngo lé byi bê nghut ri. ¹⁰ Haû gi, nga-nhûng é Yhumsîng Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za, ¹¹ haû Garai Gasâng é hpaqchyí mó góng lé, noqkuq hpúng dông mauhkûng htoq tsáng myhâng mâ é uphkâng bang eq ahkâng ayá wó bang lé, ahkuí sé nhâng râ matú nghut lhê. ¹² Nga-nhûng gi, nga-nhûng é Yhumsîng Hkrisduq Yesuq eq rading ralhûm za nghut é yanmai le, Yhang lé lumjîng é yanmai le, Garai Gasang chyáng, wám é myit eq a gyuq a wám é myit é wó htep é é nghut lhê. ¹³ Haû mù luí, ngò, nungmoq lé dông tôngbán nau é gi, nungmoq é matú, ngò wuîhke jamjau hui zô é yanmai, nungmoq i-myit hkâgyui kó; haû gi, nungmoq é matú akyû bò râ hkyô nghut lhê.

Ehpesu Myuq Byu Pé Lé Kyûdung Byi É Hkyô

¹⁴ Haû pê é yanmai, ngò gi, haû Íwâ é hí má hkyihput htuq luí kyûdung é nghut lhê. ¹⁵ Mauhkûng eq myigûng htoq mâ é Yhâng é ikun byù lhunglháng gi, Yhâng chyáng mai myîng wó yu é chyat nghut lhê. ¹⁶ Nungmoq é lumjîng myit mai, nungmoq é i-myit unghkaû

má Hkrisduq wó nyi nyi sháng gaq nghû, ¹⁷ Yhang é hpungwup shingakang bo é agùn agó wó sùt é mai, nungmoq é i-myit unghkaû mâ é sù lé, Yhâng é Woi-nyi dông, hpungwup a-tsam èq wum-o lhoq kîng byi râ matú, ngò kyûdung byi lhê. Hau htoq agó, nungmoq gi, chyitdap myit má amyit chin to luí, awang hi to mù, ¹⁸ sân-yûng bang eq rahá, hau é apyí, a-tsûng, myhâng, nik, hkâ-í nghut é lé, rago wó sé kôluí, ¹⁹ Garai Gasâng é gumjup é hkyô lhunglhâng èq wó lhoq gumjup yù kó sháng gaq nghû, sê é nyan htoq má gyaú é Hkrisduq é chyitdap hkyô lé, nungmoq wó sé râ matú, ngò kyûdung byi lhê.

²⁰ Ahkuí, nga-nhûng é hkaû má mù zúi nyi é, Yhâng é wum-o a-tsam é yanmai, nga-nhûng dông é ban-shoq eq myit é hkyô lhunglháng htoq je wó kut byi é Su chyáng, ²¹ haû noqkuq hpûng é yanmai le, Hkrisduq Yesuq é yanmai le, pyat pyat zaí zaí, ahtum abyuq, hpung-wup shingakang rû bo nyi sháng gaq ô! Amen.

4

Hkrisduq É Gungdu Má Rading Ralhûm Za

¹ Haû mù luí, nungmoq gi, nungmoq lé wut yù bê nghut mù, wut yu é hkyô eq gingdán é dông asak duì keq nghû, haû Yhumsîng é yanmai, htóng lúng sù ngò Poluq gi, nungmoq lé lhoq pun lhoq kyîng kat lhê. ² Hkyô hkat hkanmó má i-myit lhoq nyhum é eq i-myit nú-nhâm nyi keq; myit hing é eq chyit-dap myit mai rayuq eq rayuq hkam jân lhum nyi keq. ³ Haû Woi-nyí èq byi é myit hui hkyô lé, ngu-ingón hkyô dông mai châng nyi râ matú, wó dut é í shikut nyi keq. ⁴ Nungmoq gi, wut yù hui kô é hkûn, myit myoqbyù hkyô rashut za wut yù hui bekô nghut é eq rajung za, gungdu ralhûm eq Woi-nyí

ralhum za nghut nyi ri. ⁵ Yhumsing rayuq za, lumjing hkyô rahkat za, baptisma ralhum za nghut nyi ri. ⁶ Banshoq bang é Iwa nghut sù Garai Gasang le, rayuô za nghut nyi ri; Yhang gi, banshoq bang é ahtoq má nghut luí, lunglhang dông mai mù kut é eq lunglhang é ahkaú má lung nyi sù nghut ri.

⁷ Nghut kôlhang, nga-nhung yuq hkanmó gi, jeju chyunghuq lé, Hkrisduq mai ké byi é dông wó yu é nghut lhê. ⁸ Hau é yanmai,

"Yhang gi, myhang é jowò shut doq ló é hkún, shum zung é bang lé gi, shui chùng mù, byu pé lé gi, chyunghuq tsing gam byi ri."[☆]

ga, Chyúmdang má tai tô é nghut lhê. ⁹ Haú "doq ló" gá é lichyúm gi, myigùng é a-o tsáng má le, Yhang gyó jé bê nghut lhê, gá nau é a nghut lhi? ¹⁰ Haú gyó lé é Sù gi, junghkang jungmó lé lhoq bying jup râ matú, mauhkung banshoq é ahtoq má doq ló é Sù yhang nghut lhê. ¹¹ Yhang gi, ra-am lé, lagyô pé, ra-am lé, myiqhtoí pé, ra-am lé, gabú danglù hko kyo râ bang, ra-am lé, hpung-up pé eq sará pé kut tsing byi to bê nghut ri. ¹² Haú bang gi, Garai Gasang é byu pé lé wùn waq ang é muzó pé é matú, hen lajang é bang nghut ri. Haú hkún sheq, Hkrisduq é gungdu gi, ¹³ haú lumjing hkyô eq Garai Gasang é Yhangzo lé sê é hkyô má, nga-nhung banshoq bang rading ralhum za wó dut mù, kô ding bang dut luí, Hkrisduq é gumjup é isâm banshoq lé wó yu é hkún jé shoq, wó kô jat nyi râ nghut lhê.

¹⁴ Haú mù, nga-nhung gi, wuibaú pé eq hí shut htang shut bat myhú é su dut é eq, byu pé é agè ashop é eq haq dá é mhoq hpyoq hpaqchyí pé eq mhoqshit hkyô laidun hkanmó eq, shí shut hó shut mut tâng é su dut é lé hui zé é zoshang wui su

a nghut lô é za, ¹⁵ chyitdap myit mai tengmán é dang lé tai nyi jang, Hkrisduq nghu é ulhum má hkyô hkanmó kô myhang lò râ nghut lhê. ¹⁶ Yhang dông mai, gungdu gón gi, ralhum eq ralhum htuqbang é gungsho showui showang pé lé xoq byi to bê nghut mù, gungsho showui showang haú pé gi, yhum-sing é muzó lé zui sai nyi é nghut jang, gungdu haú gi, chyitdap myit má, yhanggùng yhang kô lò myhang lò râ nghut lhê.

Byù Sik Đông Asak Dui Râ Hkyô

¹⁷ Haú mù luí, haú Yhumsing é ahko ahkang mai ngò nungmoq lé tai nau é hkyô gi, haú tungbaú pé gi, akyú a bo é lé myit mù, asak duí kô é su, nungmoq gi, hkakut kó. ¹⁸ Yhangmoq gi, sê gyó é nyan chut byuq bekô nghut é eq yhangmoq myit htan nyi kô é nghut mù, hai le a sé kô é yanmai, Garai Gasang byi é asak eq wê gang byuq bekô nghut ri. ¹⁹ Yhangmoq gi, gyuq hoq hkyô a bo byuq lo kô é yanmai, myoqnoq myit dông a sansêng é hkyô jung hkanmó lé je wó kut xoq nyi shoq ga, yhumsing gùng lé, gungsho ô nau gadaú é hkyô má ap pyám bekô nghut ri.

²⁰ Nungmoq kúm gi, Hkrisduq é hkyô lé haú dông mhoq yú kô é a nghut. ²¹ Nungmoq gi, Yesuq chyang mâ é tengmán hkyô dông, Yhang é hkyô lé wó gyô wú é eq mhoq yu wú bekô nghut lhê. ²² Haú mù, nungmoq gi, hí hpyang lhê é nungmoq é nyi yap sâmlai nghut é, ô nau gadaú luí, yhumsing gùng yhumsing mhaú pyám é dông htên byoq ló nyi é nungmoq é byù xau lé tô pyám râ matú mhoq yú bê eq rajung za, ²³ nungmoq é i-myt lé asik htaí pyám nhang keq; ²⁴ hau htoq agó, nungmoq gi, tengmán é eq sêng é dingmán hkyô eq chyoiyung hkyô má, Garai Gasang eq

dù shoq hpan to hui bê nghut é byù sik lé, yu wut to keq.

²⁵ Haù mù, nga-nhúng banshoq bang gi, gungdu ralhüm é gungsho showui showang pé chyat nghut é yanmai, nungmoq yuq hkangmó gi, mhaù é hkyô lé tô pyám luí, yhumsing é chyangnâm mã é sù lé, tengmán é dang taí ra râ nghut lhê.

²⁶ "Nungmoq nhikjum yô é hkûn, mara hkâkut kó."* nungmoq gi, bui wàng shoq nhikjum hkâyô nyi kó.

²⁷ Nat Tsadán lé le, jowò hkâbyi kó.

²⁸ Hkâu sù gi, a dum hkâu lo sháng gaq; râ nyi é bang lé, rajung jung wó gâm byi shoq, yhumsing é loq èq akyû bo é hkyô pé lé kut nyi luí, muzó zuí shikut ra râ nghut lhê.

²⁹ Nungmoq é nhut mai agè agaù é dang haí le hkâhtoq nhâng kó; wó gyô é bang akyû bò shoq, yhangmoq râ tô é má cháng luí, haù bang kô lam lò râ dang za taí keq.

³⁰ Haù hkyi yù râ buinyi é matú, dizik đông nungmoq lé tap to byí é Garai Gasâng é Chyoiyúng Woi-nyí lé hkâlhoq yón kó. ³¹ Haù myit tot é, nhikjum yô é, nhik-yô é, byoq lhum byoq cheq é eq lumù gansang é, agè agaù é hkyô pé banshoq lé, nungmoq tô pyám keq.

³² Nungmoq gi, rayuq eq rayuq, ge é hkyô eq shogyo nhikmyin é hkyô tún shit lhum luí, Garai Gasang gi, Hkrisduq má, nungmoq lé mara hkyut byí é su, nungmoq yhangchang le mara hkyut byí lhùm nyi keq.

5

¹ Haù mù, nungmoq gi, chyitdap dik é zoshâng wui nghut é yanmai, Garai Gasang lé alik yu é bang kut keq. ² Hkrisduq gi, Yhânggùng lé namngón jung hkungga eq shigu hkungga đông, nga-nhúng é matú Garai Gasâng chyáng Yhânggùng

yhang ap byí pyám shoq, nga-nhúng lé chyitdap é su, nungmoq le chyitdap myit èq asak dui nyi keq.

³ Hau htoq agó, ashop é đông gungsho zùm yap é hkyô, a sansêng é hkyô hkangmó eq myoqnoq é hkyô pé lé, nungmoq taí lhang hkâtaí kó; hkâsu mù gà le, nungmoq gi, Garai Gasâng é chyoiyúng byu pé nghut lhê. ⁴ Haù eq rajung za, a taí gíng é, ahoq ahí dang, dangsôm eq hkunchaq đông gyá é dang pé lé a taí é za, jeju hkya-on dang za taí nyi keq. ⁵ Hkâsu mù gà le, ashop é đông gungsho zùm yap é hkyô kut shut sù, a sansêng é sù eq hparà noq é sù nghut é myoqnoq sù ó yuq nghut kôlháng, Hkrisduq eq Garai Gasâng é mingdán má muizè a wó é hkyô lé, nungmoq sè nyi keq. ⁶ Ó yuq nghut kôle, dangsôm* đông mai nungmoq lé a wó mhaù kó sháng gaq; hkâsu mù gà le, haù hkyô pé é yanmai, Garai Gasâng é nhikmo-yo hkyô gi, haù jìno a gyo bâng é ahtoq má jé râ nghut lhê. ⁷ Haù mù luí, haù bâng chyáng hkâbo wang lòm kó.

⁸ Hkâsu mù gà le, nungmoq gi, hí hpyang mauchut tuq dut é bang nghut lhê; nghut kôlháng, ahkuí gi, haù Yhumsing má maubó pé nghut bekô nghut ri. ⁹ Haù Yhumsing ô nau é hkyô haí nghut é lé ho htoq yù mù, maubó é yhangzô pé đông asak dui keq. ¹⁰ Hkâsu mù gà le, haù maubó é ashi gi, ge é hkyô banshoq, dingmán é hkyô eq tengmán hkyô chyat nghut ri. ¹¹ Haù ashi a zuí é mauchut tuq muzó má a bo wang lom é za, yhangmoq é mara lé tún shit keq. ¹² Hkâsu mù gà le, haù jìno a gyo bang haq zaú kut é hkyô lé gi, taí htoq le lhang hoq hpo nghut ri. ¹³ Nghut kôlháng, junghkang jungmó lé, haù maubó èq tún shit jáng gi, wó byu-myang é chyat dut râ nghut lhê. ¹⁴ Hkâsu mù

* **4:26** Hkya-on 4:4 * **5:6** Dangsôm gà é gi, Garai Gasâng é nhikmo-yo hkyô a jé rà ga taí é dang nghut lhê.

gâ le, junghkang jungmó lé byu-
myàng nhang é gi, maubó nghut ri.
Hau é yanmai,

"Yhup ngón nyí sù ê, toq aq, haù
shí é mai dui toq aq hkoi;
haù jáng, Hkrisduq gi, nang
lé duqbo byi rá nghut lhê."[†]
ga luí tai tô é nghut lhê.

¹⁵ Haù mù luí, nungmoq hkâsu
kut asak dui é hkyô má gyaí sidiq
nyí keq; hpaqchyí a bò bang su
a nghut é za, hpaqchyí bò bang
su kut nyí keq. ¹⁶ Buinyí ahkýing
shí pé gi, agè ashop é yanmai, wó
é ahko ahkáng banshoq lé ge dik
é đông chung jai keq. ¹⁷ Hau é
yanmai, byù ngok pé a dut é za,
haù Yhumsing ô nau é hkyô gi, haí
nghut é lé, sê gyô yu nyí keq. ¹⁸ Haù
achaq achyut é yubak hkyô lhoq
htoq é í lé hkâshuq wut kó; Woi-
nyí lé kúm bying nhang nyí keq.
¹⁹ Nungmoq gi, hkya-on kungtôn
dang đông le, hkya-on mahkôn
dang đông le, woi-nyí eq sêng é
mahkôn đông le, rayuq eq rayuq
dáng nyo lhum luí, nungmoq é i-
myit unghkaú mai, haù Yhumsing
lé mahkôn hkôn mù, lhoq ngón
nyí keq. ²⁰ Nga-nhùng é Yhumsing
Yesuq Hkrisduq é mying lé lang
luí, jung hkanmó é matú, haù Íwa
Garai Gasang lé, hkâ-nhám le jeju
hkya-ôn nyí keq.

²¹ Hkrisduq lé hkungga hpautap
é myit èq, rayuq eq rayuq hpautap
lhùm nyí keq.

Myi Eq Làng

²² Ikun myhí pé ê, haù Yhumsing
uphkan é đông châng é su, nung-
moq é ikun hpô pé uphkan é đông
châng nyí keq. ²³ Hkâsu mù gâ le,
Hkrisduq gi, haù noqkuq hpúng é
ulhum nghut é su, haù ikun hpó
gi, ikun myhí é ulhum nghut nyí
ri; Hkrisduq gi, haù Yhâng gungdu
nghut é noqkuq hpúng lé hkyi yù

Sù nghut ri. ²⁴ Haù noqkuq hpúng
gi, Hkrisduq uphkan é đông châng
é su, ikun myhí pé le, hkyô hkat
hkanmó má, yhangmoq é ikun
hpô pé uphkan é đông châng nyí rá
lhê.

²⁵ Ikun hpô pé ê, Hkrisduq gi,
haù noqkuq hpúng lé chyitdap luí,
hau é matú Yhânggùng lé Yhang ap
pyâm é su, nungmoq é ikun myhí
pé lé chyitdap nyí keq. ²⁶ Yhang
haù su kut é gi, haù noqkuq hpúng
lé, mungdang đông wuì má chí
pyám luí, lhoq sân-yúng yù rá eq,
²⁷ haù noqkuq hpúng gi, agè agau é
eq a-ká akông é hkyô haí le a bo é
za, mara hùn rá hkyô a bo é eq chy-
oiyúng é, hpungwup shingkan bo
é noqkuq hpúng đông, Yhânggùng lé
wó ap byi rá matú nghut lhê. ²⁸ Haù
eq rajung za, ikun hpô pé gi, yhang-
moq é ikun myhí pé lé, yhumsing
gungdu lé su chyitdap rá dut lhê.
Yhumsing é ikun myhí lé chyitdap
é sù gi, yhumsing gùng lé le, chy-
itdap é sù nghut bê. ²⁹ Ó yuq le,
yhumsing gùng lé a chyitdap a kut é
za, Hkrisduq gi, haù noqkuq hpúng
lé kut byí nyí é su, yhumsing gùng
lé byí tso byí huq luí, rago wú zúng
nyí é nghut lhê. ³⁰ Hkâsu mù gâ
le, nga-nhúng gi, Yhâng é gungdú é
gungsho showuì showang pé chyat
nghut lhê. ³¹ Haù mù, "Hau é yan-
mai, yuqgè gi, ínu íwa eq gang luí,
yhangmyí eq zùm-yap mù, yhangn-
hik í yuq gi, gungsho ralhum za dut
kó rá nghut lhê."[✱] gâ tô ri. ³² Haù
hkyô gi, gyaí yhang zaú tô é hkyô
nghut ri. Nghut kôhlang, ngò gi,
haù Hkrisduq é hkyô eq noqkuq
hpúng é hkyô lé tai nyí é nghut lhê.
³³ Haù mù, nungmoq yuq hkanmó
gi, yhumsing gùng lé chyitdap é su,
yhumsing é ikun myhí lé le chyit-
dap rá dut lhê; haù ikun myhí le,
yhâng é ikun hpó lé hkungga rá dut
lhê.

[†] 5:14 Dang ngho shí gi, hí lhê é noqkuq hpúng pé tai gyó lo é dang nghut lhê. ✱ 5:31 Apùn
2:24

6

Zo Wuí Eq Mó Wui É Hkyô

¹ Zoshâng wui ê, haû Yhumsîng má, nungmoq é mó wui é jîno gyo keq; hkâsu mù gâ le, haû gi, kut gîng é hkyô nghut ri. ² "Náng é înu îwa lé hkungga aq. ³ Haû jáng, nàng, nyi ngón yuqyò mù, myidàm htoq má náng é asak chyungxe hing nyi râ nghut lhê."* gâ é dang gi, danggidiq lom é sâng-hí lhum hkunmó nghut ri.

⁴ Îwa pé ê, nungmoq é zo wui lé nhikjum a lhoq yô é za, haû Yhumsîng é mhoq kyo hkyô eq mhoqshit lhoq pun hkyô dông yhangmoq lé baú kô nyi keq.

Jùn Pé Eq Junsing Pé É Hkyô

⁵ Jùn pé ê, nungmoq gi, Hkrisduq é jîno gyô é su, gyuq hkunggâ é eq lhumzuí é myit mai, nungmoq é myidàm htoq má é junsing pé é jîno gyo keq. ⁶ Nungmoq gi, yhangmoq é hí má za, myoqdong ho é dông kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myt unghkaú mai châng kut nyi keq. ⁷ Byù lé za dojaú é dông a nghut é za, haû Yhumsîng lé dojaú nyi é dông le, shirông myit èq dojaú nyi keq. ⁸ Hkâsu mù gâ le, jùn nghut nghut, luthkyô wó sù nghut nghut, ge é hkyô kut nyi é nghut jáng, haû Yhumsîng gi, yuq hkangmó lé shigyaú râ nghut é lé, nungmoq sê nyi lhê.

⁹ Junsîng pé ê, nungmoq le, nungmoq é jùn pé lé haû eq rajung za kut byi nyi keq. Yhangmoq lé hkâkyuq zo kó; nungmoq sê é eq rajung za, yhangmoq eq nungmoq é Yhumsîng hpó gi, mauhkûng htoq má nyi é nghut luí, Yhang gi, myoqdong hkyin é hkyô a bo é sù nghut lhê.

Garai Gasâng É Gyè Hking

* 6:3 Htoq Ló 20:12

¹⁰ Ló htâng má, taí nau é hkyô gi, haû Yhumsîng eq Yhâng é hpungwup a-tsam mó má wum-o bo nyi keq. ¹¹ Haû nat Tsadán wá dâ é hpaqchyí pé lé, nungmoq wó he-ngik pyám kó sháng gaq, haû Garai Gasâng é gyè hking banshoq lé wut to keq. ¹² Hkâsu mù gâ le, nga-nhúng gi, gungsho eq sui lé htuq htíng é bang a nghut é za, haû uphkâng bang, ahkáng ayá wó bang, mauchut tuq dut é mingkan shi é a-tsam pé eq mauhkûng htoq tsáng myhâng má é agè ashop é byò eq sêng é wum-o pé lé, htuq htíng é bang ru nghut lhê. ¹³ Haû mù luí, Garai Gasâng é gyè hking banshoq lé wut to keq; haû hkun sheq, nungmoq gi, agè ashop hkyô jé é buinyi má, yhumsîng jowò má wó yap gîng to mù, hkyô hkat hkangmó lé ban kut jáng, wó yap gîng tîng nyi kó râ nghut lhê. ¹⁴ Haû mù, nungmoq é hpyidum má tengmán hkyô hpyi-hit hit mù, dingmán hkyô wànggò-long lé gò luí, ¹⁵ nungmoq é hkyi má gi, haû simsaq hkyô byi é gabú danglù hkô râ rì rì kut to mù, gîng gîng yap nyi keq. ¹⁶ Hau htoq agó, haû agè ashop su é myiduq é myoshi lhunglhang lé wó sat ung pyám râ matú, lumjîng hkyô nghu é golong lé chung to keq. ¹⁷ Hkyi yù hkyô shamtoq muq lé tsung to luí, Garai Gasâng é mungdang nghut é, haû Woi-nyí é shâm lé wun chûng keq. ¹⁸ Ahkyîng hkangmó má, kyûdung dang eq dúng tóngbán é dang ajung jûng èq, haû Woi-nyí má kyûdung nyi luí, machya nyi uchyang, sânyûng bang banshoq é matú, hkânhâm le, xoq xoq kyûdung byi nyi keq.

¹⁹ Haû gabú danglù é yanmai, shamtoq-tui hut huí é lagyo rayuq ngò nghut nyi kôlhang, haû gabú danglù nghut é zaú tô é hkyô lé, a gyuq a wàm wó taí kyo luí, ²⁰ ngò taí râ dut é lé, a gyuq a wàm wó

taí sân kyo shoq, ngá nhut hpóng
 hkangmó, ngò taí râ mungdang pé
 lé byi sháng gaq, ngá é matú le, kyú
 bo dung byi nyi keq.

Shi-kyám Dang

²¹ Haú Yhumsîng má, chyitdap é
 gumang eq lhumzuí é dui-nhâng
 zoshâng nghut sú, Tuhkiku gi,
 nungmoq lé jung hkangmó taí kyo
 râ nghut luí, ngò hkâsu nghut nyi
 é hkyô eq haí kut nyi é hkyô lé,
 nungmoq wó sé kó râ nghut lhê.

²² Ngamoq hkâsu nghut nyi é hkyô
 lé, nungmoq wó sé râ eq, yhang,
 nungmoq lé myit wum wó byi râ
 matú za myit myoqbyù luí, yhang
 lé, ngò, nungmoq chyáng nhang kat
 é nghut lhê.

²³ Îwa Garai Gasang eq Yhumsîng
 Yesuq Hkrisduq chyáng mâ é
 lumjîng hkyô má bo é chyitdap
 myit eq nguîngón hkyô gi, haú gu-
 mang wui chyáng ru joq nyi sháng
 gaq ô! ²⁴ A dat htûm é chyitdap myit
 mãi, nga-nhûng é Yhumsîng Yesuq
 Hkrisduq lé chyitdap é lhunglhâng
 bang chyáng, Garaí jeju gi, ru joq
 nyi sháng gaq ô!

HPILIPÍ Pê Chyáng Hun Kat é Laiká (Philippians)

¹ Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sân-yúng bang lhunglhang eq, hpúng-up, hpungte pé lé, dang kyô kat lhê.

² Nga-nhùng é Íwa Garai Gasang eq Yhumsing Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyi sháng gaq ô.

Jeju Hkya-ôn É Hkyô

³ Ngò gi, nungmoq lé myit bûn kat hkangmó, ngá é Garai Gasang lé jeju hkya-ôn nyi lhê. ⁴ Ngò gi, kyûdung hkangmó, hkâ-nhám le nungmoq banshoq bâng é matú gabú myit eq dung byi nyi lhê. ⁵ Hkâsu mù gâ le, nungmoq gi, sânghî nyi mai ahkuí jé shoq, gabú danglù má ngò eq chôm zùm yap nyi é yanmai nghut lhê. ⁶ Haû nungmoq má ge é muzó kut hi é sù Garai Gasang gi, Yesuq Hkrisduq é buinyi jé shoq muzó haû lé lhoq pán rá nghut lhê nghû, ngò hkyak myit lum tô lhê.

⁷ Nungmoq banshoq bang gi, ngá é i-myit má bo to bê bang nghut é yanmai, nungmoq banshoq bang eq séng luí, ngò shí dông myit nyi é gi, gíng lhê; hkâsu mù gâ le, ngò kyum hut huí tô é u lé le, haû gabú danglù hkyô lé taí húng luí, lhoq gíng é u lé le, nungmoq gi, ngò eq rahá Garai Gasang jeju chôm hkâm yu é bang nghut lhê. ⁸ Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyit nyi é hkyô lé, Garai Gasang gi, ngá é saksé nghut lhê.

⁹ Hau htoq agó, nungmoq gi, je ge é hkyô lé dat gam hkoq mù, Hkrisduq é buinyi má sansêng luí

mara a bo é za, ¹⁰ Garai Gasang é hpungwup shingkanq eq hkyá-on kungtôn hkyô é matú, Yesuq Hkrisduq é yanmai lo é dingmán hkyô é ashí wó byíng nyi sháng gaq nghû le; ¹¹ nungmoq é chyitdap myit gi, tengmán é hpaqchyí eq wó sê é nyan banshoq má je riyhang kô jat lò sháng gaq nghû le, ngò kyûdung nyi lhê.

Dui Nyi Le Gi, Hkrisduq É Matú

¹² Gumang wuì ê, ahkuí ngò nungmoq lé sé nhâng nau é hkyô gi, ngò má haí dut lai lò bê hkyô pé gi, gè gè yhang gabú danglù ríng jat lò rá matú dut lò bê nghut ri. ¹³ Hau é yanmai, haû hkohkâm-wàng zúng é lhunglhang bang eq gotú banshoq bâng é hí má, Hkrisduq é yanmai ngò kyum hut huí é hkyô, de de dut htoq bê nghut ri. ¹⁴ Hau htoq agó, ngò htóng lúng é yanmai, haû Yhumsing Yesuq má gumang wuì nghut é myo mi-myô gi, myit wum wó yú kômù, Garai Gasang é mungdang lé, je riyhang a gyuq a kyum wám hko kyo bekô nghut ri.

¹⁵ Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akô. Nghut kôlhang, byù ra-am gi, ge é myit mai hko kyô bum akô nghut ri. ¹⁶ Ge é myit mai hko é bang gi, gabú danglù lé húng rá matú ngo lé hkyin é hkyô lé, yhangmoq sé kômù, chyitdap myit eq hko kyô é bang nghut akô. ¹⁷ Haû góbang chyaú gi, sansêng é i-myit eq a nghut é za, ngò kyum wut é hkyô má wuîhke jamjau jat byi rá matú, myit nyi bùm kô é nghut mù luí, Hkrisduq é hkyô lé yhumsing é wuizat é dông za, hko taí nyi bum akô nghut ri. ¹⁸ Nghut kôlhang, haû gi, haí rá ri lúh? Yhumsing wuizat é dông hko é nghut nghut, tengmán é dông hko é nghut nghut, hkyô hkat hkangmó má Hkrisduq é hkyô lé

hko pyo kat é nghut mù luí, ngò gi, hau é yanmai, gabú nyi lhê.

Gè gè yhang, ru gabú nyi shirá nghut lhê. ¹⁹ Hkâsu mù gâ le, nungmoq kyûdung byî é eq Yesuq Hkrisduq é Woi-nyí garúm é yanmai, ngò má dut láí lò bê hkyô gi, ngò wó luthkyô dut râ nghut é lé ngò sê lhê.

²⁰ Ngò myit láng tô é eq myit myoqbyù tô é má, ngò gi, hoq nó hái a râ é za, hí hkun lhê su, ahkuí le, dui nyi kôlhang, shi byuq kôlhang, gyuq kyum myit a bo é hkyô lé wó yû mù luí, Hkrisduq gi, ngá gûng má hkya-on waq toq é hui râ nghut lhê. ²¹ Hkâsu mù gâ le, ngò, asak dui nyi le gi, Hkrisduq é matú, shí jáng gi, ngá e amyat nghut ri.

²² Nghut kôlhang, ngò gi, gungsho má rû dui nyi mù, ngò kut é muzó má ashí zuí lo é nghut le gi, hká lhum lé sheq hkyin yu le gè râ lúhú?

²³ Ngò gi, hkyô í hkat gyoro má hká hpyang le a hkap dut tô ri; shi ló luí Hkrisduq eq rahá nyi râ lé gi, ngò ô nau ri, hkâsu mù gâ le, haú gi, je ge é hkyô nghut ri. ²⁴ Nghut kôlhang, ngò gungsho má dui nyi le gi, nungmoq é matú akyû je bò râ nghut lhê. ²⁵ Haú mù, ngò gi, shí hkyô lé hkyak myit lum to luí, lumjîng hkyô má nungmoq kô jat lo é eq gabú nyi râ matú, nyi gyó luí, nungmoq lhunglhang bang eq nyi nyi râ hkyô lé, ngò sê lhê. ²⁶ Haú mù luí, ngò nungmoq chyáng dum jé lé é hkûn, ngá é yanmai, Hkrisduq Yesuq má nungmoq é gabú hkyô gi, je riyhang jat lò râ nghut lhê.

²⁷ Haí wà dut kôlhang, nungmoq gi, Hkrisduq é gabú danglù eq gîngdán é dông nyiyap keq. Haú jáng, ngò, nungmoq chyáng jé mù huí lhum é hkûn nghut nghut, we gang lhum tô é hkûn nghut nghut, nungmoq gi, woi-nyí ralhum má za yap gîng to mù, haú gabú danglù lé lumjîng hkyô má, i-myit rahkat zâ éq shikot nyi kô é hkyô lé le; ²⁸ nungmoq gi, hká hkyô má nghut

kôlhang, gyè pê èq kyuq zô é lé a gyuq lò kô é hkyô lé le, ngò sé râ nghut lhê. Haú gi, yhangmoq é matú htên byoq hui râ kumlhá dut lò bê nghut lhê; nghut kôlhang, nungmoq gi, hkyi yù hui râ nghut lhê. Haú gi, Garai Gasang kut é nghut lhê. ²⁹ Hkâsu mù gâ le, Hkrisduq má wó lumjîng râ é jeju za a nghut, Yhang é matú wuîhke jamjau hui râ jeju le, nungmoq hkam yù bekô nghut ri. ³⁰ Haú gi, hí hpyang nungmoq ngò má myang wú é eq, ahkuí nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

2

Yesuq, Myit Lhoq Nyhum É Hkyô

¹ Hkrisduq eq rading ralhum za nghut nyi é yanmai, myit wum byî é hkyô, Yhâng é chyitdap myit mai nhik tîng é hkyô, Woi-nyí eq zùm yap é hkyô, nú-nhâm é myit eq shogyo nhikmyîn é hkyô rajung jung lé, nungmoq wó yu é nghut le gi, ² nungmoq gi, haú i-myit huí é hkyô rahkat za, chyitdap myit rajung za, myit nhiklhum eq myit é hkyô má ralhum za kut nyi é dông, ngá é gabú hkyô lé, byíng jup nhâng keq. ³ Yhumsîng é wuizat é dông le, akôm gyáng pyâm é dông le, hái le a kut é za, myit lhoq nyhum nyi mù, góbang gi, nungmoq htoq má je gyaú lhê nghû myit yu nyi keq. ⁴ Nungmoq yuq hkangmó gi, yhumsîng eq sêng é lé za a nghut, góbang eq sêng é lé le, myit byi râ lhê.

⁵ Hkrisduq Yesuq má bo é myit yhang, nungmoq chyáng bò râ dut lhê.

⁶ Yhang gi, Garai Gasang su roq za nghut nyi kôlhang, Garai Gasang eq rawuí za nghut é hkyô lé lú zîng nyi râ matú a myit é za,

- 7 Yhânggùng lé lhoq gôm pyám luí, dui-nhâng zôshang é gunghkýang lé yu chùng mù, xângzo byù gùng roq lé dut bê nghut ri.
- 8 Xângzo byù rayuq dông nghut nyi é hkûn, Yhânggùng lé Yhang lhoq nyhum pyám luí, haù tapzîng htoq má lháng tap sat pyâm é hui shoq jîno gyô ri.
- 9 Haù mù luí, Garai Gasang gi, Yesuq é myîng lé mauhkûng htoq mâ é hkyihput, myidâm htoq mâ é hkyihput eq moming mâ é hkyihput hkangmó htuq paí luí,
- 10 haù Íwa Garai Gasâng é hpungwup shingkâng é matú, Yesuq Hkrisduq gi, Yhumsîng nghut lhê nghû, nhut shô hkangmó yín yû sháng gaq ga,
- 11 myhang htâng é jowò má Yhang lé lhoq toq tô é eq, myîng lhunglhâng é htoq má gyaú é myîng haù, Yhang lé byí to bê nghut ri.

Kyí Pé Su Duqbó Nyí Râ Hkyô

- 12 Haù mù luí, ngò chyitdap é luzúm wuî ê, nungmoq gi, hkâ-nhám le jîno gyô nyi é eq rajung za, ngò, nungmoq eq rahá nyi é u lé su za a nghut, ngò eq wê gâng tô é hkûn le, nungmoq hkyi yù hui bê hkyô lé, gyai gyuq hkunggâ é myit eq je riyhang lhoq htoq nyí keq.
- 13 Hkâsu mù gâ le, Garai Gasang gi, Yhang ô nau é hkyô lé, kut nau rá myit eq wó kut rá hkyô lé nungmoq má lhoq htoq byí nyi é sù nghut lhê.
- 14 Haù kut kôlháng, táí put lhûm é dông, haù a nghut jáng, dang jet jet lhûm é dông hkâkut kó. 15 Haù jáng sheq, myit goí é, agè ashop é pyat hkaù má, nungmoq gi, mara a bo é, sân-yúng é, shut hkyô a

bo é, Garai Gasâng é yhangzô pé dut kó rá nghut lhê. 16 Hau htoq agó, nungmoq gi, asak mungdang lé chung htoq uchyang, mauhkûng mâ é kyí pé su, yhangmoq chyáng wó duqbó nyí kó rá nghut lhê. Hau hkûn, ngò gi, ajè a dín pyâm é, a nghut jáng, muzó lé akôm a zui pyâm é yanmai, Hkrisduq é buinyi má gumrông jowò wó berâ nghut lhê. 17 Nghut kôlháng, ngò gi, shuq jung hkungga* ralhum su, nungmoq é lumjîng myit mai nhongjaú byí é shigu hkungga ahtoq má hut gyûn pyâm é hui le lháng, gabú luí, nungmoq banshoq bang eq rahá chôm gabú nyi lhê. 18 Haù eq rajung za, nungmoq le gabú luí, ngò eq rahá chôm gabú nyi rá dut lhê.

Timohti Eq Epahprodi Nhik Lé Nhang Kat Râ Gâ É Hkyô

19 Ngò gi, nungmoq chyáng Timohti lé hân za wó nhang kat rá lé, haù Yhumsîng Yesuq má myit myoqbyu nyi lhê; haù hkûn sheq, nungmoq eq sêng é ludang lé ngò wó sé jáng, ngò myit ngón rá nghut lhê. 20 Nungmoq é hkyô lé, yhang su hkyak za ge myit chiq byí é byù gotú rayuq le ngò a wó. 21 Hkâsu mù gâ le, yuq du jup gi, Yesuq Hkrisduq eq sêng é hkyô lé a nghut é za, ó le ó eq sêng é hkyô lé za ho nyi bum akô nghut ri. 22 Yhang kúm gi, zo rayuq mai íwa lé htuqbâng é su, haù gabú danglù hkyô má ngò eq rahá dojaú é yanmai, yhâng lumluq é hkyô tûn shit é lé, nungmoq sé nyi lhê. 23 Haù mù luí, ngò gi, ngò má hkâsu dut rá lé sé é hkûn yhang, yhang lé nhang kat rá matú ngò myit myoqbyu nyi lhê. 24 Hau htoq agó, hkâ-myháng a myáng má, ngò yhang le nungmoq chyáng wó jé nhâng rá nghut lhê nghû, haù Yhumsîng má hkyak lum nyi lhê.

* 2:17 Shuq jung hkungga gâ é gi, tsibiyiq wing ragóm lé myi htoq má hut pyâm é dông Garai lé gyuq hkunggâ é hkyô lé tûn shit é nghut lhê. Bun zo shí má shí hkâm é hkyô lé tai nau é nghut lhê.

²⁵ Nghut kôlhang, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò rà é hkyô má wú gon byi rà matú nungmoq nhang kat é, nungmoq é gunglik le nghut é sù, Epahprodi lé nungmoq chyáng dum nhang taû kat byi rà lhê nghû, ngò myit hpyit to bê nghut lhê. ²⁶ Hkâsu mù gâ le, yhang gi, nungmoq lhunglhang bang lé myàng nau nyi é za a nghut, yhang no é hkyô lé nungmoq wó gyo bekô nghut é yanmai, gyai yhang myit myo myit chiq nyi ri. ²⁷ Gè gè yhang, yhang gi, aluq shoî shî shoq no pyâm é nghut lhê. Nghut kôlhang, Garai Gasang gi, yhang lé shogyo nhikmyîn yu ri; yhang lé baú a nghut, ngò yón htoq yón a dut nyi rà matú, ngo lé le shogyo nhikmyîn yu ri. ²⁸ Haû mù luí, yhang lé nungmoq lhom dum myàng jáng, nungmoq myang gabú rà matú le, ngò yón é hkyô yom ló byuq rà matú le, yhang lé ngò hân hân nhang kat byi nau ri. ²⁹ Nungmoq gi, gyai yhang gabú é myit eq, haû Yhumsîng má yhang lé lhom hkûlum yù mù, yhang su dut é bang lé hkungga keq. ³⁰ Hkâsu mù gâ le, yhang gi, ngo lé nungmoq a wó garúm é hkyô lé garúm rà matú, yhang é asak lé lhang a ha loshoq kut mù, haû Hkrisduq é muzó é yanmai, aluq shoî shoî shi é hui zô ri.

3

Gungsho Má Lumhkaû Râ Hkyô A Joq

¹ Hau htoq agó, ngá é gumang wui ê, haû Yhumsîng má gabú nyi keq! Rajung zâ é hkyô lé, nungmoq é matú dum puq ká byi rà gi, ngò má wui é hkyô haî a joq, nungmoq é matú akyú dut rà matú sheq ru nghut lhê.

* **3:2** Bun zo shi lhum gi, ahpyo-kuq hpyit hkyô má noqzuq nyi é bang lé tai nau é nghut lhê.

† **3:3** Ahpyo-kuq hpyit hkam yu é bang akying gâ é gi, Garai Gasâng é yhangzo hkyak nghut bê bang lé gâ lhê.

² Haû, hkuí pé lé le; agè ashop é muzó jizó kut é bang lé le; gungsho yâm é bang lé le; sidiq nyi keq.* ³ Hkâsu mù gâ le, Garai Gasâng é Woi-nyí eq noqkuq é bang, Hkrisduq Yesuq má gabú gumrong nyi é bang, gungsho má a lumhkaû é bang, nga-nhúng gi, ahpyo-kuq hpyit hkam yu é bang akying† nghut lhê. ⁴ Ngò kúm gi, gungsho má lumhkaû rà hkyô wó ang sù nghut lhê.

Góbang rayuq yuq, haû gungsho má lumhkaû rà hkyô wó âng lhê ga myit é nghut le gi, ngò gi, je riyhang wó sù nghut lhê. ⁵ Ngò gi, hkû lé é htàng shit nyi nghû rà nyi má ahpyo-kuq hpyit bê sù; Israelaq amyú mâ é, Ben-yamyin é awut ashín nghut sù, Hebre byù mâ é Hebre rayuq nghut lhê; jep é tarâ dông ga jang, ngò gi, Hparishe rayuq nghut lhê; ⁶ shirong é hkyô eq séng luí ga jang, ngò gi, haû noqkuq hpúng lé zing-ri wú bê nghut lhê; jep é tarâ mâ é dingmán hkyô eq séng luí ga jang, ngò gi, shut é hkyô a bo wú sù nghut lhê.

⁷ Nghut kôlhang, ngá é amyat nghu é pé lhunglhang gi, ahkuí, Hkrisduq é yanmai sùm byuq é chyat nghut bê nghû myit yù bê nghut lhê. ⁸ Hau htoq agó, ngò gi, ngá é Yhumsîng Hkrisduq Yesuq lé wó sê é ko dik é jeju lé sôn kat jáng, jung hkanmó lé buzaq dông myit yù bê. Hkâsu mù gâ le, lhunglhang lé ngò tô pyâm é gi, Yhang é yanmai nghut lhê. ⁹ Ngò gi, Hkrisduq lé wó yú rà eq, Yhang eq rahá wó nghut nyi rà matú, haû jung hkanmó lé buzaq nghû myit yu pyám bê. Garai Gasâng chyáng mai lo é dingmán hkyô lé ngò jep é tarâ dông wó ho yu é a nghut, Hkrisduq lé lumjîng é yanmai za wó yu é ru nghut lhê; haû gi, lumjîng myit mai

wó é nghut lhê. ¹⁰ Ngò gi, Hkrisduq lé le, Yhang dui toq hkyo é hpungwup a-tsam lé le, Yhang hpuzò é hkyô má wó zùm yap râ lé le, Yhang shí hkâm é hkyô lé wó cháng râ lé le, sé nau ri. ¹¹ Haû jáng gi, ngò le, shi byuq bê mai dum dui toq é hkyô lé wó myoqbyù râ nghut lhê.

Myit Myoqbyu Tô É Jowò Shut Din Nyi Râ Hkyô

¹² Ngò gi, haû pé banshoq lé wó gû bê le a nghû naù, ngò gumjup gù bê le a nghû naù. Nghut kôhang, Hkrisduq Yesuq gi, ngo lé lhom yù bê eq rajung za, ngò gi, haû lé wó lhom yù sháng gaq nghû, châng hkat nyi lhê. ¹³ Gumang wui ê, ngò yhang ngò gi, haû lé wó hap yù bê nghû a myit; nghut kôhang, ngò kut é muzó ralhum gi, nunghtáng mâ é lé tô-myhî pyám mù, myoq hí mâ é lé wó yù shoq nghû shikut luí, ¹⁴ Hkrisduq Yesuq má Garai Gasâng eq ngo lé ahtoq shut ji yu é chyunghuq lé wó yù râ matú, myoqbyu tô é jowò shut châng hkat din nyi lhê.

¹⁵ Gumang bê bang nga-nhúng lhungháng gi, haû sù é myit bò râ lhê. Rajung jung má nungmoq myit é hkyô shai nyi kô é nghut le gi, haû lé le, Garai Gasang gi, nungmoq lé san za tân shit râ nghut lhê. ¹⁶ Hká đông nghut kôhang, nga-nhúng gi, ahkuí jé shoq châng nyi bê hkyô eq rajung za châng kut nyi sháng.

¹⁷ Gumang wui ê, nungmoq gi, ngò kut é đông chôm kut nyi keq, ngamoq mai nungmoq lé kut shit é alik eq rajung za châng é bang lé wú yù keq. ¹⁸ Hkâsu mù gâ le, hí hkún ngò, nungmoq lé anum num taí kyô wú luí, ahkuí lhang, ngaù byi eq dum taí kyô é eq rajung za, Hkrisduq é tapzìng lé gyè kut é bang myo myo nyi bum akò nghut ri. ¹⁹ Yhangmoq é jìhtùm gi, htên byoq hkyô nghut ri; yhangmoq

é garai gi, yhangmoq é wamdaù nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myt gi, mingkan zè htoq má za nghut ri. ²⁰ Nghut kôhang, nga-nhúng é yhummau gi, mauhkúng mingdán má nghut lhê. Nga-nhúng gi, haû mâ é Yhumsing Yesuq Hkrisduq gâ é hkyi yù Sù lé, myoqbyu láng nyi é bang nghut lhê. ²¹ Yhang gi, jung hkangmó lé, Yhang uphkan é a-ô má wó kut tô é Yhâng é a-tsâm eq nga-nhúng é htên byoq sê é gungdu lé htaí lhik pyám byi luí, Yhâng é hpungwup bo é gungdu su dut nhâng râ nghut lhê.

4

¹ Haû mù luí, chyitdap é luzúm wui le nghut mù, ngò chyitdap bìn nghâm nyi é, ngá é gabú jowò eq janmaù nghut nyi é, ngá é gumang wui ê, haû gi, Yhumsing má nungmoq hkâsu kut yap gíng nyi râ hkyô nghut lhê.

Lhoq Pun Lhoq Kyíng É Hkyô

² Ngò gi, Uodia eq Suntuki nhik lé, haû Yhumsing má rayuq eq rayuq myit huí lhum nyi râ matú, gyai yhang pying kat lhê. ³ Ngá é mù wùn luzúm kyíng ê, ngò gi, myiwe shí nhik lé garúm yù laq nghû, nang lé le dúng tóngbán kat lhê; yhangnhik gi, Klemen eq le, asak jihpán laiká buk má myìng bo é, ngá é mù wùn luzúm wui góbang eq le, haû gabú danglù hkyô má ngò eq rahá gyai shikut wú bê sù nhik nghut lhê.

⁴ Haû Yhumsing má hkâ-nhám le gabú nyi keq! Ngò dum taí lhê, gabú nyi keq! ⁵ Nungmoq nú-nhâm é hkyô, byù banshoq bang lé sé nhâng keq. Haû Yhumsing gi, chyáng bê nghut ri. ⁶ Haí eq séng luí le, myit hkâ-myo hkâchiq kó; hkyô hkangmó má jeju hkyáon uchyang, kyúđung é eq dúng tóngbán é đông, nungmoq dúng é

hkyô pé lé, Garai Gasâng chyáng shit kyô nyi keq. ⁷ Haú hkûn, sé gyô é nyan banshoq htoq má gyaú é, Garai Gasâng é nguingón hkyô gi, nungmoq é myit nhiklhum eq nungmoq myit é hkyô lé, Hkrisduq Yesuq má upzúng byi nyi rá nghut lhê.

⁸ Jihtûm má, gumang wui ê, tengmán é, hpautap gíng é, dingmán é, sansêng é, wó chyitdap é, hkungga gíng é, haí má nghut kôlháng, aróng wó dik é hkyô rajung jung, a nghut jáng, hkya-on gíng é hkyô rajung jung bo é nghut le gi, haú sù é hkyô pé lé myit nyi keq. ⁹ Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, haí lé le cháng kut nyi keq. Haú hkûn, nguingón hkyô byi é Garai Gasang gi, nungmoq eq rahá nyi nyi rá nghut lhê.

Jeju Bûn É Hkyô

¹⁰ Ahkuí kúm gi, ngá é hkyô lé nungmoq dum myit chiq byi kô é yanmai, ngò gi, haú Yhumsíng má gyai yhang gabú nyi lhê; gè gè yhang, nungmoq myit chiq byi nyi kôlháng, haú lé tûn shit rá ahkáng a wó kó nghut ri. ¹¹ Ngò ísu nghú taí nyi é gi, ngò má rá é hkyô bo tô é yanmai taí é a nghut, hkâsu mù gâ le, ngò gi, ngò hui mihui má, nhik dik nyi rá matú mhoq yù bê nghut lhê. ¹² Ra châ tô u lé, hkâsu kut rá ngò sê lhê; agùn agó wó u lé, hkâsu kut rá ngò sê lhê; hkyô hkangmó eq dut tô é ahkyo lhum jup má, wam gyi kôlháng, zòmut kôlháng, agùn agó wó tô nyi kôlháng, ra châ to kôlháng, myit dik nyi rá hpaqchyí lé ngò wó mhoq yù bê nghut lhê. ¹³ Ngò gi, ngo lé wum-o a-tsam byi sù Hkrisduq é yanmai, hkyô hkat hkangmó wó kut lhê.

¹⁴ Nghut kôlháng, ngò wuínke jamjau huí nyi é hkûn, nungmoq garúm yù kô é gi, ge é hkyô kut bekô nghut ri. ¹⁵ Hau htoq agó,

Hpilipi byu pé nungmoq sê é eq rajung za, haú gabú danglù lé, ngò hkô mù nungmoq wó gyô yu hi é buinyi pé má, ngò Makedoni mau mai htoq ló rá hkûn, haú byi é hkyô eq lhom yu é hkyô má, nungmoq mai lai luí, noqkuq hpúng gotû ralhum lháng, ngo lé garúm kat é hkyô a bo é nghut lhê. ¹⁶ Ngò Htesaloni wà mó má nyi tô é hkûn lé lháng, nungmoq gi, ngò ra châ é hkyô lé adàm dàm hûn byi bekô nghut ri. ¹⁷ Ngò gi, chyunghuq chyunghtâng lé ho nyi é a nghut, nungmoq mai ashi je myo zuí jat rá matú lé za sheq ho nyi é nghut lhê. ¹⁸ Ngò gi, haí le gúm shoq myang yu é htoq agó, chyân shoq lháng nghut bê. Ahkuí, haú nungmoq hun kat é chyunghuq lé, Epahprodi chyáng mai ngò lhom myang yù luí, ngò má agùn agó nghut nyi bê. Haú pé gi, namngón jung hkungga su, Garai Gasang lé gabú nhang é, hap yù gíng é hkungga ralhum nghut ri. ¹⁹ Ngá é Garai Gasang gi, Yhang agùn agó wó sùt nyi é eq rajung za, nungmoq rá é hkyô banshoq lé, Hkrisduq Yesuq má lhoq gúm lhoq jup byi rá nghut lhê.

²⁰ Hpungwup shingkang gi, nganhung é Íwa Garai Gasâng chyáng pyat dedu ahtum abyuq ru joq nyi sháng gaq ô! Amen.

Shi-kyám Dang

²¹ Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyi é gumang wui gi, nungmoq lé shi-kyâm kat akô nghut ri. ²² Sân-yúng bang banshoq gi, nungmoq lé shi-kyâm kat akô; Kehtaq é yhúm mâ é sân-yúng bang gi, je riyhang shi-kyâm kat akô nghut ri.

²³ Yhumsíng Yesuq Hkrisduq é jeju gi, nungmoq banshoq bang eq rahá ru joq nyi sháng gaq ô!

KOLOSE Pê Chyáng Hun Kat é Laiká (Colossians)

¹ Garai Gasâng eq hkyin yù mù, Hkrisduq Yesuq é lagyo dut sù, ngò Poluq eq nga-nhùng é gumang Tim-ohti gi, ² Kolose wà mó má nyi bang nghut é, Hkrisduq má chyoiyúng bang nghut é, lhumzuí é gumang wui chyáng dang kyô kat lhê. Nga-nhùng é Íwa Garai Gasâng chyáng mà é jeju eq nguingón hkyô gi, nungmoq chyáng ru joq nyi sháng gaq.

Jeju Hkya-ôn É Eq Kyûdung É Dang

³ Nungmoq gi, nungmoq é matú kyûdung byi é hkûn, nga-nhùng é Yhumsing Yesuq Hkrisduq é Íwa nghut é Garai Gasang lé ayang jeju hkya-ôn lhê. ⁴ Hai mù gà le, Hkrisduq Yesuq má nungmoq lumjing hkyô eq Yhâng é sân-yúng bang banshoq lé nungmoq chyitdap é hkyô lé, ngamoq wó gyô é yanmai nghut lhê. ⁵ Lumjing myit eq chyitdap myit haú gi, nungmoq é matú mauhkung htoq má hkong to byi é myit myoqbyù hkyô* mai lo é nghut lhê. Myit myoqbyù hkyô haú lé gi, nungmoq chyáng jé to bê gabú danglù nghut é tengmán mungdang mai, nungmoq wó gyô to gù nghut lhê. ⁶ Nungmoq gi, gabú danglù haú lé wó gyo lui, Garai Gasang jeju eq sêng é tengmán hkyô lé sê hkyang é buinyi mai, nungmoq chyáng ashí zúí é eq kô myhang nyi bê nghut é eq rajung za, gabú danglù haú gi, mingkan gón má ge é ashí zúí nyi é eq kô myhang nyi bê nghut ri. ⁷ Nungmoq gi, haú hkyô lé, ngamoq é chyitdap byinzùm Epahpra chyáng mai

mhoq yu é nghut lhê. Yhang gi, ngamoq é gunglik đông, Hkrisduq é lhumzuí é hpúng mù wùn sù nghut lhê. ⁸ Yhang gi, haú Woi-nyí eq nungmoq lé byi tô é chyitdap hkyô lé, ngamoq lé tai kyo sù le nghut ri.

⁹ Haú nghut é yanmai, ngamoq gi, nungmoq eq sêng é hkyô lé wó gyô é nyi mai, nungmoq é matú ayang kyûdung byi nyi lhê. Garai Gasang ô nau é hkyô lé sé rà hpaqchyí lé, woi-nyí eq sêng é hpaqchyí byéng-yá eq sê gyô é nyan banshoq đông mai nungmoq chyáng lhoq pying byi sháng gaq nghu, Yhâng chyáng kyûdung byi nyi lhê. ¹⁰ Haú su kut kyûdung byi é gi, haú Yhumsing ô nau é hkyô eq gingdán é đông nungmoq asak wó duí lui, hkyô hkangmó má Yhang lé wó gabú nhâng rà matú nghut lhê. Hau đông mai, nungmoq gi, ge é muzó hkangmó má ashí zúí nyi lui, Garai Gasang lé sê é hpaqchyí má kô myhang nyi kó rà nghut lhê. ¹¹ Hau htoq agó, nungmoq gi, Yhâng é hpungwup a-tsam đông mai a-tsam banshoq eq wum-o lhoq king byi é hui nyi kó rà nghut lhê. Haú mù, nungmoq gi, gyai hkam jân é hkyô eq myit hing é hkyô lé, gabú myit mai wó yù kó rà nghut lhê. ¹² Maubó é mingdán má, sân-yúng bang eq sêng é muizè lé wó bo hkam yù rà matú, nungmoq lé gingdán nhang é sù haú Íwa lé le, jeju wó hkya-on kó rà nghut lhê. ¹³ Hkâsu mù gà le, Íwa haú gi, nga-nhúng lé, mauchut eq up é hkaú mai hkyi htoq yù lui, Yhang chyitdap é Yhang Zô é mingdán má shuí hâng é Sù nghut lhê. ¹⁴ Nga-nhúng gi, haú Yhang Zo đông mai, hkyi xe yu é hui mù, yubak mara hkyut pyám byi é hui bê nghut lhê.

Jung Hkangmó É Ushuq, Hkrisduq

* 1:5 Bun zo shí má bo é myit myoqbyù hkyô gi, Yesuq lé tai é nghut lhê.

¹⁵ Hkrisduq gi, myoq èq a byu-myang é Garai Gasang é gungghyang isâm nghut lui, zomún dông hpan tô é lhunghâng htoq má gyaú é sù nghut ri. ¹⁶ Hkâsu mù gâ le, mauhkûng eq myigùng htoq má joq é azíng zê pé, myoq èq byu-myang é eq a byu-myang é pé nghut kôle, hkohkâm ayá pé, a-tsam pé, uphkâng bang, ahkáng ayá wó bang nghut kôle, lhungháng gi, Yhâng èq hpan to huí é chyat nghut lhê. Lhungháng gi, Yhâng é matú, Yhâng èq hpan to huí é chyat nghut ri. ¹⁷ Yhang gi, lhunghâng é hí má é nghut mù, lhungháng gi, Yhâng é yanmai joq gíng bum é chyat nghut lhê. ¹⁸ Yhang gi, noqkuq hpúng nghu é gungdú é ulhum nghut ri; Yhang gi, jung hkgangmó má gyaú dik é ushuq dut sháng gaq ga, sâng-hi awang nghut sù eq shi é bang má é hí dui toq é zomún dut sù nghut ri. ¹⁹ Hkâsu mù gâ le, Garai Gasang gi, Yhâng é byíng jup hkyô banshoq, Yhang Zo má joq nyi rá lé myit nguí ô nau é nghut mù, ²⁰ haú tapzíng má htoq byí é Yhang Zô é sui dông mai nguínón hkyô kut byí é èq, myigùng htoq má é azíng zê nghut nghut, mauhkûng má é azíng zê nghut nghut, lhungháng lé, Yhang Zo dông mai, Yhang eq nguínón simsaq hkyô xoq yú bê nghut ri.

²¹ Nungmoq gi, Garai Gasang eq wê gâng é bang dut wú kôluí, nungmoq é agè ashop nyi yap sâmlai é yanmai, nungmoq i-myyit má, Yhâng é gyè dut wú bekô nghut lhê. ²² Nghut kôlhang, ahkuí, Garai Gasang gi, nungmoq lé, rá é hkyô a bo é eq mara hún rá hkyô a bo é za, chyoiyúng é dông Yhâng é hí má shít rá matú, Hkrisduq é gungsho gungdu shí hkâm é dông, nungmoq eq nguínón simsaq hkyô xoq yú bê nghut ri. ²³ Haú gi, gabú danglù mai wó yu tô é myoqbyù hkyô mai a htot byuq é za, kô myhang

nyi é eq gingtíng nyi mù, nungmoq é lumjíng hkyô má xoq nyi nyi é nghut jáng sheq dut rá nghut lhê. Gabú danglù shí gi, nungmoq wó gyô wú bê nghut é htoq agó, mauhkûng ô má hpan tô é jung hkgangmó lé hko kyô nyi bê nghut lhê. Ngò, Poluq le, gabú danglù hau é dui-nhâng zoshâng dut é nghut lhê.

Noqkuq Hpúng É Matú Poluq Wùn Waq É Hkyô

²⁴ Ahkuí, ngò gi, nungmoq é matú jamjau huí é má gabú lhê; hau htoq agó, Hkrisduq é gungdu nghut é, noqkuq hpúng é matú, rá tô ashí nghut é, Yhang hpuzô é hkyô lé, ngá é gùng má ngò lhoq gumjup yu nyi lhê. ²⁵ Ngò gi, Garai Gasang é mungdang lé, nungmoq chyáng gumjup shoq hko kyo rá matú, Garai Gasang, ngo lé hun tô é wò mai, noqkuq hpúng hau é mù wùn sù dut é nghut lhê. ²⁶ Mungdang haú gi, gohkûn mai apyat pyat haq tô gyó lo é zaú tô é hkyô nghut kôlhang, ahkuí gi, haú sâ-n-yúng bang lé hpông shít bê nghut ri. ²⁷ Garai Gasang, haú su kut é gi, zaú tô é hkyô hau é agùn agó hpungwup shinggang, tûngbaù pê chyáng hkâsu nghut é hkyô, yhangmoq lé sé nhâng rá matú nghut lhê. Zaú tô é hkyô haú gi, hpungwup shinggang lé myoqbyù é hkyô nghut é, nungmoq má Hkrisduq dui nyi bê hkyô lé gâ é nghut lhê.

²⁸ Hkrisduq má gumjup é dông, byù yuq hkgangmó lé wó shuí jé sháng gaq nghú, ngamoq gi, Hkrisduq é hkyô lé taí pyô lui, yuq hkgangmó lé, hpaqchyí byéng-yá banshoq èq taí pun taí kyíng é eq mhoghshít nyi é nghut lhê. ²⁹ Ngò, haú-í yhang wó wùn waq shikut é gi, ngò má wum-o a-tsam byíng byíng mù zuí nyi Su é wum-o banshoq èq wùn waq shikut nyi é ru nghut lhê.

2

¹ Ngò gi, nungmoq é matú le, Ladoki wà mó bãng é matú le, ngò eq myoqdong hkyùm a huì wú shí é bang banshoq é matú le, hkâ-í yhang awui ahke shikut nyi é hkyô lé, nungmoq lé sé nhâng nau ri. ² Haù su awui ahke shikut é hkyô gi, yhangmoq, myit má wum-o byí é hui râ eq chyitdap myit má rading ralthum za wó dut râ matú nghut lhê. Haù hkùn, yhangmoq gi, Garai Gasâng é zau tô é hkyô nghut é, Hkrisduq lé wó sé râ matú, sê gyô é nyan lunglhang é isut byíng shoq lé wó yú kó râ nghut lhê. ³ Haù Hkrisduq má kúm gi, hpaqchyí byéng-yá eq sumsé hpaqchyí gâ é sutzè lunglhang lé tsíng tô ri. ⁴ Nungmoq lé ngò haù hkyô taí kyô é gi, ó yuq le, dang ngón dang ngui eq mhoq hpyoq é đông, nungmoq lé a wó mhaù zo râ matú nghut lhê. ⁵ Hkâsu mù gâ le, ngá gungdu nungmoq eq rahá a nyi kôlhang, ngá é myit gi, nungmoq eq rahá nghut nyi luí, nungmoq shuq shuq tap tap za nghut nyi kô é eq Hkrisduq lé lumjíng é má hkâ-í gíngtíng nyi kô é lé myàng mù, ngò gabú nyi lhê.

Hkrisduq Đông Mai Wó É Gumjup É Asak Dui Hkyô

⁶ Haù mù luí, nungmoq gi, Hkrisduq Yesuq lé Yhumsíng nghú hap yù bekô nghut é eq rajung za, Yhang má asak xoq dui nyi keq. ⁷ Yhang má apún amyit chin gíng nyi mù, kô myhang lò luí, nungmoq mhoq yù bê eq rajung za, lumjíng hkyô má wum-o lhoq kíng mù, jeju hkya-ôn é hkyô byíng zan nyi keq.

⁸ Hkrisduq chyáng mã é a nghut é za, mینگkan shí mã é uphkàng tará pé eq xângzo wui é htungli cháng luí, mhaù zô é myit són hpaqchyí eq akyù a bo é dang đông, ó yuq eq le,

nungmoq lé a wó shuí nghoq yú kó sháng gaq, sidiq nyi keq.

⁹ Hkâsu mù gâ le, Garai Gasâng é gumjup hkyô banshoq gi, Hkrisduq é gungdu hkyangmân má lúng nyi mù, ¹⁰ nungmoq gi, a-tsam bo é banshoq eq ahkáng ayá wó é banshoq é ushuq nghut é Hkrisduq eq sêng é bang nghut kômù, gumjup é bang dut bekô nghut ri. ¹¹ Yhang má, nungmoq gi, byu loq eq kut é ahpyo-kuq hpyit hkyô đông a nghut é za, ahpyo-kuq hpyit é su, Hkrisduq eq yubak gungsho mara lé hkyut sêng pyâm é hkyô lé hkam yù bekô nghut ri. ¹² Nungmoq gi, wui-myhup hkâm é hkùn Hkrisduq eq rahá myhup yhùm é hui bekô nghut mù, Yhang lé shi é mai lhoq dui toq yu é, Garai Gasâng é a-tsam lé nungmoq lumjíng kô é yanmai, Yhang eq rahá lhoq dui toq yu é hui bekô nghut ri.

¹³ Nungmoq é yubak mara pê é yanmai le, nungmoq é yubak gungsho mara lé huì sêng pyâm é a hkam yu é yanmai le, nungmoq shi tô é hkùn, Garai Gasang gi, nungmoq lé, Hkrisduq eq rahá asak dui nhâng bê nghut ri. Yhang gi, nganhung é yubak mara lunglhang lé hkyut pyám byi luí, ¹⁴ nga-nhung eq shai lhum mù, nga-nhung lé htuoq htíng é, tará pé bo é jéyáng rá jihpán lé huì sêng pyám byi bê nghut ri. Yhang gi, haù lé tapzíng htoq má dok tap pyâm é đông yu pyám byi bê nghut lhê.* ¹⁵ Haù đông mai, a-tsam bò bang eq ahkáng ayá wó bãng a-tsam lé lang hkyut hkyô pyám mù, Yhang gi, tapzíng eq yhangmoq lé ung pyâm é đông, byù pê é hí má yhangmoq lé de de kut to bê nghut ri.

¹⁶ Haù mù luí, nàng haí zo haí shuq é yanmai le, noqkuq htíng eq sêng é poí buinyi, Lhoxan Lhosik

* **2:14** Yhang gi, haù lé tapzíng htoq má dok tap pyâm é đông yu pyám byi bê nghut lhê gâ é gi, Hkrisduq tapzíng má shi hkâm byi é hkùn, nga-nhung é yubak mara banshoq lé, Garai Gasâng eq hkyut pyám byi é lé taí nau é nghut lhê.

poi, Bánno buinyi eq séng luí le, nungmoq lé, ó yuq èq le a wó jéyáng kó sháng gaq. ¹⁷ Haú pé gi, dut lò rà hkyô pé é wupzo chyat nghut lhê; haú gùng gyíng gi, Hkrisduq yhang nghut nyi ri. ¹⁸ Myit lhoq nyhum mhaú é eq maumang lagyô pé lé noqkuq é lé myit ngui é sù ó yuq èq le, nungmoq lé, chyunghuq eq a gingdán rà đông hkâkut nhâng kó. Haú su é yuq gi, yhumsíng byu-myang é lé† za taí shikut mù, yhumsing é gungsho myit mai, akôm yhang nghut é lé gyáng dang taí é sù nghut ri. ¹⁹ Yhang gi, Garai Gasang kô myhâng nhang é su, gungdu gón é gungsho showui showang pé eq shogyi pé lé htuqbang byi mù rahá lâng tsíng tô é haú ulhum nghut é Hkrisduq eq xoq é hkyô lé byoq lò nhâng bê nghut ri.

²⁰⁻²¹ Nungmoq gi, Hkrisduq eq rahá, mingkan shí mâ é tarâ pé eq shi gang bekô nghut le nhíng, haí mù, haú eq séng lhum nyi ashí kó lú? "Hkâzui, hkâchyâm, hkâzáng," gâ é tarâ ô má nyi nyi ashi kó lú? ²² Haú pé gi, waxâng zô wui é hkunmó pé eq mhoqshit hkyô pé nghut é yanmai, jai chung é hkûn, htên byuq rà chyat nghut lhê. ²³ Haú sù é tarâ pé gi, yhumsíng yhang noqkuq shikut é, myit lhoq nyhum mhaú é eq gungdu lé gunjâng é pé nghut luí, hpaqchyí byéng-yá bo é su dut kôlhang, gungshô é agè ashop yut yut ô nau hkyô lé wó hkûm zing pyám rà má, hai akyú a bò nghut ri.

3

Chyoiyúng É Đông Asak Dui Râ Hkyô

¹ Haú mù luí, nungmoq gi, Hkrisduq eq rahá lhoq dui toq é hui bekô nghut jáng, Garai Gasâng é

loqyo hkyam* má zung tô é Hkrisduq é jowò má joq é, ahtoq mâ é azíng zê pé lé myit ô nau nyi keq. ² Nungmoq gi, myidàm htoq mâ é azíng zê lé myit tuí é a nghut é za, ahtoq mâ é azíng zê lé myit tuí nyi keq. ³ Hkâsu mù gâ le, nungmoq gi, shí bekô nghut luí, ahkuí, nungmoq é asak gi, Hkrisduq eq rahá, Garai Gasang má haq tô é hui bekô nghut ri. ⁴ Nungmoq é asak nghut sù, Hkrisduq htoq shit é hkûn, nungmoq le, Yhang eq rahá, hpungwup shing kang hkaú má htoq shit kó rà nghut lhê.

⁵ Haú mù luí, nungmoq é mingkan hkyô eq séng é, ashop é đông gungsho zùm yap é hkyô, agot a-û nyi zô lhûm é hkyô, ye lhai nau é hkyô, agè ashop yut yut ô nau é hkyô eq, hparâ noq hkyô nghut é myoqnoq hkyô pé haí lé le sat pyám keq. ⁶ Haú hkyô pé é yanmai, Garai Gasâng é nhikmo-yo hkyô gi, jìno a gyo bâng é ahtoq má† jé rà za nghut lhê. ⁷ Lai lò bê hkûn, nungmoq le, haú hkyô pé đông sô wú kô é nghut lhê. ⁸ Nghut kôlhang, ahkuí, nungmoq gi, nhikjum yô é, nhikmo-yô é, agè ashop é đông nô shoq kut é, lumù gansang é eq, nungmoq é nhutwuí mai hkunchoq taí é hkyô shí pé banshoq lé, yhumsing gùng yhumsing tô pyám rà dut lhê. ⁹ Rayuq eq rayuq hkâ-mhaú lhum kó; hkâsu mù gâ le, nungmoq gi, nungmoq é byù xau eq byù xau é nyi yap hkyô lé hkyut pyám mù, ¹⁰ byù sik lé tú wut yú kô é nghut lhê; byù sik haú gi, sumsé hpaqchyí đông mai, yhang lé hpân Su é gungdu isâm má asik jat lò nhang é hui nyi ri. ¹¹ Byù sik má gi, Grik eq Yudaq byù nghu é, ahpyokuq hpyit hkâm bang eq a hkâm bang nghu é, byù bíng eq byù jum

† **2:18** Byu-myang é lé gâ é gi, yhang myit htoq é shing-rán lé gâ lhê. * **3:1** Loqyo hkyam nghú é gi, ahko ahkáng wó é jowò lé gâ é nghut lhê. † **3:6** Jìno a gyo bâng é ahtoq má, gâ é dang, chyúmding ra-am má a bò nghut lhê.

ngheu é, jùn eq jùn a nghut sù ngheu é a nyi lô é za, Hkrisduq gi, banshoq nghut mù, banshoq má nyi nyi ri.

¹² Haù mù luí, Garai Gasâng èq hkyin yù huí é bang, Yhâng èq gyai yhang chyitdap é huí é chyoyúng bang dông, shogyo myit, gè hkyô shit é myit, lhoq nyhum é myit, nú nhâm é myit eq myit hing é hkyô pé lé, yhumsing gùng yhumsing mebu su wut to keq. ¹³ Nungmoq yhangchang mara kut shut é hkyô joq é nghut jáng, hkam jan byí lhum luí, rayuq eq rayuq mara hkyut byí lhum keq. Haù Yhumsing gi, nungmoq é mara hkyut pyám byí é su, nungmoq le mara hkyut byi keq. ¹⁴ Haù ge é sâmlai banshoq wó é htoq agó, gumjup é rading ralthum za dut é hkyô má, banshoq lé rahá wó tui zing tó é chyitdap myit lé puq wut to keq.

¹⁵ Nungmoq gi, nguingón hkyô wó râ matú ji yu é hui bekô nghut mù, gungdu ralthum má é bang chyat nghut bekô yanmai, Hkrisduq é nguingón hkyô lé, nungmoq é myit má up nhang nyi keq. Haù mù, jeju hkya-ôn nyi keq. ¹⁶ Nungmoq, rayuq eq rayuq, hpaqchyí byéng-yá banshoq èq mhoqshit é eq lhoq pun lhoq kyíng lhum é hkûn le, Garai Gasang lé nungmoq jeju bûn é myit mai, jihkyang dang, hkya-on mahkôn, woi-nyí eq sêng é mahkôn pé hkôn é hkûn le, haù Hkrisduq é mungdang lé, nungmoq é myit nhiklhum má agùn agó bò nhang nyi keq. ¹⁷ Nungmoq haì wá kut kut, dang dông nghut nghut, zui saí é dông nghut nghut, banshoq lé Yhumsing Yesuq é mying mai kut é hkûn, haù Íwa nghut é Garai Gasang lé Yhang dông mai jeju hkya-on keq.

Hkristan Ikun Byu Pé Nyi Yap Râ Hkyô

¹⁸ Ikun myhî pé ê, ikun hpô pé uphkan é ahkaù má nyi keq. Haù gi, Yhumsing é hí má kut gíng é hkyô nghut lhê.

¹⁹ Ikun hpô pé ê, ikun myhî pé lé chyitdap nyi keq. Yhangmoq lé dang htân hkâ-nyô kó.

²⁰ Zo wuí ê, jung hkanmó má nungmoq é mó wuí é jino gyo keq; hkâsu mù gà le, haù gi, Yhumsing ô nau é hkyô nghut lhê.

²¹ Íwâ pé ê, nungmoq é zo wuí lé myit hkâ-nô nhâng kó, nô nhâng jáng gi, yhangmoq, myit wum gyuí byuq kó râ nghut lhê.

²² Jùn pé ê, hkyô hkanmó má nungmoq é myidâm htoq mâ é jùn sîng bang uphkan é ahkaù má nyi nyi keq; yhangmoq é myoq hí má za zui saí luí, myoqdong ho é dông a nghut é za, haù Yhumsing lé gyuq hkunggá é eq lhumzui é myit mai zui saí nyi keq. ²³ Nungmoq haì wá kut kôle, byu é matú kut é a nghut, haù Yhumsing é matú kut nyi é dông, nungmoq é myit nhiklhum banshoq eq zui saí nyi keq. ²⁴ Haì mù gà le, nungmoq gi, haù Yhumsing chyáng mai, muizè lé chyunghuq dông wó yú kó râ nghut é lé, sé kô é yanmai nghut lhê. Nungmoq dojaú nyi é sù gi, Yhumsing Hkrisduq ru nghut lhê.

²⁵ Kut shut sù gi, yhang kut shut é marâ matú dam byí é hui zo râ nghut lhê, haì mù gà le, Garai Gasang gi, myoqdong hkyin é hkyô a joq.

4

¹ Jùn sîng bang é, nungmoq é jùn pé lé, tengmán é eq gíng âng é dông lajang byí nyi keq; haì mù gà le, nungmoq le, mauhkûng htoq má Yhumsing rayuq wó é lé sé kô é yanmai nghut lhê.

Xoq Lui Pying Kat É Hkyô

² Nungmoq gi, kyûdûng é má myit zing zuq nyi mù, machyá luí, jeju hkya-ôn nyi keq. ³ Ngò,

shamtoq-tui hut huî nyi shoq dut é, Hkrisduq é zaú tô é hkyô lé ngamoq wó taí pyô sháng gaq, Garai Gasang gi, mungdang lé ngamoq taí rà hkyô hkum hpóng byi rà matú kyû bo dung byi kó laq. ⁴ Haû Hkrisduq é zaú tô é hkyô lé, ngò taí âng é dông san za wó taí pyô sháng gaq, kyû bo dung byi kó laq. ⁵ Nungmoq gi, a lumjîng bang eq zùm yap é hkùn hpaqchyî bo nyi keq; wó yu é ahkyîng hkanmó lé rago yhang chung jai keq. ⁶ Nungmoq gi, yuq hkanmó lé hkâsu tû taí rà hkyô wó sé kó shoq, dáng nyo é má, xô èq nhám nhang é su, hkâ-nhám le jeju byîng é dang bo nyi sháng gaq.

Ló Htâng É Shi-kyám Dang

⁷ Tuhkiku gi, ngá hkyô eq sêng é danglù banshoq, nungmoq lé taí kyo rà nghut lhê. Yhang gi, ngá é chyitdap gumang, haû Yhumsîng má, lhumzui é hpúng mù wùn sù eq byinzùm nghut lhê. ⁸ Ngò, yhang lé nungmoq chyáng nhang kat é hkyô gi, ngamoq chyáng dut nyi é hkyô lé nungmoq wó sé rà eq, nungmoq lé myit wum wó byi rà matú nghut lhê. ⁹ Yhang gi, nungmoq chyáng má é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhanghik gi, shî má dut nyi é hkyô jung hkanmó lé taí kyo kó rà nghut lhê.

¹⁰ Ngò eq rahá htóng lúng sù Aristakuq gi, nungmoq lé shi-kyâm kat ri. Barnaba é yhâng za-aû Markuq le, nungmoq lé shi-kyâm kat ri. (Markuq eq séng luî pyîng kat é hkyô lé nungmoq wó yù to bê nghut mù, nungmoq chyáng, yhang jé lé é nghut jáng, lhom hkûlum yù keq.) ¹¹ Yustu le gâ é Yesuq le, nungmoq lé shi-kyâm kat ri. Garai Gasâng é mingdán matú ngá é byinzùm mù zui bang má, haû bang za Yudaq byu pé nghut kômù, yhangmoq gi, ngo lé

nhik tîng byî é bang nghut akô. ¹² Nungmoq chyáng má é byù nghut sù eq Hkrisduq Yesuq é mù wùn sù, Epahpra gi, nungmoq lé shi-kyâm kat ri. Nungmoq gi, Garai Gasang ô nau é hkyô lhunglháng má hkyak lùm to mù, gumjup luî wó gingtîng nyi sháng gaq ga, Yhang gi, ayang nungmoq é matú kyûdung shikut byî nyi ri. ¹³ Nungmoq é matú le, Ladoki wà mó eq Herapoli wà mó bâng é matú le, yhang gi, gyai yhang mù zui shikut byî é hkyô lé, yhang é matú ngò saksé hkâm lhê. ¹⁴ Ngamoq é chyitdap chi sará Lukaq eq Demaq gi, nungmoq lé shi-kyâm kat akô nghut ri. ¹⁵ Ladoki wà mó má é gumang wuî lé le, Numhpa eq yhâng yhùm má é noqkuq hpúng lé le, bo shi-kyám byi keq.

¹⁶ Laiká shî lé, nungmoq lé ngahap kyô é htâng má, Ladoki byu pé é noqkuq hpúng má le nghap nhang mù, Ladoki wà bâng chyáng hùn kat é laiká lé le, nungmoq nghap wú keq.

¹⁷ "Haû Yhumsing chyáng mai nàng hap yù to bê é muzó lé rago za lhoq pán pyám aq." nghû, Arhkipo lé taí kyo keq.

¹⁸ Ngò, Poluq gi, ngá é loq èq yhang shi-kyám dang shî lé kê kat é nghut lhê. Ngò, shamtoq-tui wut tô é lé bûn nyi keq. Jeju gi, nungmoq chyáng ru joq nyî sháng gaq ô.

HTESALONI Pê Chyáng Hî Dàm Hun Kat é Laiká (1 Thessalonians)

¹ Ngò Poluq, Sila* eq Timohti pé gi, Íwa Garai Gasang eq Yhumsíng Yesuq Hkrisduq má nghut nyí bê bang, haû Htesaloni wà mó byu pê é noqkuq hpúng lé dang kyô kat lhê. Garaí jeju eq nguingón hkyô gi, nungmoq chyáng ru joq nyí sháng gaq.

Jeju Hkya-ôn É Hkyô

² Ngamoq gi, hkâ-nhám le, nungmoq banshoq bâng é matú, Garaí Gasang lé jeju hkya-on luí, ngamoq é kyûdung dang má nungmoq lé bo dúng lhôm nyi lhê. ³ Nungmoq é lumjíng myit mai zui saí é nungmoq é muzó lé le; chyitdap myit é yanmai, nungmoq shikut é hkyô lé le; nga-nhùng é Yhumsíng Yesuq Hkrisduq má myit myoqbyu tô é yanmai, nungmoq hkam jân é hkyô lé le, nga-nhùng é Íwa Garai Gasâng é hí má, ngamoq ru bûn nyi lhê.

⁴ Garaí Gasang chyitdap é gumang wui ê, Yhang nungmoq lé hkyin yù bê lé, ngamoq sê lhê. ⁵ Hkâsu mù gà le, ngamoq é gabú danglù gi, nhutdang đông za nungmoq chyáng jé é a nghut, wum-o a-tsam đông le, Chyoiyúng Woi-nyí đông le, tengmán hkyô byíng jup é đông le, jé bê nghut é yanmai nghut lhê. Ngamoq, nungmoq eq rahá nyi é hkún, nungmoq é matú hkâsu kut laí lo é hkyô lé, nungmoq sé gù nghut lhê. ⁶ Nungmoq gi, wuihke jamjau myo myo hui zo kôhang, Chyoiyúng Woi-nyí byí é gabú myit mai, danglù haû lé lhom yù kôluí, ngamoq lé le, haû Yhumsíng lé le, alik kut yu é bang dut bekô nghut ri. ⁷ Haû mù, Makedoni mau eq

Ahkaia mau mâ é lumjíng bang banshoq é alik, nungmoq dut bekô nghut ri. ⁸ Nungmoq chyáng mai, Makedoni mau eq Ahkaia mau má, haû Yhumsíng é mungdang hû htoq ló e za a nghut, Garaí Gasang má nungmoq lumjíng hkyô gi, jowò hkangmó jàm ló bê nghut luí, ngamoq gi, haí le taí nó a ra lo nghut ri. ⁹ Hkâsu mù gà le, ngamoq lé nungmoq hká đông lhom hkulum yu é hkyô lé, yhangmoq yhang, ngamoq lé shit kyo akô. Nungmoq gi, hpara lhô pé lé tô pyám luí, Garaí Gasang shut hkâsu kut lhing lò mù, rû dui nyi é eq tengmán é Garaí Gasang lé dojaú nyi é hkyô lé le; ¹⁰ mauhkûng mâ é haû Yhang Zo lé lánng nyi é hkyô lé le, yhangmoq taí kyô akô. Yhangzo haû gi, Yhang èq shi é mai lhoq dui toq yu é hui luí, jé lô rà nhikmó yo hkyô mai nganhúng lé hkyi yù sù, Yesuq nghut ri.

2

Poluq, Htesaloni Wà Mó Má Garaí Mú Wùn Waq É Hkyô

¹ Gumang wui ê, nungmoq chyáng ngamoq lé kûm é hkyô gi, akôm a nghut é lé, nungmoq yhang sê lhê. ² Nungmoq sê é eq rajung za, ngamoq gi, hí hkún, Hpilipi wà mó má wuihke jamjau eq rhoi é hui wú bê nghut lhê; nghut kôhang, nga-nhùng é Garaí Gasang garúm é yanmai, gyai lhom htuoq htíng é hui kôle, Garaí Gasâng é gabú danglù lé, a gyuq a kyum nungmoq lé wám taí kyô é nghut lhê. ³ Hkâsu mù gà le, ngamoq lhoq pun lhoq kyíng é hkyô gi, shut é, a nghut jáng, a sansêng é i-myit đông eq nungmoq lé mhaú zô é đông a nghut e za, ⁴ haû gabú danglù lé chùng gíng é bang ga, Garaí Gasâng chyáng mai ahkáng wó é đông za, ngamoq taí é nghut lhê. Ngamoq gi, byu pé lé gabú nhâng râ matú a nghut, ngamoq

* 1:1 Sila lé gi, Salwanu le gà lhê.

é myit lé chyam wú nyi é Garai Gasang lé, gabú nhâng rá matú shikut é ru nghut lhê. ⁵ Hkâsu mù gà le, nungmoq sê é eq rajung za, ngamoq gi, lhoq ngón mhaù é dang le hkâ-nhám a chùng wú, nghop tô é myoqnoq myit le hkâ-nhám a bò, Garai Gasang gi, ngamoq é saksé nghut lhê. ⁶ Ngamoq gi, byu pé mai le, nungmoq mai le, gotú ó yuq mai le hkya-on rá lé ho nyi é a nghut, Hkrisduq é lagyô pé nghut é eq rajung za, nungmoq lé wòlai hùn naù jáng wó hun lhê; nghut kôlhâng, ⁷ ìnu rayuq, yhang é zoshâng zô pé lé hku baù é su, nungmoq chyáng nú-nhâm é đông nyi laì lò bê nghut lhê. ⁸ Ngamoq gi, nungmoq lé gyai yhang chyitdap luì, Garai Gasâng é gabú danglù za a nghut, ngamoq é asak pé nungmoq lé byì pyâm le lháng nhik dik lhê; hkâsu mù gà le, nungmoq gi, ngamoq chyitdap dik é bang dut bekô nghut é yanmai nghut lhê. ⁹ Gumang wuì ê, nungmoq gi, ngamoq gyai yhang mù zui shikut é hkyô lé, gè gè bun kó rá nghut lhê; Garai Gasâng é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wòlai a byi sháng gaq nghú, ngamoq gi, nyí lé, myín lé, mù zui é nghut lhê.

¹⁰ Ngamoq gi, lumjínng bê bang nungmoq é hí má, hkâsu chyoiyúng é eq dngmán é, mara hùn rá a bo é bang dut laì lo é hkyô lé, nungmoq le, Garai Gasang le, saksé nghut lhê. ¹¹ Hkâsu mù gà le, ngamoq gi, ìwa rayuq mai yhumsing yhangzô pé lé kut byì é su, nungmoq yuq hkangmó lé, myit wum byì nyi é hkyô lé le, nhik taì tng nyi é hkyô lé le, ¹² Yhang é mingdán eq hpungwup shingkang má, nungmoq lé wut yu é Garai Gasang eq gingdán é đông, nungmoq asak wó dui nyi sháng gaq nghú, nungmoq lé wum byì nyi é hkyô lé le, nungmoq yhang sê nyi lhê.

¹³ Ngamoq gi, ngamoq chyáng mai nungmoq wó gyô yu é Garai Gasâng é mungdang lé, nungmoq lhom yu é hkùn, byu é dang lé lhom yu é đông a nghut e za, lumjínng é bang nungmoq má mù zui nyi é, haù Garai Gasâng é mungdang lé yhang, lhom yù kô é yanmai, Garai Gasang lé xoq xoq jeju hkya-ôn nyi lhê. ¹⁴ Gumang wuì ê, nungmoq gi, Hkrisduq Yesuq má nghut nyi é, Yuda mau má joq é Garai Gasâng é noqkuq hpúng pé lé, alik kut yu é bang dut bekô nghut ri. Noqkuq hpúng haù pé gi, Yudaq byu pé zing-rì é lé hui zô é su, nungmoq le, yhumsing mau mâ é byu pé zing-rì é lé hui zô akô nghut ri. ¹⁵ Yudaq byu pé gi, haù Yhumsing Yesuq eq myiqhtoì pé lé sat pyâm kôluì, ngamoq lé le hkat htoq akô. Yhangmoq gi, Garai Gasang a ô nau é hkyô kut é bang, byù lhunglháng eq gyè dut é bang nghut akô. ¹⁶ Túngbaù pé hkyi yù hui rá matú, ngamoq hko kyô é hkyô lé, yhangmoq hkùm akô; yhangmoq gi, hkâ-nhám le, yhumsing é mara lé dik shoq haù đông lhoq jat myô yù akô nghut ri. Haù mù, Garai Gasâng é nhikmo-yô é hkyô gi, yhangmoq ahtoq má jé bê nghut ri.

Htesaloni Byu Pé Lé Poluq Hui Nau Nyi É Hkyô

¹⁷ Gumang wuì ê, ngamoq gi, rayoq zo nungmoq eq myoqdong byam gâng to kôle, myit gi, a gâng é nghut lhê; nungmoq lé gyai bunnghâm nyi luì, wó myang hui shoq nghú, ngamoq gyai yhang shikut nyi lhê. ¹⁸ Nungmoq chyáng ngamoq jé lé naù mù luì, ngò Poluq yhang, adàm dàm shikut wú bê; nghut kôlhâng, Tsadán gi, ngamoq lé hkùm tang pyâm ri. ¹⁹ Hkâsu mù gà le, nga-nhúng é Yhumsing Yesuq Hkrisduq é hí má, Yhang jé lé é hkùn, ngamoq é myit myoqbyù hkyô, gabú hkyô eq gumrông rá

janmaú gi, haíjung wá nghut lhê gâ le, nungmoq yhang nghut nyi lhê a nghut kó lúh? ²⁰ Gè gè yhang, nungmoq gi, ngamoq é gumrông jowò eq gabú hkyô nghut nyi ri.

3

¹ Haù mù luí, ngamoq gi, haù lé a wó jân nyi lo jáng, Ahten myuq má ngamoq baú nyi gyó le je gè rà nghut lhê nghû, myit hpyit yú mù, ² wuîhke jamjau shí pè é yanmai, ó yuq le, myit a hten kó sháng gaq nghû, nungmoq é lumjîng hkyô má, nungmoq lé wum-o byi rà eq myit wum byi rà matú, ³ Hkrisduq é gabú danglù lé hko kyô é hkyô má, ngamoq é gumang eq Garai Gasâng é mù wùn luzúm nghut é Timohti lé, nhang kat é nghut lhê. Nga-nhúng gi, wuîhke jamjau pé huí zo rà matú, hkyin to huí é bang nghut é lé, nungmoq yhang rago sê nyi lhê. ⁴ Nga-nhúng gi, zing-ri hui zo rà nghut lhê nghû, ngamoq, nungmoq eq rahá nghut nyi é hkùn, noq mai nungmoq lé ngamoq taí kyô nyi gù nghut bê. Nungmoq rago sê é eq rajung za, haù đông dut bê nghut ri. ⁵ Hau é yanmai, ngò a wó jân nyi lo jáng, haù gunglaú sù mai nungmoq lé gunglaú yú luí, ngamoq wùn waq bê muzó gi, akôm dut byuq rà lé, myit chiq mù, nungmoq é lumjîng hkyô lé wó sé rà matú, yhang lé ngò nhang kat é nghut lhê. Gunglaú sù gi, nat Tsadán nghut lhê.

Timohti Lo Shit Kyô É Wum Byi Dang

⁶ Ahkuí kúm, Timohti gi, nungmoq é lumjîng hkyô eq chyitdap myit eq sêng é gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhám le, ngamoq lé rago bûn nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le, yhang

lo taí kyo bê nghut ri. ⁷ Haù mù luí, gumang wui é, ngamoq myit myo uhkyí é hkyô eq zing-ri huí é hkyô pé banshoq má, nungmoq é lumjîng hkyô é yanmai, nungmoq eq séng luí myit wum byi é hkyô lé ngamoq wó yú bê nghut lhê. ⁸ Ahkuí, ngamoq gi, haù Yhumsîng má nungmoq yap gîng nyi kô é yanmai, gè gè nyi ngón bê nghut lhê. ⁹ Nga-nhúng é Garai Gasâng hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasâng lé hkâsu kut jeju ûng hkyâon rà lúh? ¹⁰ Ngamoq gi, nungmoq lé dum myàng rà matú eq, nungmoq é lumjîng myit má langhpyut é hkyô lé wó lhoq hkúm byi rà matú, nyi, myín, gyai yhang lhumzui luí kyûdûng nyi lhê.

¹¹ Nungmoq chyáng ngamoq lé rà matú, nga-nhúng é Yhumsîng Yesuq eq nga-nhúng é Íwa Garai Gasang yhang ngamoq lé hkyô hpóng byi sháng gaq. ¹² Nungmoq lé ngamoq chyitdap nyi é su, haù Yhumsîng gi, nungmoq é chyitdap myit lé, rayuq eq rayuq é ahtoq má le, yuq hkangmó é ahtoq má le, lhoq kô jat, lhoq pyíng byi sháng gaq. ¹³ Nga-nhúng é Yhumsîng Yesuq gi, Yhâng é chyoiyúng bang banshoq eq rahá lé é hkùn, nga-nhúng é Íwa Garai Gasâng é hí má, nungmoq gi, mara hûn jowò a joq é eq chyoiyúng é bang dut rà matú, nungmoq é myit nhikhum má, haù Yhumsîng mai wum-o lhoq kíng byi nyi sháng gaq. Yhâng é chyoiyúng bang gâ é gi, byù lé, a nghut jáng, maumang lagyô pé lé, taí záng lhê.

4

Garai Gasang Ô Nau É Đông Asak Dui Râ Hkyô

¹ Xoq luí taí nau é gi, gumang wui ê, ngamoq gi, ahkuí nungmoq cháng nyi é eq rajung za, nungmoq hká dòng nyi yap luí, Garai Gasang lé gabú nháng rá hkyô nungmoq lé mhoqshit byi bê nghut lhê. Ahkuí le, ngamoq gi, shí hkyô lé nungmoq hau htoq je wó châng jat rá matú, Yhumsing Yesuq má nungmoq lé dúng tóngbán luí, myit wum byi kat lhê. ² Hkâsu mù gâ le, nungmoq gi, haú Yhumsing Yesuq é ahko ahkáng dòng, ngamoq mai, nungmoq lé mhoqshit to byi é hkyô pé lé, sê akô nghut ri.

³ Garai Gasang ô nau é hkyô gi, haú nungmoq sân-yúng é hui rá matú le, ashop é dòng gungsho zùm yap é hkyô lé koi pyâm rá matú le; ⁴ nungmoq yuq hkangmó gi, haú Garai Gasang lé a sê é, a lumjín bang kut é su, gungsho yut yut ô nau é hkyô a châng e za, ⁵ haú chyoiyúng é eq hkungga gíng é sù wó dut shoq, yhumsing gùng lé wó hkang é hkyô mhoq yú rá matú le; ⁶ shí hkyô eq séng luí, ó yuq le, yhumsing é gumang lé, a ge shut, a ge lhungzo rá matú le nghut lhê. Ngamoq, nungmoq lé taí kyo mù, lhoq pun lhoq kying gù nghut bê eq rajung za, haú Yhumsing gi, haú hkyô shut é banshoq lé, dam byi rá nghut lhê. ⁷ Hkâsu mù gâ le, Garai Gasang gi, nga-nhung lé a sân-yúng é bang dut rá matú wut yu é a nghut, chyoiyúng é dòng asak dui nyi rá matú sheq wut yu é ru nghut lhê. ⁸ Haú mù luí, mhoqshit hkyô shí lé he-ngik pyâm é sù gi, byù lé he-ngik é a nghut, haú nungmoq lé, Yhâng é Chyoiyúng Woi-nyi byi tô é sù, Garai Gasang lé he-ngik pyâm é sheq ru nghut lhê.

⁹ Rayuq eq rayuq chyitdap lhum rá matú, nungmoq yhang, Garai Gasang eq mhoqshit é hui bekô nghut é yanmai, gumang yhangchang chyitdap lhum é hkyô eq séng luí, ngamoq gi, nungmoq

chyáng kê kat byi a ra lo nghut ri. ¹⁰ Haú eq rajung za, nungmoq gi, Makedoni mau gón mà é gumang wui banshoq lé chyitdap nyi akô nghut ri. Nghut kôhang, gumang wui ê, haú su je myo kut rá matú nungmoq lé ngamoq wum byi lhê.

¹¹⁻¹² Nungmoq é nyi wui lhê é asak dui hkyô má, gotú byu pé eq hkunggá é wó yú luí, ó yuq lé le, lumhkaú a ra wó dut sháng gaq, hí hkún nungmoq lé ngamoq taí kyô tô é eq rajung za, num num byù zè rá hkyô lé le, yhumsing eq a séng é hkyô a kut wún rá lé le, yhumsing loq eq zui saí mù nyi rá lé le, nungmoq é myit myoqbyù jowô kut yú keq.

Haú Yhumsing Gyó Lé Rá Hkyô

¹³ Gumang wui ê, myit myoqbyù hkyô a wó é byù góbang su, nungmoq, iyon ningtsáng a dut kó sháng gaq, haú yhup ngón byuq é bang eq séng luí, nungmoq a sé rá le, ngamoq a ô nau é nghut lhê. Yhup ngón byuq é bang gâ é gi, lumjín luí shi ló byuq é bang lé gâ é nghut lhê. ¹⁴ Hkâsu mù gâ le, Yesuq shí luí, dum dui toq bê hkyô lé nga-nhung lumjín é yanmai, Garai Gasang gi, Yesuq má yhup ngón byuq é bang lé, Yesuq eq rahá shuí lé rá nghut lhê nghú, nga-nhung lumjín é nghut lhê. ¹⁵ Haú Yhumsing taí é dang eq rajung za, nungmoq lé ngamoq taí kyo kólé, haú Yhumsing dum lé é hkún, asak dui nyi é eq myit gyo tô é bang nga-nhung gi, yhup ngón byuq bê bâng htoq rat-suí le wó hí rá a nghut. ¹⁶ Hkâsu mù gâ le, haú Yhumsing yhang gi, htê mó hkunmó eq le, maumang lagyo mó é hte eq le, Garai Gasang é tutmó mut hte eq le, mauhkúng mai gyó lé lô luí, haú Hkrisduq má shi ló bê bang hí dui toq rá nghut lhê. ¹⁷ Hau htâng, asak dui nyi é eq myit gyo tô é bang nga-nhung gi, yhangmoq eq rahá mhut htoq má shuí toq yu é hui luí, maulat

má haù Yhumsing eq hui rà nghut lhê. Haù hkùn, nga-nhung gi, haù Yhumsing eq ahtum abyuq nyi nyi berâ nghut lhê. ¹⁸ Haù mù luí, nungmoq gi, dang shí pé mai rayuq eq rayuq myit wum byí lhùm nyi keq.

5

¹ Nghut kôlhang, gumang wuì ê, ahkying buinyi eq séng luí, nungmoq lé ngamoq kâ hùn byi a ra lo nghut ri. ² Hkâsu mù gâ le, haù Yhumsing é buinyi gi, myín lé hkau sù wang é su jé lé rà nghut é hkyô lé, nungmoq rago za sê akô nghut ri. Yhumsing é buinyi gi, Yesuq dum jé lé rà buinyi lé tai nau é nghut lhê. ³ Byu pé gi, 'Nguingón yuqyo ri.' ga tai nyi bùm kô é u lé, gùng lai é myiwe rayuq zohkù-nò no lo é su, htên byoq hkyô gi, byodàn tung yhangmoq chyáng jé luí, hká dông lé yhangmoq wó hpang lut kó rà a nghut.

⁴ Nghut kôlhang, gumang wuì ê, nungmoq gi, mauchut hkaù má nyi é bang a nghut é yanmai, buinyi haù gi, hkau sù lé é su, nungmoq é matú byodàn tung dut rà a nghut. ⁵ Nungmoq lunglhang bang gi, maubó é yhangzô pé eq nyi é yhangzô pé nghut lhê. Nga-nhung gi, myín eq mauchut hkaù eq séng é bang a nghut. ⁶ Haù mù luí, nga-nhung gi, byù góbang su a yhup nyi e za, machyâ luí, gyng gyng kut nyi sháng. ⁷ Hkâsu mù gâ le, yhup é bang gi, myín lé yhup akô; í shuq wut é bang le, myín lé shuq wut akô. ⁸ Nghut kôlhang, nga-nhung gi, nyi eq séng lhê nghut é yanmai, gyng gyng kut nyi luí, lumjing myit eq chyitdap myit lé gi, wànggò-long lé su gò to, hkyi yù hui rà lé myit myoqbyù tô é hkyô lé gi, shamtoq-muq lé su tsung to, kut sháng. ⁹ Hkâsu mù gâ le, Garai Gasang gi, Yhâng nhikmo-yô é hkyô lé hkâm zo rà matú, nga-nhung lé

hkyin tô é a nghut e za, nga-nhung é Yhumsing Yesuq Hkrisduq mai, hkyi yù hkyô lé nga-nhung wó yù rà matú hkyin to bê nghut lhê. ¹⁰ Yesuq gi, nga-nhung yhup bân nyi kôlhang, yhup ngón to kôlhang, Yhang eq rahá wó nyi nyi sháng gaq ga, nga-nhung é matú shí hkâm byi bê nghut ri. ¹¹ Haù mù luí, nungmoq gi, ahkuí, nungmoq kut nyi é eq rajung za, rayuq eq rayuq myit wum byí lhum mù, htuqluq htuqbáng kut lhùm nyi keq.

Ló Htâng Lhê É Mhoqshit Hkyô

¹² Gumang wuì ê, nungmoq mâ é muzó shikut luí, haù Yhumsing má nungmoq lé up nyi é eq lhoq pun lhoq kyíng nyi é bang lé, nungmoq hkungga rà matú le; ¹³ yhangmoq zui sai é muzó jizó é yanmai, yhangmoq lé chyitdap myit dông gyai yhang hkungga rà matú le, nungmoq lé ngamoq sang kat lhê. Nungmoq le, rayuq eq rayuq ngu-ingón lhùm nyi keq. ¹⁴ Gumang wuì ê, nungmoq lé ngamoq wum byí kat nau é gi, lagôn é bang lé lhoq pun lhoq kying keq; nhiknge é bang lé myit wum byi keq; wum nyhôm é bang lé htuqluq htuqbáng kut keq; yuq hkangmó lé, i-myit hîng byí nyi keq; ¹⁵ ó yuq lé nghut kôlhang, a ge é hkyô é yanmai, a ge é dông a taù kut rà lé lhoq pun lhoq kyíng nyi keq; nungmoq rayuq eq rayuq le, góbang banshoq eq le, shikut luí, hkâ-nhám le, ge é hkyô kut byí lhum nyi keq.

¹⁶ Hkâ-nhám le, ru gabú nyi keq; ¹⁷ abyit alan kyûdûng nyi keq; ¹⁸ hkyô hkat hkangmó má jeju hkyâ-ôn nyi keq, hkâsu mù gâ le, haù pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.

¹⁹ Haù Woi-nyí lé hkâlhoq jôm pyám kó; ²⁰ myiqhtoi htoi é lé, haì su a ngàm hkâkut kó. ²¹ Jung hkangmó lé, chyam wó luí, ge é

hkyô lé zuî zing nyî mù, ²² agè ashop é hkyô hkangmó lé, koi pyám keq.

²³ Nguingón hkyo é apûn awang nghut é Garai Gasang yhang, nungmoq lé, lhunglhang lhoq sân-yúng pyám byi sháng gaq; nga-nhûng é Yhumsing Yesuq Hkrisduq dum lé é hkûn, nungmoq é woi-nyí, myit nhiklum, gungdu gi, mara hûn râ hkyô a bò sháng gaq. ²⁴ Nungmoq lé ji yu é Sû gi, lhumzuí é Sû nghut lhê mù, Yhang, shí hkyô lé kut râ nghut lhê.

²⁵ Gumang wuì ê, ngamoq é matú kyû bo dung byi kó laq. ²⁶ Gumang wuì banshoq bang lé, chyoiyúng é chyitpuq puq é dông bo shi-kyám byi kó laq. ²⁷ Gumang wuì banshoq bang lé, hun kat é laiká shî ng-hap kyo râ matú, haû Yhumsing é mying mai, ngò, nungmoq lé pying kat lhê.

²⁸ Nga-nhûng é Yhumsing Yesuq Hkrisduq é jeju gi, nungmoq chyáng ru joq nyî sháng gaq ô!

HTESALONI Pê Chyáng Htang Dàm Hun Kat é Laiká (2 Thessalonians)

¹ Ngò Poluq eq Sila, Timohti pé gi, nga-nhông é Íwa Garai Gasang eq Yhumsing Yesuq Hkrisduq má nghut nyí bê bang, haù Htesaloni wà mó byu pé é noqkuq hpúng lé dang kyô kat lhê.

² Haù Íwa Garai Gasang eq Yhumsing Yesuq Hkrisduq chyáng mà é jeju eq nguingón hkyô gi, nungmoq chyáng ru joq nyí sháng gaq ô!

Jeju Hkya-on É Eq Kyûdung É Hkyô

³ Gumang wuì ê, ngamoq gi, hkâ-nhám le, nungmoq é matú Garai Gasang lé jeju hkya-on rá dut ri; haù gi, gíng lhê; hkâsu mù gâ le, nungmoq é lumjing myit gi, je je kô jat lo nyí luí, nungmoq yuq hkangmó é chyitdap myit le, rayuq eq rayuq é ahtoq má je nyó jat lo nyí é yanmai nghut lhê. ⁴ Haù mù luí, ngamoq gi, nungmoq zing-ri huí é hkyô pé eq wuìhke jamjau huí é hkyô pé banshoq lé, nungmoq wó jân nyí kô é yanmai, nungmoq é hkam jan hkyô eq lumjing hkyô lé, Garai Gasang é noqkuq hpúng pé é hí má gumrong nyí lhê.

⁵ Shí hkyô banshoq gi, haù Garai Gasang dingmán é đông jéyáng é hkyô lé saksé tân shit é nghut lhê; haù mù luí, nungmoq gi, Garai Gasang é mingdán é matú wuìhke jamjau huí zo bekô nghut é yanmai, mingdán haù eq gingdán é bang gâ é hui kó rá nghut lhê;

⁶ Garai Gasang gi, tengmán Sú nghut lhê; haù mù, nungmoq lé jamjau byí é bang lé, Yhang mai jamjau byi rá eq, ⁷ jamjau huí nyí é bang nungmoq lé le, ngamoq lé

le lhoq lhut byi rá nghut lhê. Shí hkyô gi, haù Garai Gasang lé a sê é bang eq nga-nhông é Yhumsing Yesuq eq séng é gabú danglù lé a gyo a châng é bang lé, jéyáng rá matú, ⁸ haù Yhumsing Yesuq, wum-o a-tsam byíng é Yhâng é mau-mang lagyô pé eq rahá, myishâm eq mauhkông mai htoq shit é hkún, dut rá nghut lhê. ⁹ Yesuq jé lé lô mù, Yhâng é chyoiyúng bang má hpung-wup shingkang wó yu é eq lumjing bang banshoq mai mauhong é hui é buinyí má, yhangmoq gi, htên byoq hkyô lé ahtum abyuq jéyáng é hui zo kó rá nghut lhê. ¹⁰ Hau htoq agó, haù Yhumsing é hí mai le, Yhâng é a-tsam kô làm é mai le, lhoq kâng pyâm é hui kó rá nghut lhê. Ngamoq é saksé dang lé nungmoq lumjing bekô nghut é yanmai, haù lumjing bang má nungmoq le lòm bekô nghut lhê.

¹¹ Haù mù luí, nga-nhông é Garai Gasang gi, nungmoq lé, Yhang ji yu é hkyô eq gingdán ri ga rá le, haù Yhang é wum-o a-tsam mai, nungmoq myit tô é ge é hkyô hkangmó eq nungmoq é lumjing myit eq séng é muzó lhumjup lé, lhoq dik byi sháng gaq ngû le, nungmoq é matú, hkâ-nhám le, ngamoq kyûdung byí nyí lhê. ¹² Ngamoq haù su dung byí nyí é hkyô gi, nga-nhông é Garai Gasang eq Yhumsing Yesuq Hkrisduq é jeju yanmai, haù nga-nhông é Yhumsing Yesuq é myíng gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó rá matú nghut lhê.

2

A Tara É Sú

¹ Gumang wuì ê, haù nga-nhông é Yhumsing Yesuq Hkrisduq dum lé rá hkyô, Yhang eq nga-nhông rahá zup nyi to rá hkyô eq séng luí, nungmoq lé ngamoq pyíng kat

nau é gi, ² haù Yhumsing é buinyi gi, jé to gù nghut bê gâ é myiqh-toi dang, luhkyang, laiká pé rajung jung, ngamoq chyáng má é nghut lhê ga nungmoq chyáng jé é nghut jáng, nungmoq é myit luí za hkâduí kó, hkâgyuq dàn kó. ³ Hkâsu mù gâ le, haù htên byoq é yhangzo nghut é a tarâ Sû htoq shit luí, haù gum-lau toq é hkyô hí a htoq htoq gi, buinyi haù jé râ a nghut, haù mù luí, nungmoq lé, ó yuq èq, hká đông mai mhaù kôlhang hkâjúng kó. ⁴ Haù yuq gi, Garai ga noqkuq huí é zè lhunglhang lé htuq htíng luí, haù pé banshoq é htoq má yhanggùng yhang lhoq gyaù yú râ nghut lhê; haù mù luí, Garai Gasâng é noqkuq yhùm má zung to luí, yhanggùng yhang Garai Gasang nghut lhê ga tái râ nghut lhê.

⁵ Ngò gi, nungmoq eq rahá nyi tô é hkùn, shí hkyô pé lé lhaq tái kyo kyo kut é hkyô lé, nungmoq a bun lo kó lúh? ⁶ Haù yuq gi, ahkyíng yam-yoq jé jáng sheq htoq shit sháng gaq ga, ahkuí, yhang lé hai èq hkùm zing tô é hkyô lé, nungmoq sê lhê. ⁷ Haù a tara é hkyo é haq dá é a-tsam gi, mù zui nyi gù nghut bê; nghut kôlhang, haù lé hkùm zing nyi sù gi, hui htot pyám huí é hkùn jé shoq, haù lé hkùm zing nyi shirâ nghut lhê. ⁸ Haù hui htot pyám huí é hkùn, a tarâ Sû htoq shit râ nghut lhê; haù Yhumsing Yesuq kùm gi, Yhâng nhut má é soq èq yhang lé sat pyám râ eq, Yhang gyó lo u lhê é hpungwup mó èq, yhang lé lhoq htên pyám râ nghut lhê. ⁹ Haù a tarâ Sû lé lo é gi, Tsadán a-tsam đông laklaí kumlhá pé, kumlhá pé, mauhpo muzó pé ajung jung kut mhaù é eq, ¹⁰ htên byoq huí nyi é bang lé mhaù zo râ agè ashop é hkyô jung hkangmó lé tûn shit râ nghut lhê. Yhangmoq htên byoq é gi, haù tengmán hkyô lé chyitdap luí hkyi yù hui râ nghut é hkyô lé he-ngik pyám kô é yanmai

nghut ri. ¹¹ Hau é yanmai, Garai Gasang gi, haù tengmán hkyô lé a lumjúng e za agè ashop hkyô má ô nau é lhunglhang bang mara byí é hui kó sháng gaq ga, ¹² mhaù é dang lé júng kó râ matú, a-tsam mó bo é lum shut râ hkyô lé, yhangmoq chyáng nhâng byi bê nghut ri.

Mhoqshit é hkyô má gíng nyi râ hkyô

¹³ Nghut kôlhang, haù Yhumsing chyitdap é gumang wui è, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri. Hkâsu mù gâ le, haù Woi-nyí èq lhoq sân-yúng nyi é muzó đông le, tengmán hkyô lé lumjúng é đông le, hkyi yù hui râ matú, Garai Gasang gi, nungmoq lé, sâng-hi mai hkyin yù bê nghut ri. ¹⁴ Yhang gi, ngan-hùng é Yhumsing Yesuq Hkrisduq é hpungwup shingkang má, nungmoq wó bo lóm shoq ga, ngamoq é gabú danglù đông nungmoq lé shí hkyô má ji yù bê nghut lhê. ¹⁵ Haù mù luí, gumang wui è, nhutdang đông nghut nghut, laiká đông nghut nghut, nungmoq lé ngamoq lhai byí é mhoqshit hkyô lé zui gíng nyi luí, gíng gíng yap nyi keq.

¹⁶ Yhâng é jeju yanmai, ngan-hùng lé, ahtum abyuq é myit wum byi hkyô eq ge é myit myoqbyù hkyô lé byí é, nga-nhùng lé chyitdap é, nga-nhùng é Íwa Garai Gasang eq nga-nhùng é Yhumsing Yesuq Hkrisduq gi, ¹⁷ nungmoq é i-myit má wum byi luí, ge é muzó eq ge é nhutdang lhumjup má, nungmoq lé wum-o lhoq kíng byi sháng gaq ô!

3

Kyú Dung Byi Râ Matú Lung Kat É Hkyô

¹ Gumang wui è, je htâng má pying kat nau é hkyô lé, nungmoq chyáng dut wú bê eq rajung za, haù Yhumsing é mungdang gi, hân hân

byo myín ló mù, lhoq gyaú é hui sháng gaq, ngamoq é matú kyû bo dung byi kó laq. ² Yuq hkanngmó gi, lumjínng myit bo é a nghut é yanmai, haú achag achyut agè ashop é byu pê chyáng mai ngamoq wó lut rã matú le, kyû bo dung byi kó laq. ³ Nghut kôlhang, haú Yhumsing gi, lhumzui é sũ nghut é yanmai, Yhang nungmoq lé wum-o lhoq king byi mù, haú agè ashop su chyáng mai nungmoq lé hung yù rã nghut lhê. ⁴ Nungmoq gi, ngamoq pying tô é dang pé lé kut nyi mù, xoq lui le kut nyi rã nghut lhê nghũ, haú Yhumsing má ngamoq hkyak myit lum tô lhê. ⁵ Haú Yhumsing gi, nungmoq lé Garai Gasâng é chyit-dap hkyô eq Hkrisduq é hkam jân é hkyô má, shui wàng sháng gaq ô!

Mũ Zui Shikut Rã É Hkyô

⁶ Gumang wui ê, ngamoq gi, ngamoq chyáng mai nungmoq hap yù bê ngamoq mhoqshit é hkyô đông a nyi yap é eq lagôn é gumang ó yuq eq le, we we nyi keq nghũ, haú Yhumsing Yesuq Hkrisduq é mying mai nungmoq lé hkunmó hkyô kat lhê. ⁷ Hkãsu mù gã le, ngamoq kut é alik lé hkã đông cháng rã dut é gi, nungmoq yhang sê lhê. Ngamoq gi, nungmoq eq rahá nyi tô é hkũn, lagôn é hkyô a bo wú é htoq agó, ⁸ ó yuq é zoshuq lé le, ngũn a byi é a zo wú é nghut lhê. Nungmoq má ó yuq lé le wòlai a byi sháng gaq nghũ, ngamoq gi, muzó shikut hkyô eq wuihke hkyô má, nyi lé, myín lé, zui sai é nghut lhê. ⁹ Ngamoq gi, nungmoq lé garúm nhâng rã ahkáng a wó é a nghut, yhumsing gùng lé nungmoq cháng rã matú alik dut sháng gaq nghũ sheq, haú su kut é ru nghut lhê. ¹⁰ Hkãsu mù gã le, ngamoq, nungmoq eq rahá nyi é hkũn, "Mũ a kãm zui sũ gi, a zo sháng gaq." nghũ, nungmoq lé ngamoq mai sang to bê nghut lhê.

¹¹ Hkãsu mù gã le, nungmoq chyáng mã é byù ra-am lagon lui, haí mù le a zui e za, mũ châng lhoq gyô byi wũn akô gã é hkyô lé, ngamoq wó gyô é yanmai nghut lhê. ¹² Ngamoq gi, haú su kut é bang lé, zim za nyi mù zui sai lui, yhumsing é zoshuq ho nyi kó sháng gaq nghũ, haú Yhumsing Yesuq Hkrisduq é mying lé lang lui, hkunmó hkyô kat mù, wum byi kat lhê. ¹³ Gumang wui ê, nungmoq kúm gi, ge é muzó kut é hkyô má, hkã-nhám le, hkã-ngũ byuq bùm kó.

¹⁴ Byù rayuq yuq gi, laiká shi má ngamoq mhoqshit é hkyô lé, a châng é nghut jáng, haú yuq lé rago chôm matsing yù mù, yhang hoq bun sháng gaq, yhang eq hkãzũm yap kó. ¹⁵ Nghut kôlhang, yhang lé gyè rayuq đông a sôn e za, gumang rayuq đông lhoq pun lhoq kyĩng nyi keq.

Ló Htâng Lhê É Shi-kyám Dang

¹⁶ Haú nguĩngón hkyo é Yhumsing yhang gi, ahkying hkanngmó eq hkyô hkat hkanngmó má, nungmoq lé nguĩngón hkyô byi nyi sháng gaq. Haú Yhumsing gi, nungmoq banshoq bang eq ru nyi nyi sháng gaq.

¹⁷ Ngò, Poluq gi, ngá é loq mai yhang shi-kyám dang shi lé kã kat lhê; shi gi, ngò kã é laiká banshoq má kumlhá nghut lhê. Ngò kã é gi, shi đông chyat nghut lhê.

¹⁸ Nga-nhũng é Yhumsing Yesuq Hkrisduq é jeju gi, nungmoq banshoq bâng chyáng ru joq nyi sháng gaq ô!

TIMOHTI Chyáng Hî Dàm Hun Kat é Laiká (1 Timothy)

¹ Nga-nhùng é hkyi yù Sû Garai Gasang eq nga-nhùng é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngò Poluq gi, ² haù lumjìng hkyô má ngá zo sîng nghut sù, Timohti lé dang kyô kat lhê; haù Iwa Garai Gasang eq nga-nhùng é Yhumsîng Hkrisduq Yesuq chyáng mâ é, jeju eq shogyo nhikmyin hkyô, nguóngon hkyô gi, náng chyáng ru joq nyi sháng gaq ô.

Sará Pyoq Pé Lé Sidiq Râ Hkyô

³ Ngò, Makedoni mau má jé wang ló é hkún, pying to hkô é eq rajung za, Ehpesu myuq má nyi to shi aq; haù hkún sheq, nàng gi, shut shai é mhoqshit hkyô lé mhoqshit é bang a mhoq xoq lo râ matú le, ⁴ myit htoq mhô-myi dang eq a dat htúm é byù xik labaù má yhangmoq a ap nóng râ matú le, haù bang lé hkunmó wó hkyô râ nghut lhê. Haù hkyô pé gi, lumjìng myit mai kut htoq é Garai Gasâng é muzó lé lhoq htoq râ malaì, mabyoq jishùm za sheq lhoq htoq nyi é nghut lhê. ⁵ Haù hkunmó hkyô luì myit myoqbyu tô é hkyô gi, chyitdap myit yhang nghut ri; chyitdap myit haù gi, sansêng é i-myt, mara a bò bûn é myit eq lumjìng myit akying mai lo é nghut lhê. ⁶ Byù ra-am gi, haù hkyô pé mai htoq ló kôluì, dangsôm taì é hkyô shut lhing ló byuq bekô nghut ri. ⁷ Haù bang gi, jep é tarâ sará pé dut naù kôlhang, yhangmoq haì taì nyi é hkyô lé le, hkyak, haì lé mhoqshit é hkyô lé le, a sé kó nghut ri.

⁸ Rayuq yuq, jep é tarâ lé rago chung é nghut jáng, jep é tarâ gi, ge

é hkyô nghut é lé, nga-nhúng sê lhê. ⁹ Haù jep é tarâ gi, dingmán bâng é matú tô tô é a nghut e za, tarâ lu laì é bang eq gumlau toq bâng é matú, tarâ a hkunggâ é bang eq mara kut bâng é matú, a chyoiyúng é bang eq lumjìng hkyô a cháng bâng é matú, yhangmoq é yhângwa lé nghut nghut, yhângnu lé nghut nghut, sat pyám bâng é matú, byù sat bâng é matú, ¹⁰ ashop é dông gungsho zùm yap é bang eq yuqgê yhangchang nyi zo lhum bâng é matú, jùn dông byù ung zo bang, mhaù é bang eq dakam mhaù bâng é matú, tengmán mhoqshit hkyô eq shai lhum é lhunglhang bâng é matú sheq, jep é tarâ tô tô é nghut é lé, nga-nhúng sê lhê. ¹¹ Tengmán mhoqshit hkyô haù gi, hkungsô wó é Garai Gasâng eq ngo lé ap byi bê nghut é, Yhâng é hpungwup bo é gabú danglù eq rajung za nghut ri.

Poluq Chyáng Yhumsing É Jeju Joq Nyi É Hkyô

¹² Ngò gi, ngo lé wum-o byi é, nga-nhùng é Yhumsîng Hkrisduq Yesuq lé jeju hkya-ôn lhê; hkâsu mù gâ le, Yhang gi, ngo lé lhumzui sù rayuq dông sôn yù luì, Yhâng é muzó jizó má hkyin kat yu é yanmai nghut lhê. ¹³ Hí hkún, ngò gi, Garai Gasang lé taì hpoi sù, zing-ri sù eq byù rhoi sù nghut wú kôlhang, a sé shi mù lumjìng myit a bo e za kut é yanmai, shogyo nhikmyin yu é hkyô lé ngò wó yu é nghut lhê. ¹⁴ Nga-nhùng é Yhumsîng é jeju lé le, Hkrisduq Yesuq eq sêng é lumjìng myit eq chyitdap myit lé le, ngá chyáng agùn agó hut hkyô kat byi bê nghut ri.

¹⁵ Yubak dap bang lé hkyi yù râ matú, Hkrisduq Yesuq gi, mingkan má jé lé bê gâ é dang gi, lumjìng é mungdang nghut luì, gè gè yhang lhom yù gîng é dang nghut lhê. Haù yubak dap bang má, ngò gi, yubak je ko sù nghut é nghut lhê. ¹⁶ Nghut

kôlhang, Hkrisduq Yesuq gi, Yhang lé lumjǐng luí ahtum abyuq é asak lé wó yú râ bǎng é alik dut râ matú, yubak dap bang má yubak je ko sù nghut é, ngá é ahtoq má, Yhǎng é hkam jan hkyô lhunglhǎng wó tǔn shit shǎng gaq ga, Garai Gasang gi, ngo lé shogyo nhikmyǐn yu ri. ¹⁷ Haú mù, haú aróng eq hpung-wup shǐngkang gi, ahtum abyuq é, a dat htên byoq é, myoq èq a byu-myang é Hkohlkâm nghut sù, rayuq zǎ é Garai Gasǎng chyǎng pyat dedu ahtum abyuq ru joq nyǐ shǎng gaq ôi. Amen.

¹⁸ Ngá zo Timohti ê, nǎng eq séng luí myiqhtoi dang joq wú é eq ra-jung za, ngò gi, nang lé haú dǒng mhoqshit kat lhê; haú mù, nǎng gi, haú pé lé chung nyǐ luí, ge é majan zan mù, ¹⁹ lumjǐng myit eq mara a bò bún é myit bo nyǐ shǎng gaq. Byù ra-am gi, haú hkyô pé lé hengik pyám kô é nghut luí, yhang-moq é lumjǐng myit gi, wuǐ-sanghpo htên byoq ló é su htên byoq byuq bekò nghut ri. ²⁰ Haú bang má, Humenu eq Alesander le bò kômù, Garai Gasang lé taǐ hpoǐ é dang a taǐ râ matú mhoq yù kó shǎng gaq nghù, ngò, yhangnhik lé Tsadán é loq má ap pyám bê nghut lhê.

2

Noqkuq Hkyô Eq Séng Luí Mhoqshit Byǐ É Hkyô

¹ Haú mù luí, ngò, hí pyǐng kat nau é gi, tarǎ hkunggǎ é eq hkungga gǐng é hkyô banshoq má, nga-nhúng wó nguǐngón yuqyo nyǐ shǎng gaq, hkohlkâm pé eq ahkáng ayá wó bang banshoq é matú le, ² yuq hkangmó é matú le, dǔng tǒngbǎn byǐ, kyúdung byǐ, dǔng xoq byǐ, jeju hkya-on byǐ, kut aq nghù nau ri. ³ Haú gi, ge é hkyô nghut mù, nga-nhúng é hkyǐ yù Sù Garai Gasang ô nau é hkyô nghut ri. ⁴ Yhang gi, byù lhunglhǎng bang

hkyǐ yu é hui mù, tengmán é mung-dang lé sê gyo râ lé, ô nau nyǐ ri. ⁵ Hkǎsu mù gǎ le, Garai Gasang gi, rayuq za nghut luí, Garai Gasang eq byu é gyoro má sô xoq byǐ sù le rayuq za nghut lhê; haú yuq gi, xǎngzo byù nghut é Hkrisduq Yesuq nghut ri. ⁶ Yhang gi, byù lhunglhǎng bǎng é matú shǐhtǎi gunglik hkungga dǒng Yhǎnggǔng lé byǐ pyám bê nghut ri; haú gi, ahkyǐng yam-yoq jé é hkùn, saksé htoq shit bê nghut lhê. ⁷ Ngò gi, tǔngbaù pé lé, tengmán é lumjǐng hkyô mhoqshit râ matú, hkò kyo sù rayuq eq lagyo rayuq dǒng hkyǐn tô é hui sù nghut lhê. Ngò, haú su taǐ é gi, mhaù taǐ é a nghut, tǔng é hkyô lé za taǐ nyǐ é ru nghut lhê.

⁸ Yuqgè wuǐ gi, nhikjum yô é hkyô eq dang htǐng htǐng lhúm é hkyô a bo e za, jowò hkangmó má chyoiyúng é loq tǔ mù kyúdung râ lé, ngò ô nau ri.

⁹ Myiwe wuǐ gi, xǎm nik nik é, hǐng zè, palhé, hpaù jung mebù èq a mhôn chung e za, siri bo é mebu wut chǔng mù, tap tap za, shuq shuq za kut luí, ¹⁰ Garai Gasang lé noqkuq é myiwe wuǐ eq gǐng shoq, ge é muzó èq yhumsing gǔng lé mhôn nyǐ râ lé le, ngò ô nau ri.

¹¹ Myiwe gi, uphkang tô é dǒng chǎng nyǐ mù, zim za mhoq yù kó shǎng gaq. ¹² Myiwe gi, yuqgè lé mhoqshit râ hkyô lé le, yuqgè lé uphkǎng râ hkyô lé le, ngò ahkáng a byǐ; myiwe gi, zim za kut nyǐ ra râ nghut lhê. ¹³ Hkǎsu mù gǎ le, Adam lé hí hpan to mù, Ewaq lé hpan é ru nghut lhê. ¹⁴ Hau htoq agó, Adam gi, mhaù é hui zo sù a nghut; haú myiwe sheq mhaù é hui zo luí, mara kut shut é ru nghut lhê. ¹⁵ Nghut kôlhang, myiwe wuǐ gi, lumjǐng myit, chyǐtdap myit eq chyoiyúng hkyô má, shuq shuq za kut mù, yhangmoq xoq chǎng nyǐ

kô é nghut jáng, zoshâng hku é đông mai hkyi yu é hui kó râ nghut lhê.✱

3

Hpúng-up Eq Hpungtê Kut Râ Bâng É Hkyô

¹ Rayuq yuq, hpúng-up ayá lé ô nau nyi é nghut jáng, haú yuq gi, aróng wó é muzó lé ô nau nyi ri gâ é dang gi, lumgíng é dang nghut nyi ri. ² Haú mù luí, hpúng-up rayuq gi, mara hún râ hkyô a bo é sù, myiwe rayuq za wó é sù, dat sidiq é sù, yhumsing gùng lé wó hkuang é sù, hkungga gíng é sù, byù bíng lé dat hkulum é sù, dat mhoqshit é sù, ³ íhpê é jùn a dut é sù, byoq lhum byoq cheq a kut e za nùm é sù, mabyoq jishùm a lhoq htoq é sù, ngunzè lé a chyitdap é sù, nghut râ lhê. ⁴ Yhang gi, yhâng é ikun lé rago dat uphkàng luí, yhang zô pé mai hkungga myit bo é eq yhâng dang lé gyo byí é sù le, nghut râ lhê. ⁵ Rayuq yuq, yhumsing é ikun lé lháng a dat uphkuang é nghut le gi, Garai Gasâng é noqkuq hpúng lé gi, hkâsu kut wó wú gon râ lúhú? ⁶ Chángzo dut é a myáng shi é sù gi, hpúng-up wó kut râ a nghut, kut é nghut jáng, yhang gi, nghutbún lò luí, jéyáng é hkyô lé nat Tsadán hui zô é su hui zo abe. ⁷ Hpúng-up rayuq gi, tûngbaù pé hí má ge é myíng wó é sù le dut râ lhê; haú jáng, yhang gi, taí hpoí pyâm é lé le a hui, nat Tsadán é tuihkyó má le a myí, dut râ nghut lhê.

⁸ Haú eq rajung za, hpungtê pé gi, hkungga gíng é bang, shô-kó a xân é bang, íhpê é jùn a dut é bang, a tengmán é amyat lé a ho é bang, nghut râ lhê. ⁹ Yhangmoq gi, lumjíng hkyô mâ é nik é mauhpo tengmán hkyô pé lé, sansêng é i-myit eq châng nyi ra râ nghut lhê. ¹⁰ Yhangmoq gi, chyam é lé hí hui wú kó sháng gaq, hau htâng, yhangmoq lé mara hún râ hkyô haí a bò lo

jáng, hpungtê mù lé wùn kó sháng gaq.

¹¹ Haú eq rajung za, yhangmoq é yhumsing myhí pé le, myit no nhang é dang a taí e za, dat sidiq é eq hkyô hkangmó má lumgíng luí, hkungga gíng é myiwe wui, nghut ra râ dut lhê.

¹² Hpungtê rayuq gi, myiwe rayuq za wó é sù, yhangzô pé eq yhâng ikun lé rago za dat wùn waq é sù, dut ra râ nghut lhê.

¹³ Hpungtê mù lé rago za wùn waq bê bang gi, yhumsing é matú aróng lé le, Hkrisduq Yesuq lé yhangmoq lumjíng hkyô má, gyuq kyum é hkyô a bo é myit mó lé le, hkyak wó yu akô nghut ri.

¹⁴ Ngò gi, hkâ-myháng a myáng má náng chyáng lé jé râ matú, myit myoqbyu to kôllhang, ahkyíng du myáng pyâm le, ¹⁵ Garai Gasâng é ikun hkaú má, byu pé hká đông nyi yap râ é hkyô lé, nàng sé sháng gaq nghù, pying kat é dang shi pé lé ká byí kat lhê; ikun haú gi, rú dui nyi é Garai Gasâng é noqkuq hpúng nghut luí, tengmán hkyo é hkungmó-zíng eq apùn awang nghut ri. ¹⁶ Tarâ hkungga hkyo é zaú tô é hkyô gi, ko dik é nghut é lé, ó yuq le wó he-ngik pyâm é a nghut; haú gi, Yhang, byù gungsho má htoq shit mù, haú Woi-nyí mai Yhang lé saksé hkám byi luí, maumang lagyô pé gi, Yhang lé myàng bê nghut ri; byuhú ahú hú má Yhâng é hkyô lé hko kyo mù, Yhang lé mingkan byu pé lumjíng luí, hpungwup shíngkang eq Yhang lé mauhkung shut shuí toq yú bê nghut ri.

4

Timohti Lé Mhoqshit É Hkyô

¹ Jihtùm buinyi pé má, byù ram gi, lumjíng hkyô mai htak htoq ló luí, mhaú zô é woi-nyí pé htâng cháng kó râ eq nat gang mai lo é

mhoqshit hkyô pé lé gyo byi kó râ nghut lhê ga, haú woi-nyí gi, san za taí ri. ² Haú sù é mhoqshit hkyô pé gi, gegùn labyoq kut é byù-mhaú pé chyáng mai lo é nghut lhê; haú bâng é myit nhiklhum gi, nyhê nhe tô é shamtoq eq nyhê man tô é su dut byuq bê nghut ri. ³ Haú bang gi, hâng lhùm é hkyô lé hkùm tang é hkyô lé le, haú lumjúng luí tengmán hkyô lé sê é bang mai jeju hkya-on mù hap yù ge é, Garai Gasang hpan to byí é zoshuq lé koi pyám nhang é le, kut akô nghut ri. ⁴ Garai Gasang hpan tô é lhunglháng gi, ge é chyat nghut ri; Garai Gasang é mungdang eq kyúđung é dang đông haú pé lé lhoq sân-yúng nyi é nghut é yanmai, ⁵ jeju hkya-on luí hap yu é nghut le gi, haí jung lé lháng he-ngik pyám rá hkyô a bò nghut ri.

⁶ Haú gumang wuì lé, nàng haú hkyô pé lhoq pun lhoq kyíng é nghut le gi, nàng gi, haú nàng cháng bê ge é mhoqshit hkyô eq lumjúng hkyô má é tengmán hkyô má, kô myhâng sù nàng nghut rá htoq agó, Hkrisduq Yesuq é ge é hpungmù wùn sù le dut rá nghut lhê. ⁷ Garai a bo é myit htoq mhô-myi dang eq hpô-myhí mâng pé é mhô-myi dangsôm lé koi pyám luí, tarâ hkunggâ é hkyô má yhumsing gùng lé lhoq kùng yù aq. ⁸ Hkâsu mù gâ le, gungsho lé lhoq kùng é hkyô gi, akyû shau za htoq é nghut lhê; nghut kôlháng, tarâ hkunggâ é hkyô kúm gi, jung hkangmó é matú akyû bo lhê nghut mù luí, shí ipyat má le, htang pyat má le, akyû bo nyi ri.

⁹ Haú gi, banshoq hap yù gíng é, lumgíng é mungdang nghut lhê. ¹⁰ Haú mù luí, xângzo byù banshoq bâng é hkyi yù Sù nghut é, je riyhang, lumjúng bâng é hkyi yù Sù nghut é, rù dui nyi é Garai Gasang má, nga-nhúng, myit myoqbyu to bê nghut é yanmai, nga-nhúng gi, gyai yhang shikut nyi lhê.

¹¹ Haú pé lé, hkunmó hkyô luí

mhoqshit byí nyi aq. ¹² Náng é zorâm pyat lé, ó yuq eq le a wú tiq pyám sháng gaq, dang taí é má le, nyi yap é hkyô má le, chyitdap é hkyô má le, lumjúng hkyô má le, sansêng é hkyô má le, lumjúng bâng é matú alik kut shit nyi aq. ¹³ Náng chyáng ngò jé lé é buinyi jé shoq, nàng gi, Chyúmdang nghap kyô é má le, hko kyô é má le, mhoqshit é má le, ap nóng nyi aq. ¹⁴ Nàng gi, hpúng suwún wuì náng é ahtoq má loq ke byí é hkùn, myiqhtoi dang đông nang lé Garai Gasang byí to bê nghut é, woi-nyí hkyô eq sêng é chyunghuq lé, haí su a ngàm hkâkut pyám.

¹⁵ Haú hkyô pé lé, myit zìng zuq luí zui saí nyi aq; nàng kô myhang lo é hkyô lé, yuq hkangmó byumyàng kó sháng gaq, nàng gùng banshoq haú pé má ap nóng nyi aq. ¹⁶ Náng é asak dui hkyô má le, nàng mhoqshit é hkyô má le, rago sidiq nyi aq. Haú pé má ru gíng nyi aq, hkâsu mù gâ le, nàng haú su kut é nghut jáng, náng é asak lé le, náng chyáng mai gyô yu é bang lé le, nàng wó hkyi yù rá nghut lhê.

5

Suwún Wuì, Chuimó Pé, Jùn Pé Eq Séng Luí Hpaqchyí Byí É Hkyô

¹ Asak ko sù lé dang htân a tân e za, yhumsing é íwa lé su, yhang lé lhoq pun lhoq kying aq. Zorâm wuì lé gi, gumang wuì lé su, ² asak kô é myiwe wuì lé gi, ínù pé lé su zùm yap luí, zomyi wuì lé gi, nhammó wuì lé su sansêng é i-myit banshoq eq zùm yap nyi aq.

³ Gè gè yhang garúm rá dut é chuimó myhí pé lé, hkunggâ nyi keq. ⁴ Nghut kôlháng, chuimó myhí rayuq yuq gi, zoshâng nghut nghut, gashu nghut nghut, wó é nghut jáng, haú bang gi, yhumsing é ikun lé wú gon luí, ínù íwa eq íchý íwhoí pé lé jeju taú é đông, yhangmóq é lumjúng hkyô lé, zui saí é má lhoq

mhán nhâng râ lé hí mhoq yû ra râ nghut lhê; hkâsu mù gâ le, haû gi, Garai Gasang ô nau é hkyô nghut ri. ⁵ Haû lùm râ ó yuq le a wó mù, gè gè yhang râ tô é chuimó myhí gi, Garai Gasâng chyáng myit myoqbyu nyi luí, nyí, myín xoq xoq kyúdung mù, Garai Gasang garúm râ hkyô lé dúng nyi ri. ⁶ Nghut kôlhâng, ngón hkyô za cháng luí asak dui é chuimó myhí gi, asak dui nyi kôlhâng, shí gù nghut bê nghut ri. ⁷ Yhangmoq lé, ó yuq eq le mara a hún kó sháng gaq, haû hkyô pé lé le mhoqshit byí nyi aq. ⁸ Rayuq yuq, yhâng é buinôm ji-myi wui lé a baú é htoq agó, je luí yhumsing é ikun byú lé a baú é nghut le gi, haû lumjínng hkyô lé he-ngik pyám bê nghut luí, a lumjínng su htoq má je ashop é sù dut bê nghut ri.

⁹ Hkyuq xê zàn byíng bê é chuimó myhí za a nghut jâng, chuimó jihpán má wó kat râ a nghut; hau htoq agó, yhang gi, yuqgè rayuq za wó wú é sù; ¹⁰ zoshâng wui lé hku baú é sù, bíng lé rago dat hkulum é sù, sân-yúng bê bang é hkyí lé chi byí é sù, wuihke huí tô é bang lé garúm luí, ge é muzó junghkang jungmó má yhumsing gùng yhang ap nóng nyi ri ga, yhang kut é ge é muzó má myíng hû é sù le, nghut râ lhê.

¹¹ Asak tiq é chuimó myhí pé lé, jihpán haû má hkâkat. Hkâsu mù gâ le, gungsho ô nau é hkyo eq Hkrisduq chyáng yhangmoq ap nóng tô é hkyô lé ung pyám é hkún, yhangmoq gi, myi ló naú kó râ nghut lhê. ¹² Haû mù, yhangmoq gi, sâng-hi lé yhangmoq tô tô é danggidiq lé lhoq hpyoq pyám kô é yanmai, tarâ darâ é huí zo kó râ nghut lhê. ¹³ Hau htoq agó, yhangmoq gi, rayhúm htâng rayhúm châng wang wún kômù, lagôn mán byuq kó râ nghut lhê. Lagôn é bang za dut kó

râ a nghut, lumù gansang é bang eq yhangmoq taí a ge é pé lé taí kômù, yhumsing eq a sêng é mù má châng wang nyo wún é bang le, dut kó râ nghut lhê. ¹⁴ Haû mù luí, gyè pé mai lumù gansâng dang a wó taí pyám kó sháng gaq, asak tiq é chuimó myhí pé gi, myi ló mù, zoshâng hkú luí, yhangmoq é ikun lé gôn lajang râ matú, ngò, yhangmoq lé hpaqchyí byí kat lhê. ¹⁵ Hkâsu mù gâ le, ra-am gi, lhing taú ló kôluí, Tsadán é htâng châng nyi lugù nghut bekô nghut ri.

¹⁶ Lumjínng é myiwe rayuq yuq gi, yhâng é ikun má chuimó myhí wó é nghut le, haû yuq é matú noqkuq hpúng lé wôlai a hun e za, yhang mai garúm yû ra râ nghut lhê; haû hkún sheq, noqkuq hpúng gi, gè gè yhang râ tô é chuimó myhí pé lé wó garúm râ nghut lhê.

¹⁷ Haû noqkuq hpúng lé rago za shuí ù é hpúng suwún wui gi, akyû í tú hkam yù gíng lhê; haû mungdang hko é hkyô eq mhoqshit é hkyô má shikut é suwún wui gi, je riyhang hkam yù gíng lhê. ¹⁸ Hkâsu mù gâ le, "Guq nâng nyi é no lé, nhuttsung hkâ-tsúng to byi."* ga le, "Mú zui sù gi, yhâng é zuihpau wó yù gíng lhê."* ga le, Chyúmdang má taí tô ri. ¹⁹ Hpúng suwún rayuq lé mara hun é hkyô lé, í yuq sum yuq mai saksé hkâm e za a nghut le gi, hkâlhóm yù. ²⁰ Nghut kôlhâng, lhoq pun lhoq kyíng é hkyô lé góbang wó yù kó sháng gaq, mara kut shut é bang lé, shíwa byu pé hí má tân mhoqshit aq.

²¹ Pying kat é dang shi pé lé, gamhkuí myit a bo e za châng nyi râ eq, myoqdong hkyín luí haí le a kut râ matú, Garai Gasang eq Hkrisduq Yesuq é hí má le, hkyín yù huí é maumang lagyô pé é hí má le, ngò, nang lé pying kat lhê.

* 5:18 Tarâ Pun 25:4 * 5:18 Luk 10:7 * 5:22 Haû hkun lhê bang gi, hpúng suwún kut râ matú hkyin to bê bang lé, loq ke kyúdung byí é nghut lhê.

²² Ó yuq é ahtoq má le loq ke* byi râ lé hkâhân; góbâng é mara hkaû má le hkâbo lôm. Yhumsîng yhang yhumsîng sân-yúng shoq kut nyî aq.

²³ Nâng é wamdau ra luî, anum num no lò lò dut é yanmai, nâng gi, wuî za shuq é hkyô lé nô pyám luî, tsibiyiq wing le ratsuí tsuí shuq byi aq.

²⁴ Byù ra-âm é mara pé gi, de de dut é nghut mù luî, tarâ jéyáng é jang má hí ló jé ri; ra-âm é mara kúm gi, hau é htâng má châng byông htoq lo ri. ²⁵ Haû eq rajung za, ge é muzó pé gi, de de nghut nyî luî, haû su de de a nghut é pé lé le, wó zaú to râ a nghut.

6

¹ Jùn dut é wòlai hkaû má nyi é lhunglhang bang gi, yhangmoq é yhumsîng wuî lé gyai yhang hkungga gîng lhê nghû, myit yù râ dut lhê; haû hkûn sheq, Garai Gasâng é myîng eq nga-nhúng é mhoqshit hkyô gi, lumù gansang é a huî râ nghut lhê. ² Lumjîng é yhumsîng wuî é jùn gi, gumang wuî nghut é yanmai, yhangmoq lé a wú myuq é za, yhangmoq dojaú luî akyû myang hkâm zô é bang gi, lumjîng bang eq chyitdap gîng é bang nghut é yanmai, yhangmoq lé je ge é dông dojaú râ lhê. Shí hkyô pé lé, nâng gi, yhangmoq lé mhoq byî nyi é eq lhoq pun lhoq kying byî nyi aq.

Ngùn Lé Chyitdap É Hkyô

³ Rayuq yuq gi, shut é lumjîng hkyô lé mhoqshit luî, nga-nhúng é Yhumsîng Yesuq Hkrisduq é tengmán mhoqshit hkyô eq tarâ hkunggâ é mhoqshit hkyô lé a myit huî é nghut jáng, ⁴ haú yuq gi, nghutbûn é sù eq haî lé le a sê gyô é sù nghut ri. Yhang gi, htuq htîng lhûm é hkyô pé lé ô nau é, a ge é myit bò luî, dang eq séng mù mabyoq lhoq htoq ri; haû mai, manon é hkyô, byoq lhum

byoq cheq é hkyô, lumù gansang é hkyô, agè ashop é dông myit ngam pyâm é hkyô eq, ⁵ haû tengmán hkyô lé lhoq hpyuq pyám mù, tarâ hkungga hkyô gi, ngùn zè wó hkyô za nghut ri ga myit yu é, i-myt lhoq htên pyám bê bâng é gyoro má, byìn a huî é hkyô pé lé, lhoq htoq kat ri.

⁶ Nghut kôlhang, tarâ hkunggâ hkyô má nhik dik é hkyô bo é nghut le gi, amyat mó nghut nyi ri. ⁷ Hkâsu mù gâ le, nga-nhúng gi, mingkan htoq má haî jung le a yu wang lé, haû mai le haî wó yu htoq ló râ a nghut. ⁸ Haû mù luî, nga-nhúng gi, wutbu wutme eq zoshuq wó é nghut jáng, hau èq nhik dik nyi sháng. ⁹ Wó nau sùt nau é byu pé gi, gunglau hkyô eq tuihkyó má le, haû byoq yeq hkyô eq htên byoq hkyô má, byu pé lé myup shî nhang é, nga é hkyô myo myo eq myit nô nhâng nau é hkyô má le, byit gyó wâng kó râ nghut lhê. ¹⁰ Hkâsu mù gâ le, ngùn lé chyitdap é hkyô gi, agè ashop hkyô ajung jûng é apùn awang nghut nyi ri. Byù ra-am gi, ngùn lé ô nau luî, haû lumjîng hkyô mai sô nghoq ló mù, yhumsîng gîng lé yhumsîng, haû yón kuq hkyo eq htaû rot pyám bekô nghut ri.

Timohti Lé Pying Kat É Dang

¹¹ Nghut kôlhang, Garai Gasâng é byù nâng gi, haû pé banshoq lé koi pyám luî, dingmán hkyô, tarâ hkungga hkyô, lumjîng hkyô, chyitdap hkyô, hkam jan hkyô eq nú-nhâm é hkyô pé lé châng hkat nyi aq. ¹² Lumjîng hkyô eq séng é ge é majan le zân nyi aq. Hap yù lumjîng bê ga, saksé myo myô pé é hí má, ge é dông nâng yín yu é hkûn, wut yu é huî luî wó é ahtum abyuq é asak lé, zuî zing nyi aq. ¹³ Haû lhunglhang lé asak byî é Garai Gasâng é hí má le, Pontu Pilat chyáng saksé hkâm nyi é hkûn, ge é dông yín yu é Hkrisduq Yesuq é hí má le, ngò, nang lé pying kat lhê:

¹⁴ Yhâng é ahkyíng yam-yoq jé jáng, Garai Gasang htoq shit nhâng rá nghut é sù, nga-nhúng é Yhumsíng Yesuq Hkrisduq htoq shit é buinyì jé shoq, ¹⁵ nàng gi, agot a-u é hkyô eq mara hùn rá hkyô a bo e za, hkunmó shí lé châng nyì aq. Garai Gasang gi, hkungsô wó sù, Yhang za up sù, hkohkam pè é Hkohkâm, yhumsing pè é Yhumsíng, ¹⁶ Yhang za ahtum abyuq dui nyì sù, a ge chyâng htep e é maubó má dui nyì sù, ó yuq èq le a myang wú é, a wó myang é sù nghut nyì ri. Aróng eq hpungwup a-tsam gi, Yhâng chyáng ahtum abyuq ru joq nyí sháng gaq ô! Amen.

¹⁷ Shí ipyat má wó sùt é bang gi, a gumrông rá eq a gíng é sutzè má yhangmoq é myit myoqbyù hkyô a tô e za, nga-nhúng nguíngón yuqyo nyì rá matú junghkang jungmó lé agùn agó byí é sù, Garai Gasang chyáng za, yhangmoq myit myoqbyu nyì rá matú, hkunmó hkyó aq. ¹⁸ Ge é hkyô kut luí, ge é muzó má wó sùt nyì mù, a chum e za, gam chùng nau é myit bò rá matú, yhangmoq lé hkunmó hkyó aq. ¹⁹ Haú dông mai, yhangmoq gi, jé lô rá ipyat é matú gíng é apùn awang dông, yhangmoq é matú sutzè wó tsíng to kó rá nghut lhê; haú hkùn sheq, yhangmoq gi, asak kyíng nghut é asak haú le wó zúi zing to kó rá nghut lhê.

²⁰ Timohti ê, nang lé ap to bê hkyô lé, zúng nyí aq. Tará a hkunggá é po-ming ming bâng èq hpaqchyí nghut lhê ga myhíng shut é htuq hting lhum lhum kut é hkyô lé, koi pyám aq. ²¹ Byù ra-am gi, haú lé hpaqchyí nghut lhê ga yín yù kôluí, haú lumjíng hkyô mai so nghoq htoq ló byuq bekô nghut ri.

Jeju gi, nungmoq chyáng ru joq nyí sháng gaq ô.

TIMOHTI Chyáng Htang Dàm Hun Kat é Laiká (2 Timothy)

¹ Hkrisduq Yesuq chyáng mã é asak byi râ gâ é danggididq eq ra-jung za, Garai Gasang ô nau é đông, Hkrisduq Yesuq é lagyo nghut sũ, ngò, Poluq gi, ngò chyitdap é ngá zo Timohti lé, dang kyô kat lhê.

² Haũ Íwa Garai Gasang eq nga-nhùng é Yhumsing Hkrisduq Yesuq chyáng mã é jeju eq shogyo nhik-myin hkyô, nguingôn hkyô gi, ru joq nyi sháng gaq ô!

Lumluq Râ Matú Myit Wum Byi É Hkyô

³ Ngò gi, ngá é kyûdung dang mã, nyi, myín, abyit alan nang lé bûn nyi uchyang, sân-yúng é i-myit mai, ngá é íchýí íwâ pé dojaú é su, ngò dojaú nyi é Garai Gasang lé, jeju hkya-ôn nyi lhê. ⁴ Ngò gi, ngò mã gabú hkyô bying jup sháng gaq nghú, náng é ngaubyi lé myit bûn nyi mù, nang lé gyai yhang myàng nau nyi ri. ⁵ Ngò gi, nang é gyíng é lumjín myit lé lhoq pûn yù mù, náng whoí Lu-i eq náng nu U-ni nhik chyáng mã hí bo é lumjín myit, ahkuí, náng chyáng le bo ri nghú, hkyak myit lum nyi lhê.

⁶ Hau é yanmai, ngò loq ke byi é đông, nàng mã bo tô é Garai Gasâng é chyunghuq lé, gyúng nhang nyi râ matú, nang lé ngò lhoq pûn kat lhê.

⁷ Hkâsu mù gâ le, Garai Gasang gi, gyuq sê é myit nga-nhúng lé a kat byi e za, a-tsam bo é myit, chyitdap sê é myit, yhumsing gùng lé dat hkang é myit sheq kat byi tô é ru nghut lhê.

⁸ Haũ mù luí, nàng gi, nga-nhùng é Yhumsing eq séng luí saksé hkâm é hkyô mã le, Yhâng é yanmai htóng byú dut to sũ ngá é hkyô mã le,

hoq myit a bo é za, Garai Gasâng é wum-o mai, haũ gabú danglu é matú, ngò eq rahá wuñke jamjau chòm hui goq. ⁹ Garai Gasang gi, nga-nhúng zui sai é muzó đông a nghut e za, Yhânggùng yhang myit sôn tô é hkyô eq Yhâng é jeju yan-mai za, nga-nhúng lé, hkyi yù luí chyoiyúng é asak duí hkyô mã ji yù bê nghut ri. Ahkyíng nghu é lhang a joq shi mai yhang, jeju haũ gi, Hkrisduq Yesuq mã nga-nhúng lé byi to gũ nghut bê. ¹⁰ Nghut kôlhang, nga-nhùng é hkyi yù Sũ, Hkrisduq Yesuq pô htoq é đông, ahkuí, haũ lé lhoq htoq shit bê nghut ri. Yhang gi, shi-nò hkyô lé lhoq htên pyám luí, haũ gabú danglù đông mai, asak lé le, a dat htên byoq é hkyô lé le, lhoq htoq shit bê nghut ri. ¹¹ Ngò gi, gabú danglu é matú hko kyo sũ, lagyo eq mhogshit sũ đông, hkyin tô é hui sũ nghut lhê. ¹² Hau é yanmai, ngò gi, wuñke jamjau shi lé hui nyi é nghut lhê. Nghut kôlhang, ngò gi, ó yuq lé lumjín bê nghut é hkyô lé, sê é htoq agó, Yhang lé ngò ap tô é pé lé, haũ buinyi jé shoq, Yhang wó zúng rà nghut lhê nghú hkyak myit lum tô é yanmai, ngò a hoq.

¹³ Nàng gi, ngá chyáng mai wó gyô yu é tengmán dang pé lé, Hkris-duq Yesuq mã, lumjín myit eq chyitdap myit mai alik kut yu nyi aq. ¹⁴ Nang lé ap byi to bê, haũ ge é mungdang lé, nga-nhùng chyáng bo tô é Chyoiyúng Woi-nyí é wum-o mai zúng nyí aq.

¹⁵ Asia mau mã é bang yuq hkanmó gi, ngo lé pyám to kô é hkyô lé, nàng sê lhê; haũ bang mã, Hpugelu eq Heramoge nhik le bo akô nghut ri.

¹⁶ Haũ Yhumsing gi, Onesihpurú é yhumbyù lé shogyo nhikmyin é hkyô tûn shit sháng gaq; hkâsu mù gâ le, yhang gi, ngo lé anum num myit lhoq ngón é htoq agó, ngò wut é shamtoq-tuí é yanmai, a hoq e

za, ¹⁷ yhang, Romaq myuq má je nyi é hkûn, ngo lé myang hui shoq, ho shikut é sù nghut ri. ¹⁸ Haù Yhumsing gi, haù buinyi má, yhang lé haù Yhumsing é shogyo nhik-myin hkyô byi sháng gaq! Ehpesu myuq má, yhang ngo lé hkâ-myhó garúm bê nghut é gi, nàng rago yhang sê lhê.

2

¹ Haù mù, ngá zo ê, nàng gi, Hkrisduq Yesuq má é jeju hkaù má, wúm bo nyi aq. ² Nàng gi, saksé myo myô é hí má ngá chyáng mai wó gyô yù bê hkyô pé lé, góbang lé dat mhoqshit é, wó lum é bang lé ap byi aq. ³ Hkrisduq Yesuq é ge é gyezo rayuq su, wuìhke hkyô lé chôm jan nyi sháng. ⁴ Gyezo rayuq dông gyê mù wùn waq nyi é sù, ó yuq nghut kôle, gotû muzó má a bo lom é za, yhang lé hkunmó hkyô nyi é gyezau lé, gabú nhâng nau é chyat nghut lhê. ⁵ Haù eq rajung za, shingjóng é sù rayuq le, shingjóng lhum poi wang é hkûn, tô tô é tarâ dông a châng e nghut le gi, ung é aróng chyunghuq lé wó yû râ a nghut. ⁶ Yo-mû zui shikut é sù gi, kyôshi lé sâng-hi myang hkam yù râ sù nghut lhê. ⁷ Haù Yhumsing gi, shí pé banshoq lé wó sê é nyan nang lé byi râ nghut é yanmai, ngo taí é hkyô pé lé myit wú aq;

⁸ Haù Dawiq é awut ashín nghut sù, Yesuq Hkrisduq gi, shi é mai dum dui toq bê hkyô lé myit bun aq; haù gi, ngá é gabú danglù nghut lhê. ⁹ Gabú danglù hau é yanmai, mara bò sù rayuq lé su, ngò gi, kyum hut é hui luí, hpuzô nyi é nghut lhê. Nghut kôlhâng, Garai Gasâng é mungdang gi, kyum hut huí é a nghut. ¹⁰ Haù mù luí, ngò gi, Hkrisduq Yesuq chyáng má é hkyi yù hkyô eq ahtum abyuq é hpung-wup shing kang lé wó yù kó sháng gaq ngû, haù hkyin yù hui bâng

é matú, jung hkangmó lé hkam jân nyi lhê.

¹¹ A-ô mã é dang gi, lungíng é dang nghut lhê:

Nga-nhúng gi, Yhang eq rahá shí bê nghut jáng, Yhang eq rahá duì râ nghut lhê.

¹² Nga-nhúng gi, hkam jân é nghut jáng, Yhang eq rahá up râ nghut lhê.

Nga-nhúng gi, Yhang lé he-ngik pyâm é nghut jáng, Yhang le, nga-nhúng lé he-ngik pyâm râ nghut lhê.

¹³ Nga-nhúng gi, lhumzui myit a bò kôlhâng, Yhang gi, lhumzui nyi râ nghut lhê. Hkâsu mù gâ le, Yhang gi, yhanggùng yhang wó he-ngik pyâm é a nghut.

Garai Gasâng Hí Má Myoqdong Wó É Mû Zui Sù

¹⁴ Nàng gi, yhangmoq lé, shí hkyô pé xoq luí lhoq pùn nyi aq. Dang pé eq séng luí, a byoq lhùm nyi kó sháng gaq, Garai Gasâng hí má yhangmoq lé sidiq byi aq. Haù gi, akyû a bo é htoq agó, wó gyô é bang lé htên byoq nhang é hkyô za nghut lhê. ¹⁵ Nàng gi, haù tengmán é mungdang lé jo shoq chung jai é eq, hoq nó a râ é mù zui sù rayuq dông Garai Gasâng hí má myoqdong wó shoq, wó dut é myhó shikut aq. ¹⁶ Tarâ a hkunggâ é poming ming bang lé koi pyâm aq. Hkâsu mù gâ le, haù su kut é bang gi, tarâ a hkunggâ é hkyô má je riyhang wang nân ló byuq é bang dut kó râ nghut lhê. ¹⁷ Yhangmoq é mhoqshit hkyô gi, mong ana su byo myin ló râ nghut lhê; haù bang má Humenu eq Hpilitu nhik le bò kôluí, ¹⁸ haù tengmán hkyô mai sô nghoq ló byuq akô. Yhangnhik gi, haù dum dui toq hkyô dut lai bê ga taí kômù, ra-âm é lumjíng hkyô lé lhoq htên pyâm byi akô nghut ri. ¹⁹ Nghut kôlhâng, "Haù Yhumsing

gi, Yhang eq sêng é bang lé sê lhê. "✧ ga luí le, "Haù Yhumsing é mying lé yín yu é bang yuq hkangmó gi, agè ashop hkyô mai lhing tau ra kó râ nghut lhê." ga luí le, dizik haù htung tap tô é, Garai Gasâng é ging tîng é apûn awang gi, gîng nyi ri.

²⁰ Yhûm mó ralhum má gi, hîng auhkoq zè, ngùn auhkoq zè baú za joq é a nghut, sik auhkoq zè, tse auhkoq zè le joq lhê; ra-am gi, aróng hkyo é matú, ra-am gi, aróng hkyo é matú a nghut. ²¹ Haù mù luí, haù pé mai yhumsing gùng lé lhoq sansêng pyâm é sù gi, chyoiyúng luí, haù Yhumsing chung jai gîng é sù, ge é muzó hkangmó kut râ hen tô é sù nghut é yanmai, aróng hkyo é matú chungzè dut râ nghut lhê.

²² Zoram é agè ashop é ô nàu hkyô lé koi pyám mù, haù sân-yúng é myit mai, Yhumsing lé wut dúng é bang eq rahá, dingmán hkyô, lhumzui hkyô, chyitdap hkyô, ngu-ingón hkyô pé lé, châng hkat nyí aq. ²³ Go é eq ngok é dông dang jet jet lhûm é hkyô gi, mabyoq lhoq htoq é hkyô nghut é lé, nàng sê lhê nghut é yanmai, haù hkyô lé koi pyám aq. ²⁴ Haù Yhumsing é dui-nhâng zoshâng gi, mabyoq a lhoq htoq é za, yuq hkangmó lé dat myit tê byí é, wó mhoqshit é, a dat nhik-yô é su dut ra râ nghut lhê. ²⁵ Yhang gi, yhang lé htuq htîng é bang lé, nú-nhâm é dông mhoqshit byi ra râ nghut lhê; haù hkûn, Garai Gasang gi, yhangmoq lé myit lhîng hkyô byi mù, tengmán hkyô lé sê gyo nhâng luí, ²⁶ yhangmoq gi, bûn gyîng lò mù, nat Tsadán ô nau é hkyô lé kut byi râ matú, chyup yû huí é, nat Tsadán é tuihkyó mai wó hpang lut lò kó abe nghû, myit lum kat lhê.

3

Jihtûm Buinyi Pé Má Dut Lò Râ Hkyô

¹ Jihtûm buinyi pé má, wuîhké é ahkyíng pé joq lò râ nghut é lé, nàng

matsîng to aq. ² Hkâsu mù gà le, haù u lé, byu pé gi, yhumsing gùng lé za chyitdap é bang, ngùn lé myoqnoq é bang, gumrong é bang, nghutbûn é bang, góbang lé taí hpoí é bang, înu îwa nyo é lé a gyô é bang, jeju a dat bûn é bang, a chyoiyúng é bang, ³ chyitdap myit a bo é bang, mara hkyut byi a sê é bang, lumù gansang é bang, yhumsing gùng lé hkâng a sê é bang, byuwuí pé, ge é hkyô lé a ngui é bang, ⁴ haq gumlaù é bang, a bun a so dut wún é bang, yhumsing gùng lé za hkik bûn é bang, Garai Gasang lé chyitdap é bang dut râ malaí ngón kún hkyô lé za chyitdap é bang, dut bùm kó râ nghut lhê. ⁵ Yhangmoq gi, tarâ hkunggâ é bang su dut kôlhâng, haù pé é a-tsam lé he-ngik pyâm akô nghut ri; haù sù é bang lé, nàng koi pyâm nyi aq.

⁶ Yhangmoq gi, hpaqchyí da mù yhûm pé má wàng kôluí, mara wòlai lé wun é, agè ashop é ô nàu hkyô ajung jung má sô nghoq lò byuq é, ⁷ hkâ-nhâm le mhoq yu nyi kôlhâng, haù tengmán hkyô lé a sê gyô é, myit nyhôm é myiwe wuí lé wó lêng nghoq yu é bang nghut akô. ⁸ Yanne eq Yambre nhik gi, Mosheq lé htuq htîng é su, haù bang le, haù tengmán hkyô lé htuq htîng akô nghut ri; yhangmoq gi, myit é hkyô htên byuq kôluí, haù lumjîng hkyô má lhum a zuí é bang nghut akô. ⁹ Nghut kôlhâng, haù nhik é hkyô byông htoq lo é su, yuq hkangmó é hí má, yhangmoq ngok é hkyô byông htoq lò râ nghut mù, haù mai lai luí yhangmoq wó kut jat kó râ a nghut.

Timohti Lé Pying Kat É Dang

¹⁰ Nàng kúm gi, ngá é mhoqshit hkyô, ngá é nyiyap hkyô, ngò myit myoqbyu tô é hkyô, ngá é lumjîng hkyô, myit hîng hkyô, chyitdap hkyô, hkam jan hkyô, ¹¹ zing-ri huí é hkyô eq wuîhke jamjau hkyô pé

lé le, Antioku wà mó, Ikoni wà mó eq Lustra wà mó pé má ngò hui zô é, zing-ri hkyô pé lé, ngò hkam jan bê hkyô lé le, nàng rago sê lhê. Nghut kôle, haù Yhumsîng gi, haù pé banshoq mai ngo lé xe yù bê nghut ri. ¹² Gè gè yhang, agè ashop é byu pé eq mhaù kut é bang gi, mhaù zô nyi bum é eq mhaù zô é huì nyi bum kôluì, a ge é hkyô shut je riyhang myô jat lò kô é hkûn, ¹³ Hkrisduq Yesuq má tarâ hkunggâ é asak đông nyiyap nau é bang yuq hkangmó gi, zing-rî é hui kô râ nghut lhê. ¹⁴ Nghut kôlhang, nàng gi, ô pè chyáng mai nàng mhoq yù bê hkyô lé le, Hkrisduq Yesuq lé lumjîng jáng hkyi yu é huì shoq, ¹⁵ nang lé hpaqchyì byéng-yá wó byì é chyoyîung Chyúmdang pé lé, zoshâng hkûn mai nàng sê to bê hkyô lé le, nàng sê é yanmai, nàng mhoq yu to bê hkyô eq hkyak lumjîng to bê hkyô má, xoq kut nyi aq. ¹⁶ Chyúmdang hkangmó gi, Garai Gasâng é soq hâng tô é pé chyat nghut é yanmai, mhoqshit é hkyô, tân mhoq é hkyô, lhoq jo byì é hkyô eq dîngmán hkyô lé tân shit byì é hkyô pé é matú, akyû bo ri; ¹⁷ haù mù luì, haù Garai Gasâng é byù gi, ge é muzó jizó hkangmó lé kut râ matú, wó gumjup râ nghut lhê.

4

¹ Garai Gasâng é hí má le, dui nyi bang eq shi byuq bang lé tarâ dara râ sù Hkrisduq Yesuq é hí má le, Yhang htoq shit râ hkyô eq Yhâng mingdán é yanmai, ngò, nang lé pying kat é gi, ² haù mung-dang lé hko kyo aq; ahkyíng yam-yoq ang kôlhang, a ang kôlhang, rì rì hen to aq; myit gyaí hing é eq rago za mhoqshit é đông, lhoq jo byì, tân mhoqshit é eq myit wum byi kut nyi aq. ³ Hkâsu mù gâ le, byu pé gi, tengmán mhoqshit hkyô lé a kâm gyô é ahkyíng jé mù, yhangmoq ô nàu yut yut é hkyô

cháng luì, yhangmoq é no yo bui nau é nohkyap gyô nau é hkyô taí nhâng râ matú, sará pé rajùm rayô lé lhîngkyuq má lhoq tsiing to kô râ nghut lhê. ⁴ Yhangmoq gi, haù tengmán hkyô mai yhangmoq é nohkyap lé lhîng pyám mù, myit htoq mhô-myi dang shut lhîng lô kô râ nghut lhê. ⁵ Nghut kôlhang, nàng gi, dut tô é hkyô banshoq má rago sidiq nyi aq; wuîhke jamjau hkyô lé hkam jân nyi aq; gabú danglù hko kyô é muzó kut nyi aq; nàng é hpungmù banshoq lé wùn waq nyi aq.

⁶ Hkâsu mù gâ le, ngò gi, shuq jung hkungga ralhùm đông hut pyám é huì nyi gù nghut mù luì, mingkan mai ngò htoq lô râ ahkyíng jé bê nghut ri. ⁷ Ngò gi, haù ge é majan le zan bê; dîn shîngjóng lhùm é hkyô le bàn bê; haù lumjîng hkyô le chang bê nghut lhê. ⁸ Ahkuì, haù tengmán é tarâ Agyì nghut sù, Yhumsîng gi, haù buinyi má ngo lé ap byi râ nghut é, haù dîngmán hkyô é janmaù lé, ngá matú tô to byi bê nghut lhê. Haù gi, ngá é matú za a nghut, Yhang htoq shit râ hkyô lé myit láng nyi é bang banshoq é matú le nghut lhê.

Timohti Lé Jì Kat É Hkyô

⁹ Nàng gi, ngá chyáng wó dut é í hân hân lé lô aq. ¹⁰ Hkâsu mù gâ le, Demaq gi, mingkan shí lé chyitdap é yanmai, ngo lé pyám to luì, Hte-saloni wà mó shut; Krezen gi, Galatiq mau shut; Tituq gi, Dalamati mau shut, e lô byuq bekô nghut é yanmai nghut lhê. ¹¹ Lukaq za ngò eq rahá nghut nyi lhê. Markuq lé, nàng eq rahá shuí lé lò aq; yhang gi, ngá é hpungmù má wó htuqbáng râ sù nghut lhê. ¹² Ngò gi, Tuhkiku lé Ehpesu myuq shut nhang kat bê nghut lhê. ¹³ Nàng gi, lé lo é hkûn, Troa myuq má, Karpu chyáng ngò tô é buhîng haù lé le, ngá é chyúmding lé le, je luì eq haù

shokuq chyúmding pé lé le, yù lé lô byi aq.

¹⁴ Haù ningdup hpó Alesander gi, ngo lé a ge é myo myo kut bê nghut ri; haù Yhumsîng gi, yhang kut é eq rajung za, yhang lé dam byi râ nghut lhê. ¹⁵ Yhang gi, ng-amoq é danglù lé wum kat htuq htíng bê sù nghut é yanmai, nàngle, yhang lé sidiq ra râ nghut lhê.

¹⁶ Sâng-hí dàm, ngá gûng lé ngò taì hung é hkûn, yuq hkanmó gi, ngá é hkyam shut a bo lom e za, ngo lé pyâm tô akô. Nghut kôlhang, haù gi, yhangmoq ahtôq má mara a dut sháng gaq.

¹⁷ Nghut kôlhang, ngò dông mai danglù haù lé rago wó hko pyo kat luí, tûngbàu pé banshoq bang wó gyo kó sháng gaq ga, haù Yhumsîng gi, ngá hkyam shut yap to mù, ngo lé wum-o byí é nghut lhê. Hau htoq agó, ngò gi, hkanghkyí é nhut mai le hkyi yù hui bê nghut lhê.*

¹⁸ Haù Yhumsîng gi, ngo lé agè ashop é hkyô hkanmó mai hkyi yù luí, Yhang é mauhkûng mingdán má ngón za shuí jé râ nghut lhê. Hpungwup shíngkang gi, Yhâng chyáng ahtum abyuq ru joq nyí sháng gaq ô. Amen.

Shi-kyám Dang

¹⁹ Priskila eq Akula nhik lé le, Onesihpuru yhumbyù wuì lé le, bo shi-kyám byi laq. ²⁰ Erastu gi, Korinhtuq myuq má nyi gyó to bê; Trohpimu lé gi, nò luí, Melitu wà mó má ngò nyhi pyâm to bê nghut lhê. ²¹ Nàng gi, wó dut é í, gyoqmyò a wàng shí lé, shí má jé lé lò aq. Ubulu gi, nàng lé shi-kyâm kat ri; haù eq rajung za, Pudén, Linu, Klo-dia eq gumang wuì banshoq bang gi, nàng lé shi-kyâm kat akô nghut ri.

²² Haù Yhumsîng gi, náng é woi-nyí eq rahá nghut nyí sháng gaq.

* **4:17** Haù hkûn lé, Romaq byu pé, byù sat lé gi, hkanghkyi lé tsò pyâm lhê.

Jeju gi, nungmoq chyáng ru joq nyi sháng gaq ô.

TITUQ

Chyáng Hun Kat é Laiká (Titus)

¹ Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haù ahtum abyuq é asak lé chòm myit myoqbyu é yanmai, Garai Gasang hkyin yu to bâng é lumjínq hkyô jat râ eq, tengmán hkyô lé wó sé mù, tarâ hkungga sé nhâng râ matú, hkyin yù huí é sù nghut lhê. ² Haù ahtum abyuq é asak hkyô lé, mhaù a sê é Garai Gasang gi, ahkyíng nghu é lháng a joq shi mai danggidiq byi to mù, Yhang masat tô é ahkyíng yam-yoq má sheq mungdang hko kyô é đông lhoq htoq shit luí, ³ nga-nhúng é hkyi yù Sù, Garai Gasang hkunmó hkyô tô é eq rajung za, haù mungdang hko é hkyô lé ngá é loq má ap byi bê nghut ri.

⁴ Nga-nhúng chòm lumjínq é hkyô đông mai, ngá zo sîng nghut é Tituq lé laiká kê kat lhê. Íwa Garai Gasang eq nga-nhúng é hkyi yù Sù Hkrisduq Yesuq chyáng mã é jeju eq nguóngón hkyô gi, náng chyáng ru joq nyí sháng gaq ô.

Kreti Zinlóng Mã, Tituq Wùn Waq Râ Muzó

⁵ Ngò, nang lé Kreti zinlóng mã nyhi hkyô tô é gi, ngò, nang lé pying tô é eq rajung za, ngò a ban zui saí é loqzó pé lé lhoq pán râ matú eq, wà hkangmó má hpúng suwún ayá dâng to byi râ matú nghut lhê. ⁶ Haù hpúng suwún kut râ sù gi, mara hùn râ hkyô a bo é sù; yhangmyi rayuq za wó é sù; yhang zô pé le, agè ashop é eq jìno a gyô é ga, mara hùn râ jowò a joq é lumjínq bang nghut é sù, nghut râ lhê. ⁷ Hkâsu mù gâ le, hpúng-up rayuq gi, Garai Gasâng é sùt zum sù rayuq đông nghut lhê mù, mara

hùn râ hkyô a bo é sù nghut râ lhê; yhang gi, yhumsing myit a cháng; i-myt a lúm tot; íhpê é jùn a dut; mabyoq jishùm a kut; a sansêng é ngùn hîng lé a myit ô nau é sù nghut râ lhê. ⁸ Yhang gi, byù bíng lé dat hkulùm sù; ge é hkyô lé chyitdap sù; nùm é sù, dîngmán sù; chyoiyúng sù; yhumsing gùng lé wó hkang é sù; ⁹ mhoq yu to bê hkyô eq rajung za, lumjínq é mungdang lé ging ging zui zing nyi é sù nghut râ lhê. Haù hkùn sheq, yhang gi, góbang lé tengmán é mhoqshit hkyô đông myit wum wó byí é eq, haù eq shai lhum é bang lé, shut é hkyô wó tûn shit râ nghut lhê.

¹⁰ Hkâsu mù gâ le, gumlau kut é bang, dangsôm tái é bang eq mhaù zô é bang myo myo nyi ri. Ahpyo-kuq hpyit é hpúng bang je riyhang myo akô. ¹¹ Haù bâng é nhut shô lé gi, xaù pyâm byi râ lhê. Hkâsu mù gâ le, yhangmoq gi, a tengmán é đông sutzè lé wó yù shoq ga luí, mhoqshit a gíng é hkyô pé lé mhoqshit mù, rayhum bang bang lé lhoq hpyoq lhoq htên nyi akô nghut ri. ¹² Kreti byù mã é myiqhtoi rayuq lháng gi, "Kreti byu pé gi, ayang mhaù é bang, tân jung yosô dusak pé, lagôn é zo myoqnoq bang nghut akô." ga tái wú ri. ¹³ Saksé shí gi, têng ri. Haù mù luí, yhangmoq gi, Yudaq byu pé é myit htoq mhô-myi dang lé le; tengmán hkyô lé he-ngik pyâm é bang pying tô é dang pé lé le, a gyo kô é za, ¹⁴ haù lumjínq hkyô má ging tîng nyi kó sháng gaq, yhangmoq lé htân htân tân mhoqshit byí nyi aq. ¹⁵ Sân-yúng bâng é matú gi, azíng zê lhunglhang sân-yúng ri; a sân-yúng bang eq a lumjínq bâng é matú kúm gi, hái le a sân-yúng é chyat nghut nyi ri; hkâsu mù gâ le, yhangmoq é myit nhiklhum eq myit sôn sê é hkyô pé gi, gè gè yhang, a sân-yúng dut byuq bekô nghut ri. ¹⁶ Yhangmoq gi, Garai Gasang lé sê

lhê ga kôlhang, yhumsing zui saí é loq zó dông, Yhang lé he-ngik pyâm é bang nghut akô. Yhangmoq gi, achaq achyut é bang, jino a gyô é bang eq, ge é mù joq mijoq eq a htuk é bang nghut akô nghut ri.

2

Hká Đông Nyi Yap Râ Hkyô

¹ Nang kúm gi, tengmán é mhoqshit hkyô eq wuí é dông mhoqshit nyí râ dut lhê. ² Hpô-mâng pé lé gi, i-myit shirâm sé râ hkyô; hkungga gíng é byù dut râ hkyô; yhumsing gùng lé wó hkàng râ hkyô eq, lumjíng myit gíng râ, chyitdap myit gíng râ, hkam jan hkyô gíng nyí râ hkyô pé lé, mhoqshit byí nyí aq.

³ Haú eq rajung za, hpô-myí mâng pé lé gi, hkungga gíng é a-kyang bo nyí râ hkyô; lumù gansang dang a tai râ hkyô; íhpê é jùn a dut râ hkyô eq ge é hkyô lé za dat mhoqshit é bang wó dut râ matú mhoqshit byi aq. ⁴ Haú hkún, Garai Gasâng é mungdang gi, lumu pyâm é a hui sháng gaq, yhangmoq gi, hpô-myí zô pé lé, yhumsing yhanglâng eq, yhangzô pé lé chyitdap é, ⁵ yhumsing gùng lé wó hkang é, siri bo é, ikun lé dat wùn waq é, ge é myit wó tûn shit é, yhumsing é yhanglâng uphkang é dông dat châng é bang dut râ matú, ge mhoqshit é hpô-myí mâng pé dut râ nghut lhê.

⁶ Haú eq rajung za, zorâm wuí lé le, yhumsing gùng lé wó hkang nyí kó sháng gaq, lhoq pun lhoq kyíng nyí aq. ⁷ Hkyô hkat hkangmó má, yhangmoq lé nang yhang ge é muzó alik tûn shit nyí aq. ⁸ Nang lé lhom htuq htíng é bang gi, nga-nhúng é hkyô má mara a wó hûn kômù hoq hpû nyí kó sháng gaq, nang mhoqshit é hkyô má, tai pyám râ hkyô a bò shoq, têng é, siri bo é, eq sansêng é dang tai nyí aq.

⁹⁻¹⁰ Nga-nhúng é hkyi yù Sû Garai Gasang eq sêng é mhoqshit é hkyô

pé hkat hkangmó yúng nyí sháng gaq, hkyô hkat hkangmó má, jun pé lé, yhangmoq é yhumsing wuí pé é a-ô má nyí mù, yhumsing wuí é i-myit ngón shoq dang a tu râ; a hkau râ; wó lum tô é bang dut râ hkyô pé lé, mhoqshit byi aq.

¹¹ Hkâsu mù gâ le, hkungsô wó é myit myoqbyù hkyô ga é, nga-nhúng é kô myhang é Garai Gasang eq hkyi yù Sû, Yesuq Hkrisduq gi, hpungwup shíngkang eq htoq shit râ hkyô lé lánng nyí é hkún, ¹² tarâ a hkunggâ é myit eq mingkan myit ô nau é hkyô koi pyám luí, shí ipyat má yhumsing gùng lé wó hkàng râ, dingmán râ eq, tarâ hkunggâ é hkyô wó cháng shoq, ¹³ nga-nhúng lé mhoqshit byi râ matú, Garai Gasâng jeju chyunghuq gi, htoq shit bê nghut mù luí, byù lhunglhang bang lé hkyi yù hkyô hpóng byi bê nghut ri. ¹⁴ Haú Yesuq Hkrisduq gi, agê ashop é hkyô ban-shoq mai nga-nhúng lé hkyi yù mù, ge é muzó hkangmó lé châng kut nau é, Yhânggùng yhang sing é byuhú rahú dut râ matú wó lhoq sân-yúng yù shoq ga, nga-nhúng é matú Yhânggùng lé ap byí pyám bê nghut ri.

¹⁵ Nang lé ó yuq èq le, a wú shôm pyám kó sháng gaq; nang gi, ahko ahkáng banshoq eq, yhangmoq lé shí hkyô pé mhoqshit nyí aq; myit wum byí é eq, tân mhoqshit é hkyô lé le kut nyí aq.

3

Ge É Muzo Zui Sai Râ Hkyô

¹ Nang gi, lumjíng bang lé, zau wuí eq ahko ahkáng wó bâng é a-ô má nyí mù, jino gyô nyí râ eq, hkâ-nhám le ge é muzó hkangmó zui saí râ lé hen nyí uchyang, ² ó yuq lé le lù a mù râ; nguingón hkyô hô râ; myit tê byí é hkyô tûn shit râ eq; byù banshoq lé nùm é i-myit tûn shit nyí kó sháng gaq, lhoq pun lhoq kyíng nyí aq.

³ Hkâsu mù gâ le, nga-nhúng le, hí hpyang gi, byù ngok pé, jìno a gyô é bang, mhaú zo huí é bang eq, gungsho ô nau é hkyô eq mingkan ngón hkyô ajung jùng èq jùn kut é huí bang, dut mù luí, agè ashop é eq manon lhùm é hkyô kut nyí mù, rayuq eq rayuq a jú lhùm é đông nyi laí lò bê nghut lhê. ⁴ Nghut kôlhang, nga-nhúng é hkyi yù Sû Garai Gasang jeju eq chyitdap myit htoq shit é hkûn, ⁵ nga-nhúng yhang kut é dingmán é muzó èq a nghut é za, Yhâng é shogyo nhikmyîn é jeju yanmai sheq, Garai Gasang gi, nga-nhúng lé hkyi yù bê nghut ri. ⁶ Yhang gi, nga-nhúng é hkyi yù Sû Yesuq Hkrisduq é yanmai, nga-nhúng é ahtoq má agùn agó hut hkyó byí é Chyoiyúng Woi-nyí èq nga-nhúng lé chí san chí sêng pyám byi mù, woi-nyí má dum hku é huí nhâng luí, myit sik htaí byí é hkyô đông nga-nhúng lé hkyi yù bê nghut ri. ⁷ Haú mù luí, Yhâng é jeju mai mara hkyut san byí é huí bê nghut é yanmai, ahtum abyuq é asak lé myit myoqbyu nyi é eq rajung za, nga-nhúng gi, silí wunlí wó hkam yu é bang dut lò râ nghut lhê. ⁸ Dang shí pé gi, lumgíng é dang nghut lhê mù luí, Garai Gasang lé lumjíng é bang gi, ge é muzó lé myit lòm luí rago zui saí nyi kó sháng gaq, haú hkyô pé lé nàng wum zuq tung mhoqshit byi râ lé, ngò ô nau nyi lhê. Shí pé gi, byù lhunglhâng bâng é matú ge é eq, akyû bo é hkyô nghut lhê.

⁹ Nghut kôlhang, ana apâ ga luí taí htíng lhùm é hkyô lé le; byùxik labaú gôn é hkyô lé le; nyo byoq lhùm é hkyô lé le; jep é tarâ eq séng mù byoq lhùm é hkyô pé lé le koi pyâm nyi aq, hkâsu mù gâ le, haú pé gi, akyû a bo é hkyô eq chùng a ge é hkyô pé nghut ri. ¹⁰ Gam hkuí é myit bò sù lé gi, í dâm mhoqshit wú mù, a wó jáng, yhang lé baú tô pyám aq. ¹¹ Haú su kut sù gi, yhang kut é

muzó má mara wó to bê nghut mù, yhumsing gùng lé yhumsing mara hun é sù nghut é lé, nàng sê to lo aq.

Je Htâng Má Pying É Dang

¹² Ngò gi, Nikopoli và má gy-oqmyò lhoq lhai râ đông myit hpyit tô é yanmai, Artima lé, a nghut jáng Tuhkiku lé, nàng chyáng nhang kat byi râ, je eq yhang, nàng gi, shikut luí, haú và shut ngá chyáng lé lô aq. ¹³ Nàng gi, tarâ sê é sù Zena eq Apolo nhik lé, yhangnhik é hkyowuì má râ é hkyô banshoq, shikut luí garúm kat aq. ¹⁴ Nga-nhúng é byu pé gi, nyí wuì râ é hkyô lé wó htuoq é eq ashí zui é bang dut kó sháng gaq, ge é muzó lé myit lòm mù zui saí nyi râ hkyô lé mhoq yù râ lhê.

¹⁵ Ngò eq rahá nyi é bang yuq hkanqmó gi, nang lé shi-kyâm kat akò. Lumjíng hkyô má ngamoq lé chyitdap é bang lé, bo shi-kyâm byi aq.

Garai é jeju gi, nungmoq eq rahá joq nyi sháng gaq ô!

HPILEMON Chyáng Hun Kat é Laiká (Philemon)

¹ Hpilemon ê, Hkrisduq Yesuq é yanmai htóng lúng nyi sù, ngò Poluq eq nga-nhùng é gumang Tim-ohti nhik gi, ngá-nhik chyitdap é mù wùn luzúm nghut é sù nang lé le, ² ngá-nhik é gu-nhá Ahpiaq lé le, ngá-nhik é sarhé luzúm Arhkipò lé le, náng é yhùm má huí lhum lhum kut é noqkuq hpúng lé le, dang kyô kat lhê.

³ Nga-nhùng é Íwa Garai Gasang eq Yhumsing Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyi sháng gaq ô!

Jeju Hkya-ôn É Hkyô Eq Kyûdung Dang

⁴⁻⁵ Ngò gi, Yhumsing Yesuq lé nàng lumjing é hkyô lé le, sân-yúng bang banshoq lé nàng chyitdap é hkyô lé le, wó gyô é yanmai, ngò kyûdung é hkùn, nang lé myit bün nyi luí, hkâ-nhám le ngá é Garai Gasang lé jeju hkya-ôn nyi lhê. ⁶ Ngò gi, Hkrisduq é matú nga-nhùng chyáng bo tô é ge é mù lhumjup lé sê gyô é hkyô lé, nàng wó yù sháng gaq nghû, náng é lumjing hkyô lé, nàng saksé hkâm é má akyû htoq râ matú, kyûdung byi nyi lhê. ⁷ Náng é chyitdap myit gi, ngo lé gyai gabú nhang é eq wum-o wó yù nhang ri; hkâsu mù gâ le, gumang hpó ê, náng é yanmai, sân-yúng bang é i-myit má nguingón yuqyo é hkyô wó yù bekô nghut ri.

Onesimu É Matú Tôngbán Byi É Hkyô

⁸ Haù su mù, nàng kut gíng é muzó hkyô, ngò, nang lé pying kat lhê. Hkrisduq má, ngò gi, a gyuq a kyum é za nang lé haù wó kut nhang lhê nghut kôhang, chyitdap

myit đông za nang lé pying kat lhê. ⁹ Ngò, Poluq gi, mang bê htoq agó, ahkuí Hkrisduq Yesuq é yanmai htóng lúng sù le nghut luí, ¹⁰ ngò kyum hut huí nyi é u lé ngá zo dut lo é Onesimu é matú nang lé ngò dúng tôngbán kat lhê. ¹¹ Yhang gi, hí hpyang náng é matú akyû a bo é nghut kôhang, ahkuí gi, náng é matú le, ngá é matú le, akyû bò bê nghut ri.

¹² Ngò nhik htùng é Onesimu lé náng chyáng dum taù nhang kat lhê. ¹³ Haù gabú danglu é yanmai, ngò htóng lúng nyi é má náng é malaí ngo lé garúm râ matú, yhang lé ngò shuí nyi to naù kôhang, ¹⁴ ngò gi, nàng myit a huí le haí le a kâm kut. Hau é yanmai, ngò, nang lé kut nhang é đông a nghut e za, nàng ô nau é đông kut é san za nghut sháng gaq. ¹⁵ Hkâsu mù gâ le, náng chyáng mai yhang rayoq rabun zo gâng nyi é gi, yhang dum taù lò mù hkâ-nhám le nàng eq rahá dum wó nyi nyi râ matú nghut lhê abe. ¹⁶ Yhang gi, htàng hpyang, jùn rayuq đông a nghut e za, jùn htoq má je ge é chyitdap gumang hpó dut râ nghut bê; ngá matú, yhang gi, ngò chyitdap dik é sù nghut lhê; náng matú kúm gi, byù rayuq đông le, Yhumsing Yesuq má gumang hpó rayuq đông le, je riyhang chyitdap râ sù dut bê nghut ri.

¹⁷ Haù mù luí, nàng, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yù aq. ¹⁸ Yhang, nang lé raijung jung shut pyâm é nghut le le, chyin dap tô é nghut le le, haù gi, ngá chyáng dap é chyin nghû sôn yù aq. ¹⁹ Ngò, Poluq gi, chyin haù xap râ nghû luí, ngá loq èq yhang kâ kat kôhang, nàng yhang lhang, ngo lé asak chyin xap râ sù nghut é lé bün nham aq. ²⁰ Nghut bê, gumang hpó ê, náng é yanmai, haù Yhumsing má ngò gabú é hkyô wó yu nyi sháng gaq, Hkrisduq má ngá

é i-myt lé lhoq ngui lhoq ngón byî é dông, shî, ngò pying kat é dang lé gyo byi laq. ²¹ Nang gi, ngò tai kat é htoq má je lhom kut râ nghut é lé, hkyak za sé lui, ngò kê kat é nghut lhê.

²² Hau htoq agó, ngá é matú nyi râ gok lajang láng aq. Hkâsu mù gâ le, nungmoq kyûdung byî é yanmai, ngò gi, nungmoq chyáng dum wó jé râ lé myit myoqbyu nyi lhê.

²³ Hkrisduq Yesuq é yanmai, ngá é htóng lúng luzúm nghut é sù Epahpra gi, nang lé shi-kyâm kat ri. ²⁴ Ngá é htuq luq htuq bang nghut é Markuq, Aristakuq, Demaq, Lukaq pé le, nang lé shi-kyâm kat akô.

²⁵ Yhumsîng Yesuq Hkrisduq é jeju gi, nungmoq é woi-nyí eq rahá za ru joq nyî sháng gaq ô!

HEBRE
Pê Chyáng Hun Kat é
Laiká
(Hebrews)

Garai Yhangzo Gi, Maumang Lagyô Pê Htoq Je Gyaú É Hkyô

¹ Laí ló bê ipyat pé má, Garai Gasang gi, nga-nhúng é íchyí íwâ pé lé myiqhtoí pé dông alhîng lhîng eq adông dông mai dáng nyo wú bê nghut lhê. ² Nghut kôlhang, ló htâng é buinyì shí pé má, Yhang gi, Yhâng Zo dông mai nga-nhúng lé dang nyô bê nghut ri; Yhang gi, lhunglhâng lé sîng sù dut râ matú haú Zo lé masat to mù, Zo dông mai, nyì mi-nyì, joq mijoq lé hpan to bê nghut ri. ³ Haú Zo gi, Garai Gasâng é hpungwup shing kang duqbó é hkyô eq Yhâng é gunghkyâng isâm roq nghut nyì mù, lhunglhâng lé Yhâng é a-tsam byíng é dâng eq zú zing tò ri. Yhang gi, yubak mara lé lhoq sân-yúng é hkyô lé ban kut é htâng, mauhkûng htoq má Hkikhkam dik Sù Garai Gasâng é loqyo hkyam má zung to bê nghut ri. ⁴ Haú mù luí, Yhang gi, maumang lagyô pé é mying htoq gyaú é mying lé wó sîng yù bê nghut é eq rajung za, yhangmoq htoq je riyhang gyaú sù dut bê nghut ri.

⁵ Hkâsu mù gâ le, Garai Gasang gi, "Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê."^{*}

ga le, dum,
"Ngò gi, Yhâng Wa dut râ nghut mù, Yhang gi, Ngá Zo dut râ nghut lhê."^{*}

ga le, maumang lagyo hká yuq lé hkâ-nhám wá taí wú é nghut lhê lhú? ⁶ Dum, Garai Gasang gi, Yhâng é zomún lé mingkan shut nhang hâng kat é hkûn,

"Ngá é maumang lagyô pé banshoq gi, Yhang lé noqkuq kó sháng gaq."^{*}

ga taí ri. ⁷ Maumâng pé eq séng luí Garai Gasang taí é má,

"Yhang gi, Yhâng é maumang lagyô pé lé lai su dut nhâng mù, Yhâng é dui-nhâng zoshâng wui lé, myishâm pé su dut nhang é nghut ri."^{*}

gâ ri. ⁸ Nghut kôlhang, haú Zo eq séng luí, Yhang gi,

"Garai Gasang é, Náng é hkohkâm-tanghkuq gi, pyat dedu ahtum abyuq gîng nyì mù,

Náng é dingmán hkyô gi, Náng é mingdán lé uph kang é hkyô dut râ nghut lhê.

⁹ Nàng gi, dingmán hkyô lé chyit-dap bê nghut mù, agé ashop é hkyô lé a nguì byuq lô é nghut lhê.

Haú mù luí, Garai Gasang, náng é Garai Gasang gi, Nang lé, gabú nhang é xú but byí é dông, Náng é luzúm wui htoq je lhoq gyaú to bê nghut ri."^{*}

ga taí ri. ¹⁰ Hau htoq agó, Yhang gi, "Yhumsîng é, Nàng gi, a-nham sâng-hi má myidâm é apûn awang lé hi tô é nghut mù,

mauhkûng pé gi, Náng é loqmú chyat nghut ri.

¹¹ Haú pé gi, htên byoq byuq râ nghut lhê; nghut kôlhang, nàng gi, ru gîng nyì râ nghut lhê; haú pé banshoq gi, mebu su xau byuq râ nghut lhê.

¹² Nàng gi, haú pé lé, bumó lé su dîng yup râ nghut lhê; Nàng gi, haú pé lé, mebu su htaí pyám râ nghut lhê.

Nghut kôlhang, Nàng gi, rajung za ru gîng nyì râ nghut mù, Náng é zanwut pé gi, hkâ-nhám le htûm râ a nghut."^{*}

ga le taí ri. ¹³ Garai Gasang gi,

^{*} 1:5 Hkya-on 2:7 ^{*} 1:5 2 Sam 7:14 ^{*} 1:6 Tarâ Pun 32:43 ^{*} 1:7 Hkya-on 104:4 ^{*} 1:9 Hkya-on 45:6-7 ^{*} 1:12 Hkya-on 102:25-27

"Ngò, náng é gye pé lé, náng é hkyi nang tanghkuq kut pyám byi é hkyíng jé shoq,

Ngá é loqyo hkyam shut zung nyi shi aq."*

ga maumang lagyo hká yuq lé hkâ-nhám wá taí wú é l hú? ¹⁴ Maumâng pé banshoq gi, hkyi yù hkyô lé hkam yù râ nghut é bang lé dojaú râ matú, nhang kat huí é mù wùn woi-nyí pé chyat za nghut akô, a nghut kó l hú?

2

Sadiq Byi É Hkyô

¹ Haú mù luí, nga-nhúng gi, châng nghoq ló byuq é a huí zo sháng gaq, haú nga-nhúng wó gyô yu to bê hkyô lé je riyhang rago châng nyi râ dut l hê. ² Hkâsu mù gâ le, maumang lagyo pé eq taí bê mungdang gi, gíng nyi mù, shut shaí lu laí é hkyô eq jino a gyô é hkyô hkangmó kut é sù gi, yhumsíng eq gíng é mara dam byi é hui zo kô é nghut le gi, ³ nga-nhúng gi, haú-í yhang gyaú é hkyi yù hkyô lé haí su a ngàm kut é nghut jáng, nga-nhúng hkâsu wó hpang lut râ l hú? Hkyi yù hkyô haú gi, haú Yhumsing eq hí taí pyo htoq é nghut mù, Yhâng chyáng mai wó gyô yu é bang gi, haú hkyô têng é lé, ngamoq chyáng saksé shit bekô nghut ri. ⁴ Garai Gasang le, kumlhá pé, mauhpo muzó pé, lak-láí kumlhá myo myo eq, Yhang ô nau é eq rajung za Chyoiyúng Woi-nyí chyunghuq pé lé gàm byi é dông mai, haú hkyô lé saksé shit bê nghut ri.

Hkyi Yù Hkyô Hpóng Byi Sù

⁵ Garai Gasang gi, maumang lagyo pé lé, ngamoq taí nyi é jé lô râ mingkan lé, uphkâng nhâng râ a nghut. ⁶ Rayuq yuq mai, rawò má saksé hkâm tô é gi, "Byù gi, haí wá nghut mù, Nàng, yhang lé bún nyi l hê l hú?"

Byu Yhangzo gi, haí wá nghut mù, Nàng, yhang lé wú gôn nyi l hê l hú?

⁷ Nàng gi, yhang lé, maumang lagyo pé htoq ratsuí lhoq nyhum to bê nghut ri.

Nàng gi, yhang lé, hpungwup shingkang eq aróng bò nhâng mù,

⁸ jung hkangmó lé, yhâng é hkyiwa ô má tô to bê nghut ri."*

gâ ri. Jung hkangmó lé yhâng é a-ô má tô to bê gâ é gi, Garai Gasang, haí l háng a myhit to loshoq yhang uphkâng é a-ô má tô to bê nghut é lé gâ l hê. Nghut kôlhang, yhang é a-ô má tô tô é jung hkangmó lé, ahkuí, nga-nhúng a myàng shí é za nghut l hê. ⁹ Nghut kôlhang, nga-nhúng gi, maumang lagyo pé htoq ratsuí zo lhoq nyhúm huí é sù Yesuq lé myang é nghut l hê. Yhang gi, Garai Gasang jeju mai, yuq hkangmó é matú shí hkám byi é hui zo sháng gaq ga, shí-nò jamjau hkyô lé hkâm zo bê nghut é yan-mai, ahkuí, Yhang lé hpungwup shingkang eq aróng bò nhâng bê nghut ri.

¹⁰ Zo wuí myo myo lé hpungwup shingkang wó hkam yù nhâng sháng gaq ga, jung hkangmó lé Yhang é matú chyat eq Yhang dông mai chyat joq nyi nhang é Garai Gasang gi, wuínke jamjau hui nhang é dông, yhangmoq é hkyi yù Sù lé lhoq gumjup byi râ matú htuk âng nyi ri. ¹¹ Haú byu pé lé chyoiyúng nhang é Sù eq lhoq chyoiyúng huí é bang gi, ikun ral-hum za mâ é bang chyat nghut l hê. Haú mù, Yesuq gi, yhangmoq lé, gumang wui nghú râ lé a hoq é nghut l hê.

¹² "Ngò gi, Náng myíng lé, Ngá gumang wui chyáng taí pyô râ nghut l hê;

* 1:13 Hkya-on 110:1 * 2:8 Hkya-on 8:4-6

* 2:12 Hkya-on 22:22

Ngò gi, shiwa hpông é myoq hí má, Nang lé hkya-on mahkôn hkôn rà nghut lhê."[☆]
 ga, Yhang tái ri. ¹³ Yhang gi,
 "Ngò gi, Yhang lé lumhkau nyi rà
 nghut lhê."[☆]
 ga le dum tái ri. Hau htoq agó,
 "Ngò gi, Garai Gasang ngo lé byi é
 zoshâng wui eq shi má nyi
 nyi lhê."[☆]
 ga, Yhang dum tái ri.

¹⁴ Haù zoshâng wui gi, sui sho eq
 nghut é yanmai, Yhang le, yhang-
 moq é xângzo gùng bo hkam yù bê
 nghut ri. Hau é yanmai, Yhang gi,
 Yhâng é shi-nò hkyô đông mai, shi-
 nò hkyô é a-tsam lé zui zing é sù
 nghut é nat Tsadán lé wó lhoq htên
 pyám rà eq, ¹⁵ yhangmoq é shi-nò
 hkyô lé gyuq é eq, yhangmoq é asak
 gón lé jùn đông zui zing to huí é
 bang lé, wó lhoq lhut rà nghut lhê.
¹⁶ Gè gè yhang, Yhang gi, maumang
 lagyô pé lé garúm é a nghut é za,
 Abraham é awut ashín pé lé garúm
 é sheq ru nghut lhê. ¹⁷ Haù nghut é
 yanmai, Yhang gi, Garai Gasang lé
 dojaú é má shogyo nhikmyín é eq
 lhumzui é hkyangjong mó wó dut
 rà eq, byu pé é yubak mará é matú
 shihtái gunglik hkungga wó kut rà
 matú, hkyô hkangmó má Yhâng
 é gumang wui eq dù shoq kut é
 huí rà dut é nghut lhê. ¹⁸ Yhang
 gi, gunglaú huí é hkùn, Yhânggùng
 yhang jamjau huí zo bê nghut é
 yanmai, gunglaú huí nyi é bang lé
 wó garúm yu é nghut lhê.

3

*Yesuq Gi, Mosheq Htoq Gyaú É
 Hkyô*

¹ Haù mù luí, mauhkùng mai wut
 yù huí é, chyoiyúng é gumang wui
 é, lagyo eq hkyangjong mó nghù
 nga-nhúng yin yu é Yesuq é hkyô lé
 rago myit wú keq. ² Mosheq, Garai
 Gasâng é yhùm gón má lhumzui é

su, Yesuq le, Yhang lé masat yù sù
 Garai Gasâng chyáng lhumzui sù
 dut bê nghut ri.* ³ Yhùm kut sù gi,
 yhùm htoq je gyaú é aróng lé wó é
 su, Mosheq htoq, Yesuq gi, je gyaú
 é aróng lé wó gíng é lé myàng ri.
⁴ Hkâsu mù gâ le, yhùm hkangmó
 gi, rayuq yuq eq sai é chyat nghut
 ri. Nghut kôlhâng, Garai Gasang gi,
 jung hkangmó lé sai é sù nghut lhê.
⁵ Mosheq gi, Garai Gasâng é yhùm
 gón má dui-nhâng zoshâng rayuq
 đông lhumzui mù, Garai Gasang
 tái rà nghut é lé saksé hkám bê
 nghut ri. ⁶ Nghut kôlhâng, Hkrisduq
 gi, lhumzui é zo rayuq đông Garai
 Gasâng é yhùm lé up ri. Nga-nhúng
 kúm gi, nga-nhúng lé wám é myit bò
 nhang é hkyô eq nga-nhúng gum-
 rong nyi é myoqbyù hkyô lé myhik
 zing nyi é nghut jáng, Yhâng é yhùm
 nghut nyi bê.

*A Lumjìng Bang Lé Sidiq Byi É
 Hkyô*

⁷ Haù mù luí, haù Chyoiyúng
 Woi-nyí tái é eq rajung za,

"Hkù-nyí, nungmoq gi, Yhâng é
 danghtê lé wó gyo kô é nghut
 jáng, ⁸ yoso má Yhang lé
 chyâm kô é u lé,

gumlau toq é hkùn nungmoq é íchýí
 íwâ pé kut kô é su, nungmoq
 é i-myt lé hkâlhoq htan to kó.

⁹ Nungmoq é íchýí íwâ pé gi, myi xê
 zàn yhang Ngò kut é muzó
 lé myàng kôle, yoso háu má
 Ngo lé chyam lik bekô nghut
 ri.

¹⁰ Haù nghut é yanmai, Ngò gi,
 ipyat haù lé nhikjum yo mù,
 'Yhangmoq é myit nhiklhum
 gi, hkâ-nhám le hkyô nghoq
 byuq akô;
 yhangmoq gi, ngá é hkyô pé lé
 a sé kômù nghut ri.' nghù tái
 é nghut lhê.

[☆] 2:13 Esai 8:17 [☆] 2:13 Esai 8:18 * 3:2 Bun zo shi eq bun zo 5, 6 lhum mâ é Garai Gasâng é yhùm gâ é gi, Garai Gasâng é byu pé lé gâ é nghut lhê.

11 Haù mù, 'Ngá é bánno jowò má yhangmoq hkâ-nhám le wó wâng kó rà a nghut.' nghũ, Ngò, nhikjum yô é eq dakâm dang tái bê nghut lhê."^{*}

gâ ri.

12 Gumang wuì ê, nungmoq mâ é ó yuq le, haù rù dui nyi é Garai Gasâng chyáng mai, lhing taù ló byuq sê é, yubak mara byíng é, a lumjíng é i-mytit a bò sháng gaq, sidiq nyi keq. 13 Nungmoq gi, ó yuq le, yubak marâ é mhaù zô é hkyo èq i-mytit lhoq htan pyâm é a hui kó sháng gaq, "hkû-nyí" nghũ ru wó tái nyi nyi gi, nyí wuì, rayuq eq rayuq myit wum byí lhùm nyi keq. 14 Nga-nhúng gi, sâng-hi mai wó to bê myit lùm hkyô lé, ló htáng shoq zuí gíng nyi é nghut jáng, Hkrisduq eq chòm zùm yap nyi é bang dut bê nghut ri. 15 Haù gi,

"Hkû-nyí, nungmoq, Yhâng é danghtê lé wó gyô é nghut jáng, gumlau toq é hkûn, nungmoq é íchyí îwâ pé kut kô é su, nungmoq é i-mytit lé hkálhoq htan to kó."^{*}

ga tái é eq rajung za nghut ri.

16 Wó gyô yù mù, gumlau toq é bang gi, ô pé nghut akô lúh? Haù bang banshoq gi, Egotuq ming mai Mosheq èq shuí htoq lo é bang nghut bum lhê, a nghut kó lúh? 17 Myi xê zàn yhang Garai Gasang lé nhikjum yó nhang é bang gi, ô pé nghut akô lúh? Haù bang gi, mara kut shut mù, yoso má shi leq byuq é bang nghut bum lhê, a nghut kó lúh? 18 Jìno a gyô bùm kô é nghut jáng, Yhâng é bánno jowò má yhangmoq hkâ-nhám le wó wâng kó rà a nghut ga, Garai Gasâng èq dakam é bang gi, ô pé nghut akô lúh? 19 Haù mù, yhangmoq a lumjíng kô é yanmai, a wó wâng kô é lé, nga-nhúng myang é nghut lhê.

^{*} 3:11 Hkya-on 95:7-11

^{*} 3:15 Hkya-on 95:7-8

^{*} 4:3 Hkya-on 95:11

^{*} 4:4 Apùn 2:2

^{*} 4:5 Hkya-on 95:11

4

Garai Gasâng É Byu Pé É Matú Bánno Buinyi Đông Nghut É Bánno Jowò

1 Haù nghut mù luí, Garai Gasâng é bánno jowò má wàng rà dang-gidiq ru gíng nyi ashí nghut é yanmai, nungmoq mâ é ó yuq le, haù má a hkyit hkap é a dut rà matú, nga-nhúng sidiq nyi sháng. 2 Hkâsu mù gâ le, yhangmoq lé gabú danglù haù hko kyo bê su, ngamoq lé le hko kyo bê nghut lhê; nghut kôlháng, yhangmoq wó gyô é mungdang gi, yhangmoq é matú akyû a bò, haù mù gâ le, haù wó gyô é bang gi, lumjíng myit mai a lhom hap yù kô é yanmai nghut ri. 3 Nga-nhúng lumjíng bê bang za, bánno jowò haù má wó wàng é nghut lhê. Haù hkyô gi,

"Haù mù, 'Ngá é bánno jowò má yhangmoq hkâ-nhám le wó wâng kó rà a nghut.' nghũ, Ngò, nhikjum yô é eq dakâm dang tái bê nghut lhê."^{*}

ga Garai Gasang tái bê eq rajung za dut é nghut ri. Nghut kôlháng, Yhâng é muzó gi, mau htoq xâng hkun mai ban kut to bê nghut lhê.

4 Hkâsu mù gâ le, "Garai Gasang gi, nyhit nyi nghũ rà buinyi má Yhâng é muzó banshoq mai bánno bê nghut ri."^{*} gâ é dang pé má, haù nyhit nyi nghũ rà buinyi eq sêng é hkyô lé rawò má Yhang tái tô ri. 5 Bánno jowò joq é eq sêng luí, Yhang dum tái tô é gi, "Ngá é bánno jowò má yhangmoq hkâ-nhám le wó wâng kó rà a nghut."^{*} gâ ri.

6 Bánno jowò haù má wàng rà bang ra-am nyi é danggidiq joq tô ashí nghut ri; hí hkûn, gabú danglù haù wó gyô wú bê bang kúm gi, yhangmoq jìno a gyo kô é yanmai, a wàng kô é nghut lhê. 7 Haù mù luí, "Hkû-nyí, nungmoq, Yhâng é danghtê lé wó gyo kô é nghut

jáng, nungmoq é i-myt lé hkálhoq htân kó."[✧]
 gâ é lé, ngò hí lé tai bê eq rajung za, Garai Gasang gi, gyai myáng é htâng má Dawiq dông mai tai é hkûn, "Hkû-nyí" gâ é buinyi ra-nyí dum masat to bê nghut ri. ⁸ Hkâsu mù gâ le, yhangmoq lé, Yohuq èq bánno jowò byi bê ru nghut le gi, Garai Gasang gi, htâng má, gotû buinyi eq séng luí tai rà a nghut lo. ⁹ Haû mù luí, Garai Gasâng é byu pê é matú gi, Bánno buinyi dông nghut é bánno jowò ru joq tô ashí nghut lhê. ¹⁰ Hkâsu mù gâ le, Garai Gasang gi, Yhâng é muzó mai bannò é su, Garai Gasâng é bánno jowò má wàng é sù gi, yhumsing é muzó mai bánno rà nghut lhê. ¹¹ Haû nghut mù, yhangmoq é jino a gyo hkyo é alik lé cháng mù leqbat é, ó yuq le a bò sháng gaq, nga-nhúng gi, bánno jowò haû má wó wàng shoq, a-tsam bo é í shikut sháng.

¹² Hkâsu mù gâ le, Garai Gasâng é mungdang gi, rû dui nyi é eq a-tsam bo é nghut lhê. Haû gi, shamsó íshut dap é sham htoq má je htoq é nghut mù, myit nhikhum eq woi-nyí lé le, wuimyoq pé eq wui-nyún lé le, wó gam hkoq hkyang rot é nghut lhê; haû gi, nga-nhúng myit é hkyô pé eq myit sôn é hkyô pé lé wó jéyáng é nghut lhê. ¹³ Hpan tô é lhunglhang gi, Garai Gasâng é hí mai wó haq pyâm é haí le a joq é nghut lhê. Jung hkanmó gi, nga-nhúng, jihpán shit ra rà Su é myoq hí má a wó nghop tô é hkyô, de de dut é nghut lhê.

Je Gyaú É Hkyangjong Mó Yesuq

¹⁴ Haû mù luí, nga-nhúng gi, Garai Gasâng é Yhangzo Yesuq nghut sù, mauhkûng pê shut hkyang doq ló bê nghut é gyaú é hkyangjong mó lé wó é nghut é yanmai, nga-nhúng yín yu to bê

lumjáng hkyô lé ging ging myhik zing nyi sháng. ¹⁵ Hkâsu mù gâ le, nga-nhúng gi, nga-nhúng wum nyhôm é hkyô pé lé a sê gyo byí é hkyangjong mó wó é a nghut é za, nga-nhúng su hkyô hkanmó má gunglaú é huí wú kôlhang mara a bo é sù hkyangjong mó lé sheq wó é ru nghut lhê. ¹⁶ Haû mù luí, nga-nhúng gi, shogyo nhikmyín é hkyô wó yú rà eq, nga-nhúng ra châ é u má nga-nhúng le wó garúm rà jeju lé myang hô sháng gaq, hkyak lum é myit mai Garaí jeju tanghkuq shut chyâng htep é sháng.

5

¹ Hkyangjong mó yuq hkanmó gi, byu pê chyáng mai hkyin htoq yú huí é nghut mù, mara pê é matú, chyunghuq pé eq hkungga pé nhông byi hkyô nghut é, Garai Gasang eq sêng é muzó pé má, yhangmoq é gunglik dông, hkyin masat to huí é bang nghut akò. ² Yhânggùng yhang gi, wum nyhóm hkyo é a-ô má nghut nyi é yanmai, yhang gi, bun a bóng é eq hkyô nghoq ló é bang lé nú-nhâm é dông wó shuí-ú é nghut lhê. ³ Wum nyhôm é yanmai, yhang gi, byu pê é marâ é matú le, yhânggùng yhâng é marâ é matú le, hkungga nhông byi rà dut é nghut lhê.

⁴ Ó yuq le, yhumsing gùng yhumsing aróng haû lé wó yu é a nghut; Arun lé su, Garai Gasâng èq wut yu é hui jáng sheq wó é nghut lhê. ⁵ Haû eq rajung za, Hkrisduq le, hkyangjong mó dut lo é hpungwup shingkang lé, Yhânggùng yhang kut yu é a nghut. Garai Gasang sheq, Yhang lé, "Nàng gi, Ngá Zo nghut ri; Ngò, hkû-nyí Náng Wa dut bê nghut lhê."[✧]
 ga tai é nghut lhê. ⁶ Hau htoq agó, "Nàng gi, Melahkizedek wó é hkyangjong ayá hkyô

dông mai ahtum abyuq
hkyangjong rayuq nghut nyi
ri."☆
ga, gó wô má le, Yhang taí to ashî
nghut ri.

⁷ Yesuq gi, myidàm htoq má asak
dui nyi é buinyi pé má, Yhang lé,
shi é mai wó hkyi yù Su chyáng,
ngaubyi ngau-nhap eq wut garû é
èq, kyûdung é eq dung tôngbán bê
nghut mù, Yhâng é hkungga gíng
é ap nóng hkyo é yanmai, gyo byi
é hui bê nghut ri. ⁸ Yhang gi,
Zo rayuq nghut to kôle, Yhang hui
zô é wuîhke jamjau hkyô mai jìno
gyo hkyô wó mhoq yù bê nghut ri.
⁹ Yhang gi, lhoq gumjup huí é hkûn,
Yhang é jino gyo bang banshoq é
matú, ahtum abyuq é hkyi yù hkyo
é awang dut byuq bê nghut é eq,
¹⁰ Melahkizedek wó é hkyangjong
ayá hkyô dông mai hkyangjong mó
dut râ matú, Garai Gasâng èq hkyin
masat é hui bê sù nghut ri.

Woi-nyí Má Wáng Ra Bê Hkyô

¹¹ Ngamoq gi, shí hkyô eq séng lui
taí râ gyai joq lhê; nghut kôlhang,
nungmoq gi, ra lui za a sê gyô é
bang nghut kô é yanmai, taí sân
kyo wuî ri. ¹² Gè gè ga jáng, ahkui
lhê ahkyíng má, nungmoq gi, sará
dut gíng bê bang nghut lhê; nghut
kôlhang, Garai Gasâng é mungdang
mâ é tengmán hkyo é awang lé,
rayuq yuq èq nungmoq lé dum taú
mhoq byi râ ru dut nyi akô nghut
ri. Nungmoq gi, htan é zoshuq
râ é bang a nghut, naú wing râ é
bang ru nghut nyi ashî kó myhi-
nhung! ¹³ Naú wing shuq râ é sù
ó yuq le, zonú nghut nyi ashî mù,
dingmán é hkyô lé mhoqshit é má a
mán shi nghut ri. ¹⁴ Nghut kôlhang,
htan é zoshuq gi, ge é hkyô eq agè
ashop é hkyô lé wó sê gam hkoq yù
shoq, hkâ-nhám le yhumsing gùng
yhumsing lhoq mhân yu nyi é, kô
dìng bê bâng é matú ru nghut lhê.

6

¹ Haú mù lui, nga-nhúng gi,
Hkrisduq eq séng é mhoqshit hkyô
awang lé tô to mù, myit kô dîng
é hkyô shut xoq sô é sháng. Nga-
nhúng gi, shî-nò hkyô shut shuí
jé é muzó mai myit lhîng hkyo é,
Garai Gasang lé lumjîng hkyo é,
² baptisma pé, loq ke byi hkyô,
shi é mai dum dui toq hkyô eq
ahtum abyuq jéyáng hkyô eq séng
é mhoqshit hkyo é, apûn awang
dum hí nó a ra lô é nghut lhê.
³ Garai Gasang gyô é nghut jáng,
nga-nhúng gi, myit kô dîng hkyô
shut xoq so râ nghut lhê.

⁴ Myoq lhoq bóng é radàm hui
bê bang, mauhkûng chyunhuq lé
myang hap yù bê bang, haú Chy-
oiyúng Woi-nyí lé chôm hkam yù bê
bang, ⁵ Garai Gasâng é mungdâng é
gè hkyô eq jé lo nyi é ipyat é a-tsam
pé lé myang chyam wú bê bang,
⁶ yhangmoq hpuq lhik ló byuq é
nghut le gi, hká dông lé myit lhîng
dum ge wó râ a nghut lo, haí mù
gâ le, yhangmoq gi, Garai Gasâng é
Yhangzo lé dum jén sat pyâm é dut
mù, Yhang lé de de rhoi pyám kô é
nghut lhê.

⁷ Yhâng ahtuq má wo gyûn é mau
wuî lé shuq yù mù, yò mù saí bâng
é matú akyû bo é hôwa nuqhpýi
lhoq htoq byi é maumyí gi, Garai
Gasâng é shimân jeju myang hap
yu é nghut ri. ⁸ Nghut kôlhang, zu
gâm eq myoq gàm yuq htoq nhang
é maumyí gi, akyû a bò mù, nhîng
pyâm é hui zo râ lé chiq râ ri. Haú
gi, ló htáng má nyhê hkyô pyâm é
hui râ nghut lhê.

⁹ Nghut kôlhang, chyitdap é gu-
mang wuî ê, ngamoq gi, haú su
nghû taí é nghut kôlhang, nung-
moq é hkyi yù hkyô eq séng é je
ge é jung pé, nungmoq wó bekô
râ nghû hkyak myit lum tô lhê.
¹⁰ Garai Gasang gi, a tara é sù a
nghut. Yhang gi, nungmoq é muzó

☆ 5:6 Hkya-on 110:4

lé le, Yhâng é byu pé lé nungmoq garúm bê eq xoq luí garúm nyi é dông, Yhang lé nungmoq chyitdap é myit shit kô é hkyô lé le, a tô-myhí râ nghut lhê. ¹¹ Ngamoq gi, nungmoq é i-myt myoqbyù hkyô wó byíng Jup râ matú, nungmoq yuq hkangmó ipyat htum shoq xoq shikut nyi kó râ lé gyai ô nau ri. ¹² Ngamoq gi, nungmoq lagon bang dut byuq râ lé a ô nau é za, Garaí danggidiq byí to bê é lé, lumjíng myit eq myit hîng hkyô dông mai hkam yu é bang su châng kut kó râ lé ô nau é ru nghut lhê.

Garaí Gasâng É Danggidiq Gíng Nyi É Hkyô

¹³ Garaí Gasang gi, Abraham lé danggidiq tô é hkûn, Yhâng htoq gyaú é dakâm myíng lang râ rayuq lháng a nyi é nghut mù, Yhânggùng lé Yhang lang luí dakam é gi, ¹⁴ "Ngò gi, nang lé teng yhang shimân byi mù, nang lé awut ashín myo myo byi râ nghut lhê."* gâ ri. ¹⁵ Haù mù, Abraham gi, myit hîng hîng lánng yu é htâng má, byí tô é danggidiq lé wó yù bê nghut ri.

¹⁶ Byu pé gi, yhangmoq htoq gyaú su é myíng lé lang luí, dakâm kô é eq, yhangmoq dakam é dang lé saksé kut mù, dang-rháng é hkyô pé banshoq lé lhoq pân pyâm akò nghut ri. ¹⁷ Garaí Gasang gi, Yhang myit hpyit tô é hkâ-nhám le a htaí lhik é hkyô lé, danggidiq byí tô é lé hkam yù râ bâng chyáng san za shit nau ri; haù mù luí, dakâm dang eq lhoq gíng to bê nghut ri. ¹⁸ Garaí Gasang gi, mhaú a ge é yanmai, hkâ-nhám le a htaí lhik é hkyô í hkat nghut é danggidiq eq dakâm dang joq é nghut mù, Yhang haù su kut é gi, nga-nhûng hí má tô to byí é myit myoqbyù hkyô lé myhik zíng râ matú gaú é jowò shut hphang wàng bê bang nga-nhúng lé wum mó byí é dut râ matú nghut lhê.

¹⁹ Nga-nhúng gi, myit nhiklhûm é shamtoq goknghe dông myit myoqbyù hkyô haù lé wó é nghut mù, haù gi, gíngtíng é eq gaú é hkyô nghut ri. Myit myoqbyù hkyô haù gi, mauhkûng noqkuq yhûm mâ é pân-gyang ahkaù mâ é sân-yúng gok má jé wang é nghut ri. ²⁰ Jowò haù gi, nga-nhúng é akyu é matú, nga-nhúng é hí má wàng byí é sù Yesuq wang jé é jowò nghut ri. Yhang gi, Melahkizedek wó é hkyangjong ayá hkyô dông mai, ahtum abyuq é hkyangjong mó dut bê nghut ri.

7

Hkyangjong Melahkizedek É Hkyô

¹ Melahkizedek gi, Salem myuq é hkohkâm eq Myhang Htâng é Garaí Gasâng é hkyangjong nghut ri. Yhang gi, hkohkâm pé lé sat ùng pyám luí dum taù lo é Abraham lé hui mù, shimân byi bê nghut ri. ² Haù mù, Abraham gi, wó lo é jung hkangmó mâ é, xê gambùm mâ é ragambùm, yhang lé byi bê nghut ri. Sâng-hi lhê é Melahkizedek é myíng lichyúm gi, "dingmán hkyo é hkohkâm" gâ é nghut mù, htâng lhê é "Salem é hkohkâm" gâ é gi, "nguingón hkyo é hkohkâm" gâ é nghut lhê. ³ Yhâng é ínu íwa é hkyô eq byùxik labaù le, hi é buinyi eq asak htùm é hkyô le a kâ to nghut ri. Yhang gi, Garaí Gasâng é Yhangzo su, ahtum abyuq hkyangjong ru nghut nyi ri.

⁴ Yhang hkâ-í hkik lhê nghû é lé, myit wú keq. Haù íchyí íwa Abraham lháng gi, wó lo é mâ é xê gambùm mâ é ragambùm, yhang lé byi ri-nhung! ⁵ Hkyangjong dut bang Lewiq é awut ashín pé gi, yhangmoq é gumang wui, Abraham mai nyi gyó lo é bang nghut kôle, tarâ má bo é eq rajung za, haù bâng chyáng mai xê gambùm mâ é ragambùm lé hkyui yù râ dut é

* 6:14 Apûn 22:17

bang nghut akô. ⁶ Nghut kôlhang, Melahkizedek gi, Lewiq mai gyó lo é amyû a nghut ê kôle, danggidiq pé wó to sù nghut é Abraham chyáng mai xê gambùm mâ é ragambùm hap yù mù, shimân byî ri. ⁷ Shimân byî sù gi, shimân byî é lé hkam yù sù htoq je gyaú sù nghut é lé, ó yuq le úng-áng râ hkyô a joq é nghut lhê. ⁸ Hkyangjông pé eq séng luí ga jang, shi byuq sé é byu èq, xê gambùm mâ é ragambùm lé hkyui yu é nghut lhê; nghut kôlhang, Melahkizedek eq séng luí nghut jáng, asak dui nyi é ga taí pyô byî é huí su èq hkyui yu é nghut lhê. ⁹ Xê gambùm mâ é ragambùm hkyui yù sù, Lewiq lháng gi, Abraham dông mai xê gambùm mâ é ragambùm byi bê nghû wó taí ri. ¹⁰ Haí mù gà le, Melahkizedek gi, Abraham lé huí é hkûn, Lewiq gi, yhâng é íchyí íké é gungdu hkaú má ru bo tô ashí nghut ri.

Melahkizedek Eq Dù É Yesuq

¹¹ Haú Lewiq hkyangjong amyû pé é ipyat má, byu pé gi, jep é tarâ lé wó yu bùm kô é nghut mù, hkyangjong ayá haú mai gumjup hkyô wó yù kô é nghut le gi, haí mù luí, Arun wó é hkyangjong ayá hkyo dông a nghut é za, Melahkizedek wó é hkyangjong ayá hkyo dông lo é sù gotú hkyangjong rayuq ra shirâ lú? ¹² Hkâsu mù gà le, hkyangjong amyû htaí é hkûn gi, tarâ le htaí yhang htaí râ dut é nghut lhê. ¹³ Haú su nghû taí é hkyô pé eq séng é Sù gi, gotú byuhú mâ é sù nghut mù, byuhú haú mai gi, ó yuq le hkungga gyap má do-jau wú é a nghut. ¹⁴ Hkâsu mù gà le, nga-nhúng é Yhumsing gi, Yudaq byuhú mai gyó lo é awut ashín nghut é hkyô, san za nghut nyi ri. Mosheq kúm gi, byuhú haú eq séng é hkyô má, hkyangjong pé eq séng luí haí lé a taí é nghut

lhê. ¹⁵ Melahkizedek eq dù é gotú hkyangjong rayuq pô htoq bê nghû, ngamoq taí bê hkyô gi, je riyhang san za dut bê nghut ri. ¹⁶ Yhang gi, îwa rayuq é awut ashín pé nghut râ lhê gà é tarâ dông hkyangjong rayuq lé dut é a nghut é za, a wó lhoq htên é asak é a-tsam eq rajung za lé dut é ru nghut lhê. ¹⁷ Hkâsu mù gà le,

"Nàng gi, Melahkizedek wó é hkyangjong ayá hkyô dông mai, ahtum abyuq hkyangjong rayuq nghut nyi ri."^{*}

ga Yhang eq séng luí taí pyo tô é nghut lhê.

¹⁸ Haú hí lhê é cháng râ tarâ gi, wum nyhôm é eq akyû a bo é yanmai, tô pyám bê nghut lhê. ¹⁹ Hkâsu mù gà le, haú jep é tarâ gi, gumjup hkyô haí a wó kut byí é nghut lhê. Haú mù, je ge é myit myoqbyù hkyô lajang byí é nghut luí, nga-nhúng gi, myit myoqbyù hkyô haú mai Garai Gasâng chyáng wó chyâng htep é é nghut lhê.

²⁰ Myit myoqbyù hkyô haú gi, dakâm hkyô a bo é a nghut myihinhung! Góbang gi, dakâm hkyô a bo é za hkyangjông pé wó dut bekô nghut ri. ²¹ Nghut kôlhang, Yesuq kúm gi,

""Nàng gi, ahtum abyuq hkyangjong rayuq nghut lhê."

ga haú Yhumsing dakâm bê nghut mù, Yhang myit é hkyô htaí râ a nghut."^{*}

ga, Yhang eq séng luí Garai Gasang taí é hkûn, dakâm dang haú mai hkyangjong rayuq dut bê nghut ri. ²² Dakâm dang hau é yanmai, Yesuq gi, je ge é dangshikaq é pahkâm wò yù sù dut bê nghut ri.

²³ Hkyangjông pé myo myo nyi râ dut é gi, yhangmoq é muzó a wó xoq zui shoq shi byuq hkyô èq hkûm zing pyám kô é yanmai nghut ri. ²⁴ Nghut kôlhang, Yesuq

gi, ahtum abyuq dui nyi sù nghut é yanmai, Yhang gi, hkyangjong mù ayang ru zui nyi rà nghut lhê. ²⁵ Haù mù luí, Yhang gi, Yhang dông mai Garai Gasâng chyáng lé jé é bang lé, hkâ-nhám le wó hkyi yu é nghut lhê; haì mù gà le, Yhang gi, yhangmoq é matú dúng tôngbán byi nyi rà matú, rù dui nyi é sù nghut lhê.

²⁶ Yesuq gi, chyoiyúng é sù, mara hùn rà hkyô a bo é sù, sân-yúng é sù, yubak dap bang eq rahá a nghut shoq gotù san kut huí é sù, mauhkúng pè ahtoq má lhoq toq lhoq gyaù yu huí é sù nghut ri. Haù sù é hkyangjong mó gi, nga-nhúng rà é lé lajang byi rà htuk ang ri. ²⁷ Nyí nyí bui bui, yhumsing é mará é matú hí hkungga nhông byi mù, byu pè é mara matú le hkungga nhông byí é gotù hkyangjong mó pé su, Yhang gi, a kut rà é sù nghut lhê. Yhang gi, Yhânggùng lé Yhang nhông byí é hkùn, yhangmoq é yubak mará é matú banshoq radâm za hkungga nhông byi pyám bê nghut ri. ²⁸ Hkâsu mù gà le, haù jep é tarâ gi, wum nyhôm é byu pé lé hkyangjong mó pé dông masat é nghut ri. Nghut kôlhang, Garai Gasang gi, haù jep é tarâ é htâng má lé jé é dakâm dâng eq, Yhâng é Yuqzo lé masat to bê nghut mù, Yhang gi, ahtum abyuq lhoq gumjup huí bê nghut ri.

8

Dangshikaq Asik É Hkyangjong Mó Yesuq

¹ Ngamoq taí nyi é dangkâng gi, shí dông nghut lhê: Nga-nhúng gi, haù sù é hkyangjong mó lé wó é bang nghut lhê. Yhang gi, mauhkúng htoq má, Hkikhkam dik Sù Garai é hkohkâm-tanghkuq é lo-yyò hkyam shut zùng to mù, ² byu eq saí é a nghut é za, haù Yhumsing eq saí é saksé zúm akying hkaù mã

é, sân-yúng dik gok má dojaú é sù nghut ri.

³ Hkyangjong mó hkangmó gi, chyunghuq pé eq hkungga pé lé nhông byi rà matú wò hun to huí é chyat nghut lhê. Haù mù luí, hkyangjong mó shí yuq le, rajung jung nhông byi ra rà nghut lhê.

⁴ Yhang gi, mingkan htoq má nyi tô é ru nghut le gi, hkyangjong dut rà a nghut; hkâsu mù gà le, jep é tarâ dông ga jang, chyunghuq nhông jaú é byu pé nyi to gù bê nghut lhê.

⁵ Yhangmoq, sân-yúng dik gok má dojaú é hkyô gi, mauhkúng htoq má joq é azòng eq wupzo dông nghut ri. Haù nghut é yanmai, Mosheq gi, saksé zúm saí rà nghut é hkùn, "Nang lé, bùm má tũn shit é azòng eq rajung za jung hkangmó wó saí shoq kut aq."* ga sidiq byi huí é nghut lhê. ⁶ Nghut kôlhang, Yesuq, gyoro sô xoq byí é dangshikaq gi, axaù lhùm htoq má je gyaù é eq rajung za Yhang hap yu tô é dojaú hkyô gi, yhangmoq é dojaú hkyo htoq má je gyaù é nghut lhê. Haù mù, dangshikaq haù gi, je ge é danggidiq pè htoq má awang hi tô é nghut lhê.

⁷ Hkâsu mù gà le, sân-hi lhê é dangshikaq má rà é hkyô haì a bo é ru nghut le gi, gotù ra rà a nghut lo. ⁸ Nghut kôlhang, Garai Gasang gi, byu pè chyáng mara bo é myàng mù, taí é gi,

"Haù Israelaq é yhumbyù wuì eq le, Yudaq é yhumbyù wuì eq le,

Ngò, dangshikaq asik to rà ahkyíng jé lo nyi ri ga haù Yhumsing taí pyo ri.

⁹ Haù gi, Ngò, yhangmoq é íchýí íwâ pé lé loq eq zui mù, Egutug ming mai shuì htoq lo é hkùn,

yhangmoq eq tô tô é dangshikaq su dut rà a nghut.

* 8:5 Htoq Ló 25:40

Haî mù gâ le, yhangmoq gi, Ngá é dangshikaq lé a xoq cháng kô é nghut mù,

Ngò gi, yhangmoq chyáng mai lhing ló byuq é nghut lhê ga haû Yhumsing taî pyo ri.

¹⁰ Shî gi, ahkyíng haû laí é htâng má, Israelaq é yhumbyù wui eq Ngò to râ nghut é dangshikaq nghut lhê ga haû Yhumsing taî pyo ri.

Ngò gi, Ngá é tarâ pé lé, yhangmoq é i-myt má kat byi mù, yhangmoq é myit nhiklhum má kâ to byi râ nghut lhê.

Ngò gi, yhangmoq é Garai Gasang nghut mù, yhangmoq gi, Ngá é byu pé dut kó râ nghut lhê.

¹¹ 'Haû Yhumsing lé sé keq.' ga, yhâng é gumang hpó lé nghut nghut,

yhâng é chyangnâm mâ é sù lé nghut nghut, mhoqshit é byù nyi râ a nghut lo,

haî mù gâ lé, yhangmoq lhunglhâng bang gi, tiq htáng sù mai kô htáng sù jé shoq Ngo lé sé kó râ nghut lhê.

¹² Hkâsu mù gâ le, Ngò gi, yhangmoq é agè ashop hkyô lé mara hkyut pyám byi mù, yhangmoq é mara pé lé dum a bun byi lo râ nghut lhê.*

gâ ri.

¹³ Dangshikaq haû lé, Yhang "asik" gâ é gi, sâng-hî lhum lé, axau kut pyám é nghut ri; xau ló byuq é haî le, hkâ-myháng a myáng má byuq ló byuq râ nghut lhê.

9

Myidàm Saksé Zúm Má Noqkuq É Hkyô

¹ Sâng-hi lhê é dangshikaq gi, noqkuq râ htúngtarâ pé eq noqkuq râ myidàm sâng-yúng dik gok bo é

nghut ri. ² Saî tô é saksé zúm é sâng-hi gok má gi, haû myibung tsúng jang, siboî eq haû nhông byí é muk joq mù, haû gok lé gi, Chyoiyúng Jowò ga myhíng ri. ³ Í dang nghû râ gok pân-gyang é ahkaû mâ é gok lé gi, Chyoiyúng Htâng é Jowò gâ é nghut lhê. ⁴ Gok haû má gi, namngón jung nyhê é hîng hkungga gyap eq hîng shup dangshikaq sidek joq ri. Dangshikaq sidek haû má gi, mannaq muk bo é hîng yam, ahaq nyún tô é, Arun é dumbáng eq, dangshikaq luqlong pé bo tô ri. ⁵ Dangshikaq sidek é ahtoq má gi, shîhtaî gunglik hkungga byi jang htoq má wup tô é, Hpungwup shingkang bò Sù é hkerubim* pé joq tô ri. Nghut kôhang, ngamoq gi, ahkaû haû pé lé jikhúm nuqguq a wó taî san kyo é nghut lhê.

⁶ Haû dông jung hkangmó ban lajang tô é hkùn, hkyangjông pé gi, ayang sâng-hi gok má wàng mù, yhangmoq é dojaú muzó lé wùn waq bekô nghut ri. ⁷ Nghut kôhang, ahkaû gok má gi, hkyangjong mó za, yhânggùng é matú le, a sê é za byu pé kut shut é marâ é matú le, nhông byi râ sui chùng mù, razàn má radàm za wang é nghut lhê.

⁸ Haû Chyoiyúng Woi-nyí gi, haû pé dông mai, sâng-hi é saksé zúm ru joq nyi nyi, haû Chyoiyúng Htâng é Jowò wàng hkyô a hpông shit shí é lé, tún shit nyi ri. ⁹ Haû gi, ipyat shi é matú tún shit é azòng nghut mù, nhông byí é chyunghuq pé eq shigu hkungga pé gi, dojaú sù é i-myt lé a wó lhoq sâng-yúng byí é hkyô lé taí nau é nghut lhê. ¹⁰ Haû pé gi, zojung, shuqjung eq chí san chí sêng hking ahú hú eq za sêng é nghut mù, htúngli asik, lé joq é ahkyíng jé shoq za tô tô é gungsho eq sêng é tarâ pé nghut ri.

Hkrisduq É Sui

* **8:12** Yer 31:31-34 * **9:5** Hkerubim gâ é gi, byù su su, dusak su su dut é, dùng dap é maumang lagyo rahú nghut lhê.

¹¹ Hkrisduq gi, shî má joq to gù nghut é gè hkyô pê é hkyangjong mó dông lé jé é hkûn, hpan tô é má a lom nghû nau é, byu êq saî é a nghut é, je kô é eq je gumjup é saksé zúm mai wang lai bê nghut lhê. ¹² Yhang gi, Chyoiyúng Htâng é Jowò má wang é hkûn, bainám eq nojúng zo pê é sui lé chùng mù wang é a nghut é za, Yhâng é suí eq yhang banshoq é matú radàm za ahtum abyuq é hkyi yù hkyô wó yù bê nghut ri. ¹³ Htúngli dông agot a-û dut é bang lé lhoq sân-yúng râ matú, bainám eq nohtó zo pê é sui eq no-pyâ é myî-mhop lé, yhangmoq é ahtoq má hpyun gyun é hkûn, yhangmoq gi, ahtoq gung-sho pyâm wó lhoq sansêng é hui kô é nghut lhê. ¹⁴ Haù nghut jáng, Garai Gasâng é hí má ra a bo é Yhânggùng lé, ahtum abyuq é Woi-nyí dông mai nhông byí é Hkrisduq é sui gi, rû dui nyi é Garai Gasang lé nga-nhúng wó dojaú sháng gaq ga, shi é hkyô shut shuí jé é nyi yap sâmlai mai nga-nhúng é myit sôn sê é hkyô lé, je riyhang wó lhoq sansêng yu ri-nhung mhaí!

¹⁵ Haù nghut é yanmai, Hkrisduq gi, danggidiq byi tô é ahtum abyuq é muizè lé, ji yù hui é bang wó hap yù kó sháng gaq ga, dangshikaq asik é gyoro sô xoq byi sù nghut nyi ri. Haù su wó kut é gi, sâng-hi lhê é dangshikaq ahkaù má mara kut shut é bang lé lhoq lhut yù râ matú, yubak chyín xap zê ralhum dông, Yhang shî hkám byi yanmai nghut ri.

¹⁶ Madat dang eq séng luí ga jang, madat dang tái sù haù shî bê hkyô saksé shit râ lhê. ¹⁷ Haí mù gâ le, madat dang gi, rayuq yuq shî jáng za sheq lichyúm htoq é nghut lhê. Madat dang tái sù rû dui nyi nyi, haù gi, hkâ-nhám le lichyúm htoq râ a nghut. ¹⁸ Haù nghut é yanmai, sâng-hi lhê é dangshikaq

lhang gi, sui a bo lòm jáng lichyúm a htoq é nghut lhê. ¹⁹ Mosheq gi, haù jep é tará má bo é hknmó hkangmó lé, shiwa byù banshoq bang lé ban taí pyo é hkûn, zam zam ne é saumaú eq jam kyâng lé yù mù, nojúng zô é sui eq bainám sui eq wuì nyhò tô é lé, chyúmding má le, shiwa byù banshoq bang lé le, hpyun gyún é nghut ri. ²⁰ Yhang gi, "Sui shî gi, nungmoq cháng râ matú, Garai Gasang, hknmó hkyô to bê nghut é, dangshikaq tô tô é sui nghut lhê."* ga taí ri. ²¹ Yhang gi, saksé zúm eq dojaú é má chung é zè pé má le, haù eq rajung za sui haù hpyún gyún ri. ²² Gè gè gi, haù jep é tará má bo é dông ga jang, azing zê aluq banshoq gi, suí eq lhoq sân-yúng é hui râ dut é nghut mù, sui htoq hkyô a joq jáng, mara hkyut byi hkyô le joq é a nghut.

²³ Haù mù, mauhkúng zè pê é azòng pé gi, hkungga haù pê eq lhoq sân-yúng é hui râ é nghut lhê. Nghut kôlhang, mauhkúng zè pé yhang gi, haù pê htoq je ge é hkungga pê eq lhoq sân-yúng é hui râ dut é nghut lhê. ²⁴ Hkâsu mù gâ le, akying lhum é azòng za nghut é, byu eq saî é chyoiyúng dik é jowò má Hkrisduq wang é a nghut é za, Yhang gi, mauhkúng má yhang wang é nghut mù, ahkuí gi, nga-nhúng é matú Garai Gasâng é hí má bo yap byí nyi é nghut lhê. ²⁵ Yhang gi, haù hkyangjong mó mai yhumsing é sui a nghut é sui lé chùng mù, Chyoiyúng Htâng é Jowò má zàn wuì wàng luí kut é su, yhânggùng lé dum nhông byi byi kut râ matú mauhkúng má wang é le a nghut. ²⁶ Haù dông ru nghut le gi, Hkrisduq gi, mau htoq xâng hkûn mai shî hkâm é adàm myo myo nghut berâ nghut lhê. Nghut kôlhang, ahkuí, Yhang gi, yubak mara hui sêng pyám byi râ matú, yhânggùng lé hkungga nhông byi râ

* 9:20 Htoq Ló 24:8

ga ipyat pé ló htâng ló nyi é má, banshoq é matú radàm za htoq shit bê nghut ri. ²⁷ Byù gi, radá za shí rã nghut mù, hau htâng má tarã jéyáng é hui rã nghut é eq rajung za, ²⁸ Hkrisduq gi, byù myo myô é yubak mara lé yu pyám byi rã matú, radá za hkungga nhông é hui bê nghut ri. Haù mù, Yhang gi, yubak mara wun pyám byi rã a nghut lo é za, Yhang lé láng nyi é bang lé hkyi yù hkyô yu lé byi rã matú, htâng má í dãm nghũ rã dãm htoq shit rã nghut lhê.

10

Hkrisduq É Gùng Lé, Banshoq É Matú Radàm Za Nhông Byi É Hkyô

¹ Haù jep é tarã gi, jé lô rã nghut é gè hkyô pè é akyíng a nghut é za, wupzo za nghut ri. Haù nghut é yanmai, jep é tarã gi, zàn wuì ru nhông byi byi kut nyi é eq rajung zã é shigu hkungga pé dông mai, noqkuq rã matú chyâng lé é bang lé hkã-nhám lé wó lhoq gumjup é a nghut. ² Tarã haù wó lhoq gumjup byi é ru nghut le gi, yhangmoq nhông byi é hkyô nô pyám kó rã a nghut líhí? Hkãsu mù gã le, haù noqkuq é bang gi, banshoq é matú radàm za lhoq sanséng huí é nghut jáng, yhangmoq é yubak marã é matú, hkã-nhám le mara a bò bun lo kó rã nghut lhê. ³ Nghut kôlhang, shigu hkungga haù pé gi, zàn wuì yubak mara pé lé lhoq pun byi é zè nghut ri. ⁴ Haì mù gã le, nohtó pé eq bainám pè é sui gi, yubak mara lé huí sêng pyâm é hkyô wó dut é a nghut.

⁵ Haù mù luí, Hkrisduq, mینگkan má lé jé é hkũn, Yhang taí é gi,

"Shigu hkungga eq hkungga lé Nàng a o é nghut mù,
Nàng kúm gi, Ngá é matú gungdu hen to byi bê nghut ri.

⁶ Myi nyhé hkungga pé eq mara hkyut hkungga pé gi, Nang lé gabú nhang é a nghut.

⁷ Hau htâng, Ngò gi, 'Garai Gasang é, Ngò eq séng luí chyúmding má kã tô é eq rajung za,

Nàng ô nau é hkyô kut rã matú, Ngò, shí má nyi lhê.' nghũ taí é."*

gã ri. ⁸ Sâng-hi má, Yhang gi, "Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haù pé lé Nàng a gabú é nghut lhê." ga taí ri. Haù jep é tarã dông haù pé lé kut rã dut kôlhang taí é nghut ri. ⁹ Hau htâng má, Yhang gi, "Nàng ô nau é hkyô kut rã matú, Ngò, shí má nyi lhê." ga taí ri. Haù gi, Yhang, htang lhum dangshikaq lé htaí masat to rã matú, sâng-hi lhum lé tô pyâm é nghut ri. ¹⁰ Myit ô nau hkyô hau é yanmai, Yesuq Hkrisduq, Yhâng é gungdu lé hkungga dông banshoq é matú radàm za nhông byi é dông mai, nga-nhúng gi, lhoq chyoiyúng é hui bê nghut ri. ¹¹ Hkyangjong hkangmó gi, nyi nyi buì buì, yap mù, yhâng é hkyangjong muzó lé zui saí é nghut lhê. Yhang gi, yubak mara lé hkã-nhám lháng a wó huí séng pyám byi é, rajung zã é shigu hkungga lé, dum nhông byi byi kut é nghut lhê. ¹² Nghut kôlhang, hkyangjong mó nghut é Hkrisduq gi, yubak mara hkyut byi rã hkungga ralhum lé za, ahkyíng banshoq é matú ban nhông byi é hkũn jáng, Garai Gasâng é loqyo hkyam shut zung to bê nghut ri.

¹³ Haù hkũn mai, Yhang gi, Yhâng é gyè pé lé, Yhâng é hkyi nang jang kut byi rã lé láng nyi é nghut ri. ¹⁴ Haì mù gã le, Yhang gi, lhoq chyoiyúng é huí nyi bang lé, hkungga ralhum eq za, pyat dedú é matú lhoq gumjup byi bê nghut ri.

¹⁵ Haù Chyoiyúng Woi-nyí le, haù hkyô eq séng luí nga-nhúng lé saksé

hkâm kyô ri. Sâng-hi má, Yhang tai é gi,

¹⁶ "Haû Yhumsing tai ri, shi gi, ahkying haû lai htang má, Ngò, yhangmoq eq to rá dangshikaq nghut lhê.

Ngò gi, Ngá é tarâ pé lé, yhangmoq é myit nhiklhum hkaû má kat byi mù, yhangmoq é i-myit má kê to byi rá nghut lhê."[☆]

gâ ri. ¹⁷ Hau htang, Yhang tai jat é gi,

"Ngò gi, yhangmoq é yubak mara pé eq tarâ a chung é muzó pé lé, bún lô rá a nghut."[☆]

gâ ri. ¹⁸ Haû mù, mara haû pé lé hkyut pyâm byi bê nghut jáng, yubak marâ é matú hai hkungga le a ra lo nghut ri.

Hkam Jan Râ Hkyô

¹⁹ Haû mù luí, gumang wui é, nga-nhúng gi, Yesuq é sui èq, haû Chyoiyung Htâng é Jowò má wàng rá matú hkyak wó lum to bê nghut lhê. ²⁰ Haû gi, Yesuq é gungdu nghut é pán-gyang đông mai, nga-nhúng é matú hpóng byi bê nghut é asik eq rú dui nyi é hkyô nghut lhê. ²¹ Haû nghut é yanmai le, Garai Gasâng é yhúm lé up é gyaú é hkyangjong lé nga-nhúng wó é yanmai le, ²² nga-nhúng gi, gingtúng é lumjing hkyô mai sansêng é i-myit èq, Garai Gasâng chyáng è mù, mara bò bún é myit sôn sê é hkyô mai, nga-nhúng lé lhoq sanséng rá matú nga-nhúng é i-myit lé hpyun gyûn é hui nhâng luí, nga-nhúng é gungdu gi, sân-yúng wui èq chi byi é hui yú sháng. ²³ Nga-nhúng gi, nga-nhúng yin yu é myit myoqbyù hkyô lé zui gingtúng nyi sháng; hkâsu mù gâ le, danggidiq byi to bê Sû gi, lhumzui Sû nghut lhê. ²⁴ Chyitdap hkyô eq ge é muzó pé má, nga-nhúng gi, rayuq eq rayuq hkâsu kut

myit nhaû toq byi lhum rá hkyô lé, dat myit nyi sháng. ²⁵ Chôm huí zup lhúm nyi é hkyô lé, ra-am lhaq tô pyâm nyi kô é su, nga-nhúng gi, a tô pyâm é za, haû Buinyi chyáng lò bê nghut é lé nungmoq sê é eq rajung za, rayuq eq rayuq je riyhang myit wum byi lhúm nyi sháng.

²⁶ Nga-nhúng gi, tengmán hkyô lé sê yu é htâng má, shi-ngé ngé mara dum kut shut shut kut é nghut jáng, mara hkyut byi rá hkungga a joq lo. ²⁷ Tarâ jéyáng hkyô eq Garai Gasâng é gyè pé lé nyhê hkyô pyâm rá nghut é nhikmo-yô é myi lé za, gyuq chiq myit mai láng nyi rá dut bê nghut lhê. ²⁸ Mosheq é tarâ lé he-ngik é sù ó yuq le, saksé í sum yuq é dâng é yanmai, shogyo nhikmyin a huí é za sat pyâm é hui bê nghut lhê. ²⁹ Haû jáng, Garai Gasâng é Yhangzo lé hkyiwa ô má nâng pyeq bê sù, yhumsing lé lhoq sân-yúng byi bê nghut é dangshikaq é sui lé a chyoiyung é zè đông kut pyâm bê sù eq, jeju byi é Woi-nyi lé rhoi é sù gi, hkâ-í yhang gyaú é mara dam byi é hui ging rá nghut lhê nghú, nungmoq wó myit akô lú? ³⁰ Hkâsu mù gâ le, "Lató hpuq rá gi, Ngò ru nghut lhê; Ngò lató hpuq rá."[☆] ga le, "Haû Yhumsing gi, Yhâng é byu pé lé tarâ jéyáng rá nghut lhê."[☆] ga le, tai é Sû lé, nga-nhúng sê lhê. ³¹ Haû rú dui nyi sù Garai Gasâng é loq hkaû má byit gyó wang é gi, gyuq chiq jung yhang nghut ri.

³² Nungmoq, haû maubó lé hap yu é* htâng, wuîhke jamjau huí é má gyai yhang shituk kôluí wó jân pyâm bê nghut é, hí lhê buinyi pé lé myit bun keq. ³³ Ra-u u má, nungmoq gi, byu pé hí má de de rhoi shit é eq zing-rí é hui zo bekô nghut ri; ra-u u má, nungmoq gi, haû su hui zo bang eq rahá bo hui zo bekô

☆ 10:16 Yer 31:33 ☆ 10:17 Yer 31:34 ☆ 10:30 Tarâ Pun 32:35 ☆ 10:30 Tarâ Pun 32:36

* 10:32 Haû maubó lé hap yu é gâ é gi, gabú danglù lé sâng-hi wó hap yu é lé gâ lhê.

nghut ri. ³⁴ Nungmoq yhang, je ge é eq ru gîng nyi é zè pé wó é lé sé kô é yanmai, nungmoq gi, htông lúng bang lé shogyo nhikmyin bekô eq, nungmoq é sutzè pé lé sing yu pyám byí é bang lé, gabú myit eq jân pyám bekô nghut ri.

³⁵ Haû mù luí, nungmoq é hkyak myit lum tô é hkyô lé hkâdú pyám kó; agùn agó chyunghuq shigyaú é hui kó râ nghut lhê. ³⁶ Nungmoq gi, Garai Gasâng é ô naù hkyô lé kut é hkûn, Yhâng danggidiq byí tô é lé wó hap yù râ matú, nungmoq hkam jan râ dut é nghut lhê. ³⁷ Hkâsu mù gâ le, razup zo nghut jáng,

"Haû lé lô râ Sû gi, jé lé râ nghut mù, ahkyíng lhoq myáng râ a nghut.

³⁸ Nghut kôhang, Ngá é dingmán sù gi, lumjîng myit mai asak duì râ nghut lhê.

Yhang nungzut zut é nghut le gi, Ngò, Yhang lé myit nguì râ a nghut."^{*}

ga tô ri. ³⁹ Nghut kôhang, nga-nhúng gi, nungzut zut mù htên byoq huí é bang a nghut é za, lumjîng mù hkyi yù huí é bang ru nghut lhê.

11

Lumjîng Myit Mai

¹ Lumjîng myit nghu é gi, nga-nhúng myit myoqbyu tô é lé hkyak wó râ nghu é eq nga-nhúng a myàng shí é lé joq lhê nghu hkyak sê é hkyô nghut lhê. ² A-nham lhê bang gi, lumjîng myit haû mai Garai èq owaq é hui kô é nghut lhê.

³ Lumjîng myit mai, nga-nhúng gi, nyi mi-nyì, joq mijoq lhungháng lé Garai Gasâng é hkunmó èq hpan tô é hkyô sê gyô é nghut lhê. Haû mù, myoq èq wó myang é pé gi, byu-myang é pé mai sai htoq tô é a nghut.

⁴ Lumjîng myit mai, Abelaq gi, Ka-in kut é htoq je ge é hkungga, Garai Gasang lé nhông byí é nghut ri. Lumjîng myit mai, yhang gi, yhâng é hkungga eq séng luí Garai Gasang hkya-ôn é hkûn, dingmán sù rayuq dông owaq é hui bê nghut ri. Haû mù, lumjîng myit mai, yhang gi, shi byuq bê nghut kôhang, dang rú nyo nyi ashí nghut lhê.

⁵ Lumjîng myit mai, Enuq gi, shi é a hui zo shoq, asak shí mai mauhkûng shut shuí yu é hui bê. Yhang lé, Garai Gasang shuí ló byuq bê nghut é yanmai, yhang lé a wó myâng lo nghut ri. Hkâsu mù gâ le, yhang gi, shuí yu é a hui shí é hí má, Garai Gasang lé nguì nhâng sù rayuq dông owaq é hui sù nghut ri. ⁶ Lumjîng myit a bo é nghut le gi, Garai Gasang lé a wó nguì nhang é nghut lhê. Haî mù gâ le, Yhâng chyáng shikut luí lé jé é sù gi, Yhang nyi é hkyô lé le, lhumzui myit mai Yhang lé hô bang lé, Yhâng èq shigyaú é lé le, lumjîng râ dut é nghut lhê.

⁷ Lumjîng myit mai, Noaq gi, a myang wú shí é hkyô pé eq séng luí sidiq byi huí é hkûn, yhâng é yhum-byu wuì lé hkyi râ matú, gyuq hkunggâ é dông mai wuì-sanghpo sai bê nghut ri. Yhâng é lumjîng myit mai, mingkan lé mara byí é nghut mù, lumjîng myit mai lo é dingmán hkyo é jeju lé hkam yù sù dut bê nghut ri.

⁸ Lumjîng myit mai, Abraham gi, yhâng é muizè dông, htâng má yhang hap yù râ nghut é, Garai Gasang byí é jowò shut e ló râ matú ji yu é huí é hkûn, jìno gyo mù, yhang hká shut e ló é a sé kôhang, ê bê nghut ri. ⁹ Lumjîng myit mai, yhang gi, gó ming má nyi é byù bíng rayuq su, danggidiq byí tô é mau má nyi bê nghut ri. Yhang gi, zúm pé má lúng é nghut mù, rajung zâ

^{*} 10:38 Hbk 2:3-4

é danggidiq é muizè lé hkam yu é Isak eq Yakup le, zúm pé má lúng bekô nghut ri. ¹⁰ Hkâsu mù gà le, Abraham gi, Garai Gasâng eq azòng hên mù sai tô é, gîng é apûn awang pé eq mu é myuq lé myit myoqbyu nyi é nghut ri.

¹¹ Lumjîng myit mai, Abraham gi, yhâng é asak ipyat laî lô byuq é eq, Sarah le baùdung nghut to kôlhang, haù danggidiq byi Sû, lhumzui sù nghut lhê ga myit sôn yu é yanmai, iwa rayuq wó dut é hui bê nghut ri. ¹² Haù mù luí, yhang gi, shî gùng dông nghut kôle, yhang rayuq mai lo é awut ashín pé gi, mauhkûng mâ é kyí pé eq wuimau yàm mâ é a ung nghap é semuî myhó myô lò bê nghut ri.

¹³ Byù haù bang banshoq gi, yhangmoq shi é hkûn jé shoq lumjîng myit mai asak dui nyi kô é nghut lhê. Yhangmoq gi, danggidiq byi tô é pé lé a hap yù kó nghut ri; nghut kôlhang, haù pé lé myàng za myàng kômù, we mai te yu akô. Yhangmoq gi, myidàm htoq má gó ming byu pé eq byù bíng pé nghut é lé yín yû bekô nghut ri. ¹⁴ Haù su yín yu é byu pé gi, yhangmoq yhumsing é ming lé ho nyi é bang nghut é lé tûn shit é nghut akô. ¹⁵ Yhangmoq htoq lo é ming lé, yhangmoq myit tui nyi kô é ru nghut le gi, dum tau lô râ ahkáng wó kó râ nghut lhê. ¹⁶ Ahkuî kúm, yhangmoq gi, je ge é ming nghut é, mauhkûng mingdán lé myit tui nyi akô nghut ri. Haù mù luí, Garai Gasang gi, yhangmoq é Garai Gasang nghu é hui râ lé a hoq é nghut lhê. Hkâsu mù gà le, Yhang gi, yhangmoq é matú myuq ralhûm lajâng to byi bê yanmai nghut ri.

¹⁷ Lumjîng myit mai, Abraham gi, Garai Gasâng eq yhang lé chyam é hkûn, Isak lé hkungga ralhûm dông nhông byi bê nghut ri. Haù

gi, danggidiq pé lé hap yu to bê sù gi, yhâng é yuqzo zote lé nhông byi râ dâ é nghut lhê. ¹⁸ Garai Gasang gi, "Isak dông mai lo é lé, náng é awut ashín nghù sôn byi râ nghut lhê."^{*} ga yhang lé danggidiq byi to bê nghut kôle, yhang haù su kut é nghut ri. ¹⁹ Abraham gi, shi é mai Garai Gasang wó lhoq dui toq lhê ga myit yu ri. Taí sháng ga jâng, Isak lé, shi byuq bê mai, yhang dum wó hap yu é nghut ri.

²⁰ Lumjîng myit mai, Isak gi, Yakup eq Eso nhik é htàngnùng lhê é matú, shimân byi bê nghut ri.

²¹ Lumjîng myit mai, Yakup gi, yhang shi lô râ u má, Yosep é yhangzô nhik lé shimân byi mù, yhâng é dumbáng-u má ngè luí, no-kuq bê nghut ri.

²² Lumjîng myit mai, Yosep gi, yhâng asak htâm lô râ u lé, Israelaq byu pé Egutúq ming mai htoq lò râ eq séng luí taí mù, yhâng é showui pé eq séng luí hkâsu kut râ hkyô lé pying to bê nghut ri.

²³ Lumjîng myit mai, Mosheq é yhângnu eq yhângwâ nhik gi, yhang hku lé é htàng má, yhang lé lhamó sum hkyap haq to bekô nghut ri. Haì mù gà le, yhangnhik gi, zoshâng haù yúng é myàng kômù, hkohkam é mungdang lé a gyuq kó nghut ri.*

²⁴ Lumjîng myit mai, Mosheq gi, yhang kó lo é hkûn, Hpara-uq é byizô é yhangzo ga râ lé he-ngik pyâm ri. ²⁵ Yhang gi, yubak marâ é ngón hkyô má rayoq zo ngón kún râ malaî Garai Gasâng é byu pé eq rahá hpuzô é hui râ lé sheq hkyin yù bê nghut ri. ²⁶ Yhang gi, haù Hkrisduq é matú rhoi hui é lé, Egutúq ming mâ é sutzè htoq má je riyhang hpaudap lhê ga myit sôn yu ri. Haì mù gà le, yhang gi, yhâng é shigyaù chyunghuq lé myit myoqbyu nyi sù nghut ri. ²⁷ Lumjîng

* **11:18** Apûn 21:12 * **11:23** Haù-u lé, hkohkâm hpó gi, Israelaq pé é yuqzo zonú wui lé sat pyâm râ hkunmó hkyô tô é nghut lhê.

myit mai, yhang gi, hkohkâm hpó nhikjum yô é lé a gyuq é za, Egutuq ming mai htoq lô byuq bê nghut ri. Yhang gi, myoq éq a wó myang é sù Garai lé wó myang é sù dông, hkam jân é nghut ri. ²⁸ Lumjínq myit mai, yhang gi, haû zomún lé sat é maumang lagyô èq Israelaq byu pé é zomún lé a wó záng sháng gaq ga, Lhoqlhai Poî eq sui hpyûn é hkyô le kut hi bê nghut ri.

²⁹ Lumjínq myit mai, haû shiwa byu pé gi, Nhões Nè lé kyuq huí é myigùng htoq mai su lai byit bekô nghut ri; nghut kôlhang, Egutuq byu pé le, haû dông lai shikut wú kô é hkûn, yhangmoq gi, myup shi byuq bekô nghut ri.

³⁰ Lumjínq myit mai, shiwa byu pé, Yerihko myuq xêwâm lé nyhit nyí sô lhing é htâng má, xêwâm haû leq gyop byuq bê nghut ri.

³¹ Lumjínq myit mai, shiwa myhí Rahap gi, haû Israelaq jó wú bang lé ngingón é eq lhom hkulum yu é yanmai, jino a gyo bang eq rahá sat pyâm é a huí é nghut lhê.

³² Haû htoq lai luí, ngò haí tai jat ra shirâ lhú? Gidon, Barak, Samson, Yephtha, Dawiq, Samuelaq pé eq myiqhtoí pé é hkyô lé tai rá ahkyíng ngò a wó. ³³ Haû bang gi, lumjínq myit mai mingdán pé lé wó zân ung yù bekô, tengmán hkyô lé chung jaí bekô, danggidiq byí to bê lé wó hap yù bekô, hkanghkyi pé é nhut lé wó myhí pyám bekô, ³⁴ myiduq myishâm lé wó sat pyám bekô, shamsó mai le wó hpanq lut bekô nghut ri. Yhangmoq é wum nyhóm hkyô gi, wum taû bo byuq é dut bekô nghut ri. Yhangmoq gi, majan má a-tsam mó bò bang dut mù, maigan gyè pé lé wó ung pyám kô é nghut lhê. ³⁵ Myiwe wuî gi, yhangmoq eq sêng é shi byuq bê bang asak dum lhoq tuí huí é lé, wó yù bekô nghut ri. Góbang gi, je ge é dui toq hkyô wó yù kó sháng gaq ga, lhoq lhut é hui rá lé he-ngik

pyám kômù, zing-rî é gyai yhang hui zo bekô nghut ri. ³⁶ Ra-am gi, wuizui kut pyám byí é eq nhuq bat é hui bekô, góbang gi, shamtoq kyum hut huí é eq htóng lhùng é hui bekô nghut ri. ³⁷ Yhangmoq gi, luqgok eq dú sat é, í túm dut shoq yik hpyit é, sham èq sat pyâm é hui bekô nghut ri. Yhangmoq gi, sau-kuq eq bainám-kuq wut mù, htot lhing wún luí, myung kyuq é, zing-rî é eq rhoi pyâm é hui bekô nghut ri. ³⁸ Yhangmoq lhumzui nyí kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqhkyúng pé eq myidong pé má nyí lhing wún bekô nghut ri.

³⁹ Haû bang banshoq gi, yhangmoq é lumjínq myit é yanmai, owaq é hui bê nghut kôle, yhangmoq ó yuq le, danggidiq byí tô é lé a myang hkam yù kó nghut ri. ⁴⁰ Haí mù gâ le, nga-nhúng eq rahá za nghut jáng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhúng é matú je ge é hkyô lajâng to byi bê nghut ri.

12

Garai Gasang, Zo Wuí Lé Mho-qshit É Hkyô

¹ Haû mù luí, nga-nhúng gi, haû myhò é saksé pé mhutdùm su nga-nhúng é lhinghkyuq má joq to bê nghut é yanmai, nga-nhúng lé hkâm tang é hkyô pé jung hkangmó eq, lui za lhoq nhúng byí é yubak mara lé dú pyám mù, nga-nhúng din rá matú tô tô é hkyô lé, hkam jan lui din e ló sháng. ² Nga-nhúng gi, nga-nhúng é lumjínq hkyo é apún awang lé hí sù eq lhoq gumjup byi sù nghut é Yesuq lé wú tsuq nyí sháng. Yhang gi, Yhâng é hí má joq tô é gabú hkyo é yanmai, hoq hpû é hkyô lé haí su a ngam é za, tapzínq má shí hkâm é hkyô lé jân pyám lui,

Garai Gasâng é hkohkâm-tanghkuq é loqyo hkyam shut zung to bê nghut ri. ³Nungmoq gi, a ngú byuq râ eq myit wum a gyuí byuq kó sháng gaq, yubak dap bâng chyáng mai haû su htuq htîng é hkyô lé jân pyâm é Yesuq chyáng mai myit wum yù keq.

⁴ Nungmoq gi, yubak mara lé htuq htîng shikut é hkyô má, nungmoq é sui shun pyám shoq yhang a kut shi kó nghut ri. ⁵ Hau htoq agó, nungmoq gi, zo wuí lé đông Garai Gasang nungmoq lé wum byí é dang lé tô-myhî pyám bekô lú? Wum byi dang haû gi,

"Ngá zo ê, haû Yhumsîng mhoqshit é hkyô lé agya alhá hkâkut pyám,

Yhang, nang lé tân é hkûn, myit wum hkâgyui,

⁶ haî mù gâ le, haû Yhumsîng gi, Yhang chyitdap é bang lé mhoqshit mù, zo rayuq lé đông,

Yhang hap yu é bang yuq hkanqmó lé dam byí é nghut lhê.¹¹*

gâ é nghut ri.

⁷ Mhoqshit huí é hkyô má, wuíhkê é lé hkam jan keq. Garai Gasang gi, nungmoq lé, zo wuí lé đông kut é ru nghut lhê. Hkâsu mù gâ le, yhumsing é yhangwâ èq a mhoq é zo gi, ó wá nyi lhê lú?

⁸ Nungmoq gi, yuq hkanqmó huí lai é mhoqshit hkyô lé, a hui kô é nghut jáng, dezô pé đông nghut byuq mù, zo síng wuí a nghut lo kó. ⁹ Nga-nhúng banshoq bang gi, nga-nhúng lé mhoqshit é xângzo îwâ pé wó é bang chyat nghut mù, yhangmoq lé hkunggâ é nghut lhê. Haû nghut jáng, je riyhang, nga-nhúng é woi-nyí eq sêng é Îwâ é a-ô má nyi mù, asak duì râ dut ri myhi-nhung! ¹⁰ Nga-nhúng é xângzo îwâ pé gi, yhangmoq je ge dik bûn é lé, nga-nhúng lé rayoq zo mhoqshit

é nghut ri. Nghut kôlhang, Garai Gasang gi, Yhâng é chyoiyúng hkyô má nga-nhúng wó bo lôm shoq, nga-nhúng é gè hkyô é matú, nga-nhúng lé mhoqshit ri. ¹¹ Mhoqshit é hkyô hkanqmó gi, mhoqshit u lé ngón hkyô a nghut é za, nò hkâm hkyô nghut nyi ri. Nghut kôle, mhoqshit hkyô haû lé hkam yù bê bâng é matú gi, htâng má, nguínghón hkyô eq dingmán hkyo é ashi lhoq htoq byí ri.

¹² Haû mù luí, myûng byuq é nungmoq é loq pé eq wum nyhôm byuq é nungmoq é hkyihput pé lé wum-o lhoq kíng keq. ¹³ Hkyí hten bang a wó sô é a dut shoq, lhoq gè byí é wó hui kó sháng gaq, nungmoq so râ matú, hkyô lhoq nyhang nyí keq.

Garai Lé He-ngik Bang Dàm Byi Hui Râ Hkyô

¹⁴ Byù banshoq bang eq nguínghón shoq nyi râ eq chyoiyúng râ matú wó dut é í shikut keq. Hkâsu mù gâ le, ó yuq le, chyoiyúng hkyô a bo é gi, haû Yhumsîng lé myàng râ a nghut. ¹⁵ Ó yuq le, Garai Gasâng jeju lé a tô pyám râ matú, sidiq keq. Haû, yuq htoq lô mù, wuíhkê hkyô lhoq htoq é eq byù myo myo lé agot a-û dut nhang é nuí hko su, ó yuq lé le hkâdut nhâng kó. ¹⁶ Ó yuq le, ashop é đông gungsho zùm yap é hkyô nghut nghut, zang radún é matú, yhang wó tô é yuqzo zomún muizè ahko ahkáng lé ung zô pyám é, Garai a lom é Eso su nghut nghut, a kut râ matú sidiq keq. ¹⁷ Nungmoq sê é eq rajung za, Eso gi, htâng má, shimân jeju haû lé hkam yù nau é hkûn, he-ngik pyâm é hui bê. Yhang gi, shimân jeju haû lé ngaubyi ngau-nhap èq hô kôlhang, yhang kut é hkyô lé a wó htaí byi lo nghut ri.

¹⁸ Nungmoq gi, wó záng é eq myi duq nyi é Sinaq Bùm má le,

* 12:6 Sângkyang 3:11-12

mauchut tuq é, noq-singkyî dut é eq laidun lo é má le, ¹⁹ tut htê mying é eq, dang tai htê mying é má le, a jé é kó nghut ri. Dang htê haû lé wó gyô é bang gi, yhangmoq lé, dang a tai jat lo râ matú dung tôngbán akô nghut ri. ²⁰ Haû mù gâ le, yhangmoq gi, "Bùm haû má dusak pé záng jáng lhang, luggok eq dú sat râ dut lhê."* ga Garai Gasang hkyô tô é hkunmó lé a wó hkâm kô é yanmai nghut ri. ²¹ Haû byu-myàng hkyô gi, lúm wú gyuq hpo dut é yanmai, Mosheq lhang gi, "Ngò, gyuq nán ri."* ga tai é nghut ri.

²² Nghut kôlhang, nungmoq gi, Zi-un Bùm eq rû dui nyi é Garai Gasang é myuq nghut é mauhkung Yerusalem má, maumang lagyô pé ajùm ayò gabú ratung zup zing é jang eq, ²³ mauhkung htoq má mying kâ to huí é, zomún pé é noqkuq hpúng joq jang má, jé lé bekô nghut ri. Haû mù, nungmoq gi, byù banshoq é tarâ agyi nghut sú Garai Gasang chyáng le, lhoq gumjup huí é dingmán bâng é woi-nyi pé chyáng le, ²⁴ dangshikaq asik é gyoro so sú Yesuq chyáng le, Abelaq é sui htoq má je ge é danglù tai é, hpyùn gyùn é sui má le, jé lé é nghut bekô.*

²⁵ Nungmoq gi, dang nyô Sû lé a gyo a kut râ matú, sidiq keq. Myidàm htoq má sidiq byi é sù lé he-ngik pyâm é bang, a lut kô é nghut lhê. Haû mù, mauhkung mai nga-nhung lé sidiq byi é Su chyáng mai, nga-nhung lhing ló byuq é ru nghut le gi, je riyhang nga-nhung a wó lut râ a nghut kó lí? ²⁶ Haû Garai dang tai é u má, Yhâng é htê gi, mingkan lé lhoq nhún kat ri, akhúi kúm gi, "Ngò, mingkan lé za a nghut, mauhkung pé lé le radàm dum lhoq nhún râ nghut lhê."* ga

Yhang danggiq byi to bê nghut ri. ²⁷ "Radàm dum" gâ é dang gi, haû a wó lhoq nhún é pé wó myit to sháng gaq ga, hpan to huí é zè pé nghut é, wó lhoq nhún é pé lé huí sêng pyám râ lé gâ é nghut lhê.

²⁸ Haû mù luí, nga-nhung gi, a wó lhoq nhún é mingdán lé hap yu to bê nghut mù, jeju bun luí, hpautap é eq gyuq hkunggâ é myit mai Garai Gasang hap yù gíng é đông noqkuq sháng. ²⁹ Hkâsu mù gâ le, nga-nhung é "Garai Gasang gi, nyhê jôm é myi nghut ri".*

13

Ló Htáng Má Lhoq Pun Kyíng É Hkyô

¹ Rayuq eq rayuq, gumang yhangchang đông chyitdap lhum nyi keq. ² Byù bíng pé lé hkulúm râ hkâtô-myhí kó, hkâsu mù gâ le, ra-am gi, haû su kut nyi kô é yanmai, a sê é za maumang lagyô pé lé hkulum záng bekô nghut ri. ³ Nungmoq gi, htóng lúng bang eq rahá htóng lúng luzúm wuí đông, htóng lúng bang lé le, nungmoq yhang jamjau hui zô nyi é đông, hpuzô é bang lé le, myit bun keq.

⁴ Myiháng hkyô gi, lunglhang bâng eq hpautap é huí râ dut é nghut mù, myiháng yhuphpú gi, sân-yúng râ dut lhê. Hkâsu mù gâ le, Garai Gasang gi, su-myi sulàng lú é bang eq ashop é đông gungsho zùm yap é bang banshoq lé jéyáng râ nghut lhê. ⁵ Nungmoq é asak dui hkyô má, ngùn lé chyitdap é myit tô pyám mù, nungmoq wó é lé nhik dik nyi keq, haû mù gâ le, Garai Gasang gi,

"Hkâ-nhám le, Ngò, nàng eq a gang râ; hkâ-nhám le, Ngò, nang lé a tô pyám râ."*

* 12:20 Htoq Ló 19:12-13 * 12:21 Tarâ Pun 9:19 * 12:24 Abelaq lé gi, yhangmang Ka-in eq sat é nghut luí, yhâng é sui gi, lató-hpuq râ matú nghut ri; nghut kôlhang, Hkrisduq é sui kúm gi, hkyi yu hkyô lajang byi ri. * 12:26 Hagi 2:6 * 12:29 Tarâ Pun 4:24 * 13:5 Tarâ Pun 31:6

ga taí é nghut lhê. ⁶ Haú mù, nga-nhúng gi, hkyak lum é myit mai, "Haú Yhumsing gi, ngo lé garúm sù nghut lhê yanmai, ngò, gyuq rá a nghut. Ó yuq wá, ngo lé haí wó kut rá lhú?"[✱] nghú taí é nghut lhê.

⁷ Nungmoq lé Garai Gasâng é mungdang taí kyô é, nungmoq é hkyô-u shê bang lé, myit bun keq. Yhangmoq asak htum shoq nyi laí lo é sâmlai lé myit wú mù, yhangmoq é lumjing myit lé alik kut yù keq. ⁸ Yesuq Hkrisduq gi, a-nyí nap, hkû-nyí, htângnùng pyat dedu rajung za nghut nyi ri.

⁹ Maú nhô zâ é mhoqshit hkyô ajung jung mai éq shuí nghoq huí é bang hkâdut kó. Zo bang lé hai akyû a byí é, htúngli zoshuq èq a nghut é za, Garaí jèjù èq nga-nhúng é myit nhiklhum lé wum-o lhoq kîng yu é gi, gè hkyô nghut lhê. ¹⁰ Nga-nhúng gi, saksé zúm má do-jau é hkyangjong pé zo rá ahkáng a wó é hkungga gyap ralhú wó é nghut lhê.

¹¹ Haú hkyangjong mó gi, dusak pé é sui lé, yubak mara hkungga dông Chyoiyúng Htâng é Jowò má yu wang ri; nghut kôlháng, gungsho pé lé gi, byù nyi jowò shinggan má nyhê hkyô pyâm ri. ¹² Haú eq rajung za, Yesuq le, Yhâng é sui dông mai byu pé lé wó lhoq chyoiyúng rá matú, myuq hkum shinggan má jamjau hpuzo mù shí hkám bê nghut ri. ¹³ Haú mù luí, nga-nhúng gi, byù nyi jowò shinggan má Yhâng chyáng ê mù, Yhang hui zô é rhoi hkyô lé é bo hui zo sháng. ¹⁴ Hkâsu mù gâ le, nga-nhúng gi, mingkan shí má ru gîng nyi é myuq wó bang a nghut é za, jé lé lô rá myuq lé ho nyi é bang ru nghut lhê.

¹⁵ Haú mù luí, nga-nhúng gi, Garai Gasâng é myiêng lé yín yu é nhutwui é ashi nghut é, hkyá-on hkungga lé, Yesuq dông mai, Garai

Gasâng chyáng xoq xoq nhông byí nyi sháng. ¹⁶ Ge é hkyô kut rá eq góbang lé shuí gam chûng rá hkyô lé, hkâtô-myhí kó; hkâsu mù gâ le, Garai Gasang gi, haú sù é hkungga pé lé ô ngui nyi ri.

¹⁷ Nungmoq é hkyô-u shê bâng é jîno gyo mù, yhangmoq é ahko ahkáng ô má nyi keq. Yhangmoq gi, jihpán shit rá dut é bang dông mai nungmoq lé upzúng nyi é nghut lhê. Yhangmoq é muzó pé gi, nungmoq é matú akyû a bo é wòlai a dut é za, gabú hkyô ralhú wó dut sháng gaq, yhangmoq é jîno gyô nyi keq.

¹⁸ Ngamoq é matú kyûdung byi kó laq. Ngamoq gi, sân-yúng é myit sôn sê é hkyô wó mù, hkyô hkangmó má ge é dông asak duí rá lé ô nau lhê nghú, hkyak wó myit ri. ¹⁹ Ngò gi, nungmoq chyáng hân za wó dum jé sháng gaq, hau é matú je riyháng kyûdung byi keq nghú wum taí tsuq kat lhê.

²⁰ Sau hpúng pé é sau zúng Sù mó nghut é, nga-nhúng é Yhumsing Yesuq lé, haú ahtum abyuq é dangshikaq é sui dông, shí bê mai dum lhoq dui toq é sù, nguínón hkyô é Garai Gasang gi, ²¹ Yhang ô nau é hkyô kut rá matú ge é hkyô jung hkangmó nungmoq lé lhoq gumjup byi mù, Yesuq Hkrisduq dông mai Yhang lé gabú nhang é hkyô lé, nga-nhúng chyáng kut nyí sháng gaq. Hpungwup shingkan gi, Yesuq Hkrisduq chyáng pyat dedu ahtum abyuq ru joq nyí sháng gaq. Amen.

²² Gumang wui ê, ngò lhoq pún kyîng é dang lé nungmoq wó hkam jan kó sháng gaq nghú, wum taí tsuq kat lhê; hkâsu mù gâ le, ngò gi, nungmoq lé, laiká ratot za kâ kat é nghut lhê.

²³ Ngò gi, nga-nhúng é gumang Timohti lhoq lhut kat é hui bê hkyô lé, nungmoq lé sé nhâng nau ri.

✱ 13:6 Hkyá-on 118:6-7

Yhang shî má myap jé lé é nghut le gi, ngò, yhang eq rahá nungmoq lé, lé hui râ nghut lhê.

²⁴ Nungmoq lé shui-u bang ban-shoq eq Garai Gasâng é byu pé ban-shoq lé bo shi-kyâm byi keq. Itali ming mâ é gumang wui gi, nungmoq lé shi-kyâm kat akô nghut ri.

²⁵ Jeju gi, nungmoq ban-shoq bâng chyáng ru joq nyî sháng gaq ô.

YAKUQ Hun Kat é Laiká (James)

¹ Garai Gasang eq Yhumsing Yesuq Hkrisduq é jùn, ngò Yakuq gi, byo myín tô é Israelaq raxe í myù lé, nguingón dang shit kyô kat lhê.

*Lumjing Myit Lé Chyam É Hkyô
Eq Hpaqchyí Byéng-yá*

² Ngá gumang wui ê, nungmoq é lumjing myit lé chyam wú é hui jáng, shikut shirang sê é myit jat nyi é lé, nungmoq sê nyi lhê nghut mù, ³ wuìhke jamjau ajung jung lé htung huí é hkùn, gaù jowò mó nghut nyi lhê nghú luí myit yù keq. ⁴ Hau htoq agó, nungmoq banshoq gúm gumjup jup dut mù luí, haí le a langhpyut shoq, shikut shirang é myit gi, yhumsing kut nyi é muzó lé wó lhoq gumjup nyi sháng gaq. ⁵ Nungmoq má rayuq yuq hpaqchyí byéng-yá langhpyut tô é nghut le gi, haù banshoq bang lé, mara a hun é za, agùn agó byí nyi é Garai Gasang chyáng dúng nyi sháng gaq, haù jáng, Garai gi, yhang lé byi rà nghut lhê. ⁶ Nghut kôhang, lum shut é myit a bo é za, lumjing é myit eq dúng nyi sháng gaq, hkâsu mù gâ le, lum shut é sù gi, laidùn eq hik luí toq lo é nhông mâ é wuìhêng eq wui nyi ri. ⁷ Haù yuq gi, Yhumsing Garai chyáng mâ é haí le wó yú rà su a ngam nyi sháng gaq. ⁸ Yhang gi, myit-kó xan sù nghut luí, yhang é hkyô hkat hkangmó má, mù htang a nyang é sù nghut nyi ri.

Myung Sù Eq Wó Sù

⁹ Myung é gumang hpó gi, waq toq huí é má, wó sù gi, lhoq nyhùm huí é má, gabú gumrong nyi sháng gaq. ¹⁰ Hkâsu mù gâ le, wó sù gi, wàhu banbó su woi byuq ló rà

nghut lhê. ¹¹ Bui gi, nyé é lai eq toq lô jáng, haù wàhu nyhuí byuq ló mù, abó le yoq gyó byuq é eq, hau é yung sâm pé gi, htên byuq é su; wó sù le haù eq rajung za, yhang kut nyi é muzó má woi byuq ló rà nghut lhê.

Gunglaú É Hkyô

¹² Wuìhke jamjau huí le, wó shikut shirang nyi sù gi, hkungsô wó nyi ri; hkâsu mù gâ le, chyam wú é ban hui jáng, yhang gi, Garai Gasang lé chyitdap é bang lé, byí tô é danggidiq asak janmaù lé, wó yú rà nghut lhê.

¹³ Gunglaú huí é sù ó yuq nghut kôhang, gunglaú huí é hkùn lé, "Garai Gasang, ngo lé gunglaú nyi ri." nghú luí, a tai sháng gaq, hkâsu mù gâ le, agè ashop é hkyô gi, Garai Gasang lé wó gunglaú é a nghut, ó yuq lé le Garai Gasang gunglaú rà a nghut. ¹⁴ Nghut kôhang, ó yuq nghut le le, yhumsing é gungsho ô nau é dông, shuí láng nghoq ló é nghut le gi, agúng alaú hui bê. ¹⁵ Gungsho ô nau é hkyô kúm gi, zogùng dut jáng, mara lé hku htoq lo ri. Mara kô ding jáng, shi é má jé rà nghut lhê.

¹⁶ Ngò chyitdap é gumang wui ê, i-myit hkyô nghoq hkâ-nghoq nyi kó. ¹⁷ Gè réng é eq bying jup é chyunghuq lhunglhang gi, ahtoq shut mâ é nghut mù luí, maubó gung pê* é Yhângwa Garaí chyáng mai gyó lo é nghut ri. Yhang gi, ahpuq alik atau ahù dut é buishùm su dut rà a nghut. ¹⁸ Yhang hpan tô é amyú pé má, nga-nhung gi, sàng-hi myhing é ashi pé dut lo sháng gaq ga, Yhang gi, Yhang ô nau é hkyô cháng luí, haù tengmán é mung-dang mai, nga-nhung lé hkù to bê nghut ri.

Gyo Yu É Eq Cháng Kut É Hkyô

* 1:17 Maubó gung pé gâ é gi, bui, kyí, lhamó lé gâ lhê.

¹⁹ Ngò chyitdap é gumang wui ê, shí hkyô lé nungmoq sê nyi akô. Byù ó yuq nghut kôlhang, gyô yù râ lé han nyi sháng; dang tai râ lé a hân sháng gaq; nhik-yo râ lé le hkâhân kó. ²⁰ Hkâsu mù gâ le, byù nhik-yô é hkyô gi, Garai Gasang ô nau é dingmán é dông asak dui hkyô wó lhoq htoq râ a nghut. ²¹ Haù mù luí, achaq achyut é banshoq eq ladu láí agè ashop é pé lé lhoq san lhoq sêng pyám luí, nungmoq é i-myit lé wó hkyi yù râ matú, i-myit unghkaú má Garai Gasang hô tô é mungdang lé, nú-nhâm é myit èq hkam yu nyi keq.

²² Nungmoq gi, yhumsing gùng lé a mhaù pyám sháng gaq, haù mungdang lé wó gyô yu é bang za a nghut, haù dông châng kut é bang le nghut nyi sháng gaq. ²³ Mungdang haù lé wó gyô yù mù, a châng kut é sù ó yuq le, yhumsing é gungdu lé myoqjâm má wú sù eq wui ri. ²⁴ Yhang gi, yhâng é gungdu lé wú yù mù, myoqdong lhik é eq, yhum-sing gungdu hkâsu dut é lé tô-myhí pyám ri. ²⁵ Nga-nhúng lé wó lhoq lhut yu é gumjup é tarâ má, rago za wú tsuq nyí sù kúm gi, wó gyô yù mù tô-myhí pyám é sù a nghut, muzó èq tún shít é sù nghut é yan-mai, haù yuq gi, yhang châng kut é muzó má shimân jeju wó râ nghut lhê.

²⁶ Byù rayuq yuq, "Ngò gi, no-qquq htông lé lhoq dik sù nghut lhê." ga luí, myit to kôlhang, yhum-sing nhut shô lé a wó hkâng mù, yhumsing myit lé mhaù pyám é nghut le gi, haù yuq é noqquq htông gi, akôm za nghut nyi ri. ²⁷ Iwa Garai Gasâng é hí má sansêng é eq, râ é hkyô a bo é noqquq htông gi, wuìhke jamjau huí é chuimó chuizô pé lé, châng wú garúm é hkyô eq, mingkan htoq má é achaq achyut é hkyô lé koi pyám é hkyô nghut ri.

2

Myoqdong A Wó Hkyin Lhum

¹ Ngá é gumang wui ê, hpung-wup shingkan bo é nga-nhúng é Yhumsing Yesuq Hkrisduq lé lumjing hkyô má, byu é myoqdong lé hkâhkyin lhum kó. ² Dangké, hng loqchyop chyop luí, réng é mebu wut é sù rayuq eq ajeq amyha é mebu wut é asho awuí é sù rayuq gi, nungmoq é tarajong má wang lò kô é nghut le, ³ haù réng é mebu wut é sù lé, nungmoq lhom wú mù je hkunggâ é èq, "Shí aróng wó é jowò má zùng aq." dum, haù asho awuí é sù lé nghut jáng gi, "Mhó má yap to aq." haù su a nghut jáng, "Ngá é hkyi htâng má zùng aq." ga tai kô é nghut le gi, ⁴ nungmoq rayuq eq rayuq gamhkuí lhum luí, a ge é i-myit èq doqđân é bang dut lò bekô a nghut kó lú?

⁵ Ngò chyitdap é gumang wui ê, gyô yù keq, lumjing hkyô má wó sùt nyi luí, gidiq tô tô é mingdán é silí wunlí lé, Yhang lé chyitdap bang wó hkam yù sháng gaq ga, Garai Gasang gi, myigùng htoq má é asho awuí é bang lé hkyin yù bê a nghut kó lú? ⁶ Nungmoq kúm gi, asho awuí é sù lé a hpau a yùm kut pyám bekô nhung; wó bang sùt bang kúm gi, nungmoq lé zik zo mù luí, yhumsing é loq èq yhang, tarâ tingnyâng shut she hkyut lò bekô, a nghut kó lú? ⁷ Nungmoq eq sêng é kô dik é mying lé lháng, yhangmoq yhang rhoi dang tai bum akô, a nghut kó lú?

⁸ Haù mù luí, Chyúmdang má, "Náng gung lé nàng chyitdap é su, náng é chyangnâm má é bang lé le chyitdap aq."* ga luí, tai tô é hkohkam tarâ lé, nungmoq tsuq za châng é nghut le gi, nungmoq ge é hkyô lé kut nyi bê. ⁹ Nghut kôlhang, byu é myoqdong lé nungmoq hkyin nyi kô é nghut le gi, nungmoq mara kut nyi gù nghut

* 2:8 Nhung 19:18

bê yanmai, haû tarâ lé shut é bang lé su tarâ jéyang é huí nyi bekô râ nghut lhê. ¹⁰ Byù ó yuq nghut le le tarâ banshoq lé cháng kôlhang, haû mâ é ralhóm lhum lé shut pyám jáng gi, tarâ banshoq lé shut pyám sù dut byuq râ nghut lhê. ¹¹ Hkâsu mù gâ le, "Su-myi sulàng hkâlú."* ga luí, hkang tô é sù gi, "Byù lé hkâsat."* ga luí le, tai tô ashí. Nang su-myi sulàng a lú kôlhang, byù sat é sù nghut le gi, tarâ lé shut é sù nghut bê.

¹² Haû su mù luí, nungmoq lé lhoq lhut kat é tarâ dông jéyang doqdân é huí râ bang su, ru tai nyi keq; ru châng kut nyi keq. ¹³ Hkâsu mù gâ le, shogyo myit a bò sù gi, a shogyo é dông jéyang doqdân é huí râ nghut lhê. Shogyo nhikmyîn é hkyô kúm gi, jéyang doqdân é hkyô lé wó ông lut râ nghut lhê.

Lumjǐng Myit Eq Zui Saí É Hkyô

¹⁴ Ngá gumang wui ê, byù rayuq yuq, "Ngò gi, lumjǐng myit bo lhê." ga tai nyi kôlhang, muzó a bo lom é nghut le gi, hai akyû bò râ lhú? Lumjǐng myit haû gi, yhang lé wó hkyi yù râ lhú? ¹⁵ Gumang, gu-nhá rayuq yuq a chîn dut nyi é eq, nyí wui é zoshuq langhpyut tô é nghut le, ¹⁶ nungmoq chyáng mâ é rayuq yuq gi, yhangmoq é gungsho má râ é hkyô hai le a byí é za, yhangmoq lé, "Nungmoq wut é gùng lúm sháng gaq, zô é ùng gyi sháng gaq, ngui ngui ngón ngón ló keq." ga tai é nghut le gi, hai akyû bò kó râ lhú? ¹⁷ Haû eq rajung za, lumjǐng myit má muzó a bo é nghut le gi, shi é eq rajung za nghut nyi ri.

¹⁸ Dum rahkyô gi, "Nàng gi, lumjǐng myit bo ri, ngò gi, muzo bo lhê. Muzó a bo é nang é lumjǐng myit ngo lé tân shit wú aq, hau hkûn, ngá muzó èq ngá lumjǐng myit lé, nang lé ngò tân shit râ nghut lhê." ga luí, rayuq yuq tai

râ nghut lhê. ¹⁹ Garai Gasang rayuq za nghut é lé nang lumjǐng ri-nhung! Nghut bê, haû gi, jô é hkyô nghut nyi ri, nat gâng pé le haû su yhang lumjǐng mù gyuq nán nyi akô nghut ri.

²⁰ Kyoq a bo é byù bam ê, lumjǐng myit má muzó a bo le akôm za nghut é hkyô lé, nang sé nau lhê a nghut lhú? ²¹ Nga-nhung é Íwa Abraham gi, hkungga gyap htoq má yhangzo Isak lé shigu hkungga kut é hkûn lé, zui saí é muzó mai dingmán é sù gâ é lé wó yû bê a nghut lhú? ²² Haû mù luí, yhang é lumjǐng myit gi, yhang é muzó eq rahá za e ló é yanmai, lumjǐng myit gi, jup byíng lo é lé, nang wó myáng bê nghut ri. ²³ Haû su mù, "Abraham gi, Garai Gasang lé lumjǐng é nghut mù luí, yhang lé dingmán sù ga són byi bê."* ga luí, kê tô é Chyúmdang gi, dik to bê. Dum, yhang lé Garai Gasang é buinùm hpó ga luí le myhíng byi bê. ²⁴ Haû mù luí, byù gi, lumjǐng é myit eq baú za a nghut, zui saí é muzó èq mara hkyut san byi huí é lé, nungmoq bûn sê nyi akô.

²⁵ Haû eq rajung za, Rahap gâ é shiwa myhí gi, jowú su nhik lé lhom te yù mù luí, hkyô gó hkat dông nhang kat pyám é hkûn le, yhang zui saí é muzó mai dingmán é sù gâ é wó yû bê a nghut lhú? ²⁶ Haû su mù, gungdu má woi-nyí a bo le gi, shi é eq rajung za, haû lumjǐng myit má muzó jizó a bo le gi, shi gû nghut bê nghut ri.

3

Mhé Wui É Shô

¹ Ngá é gumang wui ê, byù myo myo sará hkâkut naú kó. Hkâsu mù gâ le, ngamoq sê é eq rajung za, sará pé gi, je riyhang htan é dông jéyang doqdân é huí zo râ nghut lhê. ² Nga-nhung banshoq bang gi, hkyô

myo myo má myit lingbat é bang chyat nghut ri. Byù rayuq yuq dâng èq a lingbat é nghut le gi, yhang gi, jup byíng sù eq yhumsing é gùng lé wó hkang é sù nghut ri.

³ Nga-nhúng myang lé nhutkyáng kyáng byi jáng, myang hau é gungdu gón lé, nga-nhúng ô nau é dông wó cháng nhang lê. ⁴ Haù mai gotú, wui-sanghpo pé lé wú wú keq, haù-í kô é sanghpo lé htan é laidùn èq mut é huì kôhang, sanghpo hkang sù gi, gyai tiq é sanghpo shap èq za, yhang ô nau é dông, haù pé lé wó hkang yu ri. ⁵ Haù eq rajung za, shô gi, tiq é gungsho za nghut kôhang, gyai gumrông nghutbùn nyi ri; wú keq, tiq dik é myizik zo gi, yoso mhanpúng mó lé wó nyé gyó nhang ri-nhung. ⁶ Shô haù gi, myi eq wui nyi ri. Nga-nhúng é gungsho má, shô haù gi, agè ashop é mingkan dut lò mù, nga-nhúng é gungsho asak lé achay achut dut nhâng luí, gungsho asak lé nyhê tuq kat ri. Haù gi, ngaraí myí èq nyhê tuq kat é nghut bê.

⁷ Dusak ajung jung, nghoq ahú hú, myí má yê é jung eq wui hkaù má nyi jung banshoq gi, wó mhê yu é jung chyat nghut mù, byu pé gi, haù pé lé mhê yu nyi akò. ⁸ Nghut kôhang, shô lé kúm gi, byù ó le a wó mhê yu kó nghut ri. Haù gi, apyí abat, agè ashop, uphkang a wó é eq, shi é jung duq èq byíng tô é jung nghut nyi ri.

⁹ Nga-nhúng gi, shô hau èq nga-nhúng é Yhumsing eq Iwa Garai lé hkya-on nyi lê; hau èq za, Garai Gasâng é gunglô dông hpan tô é waxâng zo wui lé le nhúng pyâm nyi ri. ¹⁰ Nhut ralhú za mai, hkya-ôn é dang eq nhing é dang htoq lo ri. Ngá é gumang wui ê, haù su kut é gi, a gè. ¹¹ Wuibóm radong za mai, chú nghâm é wui eq hkô é wui wó htoq rá lú? ¹² Ngá gumang wui ê, maihpáng gâm mai tsanlun shi,

tsibiyiq nú mai maihpáng shi, wó zui rá lú? Haù eq rajung za, xô ngam é wui gi, chú nghâm é wui lé wó lhoq htoq byi rá a nghut.

Ahtoq Mai Lo É Hpaqchyí

¹³ Nungmoq má, hpaqchyí byéng-yá bo é sù eq sê é dat é sù, ó nghut lhê lú? Haù yuq gi, yhang hpaqchyí bo é hkyô lé, hpaqchyí mai wó yu é, myit lhoq nyhum é hkyo èq, yhumsing zui saí é ge é muzó dông tûn shit nyí sháng gaq. ¹⁴ Nghut kôhang, nungmoq é myit má ladu lai é manon é i-myt eq, lú lhum bat zik é i-myt bo é nghut le gi, hkâ-nghutbun kó, haù tengmán hkyô lé le hkâ-mhaù pyám kó. ¹⁵ Haù sù é hpaqchyí byéng-yá kúm gi, mauhkûng htoq mai gyó lo é hpaqchyí byéng-yá a nghut, haù gi, myigùng htoq má é, gungsho ô nau é eq, nat é hpaqchyí byéng-yá chyat nghut nyi ri. ¹⁶ Hkâsu mù gâ le, manon é eq lú lhum bat zik é dut nyi le gi, ruk ruk rak rak é hkyô eq agè ashop é mù ajung jung jup hkúm nyi ri.

¹⁷ Mauhkûng htoq má é hpaqchyí byéng-yá kúm gi, sâng-hi awang má sanséng nyi ri; hau htâng má gi, nguingón hkyô lé ô nau é, myit nùm é, jino gyó é, shogyo nhikmyin sê é eq ge é ashi zui nyi mù luí, gamhkuí a bò, ahpuq alik a dut é eq, kut mhaú a sê é hpaqchyí byéng-yá nghut nyi ri. ¹⁸ Hau htoq agó, nguingón é hkyô dat sô xoq é bang gi, nguingón é shiji lé sân kat é bang nghut mù, ge é ashi wó yú kó rá nghut lhê.

4

Yhumsing Gùng Lé, Garai Gasâng Chyáng Ap To Râ Hkyô

¹ Nungmoq má gyè dut lhùm é eq mabyoq jishùm gi, hkâmai htoq lo é lú? Nungmoq akhaú má gungsho ô nau é hkyô pé ngon hkyô hô mù, majan zân lhùm é yanmai, dut htoq

lo é a nghut kó lú? ² Nungmoq yut yut myit ô nau nyi kôlhang, haî le a wó yû kó. Nungmoq sat nyi é eq manon nyi kôlhang, a wó yû kó. Nungmoq byoq lhum nyi é eq majan htoq lhum nyi kôlhang, haî le a wó yû kó; hkâsu mù gâ le, nungmoq, Garai Gasang lé a dung kô é yanmai nghut ri. ³ Nungmoq dung kôlhang, a myang yû kó nghut ri; hkâsu mù gâ le, nungmoq é ngón kún hkyô má jai chûng langsa pyám râ matú, shut é đông dúng nyi kô é yanmai nghut ri.

⁴ Su-myi sulàng lú é bang su gidíq a gîng é bang ê, mingkan ô nau é hkyô lé buinùm du é myit gi, Garai lé a ngui é myit nghut é hkyô lé, nungmoq a sé kó lú? Haû mù luí, mingkan ô nau é hkyô eq buinùm dù nau sù ó nghut kôlhang, Garai Gasang é gye nghut nyi ri. ⁵ Dum ralhum, nganhúng má Garai Gasang kat lhung tô é woi-nyí gi, manon é myit lúng nyi ri ga luí, Chyúmdang má taí é gi, akôm nghut ri nghû, nungmoq myit ngam nyi akô lú? ⁶ Nghut kôlhang, Yhang gi, je kô é jeju ru byí nyi lhê. Haû eq rajung za, Chyúmdang má,

"Garai Gasang gi, nghutbùn é bang lé hkùm zing pyám kôlhang, myit lhoq nyhum é bang lé jeju byí ri."[☆]
ga taí tô ri.

⁷ Haû mù, Garai uphkan é a-ô má ru nyi nyi keq; Nat Tsadán lé hkùm tang pyám keq; haû hkùn, yhang nungmoq chyáng mai h pang byuq râ nghut lhê. ⁸ Garai Gasang chyáng huí é keq, haû hkùn, Yhang, nungmoq chyáng huí lé lô râ nghut lhê. Yubak kut é bang ê, nungmoq é loq pé lé chí san chí sêng pyám keq. Myit koq xân é bang ê, nungmoq é myit nhikhum lé lhoq chyoí lhoq yúng to keq. Yudaq htung đông loq lé chí san chí sêng pyám keq

gâ é lichyúm gi, i-myit, gungdu lé lhoq san lhoq sêng pyám é lé gâ lhê. ⁹ Nungmoq gi, myit yón é, iyon yôn é eq ngaubyi ngau-nhap é kut nyi keq. Nungmoq é wuihâ é hkyô lé gi, iyon đông, nungmoq é gabú é hkyô lé gi, yón kuq é đông htaí pyám keq. ¹⁰ Haû Yhumsing Garai é hí má i-myit lhoq nyhum nyi keq, haû hkùn, Yhang gi, nungmoq lé lhoq toq râ nghut lhê.

¹¹ Gumang wui ê, nungmoq yhangchang a ge é đông hkâtaí hpoí lhum kó. Yhumsing é yhanggu yhangmang lé a ge é đông taí hpoí nyi é sù, haû a nghut jáng, jéyáng é sù gi, haû tarâ lé a ge é đông taí hpoí nyi mù luí, jéyáng é sù nghut nyi ri. Haû tarâ lé nàng jéyáng nyi é nghut le gi, tarâ lé châng é sù a nghut é za, tarâ jéyáng sù nàng dut nyi ri. ¹² Garai Gasang za tarâ byí tô é eq tarâ dara sù, wó hkyi yu é sù eq, wó lhoq htên é sù nghut nyi lhê. Haû é yanmai, náng é yhumkyo hpó lé jéyáng é sù nàng gi, ó yuq wa nghut lhê lú?

Gyáng Dang A Taí Râ Hkyô

¹³ "Ngamoq, hkù-nyí napmá ra-nyí nyí, wà rawà wà shut é mù, haû má razàn kô ê nyí luí, hpugá wuiloq gá mù amyat wó myang yù rà." ga taí nyi é bang ê, gyô wú keq. ¹⁴ Napmá haî dut lô rà lé lhang, nungmoq gi, a sé ko. Nungmoq é asak gi, haî nghut nyi lhê lú? Haû gi, razup rahtâng za htoq shit luí dum byuq byuq lô mù é, nghansoq eq rajung za nghut nyi ri. ¹⁵ Haû mù luí, nungmoq haû su ga taí nyi rà malaí gi, "Yhumsing Garai đông é nghut le gi, ngamoq le ru wó dui nyi mù, shí le, mhô le, wó kut rà nghut lhê." nghû luí, wó taí rà nghut lhê. ¹⁶ Ahkuí kúm gi, nungmoq é gyáng é dang đông gumrong nyi akô; haû su gumrong é hkyô banshoq gi, agê ashop é jung chyat nghut nyi ri. ¹⁷ Haû mù luí, ge é mù

sê kut to luí, a kut é sũ gi, mara kut sũ dut bê nghut ri.

5

Sùt Wó Bang Lé Sidiq Byí É Dang

¹ Sùt wó é bang ê, gyo keq, nungmoq chyáng jé lé lô rà é wuĩhke jamjau hkyo é yanmai, ngau garũ nyi keq. ² Nungmoq é sutzè gi, htên bup byuq bê nghut ri; nungmoq é wutbu wutmè le manot èq zô pyám bê nghut ri. ³ Nungmoq é hĩng eq ngùn má lháng, jogyik zuĩ byuq mù luí, haũ jogyik gi, nungmoq é mara hkyam shut saksé dut byí é eq, nungmoq é gungsho lé myi su zô pyám rà nghut lhê. Nungmoq gi, jĩhtũm buinyi shí pé má, sutzè lé za hkong to bekô nhung! ⁴ Wú keq, nungmoq é yohtung dùng yò yam nhâng mù luí, ahpau a byí é za, nungmoq mhaũ zô tô é ahpau pé garũ nyi é htê pé eq, mũ zui bang garũ é htê pé lé gi, haũ a-tsam dik shoq bo é Garai wó gyo byi bê nghut ri. ⁵ Nungmoq gi, myigùng htoq má hkik hkik hkâm hkâm wó nyi é eq, i-myt ô nau é dõng ngón hkyô chyat châng nyi bum akô. Nungmoq gi, sat rà buinyi matú yhumsing é gùng lé tsô myum to bekô nghut ri. ⁶ Haũ dingmán é sũ* lé, nungmoq mara hũn mù, sat pyám bekô. Yhang kúm gi, nungmoq lé a lhom hkũm zìng nghut ri.

Myit Hĩng Hĩng Hkam Jan Ra Râ Hkyô

⁷ Haũ mù luí, gumang wuĩ ê, haũ Yhumsing dum jé lé é buinyi jé shoq myit hĩng é èq lánng nyi keq ô! Hkyâm saĩ sũ lé wú wú keq, yhang gi, nyĩhpún mai ahpau dán é ashí lé wó yũ shoq ga mau mún eq wò htáng htáng é mau wo gyũn é jé shoq myit hĩng hĩng lánng nyi ri. ⁸ Haũ eq rajung za, nungmoq le, Yhumsing Yesuq dum jé lé rà gi, chyâng lo nyi bê nghut é yanmai,

myit hĩng é èq, i-myt lé lhoq ging lhoq tĩng to keq. ⁹ Gumang wuĩ ê, nungmoq jéyáng a hui sháng gaq, nungmoq yhangchang hkâ-nyung nyâng lhũm nyi ko. Wú keq, Tará agyì gi, hkũmdong má jé nyi to bê nghut ri.

¹⁰ Gumang wuĩ ê, haũ Yhumsing Garaĩ é myĩng eq hko kyô é myiqh-toĩ pé wuĩhke jamjau huĩ é hkũn, jân pyám é myit lé, nungmoq gi, ge é alik agàn kut yũ keq. ¹¹ Wú keq, shikut shirang é bang lé, nganhũng gi, hkungsô wó é bang nghu é nghut lhê. Yobaq hkâm jân é yanmai, Yhumsing Garaĩ gi, yhang lé htáng má myo myo dum shimân byí é hkyô lé, nungmoq wó gyô wú bê nghut lhê. Haĩ mù gâ lé, haũ Yhumsing Garaĩ gi, gyai shogyo nhikmyĩn é sũ nghut nyi ri.

¹² Ngá é gumang wuĩ ê, ban-shoq má ahkyak dik é gi, haĩ le le hkâdakâm kó. Mauhkũng lé a nghut jáng, myigùng lé lang luĩ le hkâdakâm kó. Dakam é dang gotũ lé le hkâtaĩ nyi kó. Nungmoq doqdân é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nghũ za, taĩ keq.

Lumjĩng Myit Eq Kyũdung Râ Hkyô

¹³ Nungmoq má rayuq yuq wuĩhke jamjau huĩ é nghut le gi, kyũdung nyi sháng gaq; rayuq yuq myit ngón nyi é nghut le gi, hkyá-on mahkôn hkon nyi sháng gaq. ¹⁴ Nungmoq má rayuq yuq nõhpyo huĩ é nghut le gi, nõqkuq hpúng mã é nhik bô suwũn wuĩ lé ji yũ mù, haũ bang gi, Yhumsing Yesuq é myĩng mai yhang lé xũ but byi luí, kyũdung byi kó sháng gaq. ¹⁵ Haũ su mù, lumjĩng myit èq kyũdung é dang gi, haũ nõ sũ lé lhoq gê luí, Yhumsing Garaĩ gi, haũ yuq lé lhoq toq yũ rà nghut lhê. Yhang gi, yubak mara kut

* 5:6 Dingmán é sũ gâ é danghkun lé, Chyũmlaiká ra-am má gi, dingmán é bang gâ ri.

shut é nghut kôlhang, hkyut pyám byî é hui râ nghut lhê. ¹⁶ Haû mù luî, nungmoq lhoq ge é hui kó sháng gaq, nungmoq é yubak mara lé rayuq eq rayuq yín lhum mù, kyûdung byî lhûm nyî keq. Dingmán su é kyûdung dang gi, wó dut nhâng râ a-tsam wum-o myo myo bo nyi ri.

¹⁷ Eliyaq gi, nga-nhúng su i-myit unghkaû bo é xângzo byû za nghut lhê. Nghut kôlhang, yhang gi, mau a wò sháng gaq ga, wum kat o kat kyûdung jáng, súm zan eq lhamó hkyuq hkyap tup myigùng htoq má mau a wò shoq dut byuq é nghut lhê. ¹⁸ Kyû dum dúng kat jáng, mauhkúng gi, maú wo hkyô kat byi mù, myigùng gi, yhâng é kyô shi mui shi lé lhoq htoq byî wú bê nghut lhê.

¹⁹ Ngá é gumang wuì ê, nungmoq chyáng mâ é rayuq yuq, haû tengmán hkyô mai nghoq ló byuq é hkûn, rayuq yuq gi, yhang lé tengmán hkyô shut dum wó shuí taû lo é nghut le kúm gi, ²⁰ haû shuí taû yù sù gi, yubak mara kut é sù lé, shut shai é hkyô mai tengmán hkyô shut shuí taû yù mù, myit woi-nyí lé shi é mai hkyi yù bê nghut é yanmai, yubak mara myo myo lé shuí nghop pyám byî é sù dut berâ lé, bûn nyî keq ô!

PETRUQ

Hî Dàm Hun Kat é Laiká (1 Peter)

¹ Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jìno gyo râ matú le, Yhâng é suí eq hpyûn gyûn é hui* râ matú le, haù Woi-nyí é lhoq sân-yúng nyi é muzó dông mai, Íwa Garai Gasâng é hî te sê tô é hpaqchyí má cháng luí, hkyin yù huí é bang nghut é, ² Garai Gasâng eq hkyin htoq yù luí, mingkân é byùbing dut bâng chyáng dang kyô kat lhê. Jeju eq nguingôn hkyô gi, nungmoq chyáng agùn agó joq nyi sháng gaq.

Dui Nyi É Myit Myoqbyù Hkyô

³ Hkya-on kungtôn hkyô gi, nga-nhúng é Yhumsing Yesuq Hkrisduq é Yhângwa nghut sù Garai Gasang chyáng nghut nyí sháng gaq! Yhang gi, Yesuq Hkrisduq, shí é mai dum dui toq é hkyô dông, Yhâng é gyai shogyo nhikmyin é yanmai, nga-nhúng lé, asik hku é dum hui nhâng mù, rû dui nyi é myit myoqbyù hkyô lé wó nhang é htoq agó, ⁴ nungmoq é matú mauhkung htoq má tô to byi bê nghut é, hkâ-nhám le, a hten a byoq é, agot a-ù a dut é, a hpoí byuq é mùi lé le wó nhang é nghut lhê. ⁵ Nungmoq gi, lumjingkô é yanmai, ló htàng é ahkying má lhoq htoq shit râ rì rì nghut é hkyi yù hkyô jé shoq, Garaí é hpungwup a-tsâm eq upzúng é hui bang nghut akô. ⁶ Haù mù, nungmoq gi, ahkuí razup zo, wuìhke hkyô jungkhàng jungmó má yón hpuzò é hui kó râ nghut kôlhang, gyai yhang gabú nyí keq.

⁷ Wuìhke hkyô haù pé mai, nungmoq é lumjing myit gi, jet é hkyô lé wó chyam htoq mù, myi mai jên yù kôlhang htên byoq sê é hing htoq je gyaù luí, Yesuq Hkrisduq htoq shit é hkûn, hkya-on kungtôn hkyô, hpungwup shinghang eq aróng si-tang lé, nungmoq wó kó râ nghut lhê. ⁸ Nungmoq gi, Yesuq lé a myang wú kôlhang, Yhang lé chyitdap bum akô; Ahkuí, nungmoq, Yhang lé a myàng kôlhang, Yhang lé lumjing kô é nghut mù, a ung htoq taí é eq hpungwup bo é gabú hkyô gi, nungmoq chyáng bying jup nyi ri. ⁹ Hkâsu mù gâ le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjing myit é akyù lé wó yu nyi kô é nghut ri.

¹⁰ Hkyi yù hkyô haù eq séng luí, nungmoq chyáng jé bê nghut é jeju hkyô lé taí é myiqhtoí pé gi, gyai yhang sidiq myit eq jí jí chyun chyun ho gon wú bekô nghut ri. ¹¹ Yhangmoq gi, Hkrisduq wuìhke jamjau hui luí, hpungwup shinghang wó râ nghut é hkyô lé, yhangmoq má lúng nyi é, Hkrisduq é Woi-nyí mai te taí é hkûn, hkâ-nhám nghut râ eq hkâsú é u má nghut râ hkyô lé ho gôn wú bekô nghut ri. ¹² Mauhkung mai nhang kat é Chyoiyúng Woi-nyí eq, nungmoq lé gabú danglù hko kyo bê bang mai, ahkuí nungmoq lé taí kyo bê nghut é hkyô pé lé, yhangmoq taí kô é gi, yhumsing matú do-jau é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyo pé lhâng gi, haù hkyô pé lé gyai wú nau bum akô nghut ri.

Chyoiyúng Nyi Râ Hkyô

¹³ Haù mù luí, zui saí râ matú nungmoq é i-myt lé hen to keq; yhumsing gùng yhumsing hhang

* **1:1** Yhâng é suí eq hpyûn gyûn é hui gâ é gi, Yhâng é suí eq mara chí sân pyám byi é lé gâ lhê.

nyí keq; Yesuq Hkrisduq htoq shit é hkûn, nungmoq lé byi râ nghut é jeju lé, hkyak za myit myoqbyu nyí keq. ¹⁴ Jîno gyô é zoshâng wui su, myoq a bông shí é pyat má nungmoq nyi tô é hkûn, nungmoq é agè ashop ô naù hkyô lé a châng kut é za, ¹⁵ haù nungmoq lé ji yu é Sû gi, chyoiyúng é su, nungmoq zui sai é hkyô banshoq má chyoiyúng nyí keq. ¹⁶ Hkâsu mù gà le, "Ngò gi, chyoiyúng Sû nghut é yanmai, nungmoq le chyoiyúng nyí keq."✧ ga kâ tô ri.

¹⁷ Byù yuq hkanmó é muzó lé, myoqdong a hkyin é za tarâ jéyáng é sù Íwa lé, nungmoq wut dung kô é yanmai, byùbing dông shí má nyi é u lé, Garai lé gyuq hkunggâ é myit mai asak ùi keq. ¹⁸ Hkâsu mù gà le, nungmoq gi, nungmoq é íchyí íwâ pè chyáng mai bo gyó lo é hpau a dap é asak ùi hkyô mai, htên byoq sê é ngùn, hing èq hkyi yù huí é a nghut é za, ¹⁹ gumjup é eq mara a bo é sauzo nghut sù, Hkrisduq é hpaù dik é suí èq sheq hkyi yù huí é ru nghut é lé, nungmoq sê lhê. ²⁰ Yhang gi, mau htoq xâng hkun mai hkyin yu é hui bê nghut kôlhâng, jìhtùm ahkyíng shí pé má sheq, nungmoq é matú htoq shit nhang é hui bê nghut ri. ²¹ Yhang lé, shi é mai lhoq ùi toq yù mù, hpungwup shing kang bò nhang é Garai Gasang lé, nungmoq gi, Hkrisduq dông mai lumjìng kô é nghut luí, nungmoq é lumjìng myit eq myit myoqbyù hkyô gi, Garai Gasâng chyáng nghut nyí bekô nghut ri.

²² Ahkuí kúm, nungmoq gi, haù tengmán hkyô lé châng é dông mai, yhumsing gùng yhumsing lhoq sânyúng yù bekô nghut mù, nungmoq é gumang wui lé, lhumzui é dông chyitdap bekô nghut luí, myit

nhiklhum mai, rayuq eq rayuq gyai yhang chyitdap lhum keq. ²³ Hkâsu mù gà le, nungmoq gi, htên byoq sê é amyui mai dum hkû huí é a nghut é za, Garai Gasâng é, rù ùi nyi é eq ru gîng nyi é mungdang dông, htên byoq a sê é amyui mai dum hku é hui bang ru nghut lhê. ²⁴ Hkâsu mù gà le,

"Byù lhunglhâng bang gi, wàhu mhan eq pung ri, yhangmoq banshoq bâng é hpungwup shing kang gi, yò mâ é banbó pé eq pung ri;

wàhu mhan gi, nyhuí kyuq byuq luí, banbó pé gi, yoq gyó byuq lhê;

²⁵ nghut kôlhâng, haù Yhumsing é mungdang gi, ahtum abyuq gîng nyi lhê."✧

gâ tô ri. Haù gi, nungmoq lé hko kyo bê mungdang nghut lhê.

2

¹ Haù mù luí, i-myit dù é hkyô banshoq eq mhaù zô é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkanmó pé lé tô pyám keq. ² Asik hku é zonú pé naù lé ô naù gadaù é su, woi-nyí eq sêng é jet é naù* lé ô naù gadaù nyí keq, haù jáng, nungmoq gi, hau é yanmai, nungmoq é hkyi yù hkyô má wó kô myhâng kó râ nghut lhê. ³ Hkâsu mù gà le, haù Yhumsing gi, gè sù nghut é lé, nungmoq chyam wú bekô nghut ri.

Rù Dui Nyi É Luqgok Eq Hkyin Yù Huí É Byù Myú

⁴ Byu pé mai hkyin htoq pyám kôlhâng, Garai Gasâng é matú hpau-dap luí, Yhâng èq hkyin yù huí é, rù ùi nyi é Luqgok nghut sù, haù Yhumsing chyáng nungmoq jé lé é hkûn, ⁵ nungmoq le, rù ùi nyi é luqgok pé su, woi-nyí

✧ **1:16** Nhong 11:44-45; 19:2; 20:7 ✧ **1:25** Esai 40:6-8 * **2:2** Woi-nyí eq sêng é jet é naù gâ é gi, Garai Gasâng é mungdang lé tai é nghut lhê. † **2:5** Woi-nyí eq sêng é yhùm gà é gi, noqkquq

hpúng lé tai nau é nghut lhê.

eq sêng é yhûm† saí nyi é hui luí, Yesuq Hkrisduq dông mai, Garaí eq hap yù gíng é, woi-nyí eq sêng é hkungga nhông byi rã matú, chyoiyúng é hkyangjong amyú dut bekô nghut ri. ⁶ Hkâsu mù gâ le, Chyúmdang má,

"Wú keq, hkyin yù huí é eq hpau-dap é htungchyûn luqgok racham lé, Zi-un bùm má ngò lheq tô é nghut lhê;

Yhang lé lumhkau é sù gi, hkâ-nhám le hoq hpú é hui rã a nghut."^{*}

ga taí tô ri. ⁷ Haú mù, lumjúng bang nungmoq é matú gi, luqgok haú hpaudap é nghut lhê. Nghut kôlhang, a lumjúng bâng é matú gi,

"Haú yhûm saí bang hkyin htoq pyâm é luqgok gi, htungchyûn mâ é ahkyak dik é luqgok† dut bê nghut ri."^{*}

ga le,

⁸"Byu pé lé, htúng leng rã luqgok eq myit leqbat nhâng rã luq mó cham dut bê nghut ri."^{*}

ga le, taí tô ri. Yhangmoq gi, mung-dang lé a cháng kô é yanmai, myit leqbat kô é nghut lhê. Haú dut rã lé, yhangmoq é matú masat to gú nghut bê nghut ri.

⁹ Nghut kôlhang, nungmoq gi, mauchut hkaú mai Yhâng é mauhpo maubó shut nungmoq lé wut htoq yú Su é mauhpo muzó lé wó taí pyô kó sháng gaq ga, hkyin yù huí é byuhú, hkohkâm hkyangjong amyú, chyoiyúng é byù myú, Garaí Gasang eq sêng é byu pé nghut akô nghut ri. ¹⁰ Nungmoq gi, hí lé byù ra-myú a nghut wú kôlhang, ahkuí gi, Garaí Gasâng é byù myú nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhang, ahkuí gi, shogyo nhikmyin hkyô lé wó yú bekô nghut ri.

¹¹ Chyitdap é luzúm wuí ê, nungmoq é asak woi-nyí lé majan zân nyi é, yubak mara byíng jup é ô nau gadaú hkyô lé koi pyám keq nghú, gó mûng byu pé eq byùbítng pé dông mingkan htoq má nyi é bang nungmoq lé, ngò, wum taí tsuq kat lhê. ¹² Haú a lumjúng shí é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, ngan-húng lé Garaí Gasâng eq lé kùm é buinyi má Garaí lé shigyaú kó sháng gaq, a lumjúng shí é byu pé é ahkaú má haú su ge é asak ðui hkyô dông nyi yap keq.

Uphkâng Bang Eq Yhumsíng Wui É A-ô Má Nyi Rã Hkyô

¹³ Haú Yhumsíng é yanmai, byu pé mâ é ahko ahkáng wó bang ban-shoq é a-ô má nyi keq: kô dik é ahkáng ayá wó é hkosêng é a-ô má nghut kôle, ¹⁴ shut é hkyô kut bang lé dam byi rã matú eq jô é hkyô kut bang lé shigyaú rã matú, hkosêng eq nhang tô é mauzaú pé é a-ô má nghut kôle, nyi nyi keq. ¹⁵ Hkâsu mù gâ le, ge é hkyô kut é dông, byù nâ pé é a sé a dat é dang lé nungmoq lhoq zím pyâm é gi, Garaí Gasang ô nau é hkyô nghut lhê. ¹⁶ Lut bê bang dông nyi keq, nghut kôlhang, agè ashop é hkyô lé nghop pyâm rã matú nungmoq é luthkyô lé hkâchûng kó; Garaí Gasâng é dui-nhâng zoshâng wui dông nyi keq. ¹⁷ Yuq hkangmó lé rago za hkunggâ é hkyô shit keq; lumjúng é gumang wui lé chyitdap keq; Garaí Gasang lé gyuq hkunggâ nyi keq; hkoséng lé hkungga keq.

¹⁸ Dui-nhâng zoshâng wui é, hkungga myit banshoq eq, nungmoq é yhumsíng wui é a-ô má nyi keq; ge é eq nú-nhám bâng é a-ô má za a nghut, byuwuí pé é a-ô má le nyi keq. ¹⁹ Hkâsu mù gâ le, byù

^{*} 2:6 Esai 28:16 † 2:7 Ahkyak é luqgok gâ é gi, Hkrisduq lé taí é nghut lhê. ^{*} 2:7 Hkya-on 118:22 ^{*} 2:8 Esai 8:14

rayuq gi, Garai Gasang lé bûn nyi sũ nghut é yanmai, mara dông a nghut kôlhang, wuĩhke jamjau huĩ é hkyô lé hpuzô é lé, jân pyâm é nghut le gi, hkya-on gíng é sũ nghut lhê. ²⁰ Nghut kôlhang, nungmoq gi, mara kut shut é yanmai, nhuq bat é hkâm zo luĩ, haũ lé jân nyi é nghut le gi, hai aróng wó kó râ lúh? Nghut kôlhang, nungmoq gi, ge é hkyô kut luĩ, wuĩhke huĩ zô é lé jân pyâm é nghut jáng, haũ gi, Garai Gasâng hí má hkya-on gíng é hkyô nghut lhê. ²¹ Nungmoq gi, haũ hkyo é matú ji yũ huĩ é nghut lhê; haĩ mù gâ le, Hkrisduq gi, nungmoq é matú wuĩhke hkyô huĩ é má, nungmoq lé alik dông tô to byi bê nghut mù, nungmoq gi, Yhâng é hkyĩ-kám pé lé cháng râ dut lhê.

²² "Yhang gi, hai mara le a kut shut, Yhâng é nhut mai mhaũ é lé a myàng."[✠]

²³ Yhang gi, rhoi é huĩ é hkûn, yhangmoq lé a dum taũ rhoi; wuĩhke hkyô huĩ é hkûn, kyuq é dang a taĩ. Haũ kut râ malaĩ, tengmán é dông jéyáng é Su chyáng, Yhânggùng lé ap pyâm ri. ²⁴ Nga-nhúng gi, yubak mara eq wó shi gang mù, dingmán hkyo é matú asak wó duĩ kó sháng gaq ga, Yhang gi, sik zîng má, Yhânggùng èq yhang, nga-nhúng é yubak mara lé Yhânggùng má wun pyám byi bê nghut ri; Yhâng é dàm pé é yanmai, nungmoq gi, lhoq gê byĩ é hui bekô nghut ri. ²⁵ Hkâsu mù gâ le, nungmoq gi, hkyô nghoq byuq é sau pé su dut wú kôlhang, ahkuĩ, nungmoq gi, haũ sau zúng Sũ eq nungmoq é asak woi-nyĩ lé upzúng Su chyáng lhing taũ lò bekô nghut ri.

3

Ikun Myhĩ Pé Eq Ikun Hpô Pé

¹ Ikun myhĩ pé ê, haũ eq rajung za, yhumsing é ikun hpó uphkanq

é a-ô má nyi keq; haũ hkûn, yhangmoq mâ é rayuq yuq, haũ mungdang lé a lumjîng kôlhang, ² yhumsing é asak duĩ hkyô mã é sansêng é hkyô eq hkunggâ é hkyô lé myàng kôjáng, dang dông a nghut é za, yhâng é yhumsing myhĩ é nyi yap é sâmlai dông mai yhang lé wó lhoq lhik yũ râ nghut lhê. ³ Nungmoq yúng é hkyô gi, ahtoq pyâm za nghut é, xâmban nik é dông, hîng zè mhôn chung é eq réng é mebu wut é dông mai lo é a ge nghut. ⁴ Hau é malaĩ, haũ gi, Garai Gasâng é hí má gũ bo é, nú-nhâm é eq zim za dut é woi-nyĩ é, a dat hpoĩ é yúng hkyô nghut é nungmoq é i-myt unghkaũ mã é su é yúng hkyô sheq dut râ lhê. ⁵ Hkâsu mù gâ le, gó hkûn, Garai Gasâng chyáng myit myoqbyũ bang nghut é, chyoiyúng é myiwe wuĩ gi, yhangmoq gùng lé haũ dông mhôn yũ yũ kut kô é nghut lhê. ⁶ Sarah gi, Abraham é jîno gyo luĩ, yhang lé yhâng é yhumsing ga wut é su, yhangmoq gi, ó le ô é yhumsing é ikun hpó uphkanq é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

⁷ Ikun hpô pé ê, haũ eq rajung za, yhumsing é ikun myhĩ eq rahá nyi yap e ló é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlí wó é bang dông, yhangmoq lé hkungga keq. Haũ hkûn, nungmoq é kyũdung dang lé a he-ngik pyám byi râ nghut lhê.

Ge É Kut Luĩ, Jamjau Hkam É Hkyô

⁸ Dang htâng sat é má, nungmoq banshoq bang gi, rayuq eq rayuq myit huĩ lhũm nyi keq; myit wú nô mù, gumang nhiktâng wuĩ su chyitdap lhũm nyi keq; shogyo nhik-myin myit bò luĩ, i-myt nyhum nyi

keq. ⁹ Agè ashop é lé, agè ashop é đông lató a hpuq é eq rhoi é lé rhoi é đông lató a hpuq é za, shimân byi keq; haí mù gà le, nungmoq gi, haú pè é matú, shimân jeju muì wó hkam yù kó sháng gaq ga, ji yu é hui kô é ru nghut lhê. ¹⁰ Hkâsu mù gà le, "Asak duì rà lé chyitdap é eq ge é buinyì pé lé myàng nau é sù ó yuq le, yhâng é shô lé, agè ashop é mai, yhâng é nhutwuì lé, mhaú dang tai é mai, lhoq kâng pyâm ra rà nghut lhê.

¹¹ Yhang gi, agè ashop hkyô mai lhing tau mù, ge é kut ra rà nghut lhê; yhang gi, ngu-ingón simsaq hkyô lé hô mù, châng hkat nyì ra rà nghut lhê.

¹² Hkâsu mù gà le, haú Yhumsing é myoqjí gi, dingmán bang lé wú nyi é nghut luí, yhangmoq é kyûdung dang lé, Yhâng é nohkyap eq gyo byi ri;

nghut kôlhâng, haú Yhumsing é myoqdong gi, agè ashop hkyô kut bang lé gyè đông myang pyâm ri."*

gâ tô ri.

¹³ Ge é hkyô lé, nungmoq gyai yhang kut nau nyi é nghut le gi, ó yuq wá nungmoq lé wó gun-jang rà lú? ¹⁴ Nghut kôlhâng, dingmán hkyo é matú, nungmoq wuìhke jamjau huì le lhang, nungmoq gi, hkungsô wó nyi ri. "Yhangmoq gyuq é hkyô lé hkâgyuq kó; hkâgyuq dân kó."* ¹⁵ Nungmoq kúm gi, myit nhiklhum má, Hkrisduq lé, Yhumsing đông jowò byi keq. Nang wó é myit myoqbyù hkyô lé myí é sù yuq hkangmó lé, haí mù wó é hkyô tú tai kyo rà matú, ayang hen to aq. Nghut kôlhâng, nú-nhâm é eq hkunggâ é đông haú lé kut nyi aq; ¹⁶ nungmoq é unghkaú myit san

za dut nyi keq, haú hkûn, Hkrisduq đông mai nungmoq wó é ge é a-kyang lé rhoi dang tai é bang gi, yhangmoq lumù gansang é yan-mai hoq hpú é hui kô rà nghut lhê.

¹⁷ Garai Gasang ô nau é nghut le gi, agè ashop kut luí jamjau hkâm rá htoq má, ge é kut luí jamjau hkam le gi, je ge é nghut lhê. ¹⁸ Hkâsu mù gà le, nungmoq lé Garai Gasâng chyáng shuí jé shoq, Hkrisduq gi, byu pè é yubak marâ é yanmai, radam za shí hkâm pyâm bê nghut ri; haú gi, dingmán Sù, a dingmán bâng é matú shí hkâm byi é nghut lhê. Yhang gi, gungdu shí bê nghut kôlhâng, haú Woi-nyí má lhoq dui é hui bê nghut ri. ¹⁹ Yhang gi, Woi-nyí đông, htóng lúng tô é woi-nyí pé lé ê hko kyô ri. ²⁰ Woi-nyí haú pé gi, a-nham lé, Noaq é ipyat má wuì-sanghpo lé Noaq tsuq nyi é hkûn Garai Gasang myit hng hng lánq nyi é u lé, jino a gyô é bang nghut akô. Wuì-sanghpo má wàng mù, wuì mai hkyi yù huì é byù shau luí, shit yuq za nghut akô.

²¹ Wuì haú gi, ahkuì nungmoq lé le hkyi yu é nghut é baptisma é azông nghut ri; haú gi, gungdu má é agot a-ù lé huì sêng pyám byi é a nghut é za, sansêng é unghkaú myit mai Garai Gasâng é hí má gidíq tô é ru nghut lhê. Yesuq Hkrisduq é dum dui toq hkyô đông, nungmoq gi, baptisma hkâm yù luí, hkyi yu é hui kô é nghut lhê. ²² Yesuq Hkrisduq gi, mauhkûng má doq ló luí, Garai Gasâng é loqyô hkyam má nyi tô é nghut mù, maumang lagyô pé, ahkáng ayá pé eq a-tsam pé gi, Yhâng uphkang é a-ô má nghut nyi bum akô.

4

Garai Gasâng É Matú Asak Duì Râ Hkyô

¹ Haú mù luí, Hkrisduq gi, Yhâng é gungdu má hpuzo bê nghut é

yanmai, nungmoq le, Yhang i-mytit sâmlai hau éq yhumsing gùng má gyeħking ðông wut to keq, haĩ mù gà le, yħâng é gungdu má hpuzo bê sú gi, mara eq gang bê nghut ri. ² Haũ nghut é yanmai, yhang gi, yhang nyi tũm tô é mingkan asak ðui hkyô má, agè ashop é xângzo byù ô nau é ðông a nghut é za, Garai Gasang ô nau é ðông asak ðui é ru nghut lhê. ³ Hkâsu mù gà le, nungmoq gi, laĩ lò bê ahkyíng má, a lumjĩng shĩ é byu pé hkyin kut nau é hkyô nghut é, shut é ðông nyi zô lhũm nau é i-mytit, agè ashop é yut yut ô nau é hkyô, ĩ shuq wut é hkyô, zo yê shuq yê mù achag achyut kut é hkyô, ye lai ra wut jung zoshuq lé yut yut ô nau é hkyô, achag achyut é hparà noq hkyô pé má, ahkyíng luq shoq nyi laĩ lò bê bang nghut akô. ⁴ Nungmoq gi, ladu lai shoq achag achyut kut é hkyô má, yhangmoq eq rahá a bo châng kut wún lo kô é nghut mù, yhangmoq gi, maũ byuq luĩ, nungmoq lé lumù gansang pyâm akô nghut ri. ⁵ Nghut kôlhang, yhangmoq gi, ðui nyi é bang eq shĩ bê bang lé tará jéyáng ra rĩ rĩ nghut to Sũ lé jihpán shit kyo ra kô ra nghut lhê. ⁶ Hau é yanmai, ahkuĩ shĩ byuq bê bang lé lhang gabú danglũ hko kyô é hui bekô nghut lhê; haũ gi, gungdu eq séng luĩ ga jang, yhangmoq gi, byù ðông mai tará jéyáng é hui ra eq, woi-nyĩ eq séng luĩ ga jang, Garai Gasang ðông mai asak wó ðui ra matú nghut lhê.

⁷ Lhunglhang htm ra ahkyíng gi, chyáng bê nghut ri. Haũ mù luĩ, nungmoq kyũ wó dung kó sháng gaq, bũn gyĩng luĩ, yhumsing gùng yhumsing hkan nyi keq. ⁸ Banshoq htoq má ahkyak é gi, rayuq eq rayuq gyai yhang chyitdap lhũm é hkyô nghut lhê, haĩ mù gà le, chyitdap myit gi, yubak mara myo lé wó nghop pyâm é nghut lhê. ⁹ Rayuq eq

rayuq, taĩ nyung nyâng é hkyô a bo é za, rago hkulum lhum keq. ¹⁰ Yuq hkangmó gi, yhumsing wó hkam yù bê chyunghuq eq rajung za, góbang lé dojaũ ra lhê; Garai Gasang jeju chyunghuq ajung jung lé, lhumzui é eq rago chung jai ra lhê. ¹¹ Rayuq yuq taĩ é nghut jáng, Garai Gasang é mungdang haũ eq yhang rajung za taĩ ra ra ra nghut lhê. Garai Gasang gi, lhunglhang má Yesuq Hkrisduq é yanmai hkyá-ôn é hui sháng gaq, rayuq yuq dojaũ é nghut jáng, Garai Gasang byĩ é wum-ô eq dojaũ ra ra ra nghut lhê. Haũ hpungwup shingkan eq atsam gi, Yesuq Hkrisduq chyáng pyat dedu ahtum abyuq joq nyi sháng gaq ô. Amen.

Hkristan Dut É Yanmai Jamjau Huĩ É Hkyô

¹² Chyitdap é luzúm wuĩ é, wuĩhke hkyô ðông chyam é lé nungmoq hkâm zô nyi é hkũn, nungmoq chyáng maũ nhô zâ é hkyô dut htoq bê ðông, hkágyuq ðan kó. ¹³ Hkrisduq é jamjau hkyô pé lé bo hui zô é yanmai kúm gi, nungmoq gabú keq, haũ hkũn sheq, Yhang é hpungwup shingkan eq rahá Yhang htoq shit é hkũn, nungmoq gi, gabú ðik é hui kó ra ra nghut lhê. ¹⁴ Hkrisduq é myĩng yanmai, nungmoq gi, rhoi é hui zô é nghut jáng, hkungsô wó nyi ri; hkâsu mù gà le, hpungwup shingkan bo é Woi-nyĩ ngu é, Garai Gasang é Woi-nyĩ gi, nungmoq chyáng nyi nyi ri. ¹⁵ Nungmoq má é rayuq yuq jamjau huĩ é nghut le gi, byù sat sú, hkau sú, gotũ agè ashop kut sú, góbang é mù má cháng gunjang sú ðông jamjau huĩ é a dut sháng gaq. ¹⁶ Nghut kôlhang, Hkristan rayuq ðông nungmoq jamjau huĩ é nghut le gi, hkâhoq nyĩ kó, Garai Gasang lé kúm gi, myĩng hau é yanmai hkyá-ôn nyi keq. ¹⁷ Hkâsu mù gà le, tará jéyáng ra ahkyíng gi, jé bê nghut

luí, Garai Gasâng é ikun byu pé mai hî rá nghut lhê; haú gi, nga-nhúng mai hi é nghut jáng, Garai Gasâng é gabú danglú lé a châng é bang gi, hkâsu wá dut lò rá nghut lhê lhú?

18 "Haú dingmán sù, hkyi yù hui rá wuî é nghut le gi, tarâ a hkunggâ é eq yubak dap é sù gi, hkâsu wá dut rá nghut lhê lhú?"[✧]

gâ tô ri.

19 Haú nghut mù luí, Garai Gasang ô nau é dông jamjau huî é bang gi, yhumsing gùng lé, lhumzuî é Hpân Su chyáng ap byi mù, ge é lé xoq kut nyi ra rá nghut lhê.

5

Suwún Wuî Êq Zorâm Wuî

1 Nungmoq mâ é hpúng suwún wuî lé, ngò, nungmoq é byinzùm suwún, Hkrisduq é jamjau hkyô pê é saksé nghut sù eq lhoq htoq shit rá nghut é Yhâng é hpungwup shingkang lé bo hkâm rá nghut sù dông mai sang kat kôlé: 2 Nungmoq lé ap to bê nghut é Garai Gasâng é sau hpúng* lé zúng rém bang dut mù, shuí u bang dông dojaú nyi keq; zúng rém é hkûn, a kut a ge luí kut é a nghut é za, Garai Gasang, nungmoq lé dut nhâng nau é su, yhumsing kâm é myit mai kut é nghut rá lhê; ngunzè lé a myoqnoq é za, shirông myit mai dojaú rá lhê. 3 Nungmoq é loq má ap byi to bê bang lé a up zô é za, yhangmoq é hí má alik dut nyi keq. 4 Haú jáng, Sau zúng Agyi mó† htoq shit é hkûn, nungmoq gi, hpungwup shingkang bo é, hkâ-nhám le a shum a byuq é janmaú lé myang hap yù kó rá nghut lhê.

5 Zorâm wuî ê, nungmoq le, nungmoq htoq ipyat ko bâng é a-ô má nyi keq. Nungmoq lhunglhâng bang gi, myit lhoq nyhum é hkyô lé

mebu su wut to mù, rayuq eq rayuq dojaú nyi keq, hkâsu mù gâ le,

"Garai Gasang gi, nghutbùn é bang lé hkûm zing pyám kôlhang, myit lhoq nyhum é bang lé jeju byi ri."[✧]

ga tô ri. 6 Haú mù luí, ahkying jé jáng Garai Gasang nungmoq lé waq toq sháng gaq, nungmoq gi, Yhâng é hpungwup a-tsam mó bo é loq hkaú má, yhumsing myit lé yhumsing lhoq nyhum nyi keq. 7 Nungmoq é myit chiq hkyô banshoq lé, Yhâng htoq má dú kê pyâm to keq, haí mù gâ le, Yhang gi, nungmoq é matú chiq byi nyi sù nghut lhê.

8 Yhumsing gùng lé yhumsing hkâng mù, machya nyi keq. Nungmoq é gyè nghut é nat Tsadán hpó gi, rayuq yuq lé wó zô myui pyám shoq ga, mying wún é hkanghkyi su hkat gadaú jón wún ri. 9 Yhang lé htuoq htíng pyám mù, lumjing myit má gingtíng nyi keq, haí mù gâ le, mingkan gón mâ é nungmoq é gumang wuî le, rajung zâ é jamjau hkyô pé hui zô nyi kô é lé, nungmoq sê lhê.

10 Haú mù, jeju banshoq é Garai Gasang gi, Hkrisduq má ahtum abyuq joq nyi é Yhâng é hpungwup shingkang matú nungmoq lé ji yù bê nghut luí, nungmoq razup zo jamjau huî é htâng má, Yhang yhang nungmoq lé gumjup nhâng mù, wum bô nhâng luí, ging ting ting dut nhâng rá nghut lhê. 11 Haú hpungwup a-tsam banshoq gi, Yhâng chyáng pyat dedu ahtum abyuq rú joq nyi sháng gaq. Amen.

Ló Htâng É Shi-kyám Dang

12 Lhumzuî é gumang nghù ngò sôn yu é Sila êq garúm luí, ngò gi, nungmoq lé myit wum byi dang eq, myit wum byi dang haú pé gi, Garai Gasâng é tengmán é jeju nghut é lé

✧ 4:18 Sânghkyang 11:31 * 5:2 Sau hpúng gâ é gi, lumjing bang lé gâ lhê. † 5:4 Sau zúng Agyi mó gâ é gi, Hkrisduq lé gâ é nghut lhê. ✧ 5:5 Sânghkyang 3:34

saksé hkâm é dang pé lé, tot za kê kat é nghut lhê. Tengmán é jeju háu má yap gîng nyi keq.

¹³ Babelon má nyi é, nungmoq eq rahá hkyin yù huí é Hpúng gi, nungmoq lé shi-kyâm kat ri; ngá zo dông nghut sù Markuq le, nungmoq lé shi-kyâm kat ri. ¹⁴ Rayuq eq rayuq, chyitdap bopuq puq é èq shi-kyâm lhum keq.

Nguingón hkyô gi, Hkrisduq má nghut nyi é nungmoq banshoq bâng chyáng ru joq nyi sháng gaq ô.

PETRUQ Htang Dàm Hun Kat é Laiká (2 Peter)

¹ Yesuq Hkrisduq é dui-nhâng zoshâng eq lagyo nghut sũ, ngò Simun Petruq gi, nga-nhông é Garai Gasang eq hkyi yù Sũ nghut é Yesuq Hkrisduq é dingmán hkyô dông, ngamoq su, hpaû dik é lumjîng hkyô lé hap yù bê bang chyáng dang kyô kat lhê.

² Garai Gasang eq nga-nhông é Yhumsîng Yesuq lé, nungmoq sê jat nyi é hkyô má, jeju eq nguîngón hkyô gi, nungmoq chyáng agùn agó ru joq nyi sháng gaq.

Ji Yu É Eq Hkyin Yu É Hkyô Lé Lhoq Ging Lhoq Tîng Râ Hkyô

³ Yhâng é hpungwup shîngkang eq ge é hkyô dông nga-nhông lé ji yù Sũ lé nga-nhông sê é dông mai, Garai Gasang é hpungwup a-tsam gi, asak dui hkyô eq tarâ hkungga hkyo é matú nga-nhông râ é jung hkangmó lé byi bê nghut ri. ⁴ Haû pé dông mai, Yhang gi, Yhâng é kô dik, hpaû dik é danggidiq pé nga-nhông lé byi bê nghut ri; haû hkún, nungmoq gi, haû danggidiq pé dông mai, Garaí é myit sâm lai lé wó bo hkam yù râ eq agè ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô râ nghut lhê.

⁵ Hau é yanmai yhang, nungmoq gyai yhang shikut luí, nungmoq é lumjîng hkyô má ge é hkyô lé jat yù keq; ge é hkyô má sumsé hpaqchyí lé, ⁶ sumsé hpaqchyí má yhumsîng gùng yhumsîng hkang é hkyô lé, yhumsîng gùng yhumsîng hkang é hkyô má jân shirang é hkyô lé, jân shirang é hkyô má tarâ hkunggá é hkyô lé, ⁷ tarâ hkunggá é hkyô má gumang chyitkâng myit lé, gumang

chyitkâng myit má chyitdap myit lé, jat yù keq. ⁸ Hkâsu mù gâ le, hau pé lé nungmoq wó sing myô jat lo é nghut jâng, hau pé gi, nga-nhông é Yhumsîng Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut nhâng râ a nghut. ⁹ Nghut kôlhâng, rayuq yuq gi, hau pé lé a wó é nghut jâng, chyâng é lé za myang é eq myoqjît é sũ nghut luí, laí lò bê yhâng é yubak mara pé mai lhoq sanséng byí é hui bê hkyô lé, tô-myhî pyám bê sũ nghut ri.

¹⁰ Haû mù luí, ngá é gumang wui ê, nungmoq lé ji yu é hkyô eq hkyin yu é hkyô lé, je riyhâng lhoq gingtîng nyi keq. Hkâsu mù gâ le, hau hkyô pé lé nungmoq kut nyi é nghut jâng, hkâ-nhâm le nungmoq myit leqbat kô râ a nghut; ¹¹ hau htoq agó, nga-nhông é Yhumsîng eq hkyi yù Sũ nghut é Yesuq Hkrisduq é ahtum abyuq é mingdán má agùn agó lhom pang yu é lé, nungmoq myang hap yù kô râ nghut lhê.

Chyúmdang Mâ É Myiqhtoi Dang

¹² Haû mù luí, nungmoq gi, hau pé lé sé kô é htoq agó, nungmoq wó tô é tengmán hkyô má gingtîng nyi kô é nghut kôlhâng, ngò, nungmoq lé hkâ-nhâm le hau pé lé ru lhoq pûn nyi râ nghut lhê. ¹³ Shí gungdu má ngò rû dui nyi nyi gi, nungmoq lé lhoq pûn kying byí le ge ri nghû, ngò wó myit ri; ¹⁴ haí mù gâ le, nga-nhông é Yhumsîng Yesuq Hkrisduq gi, ngo lé san za sé nhâng bê eq rajung za, hkâ-myhâng a myáng má, ngò gi, gungdu shi lé tô pyám to rá nghut é lé sê lhê. ¹⁵ Ngò htoq ló byuq é htâng má, nungmoq, hkâ-nhâm le haû pé lé ru wó bûn nyi râ lé myàng nau mù, ngò, wó dut é í shikut nyi râ nghut lhê.

¹⁶ Nga-nhông é Yhumsîng Yesuq Hkrisduq é a-tsam eq lé lo é hkyô eq séng luí, nungmoq lé ngamoq tái

kyô wú é hkûn, ngamoq gi, kut htoq yu é labyoq mhô-myi lé a châng é za, Yhâng é kô làm hkikhkâm hkyô lé myoq êq myang é saksé pé nghut lhê. ¹⁷ Hkâsu mù gà le, haû Kô Làm Hkikhkâm Hkyo é Hpungwup Shingkang mai, "Shí yuq gi, Ngò chyitdap é Ngá zo nghut lhê; Yhang má Ngò nhik dik nyi lhê."* ga taí é htê, Yhâng chyáng jé é hkûn, haû Íwa Garai Gasâng chyáng mâ é arông eq hpungwup shingkang lé Yhang wó hap yù bê nghut ri. ¹⁸ Ngamoq yhang, chyoiyúng bùm má Yhang eq rahá nyi tô é hkûn, htê haû mauhkúng mai htoq lo é lé wó gyô é nghut lhê.

¹⁹ Haû mù luí, myiqhtoi pé dang lé je lhoq ging bê hkyô, ngamoq wó é nghut lhê; haû mù, maubó lô luí, nungmoq é myit má bó-myhû htoq lo é hkûn jé shoq, mauchut tuq dut é jowò má duq nyi é myi-bung lé su, myiqhtoi dang haû lé, nungmoq gyo mù rago châng kut râ dut lhê. ²⁰ Banshoq htoq má, Chyúmdang mâ é myiqhtoi dang gi, haû myiqhtoi pé mai ó le ó lichyúm lhoq htoq yu é dông a nghut é lé, nungmoq sê to râ dut lhê. ²¹ Hkâsu mù gà le, myiqhtoi dang gi, byù ô nau é dông hkâ-nhám lé a htoq wú é za, haû Chyoiyúng Woi-nyí êq shuí u huí é bang mai, Garai Gasâng chyáng mâ é dang taí é ru nghut lhê.

2

Sará Apyoq Pé É Hkyô

¹ Nghut kôlhâng, myiqhtoi pyoq pé gi, Israellaq byù haû bâng é ahkaû má nyi wú bê nghut lhê, haû eq rajung za, nungmoq é ahkaû má lé sará apyoq pé nyi râ za nghut lhê. Yhangmoq gi, htên byoq hkyô nghut é byoq gang râ mhoqshit hkyô pé lé, haq lhoq pyo é htoq agó, yhangmoq lé wui yu é, Yhumsing lé lháng he-ngik pyám kó râ nghut lhê.

Haû mù, yhangmoq gi, yhumsing gùng yhumsing byòdàn tung htên byoq hkyô jé nhâng bekò râ nghut lhê. ² Byù myo myo gi, haû bâng é ahoq ahí hkyô má châng kó râ eq, tengmán hkyô lé taí hpoi pyám nhâng kó râ nghut lhê. ³ Sará apyoq haû bang gi, yhangmoq myoqnoq é hkyô má, yhangmoq kut htoq tô é mhô-myi dông nungmoq lé mhaú zo kó râ nghut lhê. Yhangmoq lé mara dam byi hkyô gi, gohkûn mai yhangmoq ahtoq má lhâng to gù bê nghut é htoq agó, yhangmoq é htên byoq hkyô gi, yhup myhí tô nyi é a nghut.

⁴ Hkâsu mù gà le, Garai Gasang gi, mara kut shut é maumâng pé lé lháng a ha bûn é za, ngaraí ming má hkyô pyám luí, tarâ jéyáng é hui râ hkûn jé shoq, yhangmoq lé tuq tuq chut é dong hkaû má kat tô é nghut lhê. ⁵ Yhang gi, tarâ a hkunggâ é byu pé lé dowuí tîng é hkûn, gohkun lhê é mingkan lé a ha bun nghut ri, nghut kôlhâng, dingmán é hkyô lé hko kyô é sủ Noaq eq gotú nyhit yuq lé hung yu é nghut ri; ⁶ Yhang gi, Sodom eq Gomoraq myuq lé, myi-mhop dut shoq nyhê hkyô pyám é dông mara dam byi luí, tarâ a hkungga bâng chyáng dut lò râ hkyô é azông kut tô é nghut ri; ⁷ nghut kôlhâng, tarâ a chùng bâng é achayut asak duí hkyo é yanmai myit wui myit hke huí é, haû dingmán sủ Lot lé hkyi htoq yu é nghut ri; ⁸ (hkâsu mù gà le, dingmán sủ haû gi, nyí hkanmó yhangmoq ahkaû má nyi nyi é nghut luí, tarâ a chùng é muzó hkyô lé, yhang wó myâng wó gyô é yanmai, yhâng é dingmán myit má gunjâng é hui sủ nghut ri.) ⁹ Haû su nghut é nghut jáng, Yhumsing gi, tarâ hkunggâ é byu pé lé, wuihke hkyô mai hkâsu kut hkyi htoq yù râ eq, a dingmán é bang lé, tarâ jéyáng é buinyí jé shoq, dam byí é hkyô lé

* 1:17 Mht 17:5; Mrk 9:7; Luk 9:35

xoq kut nyi é u má hkâsu kut zuí zing to rá lé sê lhê. ¹⁰ Haú yubak gungshô é htên byoq sê é yut yut ô nau hkyô châng é eq ahko ahkâng lé wú tiq bâng chyáng, haú hkyô hkyak dut rá nghut lhê.

Byù haú bang gi, ngegáng-htu é eq nghutbùn é bang nghut kôluí, mauhkúng bang lé lumù gansâng rá lé a gyuq kó nghut ri; ¹¹ nghut kôlhang, maumang lagyô pé lhang gi, wum je bo é eq a-tsam je bo é nghut kôle, haú Yhumsing é hí má, haú mauhkúng bang lé mara hun é đông lumù gansâng hkyô a wám kut kó nghut ri. ¹² Nghut kôlhang, haú sará apyoq pé gi, yhumsing a sê gyô é hkyô pé lé rhoi dang tái akô. Yhangmoq gi, haú chyup yu é hui luí, lhoq htên pyâm é hui rá matú za hku lé lo é, nhik a bo é tân jung dusak đông nghut akô; dusak haú pé su, yhangmoq le, htên byoq byuq kó rá nghut lhê.

¹³ Yhangmoq gi, nò shoq kut bekô nghut é yanmai, nò shoq kut é hui zo kó rá nghut lhê. Yhangmoq é ngón kún nau é myit gi, nyí mó káng lé lhang gungsho yut yut ô nau hkyô lhoq dik rá matú nghut ri. Yhangmoq gi, nungmoq eq rahá zoshuq poi kut kô é hkún, mhaú é lé yhangmoq é ngón hkyô kut kômù, agè agau é eq achaq achyut é bang nghut akô. ¹⁴ Yhangmoq é myoqji pé má gi, su-myi sulàng lú hkyô byíng zan to kômù, mara kut é hkyô lé hkâ-nhám le a hkying kó nghut ri; yhangmoq gi, a gíngtúng é bang lé mhoq hpyoq yu akô; yhangmoq gi, myoqnoq é hkyô má kúng é bang nghut kômù, nhíng pyâm é hui bang nghut akô. ¹⁵ Yhangmoq gi, haú dítng é hkyô lé tô pyâm to kômù, Be-ora é yhangzo nghut é, agè ashop hkyô é ahpau lé chyitdap sù Balam é hkyô má châng yông wún bekô nghut ri. ¹⁶ Nghut kôlhang, Balam gi, yhang kut shut é hkyô é yanmai,

logúng eq tân mhoqshit é hui ri; dang a dat nyo é logúng haú gi, byu é htê đông dang tái lò mù, myiqhtoi hpó a gyíng é hkyô lé hkúm tang pyâm ri.

¹⁷ Byù hau bang gi, wuì a bo é wuìtung eq, laidún eq mut tâng ló é nghansoq eq púng kômù, yhangmoq é matú gi, tuq tuq chut é mauchut hkaú lé lajang to bê nghut ri. ¹⁸ Hkâsu mù gà le, yhangmoq gi, asôm gyáng dang lé tái mù, yubak gungshô é yut yut ô nau é hkyô đông mai, haú shut shai é hkyô má asak dui nyi é mai asik za hphang htoq lo é bang lé, mhoq hpyoq yu akô nghut ri. ¹⁹ Yhangmoq gi, haú bang lé luthkyô byi rá gidíq byi kô é nghut kôle, yhangmoq gùng gi, htên byoq hkyô lhoq htoq é gungsho yut yut ô nau hkyô é jùn dut nyi akô; haí mù gà le, byù rayuq gi, yhumsing lé hai eq up sing le, hai é jùn nghut lhê. ²⁰ Byu pé gi, nga-nhùng é Yhumsing eq hkyi yù Sù nghut é Yesuq Hkrisduq lé sê é đông mai, mingkân é agè ashop hkyô mai wó hphang lut htoq bê nghut kôle, yhangmoq lé hau eq tuí yup tô é dum hui luí, ung pyâm é hui kô é nghut jáng, yhangmoq é matú, hí lhê htoq má je wuì byuq kó rá nghut lhê. ²¹ Haú dingmán é hkyô lé yhangmoq sé luí, yhangmoq lé ap byí to bê nghut é chyoiyúng hkunmó lé tô pyâm to mù lhing taú ló byuq kô é htoq má, haú hkyô lé a sê é gi, yhangmoq é matú je gè kó rá nghut lhê. ²² "Hkui gi, yhang hpat tô é lé dum taú zô lhê." gà é eq, "Waq gi, chí pyâm byí é htâng, yhâng é galhu htum má dum taú lhu lhê."* gà é sanghkyang gi, yhangmoq chyáng dik bê nghut ri.

3

Haú Yhumsing Jé Lé Râ Buinyì

¹ Chyitdap é luzúm wuì é, shí gi, nungmoq lé ngò í dá ngú rá dàm

* 2:22 Sânghkyang 26:11

ká byi kat é laiká nghut lhê. Laiká shí í lhum má, nungmoq é sansêng é i-myt lé lhoq toq râ matú taí pùn kat é laiká nghut lhê. ² Haú gi, chyoyúng myiqhtoí pé mai laí lò bê hkún taí tô é dang pé eq, nga-nhung é Yhumsing eq hkyi yù Sù mai, nungmoq é lagyô pé dông byi to bê nghut é hkunmó lé, ngò, nungmoq lé bun nhâng nau luí nghut lhê.

³ Sâng-hi má, ló htâng é buinyi pé má yhumsing é agè ashop ô nau hkyô má châng luí taí hpoi bang htoq lô râ nghut é lé, nungmoq sê gyô to ra râ nghut lhê. ⁴ Haú bang gi, "'Dum jé lé râ' ga Yhang gidíq byi é gi, hkámá lúh? Nga-nhung é íchyi íwâ pé gi, shi byuq ló bekò nghut mù, jungkhang jungmó gi, mau htoq xâng hkun mai dut é su roq dut nyi ri." ga taí kó râ nghut lhê. ⁵ Nghut kôlhang, yhangmoq gi, a-nham lé, Garai Gasâng é hkunmó mai, mauhkung pé joq é eq, myigùng gi, wuì mai dut htoq nhâng mù, wuì dông hpan tô é hkyô lé, a sé gún kut pyâm akô nghut ri. ⁶ Wuì hau èq sheq, haú hkun lhê é mingkan lé dowuì tít mù, lhoq htên pyâm é nghut lhê. ⁷ Ahkui lhê é mauhkung pé eq myigùng lé gi, tará a hkungga bang htên byoq hui râ nghut é, tará jéyâng é buinyi jé shoq, myi má nyhé râ matú, hkunmó hau èq Yhang hkong to bê nghut ri.

⁸ Nghut kôlhang, chyitdap é luzúm wuì ê, haú Yhumsing é hí má, ra-nyí gi, zanwut rahkyíng dông, zanwut rahkyíng gi, ra-nyí dông nghut é hkyô shí lé, hkátomyhí kó. ⁹ Haú Yhumsing gi, Yhâng é danggidíq lé hân a lhoq dik ga byù ra-am myit ngam pyâm é su, nyhâm é Sù a nghut. Yhang gi, ó yuq le htên byoq byuq râ lé a ô nau é yanmai, yuq hkangmó myit lhing rá lé za ô nau mù, nungmoq lé myit hîng byi nyi é nghut lhê.

¹⁰ Nghut kôlhang, haú Yhumsing

é buinyi gi, hkau sù su a bûn nùng má jé râ nghut lhê. Haú buinyi má, mauhkung pé gi, mying hum htê eq byuq byuq râ nghut lhê; duqbó-gùng pé gi, myí èq lhoq htên pyâm é hui luí, myigùng eq haú má é joq mijoq gi, nyé gyô byuq râ nghut lhê.

¹¹⁻¹² Joq mijoq gi, haú hkyô dông lhoq htên pyâm é hui râ nghut é yanmai, nungmoq gi, hkasú é byu pé dut ra râ lúh? Nungmoq gi, haú Garai Gasâng é buinyi lé ho nyi é eq buinyi haú hân za jé râ lé ô nau nyi é hkún, chyoyúng é eq tará hkunggá é asak duí hkyô dông nyi ra râ nghut lhê. Buinyi haú gi, mauhkung pé lé, myí èq lhoq htên pyâm luí, duqbó-gùng pé le, lúm nyé luí, nyé yui pyâm é buinyi dut râ nghut lhê. ¹³ Nghut kôlhang, nga-nhung gi, Garai é danggidíq nghut é, dingmán hkyô é yhúm, mauhkung asik eq myigùng asik lé, myoqbyu nyi é bang nghut lhê.

¹⁴ Haú nghut mù luí, chyitdap é luzúm wuì ê, nungmoq gi, haú hkyô lé myoqbyu é bang nghut kô é yanmai, Yhang é hí má achaq achyut a dut é eq mara hân rá hkyô a bo é za, Yhang eq nguínón nyi rá hkyô lé gyai yhang shikut nyi keq. ¹⁵ Nga-nhung é chyitdap gumang Poluq gi, yhang lé, Garai Gasang byi tô é hpaqchyí byéng-yá èq, nungmoq chyáng ká byi bê eq rajung za, nga-nhung é Yhumsing é myit hîng hkyô gi, hkyi yù hkyô nghut é lé matsing to keq. ¹⁶ Poluq gi, yhang ká é laiká pé banshoq má, haú hkyô pé eq séng luí rajung za ká shit tô ri. Yhang é laiká hkaú pé má, ra-am gi, sê gyo wuì é hkyô pé bo é yanmai, a mhòq wú é bang eq a gingtíng é bang gi, gotú Chyúmdang pé lé lichyúm htaí lhik pyâm kô é su, yhangmoq lichyúm htaí lhik pyâm kômù, yhumsing htên byoq hkyô kut yu nyi akô nghut ri.

¹⁷ Haú mù luí, chyitdap é luzúm

wuî ê, nungmoq gi, shí hkyô lé sê
to gù nghut é yanmai, tarâ a chûng
bâng é shut shaî hkyo èq nungmoq
lé a wó shuí nghoq yû râ eq, nung-
moq é gaû é jowò mai a wó byit gyó
byuq sháng gaq, yhumsing gùng
yhumsing upzúng nyî keq. ¹⁸ Nga-
nhûng é Yhumsing eq hkyi yù Sú
nghut é Yesuq Hkrisduq é jeju eq
hpaqchyî hkyô má, nungmoq kô
myhang lò kó sháng gaq. Hpung-
wup shing kang gi, Yesuq Hkrisduq
chyáng, ahkuî le, ahtum abyuq le,
ru joq nyî sháng gaq ô! Amen.

YOHAN Hî Dàm Hun Kat é Laiká (1 John)

Asak Mungdang

¹ Ngò gi, haù sâng-hi mai joq nyi mù, ngamoq wó gyô wú bê é, ngamoq é myoq eq myang wú bê é, ngamoq rago za wú wú bê é, ngamoq é loq eq záng wú bê é, asak mungdang eq sêng é hkyô lé, nungmoq lé taí kyô kat lhê. ² Asak haù gi, htoq shit bê nghut mù, ngamoq gi, haù lé myang wú luí, saksé hkám bê; haù Íwa eq rahá nyi wú é, ngamoq chyáng htoq shit bê nghut é ahtum abyuq é asak haù lé nungmoq lé taí kyô lhê. ³ Ngamoq eq zùm yap é hkyô lé, nungmoq le wó sháng gaq nghú, ngamoq gi, myang wú bê eq wó gyô wú bê hkyô lé, nungmoq lé taí kyô lhê. Ngamoq gi, haù Íwa eq le, Yhâng zo Yesuq Hkrisduq eq le, zùm yap nyi é bang nghut lhê. ⁴ Ngamoq é gabú hkyô byíng Jup sháng gaq nghú, ngamoq gi, nungmoq lé shí hkyô ká byí kat lhê.

Maubó Hkaù Má Sô Nyi Râ Hkyô

⁵ Garai Gasang gi, maubó nghut lhê; Yhâng chyáng mauchut ratsuí lháng a bò nghut ri. Shí hkyô gi, Yhangzô chyáng mai ngamoq wó gyô yù luí, nungmoq lé taí kyô é danglù nghut lhê. ⁶ Nga-nhung gi, Yhang eq zùm yap nyi lhê nghú taí kôlhang, mauchut hkaù má ru sô nyi bum é nghut jáng, nga-nhung gi, mhaù é bang dut mù, haù tengmán hkyô dông asak a dui é bang nghut ri. ⁷ Nghut kôlhang, Yhang gi, maubó má nghut nyi é eq rajung za, nga-nhung le haù maubó má sô nyi é nghut le gi, nga-nhung rayuq eq rayuq zùm yap nyi bê nghut luí, Yhang zo Yesuq é sui gi, nga-nhung

é mara banshoq lé lhoq sâng-yúng pyám byi râ nghut lhê.

⁸ Mara a bò nghú nga-nhung taí é nghut le gi, yhumsing gùng yhumsing mhaù pyám luí, haù tengmán hkyô gi, nga-nhung chyáng a bò nghut ri. ⁹ Nghut kôlhang, nga-nhung gi, yhumsing é mara lé yín yu é nghut jáng, Yhang gi, wó lum é sù eq tengmán é sù nghut é yanmai, nga-nhung é mara lé hkyut pyám byi luí, a ding a mán é hkyô banshoq mai le, nga-nhung lé lhoq sâng-yúng byi râ nghut lhê. ¹⁰ Nga-nhung gi, mara a kut shut nghú taí é nghut jáng, nga-nhung mai Yhang lé mhaù sù nghú chyô pyám é nghut luí, Yhâng é mungdang gi, nga-nhung má a bò nghut ri.

2

Hkrisduq Gi, Nga-nhung Lé Garúm Sù

¹ Ngò chyitdap é zo wuí ê, ngò gi, nungmoq mara a kut shut kó sháng gaq nghú, nungmoq lé shí hkyô ká byí kat lhê. Nghut kôlhang, rayuq yuq mara kut shut é nghut le gi, nga-nhung é matú haù Íwâ chyáng bo taí xoq byí é, Yesuq Hkrisduq gâ é Dingmán Sù lé, nga-nhung wó lhê. ² Yhang gi, nga-nhung é yubak mará é matú, shíhtai gunglik hkungga nghut nyi ri. Nga-nhung é yubak mará é matú baú za a nghut, mingkan gón mâ é byu pê é yubak mará é matú le nghut nyi ri.

³ Nga-nhung gi, Yhang hkyô tô é hkunmó pé lé châng kut é nghut jáng, Yhang lé nga-nhung rago sé bê nghut é hkyô lé, wó sé bê nghut ri. ⁴ Byù rayuq yuq mai, "Ngò gi, Yhang lé rago sê lhê." ga taí kôlhang, Yhang hkyô tô é hkunmó lé a châng kut é nghut jáng, haù yuq gi, byù mhaù nghut luí, tengmán hkyô gi, yhang má a bò nghut ri. ⁵ Ó yuq nghut kôlhang, Garai Gasang é mungdang lé châng kut nyi é nghut

jáng, Yhang lé chyitdap é myit gi, haú yuq má gè gè byíng jup bê nghut ri. ⁶ Yhang má asak dui nyi lhê ga taí é sù ó yuq nghut kôlhang, Yesuq kut bê eq rajung za, châng kut râ lhê. Haú hkûn sheq, nga-nhúng gi, Yhang má nghut nyi bê hkyô lé, wó sê lhê.

Hkunmó Asik

⁷ Chyitdap é luzúm wuî ê, ngò gi, nungmoq lé hkunmó asik ká byí kat é a nghut é za, haú sâng-hi mai nungmoq wó to bê hkunmó axau sheq ru nghut lhê. Hkunmó axau shí gi, nungmoq wó gyô wú bê mungdang nghut nyi ri. ⁸ Nghut kôlhang, ngò gi, nungmoq lé hkunmó asik ká byí kat lhê; hau é tengmán hkyô lé, Yhang má le, nungmoq má le, byu myàng ri; hkâsu mù gâ le, haú mauchut gi, laí ló byuq luí, haú tengmán é maubó gi, duq nyi gù bê nghut ri.

⁹ Ngò gi, maubó hkaú má nghut nyi lhê ga luí, yhumsing é gumang lé a jú é sù ó yuq nghut kôlhang, haú mauchut hkaú má ru nghut nyi ashí. ¹⁰ Yhumsing é gumang lé chyitdap é sù ó yuq nghut kôlhang, haú maubó má asak dui nyi é nghut mù luí, yhang má myit leqbat nhâng râ hkyô haí le a bò nghut ri. ¹¹ Nghut kôlhang, yhumsing é gumang lé a jú é sù kúm gi, haú mauchut hkaú má nghut nyí luí, haú má sô lhing jón wún ri; haú mauchut gi, yhang lé myoq lhoq chít to byí é yanmai, yhang gi, hká shut e ló nyi é hkyô lé a sé nghut ri.

¹² Chyitdap é zo wuî ê, Yhâng mying é yanmai, nungmoq é mara pé hkyut pyám byi hui bekô nghut luí, nungmoq lé ngò ká kat é nghut lhê.

¹³ Íwâ pé ê, nungmoq gi, haú sâng-hi mai nyi é Sù lé sé bekô nghut é yanmai, nungmoq lé ngò ká kat é nghut lhê.

Zorâm wuî ê, nungmoq gi, haú agè ashop sù lé úng pyám bekô nghut é yanmai, nungmoq lé ngò ká kat é nghut lhê.

Chyitdap é zo wuî ê, nungmoq gi, haú Íwa lé sé bekô nghut é yanmai, nungmoq lé ngò ká kat é nghut lhê.

¹⁴ Íwâ pé ê, nungmoq gi, haú sâng-hi mai nyi é sù lé sé bekô nghut é yanmai, nungmoq lé ngò ká kat é nghut lhê.

Zorâm wuî ê, nungmoq gi, wum-o bo é eq, haú Garai Gasâng é mungdang nungmoq chyáng dui nyi é nghut mù, haú agè ashop sù lé ung pyám bekô nghut é yanmai, nungmoq lé ngò ká kat é nghut lhê.

Mingkan Lé A Chyitdap Râ Hkyô

¹⁵ Mingkan eq mingkan htoq má é haí le lé, hkâchyitdap kó. Byù rayuq yuq, mingkan lé chyitdap é nghut le gi, haú Íwa lé chyitdap é myit, yhâng chyáng a bò nghut ri. ¹⁶ Hkâsu mù gâ le, mingkan htoq má joq é lhunglhang gi, gungsho ô nau é hkyô, myoqjí yut yut ô nau é hkyô, yhumsing wó é eq kut é hkyô lé gumrong é pé chyat nghut ri. Haú gi, Íwâ chyáng mai htoq lo é a nghut, haú mingkan mai htoq lo é ru nghut lhê. ¹⁷ Mingkan eq mingkan ô nau hkyô pé gi, laí ló byuq râ nghut lhê; nghut kôlhang, haú Garai Gasang ô nau é hkyô lé kut é sù gi, ahtum abyuq dui nyi rá nghut lhê.

Hkrisduq É Gye Pé

¹⁸ Chyitdap é zo wuî ê, shí gi, ló htâng é ahkyíng nghut bê; haú anti-hkrisduq* gi, lé lo nyi ri gâ é lé, nungmoq wó gyô wú bê eq rajung za, ahkuí lhang, anti-hkrisduq myo myo gi, jé lé bekô nghut ri. Hau é yanmai, nga-nhúng gi, ló htâng

* 2:18 Anti-hkrisduq ngû é lichyúm gi, Hkrisduq lé gyè kut é sù lé gâ lhê

é ahkýing nghut bê hkyô lé wó sé bê nghut ri. ¹⁹ Yhangmoq gi, nga-nhung é hpúng mai htoq ló byuq bê bang nghut kôle, gè gè ga yang, nga-nhung eq a sêng é bang nghut akô. Hkâsu mù gâ le, nga-nhung eq sêng é nghut jáng, yhangmoq gi, nga-nhung eq nyi to râ nghut lhê, nghut kôlhang, yhangmoq htoq ló byuq bekô nghut é yanmai, yhangmoq rayuq lháng nga-nhung eq a sêng é hkyô lé tân shit bê nghut ri.

²⁰ Nghut kôlhang, nungmoq gi, haù Chyoiyúng Sù mai xù but byí é hui† bekô nghut mù luí, nungmoq banshoq bang haù tengmán hkyô lé sê akô nghut ri. ²¹ Haù tengmán hkyô lé nungmoq a sé kôluí, nungmoq lé ngò kâ kat é a nghut; haù hkyô lé nungmoq sé gù nghut luí le, haù mhaù é hkyô gi, tengmán hkyô mai lo é a nghut é lé nungmoq sé gù nghut luí le, nungmoq lé ngò kâ kat é nghut lhê. ²² Mhaù é sù gi, ó yuq nghut lhê lú? Haù Yesuq gi, Hkrisduq a nghut ga he pyâm é sù nghut ri. Haù Íwa eq Yhangzo lé hengik é sù gi, anti-hkrisduq yhang nghut nyi ri. ²³ Haù Yhangzo lé hengik sù ó yuq nghut kôle, haù Íwa lé sé sù a nghut. Haù Yhangzo lé hap yu é sù kúm gi, haù Íwa lé le sé bê sù nghut lhê.

²⁴ Haù sâng-hi mai nungmoq wó gyô wú bê é hkyô pé lé, nungmoq i-myit má ru bo nyi keq. Haù nghut jáng, nungmoq gi, haù Yhangzo eq Íwa chyáng nyi nyi râ nghut lhê. ²⁵ Haù gi, nga-nhung lé Yhang byí tô é ahtum abyuq é asak wó yù râ gâ é danggidiq nghut ri.

²⁶ Ngò gi, nungmoq lé hkyô shuí nghoq shikut nyi bãng é hkyô eq sêng luí, nungmoq lé shí gù kâ kat é nghut lhê. ²⁷ Nungmoq chyáng kúm gi, Yhâng chyáng mai xù but jeju lé nungmoq wó yù bekô nghut

mù luí, mhoqshit râ góyuq a ra lo nghut ri. Nghut kôlhang, haù Yhâng é xù but jeju gi, hkyô hkangmó má nungmoq lé mhoqshit byi mù, haù gi, tengmán nyi é nghut luí, mhaù é hkyô haì le a bo é za, nungmoq lé mhoqshit byi nyi é eq rajung za, Yhâng chyáng nungmoq nyi nyi keq.

²⁸ Chyitdap é zo wui ê, nga-nhung gi, Yhang jé lé mù htoq shit é hkún, Yhâng é hí má a gyuq a kyum é, hoq a hpu é, wó dut râ matú Yhâng chyáng ru nyi nyi keq.

²⁹ Yhang gi, dingmán sù nghut é lé, nungmoq sé bê yanmai, dingmán hkyô lé kut é sù ó yuq nghut kôle, Garai Gasang mai hkú kat é sù nghut é hkyô lé, nungmoq sé akô nghut ri.

3

Garai Gasâng É Yhangzô Pé

¹ Nga-nhung gi, haù Garai Gasâng é yhangzô pé ga wut râ hui bê nghut é yanmai, haù Íwâ é chyitdap myit gi, nga-nhung ahtoq má hkâ-í yhang ko nyi ri myhi-nhung! Nga-nhung gi, yhangzô pé yhang nghut bu-nhung! Mingkan gi, Yhang lé a sé é yanmai, nga-nhung lé le a sé nghut ri. ² Chyitdap é luzúm wui ê, ahkuí, nga-nhung gi, Garai Gasâng é yhangzô pé nghut nyi to kôlhang, nga-nhung hkâsu dut râ hkyô lé, a tân shit shi nghut ri. Nghut kôlhang, Hkrisduq htoq shit é hkún, nga-nhung gi, Yhang su dut râ nghut é hkyô lé, nga-nhung sê lhê; hkâsu mù gâ le, Yhang hkâsu nghut é hkyô lé roq yhang, nga-nhung myàng râ nghut lhê. ³ Myit myoqbyù hkyô shí lé, Yhâng chyáng má wó tô é bang ó yuq nghut kôle, Yhang sâng-yúng é eq rajung za, yhumsing gùng lé lhoq san lhoq yúng nyi ri.

⁴ Mara kut é sù ó yuq nghut kôle, tarâ lu lai é sù nghut ri; gè

† 2:20 Xù but byí é hui gâ é lichyúm gi, Hkrisduq chyáng mai, Chyoiyúng Woi-nyí lé myang hap yu é lé gâ lhê.

gè ga jang, mara gi, tarâ lu lai é hkyô nghut nyi ri. ⁵ Nghut kôlhang, Yhang gi, nga-nhúng é yubak mara lé hkyô nghut byi râ matú, pô htoq bê hkyô lé nungmoq sé akô; Yhâng chyáng mara a bò nghut ri. ⁶ Yhang má dui nyi é sù ó yuq nghut kôle, mara a xoq kut nyi nghut ri; mara xoq kut nyi sù ó yuq nghut kôle, Yhang lé a myàng, a sé shi nghut ri.

⁷ Chyitdap é zo wui ê, nungmoq lé ó yuq eq le hkyô a shui nghoq kó sháng gaq; Yhang gi, dingmán é eq rajung za, dingmán é hkyô lé kut é sù ó yuq nghut kôle, dingmán nyi ri. ⁸ Mara kut nyi é sù gi, nat Tsadán chyáng mâ é nghut nyi ri; hkâsu mù gà le, Tsadán haú gi, sâng-hi mai yhang mara kut nyi bê nghut ri. Haú Garai Gasâng é Yhangzo gi, Tsadán é muzó lé lhoq hpyoq lhoq hten râ matú pô htoq le é nghut lhê. ⁹ Garai Gasâng chyáng mai hku kat é sù ó yuq nghut kôle, Yhâng é amyui bo to é nghut é yanmai, mara a xoq kut lo nghut ri; haú yuq gi, Garai Gasang chyáng mai hku kat é hui bê nghut é yanmai, mara wó xoq kut lo râ a nghut. ¹⁰ Ó yuq nghut kôle, dingmán é hkyô a kut é eq, yhâng gumang lé a chyitdap é sù gi, Garai Gasâng yhangzo a nghut. Hau é yanmai, ó pé gi, Garai Gasâng é yhangzô pé nghut é, ó pé gi, nat Tsadán é yhangzô pé nghut é hkyô lé, san za nga-nhúng wó sê yu ri.

Rayuq Eq Rayuq Chyitdap Lhum Râ Hkyô

¹¹ Nga-nhúng rayuq eq rayuq chyitdap lhum râ lhê gà é hkyô haú gi, sâng-hi mai nungmoq wó gyô yù bê danglù nghut ri. ¹² Haú agè ashop sù eq le sêng é, yhanggu lé sat pyâm é Ka-in su a ge kut. Yhang gi, haú mù lui yhanggu lé sat pyâm lhê lú ga le, yhâng é muzó pé gi, agè ashop hkyô, yhanggu é muzó pé gi, dingmán é hkyô nghut é yanmai

nghut ri. ✧ ¹³ Ngá é gumang wui é, nungmoq lé mingkân eq a ngui a jú kut kôlhang, hkâmaú kó. ¹⁴ Nga-nhúng gi, nga-nhúng é gumang wui lé chyitdap é yanmai, shi byuq é mai wó lut lui asak dui é hkyô lé, wó sê é nghut lhê. Chyitdap myit a bò sù gi, shi é hkyô má lúng tô ashí nghut ri. ¹⁵ Yhâng é gumang lé a ngui a jú é sù gi, byù sat sù dut râ nghut lhê; byù sat sù ó yuq chyáng nghut kôle, ahtum abyuq é asak a bo é hkyô lé, nungmoq sé nyi akô.

¹⁶ Yesuq Hkrisduq gi, nga-nhúng é matú Yhâng é asak byi pyâm bê lé wú jáng, chyitdap myit hkâsú é nghut é hkyô lé, nga-nhúng wó sê ri. Nga-nhúng le, gumang wui é matú, nga-nhúng é asak lé byi pyâm gíng ri. ¹⁷ Ó yuq nghut kôlhang, mingkan sutzè wó to lui, yhâng gumang hpó asho awui dut nyi é lé myàng kôlhang, a shogyô yu é nghut jáng, haú Garai Gasâng é chyitdap myit gi, yhâng chyáng hkâsu wó bò râ lú? ¹⁸ Chyitdap é zo wui ê, nga-nhúng gi, dang nhut shô mai za a nghut, muzó eq tengmán é dông le chyitdap nyi sháng. ¹⁹ Haú hkûn, nga-nhúng gi, tengmán hkyô eq séng bê bang nghut é lé wó sê é eq, nga-nhúng é i-myt mai nga-nhúng lé mara hun lò hkangmó, Garai Gasâng é hí má nga-nhúng i-myt wó ngón nyi bê nghut ri. ²⁰ Hkâsu mù gà le, Garai Gasang gi, nga-nhúng myit é htoq má je kô é sù nghut mù, jung hkangmó lé sê nyi ri.

²¹ Chyitdap é luzúm wui ê, nga-nhúng é i-myt mai nga-nhúng lé mara a hun é nghut le gi, Garai Gasâng hí má nga-nhúng gyuq kyûm râ hkyô a joq lo nghut ri. ²² Nga-nhúng gi, Yhang hkyô tô é hkunmó pé lé châng kut é eq Yhang lé gabú nhang é hkyô haú lé le kut é yanmai, nga-nhúng dúng é hkyô lhunglhang lé, Yhâng chyáng

mai wó yù rã nghut lhê. ²³ Yhang hkunmó hkyô tô é eq rajung za, Yhâng zo Yesuq Hkrisduq é mying má lumjúng é eq, rayuq eq rayuq chyitdap lhúm é hkyô gi, Yhang hkyô tô é hkunmó yhang nghut bê. ²⁴ Yhang hkyô tô é hkunmó pé lé, châng kut é bang gi, Yhang má dui nyi bê nghut mù, Yhang le haú bâng chyáng dui nyi bê nghut ri. Yhang nga-nhúng chyáng dui nyi bê hkyô lé, nga-nhúng lé Yhang byi tô é Woi-nyí đông nga-nhúng wó sê yu é nghut lhê.

4

Woi-nyí Pé Lé Gôn Wú Rã Hkyô

¹ Chyitdap é luzúm wuê ê, woi-nyí hkangmó lé hkâlumjúng ko, woi-nyí haú pé gi, Garai Gasâng chyáng mã é nghut é, a nghut e lé gôn wú keq; hkâsu mù gâ le, myiqhtoi pyoq pé myo myo gi, mingkan htoq má jón wún bekô nghut ri. ² Garai Gasâng é Woi-nyí lé nungmoq wó sê yù rã hkyô gi, shí đông nghut lhê: haú Yesuq Hkrisduq gi, gungsho đông jé lé bê ga, yin yu é woi-nyí hkangmó gi, Garai Gasâng chyáng mã é nghut lhê. ³ Nghut kôlhang, Yesuq Hkrisduq lé a yin yu é woi-nyí hkangmó gi, Garai Gasâng chyáng mã é a nghut. Woi-nyí haú gi, lé lo nyi ri ga nungmoq wó gyô wú bê; ahkuí lhang mingkan htoq má nyi to gù nghut é anti-hkrisduq é woi-nyí nghut ri.

⁴ Chyitdap é zo wuê ê, nungmoq gi, Garai Gasâng chyáng mã é nghut mù luí, yhangmoq lé ung pyám bekô nghut ri. Hkâsu mù gâ le, nungmoq má lúng to Sú gi, mingkan má nyi to su htoq je kô ri. ⁵ Yhangmoq gi, mingkan eq sêng é bang nghut lhê mù luí, mingkan hkyam đông taí bum akô; mingkan zo wuê le yhangmoq é dang lé gyo byi akô nghut ri. ⁶ Nga-nhúng gi, Garai Gasang eq sêng é bang nghut lhê; Garai Gasang lé sê é sú ó yuq

nghut kôle, nga-nhúng é dang lé gyô ri; nghut kôlhang, Garai Gasang eq a sêng é sú gi, ngamoq é dang lé a gyo nghut ri. Shí hkyô lé wú jáng, tengmán hkyô é Woi-nyí eq hkyô shuí nghoq é woi-nyí lé, nga-nhúng sê gam hkoq yù bê nghut ri.

Garai Gasang Gi, Chyitdap Myit

⁷ Chyitdap é luzúm wuê ê, nga-nhúng gi, rayuq eq rayuq chyitdap lhúm nyi sháng; hkâsu mù gâ le, chyitdap myit gi, Garai Gasâng chyáng mã é nghut ri. Chyitdap myit bò sú ó yuq nghut kôle, Garai Gasâng chyáng mai hku kat é hui bê sú nghut luí, Garai Gasang lé sé sú nghut ri. ⁸ Chyitdap myit a bo é sú ó yuq nghut kôle, Garai Gasang lé a sé sú nghut ri; hkâsu mù gâ le, Garai Gasang gi, chyitdap myit nghut lhê. ⁹ Garai Gasang gi, Yhang Zô é yanmai nga-nhúng asak wó duí sháng gaq ga, Yhang Zo zote lé mingkan htoq má nhang kat byi bê nghut ri. Haú gi, Garai Gasang mai nga-nhúng lé, Yhâng é chyitdap myit tân shit é hkyô nghut ri. ¹⁰ Nga-nhúng gi, Garai Gasang lé chyitdap é a nghut, Garai Gasang sheq nga-nhúng lé chyitdap luí, nga-nhúng é yubak marâ é matú, shihtáí gunglik hkungga dut sháng gaq ga, Yhang Zo lé nhang kat byi é nghut ri; haú gi, chyitdap myit yhang nghut bê. ¹¹ Chyitdap é luzúm wuê ê, Garai Gasang gi, nga-nhúng lé haú-í yhang chyitdap é nghut jáng, nga-nhúng le rayuq eq rayuq chyitdap lhum rã dut lhê. ¹² Garai Gasang lé ó yuq eq le, hkânhám lhang myang wú é a nghut; nghut kôlhang, nga-nhúng rayuq eq rayuq chyitdap lhúm nyi é nghut jáng, Garai Gasang gi, nga-nhúng má nyi nyi bê nghut luí, Yhâng é chyitdap myit gi, nga-nhúng má gumjup rã nghut lhê.

¹³ Garai Gasang gi, nga-nhúng lé, Yhâng é Woi-nyí byi to bê nghut é yanmai, Yhâng chyáng nga-nhúng

dui nyi bê hkyô lé le, Yhang nga-nhung má nyi nyi bê hkyô lé le, nga-nhung sé bê nghut ri. ¹⁴ Haù Ìwa gi, Yhang Zo lé mingkân é hkyi yù Sù dut sháng gaq ga nhang kat é hkyô lé, ngamoq myàng luí, saksé hkâm lhê. ¹⁵ Ó yuq nghut kôlhang, Yesuq gi, Garai Gasâng é Yhangzo nghut ri ga yín yu é nghut le gi, yhang má Garai Gasang nyi nyi bê nghut luí, yhang le Garai Gasâng chyáng dui nyi bê nghut ri. ¹⁶ Nga-nhung gi, Garai Gasâng eq nga-nhung lé chyitdap é hkyô lé, sé luí lumjínng nyi lhê; Garai Gasang gi, chyitdap myit nghut lhê; chyitdap myit má nyi nyi é sù ó yuq nghut kôle, Garai Gasâng chyáng dui nyi bê nghut luí, Garai Gasang le haù yuq má nyi nyi bê nghut ri. ¹⁷ Haù đông mai, chyitdap myit gi, nga-nhung chyáng gumjup bê nghut luí, nga-nhung gi, tarâ jéyáng é buinyi má a gyuq a kyum é myit wó yù rá nghut lhê; hkâsu mù gâ le, nga-nhung gi, mingkan shí má Yhang su dut nyi bê nghut ri. ¹⁸ Chyitdap myit má gyuq é hkyô a bò nghut ri; gyuq é hkyô gi, mara dam byí é hkyô eq sêng é nghut mù luí, gumjup é chyitdap myit gi, gyuq é hkyô lé hkat htoq pyâm ri. Haù gyuq é myit bò sù gi, chyitdap myit má gumjup sù a nghut.

¹⁹ Yhang hí nga-nhung lé chyitdap bê nghut é yanmai, nga-nhung le chyitdap nyi lhê. ²⁰ Byù rayuq yuq gi, "Ngò, Garai Gasang lé chyitdap lhê." ga taí kôlhang, yhang é gumang lé a jú é nghut jáng, haù yuq gi, byù mhaù rayuq nghut ri; hkâsu mù gâ le, yhumsing byu-myang é gumang lé lhang a chyitdap é sù gi, a byu-myang é Garai Gasang lé wó chyitdap rá a nghut. ²¹ Garai Gasang lé chyitdap é sù ó yuq le, yhumsing gumang lé le chyitdap rá lhê gâ é dang haù gi,

nga-nhung é matú, Yhang mai hkyô tô é hkunmó nghut lhê.

5

Garai Gasâng É Yhangzo Lé Lumjínng Hkyô

¹ Yesuq gi, haù Hkrisduq nghut ri ga lumjínng é sù ó yuq nghut kôle, Garai Gasâng chyáng mai hku kat bê sù nghut ri; Ìwa lé chyitdap é sù ó yuq nghut kôle, yhang zo lé le chyitdap é nghut bê. ² Garai Gasang lé chyitdap nyi mù, Yhang hkyô tô é hkunmó pé lé châng kut nyi é nghut le gi, Garai Gasâng é yhangzô pé lé le, chyitdap nyi é hkyô lé, nga-nhung wó sê yu é yanmai, ³ Garai Gasang hkyô tô é hkunmó pé lé châng kut é gi, Yhang lé chyitdap é hkyô nghut ri. Yhang hkyô tô é hkunmó pé gi, wòlai mó a nghut. ⁴ Hkâsu mù gâ le, Garai Gasâng chyáng mai hku kat bê sù ó yuq nghut kôle, mingkan lé ung pyâm bê nghut ri. Nga-nhung é lumjínng myit gi, mingkan lé nga-nhung ung pyâm é ongdang hkyô nghut ri. ⁵ Yesuq gi, Garai Gasâng é Yhangzo nghut é lé lumjínng é sù mai lai luí, mingkan lé wó ung pyâm é sù gi, ó yuq wá nghut lhê lhu?

⁶ Haù yuq gi, wuì eq sui* mai lé é sù, Yesuq Hkrisduq yhang nghut nyi ri. Yhang gi, wuì mai za lé é a nghut, wuì mai le, sui mai le, lé é sù nghut lhê. Woi-nyí gi, tengmán hkyô nghut é yanmai, shí hkyô lé saksé hkâm byí ri. ⁷ Hkâsu mù gâ le, Woi-nyí le, wuì le, sui le, haù sùm lhum é saksé hkâm akò nghut ri; ⁸ haù sùm lhum gi, rajung za nghut akò. ⁹ Nga-nhung gi, byu é saksé lé lhom yu lhê; nghut kôlhang, Garai Gasâng é saksé gi, haù htoq je kô nyi ri. Hkâsu mù gâ le, Garai Gasang gi, Yhang Zo eq sêng é hkyô lé saksé byí é yanmai nghut ri. ¹⁰ Garai Gasâng é Yhangzo

* 5:6 Wui eq sui ngu é gi, Yesuq baptisma hkam yu é hkyô eq shí hkâm é hkyô lé taí nau é nghut ri.

lé lumjǐng é sũ gi, saksé haũ lé yhâng é i-myt má wó bê nghut ri; Garai Gasang lé a lumjǐng é sũ kúm gi, Yhang lé byũ mhaũ rayuq ga chyó pyám bê nghut ri; hkâsu mù gâ le, Garai Gasang mai Yhang Zo eq sêng é hkyô saksé hkâm é lé, yhang a lumjǐng é yanmai nghut ri. ¹¹ Nga-nhúng lé, Garai Gasang byĩ é ahtum abyuq é asak gi, saksé haũ nghut nyi ri. Asak haũ gi, Yhang Zô chyáng bo ri. ¹² Garai Gasâng é Yhangzo lé wó sũ gi, asak haũ lé wó bê; Yhang Zo lé a wó sũ gi, asak haũ lé le a wó nghut ri.

Ahtum Abyuq Asak

¹³ Garai Gasang é Yhangzô é myìng lé lumjǐng é bang nungmoq gi, ahtum abyuq é asak wó bê hkyô lé, nungmoq sé kó sháng gaq nghũ, shĩ hkyô pé lé ngò ká byĩ kat é nghut lhê. ¹⁴ Nga-nhúng haĩ dũng le le, Garai Gasang ô nau é dõng nghut jáng gi, Yhang gyo byi râ nghut lhê; haũ gi, Yhâng é hí má nga-nhúng a gyuq a kyum wó wâng râ matú nghut ri. ¹⁵ Haũ mù, nga-nhúng haĩ dũng kôlhang, Yhang gyo byĩ é lé nga-nhúng sê é nghut le gi, Yhâng chyáng nga-nhúng dũng é hkyô lé, nga-nhúng wó yu é lé, nga-nhúng sê lhê.

¹⁶ Ó yuq nghut kôle, yhumsing é gumang hpó mai shĩ a gíng é mara kut shut é lé, myang é nghut le gi, haũ yuq é matú kyũdung byi râ lhê. Haũ hkũn, Garai Gasang gi, haũ yuq lé asak byi râ nghut lhê. Haũ gi, shĩ a gíng é mara wó bâng é matú taĩ é nghut lhê. Shĩ gíng é mara le joq lhê; nghut kôlhang, hau é matú dũng râ lhê nghũ, ngò taĩ nyi é a nghut. ¹⁷ A dingmán é hkyô lhunglhang gi, mara nghut lhê; nghut kôlhang, shĩ a gíng é mara le joq lhê.

¹⁸ Garai Gasâng chyáng mai hku kat bê sũ ó yuq nghut kôle, mara a xoq kut lô é hkyô lé nga-nhúng sê lhê; hkâsu mù gâ le, haũ Garai

Gasâng é Yhangzo gi, haũ yuq lé wú zúng nyi é nghut mù luĩ, haũ agè ashop sũ gi, haũ yuq lé wó záng htung râ a nghut. ¹⁹ Nga-nhúng gi, Garai Gasâng é yhangzô pé nghut é lé le, mingkan gón lé haũ agè ashop su èq up tô é hkyô lé le, sê lhê. ²⁰ Hau htoq agó, Garai Gasâng é Yhangzo jé lé luĩ, haũ tengmán Sũ lé sé sháng gaq ga, nga-nhúng lé sê gyô é nyan byi bê hkyô lé le, nga-nhúng sê lhê. Nga-nhúng gi, Yhang Zo Yesuq Hkrisduq má nghut nyi bê eq rajung za, haũ tengmán Sũ má le nyi nyi bê nghut lhê. Yhang gi, haũ tengmán é Garai Gasang eq ahtum abyuq é asak nghut nyi lhê.

²¹ Chyitdap é zo wuĩ è, hparà lhó pé lé koi pyám nyi keq.

YOHAN Htang Dàm Hun Kat é Laiká (2 John)

¹ Ngò suwún hpó gi, tengmán hkyô má ngò chyitdap é, hkyin yù huí é náng hpô-myhí eq nung zô pé lé, dang kyô kat lhê; ngò baú za a nghut, haú nga-nhung chyáng lúng to lú, ² nga-nhung eq ahtum abyuq ru joq nyi râ nghut é tengmán hkyô é yanmai, haú tengmán hkyô lé sê é lhunglhang bang le, nungmoq lé chyitdap nyi lhê.

³ Haú Íwa Garai Gasang eq Íwá é Yhangzo Yesuq Hkrisduq chyáng má é jeju, shogyo nhikmyin hkyô eq nguínón hkyô gi, haú tengmán hkyô eq chyitdap hkyô má, nga-nhung eq rahá joq nyi sháng gaq.

⁴ Haú Íwa mai nga-nhung lé hkunmó hkyô tô é eq rajung za, nung zô pé ra-am gi, haú tengmán hkyô má châng nyi é hkyô lé, ngò wó sê é yanmai, gyai yhang gabú nyi lhê. ⁵ Chyitdap é hpô-myhí ê, nga-nhung rayuq eq rayuq chyitdap lhum sháng nghû, ahkuí, ngò, nang lé dúng kat lhê; shí gi, sâng-hi mai nga-nhung wó gyô yù bê hkunmó lé sheq, nang lé ngò ká byí kat é nghut lhê; hkunmó sik ralhú a nghut. ⁶ Yhang hkyô tô é hkunmó eq rajung za, nga-nhung cháng kut é nghut jáng gi, chyitdap é hkyô nghut bê. Sâng-hi mai nungmoq wó gyô yù bê eq rajung za, Yhang hkyô tô é hkunmó gi, nungmoq chyitdap myit bo nyi râ matú nghut lhê.

⁷ Hkâsu mù gâ le, Yesuq Hkrisduq gi, gungsho dông jé lé é hkyô lé a yín yu é, mhaú zô é byù myo myo gi, mینگkan htoq má jón wún bekô nghut ri; haú sù é byù gi, haú mhaú zo sù eq anti-hkrisduq dut râ nghut lhê. ⁸ Nungmoq zui saí bê muzó é

akyû lé a lhoq hpyuq é za, gumjup é shigyaú chyunghuq lé, nungmoq wó hkam yù kó sháng gaq, yhum-ing gùng sidiq nyi keq. ⁹ Hkrisduq mhoqshit é dang lé a châng é za, lá chyan é sù ó yuq nghut kôle, Garai Gasang lé a wó é sù nghut ri; haú mhoqshit é dang lé ru châng nyi é sù kúm gi, haú Íwa lé le, Yhangzo lé le, wó bê sù nghut ri. ¹⁰ Mhoqshit é dang haú lé a wun é byù rayuq yuq, nungmoq chyáng jé lé é nghut le gi, haú yuq lé nungmoq é yhúmhaú má hkâwâng nhâng kó; yhang lé hkâlhóm xoq yù kó. ¹¹ Hkâsu mù gâ le, haú yuq lé lhom xoq yu é sù gi, yhang é agè ashop é muzó má lóm bê sù nghut ri.

¹² Ngò gi, nungmoq lé ká byí kat râ hkyô myo myo joq kôlhang, laiká hkyap eq kajung-chi lé a kâm chùng naù. Nga-nhung é gabú hkyô wó gumjup sháng gaq, ngò, nungmoq chyáng tsuq za lé jé mù, nungmoq eq myoqdong hkyûm kut nyo lhum râ lé myit myoqbyu nyi lhê.

¹³ Hkyin yù huí é náng nhâ é yhangzô pé gi, nang lé shi-kyâm kat akô nghut ri.

YOHAN Súm Dam Dàm Hun Kat é Laiká (3 John)

¹ Ngò suwún hpó gi, haù tengmán hkyô má ngò chyitdap é, ngá é chyitdap luzúm Ge-u lé dang kyô kat lhê.

² Chyitdap é luzúm hpó ê, ngò gi, haù náng é asak woi-nyí nyì-ngón yuqyo nyi é eq rajung za, nàng ngingón wángzán rà eq hkyô hkat hkangmó má, nyì-ngón yuqyo nyi sháng gaq nghú, kyúdung byí kat lhê. ³ Hkâsu mù gâ le, ngò gi, gumang wui ra-am, ngá chyáng lé jé mù, haù tengmán hkyô má nàng lhumzui é hkyô lé le, haù tengmán hkyô má nàng hkâsu kut xoq châng nyi é hkyô lé le, lé taí kyo kô é hkûn, gyai yhang gabú é yanmai nghut lhê. ⁴ Haù tengmán hkyô má, ngá zô pé châng nyi é hkyô lé, ngò wó gyô é hkûn gabú é í, gotú gabú hkyô a wó lo nghut ri.

⁵ Chyitdap é luzúm hpó ê, haù gumang wui gi, mau we bíng pé nghut to kôlhang, nàng yhangmoq lé lhom garúm yu é hkyô má, nàng gi, lhumzui nyi ri. ⁶ Yhangmoq gi, haù noqkuq hpúng mâ é bang lé, náng é chyitdap myit eq séng lui taí kyo bekô nghut ri. Nàng gi, Garai Gasâng hí má gingdán é dông, yhangmoq é hkyowui matú garúm lui, dé kat é nghut jáng, ge é muzó jizó kut é nghut bê. ⁷ Hkâsu mù gâ le, yhangmoq gi, Hkrisduq é mying hau é matú htoq ló kôluí, a lumjúng bâng chyáng mai hai lhang a hap yù kó nghut ri. ⁸ Haù mù lui, nga-nhúng gi, haù tengmán hkyo é matú rahá za wó chóm zui saí sháng gaq, haù sù é byu pé lé lhom hkûlum yù rà lhê.

⁹ Ngò gi, haù noqkuq hpúng lé laiká ká byí kat bê nghut lhê; nghut kôlhang, haù ushuq kut nau é sù

Diotrehpi gi, ngamoq lé a lhom hap yù nghut ri. ¹⁰ Haù mù lui, ngò lé jé jáng gi, ngamoq lé a jo a âng é dang taí é eq lumù gansang é, yhang kut é muzó lé, taí hpyí kyo rà nghut lhê; yhang gi, haù hkyô lé myit a dik shí é nghut mù lui, yhang yhang le gumang wui lé a lhom hkûlum yù, lhom hkûlum yù naù bang lé le, yhang mai hkûm zing pyám lui, yhangmoq lé haù noqkuq hpúng mai hkat htoq pyám ri.

¹¹ Chyitdap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sù gi, Garai Gasâng chyáng mâ é nghut bê; agè ashop é hkyô kut é sù gi, Garai Gasang lé a myàng shí é sù nghut ri. ¹² Demetri ge é hkyô lé, yuq hkangmó mai le, haù tengmán hkyo èq le, saksé hkám byí akò nghut ri; ngamoq le, yhang ge é hkyô lé saksé hkám byí lhê; haù ngamoq hkâm é saksé gi, têng é hkyô nghut é lé, nàng sê lhê.

¹³ Ngò gi, nang lé kê kat ra hkyô myo myo joq kôlhang, kâjung eq kâjung-chi dông a kê kat nau lo. ¹⁴ Ngò gi, a myáng má, nàng eq myang huí lhum rà lé myit myoqbyu tô lhê. Haù hkûn sheq, ngá-nhik myoqdong hkyûm myang nyo lhum rà nghut lhê.

¹⁵ Nàng ngingón yuqyo nyi sháng gaq; shí mâ é luzúm wui gi, nang lé shi-kyâm kat akò nghut ri. Nàng le, haù mâ é luzúm wui lé, mying du htau lui bo shi-kyám byi laq.

YUDE Hun Kat é Laiká (Jude)

¹ Yesuq Hkrisduq é dui-nhâng zoshâng nghut sù eq Yakuq é yhanggu, ngò Yude gi, haù Íwa Garai Gasâng eq ji yù mù, chyitdap é hui luí, Yesuq Hkrisduq eq upzúng é hui bâng chyáng dang kyô kat lhê.

² Shogyo nhikmyin hkyô, ngu-ingón hkyô eq chyitdap hkyô gi, nungmoq chyáng agùn agó joq nyi sháng gaq ô!

Garai A Wó Bâng É Yubak Mara

³ Chyitdap é luzúm wuí ê, ngò gi, nga-nhúng chôm wó é hkyi yù hkyô haù eq séng luí, nungmoq lé gyai yhang kê kat byí nau é nghut lhê wá, haù sân-yúng bang lé, radá dâm jâng ap byí to bê nghut é lumjíng hkyo é matú nungmoq htug htíng rá dut é lé, myit wum byi rá hkyô ká rá dut é lé, ngò byu-myang ri. ⁴ Hkâsu mù gâ le, haù mara dam byí é hui zo rá hkyô lé, a-nham pyat mai kê matsíng tô é hui bê bang ra-am gi, nungmoq chyáng hkaù wang lò bekô nghut ri. Yhangmoq gi, Garai a wó é bang nghut luí, haù nga-nhúng é Garai Gasâng jeju lé, mingkan ngón hkyo eq htaí lhik pyám kô é htoq agó, Yhang za nga-nhúng é Yhumsíng nghut sù eq Ahko ahkáng lhunglháng wó sù, Yesuq Hkrisduq lé he-ngik pyám akô nghut ri.

⁵ Nungmoq kúm gi, shí pé ban-shoq lé sê to gù nghut kôlhang, ngò mai nungmoq lé taí pún nau é hkyô gi, a-ô mã é pé nghut lhê: Haù gi, Yhumsíng Garai mai, Yhâng é byu pé lé, Egutuq ming mai hkyi htoq

yù kôlhang, a lumjíng é bang lé gi, htâng má dum lhoq htên pyám é nghut lhê. ⁶ Hau htoq agó, haù yhumsing é ayá lé tô pyám luí, yhumsing é nyi jowò lé pyám tô é maumâng pé lé, Yhang gi, haù tarâ jéyáng é hui rá Buinyi mó jé shoq, ahtum abyuq é toqjâng tuí eq tui luí, mauchut hkaù má lhúng tô é nghut lhê. ⁷ Haù eq rajung za, Sodom eq Gomoraq myuq eq hau é awui ayám mã é wà pé mã é bang gi, ashop é đông gungsho zùm yap é hkyô shut é eq myiwe yhangchang yuqgè yhangchang nyi zô lhúm é hkyô kut kô é nghut mù, yhangmoq gi, ahtum abyuq é myi má dang byí é hpuzo bâng é alik dut bekô nghut ri.

⁸ Haù eq rajung za yhang, yhupmoq moq é byù shí bang gi, yhumsing é gungsho lé agot a-ù kut kômù, ahkáng ayá wó sù lé he-ngik pyám kôluí, mauhkúng bang lé lumù gansang akô nghut ri. ⁹ Nghut kôlhang, haù maumang lagyo agyi Mihkaelaq lháng gi, Mosheq é gùng eq séng luí, haù nat zau eq dang rhâng lhúm é hkùn, yhang lé rhoi é đông mara hùn dang a wám taí é za, "Nang lé, haù Yhumsíng nhik-yo sháng gaq!" ga za taí ri. ¹⁰ Nghut kôlhang, byù haù bang gi, yhangmoq a sê gyô é hkyô pé lé rhoi dang taí pyám akô nghut ri; yhangmoq gi, haù myit woi-nyí a bo é dusak pé su, yhumsing myit mai sê gyô é hkyô pé má lháng, yhumsing gùng lé lhoq htên yu akô nghut ri.

¹¹ Yhangmoq gi, dingnyé wó rà! Hkâsu mù gâ le, yhangmoq gi, Ka-in* kut é agè ashop é hkyô đông cháng kô é yanmai le, akyù wó rá matú, Balam† shut é đông bo shut kô é yanmai le, Kora‡ é gumlau toq

* **1:11** Ka-in gi, yhanggu lé sat sù nghut lhê. Apùn 4:1-8 † **1:11** Balam gi, myiqhtoi nghut lhê, nghut kôlhang, ngunzè lé myoqnoq mù, Garai lé shut sù nghut lhê. Gyung So 22:1-35 ‡ **1:11** Kora gi, Garai byù nghut é hkyô-u shê sù Mosheq lé gumlau toq é hkyangjong nghut lhê. Gyung So 16:1-33

hkyô kut kômù, yhang su htên byoq byuq é hui kô é yanmai le nghut ri.

¹² Yhangmoq gi, nungmoq é chyitdap zoshuq poi má nungmoq lé agot a-ù wó dut nhang é bang nghut mù, gyuq hoq a bo é za, nungmoq eq rahá chôm zoshuq kô é hkûn, yhumsing gùng lé za yhumsing lhoq gyi yu é sau zúng bang nghut akô; yhangmoq gi, lai eq mut tâng wún é, mau a bo é mhut pé su nghut é htoq agó, ashi a zui mù, amyit eq roq hpùn pyám luí, í dâm shi é, xung nám lhê é sigâm pé su nghut akô. ¹³ Yhangmoq gi, yhumsing é hoq jung lé, tsû-myp su htoq nhang é, haù wuimau má é kô é wuìlhêng pé eq, tuq tuq chut é mauchut hkaù má tarâ jéyang hui râ matú, ahtum abyuq tô to huí é, yông wún é kyí pé su nghut akô.

¹⁴ Byù haù bang eq séng luí, Adam mai byùxik nyhit xik má nyi é Eruk, myiqhtoi htoi tô é gi, "Wú keq, haù Yhumsing gi, Yhâng é chyoiyúng bang mun mun sen sen eq rahá gyó lé lo nyi bê nghut ri. ¹⁵ Yhang gyó lé lo é gi, yuq hkangmó lé tarâ jéyang râ matú eq, haù tarâ a hkunggá é lunglhang bang, tarâ a hkunggá é dông kut é muzó pé banshoq lé le, tarâ a hkunggá é yubak byu pé, Yhang lé taí shut é dang htân pé banshoq lé le, mara byi râ matú nghut lhê." gâ ri. ¹⁶ Byù haù bang gi, put dang taí é bang eq mara hún dang taí é bang nghut akô; yhangmoq gi, yhumsing ô nau é agè ashop hkyô cháng kô é htoq agó, yhumsing gùng yhumsing nghutbùn é dang taí é eq yhumsing maiwáng zat é dông, góbang lé owaq é bang nghut akô.

Hkam Jân Râ Hkyô

¹⁷ Nghut kôlhang, ngò chyitdap é luzúm wuì é, nungmoq gi, haù nga-nhùng é Yhumsing Yesuq Hkrisduq é lagyô pé mai te taí tô é dang lé, bûn nyi keq. ¹⁸ Hkâsu mù gâ le, yhangmoq gi, "Haù ló htâng é

ahkyíng pé má, tarâ a hkunggá é yhumsing ô nau é hkyô dông châng é, rhoijap-dap dang taí é byu pé nyi to râ nghut lhê." ga, nungmoq lé taí wú kô é nghut lhê. ¹⁹ Byù haù bang gi, nungmoq lé gam hkoq é bang, mingkan hkyô lé baú za châng é bang, haù Woi-nyí a bo é bang nghut akô.

²⁰ Nghut kôlhang, ngò chyitdap é luzúm wuì é, nungmoq gi, haù Chyoiyúng Woi-nyí má kyúđung é dông, nungmoq é chyoiyúng é lumjng hkyô má, yhumsing gùng yhumsing lhoq kô yu nyi keq. ²¹ Ahtum abyuq é asak lé wó yú râ matú, haù nga-nhùng é Yhumsing Yesuq Hkrisduq é shogyo nhikmyin hkyô lé láng uchyang, nungmoq gi, Garai Gasâng é chyitdap myit má, yhum-sing gùng yhumsing nyi nyi keq.

²² Lumjng hkyô má úng-âng é bang lé, shogyo nhikmyin nyi keq; ²³ góbang lé gi, myi mai she htoq yù mù, hkyi yù keq; dum, góbang lé gi, sidiq myit eq shogyo nhikmyin hkyô tún shit mù, haù gungshô é achay achyut dap é yhangmoq é mebu lé chaq nyi keq.

Hkya-on Kungtôn Dang

²⁴⁻²⁵ Nungmoq lé, a lingbat shoq wó upzúng luí, nungmoq lé, mara hún râ hkyô a bo é za, gabú dik é dông mai Yhang é hpungwup shingkan bo é myoq hí má wó shuí shit é, nga-nhùng é hkyi yù Sû, rayuq za nghut é Garai Gasâng chyáng, hpungwup shingkan, hkikhkam hkyô, hpungwup a-tsam eq ahkáng ayá gi, nga-nhùng é Yhumsing Yesuq Hkrisduq dông mai, lai lò bê ipyat pé má le, ahkuí pyat má le, pyat dedu ahtum abyuq má le, rujoq nyí sháng gaq ô! Amen.

YOHAN É SHING-RÁN Laiká (Revelation)

Dang-hi Hpóng

¹ Yesuq Hkrisduq é shing-rán shí gi, adê myáng má dut lò râ hkyô pé lé, Yhâng é dui-nhâng zoshâng wui lé tún shit nhâng râ matú, Garai Gasâng èq Yesuq Hkrisduq Yhang lé byí tò é nghut lhê. Yhang gi, Yhâng é maumang lagyo lé nhang kat lui, Yhâng é dui-nhâng zoshâng Yohan lé, shing-rán haú sé nhang ri. ²Yohan gi, Garai Gasâng é mung-dang eq Yesuq Hkrisduq é saksé lé, yhang myang é gú banshoq eq rajung za saksé hkâm kyô é nghut ri. ³ Haú ahkyíng gi, chyâng lò bê nghut é yanmai, myiqhtoi dang shí pé lé, nghap kyô é sù eq, gyô yù lui, haú má ká tô é gú lé châng kut é bang gi, hkungsô wó nyi akô.

Noqkuq Hpúng Nyhit Lhum Lé Dang Kyô Kat É Hkyô

⁴ Ngò Yohan gi, Asia mau má é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rú nyi nyi é Su chyáng mai le, Yhâng é hkohkâm-tanghkuq hí má é nyhit woi-nyí chyáng mai le, ⁵ lhumzuí é saksé nghut sù, shi byuq é mai sâng-hi dui toq é zomún dut sù, myidàm htoq má é hkohkam pé lé up sù, Yesuq Hkrisduq chyáng mai le, jeju eq nguingón hkyô gi, nung-moq chyáng joq nyí sháng gaq.

Nga-nhúng lé chyitdap lui, Yhâng é suí èq, nga-nhúng lé, nga-nhúng é mara pé mai lhoq lhut byí é eq, ⁶ Yhâng é Garai Gasang eq Íwa

lé dojaú râ matú, nga-nhúng lé, mingdán byu pé eq hkyangjông pé* dut nhang é Su chyáng, duqwpup shingkang eq hpungwup a-tsam gi, pyat dedu ahtum abyuq ru joq nyí sháng gaq ô! Amen.

⁷ Wú keq, Yhang gi, mhut mai lé lo nyi é nghut lui, myoqjí hkangmó gi, Yhang lé myàng kó râ nghut lhê;

haú Yhang lé htaú rot bang† lháng, myàng kó râ nghut lhê;

haú myidàm htoq má é byù lhunglhâng bang gi, Yhâng é yanmai, yón ngau é hui zo kó râ nghut lhê.

Haú dòng nghut sháng gaq!
Amen.

⁸"Ngò gi, Alhpa eq Omega‡ nghut lhê. Ahkui pyat le, a-nham pyat le, htang pyat má le rú nyi nyi é, wum-o a-tsam dik shoq bò Sù nghut lhê." ga, haú Yhumsing Garai Gasang tái ri.

Byu Yhangzo Su Dut Su É Hkyô

⁹ Yesuq é, wuîhke jamjau hkyô má le, mingdán má le, jân shirang é hkyô má le, nungmoq é byinzùm nghut sù, ngò nungmoq é gumang hpó, Yohan gi, Garai Gasâng é mungdang eq Yesuq é saksé é yanmai, Patmo zinlóng má nyi nyi é nghut lhê. ¹⁰ Haú Yhumsing é Buinyi§ má, ngò gi, Woi-nyí èq shuí moq byuq ló é nghut mù, "Nàng myang é eq rajung za, chyúmding ralhum má ká lui, Ehpesu, Samurna, Pergamu, Htuatira, Sardi, Hpiladehpi eq Ladoki wà pé má joq é, ¹¹ noqkuq hpúng nyhit lhùm chyáng hun kat aq." ga, tut htê su gá é htê mó, ngá é nunghtáng má mying é lé, ngò wó gyô ri.

* **1:6** Htoq Ló 19:6 † **1:7** Htaú rot bang gá é gi, Yesuq tapzîng má jén to huí é hkùn, Yhâng é namcham má lham èq htaú é bang lé gá lhê. ‡ **1:8** Alhpa eq Omega gi, Grik laiká myhí má é sâng-hi cham eq ló htâng cham nghut lhê; haú tái nau é gi, rú dui nyi sù gá é nghut lhê. § **1:10** Yhumsing é Buinyi gá é gi, yuban nyí lé gá lhê.

¹² Haú ngo lé nyo nyi é htê yhumsing lé wú rã matú, ngò, gùng lhing kat é nghut lhê. Ngò gi, gùng lhing kat é hkún, hing myi-kok tsungjang nyhit lhum lé le, ¹³ myi-kok tsungjang haú pê é agùng má, byu yhangzo su dut é Sû rayuq nyi tô é lé le, myang kat ri; haú yuq gi, hkyigoq htoq jé é buhing wut to luí, wànggàng má hing wànggò le wut tô ri. ¹⁴ Yhâng é ulhum eq xãm gi, sau hpyú maú eq gyo su hpyu zan tô ri; Yhâng é myoqjí gi, myishâm su duq nyi ri. ¹⁵ Yhâng é hkyí gi, myi bungghkyûng má jên yu é jet é gyi su dut ri; Yhâng é htê gi, wui myo myo mying hùm é htê su gâ ri. ¹⁶ Yhâng é loqyo loq má gi, kyí nyhit cham chung tô ri; Yhâng é nhut mai gi, shamsó í shut dap é shâm htoq lo ri. Yhâng é myoqdong gi, htan dik é nyí gùng bui su tso nyi ri.

¹⁷ Yhang lé myang é hkún, ngò gi, shí gùng su, Yhâng é hkyí wang má lêng leq tô é nghut lhê. Haú hkún, Yhang gi, Yhâng é loqyo loq ngá ahtoq má ke byi mù, taí é gi, "Hkâgyuq, Ngò gi, Sâng-hi eq Jihtùm nghut lhê. ¹⁸ Ngò gi, dui nyi Sû le nghut lhê; Ngò gi, shí bê nghut kôle, wú keq, pyat dedu ahtum abyuq dui nyi é nghut lhê! Hau htoq agó, Ngò gi, shí hkyô eq moming é zoqshi pé lé chùng Su nghut lhê.

¹⁹ Haú mù, nàng myang é lé le, ahkui dut é hkyô eq htàngnùng le dut lò rá hkyô lé le, kã to aq. ²⁰ Nàng myang é, Ngá é loqyo loq mã é kyí nyhit cham eq hing myi-kok tsungjang nyhit lhum é záu tô é hkyo é lichyúm gi, isu nghut lhê. Kyí nyhit cham gi, noqkuq hpúng nyhit lhum é maumang lagyo nyhit yuq nghut ri; myi-kok tsungjang nyhit lhum gi, noqkuq hpúng nyhit lhum nghut ri.

2

*Ehpesu Myuq Mã É Noqkuq
Hpúng Lé Kã Kat É Laiká*

¹ Ehpesu myuq mã é noqkuq hpúng é maumang lagyo lé isu nghú kã kat aq:

Haú yhâng é loqyo loq má kyí nyhit cham chùng luí, hing myi-kok tsungjang nyhit lhum é gyoro mã sô nyi Su é dang gi, ² 'Ngò gi, náng é a-kyang, nàng shikut é hkyô, nàng hkam jân é hkyô pé lé, sê lhê. Agè ashop é byu pé lé, nàng a jân pyâm é hkyô lé le, haú lagyo a nghut kôlhang, lagyo pé nghut lhê gâ é bang lé, nàng chyam wú mù, yhangmoq lagyo apyoq pé nghut é lé wó sê yù kô é hkyô lé le, Ngò sê lhê. ³ Nàng gi, shikut shirâng bê nghut é htoq agó, Ngá mying é yanmai, wuihke hkyô lé hkam jan bê nghut kôle, nú byuq é hkyô a bò nghut ri.

⁴ Nghut kôlhang, nàng gi, náng é sâng-hi lhê é chyitdap myit lé tô pyâm é yanmai, ngò, nang lé mara hùn rá hkyô joq ri. ⁵ Nàng hká mai byit gyó é lé, myit bun aq! Myit lhing luí, sâng-hi nàng kut é muzó pé lé, kut aq. Nàng myit a lhing é nghut jáng, ngò, náng chyáng lé jé mù, náng é myi-kok tsungjang lé, hau é jowò mai huí pyâm byi rá nghut lhê. ⁶ Nghut kôlhang, Ngò a jú é, Nikola é chángzô pé kut é hkyô lé, nàng le a jú kut é yanmai, náng chyáng ge é hkyô ralhum bo ashí nghut ri.

⁷ Gyo rá nohkyap dap sù gi, haú Woi-nyi mai noqkuq hpúng pé lé taí é hkyô lé, gyó yù sháng gaq. Wó ung é sù lé gi, hau Garai Gasâng é hparadisú mã joq é asak sikkâm mã é ashí zo rá ahkáng, Ngò byi rá nghut lhê.' gâ ri.

*Samurna Myuq Mã É Noqkuq
Hpúng Lé Kã Kat É Laiká*

⁸ Samurna myuq mã é noqkuq hpúng é maumang lagyo lé isu nghú kã kat aq:

Haù Sâng-hi eq Jihtùm nghut é eq, shi byuq luí, asak dum dui Su é dang gi, ⁹ 'Nàng hui zô é wuìhke jamjau hkyô eq nàng myung é hkyô lé, Ngò sê lhê; nghut kôhlang, nàng gi, wó sù nghut ri! Tsadán é tarajong bang nghut to luí, Yudaq byu pé a nghut kôhlang, Yudaq byù nghut lhê gà é bang taí hpoí é hkyô lé le, Ngò sê lhê. ¹⁰ Nàng hui zo râ nghut é wuìhke hkyô lé, hkâgyuq. Ngò, nungmoq lé taí kyo kôlé, haù nat Tsadán gi, nungmoq lé chyam wú é dông, nungmoq chyáng má é ra-am lé, htông má hkyô pyám râ nghut lhê; hau htâng, nungmoq gi, raxê nyí tup zing-rí é hui zo kó râ nghut lhê. Shí shoq lhumzuí nyi aq, haù hkún, Ngò, nang lé, asak janmaú byi râ nghut lhê.

¹¹ Gyo râ nohkyap dap sù gi, haù Woi-nyí mai noqkuq hpúng pé lé taí é hkyô lé, gyô yù sháng gaq. Í dâm nghù râ shi é hkyô* gi, wó ung é sù lé, wó záng htung râ a nghut.' gâ ri.

*Pergamu Myuq Mâ É Noqkuq
Hpúng Lé Kâ Kat É Laiká*

¹² Pergamu myuq mâ é noqkuq hpúng é maumang lagyo lé isu nghù kâ kat aq:

Haù shamsó í shut dap é shâm wó Su é dang gi, ¹³ 'Nàng nyi é jowò lé, Ngò sê lhê; haù gi, Tsadán é hko hkâm-tanghkuq joq é jang nghut ri. Nghut kôhlang, nàng gi, Ngá myíng má lumhkau nyi é nghut luí, Tsadán nyi é jang nghut é nungmoq é myuq má, Ngá é lhumzuí é saksé hpó Antipa sat huí é hkún lháng, nàng Ngo lé lumjíng é hkyô lé, a hengik pyám nghut ri.

¹⁴ Nghut kôhlang, Ngò, nang lé mara hùn râ hkyô ratsuí joq ashí; hkâsu mù gà le, hparà lhô

pé lé títg byí é zoshuq zô é eq, ashop é dông gungsho zùm yap é mara kut shut râ matú, Israe-laq byu pé lé mhoq hpyoq rà hpaqchyí, Balak lé mhoq byí é Balam é mhoqshit hkyô lé myhik zing é byu pé, náng chyáng nyi ri.

¹⁵ Haù eq rajung za, haù Nikola é chángzô pé mhoqshit é hkyô lé myhik zing é byu pé le, náng chyáng nyi ri. ¹⁶ Haù mù luí, myit lhíng aq! Haù a nghut jáng, Ngò gi, náng chyáng hân jé lé mù, haù Ngá nhut mai htoq é sham eq yhangmoq lé zan râ nghut lhê.

¹⁷ Gyo râ nohkyap dap sù gi, haù Woi-nyí mai noqkuq hpúng pé lé taí é hkyô lé, gyô yù sháng gaq. Wó ung é sù lé gi, haq tô é mannaq muk lé le, myíng asik kâ tô é luggok hpyù racham lé le, Ngò byi râ nghut lhê, lhom hap yu é sù za sheq, myíng haù lé sé râ nghut lhê.' gâ ri.

*Htuatira Myuq Mâ É Noqkuq
Hpúng Lé Kâ Kat É Laiká*

¹⁸ Htuatira myuq mâ é noqkuq hpúng é maumang lagyo lé isu nghù kâ kat aq:

Haù myishâm su duq nyi é myo-jí eq jet é gyi su dut é hkyí dap é Sù, Garai Gasâng é Yhangzô é dang gi, ¹⁹ 'Náng é a-kyang, chyitdap myit, lumjíng myit, dojaú é hkyô, hkam jân é hkyô pé lé le, nàng gi, hí lhê htoq má ahkuí je myô zui saí é hkyô lé le, Ngò sê lhê.

²⁰ Nghut kôhlang, yhumsing gùng yhumsing myiqhtoi myhí nghut lhê gà é myiwe Yezebulaq lé, nàng nyi nhang tô é yanmai, Ngò, nang lé mara hùn râ hkyô joq ri. Yhang gi, Ngá é dui-nhâng zoshâng wuì lé, ashop é dông gungsho zùm yap râ eq hparà lhô pé lé títg byí é zoshuq zo râ hkyô lé mhoqshit luí, yhangmoq

* 2:11 Í dâm nghù râ shi é hkyô gà é gi, ngaraí ming wang é lé gà lhê.

3

lé hkyô shuí ngoq ri. ²¹ Ngò gi, yhang lé, ashop é dông gungsho zùm yap é hkyô mai myit lhing râ ahkying byi kôlháng, yhang gi, a myit lhing nàu nghut ri. ²² Haú mù, Ngò gi, yhang lé, jamjau hui râ yhupchong má dú lheq pyám râ nghut é htoq agó, yhang eq su-myi sulàng lú hkyô kut é bang, yhangmoq kut é hkyô lé myit lhing kô é za a nghut jáng, wuîhke jamjau mó hui zo nhâng râ nghut lhê. ²³ Ngò gi, yhang zô pé lé sat pyám râ nghut lhê; haú hkûn, Ngò gi, myit nhiklhúmq eq myit é hkyô lé sé Sû nghut é lé le, nungmoq kut é muzó eq rajung za, nungmoq yuq hkgámó lé, Ngò tau byi râ nghut é lé le, haú noqkuq hpûng pé banshoq wó sé kó râ nghut lhê. ²⁴ Mhoqshit hkyô haú lé a châng é eq Tsadán é ník é hkyô lhaq gâ é lé a mhoq yu é, Htuatira myuq má myit gyó tô é bang nungmoq lé, Ngò tái kôlé, nungmoq lé gotû wôlai Ngò jat byi râ a nghut. ²⁵ Ngò jé lé é jé shoq, nungmoq wó tô é lé za myhik zing nyi keq.

²⁶⁻²⁷ Wó ung é eq Ngò ô nau é hkyô lé jihthum jé shoq châng é sú lé gi,

"Yhang gi, yhangmoq lé, shamtoq dumbáng eq up† râ nghut lhê;

Yhang gi, tso-au hkoq pé lé su, yhangmoq lé bat hkyop pyám râ nghut lhê."[☆]

gâ tô é eq rajung za, Ngò, Ngá Wá chyáng mai ahko ahkáng wó yu é su, mingdán pé lé up râ ahko ahkáng, Ngò byi râ nghut lhê. ²⁸ Ngò gi, yhang lé, haú bó-myhû byi râ nghut lhê. ²⁹ Gyo râ nohkyap dap sú gi, haú Woi-nyí mai noqkuq hpûng pé lé tái é hkyô lé, gyó yù sháng gaq.' gâ ri.

Sardi Myuq Mâ É Noqkuq Hpûng Lé Kâ Kat É Laiká

¹ Sardi myuq mâ é noqkuq hpûng é maumang lagyo lé isu nghû kâ kat aq:

Haú Garai Gasâng é woi-nyí nyhit woi-nyí eq kyí nyhit cham lé chung Su é dang gi, 'Ngò gi, náng é a-kyang lé sé lhê; nàng gi, asak dui nyi sù ga kôlháng, shi byuq sù nghut ri. ² Gyíng lò aq! Myit gyó tô é, shi byuq râ za nghut é pé lé, wum-o lhoq kîng yù aq; hkâsu mù gâ le, Ngá é Garai Gasâng é hí má, náng é a-kyang a gumjup é hkyô lé, Ngò myang ri. ³ Haú mù, nàng hkâsu kut wó hap yu é eq wó gyó yu é hkyô lé, myit bun aq; haú dông cháng luí, myit lhing aq. Nàng a bûn gyíng é nghut le gi, Ngò hkau sù su lé râ nghut luí, nàng gi, Ngò hká u lé râ lé, sé râ a nghut.

⁴ Nghut kôlháng, Sardi myuq má, yhumsing é mebu lé agot a-û a kut é byù ra-am nyi akô. Haú bang gi, hpyu é mebu wut luí, Ngò eq rahá sô wún kó râ nghut lhê; hkâsu mù gâ le, yhangmoq gi, gingdán é bang nghut akô. ⁵ Wó ung é sú gi, haú bang su, hpyu é mebu myang wut râ nghut lhê. Ngò gi, haú yuq é myíng lé, hkâ-nhám le, asak jihpán laiká buk mai yu pyám râ a nghut; hau htoq agó, Ngá Wá é hí má le, Yhâng é maumang lagyo pé é hí má le, haú yuq é myíng lé, Ngò yín yù râ nghut lhê. ⁶ Gyo râ nohkyap dap sú gi, haú Woi-nyí mai noqkuq hpûng pé lé tái é hkyô lé, gyó yù sháng gaq.' gâ ri.

Hpiladehpi Myuq Mâ É Noqkuq Hpûng Lé Kâ Kat É Laiká

† 2:26-27 Shamtoq dumbáng eq up gâ é gi, ahko ahkáng banshoq wó luí, up é lé gâ lhê. ☆ 2:26-27 Hkya-on 2:9

⁷ Hpiladehpi myuq mâ é noqkuq hpûng é maumang lagyo lé isu nghû kê kat aq:

Haû chyoiyúng é eq tengmán é, Dawiq hkohkam é zoqshi chung é, ó yuq le a wó myhi loshoq hpông é eq, ó yuq le a wó hpông loshoq myhî é Su é dang gi, ⁸ 'Nàng kut é muzó pé lé, Ngò sê lhê. Wú aq, ó yuq le a wó myhî é hkum ralhum, Ngò náng hí má hpông to byî lhê. Nàng gi, wum-o ratsuí za bò kôlhang, Ngá é dang gyo luí, Ngá é myíng lé a he-ngik pyâm é hkyô lé, Ngò sê lhê. ⁹ Haû tarajong má noqkuq kôlhang, Tsadán lé dojaú bang nghut é, Yudaq byù a nghut kôlhang, nghut lhê gá é byù mhaû pé lé, Ngò, náng é hkyí wang má, lé paí gop nhâng luí, Ngò, nàng lé chyitdap é hkyô, yhangmoq lé sé nhâng râ nghut lhê. ¹⁰ Nàng gi, myit hîng hîng hkam jan râ é Ngá é hkunmó lé châng nyi bê nghut é yanmai, myidàm htoq má nyi é bang lé chyam lik wú râ matú, mingkan gón má jé râ nghut é wuîhke jamjau ahkyíng mai, Ngò, nang lé lhoq lhut yû râ nghut lhê.

¹¹ Ngò gi, a myáng má jé lé lô râ nghut lhê. Náng é janmaú lé, ó yuq èq le a wó yu pyám byi sháng gaq, nàng wó tô é pé lé myhik zing nyi aq. ¹² Wó ung é sù lé gi, Ngá é Garai Gasâng é noqkuq yhùm mâ é hkungzing mó dut nhâng râ nghut lhê. Haû yuq gi, hkâ-nhám le haû mai dum htoq lô râ a nghut. Ngò gi, Ngá é Garai Gasâng é myíng lé le, Ngá é Garai Gasâng chyáng mai htoq luí, mauhkûng mai gyó lé lo é, Yerusalem wà mó Asik ga é, Ngá é Garai Gasâng é myuq myíng lé le, Ngá é myíng sik lé le, yhâng chyáng kê tap byi râ nghut lhê. ¹³ Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq.'

gâ ri.

Ladoki Myuq Mâ É Noqkuq Hpûng Lé Kê Kat É Laiká

¹⁴ Ladoki wà mó mâ é noqkuq hpûng é maumang lagyo lé isu nghû kê kat aq:

Haû lhumzui é eq tengmán é saksé nghut é, Garai Gasang hpan tô é lé up é, Amen gá Su é dang gi, ¹⁵ 'Ngò gi, nàng kut é muzó lé sê lhê; nàng gi, gú le a nghut, nye le a nghut dut ri. Nàng gi, gú jáng jâng gú, nye jáng jâng nye dut râ lé, Ngò ô nau ri.

¹⁶ Nghut kôlhang, nàng gi, gú le a nghut, nye lé a nghut, lumnye nghut é yanmai, Ngò gi, nang lé, Ngá é nhut mai byé htoq pyám râ za nghut bê. ¹⁷ "Ngò gi, wó sù nghut lhê; ngò gi, sutzé gyai wó bê nghut luí, hai lhang a ra lo." ga nàng taí ri. Nghut kôlhang, nàng gi, wuîhke jamjau hui sù, asho awui dut sù, myùng sù, myoqjit sù eq achín dut sù nghut é lé, nàng a sé myhi-nhung. ¹⁸ Haû mù luí, nàng gi, wó sù sùt sù wó dut sháng gaq, myi má jên yu é hîng lé le, nàng achín dut é hoq hpu hkyô lé, wó nghop pyám sháng gaq, wut râ matú, mebu hpyù lé le, nàng myoq wó myáng sháng gaq, náng é myoqjí má kat râ matú, myoq chí lé le, nàng, Ngá chyáng mai wui yù râ matú, Ngò, nang lé hpaqchyí byî lhê.

¹⁹ Ngò chyitdap é bang lé gi, tan luí, mhohqshit lhê. Haû mù, nàng gi, hân bûn gying luí, myit lîng aq. ²⁰ Wú aq! Ngò gi, hkum yâm má yap to luí, hkum lé kok nyi lhê. Rayuq yuq, Ngá é hté lé wó gyo luí, hkum hpông byî é nghut jáng, Ngò gi, wàng mù, haû yuq eq rahá zo shuq râ nghut lhê; haû yuq le, Ngò eq rahá zo shuq râ nghut lhê.

²¹ Ngò gi, ùng luí, Ngá Wa eq rahá Yhâng é hkohkâm-tanghkuq

má zung é eq rajung za, wó ung é sù lé gi, Ngò eq rahá Ngá é hkohkâm-tanghkuq má zùng rá ahkáng, Ngò byi rá nghut lhê.
 22 Gyo rá nohkyu dap é sù gi, haù Woi-nyí mai noqkuq hpûng pé lé taí é hkyô lé, gyô yù sháng gaq.' gâ é nghut ri." gâ ri.

4

Mauhkûng Htoq Má Hkohkâm-tanghkuq Joq É Hkyô

¹ Hau htâng má, ngò wú kat le, mauhkûng má hkum ralhum bóng tô é lé myang ri. Ngò sâng-hí dàm wó gyô é tut htê su gâ é danghtê ngo lé taí é gi, "Shí má doq lò aq, htângnùng má dut lò rá hkyô pé lé, Ngò, nang lé tûn shit bá." gâ ri. ² Haù hkûn jáng yhang, ngò gi, Woi-nyí má moq byuq ló luí, mauhkûng htoq má hkohkâm-tanghkuq ralhum joq é lé myàng ri; tanghkuq haù má, byù rayuq zung tô ri. ³ Haù má zung to Su é isâm gi, huhpé eq ne yúng lungsêng su dut ri. Huí nyuì lungsêng su dut é woqgan sîng-yang gi, haù hkohkâm-tanghkuq má hkông lhîng tô ri. ⁴ Hkohkâm-tanghkuq hau é lhîngkyuq má, hkohkâm-tanghkuq gotú í xe myí lhum le joq to luí, hpyu é mebu wut mù, ulhum má hîng janmaú tsùng tô é suwún í xe myí yuq gi, haù má zung tô bum akô. ⁵ Haù hkohkâm-tanghkuq mai, lhap hpyat é, mying hûm é eq mau-gum gûm é pé dut htoq lo ri. Haù hkohkâm-tanghkuq hí má, myi-kok nyhit lhum le duq tô ri; haù pé gi, Garai Gasâng é woi-nyí nyhit woi-nyí nghut ri. ⁶ Hau htoq agó, san zâ é myoqjâm su dut mâ é wuì-nhông le, haù hkohkâm-tanghkuq hí má dîng tô ri.

Haù hkohkâm-tanghkuq agùng má le, lhîngkyuq má le, hî-u nunghtáng lhîngkyuq myoqjí dap é dui é dusak myí du nyi tô ri. ⁷ Dui é dusak sâng-hí du gi, hkanghkyi su

dut ri; í du nghû rá du gi, nohtó su dut ri; sùm du nghû rá dũ é myoqdong gi, byu myoqdong su dut ri; myí du nghû rá du gi, dâng wún é zunbung su dut ri. ⁸ Dui é dusak myí du haù gi, du hkingmó dùng hkyuq lhum lhum dap é htoq agó, lhîngkyuq má myoqjí kôm dap luí, dùng hkaù má lháng dap ri. Yhangmoq, nyí myín hkâ-nhám a no loshoq taí nyi kô é gi,

"A-nham pyat le, ahkuí pyat le, htang pyat má le, rû nyi nyi é, haù wum-o a-tsam dik shoq bò Sù Yhumsîng Garai Gasang gi, chyoiyúng, chyoiyúng, chyoiyúng nyi ri."

gâ akô. ⁹ Haù dui é dusak myí du gi, hkohkâm-tanghkuq má zung é, pyat dedu ahtum abyuq dui nyi Su chyáng, hpungwup shingking, aróng eq jeju bun hkyô byí é hkingmó, ¹⁰ haù suwún í xe myi yuq gi, hkohkâm-tanghkuq má zung é, pyat dedu ahtum abyuq dui nyi Su é hí má, ngóm gop luí, Yhang lé noqkuq akô. Yhangmoq gi, yhangmoq é hkohkâm-janmaú lé, haù hkohkâm-tanghkuq hí má hkyut to mù, taí kô é gi,

¹¹ "Ngamoq é Yhumsîng eq Garai Gasang ê, nyi mi-nyí, joq mi-joq lé, Nàng hpan to bê nghut luí,

haù pé gi, Nàng ô nau é đông hpan tô é hui bê nghut mù, nyi to joq tô bùm bê nghut é yan-mai,

Nàng gi, hpungwup shingking, aróng eq hpungwup a-tsam lé, hap yù gîng Sù nghut ri."

gâ akô.

5

Chyúmding Eq Sauzo

¹ Hau htâng, ngò gi, hkohkâm-tanghkuq má zung to Su é loqyo loq má, í shut é laiká kâ to é, dizik nyhit lhum tap tô é chyúmding le myang

ri. ² Hau htoq agó, a-tsam mó bo é maumang lagyo rayuq gi, "Hau dizik pé lé hí pyám rà eq chyúmding lé hpóng rà gi, ó yuq wá gingdán lhê lhu?" ga luí, htê mó eq wut tái nyi é lé le, ngò myang ri. ³ Nghut kôlhang, mauhkûng htoq má le, myigùng htoq má le, myigùng ô má le, hau chyúmding lé wó hpóng rà eq ahkaú má wó wú rà byù rayuq lhang a nyi nghut ri. ⁴ Hau chyúmding lé hpóng mù, ahkaú má wú rà gingdán é byù rayuq hkâlháng a nyi é yanmai, ngò gyai yhang ngau pyâm é nghut lhê. ⁵ Hau hkûn, hau suwún wui má é rayuq, ngo lé tái é gi, "Hkâ-ngaú! Wú aq, hau Yudaq byuhú má é Hkanghkyi nghu é, hau Dawiq é Amyit nghut Sû gi, ûng bê nghut luí, hau chyúmding eq hau má é dizik nyhit lhum lé wó hpông lhê." gâ ri.

⁶ Hau htâng, hau dui é dusak myí du eq suwún wui é agùng má é, hkohkâm-tanghkuq agùng má, sat hui bê su dut é Sauzo radu yap tô é lé, ngò myang ri. Sauzo hau gi, hkyuí nyhit lhum eq myoqjí nyhit lhum dap ri. Myoqjí hau nyhit lhum gi, myidàm htoq gón má nhang htoq kat é, Garai Gasâng é woi-nyí nyhit woi-nyí nghut ri. ⁷ Hau Sauzo gi, lé mù, hkohkâm-tanghkuq má zung to Su é loqyò má é chyúmding lé yu ri. ⁸ Hau chyúmding lé yu é hkûn jáng, hau dui é dusak myí du eq suwún í xe myi yuq gi, Sauzô é hí má ngóm gop akô. Yhangmoq yuq hkanmó gi, tíng eq sân-yúng bâng é kyûdung dang gâ é namngón jung byíng mui tô é híng góm pé le chung bum akô nghut ri. ⁹ Yhangmoq gi,

"Nàng gi, hau chyúmding lé yù rà eq hau é dizik pé lé hpóng rà gingdán Sû nghut ri.

Haí mù gâ le, Nàng gi, sat hui bê nghut luí, byuhú hkanmó mai le, myíng hkanmó mai le,

byù myù hkanmó mai le, mingdán hkanmó mai le, Garai Gasâng é matú, Nàng é suí eq byù pé lé wui hpyit yù bê nghut ri.

¹⁰ Nga-nhúng é Garai Gasang lé do-jaú rà matú, Nàng gi, yhangmoq lé, mingdán byu pé eq hkyangjông pé dut nhâng bê nghut luí, yhangmoq gi, myidàm htoq má up kô rà nghut lhê."

ga luí, mahkôn sik ralhüm hkôn akô nghut ri.

¹¹ Hau hkûn, ngò wú kat le, hau hkohkâm-tanghkuq lìnhhkyuq má le, dui é dusak pé eq suwún wui é lìnhhkyuq má le, nyi tô bum é mau-mang lagyo ajùm ayò mun mun sen sên é htê lé wó gyô ri. ¹² Yhangmoq gi,

"Hau sat hui bê Sauzo gi, hpungwup a-tsam, sutzè, hpaqchyí byéng-yá, wum-o, aróng si-tang,

hpungwup shingkanq eq hkyá-on kungtôn hkyô lé, hap yù gíng ri."

ga luí, htê mó eq ton bum akô nghut ri.

¹³ Hau htoq agó, mauhkûng htoq má nyi é, myigùng htoq má nyi é, myigùng ô má nyi é, wuiming má nyi é, hpan to huí é lhunglhang gi, "Hkyá-on kungtôn hkyô, aróng si-tang, hpungwup shingkanq eq hpungwup a-tsam gi,

hau hkohkâm-tanghkuq má zung tô é Sû eq Sauzô chyáng, pyat dedu ahtum abyuq ru joq nyí sháng gaq ô!"

ga luí, ton nyi bùm kô é lé, ngò wó gyô ri. ¹⁴ Hau dui é dusak myí du gi, "Amen" ga tái jang, hau suwún wui gi, ngóm gop luí noqkuq akô nghut ri.

6

Dizik Nyhit Lhùm É Hkyô

¹ Haú Sauzo gi, dizik nyhit lhum mâ é sâng-hí lhum lé hpông kat é hkûn, ngò myang é nghut lhê. Hau htâng, haú dui é dusak myí du mâ é radu gi, maugum su gâ é htê mó èq, "Lé aq." gâ é lé, ngò wó gyô ri. ² Ngò wú kat é hkûn, ngá é myoq hí má myang hpyû radu nyi tô é lé myang ri! Haú má jî to sù gi, lai rahpu chung tô é htoq agó, yhang lé, janmaú ralhum tsúng to byí luí, ùng budang wó râ matú ùng sù rayuq dông htoq ló ri.

³ Haú Sauzo gi, í lhum nghû râ dizik lé hpông kat é hkûn, haú í du nghû râ dui é dusak gi, "Lé aq." ga taí é lé, ngò wó gyô ri. ⁴ Hau htâng, myang nè radu htoq lo ri; haú má jî tô é sù gi, myidàm htoq mâ é nguingón simsaq hkyô lé wup yù râ eq, byú yhangchang rayuq eq rayuq sat lhum nhâng râ a-tsam byí é hui sù nghut luí, yhang lé shâm mó rahkyam le byí to bê nghut ri.

⁵ Haú Sauzo gi, sùm lhum nghû râ dizik lé hpông kat é hkûn, haú sùm du nghû râ dui é dusak gi, "Lé aq." ga taí é lé, ngò wó gyô ri. Ngò wú kat le, myang noq radu ngá myoq hí má nyi tô é lé myang ri! Haú má jî tô é sù gi, yhâng é loq má jàng rahpu chung to ri. ⁶ Haú hkûn, "Ran-nyí é zuihpau gi, sunsô rabyé, ran-nyí é zuihpau gi, muk-yo guq sum byé nghut lhê; haú tsanlun xù eq tsibiyiq wing lé kúm gi, hkâlhoq hten kó." gâ é htê, haú dui é dusak myí du hkaú mai htoq ló é su gâ é lé, ngò wó gyô ri.

⁷ Haú Sauzo gi, myí lhum nghû râ dizik lé hpông kat é hkûn, haú myí du nghû râ dui é dusak gi, "Lé aq." ga taí é lé, ngò wó gyô ri. ⁸ Ngò wú kat é hkûn, ngá é myoq hí má, myang muí radu nyi tô é lé myang ri! Haú má jî to su é mying gi, Shí hkyô gâ ri; Moming le, yhâng é htâng má châng tô ri; yhangnhik gi, sham èq, mutmó gyó é èq, wúm gyó é èq, tân é yosô-ze èq, myidàm htoq

myi tú mâ é ratú má nyi é bang lé sat pyám râ ahkáng wó yu to bekó nghut ri.

⁹ Sauzo gi, ngo lhum nghû râ dizik lé hpông kat é hkûn, Garai Gasâng é mungdâng é yanmai le, yhumsing hkâm é saksé é yanmai le, sat hui bâng é sobyô pé gi, hkungga gyap a-ô má nyi tô bùm kô é lé, ngò myang ri. ¹⁰ Yhangmoq gi, "Chyoiyúng é eq tengmán é, ahko ahkáng lhunglhâng wó é Yhumsing è, myidàm htoq má nyi é byu pé lé, ngamoq é sui manglat dam a byí é eq tará a jéyáng é za, hkâ-myhâng jé shoq nyi nyi râ lhú?" ga, htê mó èq garu bum akô. ¹¹ Haú hkûn, yhangmoq yuq hkangmó gi, bu hpyû hing radung dung hut é hui luí, yhangmoq su sat hui râ bang, yhangmoq é byinzùm dui-nhâng zoshâng wui nghut é gumang wui sat huí ngap é hkûn jé shoq, razup zim za nyi shi keq ga taí é lé wó gyô akô nghut ri.

¹² Hkyuq lhum nghû râ dizik lé, Yhang hpông kat é hkûn, ngò myang ri; haú u lé, layàng mó le nún lo ri; haú buí gi, saumaú noq èq woq é pán su noq byuq ri; haú lhamó lhum gón gi, sui su ne byuq ri; ¹³ maihpáng gâm lé, lai mó èq lo mut nhún kat é hkûn, a myhíng shí é maihpáng-shi yoq gyó é su, mauhkung mâ é kyí pé gi, myidàm htoq má byit gyó lo bum ri. ¹⁴ Haú mauhkung gi, laiká lé dǐng lhûm é su htot pyâm é hui luí, bùm hkang bùm mó eq zinlóng lhumjup pé gi, yhâng é jowò mai huí pyâm é huí ri.

¹⁵ Haú hkûn, haú myidàm htoq mâ é hkohkam pé, uphkáng bang, gyezaú pé, sut wó bang, wum-o a-tsam bò bang, jun pé eq luthkyô wó é lhunglhâng bang gi, bùm dong pé eq bùm pé mâ é luqgok gyoro pé má haq tô bùm uchyang, ¹⁶ haú bùm pé eq luqgok pé lé, "Ngamoq é gùng htoq má gyó ke kó laq! Haú hkohkâm-tanghkuq má zung to Su é myoq hí mai le, haú Sauzô é

nhikmo-yô é hkyô mai le, ngamoq lé haq pyám kó laq. ¹⁷ Hkâsu mù gá le, haú Yhangnhik nhikmo-yô é buinyi mó gi, jé bè nghut ri; ó yuq wá wó jân yap nyi râ lúhú?" ga garú tai bum akô nghut ri.

7

144,000 Yuq Masat Lhô Tap Hui Kô É Hkyô

¹ Hau htâng má, maumang lagyo myi yuq gi, maumyí myi chyûn má yap to mù, myigùng htoq má le, wui ming htoq má le, siggâm pé má le, lai a hik sháng gaq ga, myi shut má é lai lé zuí zing to kô é lé, ngò myang ri. ² Haú hkûn, haú dui nyi é Garai Gasâng é masat hô chung é maumang lagyo gotú rayuq gi, buihtoq hkyam mai htoq lé lo é lé, ngò dum myang ri. Yhang gi, haú myigùng eq wui ming lé lhoq hten râ ahkáng wó tô é maumang lagyo myi yuq haú lé. ³ "Nga-nhông é Garai Gasâng dui-nhông zoshâng wui é ngelang má, ngamoq mai masat hô a tap byi byi gi, haú myigùng, wui ming eq siggâm pé lé hkâlhoq hten shi kó." ga htê mó èq wut tai kat ri. ⁴ Haú hkûn, masat hô tap huí é bang byù hkâ-myhó yuq nghut é lé, ngò wó gyô ri. Israelaq byuhú banshoq má é 144,000 yuq nghut ri.

⁵ Masat hô tap huí yu é, Yudaq up mâ é bang gi, 12,000 yuq, Rubin up mâ é bang gi, 12,000 yuq, Gat up mâ é bang gi, 12,000 yuq,

⁶ Ashe up mâ é bang gi, 12,000 yuq, Nahtali up mâ é bang gi, 12,000 yuq,

Manase up mâ é bang gi, 12,000 yuq,

⁷ Simeon up mâ é bang gi, 12,000 yuq,

Lewiq up mâ é bang gi, 12,000 yuq, Yishahka up mâ é bang gi, 12,000 yuq,

⁸ Zebulun up mâ é bang gi, 12,000 yuq,

Yosep up mâ é bang gi, 12,000 yuq,

Ben-yamyin up mâ é bang gi, 12,000 yuq, nghut bum akô.

Bu Hpyû Hing Wut Bâng É Hkyô

⁹ Hau htâng, ngò wú kat é hkûn, mingdán hkangmó mai le, byuhú hkangmó mai le, byù myú hkangmó mai le, myíng chângjup mai le, lé é bang, ó yuq lhang a ung nghap é byù moq mó gi, haú hkohkâm-tanghkuq é hí má le, Sauzô é hí má le, yap nyi bùm kô é lé myang ri; yhangmoq gi, bu hpyû hing wut lui, yhangmoq é loq má byùm-haq chung tô bùm kômù,

¹⁰ "Hkyi yù hkyô gi, haú hkohkâm-tanghkuq má zung tô é nganhông é Garai Gasang eq Sauzo chyáng má é nghut ri ô!"

ga lui, htê mó èq garú bum akô nghut ri. ¹¹ Haú maumang lagyo lunglhang bang gi, haú hkohkâm-tanghkuq é lhanghkyuq má le, suwún wui eq dui é dusak myí du é lhanghkyuq má le, yap tô akô nghut ri. Yhangmoq gi, hkohkâm-tanghkuq hí má myoqdong ngóm gop mù, Garai Gasang lé noqkuq uchyang,

¹² "Amen! Hkya-on kungton hkyô eq hpungwup shingkanq, hpaqchyí byéng-yá eq jeju bun hkyô,

aróng, hpungwup a-tsam eq wum-o gi,

nga-nhông é Garai Gasâng chyáng pyat dedu ahtum abyuq ru joq nyí sháng gaq ô!

Amen!"
ga tai bum akô.

¹³ Haú hkûn, suwún wui má é rayuq gi, "Shi bu hpyû hing wut é bang gi, ô pé lúhú? Yhangmoq gi, hkâmai lé é bang nghut akô lúhú?" ga ngo lé myí ri.

¹⁴ Ngò gi, "Suwún hpó ê, nàng sê lhê." nghú tú tai jáng, yhang gi, "Shi bang gi, haú wuihke jamjau mó mai wó lut htoq lô lui, yhangmoq

é bu hîng lé, haû Sauzô é sui má chí hpyû yù bê bang nghut akô.¹⁵ Haû mù, yhangmoq gi, Garai Gasâng é hkohkâm-tanghkuq hí má nyí mù, Yhâng é noqkuq yhûm má, nyí, myín Yhang lé dojaû nyí kô é nghut lhê; haû hkohkâm-tanghkuq má zùng Sû gi, Yhâng é jonghpang lé, yhangmoq é ahtoq má nghop byi rà* nghut lhê.¹⁶ Yhangmoq gi, hkâ-nhám le, zòmut wuìshit huì rà a nghut lo; buì lhap é le, hkyíng hkyíng nyé é le, yhangmoq lé wó záng rà a nghut.¹⁷ Hkâsu mù gà le, haû hkohkâm-tanghkuq agùng má é Sauzo gi, yhangmoq é sau-rém sù dut rà nghut luí, Yhang gi, yhangmoq lé, asak wuìbúm jé shoq shuí è rà nghut lhê. Hau htoq agó, Garai Gasang gi, yhangmoq é ngaubyi sháng shoq sut pyám byi rà nghut lhê." ga tai ri.

8

Nyhit Lhum Nghû Râ Dizik Eq Namgón Jung Nyhê É Hîng Góm

¹ Haû Sauzo gi, nyhit lhum nghû rà dizik lé hpông kat é hkûn, mauhkûng htoq má hkyíng hkum rawuí kô zîm byuq ri.

² Haû hkûn, Garai Gasâng é hí má yap tô é maumang lagyo nyhit yuq lé, ngò myang ri; yhangmoq lé, tut nyhit lhum byi tô ri.

³ Namgón jung nyhê é hîng góm chung é maumang lagyo gotú rayuq gi, haû hkungga gyap yàm má lé yap tô ri. Haû hkohkâm-tanghkuq hí má é hîng hkungga gyap má, sân-yúng bang banshoq é kyúdung dang eq rahá nhông byi rà matú, namgón jung gyai myo shoq, yhang lé byi tô ri.⁴ Haû namgón jûng é myihkau gi, sân-yúng bâng é kyúdung danghtê eq rahá, maumang lagyo haû yuq é loq mai Garai Gasâng chyáng hkyang rot ló bê nghut ri.⁵ Hau htâng, maumang

lagyo haû yuq gi, góm lé yù mù, hkungga gyap má é myi lhoq pyíng yù luí, myidàm htoq má dú hkyô kat é hkûn, maugum mó gûm é, myíng hûm é, lhap hpyat é eq layàng nún é pé dut htoq lo ri.

Tut Mut É Hkyô

⁶ Hau htâng, tut nyhit lhum wó é maumang lagyo nyhit yuq gi, tut mut rà hen akô nghut ri.

⁷ Sâng-hí yuq nghû rà maumang lagyo gi, yhâng é tut lé mut kat ri; haû hkûn, sui nyó é likwò eq myi htoq lô mù, haû lé myidàm htoq má lhoq hkyô kat jáng, maumyí sum tú má é ratú eq sigâm sum tú má é ratú nyé gyó byuq é htoq agó, wàhu mhanzo banshoq le nyé gyó byuq bê nghut ri.

⁸ Í yuq nghû rà maumang lagyo gi, yhâng é tut lé mut kat ri; haû hkûn, myi dap tô é bùm mó su é lé, wuìshuq lung-aû má dú hkyô kat ri. Wuìshuq lung-aû sum tú má é ratú gi, sui dut byuq bê nghut ri; ⁹ wuìshuq lung-aû má é dui jung sum tú má é ratú gi, shi byuq luí, wuì-sanghpo pé sum tú má é ratú gi, htên byuq bê nghut ri.

¹⁰ Sum yuq nghû rà maumang lagyo gi, yhâng é tut lé mut kat ri; haû hkûn, myihu dùm su duq é kyí mó racham gi, mauhkûng mai byit gyó lô mù, wuìlàng sum tú má é ratú eq wuìbúm pê htoq má lo gyó záng ri.¹¹ Kyí hau é myíng gi, Kyí Kyí Hko gà é nghut ri. Wuìlàng sum tú má é ratú hkô byuq luí, wuì haû hkô byuq é yanmai byù myo myo shi byuq bekô nghut ri.

¹² Myi yuq nghû rà maumang lagyo gi, yhâng é tut lé mut kat ri; haû hkûn, buì sum tú ratú, lhamó sum tú ratú, kyí sum tú ratú gi, hten luí, haû pê é sum tú ratú gi, mauchut byuq bê nghut ri. Hau htoq agó, nyí sum tú má é ratú le,

* 7:15 Yhâng é jonghpang lé, yhangmoq é ahtoq má nghop byi rà, gà é gi, yhangmoq eq rahá nyí mù, yhangmoq lé upzúng nyí rà gà é nghut lhê.

myín sum tú mâ é ratú le, maubó a joq dut byuq ri.

¹³ Ngò wú nyi le, zungung radu gi, maulat má dâng wún mù, "Gotú maumang lagyo sum yuq èq mut rà nghut é, tut hte é yanmai, myidàm htoq má nyi bâng é matú, dingnyé, dingnyé, dingnyé nghut ri." ga luí, htê mó èq garû tai ri.

9

¹ Ngo yuq nghû rà maumang lagyo gi, yhâng é tut mut kat é hkûn, mauhkûng mai myidàm htoq má byit gyó tô é kyí racham lé, ngò myang ri. Haú nik dik htûm é Lasang-dông é zoqshi gi, kyí haú lé byí tô ri. ² Kyí haú gi, nik dik htûm é Lasang-dong lé hpông kat é hkûn, myi bunghkyûng mó mai htoq lo é myihkau dùm sù é myihkau gi, dong haú mai htoq lo ri. Nik dik htûm é Lasang-dong haú mâ é myihkau dum é yanmai, bui eq maulat gi, mauchut byuq bê nghut ri. ³ Myihkau dùm haú mai dinggám pé htoq lô mù, myidàm htoq má gyó lé akò; myidàm htoq mâ é gogok é a-tsam sù é a-tsam le, yhangmoq lé byí to bê nghut ri. ⁴ Myidàm htoq mâ é wàhu pé lé le, mhan-haq hpoqnoq pé lé le, sikhâm pé lé le a lhoq htên é za, yhumsing é ngelang má Garai Gasâng é masat lhô a dap é byu pé lé baú zing-ri rà matú, yhangmoq lé tai tô ri. ⁵ Nghut kôlhang, haú bang lé sat pyám rà ahkáng kúm gi, yhangmoq a wó e za, lhamó ngo hkyap tup haú bang lé zing-ri rà ahkáng za ru wó akò nghut ri. Haú bang hui zô é shî-nò jamjau gi, gogok èq pat hkûn no hpû é su yhang nghut ri. ⁶ Haú buinyi pé má, byu pé gi, shí hkyô hô kôlhang, myàng kó rà a nghut; shí nau dik kôlhang, haú shí hkyô gi, yhangmoq chyáng mai hpang byuq rà nghut lhê.

⁷ Dinggám haú pé gi, majan zan rà matú buí tô é myang pé su dut akò. Yhangmoq é ulhum má gi, hîng janmaú sù é tsúng tô é htoq agó, yhangmoq é myoqdong gi, byu myoqdong su dut bum akò nghut ri. ⁸ Yhangmoq é xâm gi, myiwe wui é xâm su dut luí, yhangmoq é zui gi, hkanghkyi zui su dut ri.

⁹ Yhangmoq é wànggò-long gi, joq-toq wànggò-long su dut ri; yhangmoq é dùng mying é htê gi, majan pá shut din yán wang lô é myang jùm eq myanglhêng pé mying hùm é htê su gà ri. ¹⁰ Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu pé lé zing-ri rà a-tsam bo ri. ¹¹ Yhangmoq é hkohkâm gi, nik dik htûm é Lasang-dong mâ é maumang nghut ri; haú é mying gi, Hebre mying dong Abadon ga, Grik mying dông Apolion* gà ri.

¹² Sâng-hí lhum dingnyé gi, lai lô byuq bê nghut ri; nghut kôlhang, dingnyé í lhum jé lô shirâ nghut lhê.

¹³ Haú hkyuq yuq nghû rà maumang lagyo gi, yhâng é tut mut kat ri. Haú hkûn, Garai Gasâng é hí má joq é hîng hkungga gyap é hkyuí myí lhum mai htê htoq lo é gi, ¹⁴ "Uhprat wui mó láng má tuí lhúng tô é maumang myi yuq lé, nhang pyám aq." ga tut chung tô é hkyuq yuq nghû rà maumang lagyo lé tai é lé, ngò wó gyó ri. ¹⁵ Haú hkûn, xângzo byù sum tú mâ é ratú lé sat pyám rà matú, ahkyíng, buinyi, lhôhkyap, zanwut lé, rì rì hen to bê nghut é haú maumang myi yuq lé nhang kat bê nghut ri. ¹⁶ Myang ji jì é gyè jum gi, byù du sen í hkyíng bo é hkyô lé, ngò wó gyô ri.

¹⁷ Ngò, shing-rán myang é má, myang jùm eq haú pé má ji bâng é wànggò-long pé gi, myi su ne é,

* 9:11 Apolion gà é lichyúm gi, lhoq hten lhoq hpyoq sù gà é nghut ri.

shing shing nyui é eq hang su hui é nghut ri. Myáng jum é ulhum gi, hkanghkyí pé é ulhum su dut luí, yhangmoq é nhut mai, myi, myihkau eq hang pé htoq lo ri. ¹⁸ Haú yhangmoq é nhut mai htoq lo é myi, myihkau eq hang gâ é wúm ihkyup sùm júng é yanmai, xângzo byù sum tú ratú gi, sat hui bekô nghut ri. ¹⁹ Myang haú jum é sho-myi gi, lhangmui su dut luí, ulhum dap mù, hte sê é yanmai, yhangmoq é a-tsam gi, nhut eq sho-myi pé má nghut ri.

²⁰ Wúm ihkyup haú sùm jung mai wó lut luí, myit gyó tô é xângzo byu pé gi, yhangmoq é loq pé èq zui saí é muzó mai, myit a lhung shi kô é htoq agó, nat gâng pé lé le, a wó myâng, a wó gyo, a wó sô é, hîng, ngùn, gyl, luqgok, sik pé é alhô lé le, noqkuq é hkyô lé a tô pyám shi kó nghut ri. ²¹ Hau htoq agó, yhangmoq gi, byù sat é mù mai le, myoqheq hpaqchyí mù mai le, ashop é đông gungsho zùm yap é hkyô mai le, hkaú é mai le, myit a lhung shi kó nghut ri.

10

Maumang Eq Laiká Ding É Hkyô

¹ Hau htàng, ngò gi, wum-o bo é maumang lagyo gotú rayuq, mauhkûng mai gyó lé lo é lé myang é nghut lhê. Yhang lé gi, mhut éq htup yup to luí, yhâng é u htoq má woqgan síng-yang gyân tô ri; yhâng é myoqdong gi, bù su dut luí, yhâng é hkyí gi, myi zîng su dut ri. ² Yhâng é loq má gi, hpông tô é laiká ding zo ralhùm chung tô ri; yhâng é loqyo hkyí gi, wuìshuq lung-aú má nang, yhâng é loqpaí hkyí gi, myigùng htoq má nâng to luí, ³ hkanghkyí mying é htê su ga, htê mó èq garú kat ri. Yhang garu kat jáng, maugum htê nyhit lhum tú gûm kat ri. ⁴ Haú maugum htê nyhit lhum tú gûm kat é hkûn, ngò ká rá da jáng, "Haú maugum htê nyhit lhum tú gûm é hkyô lé záu

pyám aq; haú pé lé hkâkâ to." ga, mauhkûng mai danghtê htoq lo é lé ngò wó gyô kat ri.

⁵ Haú hkûn, wuìshuq lung-aú eq myigùng htoq má nâng yap tô é lé, ngò myang é maumang lagyo haú gi, yhâng é loqyo loq lé mauhkûng shut tu toq kat ri. ⁶ Haú mù, yhang gi, mauhkûng eq haú má nyi é lhunglháng lé le, myidàm htoq eq haú má nyi é lhunglháng lé le, wuìshuq lung-aú eq haú má nyi é lhunglháng lé le, hpan tô é, pyat dedu ahtum abyuq dui nyi Su é mying lé lang luí, dakam é gi, "Ahkyíng ratsuí le, lhoq myáng nyí lo rá a nghut! ⁷ Nghut kôlhàng, Garai Gasang mai Yhâng é dui-nhâng zoshâng wui Nghut é myiqh-toí pé lé taí to bê é danglù eq rajung za, Yhâng é záu tô é hkyô gi, nyhit yuq nghû rá maumang lagyo èq yhâng é tut lé mut myhîng é buinyí pé má, shit rá nghut lhê." gâ ri.

⁸ Hau htoq agó, ngò wó gyô wú bê mauhkûng má é htê, ngo lé dum taí é gi, "Haú wuìshuq lung-aú eq myidàm htoq má nâng yap tô é maumang lagyo loq má hpông tô é laiká ding lé, ê yù aq." gâ ri.

⁹ Haú mù, ngò gi, ê luí, laiká ding zo haú, ngo lé byi rá matú maumang lagyo haú lé ê dung le, yhang gi, "Shí lé yù mù, zo kat aq. Náng é wam má hko rá nghut lhê; nghut kôle, náng é nhut má gi, byo-í su yhang chui rá nghut lhê." gâ ri. ¹⁰ Haú mù, ngò gi, laiká ding zo haú lé, maumang lagyo é loq mai yù mù, zô é nghut lhê; haú hkûn, ngá é nhut má gi, byo-í su yhang chui nghâm ri; nghut kôle, bàn zô kat é hkûn, ngá é wam hkaú má hkô bê nghut ri. ¹¹ Haú hkûn, "Nàng gi, byù myú myo myo eq séng luí le, mingdán myo myo eq séng luí le, myíng ahú hú eq séng luí le, hkohkam pé myo myo eq séng luí le, myiqhtoí dum htoi ra rá nghut lhê." ga, ngo lé taí kyô ri.

11

Saksé Í Yuq É Hkyô

¹ Ké rã jung dumbáng su dut é jãm-yang rahkat ngo lé byi luí, ngo lé tai é gi, "Ê mù, haú Garai Gasâng é noqkuq yhùm lé le, hkungga gyap lé le, kê wú luí, haú má noqkuq é bang lé nghap wú aq. ² Nghut kôlhang, shinggan mã é wâng lé gi, a kê é za لها pyâm to aq; hkâsu mù gâ le, haú gi, tungbaù pé lé byí to bê nghut lhê. Yhangmoq gi, haú chyoyúng myuq lé, lhamó myixe í hkyap tup chôm nang kó rã nghut lhê. ³ Hau htoq agó, ngò gi, ngá é saksé í yuq lé a-tsam byi rã nghut luí, yhangnhik gi, ji mebu wut* mù, buinyi 1260 nyí tup myiqhtoi htoi kó rã nghut lhê." gâ ri. ⁴ Yhangnhik gi, haú myidàm Yhumsing é hí má yuq tô é tsanlun gãm í gãm eq myibung tsungjang í lhum nghut ri. ⁵ Byù rayuq yuq, yhangnhik lé zing-ri nau é nghut jáng, yhangnhik é nhut mai myi htoq lô mù, yhangnhik é gyè pé lé nyhê hkyô pyám rã nghut lhê. Yhangnhik lé kãm zing-ri é sũ gi, haú su kut sat pyâm é hui zo rã nghut lhê. ⁶ Yhangnhik gi, yhangnhik myiqhtoi htoi nyi é buinyi pé má mau a wò rã matú, mauhkúng lé myhí pyám rã a-tsam wó akô; hau htoq agó, wui pé lé sui dut nhâng rã eq, nau é hkûn, wúm ajung júng èq myidàm htoq lé ihkyup hkyô byi rã a-tsam le, wó akô nghut ri.

⁷ Yhangnhik gi, saksé ban hkâm é hkûn, haú nik dik htùm é Lasangdong mai htoq lo é tân jung dusak gi, yhangnhik lé htim mù, ùng luí, sat pyám rã nghut lhê. ⁸ Yhangnhik é mâng lé gi, danglêng dong Sodom eq Egutuq gâ é, yhangnhik é Yhumsing lé le, tapzing má jén sat pyâm é myuq mó é hkyô gùng má, leq to rã nghut lhê. ⁹ Haú hkûn, byù myù hkangmó mã é bang,

byuhú hkangmó mã é bang, myíng hkangmó mã é bang, mingdán hkangmó mã é bang gi, yhangnhik é mâng lé myhup pyám rã matú a gyo kô é za, sum nyí èq rahkyuí tup chôm wú nyí kó rã nghut lhê. ¹⁰ Myidàm htoq má nyi é bang gi, yhangnhik shi byuq é yanmai gabú nguóngón luí, rayuq eq rayuq chyunguq byí lhùm é đông ngón poí kut kó rã nghut lhê. Hkâsu mù gâ le, myiqhtoi haú nhik gi, myidàm htoq má nyi nyi é bang lé, wuihke jamjau byí lai bê su nhik nghut akô.

¹¹ Nghut kôlhang, sum nyí èq rahkyuí tup lai é htàng má, Garai Gasâng chyáng mã é asak soq gi, yhangnhik chyáng wàng mù, yhangnhik gi, toq yap tô kô é nghut luí, yhangnhik lé myang é bang gi, gyai yhang gyuq nán bùm bekô nghut ri. ¹² Haú hkûn, "Shí má doq lò keq." ga, mauhkúng mai yhangnhik lé wut é htê mó lé wó gyo kômù, yhangnhik é gye pé wú tô é u lé, mhut ji mù mauhkúng shut doq lò bekô nghut ri.

¹³ Haú u lé yhang, layàng mó nún lô luí, myuq hkaú raxê tú mã é ratú gi, htên gyop byuq bê nghut ri. Hau htoq agó, byù nyhit hkyíng yuq shi byuq bê nghut luí, myit gyó tô é bang gi, gyai yhang gyuq nán bùm kômù, mauhkúng mã é Garai Gasang lé hkya-on shigyaú bum akô nghut ri.

¹⁴ Í lhum nghú rã dingnyé gi, lai byuq bê nghut ri; sùm lhum nghú rã dingnyé gi, jé rã za nghut bê.

Nyhit Lhum Nghú Rã Tut Mut É Hkyô

¹⁵ Nyhit yuq nghú rã maumang lagyo gi, yhâng é tut mut kat ri; haú hkûn, mauhkúng htoq má htê mó pé htoq lo é gi, "Mingkan htoq mã é mingdán gi, nga-nhùng é Yhumsing eq

* 11:3 Ji mebu wut gâ é gi, iyon yôn é lé gâ lhê.

Yhâng é Hkrisduq é mingdán dut bê nghut lui,

Yhang gi, pyat dedu ahtum abyuq up nyi râ nghut lhê."

gâ ri. ¹⁶ Haú hkûn, yhumsing é hkohkâm-tanghkuq má zùng mù, Garai Gasâng é hí má nyi tô é suwún í xe myi yuq gi, yhangmoq é myoq-dong ngóm gop mù, Garai Gasang lé noqkuq uchyang tái kô é gi,

¹⁷ "Ahkuí pyat, a-nham pyat rû dui nyi é, wum-o a-tsam dik shoq bò Sû Yhumsing Garai Gasang é!

Nâng gi, hpungwup a-tsam mó chùng mù, up nyi bê nghut é yanmai, ngamoq, Nang lé jeju hkya-on lhê.

¹⁸ Byù myû pé gi, nhikjum yo bùm kôluí, Náng é nhikmo-yo hkyô gi, jé bê nghut ri.

Shí bê bang lé, tarâ jéyáng râ eq, Náng é dui-nhâng zoshâng myiqhtoí pé lé le,

Náng é sân-yúng bang lé le, Náng é mying lé gyuq hkunggâ é tiq ko lé le,

shigyaú chyunghuq byi râ eq, myidám htoq lé lhoq hten bang lé lhoq hten râ, ahkyíng gi, jé bê nghut ri."

gâ akô.

¹⁹ Haú hkûn, mauhkûng htoq má, Garai Gasâng é noqkuq yhûm hpông to lui, Yhâng é noqkuq yhúmhaú má, Yhâng é dangshikaq eq sêng é saksé sidek lé byu-myang ri. Haú hkûn jáng, lhap hpyat é, mying hûm é, maugum gûm é, layàng nún é, likwò mó gyó é pé dut htoq lo ri.

12

Myiwe Myhí Eq Manjung É Hkyô

¹ Hau htoq agó, mauhkûng má limik kumhá mó htoq shit é gi: myiwe myhí rayuq gi, bui lé wut chùng mù, lhamó má hkyî ke lui, kyî raxe í cham dap é janmaú

lé, yhâng é ulhum má tsung tô ri. ² Yhang gi, zogûng dut tô é

nghut lui, zo hkû râ matú, zohkû-nò no nyi é yanmai, gyai yang

ngau garû nyi ri. ³ Hau htâng, mauhkûng má gotû kumhá dum

htoq shit é gi: gyai kô é man-

jung nè mó* radu gi, ulhum nyhit

lhum eq hkyuí raxê lhum dap lui,

yhâng é ulhum hkangmó má jan-

maú tsung tô ri. ⁴ Yhâng é sho-myi

gi, mauhkûng mâ é kyí sum tú mâ

é ratú lé shûm tsing yù mù, myidám

htoq má he hpyit hkyô kat ri. Man-

jung haú gi, zoshâng hku htoq kat

eq wó myui hâng kat shoq ga, haú

myiwe myhí é hí má láng yap tô

ri. ⁵ Myiwe myhí haú gi, mingdán

banshoq lé shamtoq dumbáng eq

up râ nghut é yuqzò rayuq lé hkû

bê nghut ri; yhâng é zoshâng lé

gi, Garai Gasâng é hí má le, Yhâng

é hkohkâm-tanghkuq hí má le bún

toq yù bê nghut ri. ⁶ Myiwe myhí

haú gi, yhâng é matú Garai Gasang

lajâng to byí é yoso hkaú má hphang

wang é bê nghut ri; haú jowò má,

yang gi, 1260 nyí tup lhom baú é

hui râ nghut lhê.

⁷ Mauhkûng htoq má majan htoq

bê nghut ri. Mihkaelaq eq yhâng

é maumang lagyô pé gi, manjung

lé majan é zan kôluí, haú manjung

eq yhâng é maumâng pé le, tau

zân akô. ⁸ Nghut kôlháng, yhang-

moq gi, a úng kômù, mauhkûng

mâ é yhangmoq nyi jowò lhoq

hpyuq pyám bekô nghut ri. ⁹ Haú

mingkan gón lé hkyô shuí nghoq

é, natzau eq Tsadán ga é, a-nham

lhê é lhangmui nghut é manjung

mó haú gi, yhâng é maumang pé

eq rahá myidám htoq má dú hkyô

pyâm é hui bê nghut ri.

¹⁰ Haú hkûn, mauhkûng htoq má

htê mó đông tái é lé, ngò wó gyó é

gi,

"Ahkuí gi, nga-nhûng é Garai

* 12:3 Manjung nè mó gâ é gi, Tsadán lé tái nau é nghut lhê.

Gasâng é hkyi yù hkyô,
 hpungwup a-tsam eq
 mingdán le,
 Yhâng é Hkrisduq é ahko
 ahkáng le, jé bê nghut ri.
 Hkâsu mù gâ le, nga-nhùng é Garai
 Gasâng é hí má, nga-nhùng é
 gumang wuì lé,
 nyí, myín mara hun nyi é sù gi,
 dú hkyô pyâm é hui bê nghut
 ri.

11 Yhangmoq gi, haù Sauzô é suí é
 yanmai le, yhangmoq saksé
 hkâm é mungdâng é yanmai
 le,

yhang lé ung pyám bekô nghut luí,
 shi byuq é jé shoq yhumsing
 asak lé a ha kó nghut ri.

12 Haù mù luí, mauhkung eq haù
 má nyi é bang ê, gabú nyí
 keq!

Nghut kôlhang, myidàm htoq eq
 wuìshuq lung-aù gi, dingnyé
 wó ri;

hkâsu mù gâ le, haù natzau gi,
 yhâng é ahkyíng yàm-yoq tot
 za ru joq alô nghut é lé sê é
 yanmai,

nhikmo-yô é eq, nungnhik
 chyáng gyó lé lô bê nghut ri."

gâ ri.

13 Haù manjung gi, myidàm htoq
 má dú hkyô kat huí é lé myàng luí,
 haù yuqzo hku é myiwe myhí lé
 zing-rí ri. 14 Myiwe myhí haù gi,
 lhangmuì chyáng mai wó lut luí,
 yhang é matú lajâng tô é yoso má
 wó dang jé mù, ahkyíng ralhù,
 ahkyíng í lhum, ahkyíng rawuí
 hkup† lhom baù nyi é hui sháng
 gaq ga, zùn mó é dùng í lhum byí
 é huí ri. 15 Haù hkùn, haù lhang-
 muì gi, myiwe myhí haù lé wó lhoq
 myhù pyám shoq ga, myiwe myhí
 é nunghtáng má, yhâng é nhut mai
 wui mó llang í é wui lhoq htoq kat
 ri. 16 Nghut kôlhang, manjung nhut
 mai lhoq htoq kat é wui mó llang

haù lé, myigùng gi, yhâng é nhut há
 mù myui pyám byí é dông, myiwe
 myhí haù lé garúm yu ri. 17 Haù
 mù, manjung haù gi, myiwe myhí
 hau é yanmai, gyai yhang nhikmo-
 yo luí, Garai Gasâng é jep é tarâ lé
 châng é bang eq Yesuq é saksé lé
 myhik zing nyi é bang nghut é, myit
 gyó tô é, myiwe myhí é awut ashín
 pé lé, majan zan râ matú htoq e ri.
 18 Manjung haù gi, wuìshuq lung-aù
 yàm má yap tô ri.

13

*Tân Jung Dusak Radu Wuìshuq
 Lung-aù Mai Htoq Lo É Hkyô*

1 Haù hkùn, haù wuìshuq lung-aù
 mai tân jung dusak radu htoq lo é
 lé, ngò myàng ri. Dusak haù má,
 hkyuì raxê lhum eq ulhum nyhit
 lhum dap to luí, yhâng é hkyuì pé
 má gi, janmaù raxê lhum tsùng to
 mù, ulhum hkangmó má gi, Garaí
 aróng lhoq hpoi é myìng dap tô
 bum ri. 2 Ngò myang é tân jung
 dusak haù gi, bauze-lo su dut ri;
 nghut kôlhang, hkyí gi, wàm hkyí su
 dut luí, nhut gi, hkanghkyí nhut su
 dut ri. Haù manjung gi, yhâng é a-
 tsam eq yhâng é hkohkâm-tanghkuq
 lé le, ahko ahkáng mó lé le, tân
 jung dusak haù lé ap byí ri. 3 Tân
 jung dusak hau é ulhum ralhù
 gi, shí râ í é dàm dap huí é su
 dut kôlhang, damhkô haù gi, yâ ge
 pyám bê nghut luí, mingkan gón
 gi, mauhong byuq kômù, yhâng
 htâng châng bùm bekô nghut ri.
 4 Manjung gi, tân jung dusak lé
 ahko ahkáng ap byí é yanmai, byu
 pé gi, manjung haù lé noqkuq é
 htoq agó, tân jung dusak haù lé le,
 noqkuq kômù, "Ó yuq wá, tân jung
 dusak shí du su dut ri lhu? Ó yuq
 wá, yhang lé wó zan ùng râ lhu?" ga
 bum akô.

† 12:14 Ahkyíng ralhù, ahkyíng í lhum, ahkyíng rawuí hkup gâ é gi, "razàn, í zàn, lhamó hkyuq hkyap" lé gâ é nghut lhê; haù gi, 1260 nyí nghut ri.

⁵ Gyáng dang tái rã eq Garaí aróng lhoq hpoi dang tái rã nhut gi, tân jung dusak haù lé byi to bê nghut é htoq agó, lhamó myí xe í hkyap tup, yhang é ahko ahkáng lé chùng rã ahkáng wó bê nghut ri. ⁶ Yhang gi, yhang nhut hpóng mù, Garaí Gasâng aróng lé lhoq hpoi dang tái é htoq agó, Garaí Gasâng é mying eq nyi jowò lé le, mauhkúng htoq má nyi é bang lé le, lumù gansang é sũ nghut ri. ⁷ Haù sân-yúng bang lé majan zân ung yù rã a-tsam, yhang lé byi bê nghut ri. Hau htoq agó, byuhú hkangmó lé le, byù myú hkangmó lé le, mying hkangmó lé le, mingdán hkangmó lé le, up rã ahkáng, yhang lé byi bê nghut ri. ⁸ Haù sat hui bê Sauzo eq sêng é asak jihpán laiká buk má, mau htoq xâng hkun mai, mying a kã lhôm é, myidàm htoq má nyi é lhunglhang bang gi, haù tân jung dusak lé noqkuq kó rã nghut lhê.

⁹ Gyo rã nohkyap dap sũ gi, gyò yù sháng gaq.

¹⁰ Shúm zung é hui rã sũ gi, shúm zung é hui rã za nghut lhê.

Sham eq sat é hui rã sũ gi, sham eq sat é hui rã za nghut lhê.*

Haù mù, sân-yúng bang gi, hkam jân é hkyô eq lhumzui hkyô bò kó rã nghut lhê.

Tân Jung Dusak Radu Myigùng Mai Htoq Lo É Hkyô

¹¹ Hau htâng, ngò gi, tân jung dusak gotû radu† myigùng mai htoq lo é lé myang ri. Yhang gi, sauzò é hkyuí su dut é hkyuí í lhum yuq ri; nghut kôlháng, yhang gi, manjung su ga dang nyo ri. ¹² Yhang gi, tân jung dusak hí lhê dû é ahko ahkáng lhunglhang lé, haù du é hí má chùng mù, shí rã í é damhkô ge byuq é tân jung dusak haù lé, haù mingkan eq

mingkan htoq má nyi é bang lé noqkuq nhang ri. ¹³ Hau htoq agó, yhang gi, byu pé é myoq hí má, mauhkúng mai myigùng shut myi lé lhang wó lhoq hkyô é, limik kumlhá mó kut shit ri. ¹⁴ Yhang gi, tân jung dusak hí lhê dû é hí má, kumlhá haù pé kut rã ahkáng wó é yanmai, myidàm htoq má nyi é bang lé mhoq hpyoq yù luí, haù sâm damhkô dap kôlháng, dui nyi é tân jung dusak haù lé, hkunggã é dông, yhangmoq lé, yhang é alhò sai nhang ri. ¹⁵ Yhang gi, haù tân jung dusak hí lhê dû é alhò lé, soq wó mut kat byí é a-tsam lé wó yù sũ nghut ri; haù mù, alhò haù gi, dang wó tái luí, yhang lé a noqkuq é bang lé, sat hui nhang ri. ¹⁶ Hau htoq agó, yhang gi, byù mó byù zo, wó sũ myùng sũ, luthkyô wó bang eq jùn pé, yuq hkangmó lé, yhum-sing é loqyo loq má nghut nghut, ngelang má nghut nghut, masat lhò zik tap yù nhang ri. ¹⁷ Haù hkùn, haù tân jung dusak é mying, a nghut jáng, yhang mying é masat námbat dap sũ mai lai luí, úng é, wui é hkyô, ó yuq le wó kut rã a nghut.

¹⁸ Hpaqchyí byéng-yá gi, shí má bo rã ri. Hpaqchyí bò sũ gi, haù tân jung dusak é námbat lé sôn wú sháng gaq; hkâsu mù gã le, haù gi, byù rayuq é námbat nghut lhê. Yhang é námbat gi, 666 nghut ri.

14

Sauzo Eq 144,000 Yuq É Hkyô

¹ Hau htâng, ngò wú kat le, haù Sauzo gi, Zi-un bùm má yap tô é lé myang ri; Yhang mying eq Yhang Wã é mying lé, yhum-sing é ngelang má kã tap tô é byù 144,000 yuq le, Yhang eq rahá yap tô bùm ri. ² Haù hkùn, ngò gi, wui pé mying hùm é htê eq maugum mó gùm é htê su gã é htê, mauhkúng mai htoq lo é lé wó

* **13:10** Chyúmding ra-am má gi, Byù rayuq yuq lé, shúm kut é sũ gi, shúm zung é hui rã nghut lhê. Sham eq byù sat é sũ gi, sham eq sat é hui rã nghut lhê, ga bo tô ri. † **13:11** Tân jung dusak gotû radu gã é shí gi, myiqhtoi pyoq lé gã nau é nghut lhê.

gyô ri. Ngò wó gyô é htê haû gi, tíng bat bang, yhangmoq é tíng lé bat myhíng é htê su gâ ri. ³ Yhangmoq gi, haû hkohkâm-tanghkuq é hí má le, dui é dusak myí du eq suwún wui pê hí má le, mahkôn sik lé hkon akô nghut ri. Haû myidàm htoq mai hkyi yù huí é byù 144,000 yuq mai lai luí, ó yuq le, mahkôn haû lé a wó mhoq sê yù kó nghut ri. ⁴ Haû bang gi, myiwe wui eq gungsho a zum é bang nghut luí, yhangmoq gi, zorâm jet pé nghut bum akô. Yhangmoq gi, haû Sauzo hká shut é le hká shut châng é bang nghut akô. Yhangmoq gi, byu pê chyáng mai wui yu é huí luí, sàng-hi myhíng é ashi lé su, haû Garai Gasang eq Sauzo lé ap byí é huí akô nghut ri. ⁵ Yhangmoq é nhut má, mhaû é hkyô haí le a taí kó; yhangmoq chyáng mara hûn râ hkyô le a bò kó nghut ri.

Maumang Sum Yuq É Hkyô

⁶ Hau htâng, maumang lagyo gotù rayuq gi, maulat má dâng wún é lé ngò myang ri; yhang gi, haû mingkan htoq má nyi é, mingdán hkangmó mâ é bang, byuhú hkangmó mâ é bang, myíng hkangmó mâ é bang, byù myù hkangmó mâ é bang lé, hko kyo râ ahtum abyuq é gabú danglù wó ri. ⁷ Yhang gi, "Garai Gasang, tarâ jéyáng râ ahkyíng jé bê nghut é yanmai, Yhang lé gyuq hkungga luí, Yhâng é hpungwup a-tsam lé shigyau keq. Haû mauhkûng eq myigùng, wuishuq lung-aû eq wuibúm pé hpan tô é Sù lé, noqkuq keq." ga luí, htê mó èq taí ri.

⁸ Í yuq nghû râ maumang lagyo gi, htâng má châng lé mù, "Haû mingdán pé* lhunglhang lé, yhang kut shut é ashop é dông gungsho zùm yap é hkyô, nhik lhoq yô é tsi-byiq wíng shuq nhang é, Babelon

myuq mó gi, lêng gyop bê! Lêng gyop bê!" ga taí ri.

⁹ Sum yuq nghû râ maumang lagyo gi, yhangnhik é htâng má châng lé mù, "Haû tân jung dusak eq yhâng é alhô lé, noqkuq luí, yhumsing é ngelang má nghut nghut, loq má nghut nghut, yhâng é masat lhô lé tap yu é sù, ó yuq nghut kôle, ¹⁰ Garai Gasâng é nhikmo-yo nghu é góm má hut kat tô é, nhik-yô é tsi-byiq wíng jet lé shuq râ nghut lhê. Hau htoq agó, haû chyoiyúng maumang lagyo pê hí má le, Sauzô é hí má le, yhang gi, duq nyi é myi eq hang èq zing-rí é huí zo râ nghut lhê. ¹¹ Yhangmoq zing-ri huí é myihkau gi, pyat dedu ahtum abyuq htoq nyi râ nghut lhê. Haû tân jung dusak eq yhâng é alhô lé, noqkuq é bang eq yhâng myíng é masat lhô tap yù sù é matú gi, nyí, myín, no râ ahkyíng wó râ a nghut." ga luí, htê mó èq taí ri. ¹² Garai Gasâng é jep é tarâ châng luí, Yesuq lé lhumzuí nyi é bang nghut é, sân-yúng bang gi, hkam shirang é hkyô bò râ lhê.

¹³ Hau htâng, "Ahkuí mai gi, haû Yhumsing má shí é sù, hkungsô wó nyi ri nghû kâ to aq." gâ é htê, mauhkûng mai htoq lo é lé, ngò wó gyô ri.

Haû hkûn, haû Woi-nyí gi, "Nghut rô, yhangmoq kut é muzó é akyú gi, yhangmoq htâng châng râ nghut é yanmai, yhangmoq gi, yhumsing zuí ngu é muzó mai myang hkyíng bekô râ nghut lhê." ga taí ri.

Myidàm Htoq Mâ É Kyôshi Shû É Hkyô

¹⁴ Ngò dum wú kat le, mhut hpyû rahtui ngá hí má joq tô é lé myang ri; mhut hpyû htoq haú má Byu Yhangzo su dut é byù rayuq zung tô ri; Yhâng é ulhum má gi, hîng janmaú tsùng to luí, Yhâng é loq má

* 14:8 Mingdán pé gâ é gi, a lumjíng bang lé gâ é nghut lhê.

gi, htoq é zaiyik ralhum chung tô ri.
¹⁵ Haú hkûn, gotû maumang lagyo gi, noqkuq yhûm mai htoq lô mù, "Haú myidàm htoq mâ é kyôshi gi, myhîng zan to bê nghut luí, kyôshu yoq jé bê nghut é yanmai, náng é zaiyik chûng mù, yik shû yù aq." ga, haú mhut htoq má zung tô é Sû lé, htê mó eq taí garû kat ri. ¹⁶ Haú mù, mhut htoq má zung tô é Sû gi, Yhâng é zaiyik lé, myigûng htoq má dú hkyô kat luí, myidàm htoq mâ é kyôshi lé, ban shû yù bê nghut ri.

¹⁷ Maumang lagyo gotû rayuq gi, mauhkûng htoq mâ é noqkuq yhûm mai htoq lo ri; haú yuq le, htoq é zaiyik ralhum chung tô ri.

¹⁸ Haú, myi lé up é maumang lagyo gotû rayuq gi, hkungga gyap mai htoq lô mù, htoq é zaiyik chûng sù lé, "Myidàm htoq mâ é tsibiyiq shi gi, myhîng bê nghut é yanmai, náng é htoq é zaiyik yù mù, tsibiyiq shipaú haú pé lé, yâm tsîng yù aq." ga, htê mó eq taí garû kat ri.

¹⁹ Maumang lagyo haú gi, yhâng é zaiyik lé, myidàm htoq má dú hkyô kat mù, haú mâ é tsibiyiq shi pé lé yâm tsîng yù luí, Garai Gasang nhikmo-yô é tsibiyiq wing pyik jang mó má hut kat bê nghut ri. ²⁰ Myuq shinggan mâ é tsibiyiq wing pyik jang haú má, tsibiyiq shi haú pé lé nâng nyhoq luí, tsibiyiq wing pyik jang haú mai suí yui htoq lo é gi, myang lunghtúng myhâng jé shoq jé lô mù, 180 déng† kô we shoq yui lô bê nghut ri.

15

Ló Htâng É Wúm Nyhit Lhum Chung É Maumang Lagyo Nyhit Yuq É Hkyô

¹ Ngò gi, mauhkûng má gotû limik kumlhá joq é lé, dum byu-myang ri; haú gi, wúm nyhit lhum chung é maumang lagyo nyhit yuq nghut ri; wúm haú pé gi, ló htâng

é wúm pé nghut ri; hkâsu mù gê le, Garai Gasang nhikmo-yô é hkyô gi, haú gû mai bàn râ nghut lhê.

² Hau htoq agó, myi eq nyhò tô é myoqjâm wui-nhông su dut é lé le, ngò myang ri; haú tân jung dusak eq yhâng é alhô lé le, yhâng mying é námbat lé le, wó ung pyám bê bang gi, wui-nhông yâm haú má yap tô bum akô; yhangmoq gi, Garai Gasang byí é tíng pé lé chung to kôluí, ³ Garai Gasâng é dui-nhâng zoshâng Mosheq é mahkôn eq haú Sauzô é mahkôn lé hkôn kô é gi,

"Wum-o a-tsam dik shoq bò Sû Yhumsîng Garai Gasang é, Nâng kut é muzó gi, hkik é eq mauho yhang nghut ri.

Pyat pyat zaí zaí é Hkohkâm ê, Náng é hkyô gi, dingmán é eq tengmán é nghut ri.

⁴ Yhumsîng ê, Nâng lé a gyuq a hkungga râ eq Nâng myîng lé a lhoq gyaú râ gi, ó yuq wá nyi râ lúh?

Hkâsu mù gê le, Nâng za chyoiyúng é Sû nghut ri.

Nâng kut é dingmán hkyô gi, tân shit bê nghut é yanmai,

byù myù lhunglhang gi, Náng hí má lé noqkuq kó râ nghut lhê." ⁵ gâ akô nghut ri.

⁵ Hau htâng, ngò wú kat le, mauhkûng má, saksé zúm joq é noqkuq yhûm bóng tô é lé, myang ri. ⁶ Haú wúm nyhit jung chung é maumang lagyo nyhit yuq gi, noqkuq yhûm haú mai htoq lo ri; yhangmoq gi, sân-yúng duqbob é nú nhám mebu wut luí, yhangmoq é wànggàng má hîng hpyihit baíyup tô akô nghut ri. ⁷ Haú hkûn, haú dui é dusak myí du mâ é radu gi, pyat dedu ahtum abyuq dui nyi é

Garai Gasâng é nhikmo-yô hkyô byíng tô é hîng góm nyhit lhum, haú maumang lagyo nyhit yuq lé byí ri. ⁸ Garai Gasâng é hpungwup shingkang eq hpungwup a-tsâm

† 14:20 180 déng gi, Grik pé é stadia 1600 kô bo ri.

é yanmai, haú noqkuq yhûm gi, myihkau bying zan to bê nghut luí, haú maumang lagyo nyhit yuq é wúm nyhit jung za a bàn bàn gi, noqkuq yhûm haú má ó yuq le a wó wâng kó nghut ri.

16

Garai Gasâng É Nhikmo-yo Hkyô Bo É Góm Nyhit Lhum

¹ Hau htâng, maumang lagyo nyhit yuq lé, "Htoq ê mù, haú Garai Gasâng é nhikmo-yo hkyô bo é góm nyhit lhum lé, myigùng htoq má hut hkyô kat keq." ga, noqkuq yhûm mai htê mó èq taí é lé, ngò wó gyô ri.

² Haú hkûn, sâng-hí yuq nghû râ maumang lagyo gi, htoq ê mù, yhâng é góm lé, myigùng htoq má hut hkyô kat jáng, haú tân jung dusak é masat lhô dap é eq yhâng é alhô lé noqkuq é bâng chyáng, achaq achyut é eq hkê-nho dik é, yapjeq ana dap tô bùm bê nghut ri.

³ Í yuq nghû râ maumang lagyo gi, yhâng é góm lé, wuishuq lung-aú má hut hkyô kat ri; haú gi, shî bê byù rayuq é sui su dut byuq é htoq agó, haú má lúng é dui jung lunglhang gi, shî byuq bê nghut ri.

⁴ Sum yuq nghû râ maumang lagyo gi, yhâng é góm lé, wuilàng pé eq wuìbúm pé má hut hkyô kat jáng, haú pé gi, sui dut byuq bê nghut ri. ⁵ Haú hkûn, haú wuì lé upzúng é maumang lagyo taí é lé, ngò wó gyô é gi,

"A-nham pyat le, ahkui pyat le, rû nyí nyí é Choyiyúng Sû ê,
Nàng haú su kut jéyáng bê nghut é yanmai, Nàng gi, tengmán Sû nghut ri;

⁶ hkâsu mù gâ le, yhangmoq gi, Náng é sâ-n-yúng bang eq myiqhtoí pé é sui lé, lhoq htoq pyám bekô nghut luí,

Nàng gi, yhangmoq lé sui shuq nhang é nghut ri; haú gi,

yhangmoq hui zo gíng é hkyô nghut ri."

gâ ri. ⁷ Haú hkûn, haú hkungga gyap mai,

"Nghut rô! Wum-o a-tsam dik shoq bò Sû Yhumsing Garai Gasang ê, Nàng jéyáng é hkyô pé gi, tengmán é eq dingmán é nghut ri."

ga le, taí kat é htê lé, ngò dum wó gyô ri.

⁸ Myi yuq nghû râ maumang lagyo gi, yhâng é góm lé, bui é ahtoq má hut hkyô kat é hkûn, bui gi, byu pé lé myí èq nyhê kyuq râ ahkáng wó bê nghut ri. ⁹ Haú mù, yhangmoq gi, nyé dik é èq nyhê kyuq é hui zo luí, wúm shí pé lé up nyí é Garai Gasâng é mying lé nhing akô; haú-í yhang hpuzo kôlhang, yhangmoq gi, myit le a lhung kó, Garai Gasang lé le a shigyau kó nghut ri.

¹⁰ Ngo yuq nghû râ maumang lagyo gi, yhâng é góm lé, tân jung dusak é hkohkâm-tanghkuq htoq má hut hkyô kat jáng, yhâng é mingdán gi, mauchut tuq dut byuq bê nghut ri. Mingbyú wuì gi, yhumsing é shô lé lhang, ngat tân bùm shoq shî-nò jamjau hui zo kôluí, ¹¹ yhangmoq no hpû é eq jeq é ana dap é yanmai, mauhkung má é Garai Gasang lé nhing akô; haú-í yhang hpuzo kôlhang, yhangmoq gi, yhangmoq kut é hkyô mai myit a lhung shi kó nghut ri.

¹² Hkyuq yuq nghû râ maumang lagyo gi, yhâng é góm lé, Uhprat wuì mó llang má hut hkyô kat jáng, wuilàng haú gi, kân byuq luí, haú buihotoq hkyam má é hkohkam pé, lé lô râ hkyô dong bê nghut ri.

¹³ Haú hkûn, po su dut é, agè ashop é byò sum woi-nyí lé, ngò myang ri; haú pé gi, manjung, tân jung dusak, myiqhtoí pyoq pé é nhut mai htoq lô kô é bang nghut akô. ¹⁴ Woi-nyí haú pé gi, nat gâng pé é woi-nyí nghut luí, limik kumlhá pé kut shit kômù, haú wum-o a-tsam dik shoq

bò Sû Garai Gasâng é buinyì mó má majan zan râ matú, mingkan gón mâ é hkohkam pé lé lhoq tsing yù râ ga, htoq e lô akò nghut ri.

¹⁵ "Wú keq, Ngò gi, hkau sù su jé lé é nghut lhê! Su hí má gungchín a so râ eq hoq hpu hkyô a lhoq htoq shit sháng gaq ga, yhumsing é wutbu wutmè lé, zúng nyí luí, gyíng gyíng kut nyi é sù gi, hkungsô wó nyi ri."*

¹⁶ Haú mù, nat haú bang gi, hkohkam pé lé, Hebre myíng dông Armagedon gâ é jowò má, rahá ji tsing tô akò nghut ri.

¹⁷ Nyhit yuq nghú râ maumang lagyo gi, yhâng é góm lé, maulat má hut hkyô kat ri; haú hkûn, haú noqkuq yhûm mâ é hkohkâm-tanghkuq mai, "Bàn bê!" gâ é htê mó htoq lo ri. ¹⁸ Hau htoq agó, lhap hpyat é, myíng hûm é, maugum gûm é eq layàng mó nún é pé dut htoq lo ri. Myidàm htoq má, xângzo byù lé nyi é hkûn mai, layàng haú su nún é eq haú-í htan é gi, a joq wú shí é nghut lhê. ¹⁹ Haú mù, haú myuq mó gi, sùm hkyam byak goq byuq luí, mingdán pé mâ é myuq pé le, gyop byuq bê nghut ri. Garai Gasang gi, Babelon myuq mó lé le myit bun luí, Yhâng é nhikmo-yô é tsibiyiq wing byíng shoq bo é góm lé shuq nhâng bê nghut ri. ²⁰ Zinlóng hkangmó gi, hpang byuq bê nghut luí, bùm pé le byuq byuq bê nghut ri. ²¹ Haú hkûn, myi xê jói kô laí é likwò mó gi, mauhkûng mai byu pé htoq má wo gyó gyûn ri; likwò wúm gi, gyai yhang wuîhke jamjaû é wúm nghut é yanmai, byu pé gi, Garai Gasang lé nhîng bum akò nghut ri.

17

Shiwa Myhí Mó É Hkyô

¹ Haú góm nyhit lhum chung tô é maumang lagyo nyhit yuq mâ é

rayuq gi, lé lô mù, "Lé aq, haú wui myo myô pé htoq má zung tô é shiwa myhí mó lé dam byi râ hkyô, ngò, nang lé tún shit bá. ² Myidàm htoq mâ é hkohkam pé gi, yhang eq rahá ashop é dông gungsho zùm yap é hkyô kut shut kôluí, myidàm htoq má nyi é bang gi, yhang kut shut é myiwe yuqgè nyi zô lhum hkyo é tsibiyiq wing lé shuq wut bùm bekò nghut ri." ga luí, ngo lé tai ri.

³ Haú mù, maumang lagyo haú gi, Woi-nyí má, ngo lé yoso shut shuí wang e ló ri. Haú ulhum nyhit lhum eq hkyuî raxê lhum dap luí, tai hpoi é myíng kôm dap tô é, zam zam ne é tân jung dusak htoq má zung tô é myiwe myhí rayuq lé, ngò myang ri. ⁴ Myiwe myhí haú gi, me me dut é eq zam zam ne é mebu wut luí, hîng, lungsêng, palhé pé èq mhôn chung ri; yhâng é loq má gi, yhâng é myiwe yuqgè nyi zô lhum hkyo é agot a-û hkyô eq achayut é zè pé byíng tô é hîng góm ralhum chung tô ri.

⁵ NIK DIK É HKYÔ, MYIDÀM HTOQ MÂ É ACHAQ ACHYUT HKYÔ PÉ EQ SHIWA MYHÍ PÉ É YHÂNGNU, BABELON MYUQ MÓ.

gâ é myíng gi, yhâng é ngelang má kê tap tô ri. ⁶ Myiwe myhí haú gi, sân-yúng bâng é sui eq Yesuq é saksé hkám bâng é sui shuq wut tô é lé, ngò myang ri.

Haú mù, ngò gi, gyai yhang maú byuq é nghut lhê. ⁷ Haú hkûn, maumang lagyo haú ngo lé tai é gi, "Nàng, hai mù maú lhê lhu? Myiwe myhí haú eq, yhang jî tô é, ulhum nyhit lhum eq hkyuî raxê lhum dap é tân jung dusak é záu tô é hkyô lé, ngò, nàng lé tai kyo râ nghut lhê.

⁸ Nàng myàng é tân jung dusak haú gi, hí hkûn nyi wú bê, ahkuí a nyi lo, nghut kôhang, nik dik htâm é Lasang-dong mai htoq lô mù, htên

* 16:15 Dang shí hkun gi, Yesuq tai é dang nghut lhê.

byoq é hui râ nghut lhê. Mau htoq xâng hkun mai, asak jihpán laiká buk má myíng a kâ tô é, myidàm htoq má nyi é bang gi, tân jung dusak haû lé myàng kô é hkûn, maû byuq bùm kó râ nghut lhê. Hkâsu mù gâ le, haû gi, nyi wú bê, ahkuí a nyi lo, nghut kôlhang, dum lé râ nghut é yanmai nghut ri.

⁹ Hpaqchyí byéng-yá bo é nyan gi, shí má râ ri. Haû ulhum nyhit lhum gi, myiwe myhí zung é bùm nyhit lhum nghut ri; hau htoq agó, hkohkâm nyhit yuq le nghut ri. ¹⁰ Ngo yuq gi, byit gyó byuq bê; rayuq gi, ahkuí nyi to ashî; myit tô é rayuq gi, a jé lé shi nghut ri; haû yuq jé lé é hkûn, yhang gi, ahkyíng razup zo za wó nyi râ nghut lhê. ¹¹ Hí hkûn nyi wú bê, ahkuí a nyi lo dut é tân jung dusak haû gi, shit yuq nghú râ hkohkâm nghut ri. Yhang gi, haû nyhit yuq eq sêng é yanmai, yhâng é htên byoq hkyô shut e ló râ nghut lhê.

¹² Haû nàng myàng é hkyuí raxê lhum gi, mingdán a myang yù shí é hkohkâm raxê yuq nghut ri; nghut kôlhang, yhangmoq gi, haû tân jung dusak eq rahá za, hkyíng hkum rahkum kô hkohkâm ayá lé wó yú kó râ nghut lhê. ¹³ Yhangmoq gi, myit myoqbyú hkyô ralhum za nghut kômù, yhangmoq é a-tsam eq ahko ahkáng lé, haû tân jung dusak lé byi kó râ nghut lhê. ¹⁴ Yhangmoq gi, haû Sauzo lé ma-jan chôm zan kó râ nghut lhê; nghut kôlhang, Sauzo haû gi, yhum-sing pé é Yhumsing eq hkohkam pé é Hkohkâm nghut é yanmai, yhangmoq lé ung pyám râ nghut lhê. Haû Sauzo eq rahá nghut é bang gi, ji yù huí é bang, hkyin yù huí é bang eq lhumzuí é bang nghut akô." gâ ri.

¹⁵ Hau htâng, maumang lagyo haû ngo lé dum taí é gi, "Nàng myang é, shiwa myhí zung tô é wui pé gi, byù myú pé, byù ajùm ayò pé, mingdán pé eq myíng lhumjup

nghut ri. ¹⁶ Haû nàng myang é tân jung dusak eq hkyuí raxê lhum gi, shiwa myhí haû lé a jú kut kó râ nghut luí, yhâng é sutzè banshoq shang yu pyám byi mù, mebu lhang a dap loshoq achîndum kut to kó râ nghut lhê; hau htoq agó, yhâng é sho lé zo luí, myí eq nyhê hkyô pyám kó râ nghut lhê. ¹⁷ Hkâsu mù gâ le, Garai Gasang gi, haû bang mai, i-myit rahkat zâ èq, yhumsing é a-tsam, haû tân jung dusak lé byi râ myit, yhangmoq lé kat byi Sû nghut ri. Haû mù, yhangmoq gi, Garai Gasang é mungdang lhoq dik é hkûn jé shoq, haû su kut kó râ nghut lhê. ¹⁸ Nàng myang é myiwe myhí haû gi, myidàm htoq mâ é hkohkam pé lé up zô é myuq mó nghut ri." gâ ri.

18

Babelon Lêng Gyop É Hkyô

¹ Hau htâng, maumang lagyo gotú rayuq mauhkûng mai gyó lo é lé, ngò myang ri. Yhang gi, ahko ahkáng mó wó é nghut luí, haû myidàm htoq lé, yhâng é hpung-wup èq duqbó to byí ri. ² Yhang, htê mó o mó èq garú taí kat é gi,

"Babelon myuq mó gi, lêng gyop bê, lêng gyop bê!

Myuq haû gi, nat gâng pé é yhùm eq agè ashop é nat hkangmó é hkyûng dut byuq é htoq agó, a sansêng é eq achaq achyut é nghoq pé nyi é sùt dut byuq bê nghut ri.

³ Hkâsu mù gâ le, haû byù myú lhunglhang gi, yhang kut shut é ashop é dông gungsho zùm yap é hkyô é nhik lhoq yô é tsibiyiq wing shuq wut bùm bekô nghut ri.

Haû myidàm htoq mâ é hkohkam pé gi, yhang eq myi shut làng shut hkyô kut bekô nghut é htoq agó,

myidàm htoq mâ é hpugá wuiloq gá bang gi, yhâng é ladu

lai shoq ngón kún é hkyo é yanmai, sutzè wó bôm bekô nghut ri."

gâ ri.

⁴ Hau htâng, mauhkûng mai htoq lo é htê gotû lé ngò dum wó gyô é gi, "Ngá é byu pé ê, myuq hau é mara pé má nungmoq a bo lòm râ matú le,

yhâng é wúm pé lé nungmoq a hui zo kó râ matú le, haû mai hân hfang htoq lò keq;

⁵ hkâsu mù gâ le, yhâng é mara gi, mauhkûng htung shoq bum zang to bê nghut luí,

Garai Gasang gi, Yhâng é a dingmán é hkyô lé myit bun bê nghut ri.

⁶ Yhang kut byí é eq rajung za, yhang lé tau kut byi keq; Yhang kut bê muzó eq rajung za, yhang lé í tú taû kut keq.

Yhang nyhó byí é góm má, í tú taû nyhó byi keq.

⁷ Yhang gi, yhumsing gùng lé yhumsing lhoq gyaú yû luí, ladu lai shoq ngón kún nhang é í,

wuîhke jamjau hkyô eq iyon hkyô myo myo, yhang lé taû byi keq.

Hkâsu mù gâ le, yhang gi, yhâng é myit má,

'Ngò gi, hkohkâm myhí nghut lhê; ngò gi, chuimó a nghut; hkâ-nhám le iyon hui râ a nghut.' ga gumrong nyi ri.

⁸ Haû mù luí, yhâng é wúm nghu é shí hkyô, iyon hkyô eq mutmó gyó hkyô gi,

ra-nyí bui má za, yhâng chyáng jé râ nghut lhê.

Hau htoq agó, yhang gi, myí èq nyhê hkyô pyâm é lé hui râ nghut lhê;

hkâsu mù gâ le, yhang lé jéyáng é, haû Yhumsing Garai Gasang gi, wum-o a-tsam bò Sú nghut ri.

⁹ Haû yhang eq rahá myiwe yuggè nyí zô lhum hkyô kut shut é eq yhâng é ladu lai shoq ngón kún hkyô má bo lom é, haû myidàm htoq mâ é hkohkam pé gi, yhang lé nyhê hkyô é myihkau lé myàng kôjáng, ngaubyi ngau-nhap eq iyon yôn é huí bùm kó râ nghut lhê. ¹⁰ Yhangmoq gi, yhang no jamjaû nyi é lé wú gyuq kôluí, we we má yap to kômù,

'Hkik é myuq mó, a-tsam bo é Babelon gi, dingnyé wó ri-nhung!

Dingnyé wó ri-nhung! Hkyíng hkum ralhum má za, dam byí é hkyô gi, náng chyáng jé bu-nhung!'

ga luí, taí garu kó râ nghut lhê.

¹¹ Myidàm htoq mâ é hpugá byu pé gi, yhang é yanmai, ngaubyi ngau-nhap é eq iyon yôn é huí kó râ nghut lhê; hkâsu mù gâ le, yhangmoq é gai zè lé, ó yuq le a wuî byi lo kô é yanmai nghut ri. ¹² Gai zè haú pé gi, hîng, ngùn, lungsêng eq palhé, nú-nhâm é pán, me me dut é pán, laí hkyíng eq zam zam ne é pán; namngón jung sik ajung jung, maguí zuí lé saí é, gùloq hpaû jung sik lé saí é, gyi lé saí é, shamtoq lé saí é, luq hpyû lé saí é jung ajà ja nghut ri. ¹³ Hau htoq agó, changhpyik gâm, xunmân, namngón jung, mura, loban, tsibiyiq wing, tsanlun xû, mún eq sungô, nojûng eq sau, myang eq myanglhêng pé; byù é gungdu eq asak pé nghut ri.

¹⁴ Yhangmoq gi, 'Nàng myit ô nau nyi é hkyô pé gi, náng chyáng mai gâng ló byuq bê nghut ri. Nàng wó é sùt é hkyô eq hkikhkam é hkyô pé banshoq gi, byuq byuq bê nghut luí, hkâ-nhám le dum wó taû yù râ a nghut.' ga taí kó râ nghut lhê.

¹⁵ Gai zè haú pé lé ung luí, yhâng chyáng mai sutzè wó yu é byù pé gi, yhang hpuzô é jamjau hkyô lé wú gyuq kô é yanmai, we we má yap to kômù, ngaubyi ngau-nhap eq iyon yon uchyang,

16 'Nú-nhâm é pán, me me dut é pán
eq zam zam ne é mebu wut
luí, hîng, lungsêng eq palhé
pé lé
môn tô é myuq mó gi,
dingnyé wó ri-nhung!
Dingnyé wó ri-nhung!

17 Hkýing hkum rahkum má za,
haú-í yhang wó é sutzè pé
htên byoq byuq bu-nhung!
ga taí kó râ nghut lhê.

Wuì-sanghpo agyì yuq hkanmó
eq wuì-sanghpo mai jón wún é bang
banshoq, wuì-sanghpo hkâng bang
eq wuìshuq lung-aú mai wam baú
hkyô wó yu é bang banshoq gi,
we we má yap to kômù, ¹⁸ myuq
haú nyé gyó nyi é myihkau lé
myàng kôjáng, 'Myuq mó shî eq
púng é myuq gi, hkâmá joq shirâ
lhú?' ga taí garu kó râ nghut lhê.
¹⁹ Yhangmoq gi, yhumsing é ul-
hum má hpuilhup kyaq gyun mù,
ngaubyi ngau-nhap eq iyon yon
uchyang,

'Myuq mó gi, dingnyé wó ri-nhung!
Dingnyé wó ri-nhung!

Wuìshuq lung-aú má wuì-sanghpo
pé wó é bang gi, yhâng é
sutzè pé é yanmai, sutzè wó
bum akô.

Nghut kôlhang, hkýing hkum
rahkum má za, htên byoq
hkyô gi, yhâng chyáng jé bu-
nhung!

20 Mauhkûng ê, yhang é yanmai
hkye gabú aq! Sân-yúng
bang, lagyô pé eq myiqhtoi
pé ê, hkye gabú keq!

Hkâsu mù gâ le, yhang, nungmoq
lé kut é eq rajung za, Garai
Gasang gi, yhang lé jéyáng bê
nghut ri.'

ga taí kó râ nghut lhê." gâ ri.

²¹ Hau htâng, wum-o a-tsam mó
bo é maumang lagyo rayuq gi,
luqluí long mó sù é luqgok racham

waq toq yû mù, wuìshuq lung-aú
má dú hkyô kat luí, taí é gi,

"Haú Babelon myuq mó gi, haú su
kut wum kat dú hkyô pyâm
é hui râ nghut luí,
hkâ-nhám le dum myàng râ a
nghut lo.

22 Haú tíng bat é bang, dat gó dat ye
é bang, sampyí mut é bang
eq tut mut é bâng é htê lé,
náng chyáng hkâ-nhám le dum
wó gyo lo râ a nghut.

Loq hpaqchyí ajung jung kûng é
byù lé, náng chyáng hkâ-
nhám le dum myàng lo râ a
nghut.

Luqluí luí é htê lé, náng chyáng hkâ-
nhám le dum wó gyo lo râ a
nghut.

23 Haú myibung duq é myishâm
lé, náng chyáng hkâ-nhám le
dum wó duq lo râ a nghut.

Myisik lusik é htê lé, náng chyáng
hkâ-nhám le dum wó gyo lo
râ a nghut.

Náng é hpugá byû pé gi, mingkân é
byù mó pé nghut ri.

Náng é myoqheq hpaqchyí èq
mingdán banshoq mâ é
bang lé, hkyô shuí nghoq bê
nghut ri.

24 Haú myiqhtoi pé é sui, sân-yúng
bâng é sui eq myidàm htoq
má sat hui bang banshoq é
sui pé gi,

yhâng chyáng chyat byu-
myàng bê nghut ri."

gâ ri.

19

Haleluya!

¹ Hau htâng, mauhkûng htoq má,
byù ajùm ayò garû é htê mó su gâ é
lé, ngò wó gyô é gi,

"Haleluya!*

* 19:1 Haleluya gâ é gi, Hebre myíng dông, "Yhumsing Garai Gasang lé hkya-on kungton lhê" gâ é dang nghut ri.

Hkyi yù hkyô eq hpungwup shing kang, a-tsam gi, nga-nhùng é Garai Gasang eq sêng é nghut lhê.

² Hkâsu mù gà le, Yhang tarâ jéyáng é hkyô gi, tengmán é eq dingmán é yanmai nghut ri.

Yhang gi, myidàm htoq mâ é bang lé, haù yhâng é ashop é đông gungsho zùm yap é hkyo eq mara kut shut nhang é shiwa myhí mó lé, mara byi luí,

Yhâng é dui-nhâng zoshâng wui é sui yuichyîn dam byi bu-nhung ô!"

gâ ri.

³ Dum radàm, yhangmoq taí garu kô é gi,

"Haleluya!

Myuq hau é myihkau gi, pyat dedu ahtum abyuq ru íng doq nyi sháng gaq ô!"

gâ bum akô nghut ri.

⁴ Haù suwún í xe myi yuq eq dui é dusak myí du gi, haù hkohkâm-tanghkuq má zung tô é Garai Gasang lé paí gop luí, noqkuq uchyang, "Amen, Haleluya!"

ga, taí garú bum akô.

⁵ Haù hkûn,

"Garai Gasâng é dui-nhâng zoshâng wui nghut é, yhang lé gyuq hkunggâ é tiq ko banshoq bang é!

Nga-nhùng é Garai Gasang lé, hkya-on kungtôn keq ô."

gâ é htê, haù hkohkâm-tanghkuq mai htoq lo ri.

⁶ Hau htâng, byù ajùm ayo é htê su ga, wui myo myo mying hùm é htê su ga, maugum mó é htê su ga, taí garú é htê lé ngò wó gyô é gi, "Haleluya!

Hkâsu mù gà le, wum-o a-tsam dik shoq bò Sù nga-nhùng é Yhumsing Garai Gasang gi, up nyi ri.

⁷ Nga-nhúng gi, ngón gabú luí, Yhâng é hpungwup

shing kang lé lhoq gyaù sháng ô!

Hkâsu mù gà le, haù Sauzo myiháng poi gi, jé bê nghut luí, Yhâng é myisik gi, ri ri nhôn to bê nghut ri.

⁸ Sân-yúng duq wik nú-nhâm é mebu le, wut râ matú, Yhang lé byí to bê nghut ri."

gâ ri. (Nú-nhâm é mebu haù gi, sân-yúng bang kut é dingmán é muzó nghut ri.)

⁹ Hau htâng, maumang lagyo gi, ngo lé, "'Haù Sauzô é myiháng zoshuq poi má ji yu é hui bang gi, hkungsô wó nyi ri.' nghû ká aq." ga taí luí, "Dang shí pé gi, Garai Gasâng é tengmán mung-dang yhang nghut lhê." ga xoq taí ri.

¹⁰ Haù hkûn, ngò gi, yhang lé no-qkuq râ nghû, yhâng é hkyí wang má paí gop kat é nghut lhê. Nghut kôlhang, yhang gi, "Haù su hkâkut! Ngò gi, nàng eq haù Yesuq é saksé lé hkâm é nàng gumang wui eq rahá, byinzùm dui-nhâng zoshâng ru nghut lhê. Garai Gasang lé no-qkuq aq! Hkâsu mù gà le, Yesuq é hkyô lé saksé hkâm é gi, myiqttoi htoí é Woi-nyí é myit đông nghut ri." ga, ngò lé taí hkûm ri.

Myang Hpyû Jí To Su É Hkyô

¹¹ Hau htâng, ngò gi, mauhkûng bóng tô é lé le, ngá é myoq hí má myang hpyû radu nyi tô é lé le, myang ri. Myang hpyû haù má jí tô é gi, Lhumzui eq Tengmán gâ é Sù nghut ri. Yhang gi, tengmán é đông tarâ jéyáng luí, majan zan Sù nghut ri. ¹² Yhâng é myoqjí gi, myishâm su dut mù, Yhâng é ulhum má gi, janmaú myo myo tsùng tô ri. Yhang mai lai luí, ó yuq le a bo sê é mying, Yhâng chyáng kâ tap tô ri. ¹³ Yhang gi, sui má jum yù bê nghut é buhíng radung wut to luí, Yhâng é mying gi, Garai Gasâng é mungdang gâ ri. ¹⁴ Haù mauhkûng gyè pé gi, hpyu é eq sanséng nú-nhâm é mebu

wut mù, myang hpyù ji kôluí, Yhâng htâng má châng bum akô nghut ri. ¹⁵ Byù myû háu pé lé zan rá matú, htoq é shâm gi, Yhâng é nhut mai htoq lo ri. Yhang gi, yhang-moq lé, shamtoq dumbáng èq up rá nghut lhê. Yhang gi, wum-o a-tsam dik shoq bò Sú Garai Gasâng é nhikmo-yô é tsibiyiq shi pyik jang má, yhangmoq lé pyik rá nghut lhê. ¹⁶ Hkohlkâm pé é Hkohlkâm eq yhumsing pé é Yhumsing gâ é mying gi, Yhâng é buhîng eq Yhâng é tangbaú má kê tap tô ri.

¹⁷ Dum, maumang lagyo rayuq gi, bui má yap tô é lé ngò myang ri; yhang gi, maulat mã é ngho-qzô pé banshoq lé, "Lé keq, Garai Gasâng é zoshuq poí mó matú, lé zup zing keq; ¹⁸ háu hkûn, nung-moq gi, hkohlkâm pé é, gyezaú pé é, wum-o a-tsam mó bò bâng é, myang jûm eq ji bâng é gungsho, luthkyô wó bang eq jûn pé é, byù mó byù zo pé lhunglhâng é gungsho pé lé, myàng zo kó rá nghut lhê." ga, htê mó èq wut garú tái ri.

¹⁹ Hau htâng, háu tân jung dusak eq myidàm htoq mã é hkohlkâm eq yhangmoq é gyezô pé gi, háu myang htoq má jî to Sú eq Yhâng é gyezô pé lé, majan zan rá matú chôm zing bum kô é lé, ngò myang ri. ²⁰ Nghut kôlhâng, háu tân jung dusak gi, chyup yu é hui bekô nghut ri; hau htoq agó, háu tân jung dusak é masat lhô lé hkam yù luí, yhâng é alhô lé noqkuq é bang lé, mhaú zo rá matú, tân jung dusak hau é gunglik dông limik kumlhá pé kut shit é myiqhtoi pyoq le, chyup yu é hui bê nghut ri. Yhangnhik gi, hang myi duq nyi é myi nhông má duì gù dú hkyô kat é hui bekô nghut ri. ²¹ Háu myit gyó tô é bang gi, myang gûng má jî to Su é nhut mai htoq lo é sham èq sat pyâm é hui bekô nghut luí, ngoq pé lhunglhâng gi, háu bâng é gungsho lé, gyi gyi dau dau myàng

zô bum bekô nghut ri.

20

Rahkyîng Zàn

¹ Dum, maumang lagyo rayuq gi, nik dik htûm é Lasang-dông é zo-qshi eq joqtoq tui mó lé, yhâng é loq má chûng mù, mauhkûng mai gyó lé lo é lé, ngò myang ri. ² Yhang gi, natzau eq Tsadán nghut é, a-nham lhê é lhangmuì gâ é manjung lé, zanwut rahkyîng lhûng to rá matú, chyup tuí yù bê nghut ri. ³ Háu mù, maumang lagyo háu gi, rahkyîng zàn a bying shî é gyoro má, manjung háu, byù myû pé lé a wó mhaú zo sháng gaq ga, nik dik htûm é Lasang-dong má yhang lé dú hkyô hâng kat luí, zoq myhí to mù, hau é ahtoq má dizik htûng tô ri. Háu rahkyîng zàn lai eq, yhang lé, ra yoq zo hpông htoq kat ra rá nghut lhê.

⁴ Ngò gi, háu tarâ jéyáng rá ahko ahkáng wó é bang zung tô bum é hkohlkâm-tanghkuq pé lé, dum myang ri. Hau htoq agó, háu Yesuq é hkyô lé saksé hkâm é yanmai le, Garai Gasâng é mungdâng é yanmai le, ulhum hpyit hui bâng é sobyô pé lé, ngò myang ri. Háu bang gi, háu tân jung dusak eq yhâng é alhô lé a noqkuq é htoq agó, yhumsing é ngelang eq loq má hau é masat lhô lé a htûng tap yù bâng é sobyo pé nghut ri. Yhang-moq gi, dum dui toq mù, zanwut rahkyîng tup Hkrisduq eq rahá up nyi bekô nghut ri. ⁵ Háu gi, sâng-hí dâm dum dui toq é hkyô nghut ri. (Shi byuq bê myit gyó tô bang gi, rahkyîng zàn háu a bying bying wó dum dui toq kó rá a nghut.) ⁶ Sâng-hí dâm dum dui toq é hkyô má lom é bang gi, hkungsô wó bang eq chyoiyúng bang nghut ri. Í dâm nghû rá shi é hkyô gi, háu bang lé up rá ahkáng wó é a nghut; háu bang gi, Garai Gasang eq Hkrisduq é hkyangjông pé dut rá nghut é

htoq agó, Hkrisduq eq rahá zanwut rahkyîng tup up kó rá nghut lhê.

Tsadán Htên Byoq Huí É Hkyô

⁷ Rahkyîng zàn haù lai jáng, Tsadán gi, htóng mai nhang htoq kat é hui luí, ⁸ majan zan rá matú, myidàm htoq myi chyún má nyi é, Goga eq Magoga gâ é byù myû pé lé mhaù shuí tsîng yù rá ga, htoq ê rá nghut lhê. Byù haù bang gi, wuîshuq lung-aù yàm mâ é semuî myhó myo kó rá nghut lhê. ⁹ Yhangmoq gi, maumyí htunghtáng hkap shoq chôm yán doq lò kômù, haù Garai Gasâng é byu pé nyi é dap nghut é, Garai Gasang chyitdap é myuq lhîngkhyuq má, lé lóm tô bùm bekô. Nghut kôlhang, mauhkûng mai myi gyó lò luí, yhangmoq lé nyhê hkyô pyám bê nghut ri. ¹⁰ Haù tân jung dusak eq myiqhtoi pyoq pé lé dù hkyô kat jang nghut é, hang myi duq nyi é nhông má, yhangmoq lé mhoq hpyoq yu é natzau haù le dù hkyô pyám é hui bê nghut ri. Yhangmoq gi, nyí, myín, pyat dedu ahtum abyuq wuîhke jamjau hui zô nyi kó rá nghut lhê.

Ló Htâng É Tarâ Doqdan Hkyô

¹¹ Hau htâng, hkohkâm-tanghkuq hpyû mó ralhum eq haù má zung tô é Sù lé, ngò myang ri. Haù mauhkûng eq myigùng gi, Yhâng é hí mai hpang ló bê nghut mù, yhangnhik é matú jowò a joq lo nghut ri. ¹² Hau htoq agó, shi byuq bê nghut é, tiq é kô é bang gi, hkohkâm-tanghkuq hí má yap tô bum é eq laiká buk pé hpông é lé, ngò myang ri. Asak jihpán laiká buk gâ é gotú laiká buk le, hpông tô ri. Haù shi byuq bê bang gi, yhumsîng kut é eq rajung za, laiká buk pé má kê tô é đông, tarâ doqdan é hui bùm bekô nghut ri. ¹³ Haù hkûn, wuîshuq lung-aù gi, yhang má lúng tô é, shi byuq bê bang lé ap byi luí, haù shi é hkyô eq Moming

le, yhangnhik chyáng lúng tô é, shi byuq bê bang lé ap byi akô nghut ri; yuq hkangmó gi, yhumsîng kut é eq rajung za tarâ doqdan é hui bekô nghut ri. ¹⁴ Hau htâng, shi é hkyô eq Moming gi, myi nhông má dù hkyô kat é hui bekô nghut ri. Myi nhông haù gi, î dâm nghú rá shi é hkyô nghut lhê. ¹⁵ Asak jihpán laiká buk má, myîng a bo é sù ó yuq nghut kôle, myi nhông haù má dù hkyô kat é hui bekô nghut ri.

21

Yerusalem Asik

¹ Hau htâng, mauhkûng asik eq myigùng asik lé, ngò myang ri; hkâsu mù gâ le, hí lhê é mauhkûng eq myigùng gi, lai ló byuq bê nghut luí, wuîshuq lung-aù le, dum joq rá a nghut lo. ² Haù hkûn, Chyoiyúng Myuq gâ é Yerusalem asik gi, lusik é matú mhôn yúng tô é myisik su, hen lajâng yù luí, Garai Gasâng chyáng mâ é nghut mù, mauhkûng mai gyó lé lo é lé, ngò myang ri. ³ Hau htoq agó, hkohkâm-tanghkuq mai htoq lo é danghtê mó lé, ngò wó gyô é gi, "Ahkuí, Garai Gasâng é nyi jowò gi, xângzo byu pé eq rahá nghut luí, Yhang gi, yhangmoq eq rahá nyi nyi rá nghut lhê. Yhangmoq gi, Yhâng é byu pé dut rá nghut luí, Garai Gasang yhang, yhangmoq eq rahá nyi mù, yhangmoq é Garai Gasang dut rá nghut lhê. ⁴ Garai Gasang gi, yhangmoq é myoq mâ é ngaubyi lhunglhang lé, sut pyám byi rá nghut lhê. Htângnùng má gi, shi-nò hkyô, iyon hkyô, ngaubyi ngau-nhap hkyô eq no hpu hkyô nghú é joq rá a nghut lo; hkâsu mù gâ le, hí lhê é hkyô pé gi, lai ló byuq bê nghut ri." gâ ri.

⁵ Haù hkohkâm-tanghkuq má zung to Sù gi, "Wú aq, jung hkangmó lé, Ngò asik kut nyi bê nghut lhê." ga tái luí, "Shi lé kê to aq, hkâsu mù gâ le, dang shí pé gi,

lungíng é dang eq tengmán é dang nghut lhê." ga taí ri.

⁶ Hau htoq agó, Yhang gi, "Haú pé gi, ban kut bê. Ngò gi, Alhpa eq Omega nghut lhê; Sâng-hi Awang eq Lô Htáng Sû le nghut lhê. Wui shit sù lé gi, ahpau a dúng é za, asak wuibúm mâ é uchyam lé, Ngò byi huq râ nghut lhê. ⁷ Wó ung é sù ó yuq nghut kôle, Garaí é silí wunlí haú pé banshoq lé sítng râ nghut mù, Ngò gi, yhâng é Garaí Gasang dut luí, yhang gi, Ngá zo dut râ nghut lhê. ⁸ Nghut kôlhang, gyuq myit bò bang, a lumjítng bang, achag achyt dut bang, byù sat bang, ashop é dông gungsho zùm yap é hkyô shut é bang, myoqheq hpaqchyí kut é bang, hparà noq é bang eq mhaú bang lhunglhâng é jowò gi, haú hang myi duq nyi é nhông nghut râ nghut lhê. Haú gi, í dâm nghû râ shi é hkyô nghut ri." ga ngo lé taí ri.

⁹ Lô htâng é wúm nyhit jung byíng tô é góm nyhit lhum chung tô é maumang lagyo nyhit yuq mâ é rayuq gi, lé mù, "Lé aq, haú Sauzô é yhangmyi gâ é myisik lé, ngò tún shit rá nghut lhê." ga ngo lé taí ri. ¹⁰ Hau htâng, yhang gi, ngo lé Woi-nyí mai bùm myhâng mó ralhum má shuí jé luí, Garaí Gasâng chyáng mâ é nghut mù, mauhkúng mai gyó lé lo é, haú Choyiyúng Myuq gâ é Yerusalem lé tún shit ri. ¹¹ Myuq haú gi, Garaí Gasâng é hpungwup shíngkang hú é htoq agó, haú maubó gi, hpaú dik é huhpé lungsêng su dut luí, myoqjám su sân-yúng ri. ¹² Myuq xêwâm gi, kô myhang é htoq agó, hkum raxe í lhum hpông tô ri; hkum haú pé má, maumang lagyo raxe í yuq zúng tô ri. Hau htoq agó, Israelaq byù myû raxe í hu é myíng lé, hkum haú pé má kâ tap to bum ri. ¹³ Hkum haú pé gi, buihtoq hkyam shut sùm lhum,

buiwàng hkyam shut sùm lhum, maupyí shut sùm lhum, mautsúng shut sùm lhum kut hpông tô ri. ¹⁴ Myuq xêwâm haú gi, awang raxe í lhum eq hi tô é nghut luí, awang haú pé má, Sauzô é lagyo raxe í yuq é myíng dap tô bum ri.

¹⁵ Haú ngo lé nyo é maumang lagyo gi, myuq lé le, hau é hkum pé lé le, xêwâm pé lé le, ké râ matú, ké é jung hîng jâm-yang ralhum chung tô ri. ¹⁶ Myuq haú gi, myi chyûn dut mâ é nghut luí, hîng hpyang làm hpyang rawuí wuí za dut mâ é nghut ri. Maumang haú gi, myuq lé jâm-yang hau eq ké wú é hkûn, hîng hpyang, làm hpyang, myhâng hpyang banshoq 1400 déng* kô bo ri; ¹⁷ yhang gi, haú byù ké é jung eq wuí é maumang lagyo é ké jung lé chûng mù, myuq xêwâm lé ké wú é hkûn, rasho myí xê myi dúng bo ri. ¹⁸ Myuq xêwâm haú gi, huhpé lungseng eq saí é nghut ri; myuq gi, hîng gyíng eq saí é nghut mù, myoqjám su yhang sân-yúng ri. ¹⁹ Myuq xêwâm haú é awang pé gi, hpau jung lungsêng ajung jûng eq mhôn tô é nghut ri. Sâng-hí lhum gi, huhpé lungseng eq, í lhum nghû râ gi, nila (mauhkúng nyui su dut jung) lungseng eq, sùm lhum nghû râ gi, mahuya (noq é isâm myo jung) lungseng eq, myí lhum nghû râ gi, myaq (huí nyui nyui é jung) lungseng eq, ²⁰ ngo lhum nghû râ gi, nyhaú myoqjí su dut jung lungseng eq, hkyuq lhum nghû râ gi, pate-mya (nè é jung) lungseng eq, nyhit lhum nghû râ gi, huí muí muí é su dut jung lungseng eq, shit lhum nghû râ gi, myek-yoi (wuimau nyui su dut jung) lungseng eq, gaú lhum nghû râ gi, utohpaya (bó huí huí é jung) lungseng eq, raxê lhum nghû râ gi, mahuya nyui lungsêng eq, raxe ralhum nghû râ gi, wakintu (mhan-

* 21:16 1400 déng gi, Grik pé é stadia 12000 kô nghut ri.

haq nyùi eq mauhkûng nyùi nyhô tô é su dut é jung) lungsêng eq, raxe í lhum nghû râ gi, (me me dut é jung) htihtu-nila lungsêng eq mhôn tô ri. ²¹ Haû myuq hkum raxe í lhum gi, palhé raxe í cham nghut ri; hkum ralhum gi, palhé rachâm eq saí é nghut ri. Haû myuq é hkyô mó gi, hîng jet eq saí é nghut lui, myoqjâm su duq san é hkyô nghut ri.

²² Ngò gi, myuq haû má noqkuq yhûm joq é lé a myàng, hkâsu mù gâ le, haû wum-o a-tsam dik shoq bò Sû Yhumsîng Garai Gasang eq Sauzo gi, myuq hau é noqkuq yhûm nghut nyi é yanmai nghut ri.

²³ Haû Garai Gasâng é hpungwup shingkang gi, myuq haû má duqbó byí é htoq agó, Sauzo gi, myuq hau é myibung nghut é yanmai, myuq haû má gi, bui eq lhamó tsô byi a ra nghut ri. ²⁴ Haû byù myû pé gi, myuq haû duqbó é hkaû má hkyô wó so kó râ nghut lhê; haû myidâm htoq mâ é hkohkam pê gi, yhangmoq é hkikhkâm hkyô lé, myuq haû má yù lé kó râ nghut lhê. ²⁵ Myuq haû má gi, myín nghû é a joq é yanmai, myuq hkum myhî é le joq râ a nghut lo. ²⁶ Haû byù myû pé é hpungwup shingkang eq aróng lé, myuq haû má yu lé kó râ nghut lhê. ²⁷ Myuq haû má, a sansêng é hkyô haí le wó wàng râ a nghut é htoq agó, hoq hpu hkyô eq mhaû zô é hkyô kut é sù ó yuq le wó wàng râ a nghut; haû Sauzô é asak jihpán laiká buk má myìng bo é bang za wó wàng râ nghut lhê.

22

Asak Wuì Mó Lâng

¹ Hau htâng, Garai Gasang eq Sauzô é hkohkâm-tanghkuq mai yui htoq lô lui, myuq hkaû má é hkyô mó gûng đông yui ló é, myoqjâm su sân-yûng é asak wuì mó lâng lé, maumang lagyo haû, ngo lé tân shit

ri. ² Wuilàng í hpoq é má, ashi raxe í myû zuí é asak shigâm yuq tô é nghut lui, lhohkyap hkangmó ashi zuí ri. Hau htoq agó, shigâm haû pé mâ é ahaq pé gi, byù myû pé lé yâ gè râ matú nghut ri. ³ Nhîng é haí le a joq lo râ nghut lhê. Garai Gasang eq Sauzô é hkohkâm-tanghkuq gi, myuq hkaû haû má joq nyi râ nghut mù, Yhâng é dui-nhâng zoshâng wuì gi, Yhang lé noqkuq dojaú kó râ nghut lhê. ⁴ Yhangmoq gi, Yhâng é myoqdong lé myàng kó râ nghut é htoq agó, yhangmoq é ngelang má, Yhâng é myìng kê tap é hui kó râ nghut lhê. ⁵ Myín nghû é le joq râ a nghut lo. Myibung duqbó byí é le, bui tsô byí é le, yhangmoq ra kó râ a nghut lo, hkâsu mù gâ le, haû Yhumsîng Garai Gasang gi, yhangmoq lé duqbó byí nyi râ nghut lhê. Hau htoq agó, yhangmoq gi, pyat dedu ahtum abyuq up nyi kó râ nghut lhê.

⁶ Maumang haû gi, ngo lé, "Dang shí pé gi, lumgíng é dang eq tengmán é dang nghut lhê. Myiqhtoí pé é woi-nyi lé up é Yhumsîng Garai Gasang gi, adé myáng má dut lò râ hkyô pé lé, Yhâng é dui-nhâng zoshâng wuì lé tân shit râ matú, Yhâng é maumang lagyo lé nhang kat é nghut ri." ga tai ri.

Yesuq Jé Lé Lô Râ Hkyô

⁷ "Wú keq, Ngò gi, a myáng má jé lé lô râ nghut lhê! Laiká shí má bo é myiqhtoí dang pé lé châng kut é sù gi, hkungsô wó nyi ri."* gâ é lé, ngò wó gyô ri.

⁸ Haû hkyô pé lé wó myâng wó gyô é sù gi, ngò Yohan nghut lhê. Ngò gi, haû hkyô pé lé wó myâng wó gyô é hkûn, ngo lé, shí hkyô pé tân shit é maumang lagyo é hkyî wang má noqkuq râ matú paí gop é nghut lhê. ⁹ Nghut kôhang,

* 22:7 Dang shí hkun gi, Yesuq tai é nghut lhê.

yhang gi, ngo lé, "Haû su hkâkut! Ngò gi, nàng eq le, náng é gumang myiqhtoí pé eq le, laiká shî mâ é mungdang pé lé châng kut é lhunglhang bang eq le rahá, byinzùm dui-nhâng zoshâng ru nghut lhê. Garai Gasang lé noqkuq aq!" ga taí ri.

¹⁰ Hau htâng, yhang gi, "Laiká shî má bo é myiqhtoí dang pé lé, hkâzaú to lo, hkâsu mù gâ le, haû ahkyíng gi, chyâng lò bê nghut ri. ¹¹ A dingmán é sù gi, a dingmán é đông xoq kut nyí sháng gaq; a sansêng é sù gi, a sansêng é đông xoq dut nyí sháng gaq; dingmán é sù gi, dingmán é đông xoq kut nyí sháng gaq; chyoyíung é sù gi, xoq chyoyíung nyí sháng gaq." ga ngo lé taí kyô ri.

¹² "Wú keq, ngò gi, a myáng má jé lé lô rà nghut lhê! Ngò gi, yuq hkangmó lé, yhumsíng kut é eq rajung za byi rà shigyaú chyunghuq chung tô lhê. ¹³ Ngò gi, Alhpa eq Omega nghut lhê, Sâng-hi eq Jihâm nghut lhê, Sâng-hi Awang eq Lô Htáng Sù le nghut lhê.

¹⁴ Asak shigâm má jé rà eq myuq hkaû shut hkúmdong mai wó wang jé rà ahkáng wó yù shoq, yhumsíng é buhíng lé chî sân é bang gi, hkungsô wó nyi ri. ¹⁵ Shinggan má gi, hkui đông nyi é bang, myoqheq hpaqchyí kut é bang, ashop é đông gungsho zùm yap é hkyô shut é bang, byù sat é bang, hparà noq

é bang eq mhaû é hkyô lé ô nàu luí châng kut é bang lhunglhang nyi bum akò nghut ri.

¹⁶ Ngò, Yesuq gi, haû noqkuq hpúng pé lé, shí hkyô pé saksé hkâm shit sháng gaq nghû, Ngá é maumang lagyo lé, nungmoq chyáng nhang kat bê nghut lhê. Ngò gi, Dawiq é Amyit eq Awut Ashín le, haû duqbó é Bó-myhû le nghut lhê."† gâ é lé, ngò wó gyô ri.

¹⁷ Haû Woi-nyí eq myisik gi, "Lé aq!" gâ akò. Haû wó gyô é sù gi, "Lé aq!" ga sháng gaq. Wui shit sù ó yuq nghut kôle, lé sháng gaq; shuq nau é sù ó yuq nghut kôle, ahpau byi a ra é asak wui lé, shuq sháng gaq.

¹⁸ Laiká shî má bo é myiqhtoí dang pé lé wó gyô é bang yuq hkangmó lé, ngò sidiq byí é gi: dang haû pé má, rajung jung kat jat é sù ó yuq chyáng nghut kôle, Garai Gasang gi, laiká shî má kê tô é wúm pé lé jé nhâng rà nghut lhê. ¹⁹ Myiqhtoí laiká shî má bo é dang pé lé, yu pyâm é sù ó yuq lé nghut kôle, Garai Gasang gi, laiká shî má kê tô é asak shigâm eq chyoyíung myuq mâ é yhang eq sêng é gû lé, yu pyâm byi rà nghut lhê.

²⁰ Shí hkyô pé lé saksé hkâm byí é Sù gi, "Nghut bê, Ngò gi, a myáng má jé lé lô rà nghut lhê." ga taí ri.

Amen. Yhumsíng Yesuq ê, lé lô aq ô!

²¹ Haû Yhumsíng Yesuq é jeju gi, Garai Gasâng é byu pé chyáng joq nyí sháng gaq ô! Amen.

† 22:16 Dang shí hkun gi, Yesuq taí é nghut lhê.